


Tti jian joajné
Jesucristo



New Testament in Popoloca, San Marcos Tlacoalco

Tti jian joajné Jesucristo

New Testament in Popoloca, San Marcos Tlacoalco

copyright © 1982 Wycliffe Bible Translators, Inc.

Language: San Marcos Tlacoalco Popoloca (Popoloca, San Marcos Tlacoalco)

Translation by: Wycliffe Bible Translators, Inc.

Popoloca, Tlacoalco [pls], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Marcos Tlacoalco

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files dated 29 Jan 2022
a23ba35e-b016-5f67-a705-694e460cf18a

Contents

SAN MATEO	1
SAN MARCOS	71
SAN LUCAS	114
SAN JUAN	186
LOS HECHOS	239
ROMANOS	304
1 CORINTIOS	334
2 CORINTIOS	362
GÁLATAS	382
EFESIOS	393
FILIPENSES	404
COLOSENSES	411
1 TESALONICENSES	418
2 TESALONICENSES	424
1 TIMOTEO	427
2 TIMOTEO	435
TITO	441
FILEMÓN	445
HEBREOS	447
SANTIAGO	469
1 PEDRO	477
2 PEDRO	486
1 JUAN	491
2 JUAN	498
3 JUAN	499
JUDAS	501
APOCALIPSIS	504

Tti Jian Joajné Jesucristo Que Dicjin Mateo

Cain nixançhen de ixin Jesucristo (Lc. 3.23-38)

¹ Jihi ná lista de cain nixançhen de ixin Jesucristo. Jehe Jesucristo joixin de ngain razé chojni David co de Abraham.

² Abraham cjoí ndodé Isaac, co Isaac cjoí ndodé Jacob, co Jacob cjoí ndodé Judá conixin cainxin xanchó Judá.

³ Judá cjoí ndodé Fares co Zara, co janné na cjoí Tamar. Fares cjoí ndodé Esrom, co Esrom cjoí ndodé Aram.

⁴ Aram cjoí ndodé Aminadab, co Aminadab cjoí ndodé Naasón, co Naasón cjoí ndodé Salmón.

⁵ Salmón cjoí ndodé Booz co janné Booz cjoí Rahab. Booz cjoí ndodé Obed co janné Obed cjoí Rut. Obed cjoí ndodé Isaí.

⁶ Isaí cjoí ndodé rey David, co rey David cjoí ndodé Salomón, co janné Salomón icha saho cjoí jan nçhichihí ná tattíta que vinhi Urías.

⁷ Salomón cjoí ndodé Roboam, co Roboam cjoí ndodé Abías, co Abías cjoí ndodé Asa.

⁸ Asa cjoí ndodé Josafat, co Josafat cjoí ndodé Joram, co Joram cjoí ndodé Uzías.

⁹ Uzías cjoí ndodé Jotam, co Jotam cjoí ndodé Acáz, co Acáz cjoí ndodé Ezequías.

¹⁰ Ezequías cjoí ndodé Manasés, co Manasés cjoí ndodé Amón, co Amón cjoí ndodé Josías.

¹¹ Josías cjoí ndodé Jeconías conixin cainxin xanchó Jeconías. Co ngain tiempo mé chojni Babilonia savicao cain chojni Israel para ngain nonttehe Babilonia de esclavo.

¹² Después de mé Jeconías cjoí ndodé Salatiel, co Salatiel cjoí ndodé Zorobabel.

¹³ Zorobabel cjoí ndodé Abiud, co Abiud cjoí ndodé Eliaquim, co Eliaquim cjoí ndodé Azor.

¹⁴ Azor cjoí ndodé Sadoc, co Sadoc cjoí ndodé Aquim, co Aquim cjoí ndodé Eliud.

¹⁵ Eliud cjoí ndodé Eleazar, co Eleazar cjoí ndodé Matán, co Matán cjoí ndodé Jacob.

¹⁶ Jacob cjoí ndodé José tti cjoí xixihi María, co María cjoí janné Jesús, que dinhi Cristo, tti Dios rroanha.

¹⁷ Jañá cjoí catorce ndodaha desde Abraham hasta rey David co de rey David icatorce ndodaha hasta are chojni Israel cjoí na ngain Babilonia de esclavo, co iná catorce ndodaha de are mé hasta are concjhi Cristo.

Are concjhi Jesucristo (Lc. 2.1-7)

¹⁸ Janhi conhe para concjhi Jesucristo: janné Jesús, María, ovechonda compromiso ngain José para rrocottehe. Co saho de rroquintecao chó na, María oveyá chjan de ixin joachaxín Espíritu Santo.

¹⁹ José, tti joigoan xixihi María, cjoí ná xí jian de ngain Dios, co jehe joinaoha coequin chjni de ixin María. Jehe ijoinaoha rroquecao María.

Mexinxin jehe xaxaon que irrocjanha ngain María. Jehe joinaoha conohe icha chojni que ixin jehe na ijeha novio na, mexinxin jehe xaxaon jañá.

²⁰ Co are José jixaxaon jañá, ná ángel de Dios joí ngain cottachin are tajjioa José co ángel mé ndacho:

—José, jaha tti razé David, xañha que ixin María soan çhiha, ixin chjan que jehe rrochonda joixin xan de ngain Espíritu Santo.

²¹ Jehe sincheconcijhi ná xanxí, co jaha sinchequinhi xan JESÚS. Sinhi xan jañá ixin jehe xan tsjenga xan hna cainxin tti jianha que nchehe chojni xan.

²² Cain yá conhe para que joiconhe tti dindaçho Dios ngain profeta que nichja:

²³ Ná xannhí que xa xonhi xí catte, xan mé xan seyá chjan, co are tsoncijihi chjan mé, sinhi xan Emanuel, co mé rroçho: Dios jí ngayá na.

²⁴ Are José xingamehe de cottachin, jehe joinchehe inchin coetonha ángel de Dios co vayé María para çhihi.

²⁵ Pero vintteha na junto hasta que María joincheconcijhi xenhe que veyá. Co joinchequinhi xan JESÚS.

2

Are tti ní xí sabio joitsjehe Jesús

¹ Jesús concjixin ngain rajna Belén, ngain nonttehe Judea are Herodes vehe rey ngain nontte mé. De ngain iná nontte icha oriente vinttequixin ní xí para ngain ciudad de Jerusalén. Co canio xí mé de ixin conotse vagatsoanxin xa de ixin quehe siconhe ngataha nontte,

² co nntiha joanchiangui xa:

—¿Quettinó jí tti rey de chojni judío que oconcijhi? Janha na desde ngain lado oriente viconxin na conotse rey mé, co jai janha na joihi na nntihi para sinttasayá na rey mé.

³ Are rey Herodes conohe jiji, jehe veva contento, jehe conixin cain chojni que te ngain Jerusalén.

⁴ Cottimeja jehe rey Herodes vayé cain xidána que vaquetonha ngain icha xidána, co cain ximaestro ley, co jehe rey joanchiangui ngain cain nimé ixin ttinó tsoncjixin Cristo, tti Dios rrorroanha.

⁵ Jehe na vinttendaçho na:

—Ngain rajna Belén ngain nonttehe Judea, ixin profeta dicjin janhi:

⁶ Co jaha, rajna Belén que rrihi ngain nonttehe Judá, jaha tti icha importante de cainxin rajna que ttetonha nntiha, ixin de nganji sachjixin ná xí que tsetonha, co xí mé tti senda chojnina Israel.

⁷ Cottimeja Herodes jimao vayé canio xí que vinttequixin de lado oriente co joanchiangui Herodes ngain xa ixin quexehe nchanho mero xago conotse mé.

⁸ Cottimeja Herodes coetonhe canio xí mé para cjoí xa ngain rajna Belén co ndaço ngain xa:

—Ttji ra nntiha, co danchiangui ra jian ttinó jí chjan yá. Co are osinchí ra xan, nchenona ra para que janha cai tsji sinttasayá xan.

⁹ Conixin tti ndaço rey jiji, canio xí mé savinttecji xa. Co tti conotse que vintteguicon xa de ngain lado oriente jitaon va nntiha dirección de tti tettji xa hasta que tavehe va dirección de ngain lugar tti jí xanxichjan.

10 Are canio xí mé vintteguicon xa conotse mé, anto vintteché xa;

11 co are vintteguixinhi xa nchia tti jí xanxichjan ngain janné xan, María, canio jehe xa vinttetoxin nttajochjihi xa co joinchesayehe xa xanxichjan. Cottimeja vanttjé xa canxion caja que joicao xa para joinchetoen xa xanxichjan oro, co tsjoca, co iná cosa que dinhi mirra, que chojni vanchegonda inchin perfume.

12 Cottimeja canio xí mé vitonhe xa ngain cottathin que ixin irrocjanha xa ngain Herodes, mexinxin ojé nttiha savinttecjanxin xa para ngain nacioen xa.

Are María co José savicao na xanxichjan para Egipto

13 Después de savintteceji jehe tti canio xí que vinttequixin de ngain lado oriente, are tajihoa José, ná ángel de Dios joí ngain cottathin José co ndačo ángel mé:

—Dingattjen co sattingacoho xanxichjan conixin janné xan. Sattji ra para ngain nonttehe Egipto co tadintte ra nttiha hasta que janha rrondattjo ra, ixin Herodes tsjé xanxichjan para nasoexon xan.

14 Cottimeja vingattejen José conixin María para sajoicao na xanxichjan de ttie para Egipto.

15 Nttiha vintte na hasta que ndavenhe Herodes. Jañá conhe para joiconhe tti dindačo Dios ngain profeta, co jehe profeta dicjin: “De ngain nonttehe Egipto vayaxin Xanhna.”

Are coetonha Herodes para venhe cain xanxichjan

16 Are Herodes conohe ixin tti canio xí que vinttequixin de ngain lado oriente icjanha xa ngain inchin jehe coetonhe xa, jehe anto coñao co coetonhe xisoldadoe para nasoexon xa cainxin xanxichjan que vinttechonda de yó nano para nontte que vintte ngain rajna Belén conixin xanvintte ngain icha rajna ngandanji Belén inchin tti tiempo que vinttendačo canio xí que vinttequixin de ngain lado oriente.

17 Jañá joiconhe tti diquentaxin profeta Jeremías:

18 Coinhi ni ná tté chojni de ngain ciudad de Ramá, que tsjanga co ta joachjaon.

Co mé Raquel tti vatsjangaxin xenhe, co vačhoha para que iná chojni rrogantsjehe joachjaon mé ixin cain xenhe ondavintteguenhe xan.

19 Pero después de ndavenhe Herodes, ná ángel de Dios joí ngain cottathin are José tajihoa nttiha ngain Egipto, co ndačo ángel mé ngain José:

20 —Dingattjen co sacjancoho xanxichjan conixin janné xan para ngain nontte Israel ixin ondavintteguenhe tti chojni que joinao narrogoexon xanxichjan.

21 Cottimeja vingattjen José co sajoicao xanxichjan conixin janné xan para ngain nontte Israel.

22 Pero are conohe José ixin Arquelao tti jittetonha ngain Judea en lugar de Herodes, ndodé jehe Arquelao, José xaon para rrocji nttiha. Mexinxin jehe vitonhe ngain cottathin para sacjoí ngain regioen Galilea.

23 Are jehe joihi nttiha, jehe sajoiguehe ngain rajna Nazaret. Jihi conhe para joiconhe tti vinttendačo profeta que Jesús sinhi nazareno.

3

Juan ndache chojni ngagaha jna joajné Dios
(Mr. 1.1-8; Lc. 3.1-9, 15-17; Jn. 1.19-28)

¹ Ngain tiempo mé Juan, tti vancheguitte chojni, jói ngain regioen Judea, ngagaha jna tti jí joxon nchise para vandache chojni de ixin Dios,

² co vandačo ngain na:

—Xo tenchehe ra jianha, incheha ra jamé. Ttentoxinhi ra vidá ra ixin tti tte-tonha Dios ochian jói.

³ Jehe Juan jihi tti diquentaxin profeta Isaías janhi:

Tsinhi na ná tté chojni que tsoyaoxin de ngagaha jna co rrondačo: “Nchechjian ra nntiha para ixin jehe tti chonda cain joachaxin; danttjehe ra ná nntiha nao.”

⁴ Lonttoe Juan diconchjian de xehe cocamello, co cinturoen de roa, co jehe vane ná tipo de coxoali que dinhi langosta, co tsjén cormena que jehe vaquittja ngagaha jna mé.

⁵ Vaquí chojni de ciudad de Jerusalén ngain Juan para vaquinhi na tti vandačo, co vaquí cainxin chojni de ngain nonttehe Judea co cai cain chojni que vintte ngain rajna que vintte chiaon de río Jordán.

⁶ Co are vaquendoenhe ñao na de cain tti jianha que vanchehe na, cotimeja Juan vancheguitte na ngain río Jordán.

⁷ Pero are Juan vicon que atto tsje xifariseo co xisaduceo cjoí xa ngain para rrojiguitte xa cai, jehe ndačo ngain xa:

—Jaha ra razé conché! ¿Quensen jointtanoha ra ixin nchao setanha ra tti castigo anto soji que jitonchian?

⁸ Chonda ra que sinchehe ra jian para que jamé sicon ni claro que jaha ra ocoentoxinhi ra vidá ra,

⁹ co ndacheha chó ra: “Ján na razé Abraham na”; ixin janha rronhattjo ra que hasta xo jihi Dios nchao sinchechjian xo chojni de razé Abraham.

¹⁰ Hacha ojí listo para tsonchinji nttá, co cain nttá que danjoha jian tochjoin rrochinji nttá mé co rroche nnta ngain xohi.

¹¹ Ndoa que jái janha rrinttaguitte jaha ra conixin jinda, co mé jecho ná señal que ixin jaha ra ocoentoxinhi ra vidá ra; pero tti tsí después de janha, jehe sinttaguitte ra conixin Espíritu Santo co Espíritu mé tsiaho inchin xohi para sincheroa almá ra inchin oro toroaxin ngain xohi. Jehe mé chonda icha tsje joachaxin que janha, hasta que janha ni jiquininxinha na ni para tsjiá catté.

¹² Co jehe mé ochonda palé ngá rá para tsjendoaxin trigo para sachjehe trigo paja. Jehe tsenchjinha trigoe ngain nchiandoha, co paja tsjaga ngain ná xohi que xonhi tiempo danga.

Are joiguitte Jesús
(Mr. 1.9-11; Lc. 3.21-22)

¹³ Co Jesús joixin de Galilea para cjoí ngain río Jordán, tti vehe Juan para que Juan joincheguitte Jesús.

¹⁴ Pero Juan čhoha para rrojincheguitte Jesús, co ndačo ngain Jesús:

—Jaha tti jiquininxin sincheguitte na janha; ¿quedonda janha sinttaguitte jaha?

¹⁵ Pero Jesús ndačo:

—Pero jaxon sonttoha na jamé ixin ján na jiquininxin sonttoho na inchin rinao Dios.

Cottimeja Juan vitticaon.

¹⁶ Co are joexin joiguitte Jesús, vachjenguixin de jinda. Co rato mé ngajni xiré, co Jesús vicon Espíritu Santo de Dios que xincanji inchin ná conttoanajni ngataha Jesús.

¹⁷ Cottimeja coinhi na tté Dios de ngajni, que ndačo:

—Jehe jiji tti Xanhna que janha anto rinaho, co de ixin jehe Xan janha anto chahna.

4

Are inchínji joinao rrojincheyehe Jesús

(Mr. 1.12-13; Lc. 4.1-13)

¹ Cottimeja jehe Espíritu mé joicao Jesús para ngagaha jna tti jí joxon nchise para que inchínji rrojincheyehe Jesús.

² Nttiha vehe Jesús cuarenta nchanho co cuarenta ttie, co ngoixin tiempo mé jehe joinaha. Cottimeja jehe venhe jintta.

³ Cottimeja inchínji conchienne ngain Jesús para rrojincheyehe, co ndačo ngain Jesús:

—Si ndoa jaha Xenhe Dios, ttetonha que xo tehe rrocjan xo niottja.

⁴ Pero Jesús ndačo:

—Tti jitaxin Palabré Dios ndačo: “Chojni sinttechonxin na jeoha de tti jine na, sino cai de cain palabra que Dios ndačo.”

⁵ Cottimeja jehe inchínji sajoicao Jesús para ngain ciudad de Jerusalén co nttiha inchínji joinchecani Jesús para ngataha tti nihngo icha importante

⁶ Co nttiha ndačo inchínji ngain Jesús:

—Si ndoa jaha Xenhe Dios, daritsingaxin de nttihi hasta tti nontte, ixin ndačo ngain tti jitaxin Palabré Dios:

Dios tsetonhe ángel de jehe para senda jaha.

Cain ángel mé rrocacha conixin rá

para que xonhi tti tsonihi rottea de ixin xo.

⁷ Jesús ndačo:

—Cai ndačo ngain tti jitaxin Palabré Dios: “Daqueha prueba ngain Dios tti chonda joachaxin para ixin jaha.”

⁸ Cottimeja jehe inchínji sajoicao Jesús para ngataha ná jna anto noi. Co de nttiha cjoagoexin inchínji Jesús cainxin nación que jí ngoixin mundo co cain tti chjoin que jí ngain cain nación mé.

⁹ Co ndačo inchínji ngain Jesús:

—Janha rrochjaha jaha cain yá si jaha sarittoxin nttajochjiha co sinch-esayana janha.

¹⁰ Cottimeja Jesús ndačo ngain inchínji:

—Sattjixin de nganji janha, Satanás, ixin ndačo ngain tti jitaxin Palabré Dios: “Nchesayehe jehó Dios tti chonda joachaxin para ixin jaha, co jehó ngain jehe ditticaon jaha.”

¹¹ Cottimeja inchínji sacjoixin de ngain Jesús, co jói canxion ángel de Dios para joincheatendehe Jesús.

Jesús coexinhi xé ngain Galílea

(Mr. 1.14-15; Lc. 4.14-15)

¹² Are Jesús conohe que Juan jiaxinhi ngain cárcel, jehe sacjoi para nont-tehe Galílea.

¹³ Pero jehe taveha ngain rajna Nazaret, sino que jehe sacjoi joiguehe ngain rajna Capernaum, co mé ná rajna que jí ngandehe lago que dinhi Galilea ngain regioen Zabulón co Neftalí.

¹⁴ Jamé joiconhe tti dindačo profeta Isaías:

¹⁵ Nonttehe Zabulón co nonttehe Neftalí que te ngaca jinda que dinhi Galilea toenixin río Jordán, nonttehe Galilea tti te chojni que jeha judío.

¹⁶ Tti chojni que vintte inchin ngain tti naxin xehe, jai jehe na inchin ná xohi joinchengasañehe na.

Co tti chojni que inchin ondavenhe pero jai cjan xechon na iná.

¹⁷ Desde are mé Jesús coexinhi ndache chojni de ixin Dios. Jehe vandacho ngain ná:

—Ttentoxinhi ra de tti jianha que jaha ra tenchehe ra ixin Dios que ttjen ngajni otoiñ tsetonha nganji ra.

Jesús nichjé nó xí que vatse copescado

(Mr. 1.16-20; Lc. 5.1-11)

¹⁸ Jesús mero jidatto ngandehe lago que dinhi Galilea are jehe vicon yó xí, co cayoi xí mé ichó xa. Ná xa vinhi xa Simón, co cai vinhi xa Pedro, co iná xa vinhi xa Andrés. Co cayoi xí mé vatse xa copescado, co rato mé tetjahngui xa nonchaha jinda.

¹⁹ Jesús ndačo ngain cayoi xí mé:

—Xacoi ra chjin na; jaha ra ttjejo ra copescado pero jai janha sinttacoanha ra quexén tsejo ra chojni para ixin Dios.

²⁰ Co rato mé cointtohe na nonchaha co sajoicao na Jesús.

²¹ Nchion icha ndaha Jesús vicon iyó xí, co cayoi xí mé ichó xa cai. Cayoi xí mé xenhe Zebedeo. Ná xa vinhi xa Jacobo co iná xa vinhi xa Juan. Cayoi xí jiji Tate xa conixin ndodé xa Zebedeo ngá ná barco tatetteyehe na nonchaha. Jesús vayé na,

²² co ngain rato mé cointtohe na ndodé na nntiha ngain barco mé co sarroé na Jesús.

Jesús joinchecoehne tsje chojni de ixin Dios

(Lc. 6.17-19)

²³ Jesús ngaria ngoixin nonttehe Galilea para joinchecoehne chojni de ixin Dios ngain cain nihngo que te nntiha. Jehe ndache na tti jian joajna de ixin quexén ttetonha Dios co jehe vanchexingamehe cain chojni que vinttechonda quexeho chin.

²⁴ Co hasta chojni de ngoixin regioen Siria conohe na tti jian que vanchehe Jesús co joiaho na ngain Jesús cain chojni que vinttechonda quexeho chin; tti vinttechonda dolor ngain cuerpoe, tti vinttechonda espíritu jianha, tti vinttechonda chin denda, co tti čoha vaguinttequingui rióho cuerpoe. Co Jesús joinchexingamehe cain chojni mé.

²⁵ Co ngain tiempo mé tsje chojni de tsje parte rroé na Jesús tti jehe savacj; chojni de Galilea, de ngoi regioen Decápolis, de ngain Jerusalén, de Judea, co de toenixin río Jordán.

¹ Are Jesús vicon anto tsje chojni xatte ngain, jehe coani ngain ná jna para que jehe nchao ndache cain chojni mé de ixin Dios, co are jehe nttiha, cain chojni que vacao vintte na ngandanji jehe.

² Cottimeja jehe coexinhi ndache na janhi:

Quexehe chojni tti chonda čhjoin vida
(Lc. 6.20-23)

³—Anto čhjoin para ixin tti chojni que xaxaon ixin rrogondehe na que Dios tsjenguijna na, ixin chojni mé tequininxin na ngajni tti ttetonha Dios.

⁴'Anto čhjoin para ixin tti chojni que techín de ixin anto tsje cosa jianha jí ngataha nontte jíhi, ixin Dios sincheconsolá chojni mé.

⁵'Anto čhjoin para ixin tti chojni que dintteha orgulloso, ixin jehe na nisayé tti nontte que Dios ndačo sanjo.

⁶'Anto čhjoin para ixin tti chojni que anto rinao sinchehe inchin ttetonha Dios, ixin jehe Dios tsjenguijna chojni mé para sinchehe na jamé.

⁷'Anto čhjoin para ixin tti chojni que ttiaconoehe icha chojni, ixin Dios tsiaconoehe chojni mé.

⁸'Anto čhjoin para ixin tti chojni que ixonhi jianha teca ixin chojni mé sicon na Dios.

⁹'Anto čhjoin para ixin tti chojni que ttjenguijna icha chojni para tsetoha na, ixin Dios sincheguinhí cain chojni mé xenhe jehe Dios.

¹⁰'Anto čhjoin para ixin tti chojni que anto tanguí tonhe ixin jehe na tenchehe na inchin rinao Dios, ixin chojni mé tequininxin na ngajni tti ttetonha Dios.

¹¹'Co anto čhjoin para ixin jaha ra are chojni feo ndattjo ra na, co feo nchehe na nganjí ra, co ndattjo ra na tsje cosa que jaha ndoa para rroningacoanxin ra na ixin jaha ra nichja ra joajnana janha.

¹²Masqui jamé tsonha ra, jaha ra čhjoin tonoha ra co dintte ra contento, ixin jaha ra sayehe ra jie premio ngajni. Ixin cai jańá feo joinchehe chojni ngain cain profeta que joí icha saho que jaha ra.

Chojni que ditticaon Jesús inchin xijntta co inchin joadingasán para ngain mundo jíhi

(Mr. 9.50; Lc. 14.34-35)

¹³'Jaha ra inchin xijntta para ngain chojni ngataha nontte jíhi. Pero si xijntta mé ndarrocjan simple que ijeha xijntta, ¿queéén nchao sinchegonda chojni? Xijntta mé ixonhi xé, jeha para singo ndaha co tsingachje chojni.

¹⁴'Co jaha ra inchin joadingasán para icha chojni de ngataha nontte jíhi. Inchin ná ciudad que jí ngataha ná jna, cain chojni de cjin nchao siconxin na ciudad mé.

¹⁵Ni ná lámpara are jinchengasán čhoha sehe ngaxinhi ná cajón ixin lámpara mé chonda que sehe noi para sinchengasenhe cain chojni que te ngain nchia.

¹⁶Jamé jaha ra cai, nchehe ra jian para que tti jian que jaha ra sinchehe ra, mé inchin joadingasán para ngatto con cain chojni para que are jehe na sicon na tti jian que jaha ra sinchehe ra, jehe na sinchecoanxinhi na Ndodá ra que ttjen ngajni.

Jesús cjoagoe chojni quehe rročo ley que vayé Moisés

¹⁷Co Jesús ndačo cai:

—Ĥaxaonha jaha ra que janha joihi para jointtaxantte ley que vayé Moisés ni cain tti ndačo cain profeta are saho; janha joiha para jointtaxantte cain mé, janha joihi para joindattjo ra tti mero ndoa quehe rročo cain mé.

¹⁸ Janha rrondattjo ra ndoa que cain tiempo que sehe ngajni co nontte, ley mé rroxantteha ni rioho ni ná letra sačhjeha hasta tsoenja cain tti jitaxin ngain ley mé ixin cain mé chonda que tsonhe.

¹⁹ Mexinxin tti chojni que ditticaonha quexeho parte que ley jihi ttetonha, masqui parte mé antoha importante, co si chojni mé tsjagoe icha chojni para sinchehe na řajeho, Dios rrondačo que chojni mé antoha importante ngajni, tti ttetonha Dios. Pero tti chojni que ditticaon cain tti ttetonha ley jihi, co jehe nchecoenhe icha chojni řajeho inčhin jehe nchehe, Dios rrondačo que ixin chojni mé anto importante na ngajni tti ttetonha Dios.

²⁰ Ixin janha rrindattjo ra, que si jaha ra sincheha ra icha jian que cain ximaestroey ley mé co tti nchehe cain xifariseo, jaha ra čhoha sintte ra ngajni tti ttetonha Dios.

*Are Jesús ndache chojni quehe tsonhe chojni que tsońaohé čhó
(Lc. 12.57-59)*

²¹ Jaha ra coinhi ra tti vitonhe nindogoelitoa ra řančhjen janhi: “Dantsjeha ra vidé iná chojni, ixin quexeho tti santsjehe vidé iná chojni, tti tjaya chonda que soenhe juzgado.”

²² Pero janha rrondattjo ra que quexeho tti tsońaohé iná chojni, tti tsońao mé chonda que soenhe juzgado. Co quexeho tti rrondache feo iná chojni, tti rronichja feo mé soenhe juzgado de ngain tti juzgado que chonda icha tsje joachaxin nttihi ngataha nontte. Co tti ncheguinhí iná chojni, tonto, tti ndačo mé chonda peligro de tsji ngacjan řoi infierno.

²³ Mexinxin are jaha tsjiho ofrenda ngain alté Dios para sanjo ngain, co rato mé jaha rrořaxaon que ixin iná chojni ningaconha jaha,

²⁴ nttiha ttintohe ngaca altar tti jaha sanjo ngain Dios, co ttji ngain tti chojni que ningaconha co nchetsenhe ñao que itsońaoha nganji ni jaha ngain jehe. Cottimeja cjan jaha para danjo tti jaha rridanjo ngain Dios.

²⁵ Si čhonja chojni sičo jie para ixin jaha, co tsjiho ngain juzgado, icha jian de ngatjao nttiha jaha nchetsenhe ñao chojni mé para que jehe sinttatjańaha cain tti rrica, para que jehe itsjioha ngain xijuez. Ixin si nahi, xijuez tsetonhe xa xipolicía para que tsiaxinha xa jaha.

²⁶ Co ndoa tti janha rrindattjo, que nttiha siaxinha hasta que tsjengaja hna cainxin tomi que jaha rrica.

Are Jesús ndache chojni que ixin jianha para ná xí sejoacaho xa iná nčhi

²⁷ Jaha ra ocoinhi ra ixin ley que vayé Moisés ttetonha janhi: “Dinttečhincoha ra iná nčhi que jaha nčhičhiha ra.”

²⁸ Pero janha rrindattjo ra que quexeho ná xí tsiaconhe iná nčhi, xí mé rročo que inčhin ojoinchehe xa tti jehe xa řaxaon xa ngain nčhi mé de ngain ansén xa.

²⁹ Mexinxin si jmacon sinttařaxaon para sinchehe jianha, ncheha cosa mé masqui hasta dantsjengui jmacon mé co danza ndaha, ixin icha jian sinchetján ná parte de cuerpoa co nahi ngoixin cuerpoa tsji ngain infierno.

³⁰ Co si rá sinttařaxaon de sinchehe jianha, ncheha cosa mé masqui hasta tončhinji rá mé co danza ndaha, ixin icha jian sinchetján ná parte de cuerpoa co nahi ngoixin cuerpoa tsji ngain infierno.

Are Jesús ndaĉho de ixin tti chojni que dachjendehe ch

(Mt. 19.9; Mr. 10.11-12; Lc. 16.18)

³¹ 'Cai ndaĉho ngain ley que vayé Moisés: "Tti rinao saĉhjenjehe nĉiĉihi chonda que sinchehjenjehe nĉha ná Źón que setaxin que jehe ndoa ondavachjenjehe nĉha para ngoixin vidé."

³² Pero janha rrindattjo ra, que si ná xí sinao xa saĉhjenjehe xa nĉiĉihi xa (co jeha ixin vittjaxin xa nĉha tajjoacaho nĉha iná xí,) xixihi nĉha tti culpé ngattoxon con Dios co por ixin tti sinchehe jehe xa, nĉhí sinchehe nĉha jianha cai. Co xí que jehe nĉha secas nĉha después, sinchehe xa jianha cai ixin secas xa nĉhí mé.

Are Jesús ndache chojni ixin nchejuraha

³³ Cai ndaĉho Jesús:

—Cai jaha ra ocoihni ra ixin vitonhe nindogoelitoa ra Źanĉhen janhi: "Ttinttoeha de nchehe tti jaha joincheprometé conixin ná juramento de ixin nombré Dios."

³⁴ Pero janha rrindattjo ra que Źonhi tiempo sinchejurá ra. Nchejuraha ra de ixin ngajni ixin nttiha tti ttjen Dios.

³⁵ Ni nchejuraha ra de ixin ngataha nontte ixin nttihi tti nchejogaxin rotté Dios. Ni nchejuraha ra de ixin Jerusalén ixin mé tti ciudad de Dios, tti Rey de cainxin cosa.

³⁶ Ni nchejuraha ra de ixin já ra ixin jaha ra ĉhoĉa sinchettie ra ni sincherora ra ni ná Źajá ra.

³⁷ Mexinxin icha jian jeha ndaĉho ra "ján" o "nahi" ixin si rrondaĉho ra icha, mé tsixin de ngain inchínji.

Are Jesús ndaĉho ixin tsjengueyexinha ni iná chojni que joinchehe jianha ngain ni

(Lc. 6.29-30)

³⁸ Jaha ra ocoihni ra quehe ttetonha ley que vayé Moisés: "Tti tsonĉinga jmacon ná chojni, cai jehe chonda que rroĉinga jmacon. Co tti sanqué neno ná chojni, cai jehe chonda que setsinga neno."

³⁹ Pero janha rrindattjo ra que ncheha ra jamé ngain tti chojni que sinchehe jamé nganji ra. Sino que, si ĉhonja chojni rroĉanguiha ra ná manazo ngá con ra, dittoaxin ra para rroĉanguiha ra iná manazo.

⁴⁰ Co si ĉhonja chojni siĉho jie para ixin jaha ra co sinao na santsjaha ra na camisá ra, jaha ra dittoaxin ra danjo ra hasta chamarrá ra cai.

⁴¹ Si ĉhonja chojni tsetonha que jaha ra tsjiho ra ná carga yó kilómetro, jaha ra dittoaxin ra ttjiho ra carga mé hasta nó kilómetro.

⁴² Co quexeho chojni que sanchiaha ra ná cosa, jaha ra chjehe ra; co ndaĉhoĉa ra nahi ngain chojni mé.

Are Jesús ndaĉho chonda que sinao ni chojni que ningaconhe ni

(Lc. 6.27-28, 32-36)

⁴³ 'Cai jaha ra ocoihni ra ixin ley que vayé Moisés janhi ttetonha: "Rinao chojni amigoa co ningaconhe tti chojni que ningaconha jaha."

⁴⁴ Pero janha rrindattjo ra que rinao ra tti chojni que ningaconha ra, co nichja ra jian de ixin tti chojni que nichja jianha de ixin jaha ra co nchehe ra jian ngain tti chojni que ningaconha ra, co nchetsenhe ra ñao Dios que jehe sinchehe jian ngain tti chojni que feo ndattjo ra co nchehe feo nganji ra.

⁴⁵ Jañá sinchehe ra para que sintte ra ndoa xenhe Ndodá ra que ttjen ngajni. Ixin jehe Ndo mé tti rroanha nchanho para nchengasañehe cain

chojni, tti chojni que nchehe jian co tti chojni que nchehe jianha, co jehe Ndo tti rroanha čhin para cainxin chojni cai, tti nchehe jian co tti nchehe jianha.

⁴⁶ Ixin si jaha ra rinao ra jeho tti chojni que jehe rinao ra jaha ra, xonhi premio sayehe ra ixin hasta tti chojni que chonxinha de ixin Dios cai nchehe jamé, inchin cain xicobrador de impuesto.

⁴⁷ Co si jeho amigoa ra rronichjehe ra, cai mé ¿quehe jian sinchehe ra? ixin hasta tti chojni que chonxinha de ixin Dios nchehe na jamé cai.

⁴⁸ Nchehe ra de que dintte ra chojni jian, jañá inchin Ndo dá ra que ttjen ngajni jehe Ndo jian Ndo.

6

Are Jesús ndačho ixin chonda ni que tsjenguijna ni chojni noa

¹ Nchehe ra tti jian jeoha are tatetsjehe icha chojni para que jehe na sicon ra na co rroaxaon na ixin jaha ra anto jian ra. Si jamé sinchehe ra, Ndo dá ra que ttjen ngajni xonhi tsjengaha ra Ndo hna.

² Mexinxin are jaha ra tsjenguijna ra chojni noa, ttequinha ra ngain cainxin chojni inchin nchehe canxion chojni are ngain nihngo Israel co ngá ntiha. Chojni mé ndačho ixin nchehe na jañá para ixin Dios, pero ndoaha; chojni mé nchehe na jañá para que icha chojni rronichja na jian de ixin chojni mé. Pero janha rrindattjo ra que Dios xonhi tsjenguehe hna chojni mé ixin ojoacha de tti jian que nichja icha chojni por ixin jehe.

³ Mexinxin jaha ra are tsjenguijna ra chojni noa, xonhi chojni ttequinhi ra, ni chojni icha amigoa ra ndacheha ra.

⁴ Rročho que ttjenguijna ra chojni mé, pero jimao. Co Ndo dá ra que ttjen ngajni sicon Ndo tti jaha ra sinchehe ra; co jehe Ndo tsjengaha ra Ndo hna.

Jesús cjoago quexén sinchecoanxinhni ni Dios

(Lc. 11,2-4)

⁵ Co Jesús ndačho cai:

—Are jaha ra sinchecoanxinhni ra Dios, ncheha ra inchin nchehe tti chojni que ncheoxinhni na nchecoanxinhni na Dios tatengattjen na ngaxinhni nihngo co ngain esquiné ntiha, para que icha chojni sicon na. Chojni mé ndačho na ixin nchehe na jañá para ixin Dios, pero ndoaha. Janha rrindattjo ra que Dios tsjengueha hna chojni mé tti jehe na tenchehe na, ixin ochonda na tti sacha na.

⁶ Mexinxin are jaha ra sinchecoanxinhni ra Dios, dixinhni ra nchiandoi ra co ttejehe ra puerté nchia co nchecoanxinhni ra Dios Ndo dá ra que ttjen ngajni ntiha, jaho ra conixin jehe Ndo. Co Dios tti sicon tti jaha ra tenchehe ra, co jehe Ndo tsjengaha ra Ndo hna.

⁷ Are jaha ra sinchecoanxinhni ra Dios cjantaonha ra de nichja ra tti palabra que xonhi xé, inchin tti chojni que chonxinha de ixin Dios, ixin jehe na xaxaon na que Dios sinchehe caso cain tti jehe na tendačho na ixin anto tsje tenichja na.

⁸ Mexinxin jaha ra ncheha ra inchin nchehe jehe na, ixin Ndo dá ra que ttjen ngajni onohé Ndo quehe rrogondaha ra icha saho que jaha ra sanchiehe ra Ndo.

⁹ Mexinxin jaha ra nchecoanxinhni ra Ndo janhi:

Padre soixin que ttjen ngajni,
nombrea soixin jiquininxin tsosayehe.

¹⁰ Siquetonha nttihi soixin.

Co tsonhe inchin soixin rinao nttihi ngataha nontte, jañá inchin tonhe nttiha ngajni.

¹¹ Chjana ra jai tti sine na que rrongondana na.

¹² Nchetjañana ni ra tti jianha que jointtaha na, jañá inchin janha na jointtat-jañá na tti chojni que joinchehe jianha nganji na.

¹³ Nchegattoha ni ra tangui; tančhjandaha ni ra ngain tti jianha.

Ixin soixin tti ttetonha co soixin tti chonda cainxin joachaxin co gloria para cainxin tiempo. Amén.

¹⁴ Ixin si jaha ra nchetjañehe ra tti chojni que nchehe jianha nganji ra, Ndodá ra que ttjen ngajni sinttatjañaha ra Ndo jaha ra cai.

¹⁵ Pero si jaha ra nchetjañehe ra chojni mé, Ndodá ra que ttjen ngajni cai choha sinttatjañaha ra Ndo cain tti jianha que jaha ra nchehe ra.

Are Jesús ndačo que xén sinttecjáño ni

¹⁶ Co Jesús ndačo cai:

—Are jaha ra sinttecjáño ra para ixin Dios, dinttechinha ra inchin tti chojni que ncheha inchin ndačo. Chojni mé ndačo na ixin tecjáño na para ixin Dios pero nahi, ixin chojni mé dinttechín na para que icha chojni dicon que ixin jehe na tecjáño na. Pero janha rrindattjo ra seguro que chojni mé Dios xonhi tsjenguehe na hna ixin ochonda na tti sachá na.

¹⁷ Pero jaha ra are sinttecjáño ra para ixin Dios, tontti ra jinda ngá con ra co nchejinji ra já ra jian,

¹⁸ para que icha chojni rrořaxaonha na que ixin jaha ra tecjáño ra para ixin Dios. Jeho Ndodá ra que ttjen nganji tsonohe Ndo, co jehe Ndo tsjengaha ra Ndo hna.

Cosa rentte que rrochonda na ngajni

(Lc. 12.33-34)

¹⁹ Cai ndačo Jesús:

—Datseha ra tsje cosa nntihi ngataha nontte, nntihi tti ndattjehe cochí co nntihi tti cain cosa ndaditján, co nntihi tti jí tti chehe que tté cain cosa.

²⁰ Icha jian datse ra tsje cosa para ngajni, nntiha tti xonhi cochí jí para tsjehe cain cosa, ni cain cosa diha chjín, ni tti chehe coha nntiha para tsé.

²¹ Ixin ngain lugar tti jaha ra rrochonda ra cosa icha importante para ixin jaha ra, cai nntiha sehe joarrixaoan ra co ansean ra.

Jmacon ni, mé tti lamparé cuerpoe ni

(Lc. 11.34-36)

²² Cai ndačo Jesús:

—Jmacon jí inchin ná lámpara ngain cuerpoa. Mexinxin si jmacon jian, cai ngoixin cuerpoa rrochonda joadingasán. Rročo si joadingasán que Dios rroanha jí ngain ansean, jaha ná chojni jian.

²³ Pero si jmacon jianha, cai ngoixin cuerpoa jí ngain tti naxin xehe. Rročo que si coha nganji tti joadingasán que Dios rroanha, jaha inchin chojni chejo ixin čhoaha dicon nntié Dios. ¡Co tti naxin xehe mé anto jianha para ixin jaha!

Chonda que icha sinoa ni Dios que tomi

(Lc. 16.13)

²⁴ Xonhi chojni nchao sinchehe xé yó xinajni ngain nacoa tiempo, ixin icha sinoa ná xinajni co rroningaonhe iná xinajni, o icha sitticoan ngain ná xinajni co ngain iná xa isincheha caso. Jañá cai čhoaha sinoa ni tomi co sinoa ni Dios ngain nacoa tiempo.

*Dios jinda cain xenhe**(Lc. 12.22-31)*²⁵ Cai ndaĉho Jesus:

—Co janha rrindattjo ra que taha ra joachjaon de ixin tti sintte ra co de ixin tti sihi ra para sinttechonxin ra, ni taha ra joachjaon de ixin lontto para sinttengaha ra ixin icha rentte vide ni que tti jine ni, co icha rentte cuerpoe ni que lonttoe ni. Ixin Dios chja ra vida que techonxin ra, mexinxin jehe tti rochja ra cain cosa que rrogondaha ra ngain vida jihi.

²⁶ Tsjehe ra que cain conttoa que tjaganga va ngataonhe hinto; jehe va onhi ttenga va ngataon jngui, co jame onhi cosecha tsın va, ni ttenchjianha va cosecha ngain na nchia. Pero masqui jame, Ndoda ra que ttjen ngajni danjo Ndo tti jine cainxin coxigochjan me. Co jaha ra seguro que icha rentte ra que cain coxigochjan me.

²⁷ Co jaha ra masqui anto tsa ra joachjaon pero choha sahngui ra ni irioho metro icha de tti jininxin ra.

²⁸ :Quedonda jaha ra anto ta ra joachjaon de ixin lontto? axaon ra jian queen dangui cain tsjo ngataon jngui que cain tsjo me ncheha tsjo a, ni tajinha tsjo hjon.

²⁹ Co ni rey Salomon, que jehe anto hjoin vaguitsa, pero onhi tiempo jehe vetsa icha hjoin que cain tsjo.

³⁰ Si Dios jana nchetsa cain ca que jeho jai jı ca ngataon jngui co ndoe ondarroxema ca co rroche ca ngain ohi, mexinxin Dios sinchehe icha jian nganji jaha ra masqui a ditticaonha ra jian ngain Dios.

³¹ Mexinxin taha ra joachjaon ni tendachoha ra: “:Quehe sontte na? o :quehe sonho na? o :quehe lontto sitoxianxin na?”

³² Ixin cain icha chojni cain jihi tti taxin na joachjaon, pero jaha ra chonda ra na Ndoda ra que ttjen ngajni co jehe Ndo onohe Ndo que jaha ra jan rrogondaha ra cain cosa jihi.

³³ Mexinxin cain tiempo ditticaon ra cain tti jehe Ndo ttetonha Ndo, co nchehe ra tti jehe Ndo rinao Ndo, co jame sayehe ra cain cosa jihi.

³⁴ Co taha ra joachjaon de ixin queen sinchehe ra ndoe, ixin ndoe tsiaho oje problema. Nchanho co nchanho chonda probleme, pero jaha ra chonda ra confianza ngain Dios ixin jehe tti sinttaaxaon ra quehe sinchehe ra.

7*Ncheha ra juzgado ina chojni**(Lc. 6.37-38, 41-42)*

¹ Ncheha ra juzgado ina chojni para que Dios sincheha juzgado nganji ra.

² Ixin jehe sinttajuzga jaha ra ajeho inchin jaha ra nchejuzguehe ra icha chojni, co jehe sinchehe nganji ra inchin nchehe jaha ra ngain icha chojni.

³ :Queen nchao sicon ra tti anto nnın caxineno que jingangui jmacon ina chojni, co diconha ra tti caxineno anto jie que jingangui jmacon ra jaha ra?

⁴ Si jaha ra jingangui na caxineno anto jie ngangui jmacon ra, :queen nchao rrondache ra ina chojni: “Tanhjanda na santsjenguiha caxineno que jingangui jmacon?”

⁵ :Jaha ra tti chojni que ncheha tti ndacho! Saho dantsjengui ra tti caxineno anto jie que tengangui con ra, co jame nchao sicon ra jian para santsjengui ra tti caxineno nnın que jingangui jmacon ina chojni.

⁶ Ncheha ra sigue ndacho ra joajne Dios ngain tti chojni que anto hinto inchin conia ixin joajna me anto jian co jehe chojni me puede rrocjancoa na

nasoenxon ra na. Ni ncheha ra sigue ndaĉho ra joajn  Dios ngain tti chojni que depors n nche oxinhi nchehe jianha, ixin chojni m  te inchin cocochi co joajn  Dios inchin perla que anto fino, co jehe na sincheha na caso, inchin are cocochi ttingachjexon va noa co jineha va.

Quex n sanchia cosa de ngain Dios

(Lc. 11.9-13; 6.31)

7   Danchia ra co Dios rrochj  ra. Tj  ra co sinch  ra. Dinga ra puerta co puerta m  rroxir .

8 Ixin tti chojni que danchia day ; co tti chojni que ttj , jehe dittja; co tti chojni que dinga puerta, xir  puerta m  para ixin jehe.

9   Ixin apoco  honja de jaha ra nchao rrochjehe ra xanha ra n   o are sanchiaha ra xan niottja?

10   O apoco nchao rrochjehe ra xan nntaohe conch  are sanchiaha ra xan nntaohe copescado?

11 Ja n , si jaha ra que jaha jian ra noha ra danjo ra cosa jian ngain xanha ra, mexinxin Ndo a ra que ttjen ngajni seguro rrochj  ra Ndo cosa jian jaha ra  o sanchiehe ra Ndo.

12 Mexinxin cainxin tiempo nchehe ra ngain icha chojni inchin jaha ra rinao ra sinchehe jehe na nganji ra, ixin jam  tettonha ley que vay  Mois s co cain tti dicjin cainxin profeta are saho.

Tti puerta jno

(Lc. 13.24)

13   Para tsji ra ngajni chonda que sixinxin ra de ngain tti puerta jno, ixin tti puerta ton co tti nntiha ton, m  tti sattjixin tsje chojni ngain infierno.

14 Pero tti puerta co tti nntiha que satsjixin chojni para ngajni, cayoi m  nojno, co tsjeha chojni chonxin puerta m  co nntiha m .

Nttattochjoin datsoan ni nnta de ixin ttochjo n nnta

(Lc. 6.43-44)

15   Ttjiho ra cuidado de ixin tti chojni mentiroso que ndaĉho na ixin jehe na nichja na de ixin Dios pero ndoaha. Jehe na ndaĉho na ja n  de ngain rroha na pero de ngain ans n na jehe na jianha na inchin coxigo  hintto ngagaha jna.

16 Jaha ra nchao satsoan ra chojni m  de ngain tti jehe na nchehe na ixin inchin nntanchaha  hoha sinchian nnta uva, ni canchaha  hoha sinchian ca higo,

17 ja n  cai cain nttattochjoin jian danjo nnta ttochjoin jian, co tti nttattochjoin que  onhi    danjo nnta ttochjoin que  onhi   .

18 Nttattochjoin jian  hoha sanjo nnta ttochjoin que  onhi    ni cai nttattochjoin que  onhi     hoha sanjo nnta ttochjoin jian.

19 Cain nttattochjoin que danjoha ttochjoin jian  hinji nnta m  co che nnta ngain  ohi.

20 Co jam  jaha ra rrochonxin ra chojni m  de ngain tti jehe na nchehe na.

Cainxinha chojni tsji na ngajni tti ttettonha Dios

(Lc. 13.25-27)

21   Cainxinha chojni que ndachjenji na janha: "Soixin, Soixin", tsji na ngajni tti ttettonha Ndo ana, sino que jecho tti chojni que nchehe cain tti rinao Ndo ana que ttjen ngajni.

22 Are ts  nchanho m , tsje chojni rrondachjenji na janha: "Soixin, Soixin, janha na ndattjan na chojni de ixin soixin, co ngain nombrea venguixin na

espíritu jianha de ngaxinhi cuerpoe tsje chojni, co de ixin nombrea jointtaxin na tsje milagro.”

²³ Pero ngain nchanho mé janha rrondattjan na: “Janha xonhi tiempo joatsoan jaha ra inchin chojnina. Sattjixin ra de nganji janha, jaha ra xo joinchehe ra jianha.”

Tti nchia que jingattjen ngataha ttjao co tti nchia que jingattjen ngataha nchise

(Lc. 6.47-49; Mr. 1.22)

²⁴ Jañá mexinxin tti chojni que ditticaon na janha co nchehe tti janha ndachjan, chojni mé inchin ná xí que xaxaon jian para joinchechjian nchiandoha ngataha ttjao.

²⁵ Co are joí çhin, coyé jinda ngain río, co cjoa çhintto soji ngain nchia mé, pero nchia vetsingaha nchia ixin soji jingattjen nchia ngataha ttjao.

²⁶ Pero tti chojni que ttinhi tti janha ndachjan co ncheha jamé, chojni mé inchin tti ná xí que xonhi xé tti jehe xa xaxaon xa ixin dinchechjian xa nchiandoha xa ngataha nchise.

²⁷ Co are joí çhin, coyé jinda ngain río, co cjoa çhintto soji, nchia mé çjamangui nchia. Co mé anto tanguí para ixin xí mé.

²⁸ Are Jesús joexin nichja cain jihi, cain chojni que tettinhi nttiha vinttegoan na admirado de ixin tti ndaço Jesús,

²⁹ ixin Jesús ndaço ngain na conixin anto tsje joachaxin, co jeha inchin cain ximaestroey ley.

8

Jesús joinchexingamehe ná tti vechonda lepra

(Mr. 1.40-45; Lc. 5.12-16)

¹ Are Jesús vaniaxin de ngain jna mé, anto tsje chojni rroé.

² Co conchienne ná xí que veninxin chin dinhi lepra. Xí mé vettoxin nttajochjihi xa ngattoxon con Jesús co ndaço xa:

—Si rinao soixin, nchao nchexingamana de ixin chin que janha rrichonda.

³ Cottimeja Jesús catte xí mé co ndaço ngain xa:

—Ján, rinaho. Co jaxon oxingamaha jaha.

Co are Jesús ndaço yá jehe tti venihi mé xingamehe de ixin tti chin que jehe vechonda.

⁴ Co Jesús ndaço ngain tti xí mé:

—Tsjenxin, xonhi chojni ndache. Jeho ttji co tonchienhe ngain xidána para que jehe xa sicon xa ixin jaha oxingamaha, co danjo para ixin Dios inchin tetonha ley que vayé Moisés, para que cain chojni nttiha tsonohe na que jaha oxingamaha de ixin tti çhin que joarichonda.

Jesús joinchexingamehe ná xanxí, xinchehe xé ná xicapitán romano

(Lc. 7.1-10)

⁵ Are joigaha Jesús rajna Capernaum, ná xisoldado capitán romano conchienne xa co joinchetsenhe xa ñao Jesús,

⁶ co ndaço xa:

—Nttatsanha ñao soixin nchexingamehe ná xinchehe xana ixin nihi xa. Tajitsinga xa ngain nchia co çhoha ttingui xa co cai anto jittín xa.

⁷ Jesús ndaço:

—Janha tsji sinttaxingamá xí mé.

⁸ Co xicapitán mé ndaço xa:

—Nttatsanha ñao soixin, janha ni jiquininxinha na para soixin sixinhi nchiania. Jeho rinaho janha que soixin ttetonha co xinchehe xana orrox- ingamehe xa.

⁹ Janha nona jamé ixin janha ditticanho cain tti ttetonna xichonda icha tsje joachaxin que janha, co cai janha chonda joachaxin de ttetoan cain xisoldadona. Are janha ndattjan ná de jehe xa que tsji xa quexeho parte, jehe xa ttji xa. Co are ndattjan xa que tsí xa, jehe xa ttí xa. Co are ttetoan ná de xinchehe xana de sinchehe xa quexeho xa, jehe xa nchehe xa xa mé.

¹⁰ Are Jesús coinhi jiji jehe goan admirado co nda'cho ngain chojni que jidicao:

—Janha rrindattjo ra ndoa que cainxin rajna de Israel xonhi chojni vetan janha que anto jian ditticaon inchin xí jiji.

¹¹ Janha rrondattjo ra que tsje chojni de icha nación inchin xisoldado romano jiji tsji na siguintte na ngain Abraham, co Isaac co Jacob nttiha ngajni tti ttetonha Dios.

¹² Co tsje chojni Israel que tequininxin tsji nttiha, pero tsjiha na nttiha ixin Dios rrorroanha na ngain tti naxin xehe, nttiha tti puro rrotsjanga na, co hasta sinetaon neno na.

¹³ Cottimeja Jesús nda'cho ngain xicapitán mé:

—Sattji nchiandoi, co tsonhe inchin jaha ditticaon.

Co xinchehe xé mé xingamehe xa ngain rato mé.

Jesús joinchexingamehe jannché Pedro

(Mr. 1.29-31; Lc. 4.38-39)

¹⁴ Jesús cjoí nchiandoha Pedro, co nttiha vicon Jesús jannché Pedro tajitsinga jan de ixin soa.

¹⁵ Jesús jehó tsehe rá jan co ondava'chjehe jan soa que veyá jan, co vingattjen jan para joincheatendehe jan na.

Jesús joinchexingamehe tsje chojni nihi

(Mr. 1.32-34; Lc. 4.40-41)

¹⁶ Co are ondaconaxin xehe, tsje chojni joiaohe na Jesús tsje chojni que chonda espíritu jianha, co jehe, conixin nacoa palabra que jehe nichja, vengui cain espíritu jianha mé. Co cai ngain rato mé jehe joinchexingamehe cainxin chojni nihi que conchienne ngain.

¹⁷ Jiji conhe para que joiconhe tti dinda'cho profeta Isaías are jehe dicjin: “Jehé mismo vayé chinha na co sajoicao tti anto ttín cuerpoa na.”

Tti chojni que joinao rrogacao Jesús

(Lc. 9.57-62)

¹⁸ Are Jesús vicon que anto tsje chojni xatte ngain, jehe coetonhe chojni que vacao para vatto na conixin jehe para toenxin lago.

¹⁹ Co ngain rato mé conchienne ná ximaestroe ley Israel ngain Jesús co nda'cho xa:

—Maestro, janha rinaho sacjin na tti soixin sacji.

²⁰ Jesús nda'cho:

—Cain condanixa chonda va cuevé va co cain conttoa chonda va caqué va; pero janha, tti Xí que joixin de ngajni, chondaha ni ttinó sari'chin.

²¹ Co iná de tti chojni que vacao Jesús nda'cho:

—Janha ján sacjin na, pero chonna na hasta ndasenja ndodana para que janha tsjavá ndo.

²² Co Jesús nda'cho:

—Chjin na co tan'chjanda tti chojni que ditticaonha na janha tsjavá chó na.

Jesús tajoaquehe ċhintto conixin olé lago

(Mr. 4.35-41; Lc. 8.22-25)

²³ Cottimeja Jesús conixin chojni que vacao coani na ná barco co sacjoixin na de nttiha.

²⁴ Co are ongotaonhe jinda mé, cjoa ná ċhintto anto soji que tsín olé jinda que hasta cjoanotaon barco mé. Co Jesús tajjioa ngaxinhi barco hora mé.

²⁵ Cottimeja cain chojni que joicao cjoí na joinchexingamehe na Jesús co ndaċho na ngain:

—Nttatsanha na ñao soixin, tanċhjandaha ni ra ndasenhe na ixin barco ndajixincanjingui jinda.

²⁶ Jesús ndaċho ngain na:

—¿Quedonda anto Ķaon ra? ¡Jaha ra antoha jian ditticaon ra tti janha ndattjo ra!

Cottimeja vingattjen Jesús co nichjé ċhintto conixin jinda, co ngain rato mé tavehe ċhintto conixin jinda.

²⁷ Co cain chojni mé vinttegoan na admirado, co vinttendaċho na:

—¿Quehe joachaxin chonda xí jihi que hasta ċhintto co jinda ditticaon tti ndaċho xa?

Xí de ngain nonttehe Gadara que vinttechonda espíritu jianha

(Mr. 5.1-20; Lc. 8.26-39)

²⁸ Are Jesús joiji toenxin lago mé ongain nonttehe Gadara, yó xí vinttegaċhjexin xa de ngaxinhi cueva tti vaguittohe cuerpoe chojni que ndavaguenhe ngain tiempo mé. Co xí mé vintteconchienhe xa ngain Jesús. Cayoi xí mé vinttechonda xa espíritu jianha ngaxinhi cuerpoe xa, co anto ċhintto vintte xa que ni Ķonhi chojni nchao vagattoxin ngain lugar mé.

²⁹ Co vinttendaċho xa sén:

—¿Quedonda joíhi nganji na, jaha Jesús, Xenhe Dios? ¡Ķa jeha tiempo para que jaha sincheguetan ni ra tangui!

³⁰ Co nonttiha chiaon rridinttene anto tsje cocochi.

³¹ Co cain espíritu jianha joinchetsenhe ñao Jesús co ndaċho:

—Si senguixin na de ngaxinhi cayoi cuerpo tehe, nttatsanha na ñao tanċhjanda na sixinhi na ngaxinhi cocochi taha.

³² Cottimeja Jesús ndaċho:

—Ján, diguixinhi ra nttiha remé.

Co cain espíritu jianha vathjexin de ngaxinhi cayoi cuerpoe xí mé co savixinhi ngaxinhi cain cocochi mé. Cottimeja cain jehe va ndavinttecoloco va co coinga va xincanji va ngain ná lago nttiha, co nttiha joingui va jinda co nttiha ndavintteguenxin cainxin va ixin vintteconjehe va jinda.

³³ Co tti chojni que vaquingaria cain cocochi mé vintteĶaon na co coinga na cjoí na ngain rajna que jí icha chian para joindaċho na tti conhe cain cocochi, co tti conhe ngain cayoi xí que vinttechonda espíritu jianha.

³⁴ Cottimeja cain chojni de ngain rajna mé vintteccj na tti jí Jesús. Co are vicon na Jesús, jehe na joinchetsenhe na ñao Jesús que satsjixin de ngain nonttehe na.

9

Jesús joinchexingamehe ná xí que choha vacji

(Mr. 2.1-12; Lc. 5.17-26)

¹ Cottimeja Jesús coani barco iná co sacjoi para toenxin jinda ngain rajna Capernaum, rajné Jesús tiempo mé.

² Nttiha joicaohé na Jesús ná tti xí que čhoha vacji, tajitsingataha xa ná camilla. Are Jesús vicon que cain chojni que joicao tti nihi mé chonda seguro que Jesús sinchexingamehe jehe tti nihi mé, Jesús ndačho ngain tti nihi:

—Āaonha, janha ojointtatjañaha cain tti jianha que jaha rrica.

³ Co cainxin ximaestro ley Israel que te nttiha vintteřaxaon xa: “Nchaoha tti jinichja xí jihi; Dios tsoñaohe xa.”

⁴ Pero Jesús ovenohe tti teřaxaon xí mé, co jehe ndačho ngain xa:

—¿Quedonda anto jianha tti jaha ra řaxaon ra?

⁵ ¿Quexehe tti icha tanguiha rročhjan: “Ovitjañaha jaha cain tti jianha que joinchehe”, o rrondačhjan: “Dingattjen co sattjixin rottea”?

⁶ Nchao remé, janha tsjagoha ra que janha, tti Xí que joixin de ngajni, chonda joachaxin nttihi ngataha nontte para nttatjañá chojni tti jianha que nchehe na.

Cottimeja ndačho Jesús ngain tti čhoha vacji mé:

—Dingattjen co tsinhi camillá co sattjixin rottea para nchiandoi.

⁷ Co ngain rato mé jehe tti čhoha vacji, vingattjen co sacjoi para nchian-doha.

⁸ Co cain chojni que te nttiha are vicon na milagro jihi, jehe na vintteřaon na co ndačho na que ixin Dios jian ixin joanjo joachaxin mé ngain chojni.

Jesús nichjé Mateo

(Mr. 2.13-17; Lc. 5.27-32)

⁹ Cottimeja Jesús sacjoixin de nttiha, co ngatja nttiha Jesús vicon Mateo tají ngaca mesa tti jinchexin cobro cain impuesto. Co Jesús ndačho ngain:

—Āacoi, chjin na.

Co ngain rato mé jehe Mateo vingattjen co sacjoi conixin Jesús.

¹⁰ Co después Jesús tajine ngain nchiandoha Mateo. Co nttiha conchienne tsje xicobrador de impuesto, co icha chojni que nchehe jianha, co cain nimé joine na ngain mesa conixin Jesús conixin cain chojni que jehe vacao.

¹¹ Pero canxion xifariseo vintteguicon xa jihi, co después vinttejanchian-gui xa ngain tti chojni que vacao Jesús co vinttendačho xa:

—¿Quedonda ximaestroa ra jinecaho xa cain xicobrador de impuesto, co icha chojni que nchehe jianha?

¹² Jesús coinhi jihi, co jehe ndačho ngain xa:

—Chojni que niha, chojni mé rrogondeha xincheřoan, jehó tti chojni nihi, mé tti rrogondehe xincheřoan.

¹³ Sattji ra co diquinxin ra quehe rročho tti parte ngain Palabré Dios que jitaxin: “Janha rinaho que jaha ra tsiacnoehe ra chojni, co nahi ixin sonhe ra coxigo para tsín ra para ixin janha.” Mexinxin janha joiha para joinichjá chojni jian, sino que janha joihi para joinichjá chojni jianha para que tsentoxinhi na de tti jehe na tenchehe na.

Are joanchianguihi na Jesús ixin quedonda chojni jehe dinttecjañoha na

(Mr. 2.18-22; Lc. 5.33-39)

¹⁴ Cottimeja chojni que vacao Juan, tti vancheguite chojni, conchienne na ngain Jesús co ndačho na:

—¿Quedonda janha na, conixin cain xifariseo anto dinttecjáño na para ixin Dios, co chojni que čhjiho jaha dinttecjañoha na?

¹⁵ Jesús ndačho ngain na:

—¿Apoco cain chojni que tti ngain ná vandango tti tottehe na nchao sinttecjáño na si xinovio xa jí xa ngayehe na? Pero, ján, tsí tiempo que xinovio satsjixin xa de ngain na, cottimeja jehe na sinttecjáño na.

¹⁶ Xonhi chojni tteyehe lontto narao ngain rioho lontto nttaxí, ixin lontto narao ndadixehe co ndattinchje lontto nttaxí, co tti diguichje icha tojie.

¹⁷ Ni cai xonhi chojni ttequia xan que jidatsoxinhí ngá ná roanxan nttaxí ixin xan mé anto daca tsonchintaon xan roanxan mé, co cayoi cosa mé ndasitján. Mexinxin xan que jidatsoxinhí siquia xan ngain ná roanxan narao para que sitjanha cayoi cosa mé, ixin roanxan mé sichjehe co xan mé singoha xan. Jañá tti costumbre que jaha ra chonda ra jiha de acuerdo ngain tti janha rrindattjo ra.

Are xingamehe xannchichjenhe Jairo conixin tti nchí que catte lonttoe Jesús (Mr. 5.21-43; Lc. 8.40-56)

¹⁸ Jesús xa jindačo cain palabra yá are joí ná xí que ttetonha ngain nihngo nttiha. Vettoxin nttajochjihi xa ngain Jesús co ndačo xa:

—Ná xannchichjanhna jaxon joexin ndavenhe xan. Pero si soixin sihi co tsín rá ngataha xan, jehe xan rrocjan rroxechon xan iná.

¹⁹ Jesús vingattjen co sajoicao xí mé conixin tti chojni que vacao.

²⁰ Co are ongatja nttiha conchienne ná nchí que ovechonda tteyó nano que veguenguihi ncha jni. Jimao conchienne ncha toenixin Jesús co catte ncha ngandehe tti manta que jitsá,

²¹ ixin jehe ncha xaxaon ncha: “Conixin jehó rrocatte lonttoe Jesús, janha rroxingamana.”

²² Pero Jesús ngaria co jehe vicon nchí mé, co ndačo ngain ncha:

—Xaonha, jaha oxingamaha ixin vitticaon.

Co desde ngain rato mé, nchí mé ondaxingamehe ncha.

²³ Co después are Jesús joiji ngain nchiandoha xí que vaquetonha ngain nihngo, Jesús vicon que onttiha te ximusico para sasicjavá na xannchichjan mé. Co icha chojni anto tetsjanga na.

²⁴ Jesús ndačo ngain na:

—Dachjexin cain ra de nttihi, ixin xannchichjan yá jeha ndadiguenhe xan, jehó tajjioa xan.

Cain chojni nttiha cjoanoa na Jesús ixin jehe ndačo jañá.

²⁵ Pero jehe coetonhe na que vačhjexin na de nttiha, cottimeja jehe joixinhí co tsehe rá xannchichjan mé, co jehe xan vingattjen xan.

²⁶ Co ngoixin región mé anto daca conohe chojni de ixin tti milagro jian que joinchehe Jesús.

Jesús joinchexingamehe yó xí que vaguiconha

²⁷ Are Jesús sacjoixin de nttiha, rroé yó xí que vaguiconha co vinttendáčo xa sén:

—jTtiaconoana ni ra soixin, tti razé David co tti chonda joachaxin que vechonda rey David!

²⁸ Co are Jesús joixinhí nchiandoha, jehe cayoi tti vaguiconha mé vint-teconchienne ngaca Jesús co jehe joanchianguihi cayoi xí mé:

—¿Aditticaon ra que janha nchao sinttaxoán jmacon ra?

Cayoi xí mé ndačo xa:

—Ján ditticanho na que soixin nchao sinchexoanna ni ra.

²⁹ Cottimeja Jesús catte ngataha jmacon cayoi xí mé co ndačo:

—Tsonhe inchin jaha ra ditticaon ra.

³⁰ Co ngain rato mé ndaxingamehe jmacon cayoi xí mé. Cottimeja Jesús anto coetonhe xa co ndačo ngain xa:

—Xonhi chojni ttequinhi ra quehe conha ra.

³¹ Pero are sacjoixin xa de nttiha, jehe xa coexinhi xa coequín xa chojni ngoixin región mé tti joinchehe Jesús.

Jesús joinchexoenhe ná tti čhoha vanichja

³² Are cayoi xí mé tedarhjin xa de nttiha, canxion chojni joiaohe na Jesús iná xí que čhoha vanichja ixin vechonda ná espíritu jianha.

³³ Are Jesús joantsje espíritu jianha mé, jehe tti xí mé coexinhi nichja. Cain chojni que vicon nttiha vinttegoan na admirado co ndačo na:

—Nttihi Israel xonhi tiempo vocon na ná cosa inchin jihi.

³⁴ Pero xifariseo vinttendačo xa:

—Xí jihi nchao denguí xa espíritu jianha de ixin joachaxín Satanás ixin Satanás tti tetonhe cain espíritu jianha.

Jesús ttiacnoehe cain chojni

³⁵ Jesús vacji ngain cain ningoe cain rajna nttiha co ngain ningoe cain rajnanchjan para vandache chojni de ixin Dios. Jehe vandačo tti jian joajna de ixin quexén tteonha Dios, co vanchexingamehe cain chojni que vinttechonda quexeho chin.

³⁶ Are Jesús vicon cain chojni jihi, jehe coiacnoehe na ixin jehe na chonda na joachjaon co tedoan na desanimado inchin coleco que chondaha va tti ttingaria va.

³⁷ Cottimeja jehe ndačo ngain tti chojni que vacao:

—Ján ndoa, que cosecha atto tsje pero ninchehe xa tsjeha na.

³⁸ Mexinxin ndache ra Xinajni que rrorroanha Xa icha ninchehe xa para que satse na cain cosecha jihi.

10

Jesús coinchiehe tti tteyó chojni que vacao
(Mr. 3.13-19; Lc. 6.12-16)

¹ Cottimeja Jesús vayé tti tteyó chojni que vacao co joanjo joachaxin ngain na de nchao sengui na espíritu jianha de ngain chojni, co de nchao sinchexingamehe na cain chojni que nixin quexeho chin.

² Jihi nombré tti tteyó chojni que vacao Jesús: tti saho vinhi Simón, co cai vinhi Pedro; Andrés xanchó jehe Pedro; Jacobo conixin Juan xanchó jehe Jacobo, co cayoi nimé xenhe Zebedeo.

³ Co Felipe; Bartolomé; Tomás; Mateo, tti cobrador de impuesto; Jacobo, xitsihi Alfeo; Lebeo, que cai vinhi Tadeo;

⁴ Simón, jehe ná de tti partidoe chojni politico que vaquetocaho chojni romano; co Judas Iscariote, tti joindačo para tse na Jesús.

Jesús rroanha chojni que vacao para joinichja na de ixin Dios
(Mr. 6.7-13; Lc. 9.1-6)

⁵ Jesús coetonhe tti tteyó chojni jihi janhi:

—Ttjija ra ngain región tti te chojni que jeha judío, ni ttjija ra ngain nonttehe Samaria.

⁶ Ttji ra jeho ngain chojni judío ixin jehe na te na inchin coleco que diguíchoe.

⁷ Ttji ra co dindache ra chojni mé que oconchiaon tiempo para que Dios tsetonha ngain ansén jehe na.

⁸ Nchexingamehe ra chojni nihi, nchexechon ra chojni que ondadiguenhe, nchexingamehe ra tti chojni que techonda chin lepra, co dehngui ra espíritu jianha de ngain chojni. Jaha ra vittonha ra joachaxin jihi, mexinxin are sinchegonda ra joachaxin jihi ncheha ra cobro.

⁹ Ttjioha ra tomi; ni de oro ni de plata ni de cobre.

¹⁰ Ni ttjioha ra tti sintte ra ngatja nttiha. Co ttjioha ra icha lontto ni icha catte que jehó catte que jaha ra techjanga ra co jehó lontto que jaha ra tengaha ra, ni ttjioha ra nttacotto ixin jaha ra chonda ra derecho de sayehe ra tti sintte ra co cain icha que sondaha ra de ngain tti chojni que tsji ra.

¹¹ Are saso ra ngain ná rajna o ngain ná rajnanchjan, ttjé ra nttiha ná chojni jian para dittoha ra nttiha ngain nchiandoha chojni mé hasta que jaha ra satsjixin ra de ngain rajna mé.

¹² Are saso ra ngain nchia mé chjehe ra na joajna co nchetsenhe ra ñao Dios que jehé sinchençaon chojni mé.

¹³ Si chojni de nchia mé jian na, ján, Dios sinchençaon na. Pero si jehé na jianha na, Dios sinttanchaon jaha ra en lugar de jehé na.

¹⁴ Co si ngain ná nchia rrochoha na sayaha ra na ni sincheha na caso tti jaha ra rronchache ra na, jaha ra dačhjin ra de ngain nchia mé o de ngain rajna mé co tontsjenga ra rottea ra para que sinttji cain jinche que teyá rottea ra nttiha. Jamé para ná señal ixin vitticaonha na jaha ra.

¹⁵ Janha rrindattjo ra seguro que are ngain tti nchanho que are Dios sinchejuzguehe cain chojni, rajna mé icha soji castigo sayé que tti castigo que vayé chojni ngain Sodoma co Gomorra.

Jesús ndache tti tteyó chojni ixin icha chojni feo sinchehe ngain na

¹⁶ ¡Tsjenxin ra! Janha rrorroanha jaha ra inchin coleco ngayehe condaniša. Dittoaxinha ra para sinttayaha ra na inchin conché dittoexinha va para denhe va. Pero dintteha ra čhintto; sino que dintte ra inchin conttoanjani.

¹⁷ Pero ttjiho ra cuidado ixin rrotse ra na co sinttachianha ra na ngain juzgado, co tsaxin ra na nttá ngaxinhi nihngo.

¹⁸ Co hasta tsjiho ra na ngain tsje xigobernador co ngain tsje rey de ixin causananxin janha. Co jamé jaha ra rrochonda ra oportunidad de rronichja ra ngain cain xí mé de ixin janha, co hasta rronichja ra ngain icha chojni que jeha judío.

¹⁹ Pero are rrotse ra na co tsjiho ra na ngain juzgado, jaha ra taha ra joachjaon de ixin quešén rrončačo ra nttiha, ni taha ra joachjaon de ixin quehe palabra sinchegonda ra, ixin are mé Dios rrorroanha palabra que jaha ra rronichja ra.

²⁰ Ixin jeha jaha ra tti rronichja ra, sino que Espíritu Santo que rrorroanha Ndojá ra que ttjen ngajni, mé tti rronichja.

²¹ Chojni sičo jie para ixin xanchó para nasoexon na xan. Co sehe ndodaha que jehó ndo sičo ndo jie para nasenxon xenhe ndo. Co sehe chjan que rroningaonhe xan ndodé xan co janné xan co jehó xan sičo xan jie para nasenxon nindoha xan.

²² Cainxin chojni ngoixin mundo rroningaonha ra na ixin causananxin janha. Pero quexeho ra šo sitticaon ni ra co sinchehe ra cain tti janha coetonha ra hasta are ndasenhe ra, jaha ra rrochonda ra iná vida naroxin ngain Dios.

²³ Are chojni de ngain ná rajna feo sinchehe na nganji ra jaha ra sattjixin ra de nttiha co sattji ra ngain iná rajna. Janha rrindattjo ra seguro que ni ša

tsjaha ra tsingaria ra ngain cainxin rajna de chojni Israel are janha, tti Xí que joixin de ngajni, orrocjan na sihi iná.

²⁴ Ni ná tti jitangui jeha icha nohe que ximaestroe, co ni ná tti nchehe xa jeha icha ttonha que xinajni.

²⁵ Tti jitangui, choha tsangui icha que jeha tti nohe ximaestroe, co tti nchehe xa choha icha tsetonha que jeha inchin ttonha xinajni. Jañá si janha tti inchin ndodá ra de ngain nchia co nchequinhi na na Beelzebú, que rocho Satanás, seguro jeha na rronichja na icha feo de ixin jaha ra.

Quensen jiquininxin rroxagoen ni

(Lc. 12.2-9)

²⁶ Pero xagoenra ra ni ná chojni ixin anto daga tsononxin cain tti ndoa de ixin Dios co xonhi cosa jima que tsononxinha.

²⁷ Cain tti rrindattjo ra, nchenohe ra tsje chojni, co cain tti rrindattjo ra jima, jaha ra nchenohe ra icha tsje chojni inchin rrocani ra ná nchia co de nttiha rronichjaxin ra.

²⁸ Xagoenra ra tti chojni que natjayaxon ixin mé choha nasoenxon almé ni. Xagoenra ra jeha Dios ixin jeha mé tti nchao nasoenxon cuerpoe ni co almé ni ngain infierno.

²⁹ ¿Quejanhi rentte yó conttoachjan? ¡Anto tsjeha tomi! Pero masqui jamé ni ná de jeha va denha va si Ndodá ra que ttjen ngajni danjoha joachaxin.

³⁰ Co jeha Ndo nohe Ndo hasta quejanhi xajá ra chonda ra.

³¹ Mexinxin jaha ra xaonha ra, ixin para Dios, jaha ra icha rentte ra que tsje conttoa.

Tti chojni que ndacho ngattoxon con icha chojni ixin Jesús jian

(Lc. 12.8-9)

³² Cain chojni que rrondacho ngattoxon con icha chojni que ixin janha jian na, cai janha rrondaçhjan ngattoxon con Ndodana que ttjen ngajni que ixin chojni mé jian cai.

³³ Pero tti chojni que ndacho ngattoxon con icha chojni que ixin janha jeha jian na, cai janha rrondaçhjan ngattoxon con Ndodana que ttjen ngajni que ixin chojni mé jeha jian cai.

Causexin Jesús chojni rrochjeya

(Lc. 12.51-53; 14.26-27)

³⁴ Xaxaonha ra que janha joihi ngataha nontte jihi para que cain chojni sinoa chó ixin tsoenja jamé, sino que cainxin chojni rrochjeya na ixin janha joihi.

³⁵ Ixin ttoha chojni sitticaon na janha co ttoha na nahi, mexinxin ná xanxi co ndodé xan tsoñahe chó na co xannchi co janné xan tsoñahe chó na, co nchidainda co jannché ncha tsoñahe chó na.

³⁶ Jañá cada chojni rroningaonhe na jeha nindoha na.

³⁷ Chojni que rinao ndodé o janné icha que janha, chojni mé jiquininxinha soan chojnina, co tti chojni que rinao nchichjehe o xitsihi icha que janha, chojni mé jiquininxinha soan chojnina,

³⁸ Co tti chojni que tsinha en peligro vidé na para ixin janha, chojni mé jiquininxinha soan chojnina.

³⁹ Tti icha rinao vidé, mé sinchetján vidé. Pero tti sinchetján vidé de ixin causananxin janha, mé rrochonda iná vida naraixin.

Tti chojni que rroxenguehe hna
(Mr. 9.41)

⁴⁰ Tti chojni que jian sayaha jaha ra, chojni mé cai sayehna na janha, co tti chojni que sayehna janha, chojni mé cai sayé na jehe tti rroanha na janha.

⁴¹ Co tti chojni que sayé ná profeta ixin profeta nichja joajna que dayé de ngain Dios, chojni mé Dios tsjenguehe hna inchin xenguehe hna ná profeta. Co tti sayé ná xí jian ixin xí mé jian xa, chojni mé Dios tsjenguehe hna xajeho inchin xenguehe hna ná chojni jian.

⁴² Co quexeho chojni que sanjo masqui ná vaso de jinda quin ngain quexeho chojni que ditticaon na janha jehó ixin ditticaon na janha, chojni mé Dios tsjenguehe hna cai.

11

Tti chojni que Juan rroanha
(Lc. 7.18-35)

¹ Are Jesús joexin ndache cain cosa jiji tti tteyó chojni que vacao, sacjoixin de nttiha para joindache icha chojni de ixin Dios ngain icha rajna que vintte ngain región mé.

² Juan, tti vanheguitte chojni, ovehe ngaxinhi cárcel tiempo mé pero jehe conohe cain tti jian que jinchehe Jesucristo. Cottimeja jehe rroanha yó chojni que vacao para joiganchianguihi na Jesús

³ ixin quensen jehe, co ndaço na ngain Jesús:

—¿Ajaha tti Cristo tti chonda que tsí, o xa rrochonda na que rrochoan na iná chojni?

⁴ Jesús ndaço:

—Ttji ra co dindache ra Juan tti jaha ra tedicon ra jaxon co tti jaha ra tettinhi ra.

⁵ Diquequinhí ra Juan ixin tti chojni que vaguiconha, jai onchao dicon, co ixin tti çhoá vacji, jai onchao çhji, co ixin oxingamehe tti chojni que veninxin tti chin que dinhi lepra, co ixin tti chojni que vaquinha, jai onchao ttinhi, co ixin tti chojni que ondavenhe, jai oxechon, co ixin tti chojni que xa vaquinha de ixin Dios, jai janha ndattjan.

⁶ Co anto çhjoin para ixin tti chojni que chonda seguro nganji na janha.

⁷ Are cayoi tti chojni mé sacjoi na, Jesús coexinhi ndache icha chojni que te nttiha de ixin Juan, tti vanheguitte chojni, co Jesús ndaço:

—Are çjoi ra ngagaha jna tti xonhi chojni te para joitsjehe ra Juan, ¿quehe xaxaon ra rroguicon ra jehe? ¿Axaxaon ra ixin joarrixaoen seguroha inchin nttaxiji que nchequingui çhintto,

⁸ o ani ná xí que jingá lontto anto fino inchin ná rey? ¿A poco chonxinha ra ixin tti chojni que jingá lontto anto fino, jehe na te na ngain nchia anto fino?

⁹ Mexinxin ¿quehe xaxaon ra rroguicon ra? ¿A ná profeté Dios? Ján ndoa que Juan ná profeté Dios, co jehe icha rentte que ná profeta.

¹⁰ Juan, mé tti rroço ngain tti jitaxin Palabré Dios:

Icha saho que jaha tsji, janha rrorroanha ná tti sicao joajnana para que jehe mé sinchechjian nttiha para ixin jaha.

¹¹ Janha seguro rrindattjo ra que de cainxin chojni que concjixin ngataha nontte jiji hasta jai, ngattoxon con Dios xonhi chojni icha importante que jehó Juan. Pero masqui jamé, tti chojni que icha importanteha de ngain tti parte que ttetonha Dios de ngain ansén chojni, chojni mé xa icha importante que Juan.

¹² Desde que Juan jói para joindache chojni de ixin Dios hasta jai, atto tsje chojni rinao na rrocayacoen na tti tteonha Dios que ttjen ngajni, co chojni chintto rinao na sinchexante na tti tteonha Dios.

¹³ Cain profeté Dios que jói co ley que vayé Moisés jinchenohe chojni de ixin quexén tsetonha Dios ngain ansén chojni hasta que jói Juan para joinchenohe chojni que ixin otoiñ tsí tiempo mé.

¹⁴ Co si jaha ra rinao ra sitticaon ra, jáñ, Juan mé tti profeta Elías que chonda que jói iná.

¹⁵ Xo tsinxin ra, ttinhi ra jian.

¹⁶ ¿Quehe sinttacaninxin chojni de ngain tiempo jihi? Jehe na inchin tti xannchinnchinchjan que tsontaon ngataon ndásin co toyaotte xan icha xancompañeroe xan:

¹⁷ “Janha na jointtachjian na sóñ conixin ná nttaxo pero jaha ra tteha ra, mexinxin janha na tsje na canto que ttiaho joachjaon pero jaha ra tsjangaha ra.”

¹⁸ Rrocho ixin jói Juan, tti vancheguitte chojni, co jehe vaguiha vino ni vajineha tsje. Co jaha ra ndacho ra que ixin jehe chonda ná espíritu jianha.

¹⁹ Cottimeja joihi janha, tti Xí que joixin de ngajni, que jinecaho chojni co dihi vino. Co jaha ra ndacho ra que ixin janha anto jine co anto dihi hasta coan na, co ixin janha amigoe cain chojni que tenchehe jianha, co xicobrador de impuesto. Pero tti nchecoenhe Dios chojni, mé anto jian ixin tti jian mé xago ngain tti nchehe chojni que ditticaon ngain jehe.

Rajna que vintteguitticaonha

(Lc. 10.13-15)

²⁰ Cottimeja Jesús coexinhi joinchesattehe chojni de cain rajna tti jehe joinchehe icha tsje milagro, ixin cain chojni mé xa coentoxinha na vidé na de tti jianha que tenchehe na. Mexinxin Jesús ndacho ngain na:

²¹ —¡Anto tanguí tsonha jaha ra de ngain rajna Corazín, co cai jaha ra de ngain rajna Betsaida! Ixin tti cain milagro que janha jointtaha ngayaha ra, si cain milagro mé rroconhe ngayehe chojni de ngain ciudad de Tiro co ciudad de Sidón, cain chojni mé osé rroquentoxinhi na vidé na de tti jianha que vanchehe na. Co para rrocjago na que ixin jehe na orroquentoxinhi na vidé na, jehe na rroquinttengá na lontto ttie co rrocjinttjitte na nntesoguihi já na.

²² Pero jaxon janha rrindattjo ra que para ngain tti nchanho que Dios sinchejuzguehe cain chojni, jaha ra tti sayehe ra ná castigo icha soji que chojni ngain ciudad de Tiro co Sidón.

²³ Co jaha ra de ngain rajna Capernaum, ¿axaxaon ra que ixin anto importante ra para ngain Dios? Jeha jamé ixin jaha ra chonda ra que tsji ra ngain infierno. Ixin tti cain milagro que janha jointtaha ngayaha ra, si mé rroconhe ngayehe chojni de ngain ciudad de Sodoma, cain chojni mé seguro rroquentoxinhi na vidé na co ciudad mé xa rroquehe hasta jai.

²⁴ Pero janha rrindattjo ra que para ngain tti nchanho que Dios sinchejuzguehe cainxin chojni, jaha ra tti sayehe ra ná castigo icha soji que cain chojni de ngain regioen Sodoma.

Are Jesús ndacho: “Sihi ra nganji co nchejogaha ra”

(Lc. 10.21-22)

²⁵ Ngain rato mé Jesús ndacho:

—Padre soixin que joinchechjian ngajni co nontte, janha chjaha gracias soixin ixin soixin coema tti ndoa para ngain tti chojni que anto chonxin co anto sé coanguí na, co cjoago tti ndoa mé ngain tti chojni que tsjeha chonxin.

²⁶ Ján, Padre, ixin soixin jañá rinao.

²⁷ 'Nnodana que ttjen ngajni chjana Ndo cain cosa. Xonhi chojni chonxin cainxin de ixin Xenhe Ndo, sino que jehó jehe Ndo nohe Ndo de ixin Xenhe Ndo. Co Xonhi chojni chonxin cainxin de ixin jehe Ndo, sino que jehó Xenhe Ndo conixin cain tti chojni que jehe Xan sinao Xan sinchenohe Xan de ixin jehe Ndo.

²⁸ Xacoi ra nganji na, cain jaha ra Xó atto conchjen ra de ngain Xa co de joachjaon que techonda ra, co nganji na janha sinchejogaha ra.

²⁹ Dittoaxin ra ditticaon ra nchehe ra tti janha rritettonha ra co tangui ra cain tti janha rrinttacoanha ra, ixin janha jeha chintto na, co anto nda ansenna, co jamé nchao sinchejogaha almá ra.

³⁰ Tti janha rritettonha ra tanguiha para jaha ra sitticaon ra sinchehe ra.

12

Chojni que vacao Jesús conchinji na trigo ngain nchanho que nchejogaha ni (Mr. 2.23-28; Lc. 6.1-5)

¹ Ngain tiempo mé ngain ná nchanho que nchejogaha ni, Jesús conixin tti chojni que vacao vatto na ngain canxion jngui que dinga trigo. Co chojni mé venhe na jintta, mexinxin coexinhi na conchínji na canxion ninchjenhe trigo para joine na.

² Co canxion xifariseo vintteguicon xa mé, co vinttendaçho xa ngain Jesús: —Tsjenxin, chojni que chjiho tenchehe na Xa co jiquininxinha sinchehe ni Xa ngain tti nchanho que nchejogaha ni.

³ Pero Jesús ndaçho ngain xa:

—¿Axa tsjeha ra tti jitaxin ngain Palabré Dios ixin quehe joinchehe David conixin cain xicompañeroe ná nchanho are vintteguenhe na jintta?

⁴ David conixin cain xicompañeroe mé joixinhi na tti nihngo icha importante co joine na tti niottja que jiquininxinha para rrojine na jehe na, sino que jehó xidána vequininxin vane xa niottja mé.

⁵ ¿O ani Xa tsjeha ra tti jitaxin ley que vayé Moisés que ixin cain xidána de ngain nihngo icha importante Xonhi tiempo nchejogaha xa ngain tti nchanho que nchejogaha ni, co mé jeha ná cosa jianha para ixin jehe xa?

⁶ Co janha rrindattjo ra que jí nganji ra jaxon ná tti icha importante que nihngo mé.

⁷ Jaha ra Xa coinxinha ra tti ndaçho Dios ngain tti jitaxin Palabré que ndaçho: “Janha rinaho que jaha ra tsiaconoeha ra chojni, co nahi ixin sonhe ra coxigo para tsin ra para ixin janha.” Si jaha ra orroquinxin ra mé irronichjaha ra jianha de ixin chojni que ncheha ni ná cosa jianha.

⁸ Janha, tti Xí que joixin de ngajni, cai chonda joachaxin para tti nchanho que nchejogaha ni.

Ná xí que ndadixemadoho ná rá (Mr. 3.1-6; Lc. 6.6-11)

⁹ Cottimeja Jesús sacjoixin de nttiha, co sajoixinhi iná nihngo.

¹⁰ Co ngaxinhi nttiha tají ná xí que ndadixemadoho ná ra, co xifariseo techonhe xa quehe cosa nchaoh rrojincehe Jesús para rrocjanguihi xa. Mexinxin joanchiangui xa ngain co ndaçho xa:

—¿Ají joachaxin para que sinchexingamehe ni chojni nihi mero ngain tti nchanho que nchejogaha ni?

¹¹ Jesús ndaçho:

—Si ná de jaha ra chonda ra ná coleco, co si setsingá va ná pozo ngain tti nchanho que nchejogaha ni, ¿atsjiha ra para sigantsjea ra va? ¡Seguro que ján!

¹² Nchao, janché ndachjenji ni ra, ¿ajeha anto icha rentte ná chojni que ná coleco? Mexinxin jeha jianha para que jehe ni sinchehe ni ná cosa jian ngain tti nchanho que nchejogaha ni.

¹³ Cottimeja ndačo Jesús ngain tti xí que dixemadoho rá:

—Tinxé rá.

Co are jehe coinxe rá, ojian vittohe ra inchin ra jngo.

¹⁴ Cottimeja xifariseo mé vinttegachjexin xa de nttiha co coexinhi xa cjoao chó xa ixin quexén sinchehe xa para nasoenxon xa Jesús.

Tti dindačo profeta Isaías de ixin Jesús

¹⁵ Are Jesús conohe cain mé, jehe sacjoixin de nttiha co anto tsje chojni rroé na Jesús. Co jehe joinchexingamehe cainxin chojni nihi que vetan.

¹⁶ Co jehe vaquetonhe na que rrondateha na icha chojni ixin quensen jehe.

¹⁷ Jamé, para que joiconhe tti dicjin profeta Isaías que ndačo:

¹⁸ Yá chonda ra tti nchehe xana, tti janha coincia, tti janha anto rinaho, co de ixin jehe, janha anto chahna.

Co sanjo Espiritu Santo ngain jehe,

co jehe tti rrondate cain chojni de cainxin nación quehe jiquininxin sinchehe na.

¹⁹ Jehé xonhi chojni tsetocaho, ni tsoyaotteha chojni, ni jehe rronichjaha soji ngain chojni ngá nttiha.

²⁰ Jehé sincheanimá tti chojni que anto tangui tonhe na co jion sinchecoenhe chojni que ditticaon nchion,

hasta que cainxin chojni sinchehe na jian inchin jehe tsetonha.

²¹ Co cainxin nación satsoan que ixin jehe tti ttjenguijna chojni.

Are ndačo chojni ixin Jesús chonda joachaxín Satanás

(Mr. 3.19-30; Lc. 11.14-23; 12.10)

²² Cottimeja joicaohe na Jesús ná xí que choha vaguicon ni vanichja ixin vechonda xa ná espíritu jianha. Co Jesús joinchexingamehe xí mé para que jehe xa onchao vicon xa co onchao nichja xa.

²³ Cainxin chojni goan na admirado ngain rato mé, co vinttendačo na:

—Puede jiji tti razé David que rrochonda xajeho joachaxin que vechonda rey David.

²⁴ Pero are xifariseo vinttequinhi xa jiji, vinttendačo xa:

—Xí jiji dengui xa espíritu jianha pero de ixin joachaxín Satanás, tti rey de cain espíritu mé co tti dinhi Beelzebú cai.

²⁵ Jesús oconohe quehe tendačo xifariseo mé, mexinxin jehe ndačo ngain xa:

—Si chojni ngain ná nación chjea na para ttetocaho chó na, nación mé tsonchjenha sé, co si ná rajna o ná nindoha anto tteto na, cai tsonchjenha chojni mé sé.

²⁶ Jamé cai si Satanás dengui chó jehó, rrocho que jehó ttetocaho chó co joachaxín tsonchjenha sé, toin ndatsjexin.

²⁷ Mexinxin, si inchin ndačo ra jaha ra que janha dehngui espíritu jianha de ixin joachaxín Satanás, si jamé ¿quensen danjo joachaxin ngain chojni ra para que jehe na dengui na espíritu jianha? Mexinxin jehó chojni ra tjago que jaha ra jeha ndoa tti jaha ra xaxaon ra.

28 Pero janha dehngui espíritu jianha de ixin joachaxín Espíritu Santo de Dios, co mé rrocho que tti ttonha Dios ojí nganji ra.

29 'Ixin si ná chojni rinao santsjehe cosé iná xí tsanga de ngaxinhi nchian-doha xa, saho chonda que tsia xa.

30 'Tti chojni que ncheçoxinha tti janha rrinttaha, chojni mé ningaonna janha, co tti çhjiha nganji na janha para ttjejo na chojni, mé icha tonchjequé na.

31 'Mexinxin janha rrindattjo ra que cain chojni nchao sitjañehe na cain tti jianha que nchehe na co cain tti jianha que nichja na, pero si rronichja na jianha de ixin Espíritu Santo, Dios sinchetjañehe na palabra mé.

32 Co quexeho tti rronichja palabra jianha de ixin janha, tti Xí que joixin de ngajni, nchao sitjañehe chojni mé, pero tti chojni que rronichja palabra jianha de ixin Espíritu Santo, Dios çonhi tiempo sinchetjañehe chojni mé, ni jaxon ni después que jehe ndasene.

Nttattochjoin datsoan ni ntta de ixin ttochjoín ntta
(Lc. 6.43-45)

33 'Si nttattochjoin jian ntta, cai ttochjoin que nchechjian ntta jian tto; co tti nttá çonhi xé, cai ttochjoin que nchechjian ntta çonhi xé tto. Mexinxin cada nttattochjoin datsoan ni ntta de ixin ttochjoín ntta.

34 Jaha ra inchin xenhe conché! ¿Queçén nchao rronichja ra cosa jian si jaha ra jianha ra? Rroha ni nichja cain tti jí ngain ansén ni.

35 Ná chojni jian jehe nichja cosa jian ixin tti jian jí ngain ansén; co ná chojni jianha jehe nichja cosa jianha ixin tti jianha mé jí ngain ansén.

36 Co janha rrindattjo ra que are ngain tti nchanho que Dios sinchejuzguehe cainxin chojni, are mé cainxin na chonda que tsjenga na hna de ixin cain palabra que çonhi xé ndaço na.

37 Ixin inchin rronichja jaha, jamé Dios sinchejuzgá nganji. Co are mé tsonoha si ján rrica o ni çonhi rrica.

Are chojni jianha joanchia na ná milagro
(Mr. 8.12; Lc. 11.29-32)

38 Cottimeja canxion xifariseo co canxion ximaestroe ley Israel vinttendaço xa ngain Jesús:

—Maestro, janha na rinaho na sicon na que jaha sinchehe ná milagro.

39 Jesús ndaço ngain xa:

—Chojni jianha que ditticaonha na Dios rinao na sicon na ná milagro, pero chojni mé Dios tsjagoeha na icha milagro que jeha inchin tti conhe profeta Jonás.

40 Ixin jamé inchin Jonás vehe ní nchanho co ní ttie ngaxinhi tsehe copescado jie, jamé janha cai, tti Xí que joixin de ngajni, sarihi ngadoho nontte ní nchanho co ní ttie.

41 Cain chojni que vintte ngain ciudad de Nínive, jehe na singattjen na ngain tti nchanho are Dios sinchejuzguehe cainxin chojni para rrocho na jie para ixin cain chojni de ngain tiempo jiji, ixin jehe na coentoxinhi na vidé na are Jonás joindache na joajné Dios. Co nttihi nganji ra jaxon jí ná tti icha importante que Jonás, pero jaha ra çhoha ra ditticaon ra.

42 Cai tti reina que joixin de ngain nontte Sabá icha sur, singattjen ngain tti nchanho are Dios sinchejuzguehe cainxin chojni de ngain tiempo jiji para que reina mé rrocho jie para ixin jehe na ixin jehe reina mé joixin anto cjin

para joiquinhi tti venohe Salomón, co nttihi nganji ra jaxon jí ná tti icha importante que Salomón.

Tti espíritu jianha que cjan
(Lc. 11.24-26)

⁴³ Co Jesús ndačho cai:

—Are ná espíritu jianha dačhjexin de ngain cuerpoe ná chojni, espíritu mé sattji ngain tsje lugar xema para dicjé ttinó sinchejogaha, co are jehe idittjaha lugar mé, jehe řaxaon:

⁴⁴ “Janha rrocjan na ngain nchiania tti vačhjexin.” Co are jehe espíritu jianha mé cjan, dittja ngain cuerpoe chojni mé inchin ná nchia que řonhi chojni te, tti diganjo na jian, co cain roa ngaxinhi nchia mé.

⁴⁵ Cottimeja jehe espíritu jianha mé dirróé iyáto espíritu icha jianha que jehe para que dintte cain espíritu mé ngaxinhi cuerpoe chojni mé, co chojni mé cjan icha tangui tonhe que are saho. Co jamé tsonhe ngain chojni jianha tehe cai.

Janné Jesús co xanchó
(Mr. 3.31-35; Lc. 8.19-21)

⁴⁶ Jesús řa jinichja cain yá ngain chojni are jói janné conixin xanchó Jesús ixin joinao na rronichjé na Jesús, pero ndoja tavintte na ixin tsje chojni sinxinhi nchia tti jí Jesús.

⁴⁷ Ná chojni ndačho ngain Jesús:

—Janná co xanchó ndoja nttihi te na co rinao na rronichja na nganji.

⁴⁸ Pero Jesús ndačho ngain chojni mé:

—¿Quensen jannana, co quecá xanchian?

⁴⁹ Cottimeja jehe cjoago ngain chojni que vacao co ndačho:

—Chojni tehe tti inchin jannana co jehe na tti inchin xanchian,

⁵⁰ ixin quexeho chojni que nchehe inchin rinao Ndodana que ttjen ngajni, chojni mé tti xanchian co chojni mé tti jannana.

13

Ejemploe tti joiquenga trigo ngataon jngui
(Mr. 4.1-9; Lc. 8.4-8)

¹ Ngain nchanho mé Jesús vačhjexin de nchia mé co sacjoi para ngandehe lago.

² Pero anto daca řatte anto tsje chojni ngain jehe, mexinxin jehe coani ná barco para ngataonhe jinda mé co de nttiha ndachexin cain chojni mé de ixin Díos. Cain jehe na tavintte na ngandehe jinda mé.

³ Ngain rato mé jehe joinchegonda tsje ejemplo para joinchecoenhe na tsje cosa. Saho jehe ndačho:

—Ná xí cjoi xa joiquenga xa trigo ngataon jngui.

⁴ Co are coexinhi xa cjoa xa trigo ngataon jngui, canxion noanchjan de trigo vinttji ngá nttiha, co jói conttoa ndajoine va trigo mé.

⁵ Co icha noanchjan de trigo vinttji ngataha tti jí ttjao tti ttjinha jinche jí, co trigo mé anto daca řinhi ixin tsjeha jinche řanotaon.

⁶ Pero are řinhi nchanho, ndaxehntte catrigo mé, co ixin řonhi noehe ca vechonda ca, anto daca ndaxema ca.

⁷ Co icha noanchjan de trigo vinttji ngacjan canchaha, co canchaha mé icha daca vangui ca co coančjandaha ca trigo para vangui.

⁸ Pero icha noanchjan de trigo vinttji tti jí jian jinche, co mé joanjo jian cosecha. Canxion nihi trigo mé joanjo de cien noanchjan cada trigo, icanxin trigo joanjo de sesenta noanchjan, co icanxin trigo joanjo de treinta noanchjan, cada trigo.

⁹ Si jaha ra ttinxin ra, ttinhi ra jian.

Quedonda Jesús joinchegonda tsje ejemplo

(Mr. 4.10-12; Lc. 8.9-10)

¹⁰ Cottimeja tti chojni que vacao Jesús conchienne na ngain co ndačo na: —¿Quedonda ndache chojni conixin ejemplo?

¹¹ Jesús ndačo ngain na:

—Jaha ra Dios ndačo para que tsonoha ra quexén tetonha jehe ngain ansén chojni, pero jehe na čhoha tsonohe na.

¹² Tti ttinxin, Dios sinchequinxin icha para que jehe icha tsinxin; pero tti xonhi ttinxin, Dios santsjehé hasta tti nchion que jehe ttinxin.

¹³ Mexinxin janha ndattjan na de ixin ejemplo ixin jehe na dicen na pero inchin rroguiconha na, co jehe na ttinhi na pero inchin rroquinha na ixin ttinxinha na tti jehe na ttinhi na.

¹⁴ Jañá tti jehe na tenchehe na yá joiconhe tti dindačo Dios ngain profeta Isaías are Isaías dicjin:

Jaha ra seguro tsinhi ra, pero tsinxinha ra; sicon ra, pero satsoanha ra.

¹⁵ Ixin ansean ra atto ndaconcha,

co ndatsjoan ra ttjenguijnaha ra para daca tsinxin ra, co masqui tonoha ra que jmacon ra teẁangué, pero ttejé, para que rrochonxinha ra tti jaha ra dicen ra, ni tsinxinha ra tti jaha ra ttinhi ra, ni ansean ra tsinxinha,

ni rroẁaxaonha ra sihi ra nganji na janha para que janha tsjenguijna ra.

¹⁶ Cottimeja Jesús cjan ndačo ngain chojni que vacao:

—Pero janha ndačhjan que anto čhjoin para ixin jaha ra ixin chonxin ra tti dicen ra, co ttinxin ra tti ttinhi ra de ngain ndatsjoan ra.

¹⁷ Janha seguro rrindattjo ra que are icha saho tsje profeta co tsje chojni jian de ngain ansén joinao na rroguicon na cain tti jaha ra tedicon ra jaxon, pero jehe na iviconha na. Co cai joinao na rroquinhi na cain tti jaha ra tettinhi ra jaxon, pero jehe na icoinha na.

Jesús ndačo quehe rročo ejemploe tti joiquenga trigo

(Mr. 4.13-20; Lc. 8.11-15)

¹⁸ Ttinhi ra quehe rročo ejemploe tti joiquenga trigo ngataon jngui.

¹⁹ Tti chojni que ttinhi tti joajna de ixin quexén siquetonha Dios ngain ansén na, co jehe na ttinxinha na joajna mé, chojni mé inchin tti trigo que vinttji ngá ntiha. Co ttí inchínji co jehe ndanchetjanji na joajné Dios que vittohe ngain ansén na.

²⁰ Co tti trigo que vinttji ngataha tti jí ttjao, mé rročo tti chojni que ttinhi joajné Dios co jehe na anto čhjoin tonoha na dayé na joajna mé.

²¹ Pero inchin trigo mé chondaha tsje noehe seha tončhjenhe trigo, jamé jehe chojni mé cai are tangui tonhe na co icha chojni feo nchehe ngain na ixin ditticaon na joajné Dios, cottimeja jehe na ndadoan na desanimado.

²² Co tti trigo que vinttji ngacjan canchaha, mé rročo tti chojni que ttinhi joajné Dios, pero jehe na icha ẁaxaon na cain cosa que jí ngataha nontte jihi

co tomi, mé tti ncheyehe na, co cain mé tti ndanchetjañehe na joajné Dios co incheha na inchin ttetonha joajna jiji.

²³ Pero tti trigo que vinttji ngain tti jian jinche, mé rrocho tti chojni que ttinhi joajné Dios co ttinxin na, co jehe na inchin tti trigo que anto tsje noa joinchechjian. Canxion jehe na inchin tti trigo que joinchechjian cien noa ngain nacoa ninchjan, co icanxin na inchin tti trigo que joinchechjian sesenta co de treinta noa ngain nacoa ninchjan.

Ejemplo ca xonhi xé ngagaha trigo

²⁴ Cottimeja Jesús ndacho ngain na iná ejemplo jiji:

—Rrondattjo ra quexén ttetonha Dios que ttjen ngajni. Mé inchin ná xí que coenga jian trigo ngain jnguihi.

²⁵ Pero ttie are cain chojni tatejoa na, cjoí ná chojni ntthiha que ningaconhe jehe tti jnguihi mé co coenga anto tsje tsehe ca que xonhi xé ngain jngui mé, co sacjoi.

²⁶ Are trigo mé vangui, ocoexinhi joinchechjian ninchjan, hasta are mé cononxin quehe clase de ca jí ntthiha.

²⁷ Cottimeja ninchehe xé tti jnguihi mé cjoí na joindaço na ngain: “Si tti trigo que soixin coenga ngataon jngui cjoí joxon trigo jian, ¿quettinó joixin ca jiji que xonhi xé?”

²⁸ Tti jnguihi mé ndaço ngain na: “Çhonja chojni que ningaconna joinchehe jiji.” Cottimeja ninchehe xa joanchiangui na co ndaço na: “¿Arinao tsji na janha na sigantsjengui na cain ca mé?”

²⁹ Pero tti jnguihi ndaço ngain na: “Nahi, ixin are santsjengui ra ca mé, santsjengui ra trigo cai.

³⁰ Icha jian tançhanda ra ca sanguicaho ca trigo hasta are cosecha, cottimeja janha rrorroanha ninchehe xana para que saho santsjegaha na ca yá, co tsia na ca para rroche ca, cottimeja tsenchjinha na joxon trigo ngain nchiania.”

Ejemplo ná tsé que dinhi mostaza

(Mr. 4.30-32; Lc. 13.18-19)

³¹ Cai ndaço Jesús ngain na ejemplo jiji:

—Tti ttetonha Dios ngain ansén chojni, mé inchin ná tsé de ca que dinhi mostaza que ná xí ttenga ngataon jnguihi xa.

³² Tsé mé anto icha nchinnchin tse que cainxin tsehe icha ca; pero qué tsé mé anto dangui ca hasta icha jie diji ca que cain icha ca. Co dangui ca inchin ná nttá jie que hasta conttoa nchechjian va caqué va ngagaha ramé ca mé.

Ejemplo levadura

(Lc. 13.20-21)

³³ Cai ndaço Jesús ngain na ejemplo jiji:

—Tti ttetonha Dios ngain ansén chojni, mé inchin levadura que ná chojni ttinttjecjan ngain hariné niottja para que nchegangui nchoho.

Quexén vanchegonda Jesús cain ejemplo

(Mr. 4.33-34)

³⁴ Jesús ndaço cain jiji ngain chojni de ixin ejemplo, co si jeha de ixin ejemplo, jehe xonhi vandaço ngain na.

³⁵ Jañá conhe para joiconhe tti dindaço Dios ngain profeta are jehe dicjin janhi:

Janha rronichja de ixin ejemplo;

janha rrondačhjan cosa que vinttema desde que are nontte conchjian nontte.

Jesús ndačho quehe rročho ejemploe tti ca que čhinhi ngagaha trigo

³⁶ Jesús joanjo joajna ngain cain chojni mé, cottimeja jehe conixin chojni que vacao sacjan na para ngain tti nchia que vintte na are mé. Are ongain nchia mé cain chojni que vacao conchiennehe na co ndačho na ngain:

—Ndanchenji ni ra quehe rročho ejemploe tti ca que čhinhi ngagaha trigo ngataon jngui.

³⁷ Cottimeja Jesús ndačho:

—Tti ttenga jian trigo, mé janha, tti Xí que joixin de ngajni.

³⁸ Co jngui rročho mundo jihi. Co tti jian trigo, mé rročho tti cain chojni que chonda parte ngain tti ttetonha Dios, co tti ca que čhinhi ngagaha trigo, mé rročho tti cain chojni que nchehe inchin ttetonha inchínji.

³⁹ Co tti coenga ca, mé tti ningaconna, co mé rročho mero inchínji. Co cosecha rročho are ondatsjexin mundo. Co tti satse cosecha jihi, mé cain ángel de Dios.

⁴⁰ Jamé inchin ca que čhinhi ngagaha trigo xatse ca para che ca ngacjan xohi, cai jamé tsonhe chojni inchínji are ondatsjexin mundo jihi.

⁴¹ Janha, tti Xí que joixin de ngajni, rrorroanha tsje ángel para sigantsjeyexin de ngain chojni que ditticaon na janha tti cain chojni que ncheyehe icha chojni para nchehe na jianha, co cain chojni que nchehe jianha,

⁴² para siguinttjiate na ngacjan xohi. Nttiha tti rrotsjanga na co sinetaon neno na.

⁴³ Cottimeja cain tti chojni que nchehe inchin rinao Dios, chojni mé tsonguixima na inchin nchanho ngain lugar tti ttetonha Ndodá na que ttjen ngajni. ¡Si jaha ra ttinxin ra, ttinhi ra jian!

Ejemploe tti tesoro que jiřavá

⁴⁴ Jesús ndačho iná ejemplo jihi:

—Tti ttetonha Dios ngain ansén chojni, mé inchin ná tesoro que jiřavá ngataon ná jngui. Are ná xí dittja xa tesoro mé, cjan xa tjavá xa nttiha iná. Cottimeja anto ché xa sacjan xa nchiandoha xa, nchecji xa cainxin cosa que chonda xa co tehna xa jehe tti nontte que jiřavá tesoro mé.

Ejemploe tti perla que anto rentte

⁴⁵ Co cai tti ttetonha Dios ngain ansén chojni, mé inchin tti perla que anto rentte. Co xitachji perla,

⁴⁶ are dittja xa perla mé, jehe xa ttji xa co nchecji xa cainxin cosa que chonda xa para ttenanxin xa perla mé.

Ejemploe ná nonchaha

⁴⁷ Co cai tti ttetonha Dios ngain ansén chojni, mé inchin ná nonchaha que tja na ngangui jinda co tse cain clase de copescado.

⁴⁸ Are ondacaon nonchaha mé de copescado, xitse va dantsjengui xa nonchaha mé hasta tti ngandehe jinda. Co nttiha ttinchiehe xa cain copescado; tti copescado jian ttenga xa va ngain ntača co copescado que xonhi xé jehe xa ttinttji xa va.

⁴⁹ Jamé tsonhe are ondatsjexin mundo jihi; tsí tsje ángel de Dios para santsjenda cain chojni que nchehe jianha de ngayehe chojni que nchehe jian.

⁵⁰ Co ángel mé rrorroanha cain chojni que nchehe jianha para ngacjan xohi, nttiha tti jehe na rrotsjanga na co sinetaon neno na.

Tti tesoro naroaxin co tti tesoro onttaxí

⁵¹ Cottimeja Jesús joanchiangui ngain chojni que vacao, co ndačo:

—¿Attinxin jaha ra cain jiji?

Jehe na vinttendačo na:

—Ján.

⁵² Cottimeja Jesús ndačo:

—Mexinxin cain jiji rročo que are ná ximaestroe ley Israel ditticaon xa tti janha ndačhjan, jehe xa inchin ná chojni que diquenchjinha yó tesoro ngaxinhi nchiandoha co jehe nchao dantsje tesoro naroaxin co tesoro nttaxí. Ixin ximaestroe ley mé nchao nchecoenhe xa chojni quehe ttetonha ley mé co jai cai nchao ndache xa chojni tti ndačhjan janha. Mexinxin rročo que chonda xa yó tesoro, tti nttaxí co tti naroaxin.

Jesús ngain Nazaret

(Mr. 6.1-6; Lc. 4.16-30)

⁵³ Are Jesús joexin ndačo cain ejemplo jiji, jehe sacjoixin de nttiha.

⁵⁴ Co sacjoi para Nazaret, tti jehe vanguixin. Nttiha coexinhi joinchecoenhe chojni de ixin Dios ngain ningoe na, co cain chojni nttiha vagoan na admirado co ndačo na:

—¿Queéén coanguixin xí jiji? Ixin anto nohe xa jai. ¿Queéén nchao nchehe xa cain milagro jiji?

⁵⁵ Ixin xí jiji xitsihi tti carpintero co janné xa María, co xanchó xa Jacobo, co José, co Simón, co Judas.

⁵⁶ Co cai xanchó xa xannché nttihi te xan ngain rajná na jiji. ¿Queéén coanguixin xa cain tti nohe xa yá?

⁵⁷ Mexinxin jehe na čhoha na joinchehe na caso tti ndačo Jesús. Pero Jesús ndačo ngain na:

—Cain chojni nchesayehe na ná profeta pero nahi profeta que ttixin de ngain xajeho rajné na o profeta que ttixin de ngain xajeho nindoha na.

⁵⁸ Co tsjeha milagro joinchehe Jesús nttiha ixin chojni nttiha vitticaonha na Jesús.

14

Queéén ndavenhe Juan, tti vancheguitte chojni

(Mr. 6.14-29; Lc. 9.7-9)

¹ Ngain tiempo mé Herodes, tti vehe gobernador nttiha Galilea, jehe cai conohe tti vanchehe Jesús.

² Co jehe mé ndačo ngain chojni:

—Jehe xí yá, mé Juan, tti vancheguitte chojni, que xechon. Mexinxin chondaxin joachaxin de nchehe milagro yá.

³ Ixin Herodes tti coetonhe xisoldadoe para tse xa Juan co coia xa co joiquiaxinhi xa ngain cárcel. Herodes joinchehe jañá ixin causexin ná nčí que vinhi Herodías tti cjoí nčíchihi ná xichó jehe Herodes que vinhi Felipe.

⁴ Juan vandačo ngain Herodes:

—Jianha ixin rricoho nčí yá.

⁵ Herodes desde are mé joinao narrogoenxon Juan, pero vañaoncoa ngain chojni ixin cainxin na vaguitticaon na que Juan vanichja joajné Dios que jehe vagayé.

⁶ Pero are quié Herodes, ná n̄chichjehe jehe Herodías joí n̄tha co tte n̄tha són ngattoxon con cain chojni que te ngain Herodes rato mé. Co Herodes anto joincheḡoxinhi queḡén tte xann̄chí mé,

⁷ hasta que joinchejurá Herodes que jehe sanjo ngain xan quexeho ná cosa que jehe xan sanchia xan ngain jehe.

⁸ Co jehe xan ocoá xan consejo de ngain janné xan, mexinxin ndaḡo xan ngain Herodes:

—Chjana ngá na láto já Juan, tti n̄cheguitte chojni.

⁹ Co rey Herodes are coinhi jihi, jehe anto vechín, pero ixin jehe ondaḡo que seguro sanjo quexeho cosa que jehe xann̄chí mé sanchia xan, co ixin coinhi cain chojni que tate ngain Herodes rato mé, mexinxin jehe coetonha que sayé xann̄chí mé tti jehe xan joanchia xan.

¹⁰ Herodes coetonha para joicon̄chinjhi na já Juan ngain cárcel.

¹¹ Cottimeja joiaho na já Juan ngá ná láto, joanjo na ngain xann̄chí mé, co jehe xan joanjo xan ngain janné xan.

¹² Cottimeja vinttequí chojni que vacao Juan para sajoicoa na cuerpoe Juan co joicjavá na. Cottimeja cjoí na para joinchenohe na Jesús.

*Are Jesús joanjo joine naho mil xí
(Mr. 6.30-44; Lc. 9.10-17; Jn. 6.1-14)*

¹³ Are Jesus conohe yá, jehe coani ná barco co sacjoi jecho ngain ná lugar tti ḡonhi chojni te. Pero chojni vicon na para ttinó sacjoi, co tsje chojni de ngain rajna nttiha rroé na conixin rotté na.

¹⁴ Mexinxin are Jesús joiji nttiha co vaḡhjexin de barco mé, vicon anto tsje chojni sinchonhe nttiha, co jehe coiaconoeha na co joinchexingamehe cain chojni nihi que joiaho na.

¹⁵ Co ixin ocoexinhi conaxin xehe, chojni que vacao Jesús conchienne na co ndaḡo na ngain jehe:

—Otsocjin co ḡonhi nchia jí ngain lugar jihi. Ndache cain chojni que onchao, para que jehe na sasintteci na ngain rajna para siquehna na tti sine na.

¹⁶ Jesús ndaḡo:

—Chondaha na que sasintteci na; danjo ra jaha ra tti sine na.

¹⁷ Jehe na ndaḡo na:

—Janha na nttihi ḡonhi chonda na, jecho naho niottja co yó copescado.

¹⁸ Jesús ndaḡo:

—Sicohna ra cain yá nttihi.

¹⁹ Cottimeja jehe coetonhe cainxin chojni para tavintte na ngataha ca ngataha nontte. Cottimeja jehe coá tti naho niottja ngá rá co tti yó copescado co tsjehe para ngajni, joanjo gracias ngain Dios co váña niottja mé co joanjo nio ngain chojni que jehe vacao para que jehe na conchjea na nio ngain cainxin chojni mé.

²⁰ Cainxin chojni mé joine na, co cojehe na jian, co después ḡa joinchecaon na tteyó ntaḡa de pedazo que xexin joine na.

²¹ Tti chojni que joine niottja mé cjoí inchin naho mil xí, aparte n̄chí co icha xann̄chinn̄chinchjan.

*Jesús cjoixin rotté ngataonhe jinda
(Mr. 6.45-52; Jn. 6.16-21)*

²² Cottimeja Jesús coetonhe tti chojni que vacao para coani na barco co satto na toenxin jinda mé icha saho que jehe ixin jehe xa vittohe nttiha ixin jidoan despedido de ngain cain chojni mé.

²³ Co después de goan despedido de ngain cain chojni mé, jehó coani ná jnanchjan para joinchecoanxinhi Dios. Co are ondaconttie Jesús nttiha tají jehó.

²⁴ Co barco que sajoicao tti chojni que vacao ojojii barco ngosine jinda mé. Co olé nda coexinhi cjoinhi nganito barco mé ixin čhintto anto soji joixin čhintto de tti satettji na.

²⁵ Co are ochiaon vingasán Jesús conchienne ngain na jittjixin rotté ngataonhe jinda.

²⁶ Co are tti chojni que vacao vicon na que jehe jittjixin rotté ngataonhe jinda, jehe na vinttexaon na, co de joaxaon jehe na vinttecoyao na sén co ndačo na:

—¡Yá ná nttanchanha!

²⁷ Pero Jesús nichjé na co ndačo ngain na:

—¡Xaonha ra, ixin janha joihi!

²⁸ Cottimeja Pedro nichja ngain co ndačo:

—Si ndoa soixin, ttetonna tsjixin rottena ngataonhe jinda hasta tti ttjen soixin.

²⁹ Co Jesús ndačo ngain:

—Xacoi remé.

Cottimeja Pedro vanianxin de barco mé co coexinhi cjoixin rotté ngataonhe jinda para sarrocji ngain tti jí Jesús.

³⁰ Pero are jehe conohe ixin anto soji čhintto, jehe xaon co ixin jehe coexinhi ndaxincanjingui jinda, jehe ndačo sén:

—¡Tanchjandaha na rroxincanjingui na jinda!

³¹ Ngain rato mé Jesús tsehe rá co ndačo ngain:

—¡Jaha tantoha ditticaon! ¿Quedonda joidoho joaxaon?

³² Co are cayoi jehe na coani na barco mé, otavehe čhintto.

³³ Cottimeja nidiguittohe ngaxinhi barco mé vinttetoxin nttajochjihi na ngain Jesús, co vinttendačo na:

—Ján ndoa, soixin Xenhe Dios.

Jesús joinchexingamehe tsje chojni nihi ngain nonttehe Genesaret (Mr. 6.53-56)

³⁴ Coattoa na jinda mé, co joihi na ngain nonttehe Genesaret.

³⁵ Are chojni de ngain lugar mé joatsoan na que jehe Jesús, jehe na joinchenohe na chojni de ngoixin región mé, co joiaho na cain chojni nihi ngain Jesús.

³⁶ Co vanchetsenhe na ñao Jesús ixin sanjo joachaxin ngain cain tti nihi mé de rrocate na masqui jehó rioho ngandehé lonttoe, co cainxin chojni que cate lonttoe Jesús, xingamehe na de ixin tti chin que vinttechonda na.

15

Tti nchejianha chojni (Mr. 7.1-23)

¹ Cottimeja vintteconchiehe ngain Jesús canxion xifariseo co canxion ximaestroey ley Israel que vinttequixin xa de ngain ciudad de Jerusalén, co joanchiangui xa ngain Jesús co ndačo xa:

² —¿Quedonda chojni que ċhjiho ncheha na tti costumbre que coetonha nigoelitona xanċhjen? Ixin jehe na tonttiha na jinda rá na tsje nttiha saho que sine na.

³ Pero Jesús joanchiangui ngain xa co ndaċho:

—¿Quedonda jaha ra ncheha ra tti ttetonha Dios co jeha nchehe ra inchin costumbre que jaha ra chonda ra?

⁴ Ixin Dios coetonha: “Ttjiho ra respeto ngain ndodá ra co ngain janná ra”, co “Tti rronichja jianha de ixin ndodé o janné, chojni mé jiquininxin nasenxon.”

⁵ Pero jaha ra ndaċho ra que ná chojni nchao rrondache ndodé o janné: “Janha ċhoċha tsjenguijna soixin ixin cain cosa que janha chonda, ojoanjo ngain Dios.”

⁶ Co jaha ra ndaċho ra que quexeho chojni que rrondaċho jañá, irrochondaha na que tsjenguijna na ndodé na o janné na. Jañá jaha ra incheha ra caso tti coetonha Dios co nchehe ra inchin costumbre que jaha ra chonda ra.

⁷ ¡Jaha ra ncheha ra tti ndaċho ra! Jian dindaċho profeta Isaías de ixin jaha ra, are jehe dicjin:

⁸ Chojni tehe nchesayana na de ngain rroha na, pero de ngain ansén na xá icjin te na para sino na na janha.

⁹ Mexinxin xonhi xé masqui tenchecoanxinna na;

ixin tti jehe na tenchecoenhe na chojni joxon tti ttetonha xí nttihi ngataha nontte.

¹⁰ Cottimeja Jesús vayé cainxin chojni que vintte nttiha co ndaċho ngain na:

—Ttinh ra tti rrondattjo ra co ttinxin ra jian:

¹¹ Jeha tti jine co tti dihi chojni nchejianha na, sino que cain palabra jianha que daċhjexin de rroha na, mé tti nchejianha na.

¹² Cottimeja tti chojni que vacao Jesús conchienne na ngain co ndaċho na:

—¿Añoaha soixin ixin xifariseo yá feo vintteconohe xa are vinttequinhi xa tti soixin ndaċho?

¹³ Pero Jesús ndaċho ngain na:

—Quexeho nttattochjoin que Nnodana que ttjen ngajni cjoengaha, nttá mé chonda que saċhjenguinoa nttá.

¹⁴ Tanċhjanda ra xa ncheha ra xa caso ixin jehe xa inchin tti diconha que dicao iná tti diconha. Co jañá si ná tti diconha sicao iná tti diconha, cayoi chojni mé sinttjia na ngain ná toe.

¹⁵ Cottimeja Pedro ndaċho ngain Jesús:

—Ndachjenji na quehe rroċho ejemplo yá.

¹⁶ Jesús ndaċho:

—¿Acai jaha ra ttinxinha ra?

¹⁷ ¿Attinxinha ra que cain tti jine ni sattji para ngaxinhi tsehe ni, cottimeja daċhjexin de ngain cuerpoe ni?

¹⁸ Pero tti palabra que daċhjexin de ngain rroha ni ttixin de ngain ansén ni, co palabra mé tti nchejianha ni.

¹⁹ Ixin de ngain ansén chojni ttixin cain cosa jianha que jehe na xaxaon na, co jehe na xaxaon na para santsjehe na vidé iná chojni, co jehe na dinttejoacaho na iná nċhi que jeha nċhichihí na, jehe na tté na cosé iná chojni, jehe na nichja na ndoaha de ná cosa, co jehe na nchexoxinhi na nichja na cuentoe iná chojni que jeha ndoa.

²⁰ Cain cosa yá tti nchejianha chojni, pero tti tonttiha na jinda tsje nttiha saho que sine na, jeha mé tti nchejianha na.

Ná nchí de iná nacion que vitticaon ncha Jesús

(Mr. 7.24-30)

²¹ Jesús vaçhjexin de nttiha co sacjoi para regioen ciudad de Tiro co Sidón.

²² Co ná nchí que joixin de ngain nacioen Canaán tiempo mé vehe ncha ngain región mé, co joí ncha ngain Jesús co ndaço ncha sén:

—¡Soixin tti razé David, nttatsanha ñao ttiaconoana na! Ná xanhna xannchí chonda xan ná espíritu jianha co anto tangui tonhe xan.

²³ Pero Jesús joincheha caso nchí mé. Cottimeja tti chojni que vacao joí na ngain co joinchetsenhe na ñao Jesús co ndaço na:

—Ndache nchí jiha satsji ncha ixin atto sén jinichja ncha jirroá na ncha.

²⁴ Cottimeja ndaço Jesús ngain ncha:

—Dios rroanha na janha pero jeha para ngain chojni de nacioen Israel que ndadiguitján inchin coleco.

²⁵ Pero nchí mé conchienhe ncha co vettoxin nttajochjihi ncha ngain Jesús co ndaço ncha:

—¡Nttatsanha ñao ttjenguijna na soixin!

²⁶ Jesús ndaço ngain nchí mé:

—Nchaoha jí si ná chojni santsjehe xenhe niottja para rrochjé conia nio.

²⁷ Pero jeha nchí mé ndaço ncha:

—Ján ndoa, pero hasta conia nchao jine va tti nchoe niottja que dinttjixin de ngataha mesé nindoha va.

²⁸ Cottimeja Jesús ndaço ngain nchí mé:

—¡Jaha anto jian ditticaon! Tsonhe inchin jaha rinao.

Co ngain rato mé xenhe tti nchí mé ndaxingamehe xan.

Are Jesús joinchexingameje tsje chojni nihi

²⁹ Jesús sacjoixin de nttiha co vatto ngandehe lago de Galilea, cottimeja coani ngataha ná jna co tavehe nttiha.

³⁰ Tsje chojni joí ngain Jesús tti jeha tají, co joiaho na ngain Jesús tsje chojni nihi; tti rrengo, tti chejo, tti ttao, tti chonda rá que xonhi xé ra, co icha ninihi. Cain chojni mé coín na ngandaxinhi Jesús, co jeha joinchexingamehe cainxin na.

³¹ Co cainxin chojni que te nttiha goan na admirado are jeha na vicon na que tti chojni ttao onchao nichja, co tti vaquín rá ondaxingamehe, co tti rrengo onchao sacjoixin rotté, co tti chejo onchao vicon. Co cainxin chojni mé coexinhi na joinchecoanxinhi na Dios de chojni Israel.

Are Jesús joanjo joine nó mil xí

(Mr. 8.1-10)

³² Cottimeja Jesús vayé tti chojni que vacao co ndaço ngain na:

—Janha ttiaconoá cain chojni tehe ixin ochonda ní nchanho que te na nttihi nganji na, co xonhi chonda na para sine na. Janha rinaoha rrorroanha na para nchiandoha na si sineha ná ixin puede ndatsonchjenxin na jintta ngatja nttiha.

³³ Cottimeja tti chojni que vacao Jesús ndaço na ngain:

—Pero ¿quexén sonttó na tti sine na jeha na? Ixin anto tsje na, co nttihi ngain lugar jihi xonhi nchia jí.

³⁴ Jesús joanchiangui ngain jeha tti chojni que vacao co ndaço:

—¿Quejanhi niottja chonda ra?

Co jeha na ndaço na:

—Yáto niottja co nchion copescadochjan.

³⁵ Cottimeja Jesús coetonhe cain chojni mé que tasintte na ngataha nontte.

³⁶ Co jehe coá tti yáto niottja mé co copescado co joanjo gracias ngain Dios. Cottimeja váña nio co copescado co joanjo ngain tti chojni que vacao, co jehe na conchjea na nio conixin copescado ngain cainxin chojni mé.

³⁷ Cainxin na joine na co cojehe na jian. Cottimeja xa joincheaon na yáto nntaxa de tti xexin joine na.

³⁸ Cain chojni que joine mé cjoi nó mil xí co icha nêhí co chjan.

³⁹ Cottimeja Jesús goan despedido de ngain cainxin chojni mé, co joixinhi barco co sacjoi para regioen Magdala.

16

Xifariseo co xisaduceo joanchia xa ixin Jesús rrojinchehe ná milagro (Mr. 8.11-13; Lc. 12.54-56)

¹ Xifariseo co xisaduceo cjoi xa vintteguitsjehe xa Jesús, co para que rroguicon xa que Jesús rrojinchehe ná cosa nchaoha, jehe xa ndačo xa ngain que jehe rrojinchehe ná señal de milagro que rroquixin de ngajni.

² Pero Jesús ndačo ngain xa:

—Are totsocjin jaha ra ndačo ra: “Anto čhjoin tsí nchanho ndoe ixin ngajni jatse.”

³ Co are ndoyo ndačo ra: “Jai čhjoinha sehe nchanho ixin jatse ngajni co jáá ttjoi.” ¡Jaha ra ncheha ra tti ndačo ra! Jaha ra noha ra datsoenhe ra quežén sehe tiempo are tsjehe ra ngajni, pero noaha ra datsoenhe ra quehe rročo señal de ngain tiempo jiji.

⁴ Jaha ra chojni jianha de ngain tiempo jiji que ditticaonha ra co tedanchia ra ná señal de milagro. Pero xonhi icha señal sayehe ra que jecho inchin señal que conhe Jonás.

Jańá čo Jesús ngain xa, co cointtohe xa ntthiha co jehe sacjoi.

Tti levaduré xifariseo (Mr. 8.14-21)

⁵ Are tti chojni que vacao Jesús vatto na toenxin lago mé, jehe na tjañehe na de joicao na niottja para rrojine na.

⁶ Cottimeja Jesús ndačo ngain na:

—Tsjenxin ra, ttjiho ra cuidado de ixin levaduré xifariseo co levaduré xisaduceo.

⁷ Co tti chojni que vacao Jesús coexinhi na ndache chó na:

—Jańá ndattjo na na ixin ján na joicocha na niottja para sontte na.

⁸ Jesús conohe quehe tetjao na co jehe ndačo ngain na:

—¿Quedonda ndačo ra ixin chondaha ra niottja? ¡Jaha ra seguro que tantoa ditticaon ni ra!

⁹ ¿Axa ttinxinha ra, ni xaxaonha ra de tti naho niottja que janha conchjeyá tti naho mil xí, co ixin tsje nntaxa joincheaon ra de tti niottja que xexin joine na?

¹⁰ ¿Ani xaxaonha ra de tti yáto niottja que conchjeyá tti nó mil xí, co ixin tsje nntaxa joincheaon ra de tti niottja que xexin joine na?

¹¹ ¿Quežén xaxaonxin ra que janha rrindačhjan de ixin tti sintte ra are ndačhjan ixin tsjiho ra cuidado de ixin levaduré xifariseo, co levaduré xisaduceo?

¹² Cottimeja jehe na coinxin na que Jesús jeha jindache na ixin sicao na cuidado de ixin levaduré niottja, sino que tti tenchecoenhe xifariseo icha chojni co tti tenchecoenhe xisaduceo icha chojni.

*Pedro ndaĉho que Jesús, mé tti Cristo
(Mr. 8.27-30; Lc. 9.18-21)*

¹³ Are Jesús joiĵi ngain regioen Cesarea de Filipino, jehe joanchiangui ngain tti choĵni que vacao co ndaĉho:

—¿Quehe ndaĉho choĵni ixin quensen na janha, tti Xí que joixin de ngajni?

¹⁴ Jehe na ndaĉho na:

—Canxion choĵni ndaĉho na que jaha Juan tti vancheguitte choĵni, icanxin na ndaĉho na que jaha Elías, co icanxin na ndaĉho na que jaha Jeremías o iná profeta.

¹⁵ Cottimeja ndaĉho Jesús ngain tti choĵni que vacao:

—Co jaha ra, ¿quehe ndaĉho ra ixin quensen na janha?

¹⁶ Cottimeja ndaĉho Simón Pedro:

—Soixin tti Cristo, tti Xenhe Dios que jichon.

¹⁷ Jesús ndaĉho ngain Pedro:

—Anto ĉjoin para ixin jaha, Pedro, tti xenhe Jonás, ixin ni ná choĵni ndattjoha yá, sino que Ndodana que ttjen ngajni tti ndattjo yá.

¹⁸ Co janha rrindattjo que jaha dinhi Pedro, co nombre jĵi rroĉho űo. Co ngataha űo jĵi sinttachjian ningona; co ni joachaxín infierno tsixinha ngain nihngo jĵi.

¹⁹ Janha rroĉhaha jaha cain joachaxin de tsinxin quehe rinao Dios nttiha ngajni; inchin janha rroĉhaha jaha llave de ngajni. Co tti jaha tsiatte nttihi ngataha nontte, Dios ocoiatte nttiha ngajni; co tti tsonxindanguehe jaha nttihi ngataha nontte, Dios oconxindanguehe mé nttiha ngajni.

²⁰ Cottimeja Jesús coetonhe jehe tti choĵni que vacao que űonhi choĵni rrondache na ixin jehe tti Cristo.

*Jesús ndaĉho ixin jehe ndasenhe
(Mr. 8.31—9.1; Lc. 9.22-27)*

²¹ Desde are mé Jesús coexinhi ndache jehe tti choĵni que vacao que ixin jehe chonda que tsji para ciudad de Jerusalén co nttiha anto tangui tsonhe jehe ngain cain xittetonha ngain nihngo nttiha, co ngain cain xidána que vaquetonha ngain icha xidána, co ngain cain ximaestroey ley Israel. Co ndaĉho que cain xí mé nasoenxon xa jehe, pero ngain nchanho ninxin jehe rroxechon.

²² Cottimeja jehe Pedro joantsjenda Jesús co coexinhi Pedro ndache Jesús:

—¡Nichjaha jamé ixin Dios sicao cuidado de ixin soixin que űonhi tiempo tsonha jĵi!

²³ Pero Jesús ngaria co ndaĉho ngain Pedro:

—¡Sattjixin de nganji na, Satanás! ixin jaha rinao rrocayaconhna na janha. Jaha űaxaonha inchin űaxaon Dios, sino inchin űaxaon choĵni que te ngataha nontte.

²⁴ Cottimeja Jesús ndaĉho ngain tti choĵni que vacao:

—Si ĉhonja de jaha ra rinao ra sacjin na, pero chonda ra que rrotjañaha ra cain tti chonda ra co masqui anto tangui tsonha ra co hasta nasenxon ra.

²⁵ Ixin tti rinao que vidé űonhi tsonhe, mé sinchetján vidé; pero tti sinchetján vidé de ixin causananxin janha, mé sechon para cainxin tiempo.

²⁶ Ixin űonhi űé que ná choĵni sacha cainxin que jí ngain mundo jĵi co ndasinchetján almé, ¿o quejanhi tsenanxin choĵni almé?

²⁷ Ixin janha, tti Xí que joixin de ngajni, sihi iná conixin gloria que rroĉjhana Ndodana conixin cain angelna, cottimeja cada choĵni tsjengá na hna inchin jehe na joinchehe na.

28 Co atto seguro rrindattjo ra, que ttoha ra xo te ra nganji na jaixon, xa senha ra hasta que siconja ni ra janha, tti Xí que joixin de ngajni, rrocjan na sihi conixin joachaxin para siquetonha cain cosa.

17

Are vicon na Jesús anto oje
(Mr. 9.2-13; Lc. 9.28-36)

1 Vatto incjaon nchanho, cottimeja Jesús joicao Pedro co Jacobo co Juan, xanchó Jacobo, co Jesús cjo conixin jehe na ngataha ná jna anto noi,

2 co nttiha vicon na Jesús anto oje. Ngá con Jesús anto conguixian inchin tté nchanho, co lonttoe anto coroa lontto hasta conguixima lontto.

3 Co ngain rato mé jehe na vicon na Moisés co Elías, tatetjao na Jesús nttiha.

4 Cottimeja Pedro ndačo ngain Jesús:

—Soixin, ¡Atto nchao ixin janha na te na nttihi! Si rinao, janha na sinttachjian na ní nchiachjan: ná nchiachjan para ixin soixin, ná nchiachjan para ixin Moisés, co iná nchiachjan para ixin Elías.

5 Pedro xa jinichja jañá are joí ná ttjoi anto roa hasta jitonguixima ttjoi, co ttjoi mé ndacjoanotaon na, co de ngacjan ttjoi mé coinhi na tté Dios que ndačo:

—Jihi tti Xanhna que janha anto rinaho, co de ixin jehe Xan janha anto chahna. Ditticaon ra tti rrondačo Xan.

6 Cottimeja tti canio chojni que joicao Jesús nttiha are coinhi na yá, canio na vinttetoxin na co visé na ngataha nontte, co anto xaon na.

7 Cottimeja Jesús conchienne ngain na, catte na co ndačo ngain na:

—Dingattjen ra, co xaonha ra.

8 Co are jehe na tsjehe na, ixonhi chojni vicon na, más que jeho Jesús.

9 Are tedania na de ngataha jna mé, Jesús coetonhe na co ndačo:

—Xonhi chojni ttequinhi ra tti jaha ra vicon ra, hasta que janha, tti Xí que joixin de ngajni, rroxechon na.

10 Cottimeja jehe tti canio chojni que joicao Jesús joanchiangui na ngain Jesús co ndačo na:

—¿Quedonda ndačo ximaestroey ley Israel ixin Elías chonda que tsí icha saho que jaha?

11 Jesús ndačo ngain na:

—Ján ndoa que Elías tti tsí icha saho que janha co jehe tti siquentonxinhi vidé chojni para que nchao sayehna na janha.

12 Pero janha rrindattjo ra que Elías ojoi co jehe na joatsoanha na, sino que joinchehe na ngain inchin jehe na jinao na. Jamé janha cai, tti Xí que joixin de nganji, tangui tsonna de ngain rá jehe na.

13 Cottimeja jehe tti canio chojni que joicao Jesús xaon na que Jesús jindačo de ixin Juan, tti vanheguitte chojni.

Jesús joinchexingamehe ná xanxí que vechonda chin denda
(Mr. 9.14-29; Lc. 9.37-43)

14 Are joiji na ngain tti vittohe icha chojni que vacao Jesús, nttiha anto tsje chojni sinchonhe na Jesús. Are conchienne ná xí ngain Jesús co vettoxin nttajochjihi xa co ndačo xa:

15 —Nttatsanha ñao soixin, ttiaconoehe xanhna ixin chonda xan chin denda co anto tangui tonhe xan. Tsje nttiha detsingatte xan xohi o ngangui jinda.

16 Ntthi joiquina xan ngain chojni que čhjiho tehe, pero čho ha nchexingamehe na xan.

17 Jesús ndačo:

—Jaha ra chojni que ditticaonha ra co jianha ra! ¿Hasta quesa janha chonda que sarihi nganji ra? ¿Hasta quesa janha chonda que tsixinna nganji ra? Sicozna ra chjan yá ntthi.

18 Cottimeja Jesús joinchesattehe tti espíritu jianha que vechonda chjan mé, co venguixin espíritu mé de ngaxinhi cuerpoe xan. Co desde ngain rato mé jehe xan ndaxingamehe xan.

19 Cottimeja are jeho Jesús ntthi conixin chojni que vacao, jehe na joanchiangui na ngain co ndačo na:

—¿Quedonda janha na čho ha vehngui na espíritu jianha yá?

20 Jesús ndačo ngain na:

—Ixín jaha ra antoha jian ditticaon ni ra janha. Co janha atto seguro rrindattjo ra que si tti ditticaon ra jiexin rroguhe inchin ná tsehe ca dinhi mostaza, nchao rrondache ra jna jiha: “Sattjixin de ntthi co sattji iná lugar”, co jna yá satsjixin jna de tti jí jna. Xonhi cosa que čho ha sinchehe ra si ndoa ditticaon ra.

21 Pero clase de espíritu jianha yá jeho nchao dengui ni are nchecoanxinhi ni Dios co dinttečjáño ni saho.

Jesús ndačo iná ixín jehe ndasene

(Mr. 9.30-32; Lc. 9.43-45)

22 Ná nchanho are xa vintte na ngain regioen Galilea, Jesús ndache tti chojni que vacao ixín chojni sinchechienhe na jehe, tti Xí que joixin de ngajni, para ngain chojni jianha.

23 Co ixín nasoexon na jehe Jesús, pero ngain nchanho ninxin jehe rroxechon iná. Co chojni que vacao anto vinttechín na are coinhi na yá.

Are Jesús cjoenga hna impuesto ngain nihngo

24 Are Jesús conixin chojni que vacao joiji na ngain rajna Capernaum, tti xí que vanchehe cobro impuesto nihngo cjoí xa ngain Pedro co joanchiangui xa co ndačo xa:

—¿Attjenga hna ximaestroa ra impuesto para ixín nihngo?

25 Pedro ndačo:

—Ján.

Cottimeja Pedro are cjoí ngaxinhi nchia para rrojindačo tti ndačo xicobrador, pero Jesús saho ndačo ngain jehe:

—Pedro, ¿quensen Xaxaon jaha nchehe cobro impuesto xittetonha ngataha nontte ntthi? ¿Achojni de ngain nacioen xa o ni chojni que ttixin cjin?

26 Pedro ndačo:

—Tti chojni que ttixin cjin.

Jesús ndačo:

—Mexinxin chojni xa chondaha na que tsjenga na hna.

27 Pero para que Xonhi chojni sontoñao na, ttji jaha ngain lago, dancangui anzuelo co dantsjengui tti saho copescado que rrotse anzuelo. Co ngaxinhi rroha copescado mé sinchí ná tomi. Tomi mé sittja para tsjengaxin na hna impuestona janha co impuestoa jaha. Ttjiho tomi mé co ttjenga hna cain.

18

¿Quensen tti icha importante?

(Mr. 9.33-37; Lc. 9.46-48)

1 Ngain rato mé chojni que vacao Jesús conchienne na ngain Jesús co ndačo na:

—¿Quensen icha importante ngajni?

2 Cottimeja Jesús vayé ná xannchinchjan co coín xan ngayehe na,

3 co ndačo:

—Atto seguro rrindattjo ra que si jaha ra tsentoxinha ra vidá ra co rrocjan ra inchin xannchinnchinchjan, čhoha rrochonda ra parte ngain tti ttetonha Dios.

4 Mexinxin quexeho chojni que jeha orgulloso co cjan inchin chjan jihi, chojni mé tti sehe icha importante nttiha ngajni.

5 Co tti chojni que sayé ná tti inchin xannchinchjan jihi ixin ditticaon na janha, cai chojni mé sayehna na janha.

Tti sinchenchehe ni cosa jianha

(Mr. 9.42-48; Lc. 17.1-2)

6 Quexeho chojni que sincheyehe ná chojni mé que xa antoha jian ditticaon na janha, icha jian sečhianito ná xochin ngain ttosin chojni mé para roxincanjingui ndachaon.

7 Atto nchaoha ixin jí cosa ngataha nontte nttihi que tenchenchehe chojni tti jianha. Cosa mé cainxin tiempo sehe nttihi, pero janto tangui tsonhe tti chojni que sincheyehe iná chojni para sinchehe jamé!

8 Mexinxin si ná rá o ná rottea sinttaxaxaon para sinchehe jianha, ncheha cosa mé, masqui hasta tončhinji rá o rottea co tja cjin, ixin icha jian rrochonda vida naroxin masqui coha ná rá o ná rottea, co nahi tsji conixin yoixin rá o yoixin rottea ngain infierno tti xonhi tiempo danga xohi.

9 Co si jmacon sinttaxaxaon para sinchehe jianha, ncheha cosa mé, masqui hasta dantsjengui jmacon co tja cjin, ixin icha jian rrochonda vida naroxin masqui nacoa jmacon, co nahi tsji conixin cayoixin jmacon ngain infierno tti xonhi tiempo danga xohi.

Ejemploe tti coleco diguitján

(Lc. 15.3-7)

10 Xaxaonha ra ixin chojni que xa antoha jian ditticaon na janha jeha importante na. Ixin janha rrindattjo ra que ngajni cain ángel que tenda jehe na, cainxin tiempo te ángel mé ngattoxon con Nnodana que ttjen ngajni.

11 Ixin janha, tti Xí que joixin de ngajni, joihi para joicjenguijna tti chojni que otequininxin rrocji ngain infierno.

12 Inchin si ná xí chonda xa cien coleco co ndasitján ná va, ¿quexén sinchehe xa? ¿Atsinttoeha xa tti noventa y nueve va ngagaha jna, co satsji xa sicjé xa coleco vitján?

13 Co si sittja xa va, seguro que icha rroché xa ngain coleco mé que ngain tti noventa y nueve coleco que vitjanha.

14 Jamé cai Nnodá na que ttjen ngajni rinaoha Ndo que sitján ni ná chojni que xa antoha jian ditticaon na janha.

Quexén sinchetjañehe ni chojni que ditticaon Jesús

(Lc. 17.3)

15 Si ná chojni que ditticaon na janha sinchehe ná cosa nchaoha nganji jaha, nichjehe jahó co jehe co ndache ixin jehe nchaoha joinchehe. Si jehe

sinchehe caso tti jaha rrondache, nchao, ixin jaha ocjoenguijna jehe para que jehe rrochonda parte ngain tti tteonha Dios.

¹⁶ Pero si sincheha caso tti jaha rrondache, cottimeja ttjé ná o yó chojni para ttjiho dinichjehe ra jehe que tti joinchehe nchaoha jí, co jehe cayoi chojni mé sintte na de testigo de quehe rrondache chó ra.

¹⁷ Co si jehe xa sincheha caso masqui cjoiho cayoi chojni mé, cottimeja jaha dindache cain chojni ngain nihngo. Co si chojni mé xa sincheha caso tti rrondačo cain chojni ngain nihngo, cottimeja cain ra dantsjenda ra chojni mé inchin tti chojni que ditticaonha Dios o inchin ná chojni jianha.

¹⁸ Janha rrindattjo ra seguro que cain tti tsia ra nttihi ngataha nontte, Dios ocoia cosa mé nttiha ngajni. Co cain tti jaha ra tsonxindanguehe ra nttihi ngataha nontte, Dios oconxindanguehe cosa mé nttiha ngajni.

¹⁹ Cai rrindattjo ra que si yó de jaha ra sintte ra de acuerdo nttihi ngataha nontte de sanchia ra čhonja are tenchecoanxinhi ra Nnodana que ttjen ngajni, seguro que jehe Ndo rrochjá ra Ndo.

²⁰ Ixin tti te yó o ní chojni que tenichja na conixin nombrena janha, janha nttiha rrihi ngayehe na.

²¹ Cottimeja Pedro cjoí joanchianguihi Jesús co ndačo:

—¿Quejanhi nttiha chonda janha que sinttatjañá ná tti sinchehe jianha nganji na janha? ¿Achonda que sinttatjañá hasta yáto nttiha?

²² Jesús ndačo ngain Pedro:

—Janha rrindattjoha que hasta yáto nttiha, sino que hasta yáto de tti setenta nttiha.

Ejemplo ná tti nchehe xa que choha joinchetjañehe ná xicompañeroe

²³ Mexinxin rrondattjo ra quexén tti tteonha Nnodana que ttjen ngajni. Mé inchin ná rey que joinchecjienhe cuenté cain ninchehe xé ixin quejanhi teca na cada na.

²⁴ Jehe mero coexinhi jinchechjian cuenta mé are joiaho na ngain rey mé ná tti nchehe xa que jica tsje millones.

²⁵ Pero ixin tti nchehe xa mé chondaha quehe tsjengaxin hna, mexinxin coetonha rey mé que rrojinhecji na tti nchehe xa mé ngain iná xinajni conixin čhihi co xenhe co cain cosa que jehe vechonda para rroxengaxin hna tti jehe jica ngain rey.

²⁶ Cottimeja jehe tti nchehe xa mé vettoxin nttajochjihi ngain rey co ndačo: “Nttatsanha ñao chonna na nchion co tsengaha hna cainxin tti rricaha.”

²⁷ Rey coiaconoehé tti nchehe xa mé co joinchetjañehe cain tomi que veca co coančjanda sacjoi.

²⁸ Pero are jehe tti nchehe xa mé vačhje para sacjoi, nttiha vetanxin iná tti nchehe xa, xicompañeroe. Co jehe mé veca nchion tomi ngain tti sajittji. Co jehe tti sajittji mé tse co tsenguihi ttosin xicompeñeroe co coejehe tté xa, co ndache chó: “¡Ttjengana hna tti rricana na!”

²⁹ Cottimeja jehe tti veca vettoxin nttajochjihi co ndačo: “Nttatsanha ñao chonna na, co tsjengaha hna cain tti rricaha.”

³⁰ Pero tti sajittji choha, sino que sajoicao coiaxinhi ngain cárcel hasta que rrocjengaja hna tti jica.

³¹ Co are icha ninchehe xa vicon na jiji, anto vinttečhín na co cjoí na joindačo na cain jiji ngain xinajni na, jehe tti rey mé.

³² Cottimeja jehe rey mé rroanha joajna para joiꝥacoa tti cjoaya, co ndaŧho ngain: “¡Jaha ná ninchehe ꝥa anto jianha! Janha jointtatjañaha jaha cain tti joaricana na ixin joinchetsena ñaho na.

³³ Jaha cai rrochonda que rroquiaconoehe xicompañeroa, jañá inchin janha coiaconoaha jaha.”

³⁴ Co jehe rey mé anto coñao co coetonha para que sayé castigo jehe tti nchehe ꝥa mé hasta que tsjengaja hna cain tti jica.

³⁵ Co are ojoexin ndaŧho Jesús cain yá jehe ndaŧho:

—Cai jañá sinchehe Ndodana que ttjen ngain nganji ra, si jaha ra sinchet-jañeha ra icha chojni tti nchaoha que sinchehe na nganji ra.

19

Jesús ndaŧho de ixin xí que dachjendehe čihi

(Mr. 10.1-12; Lc. 16.18)

¹ Después que Jesús ndaŧho cain cosa yá, jehe sacjoixn de Galilea co joiji ngain tti parte de regioen Judea que jí lado čhinxin nchanho de río Jordán.

² Anto tsje chojni rroé na Jesús, co nttiha jehe joinchexingamehe tsje chojni nihi.

³ Cottimeja canxion xifariseo vintteconchienhe xa ngain Jesús para rro-jinchenichja xa Jesús ná cosa nchaoha para que nchao rrocjanguihi xa. Joanchiangui xa ngain jehe co ndaŧho xa:

—¿Anchao ná ni sačhjendehe ni čihi ni de ixin quexeho cosa que jehe ni isincheꝥoxinha ni?

⁴ Jesús ndaŧho ngain xa:

—¿Atsjeha ra tti jitaxin Palabré Dios? Nttiha jitaxin ixin Dios tti joinchexjian chojni are saho. Co jehe mé joinchexjian xí co nčhi.

⁵ Cai jitaxin nttiha: “Mexinxin xí sačhjendehe xa ndodé xa co janné xa para sechao xa jeho čihi xa, co cayoixin na sintte na inchin nacoaxinxon chojni.”

⁶ Co jañá ijeha yó chojni, sino que nacoaxinxon chojni. Mexinxin xí čhoaha sačhjendehe xa čihi xa ixin Dios joinchexjian cayoi jehe na nacoa chojni.

⁷ Cottimeja vinttendaŧho jehe xa:

—¿Quedonda diquetonha Moisés que nchao sanjo ni ngain ncha ná ꝥón que jitaxin que jehe ni ondavačhjendehe ni čihi ni, co jamé ondatsinttohe ni ncha?

⁸ Jesús ndaŧho:

—Moisés ndaŧho jañá ixin jaha ra atto cha ansean ra, mexinxin jehe joanjo joachaxin yá de sačhjendehe ra nčhičhiha ra, pero are icha saho jeha jañá coetonhe Dios.

⁹ Co janha rrindattjo ra, que tti dachjendehe nčhičhihi (co jeha de ixin vittjaxin ncha tajijoacaho ncha iná xí), co jehe decaho iná nčhi, jehe nchehe jianha ꝥajeho como si rrochonda yó nčhi. Co tti decaho ná nčhi que digachjendehe xixihi, cai chojni mé jianha nchehe, ꝥajeho inchin rrochonda nčhičhihi iná xí.

¹⁰ Cottimeja chojni que vacao Jesús ndaŧho na ngain:

—Si jañá jí remé de ixin xí co nčhi, icha jian sinttecaoha chó ni.

¹¹ Jesús ndaŧho ngain na:

—Pero jeha cain chojni nchao sintte na jeha na, sino que jeha tti chojni que Dios ndaŧho para que sintte na jeha na.

¹² Jí tsje razón para que xí dinttecaoha xa nčhi. Te xí deporsín desde are toncjihia xa cuerpoe xa rinaoha nčhi, co icanxin xí čhoaha sinttecao xa nčhi ixin chojni joincheꝥoenhe xa ngain tti parte jima de cain xí, co icanxin xí

rinaoha xa dinttecao xa nchí ixin icha rinao xa nchehe xa inchin ttetonha Dios que ttjen ngajni. Co xo rinaoha ra sinttecoho ra nchí ixin sinchehe ra inchin ttetonha Dios, nchao nchehe ra.

Jesús joinchenchaon xannchinnchinchjan

(Mr. 10.13-16; Lc. 18.15-17)

¹³ Cottimeja joiaohe na Jesús canxion xannchinnchinchjan para que Jesús rroquín rá ngataha já xan co sinchetsenhe ñao Dios ixin sinchenchaon xan. Pero chojni que vacao Jesús coexinhi na joinchesattehe na cain tti chojni que joicao cain chjan mé.

¹⁴ Pero Jesús ndacho ngain chojni que vacao:

—Tančhanda ra que xannchinnchinchjan tsí xan nganji na janha, cay-coenra ra xan ixin ngajni tti ttetonha Ndodana, nttiha para cain chojni inchin jehe xan.

¹⁵ Co Jesús coín rá ngataha cain xannchinnchinchjan mé co joinchetsenhe ñao Dios ixin sinchenchaon xan, cottimeja Jesús sacjoixin de nttiha.

Ná xanxí anto rico cjoao xan Jesús

(Mr. 10.17-31; Lc. 18.18-30)

¹⁶ Ná xanxí cjoixan joitsjehe xan Jesús, co joanchiangui xan co ndacho xan: —Maestro, soixin que anto jian, ¿quehe icha cosa jian chonda janha que sinttaha para que janha rrochonda iná vida naroaxin que xonhi tiempo tsjexin?

¹⁷ Jesús ndacho ngain xanxí mé:

—¿Quedonda nchequinhi na janha jian? xonhi iná tti icha jian, jeho na-coaxinxon, co mé jehe Dios. Pero si jaha rinao rrochonda iná vida naroaxin, ditticaon co nchehe cain tti coetonha Dios.

¹⁸ Xanxí mé ndacho xan:

—¿Quecá?

Co Jesús ndacho ngain xan:

—Dantsjehe vidé iná chojni; xonhi nchí nchejehe; xonhi cosé iná chojni ttehe; ndachoha cosa ndoaha de iná chojni;

¹⁹ ttjiho respeto ngain ndodá co ngain janná; co rinao cain chojni inchin rinao cuerpoa.

²⁰ Xanxí mé ndacho xan ngain Jesús:

—Cain yá rrinttaha desde are xa nchín na, ¿quehe xa ditján sinttaha?

²¹ Jesús ndacho ngain xan:

—Si jaha rinao sarihi chojni jian ndoa, ttji co nhecji cainxin tti chonda co tonchjejehe chojni noa tomí, cottimeja ngajni jaha rrochonda cosa icha rentte, cottimeja sihi para sacjin na tti sacji janha.

²² Pero are xanxí mé coinhi xan yá, anto vechín xan co sacjoi xan ixin anto rico vehe xan.

²³ Cottimeja Jesús ndacho ngain chojni que vacao:

—Atto seguro rrindattjo ra que atto tangui para que chojni rico rrochonda na parte ngain tti ttetonha Ndodana que ttjen ngajni.

²⁴ Icha tanguiha para ná cocamello sattoxinhi va toechjenhe ná ntachiehe manta que para chojni rico rrochonda na parte ngain tti ttetonha Dios.

²⁵ Are chojni que vacao Jesús coinhi na yá, anto vinttegoan na admirado co joanchianguihi chó na co ndacho na:

—¿Mexinxin quensen nchao rrochonda iná vida naroaxin remé?

²⁶ Jesús tavetsjehe ngain na co ndacho:

—Chojni nttihi choha sinchehe na jamé, pero Dios nchao sinchehe cainxin.

²⁷ Cottimeja Pedro ndaĉho ngain Jesús:

—Janha na cointtoa na cain tti joichonda na, para que jai nchao ĉhjin na nganji soixin. Mexinxin, ¿quehe rrochonda na janha na?

²⁸ Jesús ndaĉho ngain na:

—Atto seguro tti rrindattjo ra, que ngain tti tiempo que tsí, are cainxin rocjan nroaxin, are mé janha, tti Xí que joixin de ngajni, sarihi ngain tti lugar que chonda gloria, co jaha ra que ĉhjin na jai cai sintte ra ngain tteyó lugar de joachaxin para que sinchejuzguehe ra tti tteyó grupoe chojni Israel.

²⁹ Co cain chojni que ttintohe na nchiandoha na, o xanchó na, o ndodé na, o janné na, o ĉihi na, o xenhe na, o jnguihi na para tenchehe na xana janha, chojni mé sayé na cien nttiha icha tsje co cai sayé na iná vida nroaxin que xonhi tiempo tsjexin.

³⁰ Pero tsje chojni que jai xaxaon na ixin jehe na anto importante na, pero are mé, xonhi rentte na. Co tsje chojni que jai xaxaon na ixin jehe na jeha importante na, pero are mé jehe na nisintte icha importante.

20

Ejemploe ninchehe xa

¹ Cai ndaĉho Jesús:

—Tti ttetonha Dios ngajni, mé inchin joinchehe ná xí que vechonda jie jngui. Xí mé vaĉhje xa ndoyo para joicjé xa ninchehe xa para sinchehe na xa ngain nttauva.

² Jehe xí mé ndaĉho xa ngain na que tsjenguehe xa na hna tti jiquininxin dacha ni ngoi ná nchanho, co jehe na vittoxin na. Mexinxin jehe xa rroanha xa na para ngain jnguihi xa joinchehe na xa.

³ Cottimeja jehe xa vaĉhje xa iná xa jidacao inchin las nueve co vittja xa icanxin chojni ngain ndásin que xonhi xa tenchehe.

⁴ Jehe xa ndaĉho xa ngain na: “Cai jaha ra ttji ra dinchehe ra xana ngain jnguihna, co tsjengaha ra hna inchin jiquininxin.” Co chojni mé vinttecji na.

⁵ Cottimeja jehe xí mé vaĉhje xa iná inchin chonguíxin co cai iná inchin ní hora tsocjin, co joinchehe xa xajeho.

⁶ Co inchin naho hora tsocjin cjan vaĉhje xí mé iná para ngain ndásin, co vittja xa icanxin chojni que xonhi xa tenchehe na cai, co jehe xa ndaĉho xa ngain na: “¿Quedonda nttihi tate jaha ra ngoixin nchanho co xonhi xa tenchehe ra?”

⁷ Jehe na vinttendaĉho na: “Ixin xonhi chojni ĉhjana na xa.” Cottimeja jehe xa ndaĉho xa ngain na: “Cai jaha ra ttji ra dinchehe ra xana ngain jnguihna, co tsjengaha ra hna inchin jiquininxin.”

⁸ Co are ondaconttie, jehe xa ndaĉho xa ngain tti jinda xa mé: “Dayehe cain ninchehe xa co ttjenguehe na hna. Ttexinxin ngain tti chojni que joixinhi después, co ttjaxin ngain tti nijoixinhi icha saho.”

⁹ Cottimeja vintteconchienhe tti chojni que coexinhi joinchehe xa inchin naho hora tsocjin, co cada na xenguehe na hna lo de ngoixin nchanho.

¹⁰ Cottimeja are xenguehe hna tti chojni que joixinhi joinchehe xa icha saho, jehe na xaxaon na que rroxenguehe na hna icha tsje, pero cai xenguehe na hna jeha tti ná nchanho.

¹¹ Are xenguehe na hna tti nijoixinhi joinchehe xa icha saho, jehe na coexinhi na ndaĉho na ixin jianha joinchehe tti jnguihi.

12 Jehe na ndaĉho na ngain xinajni mé: “Cain chojni tehe que joinchehe na ʒa jeho nacoa hora co cjoenguehe na hna ʒajeho que janha na que jointtaha na ʒa ngoixin nchanho ngandaohe soa.”

13 Pero jehe xinajni mé ndaĉho xa ngain ná na: “Amigo, janha ʒonhi ni ná cosa jianha rrinttaha nganji ra. ʒAcjoanha na ixin tsjengaha ra hna lo de ná nchanho?”

14 Jaxon dayehe tomia co sattji. Janha rinaho tsjengá chojni tehe hna ʒajeho inchin rrittjengaha ra hna jaha ra.

15 ʒApoco janha chondaha derecho de sinttaha tti janha rinaho ngain tomia? ʒO ani jaha ra tonchjoaha ra ixin janha danjoncoa tomia?”

16 Mexinxin jiji rroĉho ixin tti chojni que jai ʒaxaon na ixin jehe na jeha importante na, pero are mé jehe na nisintte icha importante. Co tti chojni que jai ʒaxaon na ixin jehe na anto importante na, pero are mé ʒonhi tsorentte na. Ixin janha nichjá anto tsje chojni pero cainxinha na rinao na na janha.

Jesús cjan ndaĉho iná ixin jehe ndasenhe

(Mr. 10.32-34; Lc. 18.31-34)

17 Are Jesús ojittji ngatja nttiha para Jerusalén, jehe joantsjenda tti tteyó chojni que vacao co ndaĉho ngain na:

18 —Jaha ra tedicon ra que jaxon satettjin na para Jerusalén. Nttiha janha, tti Xí que joixin de ngajni, sinchechienhe na na ngain xidána que ttetonha ngain icha xidána co ngain ximaestroe ley Israel, co nimé ni rrondaĉho que ixin janha nasenxon na.

19 Co sanjo na na janha ngain xí de ojé nontte para que nimé tsjanoo na na janha, co rroʒanguihna na cuarta de roa, co sinchecrucificá na na. Pero ngain nchanho ninxin janha rroxechon na.

Tti joanchia janné Jacobo co Juan

(Mr. 10.35-45)

20 Cottimeja conchienenhe ngaca Jesús, janné Jacobo co Juan, cayoi nimé xenhe Zebedeo. Co jehe janné na conixin cayoi jehe na vintteconchienenhe na ngain Jesús. Co jehe jan vettoxin nntajochjiji jan ngain Jesús para joanchia jan ná joatotsenhe ñao jan ngain Jesús.

21 Jesús ndaĉho ngain naníta mé:

—ʒQuehe rinao?

Naníta ndaĉho:

—Ttetonha soixin que are soixin tsetonha cainxin cosa, ná de xanhna tehe sehe lado jian de soixin co iná xan sehe xan ngain lado cjon de soixin.

22 Pero Jesús ndaĉho ngain Jacobo co Juan:

—Jaha ra noaha ra tti danchia ra. ʒAnchao tsonha ra tti anto tangui que janha tsonna, co anchao ndasenhe ra inchin janha ndasenhe na?

Jehe na vinttendaĉho na:

—Ján nchao.

23 Jesús ndaĉho ngain na:

—Ján ndoa que jaha ra tangui tsonha ra, co senhe ra inchin janha senhe na, pero de tti sintte ra lado jian na co lado cjon na, jeha janha tti danjo joachaxin mé, sino que Ndodana Ndo nohe quensen sintte nttiha.

24 Co are tti itte chojni que vacao Jesús coinhi na yá, coñao na ngain Jacobo co Juan.

25 Pero Jesús vayé na, co ndaĉho ngain na:

—Jaha ra noha ra que cain xí que ttetonha ngain nación, ttetonha xa inchin rinao xa, co cai icha xí que chonda joachaxin nttiha anto ttetonha xa ngain chojni.

²⁶ Pero jeha jamé tsonhe ngayaha jaha ra, sino que tti rinao icha tsetonha ngayaha ra, pero mé chonda que icha tsjenguijna icha chojni.

²⁷ Co quexeho de jaha ra xo rinao ra icha tsetonha ra, pero cai chonda que sintte ra inchin esclavo para icha chojni.

²⁸ Janhi inchin janha, tti Xí que joixin de ngajni, joiha para que chojni tsjenguijna na janha, sino que janha joihi para joicjenguijna chojni co para que janha sanjo vidana para tsjenga hna tti teca tsje chojni.

Jesús joinchexingamehe yó tti chejo

(Mr. 10.46-52; Lc. 18.35-43)

²⁹ Are Jesús conixin tti tteyó chojni que vacao vačhjexin na de ciudad de Jericó, anto tsje chojni rroé Jesús.

³⁰ Ngandehe nttiha mé tate yó tti xí chejo, co are vinttequinhi xa que Jesús jidatto nttiha, jehe xa ndačo xa sén:

—¡Soixin, razé David, ttiaconoana ni ra janha na!

³¹ Cain chojni que tettji nttiha joinchesattehe na cayoi xí mé para que rrotencoaxa, pero jehe xa icha coyao xa co ndačo xa:

—¡Soixin, razé David, ttiaconoana ni ra janha na!

³² Cottimeja Jesús tavengattjen, co vayé cayoi tti chejo mé co joanchiangui ngain co ndačo:

—¿Quehe rinao ra sinttaha janha nganji ra?

³³ Cayoi tti chejo mé vinttendačo:

—Janha na rinaho na sicon na.

³⁴ Cottimeja Jesús coiaconoehe cayoi xí mé co cattehe jmacon xa. Co ngain rato mé cayoi tti chejo mé onchao vicon, co cayoi sacjoi conixin Jesús.

21

Jesús joigaha ciudad de Jerusalén

(Mr. 11.1-11; Lc. 19.28-40; Jn. 12.12-19)

¹ Are joihi na ngain rajna Betfagé, chiaon ngaca Jerusalén, co ngaca tti nanchjan que dinhi Nttaolivo, Jesús rroanha yó de tti chojni que vacao.

² Co ndačo ngain na:

—Ttji ra ngain rajnanchjan jimé. Yá sinchí ra ná colochojitchoa va co nttiha jji colochochjenhe va. Toxindanguehe ra va co sicohna ra cayoi va nttihi.

³ Co si čhonja chojni rrondattjo ra čhonja, jaha ra ndache ra que ximae-stroa ra rrongondehe xa va co toin sicán ra va iná.

⁴ Jihi conhe para que joiconhe tti dindačo profeta are diquentaxin janhi:

⁵ Ndache ra ciudad de Jerusalén:

“Tsjenxin, tti Rey de jaha joí nganji, co jehe joí inchin ná chojni que jeha importante, co jitaha ná colochojitchoa, que mé colochochjan nchín, xenhe ná colochojitchoa que otame va.”

⁶ Cottimeja cayoi chojni mé sacjoi na co joinchehe na inchin coetonha Jesús.

⁷ Joiaho na colochojitchoa mé conixin xenhe va, co manta que tetsá na cjoajinhi na colochochjan para Jesús vetaha va.

⁸ Co tti anto tsje chojni que joichonhe na Jesús, ttoha na coingo na ngá nttiha tti manta que tetsá na, co icanxin na conchinji na ramé nttá para coingo na ngá nttiha.

⁹ Co cain chojni que tetaon nttiha co cain chojni que terroé coexinhi na ndaço na:

—¡Gloria para ixin xí jihi ixin jehe xa razé rey David co chonda xa joachaxin que vechonda rey David! ¡Anto jian jehe tti joí conixin nombré Dios! ¡Gloria ngain Dios!

¹⁰ Are Jesús joixinhi ciudad de Jerusalén, cainxin chojni que te nttiha xatte na ngain ixin anto ché na, co tsje na joanchiangui na co ndaço na:

—¿Quensen jihi?

¹¹ Co icha chojni ndaço na:

—Jihi tti profeta que dinhi Jesús, tti joixin de ngain rajna Nazaret ngain nonttehe Galilea.

*Jesús joincheroa nihngo icha importante
(Mr. 11.15-19; Lc. 19.45-48; Jn. 2.13-22)*

¹² Después Jesús joixinhi patioe nihngo icha importante para ixin Dios, co nttiha vengui cain chojni que tettehna co tenchecji. Concjamangui cain mesé tti chojni que tedasinguixinhi icha chojni tomi para rrochondaxin na suelto, co concjamangui nttaxintaon cain nitenchecji contoanajni.

¹³ Co ndaço ngain na:

—Ngain tti jitaxin Palabré Dios jindaço: “Nchiania sehe nchia para sinchecoanxinna na janha”, pero jaha ra ndadinchexhjian ra nchia ná lugar tti xatte xichehe.

¹⁴ Co nttiha ngain nihngo mé canxion tti chejo co canxion tti rrengo conchienne na ngain Jesús, co Jesús joinchexingamehe cain chojni mé.

¹⁵ Pero xidána que vaquetonha ngain cain icha xidána co ximaestroe ley Israel are vintteguicon xa cain milagro que jehe Jesús jinchehe co are vinttequinhi xa quexén cain chjan ngaxinhi nihngo ndaço xan sén: “¡Gloria para ixin xí jihi ixin jehe xa razé rey David co chonda xa joachaxin que vechonda rey David!” Are vinttequinhi xa yá vinttegoñao xa

¹⁶ co vinttendaço xa ngain Jesús:

—¿Arrittinhi tti tendaço chjan taha?

Co Jesús ndaço ngain xa:

—Ján, rritian. Pero jaha ra çaña tsjeha ra ngain tti jitaxin Palabré Dios? Nttiha jitaxin de ixin jihi ixin ndaço janhi:

Dios joinchecoenhe cain chjan hasta xan nandá toncjihhi para nchesayehe xan jehe jian.

¹⁷ Cottimeja jehe xa nttiha vintteguittohe xa co Jesús sacjoixin de ngain ciudad de Jerusalén co sacjoi para ngain rajna Betania co nttiha vattoxin ttie mé.

*Are Jesús nichja ngain nttahigo que xonhi ttochjoin jiyá
(Mr. 11.12-14, 20-26)*

¹⁸ Ndoexin dacao are Jesús cjan para ngain Jerusalén iná, jehe venhe jintta.

¹⁹ Ngandehe nttiha mé Jesús vicon ná nttahigo co jehe conchienne ngain ntta, pero xonhi ttochjoin vittja ngain ntta, jehó qué ntta chonda ntta. Cottimeja Jesús ndaço ngain ntta:

—¡Xonhi tiempo jaha rrocjan sinchexhjian ttochjoin!

Co ngain rato mé ndaxema nttahigo mé.

²⁰ Are chojni que vacao Jesús vicon na yá, vinttegoan na admirado, co joanchiangui na ngain Jesús co ndaço na:

—¿Queñén ndaxemanxin nttahigo yá anto daca?

²¹ Jesús ndaço ngain na:

—Atto seguro tti rrindattjo ra que si seguro ditticaon ra co xaxaonha ra que ixin choha tsonhe, jeoha sinchehe ra jiji, tti janha jointtaha ngain nttahigo yá, sino que jaha ra nchao rrondache ra jna jiha: “Sattjixin de yá co digaritsiahngui ndachaon”, co jamé tsonhe.

²² Co cain tti sanchia ra ngain Dios, co si ditticaon ra que sayehe ra, ján sayehe ra.

Tti joachaxin que chonda Jesús

(Mr. 11.27-33; Lc. 20.1-8)

²³ Cottimeja Jesús joixinhi ngaxinhi tti nihngo icha importante, co are jehe jindache cain chojni nttiha de ixin Dios, conchienne ngain jehe canxion xidána que vaquetonha ngain cain icha xidána conixin icanxin xittetonha ngain nihngo mé, co vinttejangui xa ngain Jesús co ndaço xa:

—¿Quehe joachaxin chonda jaha para nchehe cain cosa jiji? ¿Quensen chjá joachaxin jiji?

²⁴ Jesús ndaço ngain xa:

—Janha cai sanchianguiha ra ná cosa jaha ra, co si jaha ra rrondachjenji ni ra tti janha sanchianguiha ra, cottimeja janha rrondattjo ra quexehe joachaxin nttaxin janha cain cosa jiji.

²⁵ ¿Quensen rroanha Juan para joincheguitte chojni? ¿A Dios, o ani chojni?

Cottimeja coexinhi xa joanchianguihi chó xa co ndaço xa:

—Si rrondaço na que Dios tti rroanha Juan, xí jiji nchao rrondattjo na xa: “¿Quedonda vitticaonha ra remé?”

²⁶ Co si rrondaço na que chojni tti rroanha Juan, pero ján na xagoen na chojni ixin cainxin chojni ditticaon na que Juan vanichja joajna que vagayé de ngain Dios.

²⁷ Co mexinxin vinttendaçoxin xa ngain Jesús:

—Nonaha na.

Cottimeja Jesús ndaço ngain xa:

—Mexinxin ni janha rrondattjoha ra cai quexehe joachaxin nttaxin janha cain cosa jiji.

Ejemploe tti yó xanxi

²⁸ Jesús ndaço ngain xa:

—¿Queñén xaxaon ra de ixin ejemplo jiji? Ná xí vechonda xa yó xenhe xa xanxi, co ndache xa xansaho: “Tji jai dinchehe xa ngain nttauva.”

²⁹ Co jehe xan ndaço xan: “Rinaoha tsji.” Pero después xaxaon xan ojé co ján, cjoí xan joinchehe xan xa.

³⁰ Cottimeja tti xí mé joitsjehe xanyoxin co ndaço xa xajeho ngain xan mé, co xan mé ndaço xan: “Ján tsji.” Pero jehe xan cjoiha xan.

³¹ ¿Quexehe de cayoi xan joinchehe xan inchin joinao ndodé xan?

Jehe xa vinttendaço xa:

—Xansaho.

Cottimeja Jesús ndaço ngain xa:

—Atto seguro tti rrindattjo ra, que cain xicobrador de impuesto, co cain nchí que vanchecji cuerpoe ngain icha xí, nimé ni icha saho rrochonda parte ngain tti ttonha Dios que jaha ra.

³² Ixin Juan, tti vancheguitte chojni, jehe joí para joindattjo ra quexén chonda ra que sintte ra ngain vidá ra, co jaha ra vitticaonha ra tti ndačo jehe Juan. Pero xicobrador de impuesto co nčí que vanchecji cuerpoe ngain icha xí, cain nimé vitticaon na tti ndačo Juan. Pero jaha ra masqui vicon ra jamé, coentoxinha ra vidá ra para rroguitticaon ra tti ndačo Juan.

Ejemplo ninchehe xa jianha
(Mr. 12.1-12; Lc. 20.9-19)

³³ Ttinhí ra iná ejemplo jihi: Ná tti vechonda jie jngui ngoixin jngui cjoenga nttauva co ngoixin jngui coendanji cerco, co joinchechjian ná tanque tti vagueninxin na ttouva, co joinchechjian ná torre para siconxin tti senda ngoixin jngui de nttattochjoin mé.

‘Cottimeja tti xí mé joanjo xa nttattochjoin media ngain canxion tti nchehe xa co jehe xa sacjoi xa cjin.

³⁴ Co are ojoí tiempo de cosecha, jehe xí mé rroanha xa canxion ninchehe xé xa ngain tti nicoá nttattochjoin media para joiganchia na tti parte de cosecha que jiquininxin sayé xinajni mé.

³⁵ Pero jehe tti nicoá nttattochjoin media tse na jehe tti ninchehe xé xinajni mé; ná coaxin na nttá, ná nagoenxon na, co iná coaxin na xo.

³⁶ Jehe xinajni mé cjan rroanha icha tsje ninchehe xé iná para joiganchia na tti parte de cosecha que jiquininxin sayé xinajni. Pero jehe tti nicoá nttattochjoin mé media, cjoaya na iná, co joinchehe na xajeho inchin joinchehe na ngain tti nicjoi icha saho.

³⁷ Ultimo jehe xinajni mé rroanha xenhe xanxí, ixin jehe xaxaon: “Chonda na que sicao na respeto ngain xanhna.”

³⁸ Pero are vicon tti nicoá nttattochjoin media que joihi xenhe jehe xinajni, jehe na ndache chó na: “Jihi tti sayé ngoi nontte jihi de nttattochjoin. Nasoenxon na jehe para que ján na sittoá na ngoixin jngui de nttattochjoin.”

³⁹ Co jamé joinchehe na; tse na xan, joantsjegaxin na xan de ngain nttattochjoin mé co nagoenxon na xan.

⁴⁰ Cottimeja Jesús joanchiangui ngain xa co ndačo:

—Are tsí tti jnguihi mé, ¿quehe sinchehe ngain tti nicoá nttattochjoin mé media?

⁴¹ Jehe xa vinttendačo xa:

—Jehe xinajni mé sincheniha xa para nasoenxon xa cain tti nchehe xa jianha que coá nttattochjoin media co jehe sanjo nttattochjoín media ngain oje chojni, que sanjo na ngain jian tiempo tti parte de cosecha que jiquininxin sayé xinajni.

⁴² Cottimeja Jesús ndačo ngain xa:

—¿Axonhi tiempo tsjehe ra jaha ra tti jitaxin Palabré Dios? Ndačo janhi: Tti xo que joinchegondaha xittette nchia, pero xo mé tti xo joiguehe esquiné nchia. Co jihi joinchehe Dios, co para ixin ján na cosa jihi anto thjoin.

⁴³ Mexinxin janha ndattjo ra que jaha ra sachjaha ra parte ngain tti ttetonha Dios, co sayé tti chojni que sinchehe inchin jiquininxin ngain tti ttetonha Dios.

⁴⁴ Co para tti xo que rrindattjo ra, quexeho chojni que tsonttenguixin xo jihi, tsonchjian pedazo cuerpoe na. Co si xo jihi setsinga xo ngataha quexeho chojni, rrocjan cuerpoe chojni mé polvo.

⁴⁵ Are cain xidána que vaquetonha ngain icha xidána co cain xifariseo vinttequinhi xa cain ejemplo que ndaço Jesús, coixin xa que ixin jinichja de ixin jehe xa.

⁴⁶ Mexinxin joinao xa are mé rrotse xa Jesús, pero xa joincheha xa ixin xagoen xa chojni que te ntiha ixin cain chojni vaguitticaon na que Jesús vanichja palabré Dios.

22

Ejemploe tti quiai are tottehe na

¹ Jesús coexinhi ndaço iná ngain na de ixin ejemplo, co ndaço:

² —Tti tteonha Dios ngajni, mé inchin joinchehe ná rey que coín ná vandango are cottehe xitsihi.

³ Jehe rey mé coetonhe cain xinchehe xé para joindache xa cain chojni que ovintte invitado para sijine na ngain vandango mé, pero cain chojni mé çhoja na cjoí na.

⁴ Jehe rey mé cjan rroanha icha ninchehe xé, co ndaço ngain na: “Ndache ra cain chojni que ote invitado que otší na sine na ixin onchao jí comida. Ndache ra na ixin janha ocoetonha para venhe coxinttahna co cain coxigo que janha jointtanttao, co cainxin onchao jí. Ndache ra na que tsí na ngain vandango jiji.”

⁵ Pero cain tti chojni que ovintte invitado çhoja na cjoí na. Ná de jehe na sacjoí na ngataon jnguihi na, co iná na ngain negocioe na,

⁶ co icanxin na tse na jehe ninchehe xé rey mé, co feo joinchehe na ngain na hasta nagoenxon na na.

⁷ Cottimeja rey mé anto coñao, co rroanha cain xisoldadoe para nagoenxon xa cain jehe tti chojni que cjoaya co cjoaga xa rajné na.

⁸ Cottimeja ndaço rey mé ngain ninchehe xé: “Vandango onchao jí, pero cain chojni que jointtainvitá rrojine na tequininxinha na para rroquí na.

⁹ Jai tti ngain cain ntiha yeye co ndache ra cain chojni que setan ra que tsí na sine na.”

¹⁰ Cain ninchehe xé rey mé vaçhje na ngain cain ntiha, co joatse na cain chojni que vetan na, tti jian co tti jianha; co jamé hasta caon nchia mé de chojni.

¹¹ Cottimeja jehe rey mé joixinhi para joitsjehe cain chojni que tejine, co jehe vicon ntiha ná xí, pero diguitoxinha xa inchin ná chojni que tji ngain ná vandango.

¹² Jehe rey ndaço ngain tti xí mé: “Amigo, ¿quedonda joixinxin jaha ntihi que ditoxinha para ngain vandango jiji?” Pero jehe tti mé tencoa.

¹³ Cottimeja rey mé ndaço ngain tti nitedayá láto ngain mesa: “Ttia ra xí yá de rotté xa co de rá xa co diganca ra xa ndoja ngain tti naxin xehe tti rrotsjanga xa co sinetaon neno xa.”

¹⁴ Ixin janha nichjá anto tsje chojni, pero cainxinha na rinao na na janha.

Tti roxenga hna ngain impuesto (Mr. 12.13-17; Lc. 20.20-26)

¹⁵ Cottimeja xifariseo savintteci xa, co vinttecjao chó xa que xén sinchehe xa para sinchenichja xa Jesús ná cosa nchaoja para mé tsjanguixin xa Jesús.

¹⁶ Mexinxin rroanha xa canxion chojni xa, conixin canxion chojni Herodes para joindacho na ngain Jesús:

—Maestro, janha na nona na que soixin nda'cho tti ndoa, co soixin ndoa nchechoenhe chojni de ixin Dios, co ncheha caso tti nichja icha chojni ixin soixin ncheha juzgado chojni rico ojé que chojni noa.

¹⁷ Ndachjenji ni ra: ¿Anchao jí tsjenga na hna impuesto ngain xiemperador, o ani nahi?

¹⁸ Pero Jesús oconohe de tti jianha que jehe xa te'axaon xa de ixin jehe, co jehe nda'cho ngain xa:

—Jaha ra xo ncheha ra tti nda'cho ra! ¿Quedonda rinao ra sincheyana ra?

¹⁹ Tjagohna ra ná tomi que ttjengaxin ra hna impuesto.

Co jehe na cjoagoe na Jesús ná tomi de plata que vanchegonda chojni tiempo mé.

²⁰ Are vicon Jesús tomi mé joanchiangui ngain na co nda'cho:

—¿Quensen con jinganito jihi, co quensen nombré jitaxin jihi?

²¹ Jehe xa vinttenda'cho xa:

—Con xiemperador co nombré xa.

Cottimeja Jesús nda'cho ngain xa:

—Chjehe ra xiemperador tti jiquininxin xa co danjo ra ngain Dios tti jiquininxin sayé jehe.

²² Are vinttequinhi xa jihi, jehe xa vinttegoan xa admirado; co nttiha cointtohe xa Jesús co jehe xa savinttecji xa.

Caxion chojni joanchiangui que'én tti rroxechon ni

(Mr. 12.18-27; Lc. 20.27-40)

²³ Ngain nchanho mé caxion xisaduceo cjoí xa para joitsjehe xa Jesús. Xisaduceo vaguitticaon xa que chojni que ndadenhe irroxechonha na; mexinxin joanchiangui xa ngain Jesús co nda'cho xa:

²⁴ —Maestro, ley que vayé Moisés jitaxin que si ná xí que jicao xa 'chihí xa ndasenhe xa co 'xonhi chjan tsinttohe xa, chonda que ná xanchó xa xanxí secoo n'chiganha mé co rrochonda na chjan para que chjan mé sehe xan inchin xenhe tti ndavenhe.

²⁵ Nttihi ngayehna janha na vintte yáto xanxí, cain xanchó xan. Xansaho vecao xan 'chihí xan pero ndavenhe xan, co ixin 'xonhi chjan cointtohe xan, n'chiganha mé vecao n'cha xanchó tti ndavenhe, xanyoxin.

²⁶ 'Xajeho jamé conhe ngain xanyoxin cai, co después vecao n'cha xan-ninxin, pero 'xajeho jamé conhe, co hasta vecao n'cha tti xanyatoxin co 'xonhi chjan joichonda n'cha.

²⁷ Co después de cain mé, cai jehe n'cha ndavenhe n'cha.

²⁸ Mexinxin ndachjenji ni ra, are rroxechon cain ni yá, ¿quexehe de tti yáto xanchó mé sehe mero xixihí jehe n'chí mé ixin cain xan vinttecao xan 'xajeho n'chí mé?

²⁹ Jesús nda'cho:

—Jaha ra noaha ra quehe tenda'cho ra ixin noaha ra tti jitaxin ngain Palabré Dios, ni noaha ra tti joachaxin que chonda Dios.

³⁰ Ixin cain chojni que ondavenhe, are rroxechon na, isinttecaoha chó na de xí co ni de n'chí, ixin are mé sintte na inchin cain ángel de Dios que te ngajni.

³¹ Pero de tti jaha ra danchiangui na ra de ixin tti chojni que ndadenhe, ¿atsjeha jaha ra tti jindattjo ra Dios mismo? Jehe dinda'cho janhi:

³² “Janha tti Dios de Abraham co Isaac co Jacob.” Dios jeha Dios de tti nindadiguenhe, sino que Dios de chojni que techon.

³³ Cain chojni que te nttiha, are vinttequinhi na yá, cain na vinttegoan na admirado de ixin tti nichja Jesús.

Tti icha importante que ttetonha Dios
(Mr. 12.28-34)

³⁴ Are xifariseo conohe xa que Jesús ndajoinchetencoa xisaduceo, jehe xifariseo xatte xa ngain Jesús.

³⁵ Co ná de jehe xa que vehe xa maestroe ley Israel joinao xa rro-jinchenichja xa Jesús ná cosa nchaoha; mexinxin joanchiangui xa ngain Jesús co ndaço xa:

³⁶ —Maestro, ¿quexehe tti icha importante que ttetonha Dios sinchehe ni?

³⁷ Jesús ndaço:

—“Rinao Dios, ngain ansean, conixin ngain almá, conixin ngain joar-rixaon.”

³⁸ Jihi tti icha importante, co tti saho que ttetonha Dios sinchehe ni.

³⁹ Co tti yoxin chiaon xajeho ixin ndaço: “Rinao cain chojni inchin rinao cuerpoa.”

⁴⁰ Jehe cayoi cosa yá tti icha importante de ngain ley que vayé Moisés co de cain tti ndaço cain profeté Dios.

Tti dindaço David de ixin Jesucristo
(Mr. 12.35-37; Lc. 20.41-44)

⁴¹ Are cain xifariseo xa tate xa nttiha,

⁴² Jesús joanchiangui ngain xa co ndaço:

—¿Quehe xaxaon ra de ixin Cristo? ¿Quensen mé?

Jehe xa vinttendaço xa:

—Mé tsixin de ngain razé rey David.

⁴³ Cottimeja ndaço Jesús:

—Mexinxin ¿quedonda Espíritu Santo joinchenichja David, co David joincheguini Cristo, soixin? Ixin David dindaço:

⁴⁴ Tti Ttetonha cainxin cosa ndaço ngain tti Ttetonna janha:

“Darihi ngain lado jian na hasta que janha sinttagacha jaha de ngain cain tti ningaonha.”

⁴⁵ Mexinxin, ¿queén que Cristo jehe ná xanntí David si jehe David mismo ndaço que Cristo tti ttetonha ngain jehe?

⁴⁶ Co ni ná xa ixonhi ndaço xa ngain Jesús, co desde ngain nchanho mé ni ná xa ixonhi joanchianguihi xa Jesús.

23

Jesús joinchesattehe xifariseo co ximaestroe ley
(Mr. 12.38-40; Lc. 11.37-54; 20.45-47)

¹ Cottimeja Jesús ndaço ngain cain chojni que te nttiha co ngain chojni que vacao:

² —Cain ximaestroe ley Israel co cain xifariseo chonda xa joachaxin de nchecoehne xa chojni cain tti coetonha ley que vayé Moisés.

³ Mexinxin jaha ra ditticaon ra co nchehe ra cain tti rronhattjo ra xa, pero ncheha ra inchin jehe xa tenchehe xa ixin jehe xa dinttendaço xa ná cosa co dinttenchehe xa ojé.

⁴ Ndache xa chojni que sinchehe na tti anto tangui que jehe xa ttetonha xa, que ni jehe xa çhoha ni rinaoha xa nchehe xa cain mé.

⁵ Jehe xa nchehe xa cosa jian pero jeha para que icha chojni dicen, co para xaxaon na que jehe xa anto jian xa. Co jehe xa ttianito xa nttattjen xa co rá xa cajachjan de roa tti jingá rioho xón que jitaxin canxion parte de Palabréd Dios, co dinttengá xa lontto icha jinjini que icha chojni.

⁶ Co anto nchexoxinhi xa ttji xa ngain vandango co dintte xa ngain tti lugar icha importante. Co are dintteci xa ngain nihngo dintte xa ngain nttaxintaon icha importante.

⁷ Co are rridintte xa ngain nttiha, rinao xa que chojni sanjo na joajna ngain xa conixin anto tsje respeto, co sincheguinhí na xa maestro.

⁸ Pero jaha ra dittoaxinha ra que chojni sinttaguinhi ra na maestro, ixin cain jaha ra inchin chó ra cainxin ra co chonda ra jeha nacoaxinxon Maestro, que mé Cristo.

⁹ Co nttihí ngataha nontte ni ná chojni ncheguinha ra padre, ixin chonda ra jeha nacoaxinxon Ndodá ra que ttjen ngajni.

¹⁰ Ni dittoaxinha ra que chojni rroundattjo ra na ixin jaha ra anto importante ra ixin Cristo jeha mé tti icha importante para ixin jaha ra.

¹¹ Tti chojni que ttjenguijna icha chojni, mé tti icha importante de cain jaha ra.

¹² Ixin tti chojni que tonohé ixin jehe tti anto importante, mé settoxin nttajochjihí nganjí ra co tti chojni que jai tonohé que jehe jeha importante, chojni mé tti sehe icha importante.

¹³ ¡Pobre de jaha ra, ximaestroé ley co jaha ra chojni fariseo, xo ncheha ra tti ndačo ra! Ixin jaha ra tecayacoenhe ra chojni para que jehe na choha rrochonda na parte ngain tti tteonha Dios que ttjen ngajni. Ni jaha ra mismo rinaoha ra rrochonda ra parte ngain tti tteonha Dios, ni tančhjáandaha ra icha chojni para rrochonda na parte nttiha.

¹⁴ ¡Pobre de jaha ra, ximaestroé ley co jaha ra chojni fariseo, xo ncheha ra tti ndačo ra! Ixin jaha ra dantsjehe ra nchiandoha nchiganha ixin ittixinha nča ttjenga nča hna contribución, cottimeja para que xonhi chojni rroxaxaon tti jaha ra tenchehe ra, anto sé nchecoanxinhi ra Dios. Mexinxin jaha ra sayehe ra icha jie castigo que icha chojni.

¹⁵ ¡Pobre de jaha ra ximaestroé ley co jaha ra chojni fariseo, xo ncheha ra tti ndačo ra! Ixin jaha ra anto ttingaria ra para que ttjé ra chojni que sitticaon xajeho inchin jaha ra co are odinchí ra chojni mé, masqui jeha nacoa, jaha ra nchenchehe ra chojni mé cosa que jiquininxinha para que jehe icha jiquininxin tsji ngain infierno que jaha ra mismo.

¹⁶ ¡Pobre de jaha ra, xo tenchecanttjen ra icha chojni que noeha. Ixin ndačo ra que are ná chojni ndačo sinchehe ná cosa, co sinchejurá de ixin ningoe Dios, juramento mé xonhi xé; pero si sinchejurá de ixin tti oro que jixinhi nihngo, juramento mé nchoe jian.

¹⁷ ¡Jaha ra tonto ra co chejo ra! ¿Quexehe tti icha importante, aoro o nihngo que jinchejian oro mé?

¹⁸ Co cai ndačo ra que are ná chojni ndačo sinchehe ná cosa, co sinchejurá de ixin altar que jixinhi nihngo, juramento mé xonhi xé; pero si sinchejurá de ixin cain tti jí ngataha altar, juramento mé ján jian.

¹⁹ ¡Jaha ra tonto ra co chejo ra! ¿Quexehe tti icha importante, a tti jí ngataha altar o jehe altar que jinchejian cain cosa mé?

²⁰ Ixin tti chojni que nchejurá de ixin altar, chojni mé jinchejuraha de ixin jeha altar, sino que de ixin cain cosa que jí ngataha.

21 Co tti chojni que nchejurá de ixin nihngo, chojni mé jinchejuraha de ixin jeha nihngo, sino que cai de ixin Dios que jí ngaxinhi nttiha.

22 Cai tti chojni que nchejurá de ixin ngajni, chojni mé cai jinchejurá de ixin tti jitaha Dios co cai de ixin jeha Dios mismo, ixin jeha tti jí nttiha.

23 ¡Pobre de jaha ra ximaestroe ley co jaha ra chojni fariseo, xo ncheha ra tti ndačo ra! Jaha ra danjo ra para ixin Dios tti ttxin parte de ca inchin cañancho, co de anís, co de comino, pero ncheha ra tti icha importante de cain tti coetonha Dios, inchin de tti sinchehe ra jian ngain vidá ra, co tti tsiaconoehe ra icha chojni, co tti sitticaon ra jian de ixin Dios. Cain yá tti chonda ra que sinchehe ra cain nchanho, co cai nchehe ra sigue danjo ra tti ttxin parte de ca mé.

24 ¡Jaha ra tenchecantjen ra icha chojni que noeha! ¡Jaha ra nchecanguihi ra ná coxisenchjan de ngain vasoa ra pero dinga ra nchejio ná cocamello!

25 ¡Pobre de jaha ra ximaestroe ley co jaha ra chojni fariseo, xo ncheha ra tti ndačo ra! Jaha ra inchin vaso co láto que chojni ncheroa de ngama, pero de ngaxinhi ansean ra anto ttoaha ra ixin xa teca ra de cain cosa que diquehe ra co de puro rinao ra que jaho ra rrochonda ra cainxin cosa.

26 Jaha ra xo fariseo chejo. Saho ncheroa ra ansean ra co jamé cai tsoroa ngama ra, inchin nchehe ra ngain vaso co láto.

27 ¡Pobre de jaha ra, ximaestroe ley co jaha ra chojni fariseo, xo ncheha ra tti ndačo ra! Ixin jaha ra inchin cueva tti ttxinhi cuerpoe chojni que ndadiguenhe ixin cueva mé çhjoin te ixin diguingaxin ntteso ndojaxin, pero ngaxinxin tecaon de loroe chojni co cain cosa que ttoaha.

28 Jamé te ra jaha ra; de ndojaxin xago ra ixin jian ra ngain chojni, pero de ngaxinhi ansean ra tecaon ra de cosa jianha.

29 ¡Pobre de jaha ra ximaestroe ley co jaha ra chojni fariseo, xo ncheha ra tti ndačo ra! Ixin jaha ra nchechjan ra monumento anto çhjoin ngataha tti texavá cuerpoe cain profeta que ndavenhe are saho co nchetsonji ra monumentoe cain tti chojni que cjoí jian.

30 Cottimeja ndačo ra: “Sí janha na rroguinttechon na ngain tti tiempo que vinttechon nindogoelitoa na xañçhen, janha na rrocjenguijnaha na na para narrogoenxon na cain profeta que goen jeha na.”

31 Conixin yá jaha ra mismo datsoan ra que jaha ra xanntí tti chojni que nagoenxon cain profeta que venhe.

32 ¡Janché jaha ra nchejexin ra tti coexinxin joinchehe nindogoelitoa ra xañçhen!

33 ¡Jaha ra te ra inchin conché, co inchin razé conché ra! Jaha ra chonda ra que tsji ra ngain infierno.

34 Mexinxin janha rrorroanha profeta nganji ra, co xí que Espíritu Santo joinchenohe, co xí que sinttaoanha ra de ixin Dios. Pero jaha ra nasoenxon ra na co sinchecrucificá ra canxion na co icanxin na rroxanguihi ra na nttá o tton ngaxinhi nihngo, co rrorroehe ra na de rajna co rajna ngoi tti jeha na sacji na para feo sinchehe ra ngain na.

35 Mexinxin jaha ra tti teca ra vidé cainxin chojni jian que vintteguenhe, desde Abel, tti cjoí xí jian para ngain Dios, hasta Zacarías, xenhe Berequías tti nindogoelitoa ra nagoenxon na ngain lugar entre nihngo co altar.

36 Atto seguro tti janha rrindattjo ra, que cain chojni judío que techon jai, nijihí, niteca cain yá.

*Jesús tsjanga por ixin Jerusalén
(Lc. 13.34-35)*

³⁷ Cottimeja ndaĉho Jesus ina:

—iChojni de Jerusalen, jaha ra que nadoenxon ra profete Dios co anguihi ra o tti chojni que ttiaho joajna que Dios rroanha nganji ra; anto tsje nttiha janha joinaoh rrogatse ra inchin na cochia datse va xenhe va nganguihi nenehe va, pero jaha ra joinaoha ra!

³⁸ Tsjenxin ra; nchiandoi ra ndasittohe nchia jeho nchia,

³⁹ ixin janha rrindattjo ra que irrocjanha ra sicon ni ra janha hasta que tsija tti tiempo que jaha ra rrondaĉho ra: “Anto jian tti jo de ngain nombre Dios.”

24

Jesus ndaĉho que nihngo icha importante rroxante

(Mr. 13.1-2; Lc. 21.5-6)

¹ Jesus vaĉhjexin de nihngo icha importante co sajittji are chojni que vacao conchienne na ngain co ndaĉho na ixin rrotsjehe Jesus ngoixin nihngo me.

² Pero Jesus ndaĉho ngain na:

—Adicon jaha ra cain ya? Atto seguro tti rrindattjo ra que ya sittoeha ni na o ngataha ina o; cainxin rroxante.

Quehe tsonhe icha saho que mundo ndatsjexin

(Mr. 13.3-23; Lc. 21.7-24; 17.22-24)

³ Cottimeja savinttecji na ngain tti jnanchjan que dinhi Nttaolivo, co are Jesus tavehe nttiha, chojni que vacao conchienne na co joindaĉho na ngain jimao:

—Rinaho na que rrondachjenji ni ra quesa tsonhe ya, Quehe seal rroago are soixin rrocjan sihi ina, co are ondatsjexin mundo jiji?

⁴ Cottimeja Jesus ndaĉho ngain na:

—Ttjiho ra cuidado que onhi chojni sinttayaha ra.

⁵ Ixin atto tsje chojni ts co sinchegonda na nombrena rrondaĉho na: “Janha tti Cristo na”; co sincheyehe na tsje chojni.

⁶ Jaha ra tsinhi ra que sehe guerra nttihi co ngain icha lugar, pero aonha ra ixin jam chonda que tsonhe; pero a jeha tti nchanho que ndatsjexin mundo.

⁷ Ixin na nacin tsetocaho ina nacin, co na regin tsetocaho ina regin. Co ngain tsje parte de nontte sehe jintta, co chin, co tsingui nontte.

⁸ Cain ya nand tsexinxin tsonhe tti anto tangui que tsonhe chojni.

⁹ Cottimeja sinttachienne ra na jaha ra ngain chojni que ningaonha ra para feo sinchehe na nganji ra, co nasoenxon na jaha ra, co ngoixin mundo rroningaonha ra chojni ixin ditticaon ni ra janha.

¹⁰ Ngain tiempo me tsje chojni isincheha na sigue sitticaon na nganji na janha co rroningaonhe ch na co jeho na sinchechienne ch na ngain tti ningaonna janha.

¹¹ Are me tsononxin tsje tti rronichja cosa ndoaha, co jehe na rrondaĉho na que jehe na tenichja na joajne Dios, co sincheyehe na tsje chojni.

¹² Co anto tsje cosa jianha sehe, que hasta tsje chojni isinaoha ch na.

¹³ Pero tti chojni que sinchehe sigue sitticaon na janha hasta ndasenne, chojni me rrochond ina vida naroxin.

¹⁴ Co tti jian joajna de queen ttetonha Dios, jiji tsonohe chojni ngoixin mundo para que chojni ngain cainxin nacin tsonohe na tti jian joajna jiji. Are tsjexin cain ya, cottimeja ndasittan mundo jiji.

¹⁵ Profeta Daniel diquentaxin de ixin tti cosa que icha jianha de cainxin cosa. Co are jaha ra sicon ra que cosa mé siguehe ngain tti lugar santo de ngain nihngo icha importante, (tti tsjehe Xón jihi chonda que tsinxin),

¹⁶ cottimeja tti chojni que te Judea rrochonda na que satsinga na ngagaha jna.

¹⁷ Co tti sintte ngataha techoe nchiandoha, are jehe sania, rochjeha tiempo para sicao cosé de ngaxinhi nchia ixin anto daca satsinga.

¹⁸ Co tti sintte ngataon jngui, chondaha que rrocjan ni para sirroé lonttoe ngain nchiandoha.

¹⁹ ¡Pobre de cain nchí que sintteyá chjan co cain nchí que rrochonda chjan que tetai ngain nchanho mé!

²⁰ Nchetsenhe ra ñao Dios que jaha ra rrochondaha ra que satsinga ra mero ngain tiempoe quin, ni ngain tti nchanho que nchejogaha ni,

²¹ ixin are mé anto tangui tsonhe, que xa xonhi tiempo tonhe jamé ni desde are coexinhi vehe nontte jihi, ni tsonhe después.

²² Co si Dios rojinchenchinha tiempo mé, xonhi chojni rroxeha, pero Dios sinchenchín tiempo mé ixin jehe anto rinao cain tti chojni que jehe coinchiehe.

²³ Si are mé chonja chojni rrondattjo ra: “Nttihi jí Cristo”, o “Nojiha jí”, jaha ra ditticaonha ra.

²⁴ Ixin are mé tsí tsje chojni que sincheyehe tsje chojni ixin rrondacho na que jehe na ni Cristo co tsí chojni que rrondacho ixin jehe na dayé na joajné Dios. Co sinchehe na tsje señal co milagro para sincheyexin na tsje chojni, co si nchao hasta tti chojni que Dios mismo coinchiehe sincheyehe na.

²⁵ Janha ondattjo ra cain yá desde jaxon.

²⁶ Mexinxin si rrondattjo ra na: “Cristo cjan joí co jehe jí ngagaha jna tti xonhi chojni jí”, jaha ra ttjiha ra ditsjehe ra nttiha, o si rrondattjo ra na: “Cristo nttihi jí ngaxinhi ná cuarto”, jaha ra ditticaonha ra.

²⁷ Ixin janha, tti Xí que joixin de ngajni, are sihi iná, janha tsononxin na inchin are tonguixin anto daca dattoa xohi ngajni desde tti chinxin nchanho hasta tti diataonxin nchanho.

²⁸ Co tti sarihi janha, nttiha rroxatte cain chojnina.

Quexén tsí tti Xí que joixin de ngajni

(Mr. 13.24-37; Lc. 21.25-33; 17.26-30, 34-36)

²⁹ Nttihi tsjexin satto cain tti nchanho que anto tangui mé, cottimeja nchanho isinchengasanha nchaon, co conittjao co conotse sinttjixin va de ngajni, co hasta cainxin cosa que jí ngajni, rroxanga.

³⁰ Cottimeja sicononxin ngajni señal de janha, tti Xí que joixin de ngajni, co ngain cainxin rajna de ngoixin mundo rrotsjanga chojni, co sicon na na janha, tti Xí que joixin de ngajni, sihi are mé ngacjan ttjoi de ngajni conixin anto tsje joachaxin co gloria.

³¹ Co janha rrorroanha cain angelna para que are tsoyao trompeta, jehe satse cainxin chojni que janha coinchí de cainxin parte de ngoixin mundo.

³² Tangui ra ejemploe nttahigo: Are xesan ramé ntta co chinhi qué ntta, jaha ra onoha ra que ojoiconchian tiempoe chin.

³³ Xajejo jamé cai, are jaha ra sicon na que cain cosa yá tsexinhi tsonhe, jaha ra onoha ra que janha ochiaon rrocjan na sihi iná.

³⁴ Atto seguro tti rrindattjo ra que cain yá tsonhe icha saho que generación jihi sitján.

³⁵ Ngajni co nontte ndasitján, pero tti janha ndačhjan sitjanha ixin chonda que tsonhe cain tti ndačhjan.

³⁶ Pero nchanho co hora que tsonhe mé, ni ná chojni noeha, ni cain ángel que te ngajni, ni janha tti Xenhe Dios nonaha. Jeho Dios Ndodá na tti nohe quesá co quehe hora.

³⁷ Jańá inchin conhe ngain tiempoe Noé cai jamé tsonhe are sihi janha, tti Xí que joixin de ngajni.

³⁸ Ngain tiempo mé are icha saho que vitjanxin na jinda, cain chojni vanchehe sigue vanchehe na inchin costumbré na; vajine na co vaguihi na, vacottehe na co vaganjo na nčhichehe na para vacottehe nča. Jańá hasta ngain tti nchanho que Noé joixinhi para ngaxinhi tti arca que jehe joiñchechjian.

³⁹ Co coinxinha na que ixin ndarroguítján mundo hasta que jói jinda co ndagoen cainxin na. Jamé tsonhe cai are sihi janha, tti Xí que joixin de ngajni.

⁴⁰ Ngain rato mé si yó xí tenchehe ʒa ngataon jngui, ná rrochonda iná vida naroxin co ná nahi.

⁴¹ Co si yó nčí tedaho, ná nča sayá nča co iná nča nahi.

⁴² Jaha ra cain nchanho dintte ra listo ixin noaha ra quesá sihi janha tti chonda cain joachaxin.

⁴³ Pero ttettexin ñao ra jihi, que si xinajní ná nchia rroconohe xa quehe hora rroquí xichehe are ttie, xinajni rroquejoaha xa; jehe xa rroguenda xa nchiandoha xa para rrocanchjandaha xa xichehe rroguixinhi xa rroqué xa.

⁴⁴ Mexinxin jaha ra cai dintte ra listo ixin noaha ra quesá janha, tti Xí que joixin de ngajni, sihi iná.

*Ná tti nchehe xa jian co ná tti nchehe xa jianha
(Lc. 12.41-48)*

⁴⁵ Tti nchehe ʒa que ditticaon nchehe cain tti ditonhe co chonxin tti jian; xinajni chonda xa confianza ngain chojni mé para que jehe dittoehe icha ninchehe ʒé xa para danjo jine na hora que denhe na jintta.

⁴⁶ Anto čhjoin para ixin jehe tti nchehe ʒa si jehe jinchehe cain tti vitonhe are tsí xinajní.

⁴⁷ Atto seguro tti rrindattjo ra, que xinajní rrochjé xa joachaxin para que jehe senda cainxin cosa que jehe ʒa chonda xa.

⁴⁸ Pero si tti nchehe ʒa mé jianha, co rroʒaxaon que xinajní tsiha xa toin,

⁴⁹ co si jehe tsexinhi sinchesattehe icha ninchehe ʒé xa, co sehe sincaho co sicaho cain tti dicoan,

⁵⁰ pero cottimeja xinajní tsí xa ngain ná nchanho que ni jehe rroʒaxaonha, co ngain ná hora que ni jehe noeha.

⁵¹ Co rrochjé xa ná castigo anto tanguí, que ʒajeho inchin castigo que sayé cain chojni que ncheha na tti jehe na ndačo na. Cottimeja nttiha jehe rrotsjanga co sinetaon neno.

25

Ejemploe tti tte xannčí

¹ Cai ndačo Jesús:

—Jihi ná ejemploe queʒén ttetonha Dios que ttjen ngajni. Mé inchin ná xanxí que tsottehe. Co tte xannčí vintteci xan ngain vandango mé co joicao xan lámpara de aceite para joichoexin xan xinovio ngatja nttiha.

² Naho de jehe xan lista xan co naho xan xaxaonha xan jian.

³ Tti xan xaxaonha jian joicaoha xan icha aceite para rroquequia xan lamparé xan iná.

⁴ Co tti xan lista joicao xan icanxin xoꝯao de aciete aparte de lamparé xan.

⁵ Co ixin xinovio dacaha joí xa, cain xannčí mé tse xan cottačhin co tavinttejoa xan.

⁶ Cottimeja inchin ngosine ttie, coinhi xan coyao ná tti ndačo: “¡Ojój xinovio, dačhje ra dichoenxin ra xa ngatja nttiha!”

⁷ Cain xannčí mé vintteguingattjen xan, para vinttenchegacaon xan lamparé xan.

⁸ Cottimeja tti xan naho que xaxaonha jian vinttendačo xan ngain tti xan naho que vintte lista: “Chjana ni ra nchion aceite ixin lamparana na ndatedangá lampara.”

⁹ Pero tti xan naho que vintte lista vinttendačo xan: “Nahi, ixin sittjaha aceite para ixin janha na co jaha ra. Icha jian ttji ra tti točhji aceite, co nttiha tehna ra aceite para ixin jaha ra.”

¹⁰ Pero are tti naho xannčí mé joiuehna xan aceite, xinovio ojój xa. Co cain tti xannčí que tedacaon lamparé joixincaho xan xinovio ngaxinhi nchia tti jí vandango co coejé na puerta.

¹¹ Cottimeja vinttequí tti inaho xannčí co vinttendačo xan: “Nttatsanha ra ñao danttjena ni ra puerta.”

¹² Pero xinovio ndačo xa: “Chonxinha quensen jaha ra.”

¹³ Cottimeja Jesús ndačo:

—Dintte ra listo cain nchanho ixin noaha ra quesa ni quehe hora rrocjan na sihi janha, tti Xí que joixin de ngajni.

Ejemploe tomi

¹⁴ Jíhi iná ejemploe que xén ttetonha Dios que ttjen ngajni. Mé inchin na xinajni que sajittji para ngain iná nación. Pero icha saho que jehe xa sacjoi xa, vayé xa cain ninchehe xé xa co ndačo xa ngain na: “Nttihi cada ra tsintoaha ra tomina.”

¹⁵ Ngain ná de jehe na joanjo xa inchin naho mil de tomi mé, co ngain iná na joanjo xa inchin yó mil, co ngain iná na inchin ná mil. Cada na vayé na tomi inchin jehe na nohe na nchenchehe na tomi xa. Cottimeja jehe xinajni mé sacjoi xa cjin.

¹⁶ Tti nchehe xa que vayé tti naho mil de tomi mé, jehe joinchegonda tomi mé co joacha iná naho mil.

¹⁷ Co jamé joinchehe tti vayé tti yó mil, co joacha iná yó mil.

¹⁸ Pero tti vayé ná mil, mé ngue co cjoavá tomí xinajní.

¹⁹ Vatto tsje tiempo, cottimeja cjan xinajní cain ninchehe xa mé para joitse xa cuenta ngain na.

²⁰ Saho conchienne tti vayé naho mil, co joanjo iná naho mil, co ndačo ngain xa: “Chjana naho mil, co nttihi dayehe iná naho mil que joacha janha.”

²¹ Xinajni mé ndačo xa ngain: “Atto nchao jí; jaha ná ninchehe xa atto jian co nchehe cain tti ditonha. Jaha ojoinchehe jian ngain tti tomi que chjaha masqui tsjeha, mexinxin jai rochjaha icha tsje. Xacoi dixinhi nchiania para rochaha conixin janha.”

²² Cottimeja conchienne tti nchehe xa que vayé tti yó mil, co ndačo: “Chjana yó mil, co nttihi dayehe iná yó mil que joacha janha.”

²³ Xinajní ndačo xa ngain: “Atto nchao jí; jaha ná ninchehe xa atto jian, co nchehe cain tti ditonha. Jaha ojoinchehe jian ngain tti tomi que chjaha

masqui tsjeha, mexinxin jai rrochjaha icha tsje. xacoi dixinhi nchiania para rrochaha conixin janha.”

²⁴ Pero are conchienne tti nchehe xa que vayé tti mil, ndačo ngain xinajni: “Janha nona que soixin anto soji ansean que dantsjehe chojni tti soixin danjoha co jamé tsinhi cosecha tti soixin ttengaha.

²⁵ Mexinxin janha xaon na nganji co joiquema tomia, joicjavá tomi. Pero nttihi dayehe tti tomia que chjana.”

²⁶ Xinajni ndačo xa: “Jaha ná ninchehe xa jianha, co atto saha. Si onoha que janha dantsjá chojni tti janha danjoha, co jamé janha tsinhi cosecha tti janha coengaha,

²⁷ mexinxin icha jian si jaha rrojicán tomia ngain ná banco, co are janha rrocjan na rrojihu, rrogayá tomia conixin tti rrogacha tomi.”

²⁸ Co ndačo xa ngain nite nttiha: “Dantsjehe ra xa tti mil que jichonda xa co danjo ra ngain tti jichonda tte mil.

²⁹ Ixin tti chonda, sayé icha, co rrochonda hasta rroxehe. Co tti xonhi chonda, sachjehe hasta cain tti chonda masqui tsjeha chonda.

³⁰ Co tti nchehe xa que xonhi xé jihi, dehngui ra ndoja tti naxin xehe, nttiha tti rrotsjanga jehe co sinetaon neno.”

Quexén soenhe juzgado cain nación

³¹ Janha, tti Xí que joixin de ngajni, are janha sihi inchin ná Rey, conixin cain angelna, are mé sarihi ngain lugar de joachaxin.

³² Chojni de cainxin nación rroxatte na ngattoxon con, co janha santsjenda na cada na inchin tti ttingaria coleco dantsjenda coleco de ngayehe cottentso.

³³ Janha tsín coleco lado jian na co cottentso lado cjon na.

³⁴ Cottimeja janha, tti Rey na, rronddattjan tti chojni que te lado jian na: “xacoi ra, jaha ra xo ojointtanchaon ra Nnodana, co dayehe ra tti lugar que jichjian para ixin jaha ra desde que are Nnodana joinchechjian Ndo nontte.

³⁵ Ixin janha venhe na jintta, co jaha ra chjana ra tti joine; co venhe na jinda co jaha ra chjana ra tti vihi; janha vacji inchin chojni de ojé nontte co jaha ra chjana ra nchia tti janha joarihi.

³⁶ Janha xonhi lontto joarichonda, co jaha ra chjana ra lontto que joaringaha; janha conina co jaha ra joasotsjena ra; janha viaxinna ngain cárcel, co jaha ra joasotsjena ra.”

³⁷ Cottimeja tti chojni jian rronddačo na: “¿Quesa vicon na que soixin venhe jintta, co janha na ján chjaha ra tti jointte? ¿O quesa vicon na que soixin venhe jinda co janha na ján chjaha ra tti vihi?

³⁸ ¿O quesa vicon na que soixin vacji inchin chojni de ojé nontte, co janha na ján chjaha ra nchia tti joarihi? ¿O quesa joarichondaha lontto co janha na ján chjaha ra lontto?

³⁹ ¿O quesa vicon na janha na que soixin coniha o joarihi ngaxinhi cárcel co janha na ján joasotsjaha ra soixin?”

⁴⁰ Co janha tti Rey na rronddachjan: “Atto seguro tti rrrindattjo ra que cain tti jian que joinchehe ra ngain chojni tehe que ditticaon na, masqui chojni mé anto importanteha na, pero rročo ixin nganji na janha tti joinchehe ra mé.”

⁴¹ Cottimeja janha tti Rey na rronddattjan tti chojni que te lado cjon na: “Sattjixin ra de nganji na janha, jaha ra chojni jianha. Sattji ra ngain infierno tti xonhi tiempo danga xohi, que mé conchjian para ixin inchínji conixin cain ángel de jehe.

⁴² Ixin janha venhe na jintta co jaha ra chjanaha ra tti joine; venhe na jinda co chjanaha ra tti vihi.

⁴³ Janha vacji inchin chojni de ojé nontte, co jaha ra chjanaha ra nchia tti joarihi. Janha ivechondaha lonttona, co jaha ra chjanaha ra lontto. Janha conina, cottimeja viaxinna ngain cárcel, co jaha ra joasotsjenaha ra.”

⁴⁴ Cottimeja jehe na rrondačo na: “¿Quesa vicon na que soixin venhe jintta o venhe jinda, o inchin chojni de ojé nontte, o quesa vicon na que soixin ijoarichondaha lonttoa, o quesa que soixin coniha, o viaxinha ngain cárcel co janha na cjoengujnaha ra soixin?”

⁴⁵ Co janha tti Rey na rronhattjan na: “Atto seguro tti rrindattjo ra que cada nttiha que thoha ra cjoengujna ra chojni tehe que ditticaon na janha masqui chojni mé anto importanteha na, ngain rato mé rročo ixin jaha ra cjoengujnaha ni ra janha.”

⁴⁶ Cottimeja cain chojni jihi satsji na ngain infierno tti xonhi tiempo danga xohi, co tti chojni jian satsji na tti rrochonda na iná vidé na naroaxin que xonhi tiempo tsjexin.

26

Quexén xaxaon na para tse na Jesús

(Mr. 14.1-2; Lc. 22.1-2; Jn. 11.45-53)

¹ Are Jesús joexin ndačo cain yá, jehe ndačo ngain chojni que vacao:

² —Inchin jaha ra onoha ra, nttihi yó nchanho tsí tti quiai dinhi pascua co janha, tti Xí que joixin de ngajni, jehe na rrondačo na para rrotse na na co sinchecrucificá na na.

³ Cai ngain xajeho nchanho mé cain xidána que ttonha ngain icha xidána co cain ximaestro ley Israel co cain xittetonha ngain nihngo, cain chojni mé xatte na ngain patioe palacioe Caifás, tti dána icha importante.

⁴ Nttiha cjoaxin na de ixin quexén sinchehe na para que sincheyehe na Jesús para rrotse na co nasoexon na.

⁵ Pero vinttendačo na:

—Sonttoha na ngain mero nchanho de quiai para que tsoñaoha chojni.

Ná nchí cointtjitte aceite cuerpoe Jesús

(Mr. 14.3-9; Jn. 12.1-8)

⁶ Ngain tiempo mé Jesús vehe ngain rajna Betania ngain nchiandoha Simón tti vancheguinhí na Leproso.

⁷ Co nttiha, are tene na ngain mesa conchienne ná nchí que joicao ná xoꝑao de joxon marmol hasta jiče de aceite que anto xajni co anto rentte. Jehe ncha cointtjitte ncha aceite mé ngataha já Jesús.

⁸ Are chojni que vacao Jesús vicon na yá, coñaon na co coexinhi na ndačo na:

—¿Quedonda coxinoa aceite yá?

⁹ Nchao rrocchji aceite yá conixin tsje tomi para rrocjengujnanxin na chojni noa.

¹⁰ Jesús coinhi mé, co jehe ndačo ngain na:

—¿Quedonda jańá techo ra ixin nchí jihí? Tti jehe ncha joinchehe ncha nganji na janha; jihí ná cosa jian.

¹¹ Ixin chojni noa cain tiempo sintte na ngayaha ra, pero janha cainxinha tiempo sarihi ngayaha ra.

¹² Tti joinchehe nchí jihí, are jehe ncha cointtjitte ncha aceite cuerpona, jehe ncha ocoinga na ncha yá para are rroꝑavá na.

13 Atto seguro tti janha rrindattjo ra que cain tti rrondaço na tti jian joajna jihi ngoixin mundo, cai rrondaço na tti joinchehe n'chi jihi para rroḡaxaonxin na n'cha.

Judas ndaço para rrotse na Jesús

(Mr. 14.10-11; Lc. 22.3-6)

14 Cottimeja ná de tti tteyó chojni que vacao Jesús, mé vinhi Judas Iscariote, cjoí para joicjao canxion xidána que vaquetonha ngain icha xidána,

15 co ndaço ngain xa:

—¿Quejanhi tomi rrochjana ra si janha rrondattjo ra queḡén sinchehe ra para rrotse ra Jesús?

Cottimeja jehe xa cjoenguehe xa hna treinta tomi de plata.

16 Co desde ngain rato mé Judas cjoé queḡén sinchechienhe Jesús ngá rá xidána mé.

Are joinecaho Jesús tti tteyó chojni que vacao

(Mr. 14.12-25; Lc. 22.7-23; Jn. 13.21-30; 1 Co. 11.23-26)

17 Saho nchanho de tti quiai que jine na niottja que chondaha levadura, tti tteyó chojni que vacao Jesús conchienenhe na ngain jehe co joanchiangui na co ndaço na:

—¿Quettinó sinttachjianxin na tti sintte soixin para ngain quiai pascua?

18 Jesús ndaço ngain na:

—Ttji ra ngain Jerusalén ngain nchiandoha tti xí que jaha ra onoha ra co ndache ra que janha ndaḡjan que ochian joí tiempo para janha ndasenne na co ngain nchiandoha jehe sinttasayaxin janha tti quiai pascua conixin chojnina que ḡjinha.

19 Chojni mé vitticaon na joinchehe na inchin coetonha Jesús, co nttiha joinchechjianxin na cain tti joine na ngain tti quiai pascua.

20 Ngain ttie mé Jesús joinecaho tti tteyó chojni que vacao.

21 Co are cain na tatene na, jehe ndaço ngain na:

—Atto seguro rrindattjo ra que ná de jaha ra rrondache chojni queḡén para rrotse na na janha.

22 Cottimeja cain jehe na anto vinttechín na co coexinhi na, ná na co ná na joanchiangui na ngain Jesús co ndaço na:

—¿Apoco janha?

23 Co Jesús ndaço ngain na:

—Ná tti rrinequinha janha ngain lato jihi, mé tti rrondache chojni queḡén para rrotse na na.

24 Ján ndoa janha, tti Xí que joixin de ngajni, senhe na inchin ndaço ngain tti jitaxin Palabré Dios, pero anto tanguí tsonhe tti rrondache chojni queḡén para rrotse na na. Icha jian para ixin jehe si rroconcjia.

25 Cottimeja nichja Judas, tti ndache chojni queḡén para rrotse na Jesús, co jehe ndaço ngain Jesús:

—Maestro, ¿apoco janha?

Jesús ndaço ngain:

—Ján, jaha.

26 Are tejine na, Jesús coá niottja co joanjo gracias ngain Dios, co váña nio. Cottimeja joanjo nio ngain chojni que vacao, co ndaço ngain na:

—Jintte ra, jihi rroḡo cuerpona janha.

27 Cottimeja coá tti vaso de vino, co joanjo gracias ngain Dios. Cottimeja joanjo ngain na co ndaço:

—Dihi ra cainxin ra jaha ra vino jihi,

²⁸ ixin jihi tti rroçho jnina janha que sinchese gurá tti trato naroaxin. Co jnina singo jni para rroxengaxin hna tti jianha que nchehe tsje chojni.

²⁹ Pero rrindattjo ra que janha irrocjanha na sihi vineo uva hasta tti nchanho que janha conixin jaha ra sonho na tti vino naroaxin ngain lugar tti tteonha Ndozana ngajni.

*Jesús ndaço que Pedro rrondaço ixin jehe chonxinha Jesús
(Mr. 14.26-31; Lc. 22.31-34; Jn. 13.36-38)*

³⁰ Co vinttetsje na ná himno, cottimeja savintteci na ngain jnanchjan que dinhi Nttaolivo.

³¹ Cottimeja Jesús ndaço ngain na:

—Janha tti cain jaha ra sinttechinhi ra de ixin janha ngain ttie jihi, ixin ndaço ngain tti jitaxin Palabré Dios: “Dios nasoexon tti ttingaria coleco, co cain coleco rrochjequé va.”

³² Pero después que janha rroxechon na, janha saho tsji Galilea que jaha ra.

³³ Cottimeja Pedro ndaço ngain Jesús:

—Masqui cainxin na sinttechin na de ixin soixin, pero janha nahi.

³⁴ Cottimeja ndaço Jesús:

—Janha rrindattjo seguro que ngain ttie jihi, saho que rrotsje conttaxichia, jaha orrondaço ninxin nntiha que chonxinha na.

³⁵ Pedro ndaço:

—Masqui rrochonda que senxin na tti soixin senxin, pero rrondaçhjanha ixin chonxinha soixin.

Co cain ni icha ndaço na çajeho cai.

*Are Jesús joichetsenhe ñao Dios ngain Getsemaní
(Mr. 14.32-42; Lc. 22.39-46)*

³⁶ Cottimeja Jesús conixin tti chojni que vacao joihi na ngain ná lugar dinhi Getsemaní, co nntiha Jesús ndaço ngain na:

—Nntihi dintte ra co chonna ra ixin janha sinttatsán ñao Dios.

³⁷ Co Jesús sajoicao Pedro co cayoi xenhe Zebedeo, co jehe coexinhi conohe ná joachjaon anto soji ngain almé.

³⁸ Cottimeja jehe ndaço:

—Janha tonona ngain almana ná joachjaon anto soji que hasta rinaho ndasenhe na. Dittoha jaha ra nntihi nganji na janha, co dinttechinha ra.

³⁹ Cottimeja Jesús sacjoi nchion icha cjin co nntiha vecjantaha nontte, co joinchetsenhe ñao Dios, co ndaço:

—Padre, si nchao, tançhjangaha na que janha sattoha ngain tti anto tangui que tsonna; pero tsoenha inchin janha rinaho, sino que tsonhe inchin soixin rinao.

⁴⁰ Cottimeja cjan para ngain tti ní chojni que joicao, pero are jehe joihi nntiha, jehe na otatejoa na. Co jehe ndaço ngain Pedro:

—¿Acoixianha ra tavinttetsjehe ra ni ná hora para rroguinttenda ni ra?

⁴¹ Tadinttetsjehe ra co nchetsenhe ra ñao Dios, para que çonhi cosa jianha sinttatjanji ra. Ndoa que espiritua ra anto rinao sintte jian, pero cuerpoa ra sojiha.

⁴² Yoxin nntiha jehe cjan para joinchetsenhe ñao Dios iná co ndaço:

—Padre, si çhoja para que soixin tsançhjangaha na janha satto ngain tti anto tangui jihi, que tsonhe inchin soixin rinao remé.

⁴³ Cottimeja jehe cjan co jehe na tatejoa na iná ixin jmacon na icoixinha de anto cottaçhin.

⁴⁴ Jesús nttiha cointtohe na co jehe sacjan para joinchetsenhe ñao Dios ninxin nttiha, co ndačo xajeho.

⁴⁵ Cottimeja cjan ngain tti vittohe jehe tti ní chojni que joicao, co ndačo ngain na:

—Janche dinttechin ra co nchejogaha ra. Hora ojoí que janha, tti Xí que joixin de ngajni, sinchechienhe na na ngá rá chojni jianha.

⁴⁶ Dingattjen ra sachjin na; ojoí tti ndačo quexén para rrotse na na janha.

Are tse na Jesús

(Mr. 14.43-50; Lc. 22.47-53; Jn. 18.2-11)

⁴⁷ Jesús xa jindačo jaña are ojoí Judas, ná de tti tteyó chojni que vacao Jesús. Judas joiaho anto tsje chojni que teyá na espada co nttá. Xidána que vaquetonha ngain icha xidána co xittetonha ngain nihngo, xí mé rroanha cain chojni mé.

⁴⁸ Judas, tti joindache xa quexén para tse na Jesús, mé dindačo ngain cain chojni que joiaho:

—Tti janha tsetoxin para rrochjaha joajna, jehe mé. Tse ra co sattjiho ra.

⁴⁹ Cottimeja jehe Judas conchienenhe ngain Jesús co ndačo:

—¡Deo, Maestro!

Co coetoxin.

⁵⁰ Jesús ndačo ngain Judas:

—Amigo, ¿quedonda joihi nttihi?

Cottimeja cain nicjoi conchienenhe na co tse na Jesús co sajoicao na.

⁵¹ Ngain rato mé, ná de tti tteyó chojni que vacao Jesús joantsje espadé co conchinjihi ndatsjoen ná xinchehe xé xidána icha importante.

⁵² Cottimeja ndačo Jesús ngain:

—Ttenchjinha espadá lugué espada. Ixin cain chojni que tjayaxin conixin espada, conixin espada senxin cai.

⁵³ ¿Añoaha que janha nchao rrondattjan Ndodana co jehe Ndo jaxon rrorroanna Ndo icha que setenta mil ángel?

⁵⁴ Pero si jamé rroconhe, ¿quexén para tsonhe tti ndačo ngain tti jitaxin Palabré Dios, que mé chonda que siconhe?

⁵⁵ Cottimeja Jesús ndačo ngain cain chojni que cjoí:

—¿Ajoihi jaha ra conixin espada co nttá para joitse ni ra como si janha rrocji ná xichehe? Cain nchanho vatto janha vagarihi ngayaha ra ngain nihngo icha importante para vanttacoanha ra de ixin Dios co xonhi tiempo tse ni ra.

⁵⁶ Pero cain jihi tsonhe para que siconhe cain tti dindačo cain profeta ngain tti jitaxin Palabré Dios.

Cottimeja cain tti chojni que vacao Jesús ndacointtohe na jeho Jesús nttiha co jehe na sacinga na.

Are Jesús ngain juzgadoe nihngo

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Cain nijoitse Jesús sajoicao na para ngain nchiandoha Caifás, mé vehe xidána icha importante, co nttiha tti dixatte cain ximaestroe ley co cain xittetonha ngain nihngo.

⁵⁸ Co Pedro ta tti cjin jirroexin hasta joihi ngain patioe nchiandoha jehe Caifás. Nttiha joixinhi Pedro co tavehe ngayehe xipolicía que te nttiha para vicon quehe joinchehe ni icha ngain Jesús.

⁵⁹ Cain xidána que vaquetonha ngain icha xidána, co cain xittetonha ngain nihngo, co cain xittetonha ngain juzgadoe nihngo cjoé xa quehe sinchecaxin

xa Jesús, masqui ndoaha joinchehe Jesús ná cosa jianha, jeho para ttjé xa para nasoenxon xa Jesús.

⁶⁰ Pero xonhi cosa vittja xa masqui anto tsje chojni conchienne para ndačo na cosa ndoaha de ixin quehe joinchehe Jesús. Cottimeja vintconchienne yó chojni testigo que nichja cosa ndoaha.

⁶¹ Chojni mé ndačo na:

—Xí jihi ndačo xa: “Janha nchao tsonxante ningoe Dios, co rrocjan na sinttachjian nihngo iná ngain nincoa nchanho.”

⁶² Cottimeja vingattjen xidána icha importante co ndačo xa ngain Jesús:

—¿Axonhi nichja jaha? ¿Andoa tti ndačo chojni tehe o ni nahi?

⁶³ Pero Jesús tencoa. Cottimeja ndačo xidána icha importante mé:

—Conixin joachaxín nombré Dios que jichon, janha rritetonha jaha que rrondachjenji na ndoa. Ndachjenji na si jaha tti Cristo, Xenhe Dios.

⁶⁴ Jesús ndačo:

—Ján, janha inchin jaha ndačo. Co cai rronattjo ra jaha ra que sicon ni ra janha, tti Xí que joixin de ngajni, sarihi ngain lado jian de Dios que chonda cainxin joachaxin, co sicon ni ra sihi ngacjan ttjoi de ngajni.

⁶⁵ Cottimeja jehe xidána icha importante coinchje xa lonttoe xa para ná señal que jehe xa anto coñao xa co ndačo xa:

—Xí jihi nichja xa jianha para ixin Dios. ¿Quehe rrogondá na icha testigo? Jaha ra coinhi ra tti jianha que ndačo xa.

⁶⁶ ¿Quehe xaxaon ra?

Cain na ndačo na:

—Jiquinixin xa senhe xa.

⁶⁷ Cottimeja canxion na cjoatjo na nttatté na ngá con Jesús co xanguí na tton. Icanxin na xanguí na manazo ngá con Jesús.

⁶⁸ Co ndačo na ngain:

—Jaha que Cristo, ¡datsoenhe quensen goen!

Pedro ndačo que jehe chonxinha Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ De cain mé Pedro tají ndoja ngain patio, co conchienne ngain jehe ná nchimozé xidána icha importante co ndačo ncha:

—Jaha cai vacjiho Jesús, tti joixin nonttehe Galilea.

⁷⁰ Pero ngattoxon con cain nite nttiha, Pedro ndačo:

—Nonaha de quehe rrindachjenji na.

⁷¹ Pedro are jehe sajittji ngain puerté patio are vicon iná nchimozé xidána mé, ndačo ncha ngain nite nttiha:

—Xí jiha cai vacao xa Jesús, tti rajné Nazaret.

⁷² Pedro joinchejurá co ndačo:

—Janha chonxinha xí yá.

⁷³ Nchion después cain nite nttiha conchienne na ngain Pedro co ndačo na ngain:

—Ján ndoa, jaha cai ná de tti chojni Jesús ixin datsoan ni hasta de quexén nichja.

⁷⁴ Cottimeja Pedro joanchia ná castigo ngain Dios para ixin jehe ixin joinchejurá ngain Dios co ndačo:

—Dios nchao nasoenxon na janha si ndoaha tti rrindachjan que janha choxinha xí yá.

Co ngain rato mé tsje ná conttaxichia.

⁷⁵ Cottimeja Pedro xaxaon tti nda'cho Jesús ngain jehe: "Saho que contaxichia rrotsje va, jaha orronda'cho ninxin nttiha que ixin chonxinha na." Cottimeja Pedro va'chjexin de nttiha co anto tsjanga.

27

Are joicao na Jesús ngain Pilato (Mr. 15.1; Lc. 23.1-2; Jn. 18.28-32)

¹ Are ovingasán cain xidána que vaquetonha ngain icha xidána co cain xittetonha ngain ningoe chojni judío cjoao na ixin quexén sinchehe na para nasoexon na Jesús.

² Cottimeja coia na Jesús co joicao na ngain Poncio Pilato, tti vehe xigobernador.

Are ndavenhe Judas

³ Judas, tti joindache xidána para tse na Jesús, are jehe conohe que nasoexon na Jesús, jehe xaxaon que jianha joinchehe co anto feo conohe, co cjan cjoic ngain xidána que vaquetonha ngain icha xidána co xittetonha ngain nihngo para joiconcjan tti treinta tomi de plata,

⁴ co nda'cho ngain xa:

—Janha jianha jointtaha ixin joindattjo ra quexén para tse ra ná xí que xonhi jica para que nasoexon ra xa.

Pero jehe xa vinttenda'cho xa ngain Judas:

—Pero mé, ¿janha na quehe ndosenna na? ¡Yá problemá jaha!

⁵ Cottimeja Judas cjoa tomi mé ngaxinhi nihngo nttiha, co sacjoi para joiquenttedonguihi ttosin ná jino jeho para ndavenhe.

⁶ Jehe xidána que vaquetonha ngain icha xidána joatse xa tomi mé co nda'cho xa:

—Choha tsín na tomi jihi ngain cajé tti tomi que danjo chojni ixin tomi jihi xengaxin hna jni.

⁷ Cottimeja cjoao chó xa para que conixin tomi mé coenaxin xa tti nontte que dinhi Nonttehe tti Nchechjian Chi para que nttiha sehe ná lugar tti tsjavá na chojni que ttixin de iná nación.

⁸ Mexinxin jngui mé dinhi hasta jai, Jngui de Jni.

⁹ Jamé joiconhe tti dinda'cho profeta Jeremías: "Coá na tti treinta tomi de plata, (tti tomi que chojni Israel cjoenga hna para ixin jehe).

¹⁰ Conixin tomi mé coenaxin na tti jnguihi tti nchechjian chi, co jamé conhe inchin coetonna Dios."

Jesús ngain Pilato (Mr. 15.2-5; Lc. 23.3-5; Jn. 18.33-38)

¹¹ Joicao na Jesús ngain xigobernador que vinhi xa Pilato, co jehe xa joanchianguihi xa Jesús co nda'cho xa:

—¿Ajaha tti Rey de chojni judío?

Jesús nda'cho ngain xa:

—Ján janha jañá inchin jaha nda'cho.

¹² Co are cain xidána que vaquetonha ngain icha xidána, co cain xittetonha ngain nihngo tenichja xa tti jeha ndoa de ixin Jesús, jehe xonhi nda'cho.

¹³ Cottimeja Pilato nda'cho ngain Jesús:

—¿Attinha cain tti tenda'cho na de ixin jaha?

¹⁴ Pero Jesús xonhi nda'cho ngain Pilato; co jamé jehe xigobernador Pilato goan xa admirado co inoeha xa quehe rrojinchehe xa ngain rato mé.

*Are ndaĉho na ixin Jesús chonda que ndasenhe
(Mr. 15.6-20; Lc. 23.13-25; Jn. 18.38—19.16)*

¹⁵ Nĉhao remé, ngain cain quiai mé xigobernador vechonda xa costumbre de vacanĉjanda xa ná de tti teaxinhi para savacji. Jehe xa vacanĉjanda xa quexeho de tti chojni que vaquinchiehe jehe na.

¹⁶ Ngain tiempo mé nttiha vehe ngaxinhi cárcel ná tti vinhi Barrabás, co tsje chojni chonxin jehe mé.

¹⁷ Co are cainxin chojni ĵatte na nttiha, Pilato joanchiangui ngain na co ndaĉho:

—¿Quensen rinao ra tsanĉjanda janha para que jehe satsji; a Barrabás o ani Jesús, tti dinhi Cristo?

¹⁸ Jamé ndaĉho Pilato ixin oconohe que cain xidána conĉjoehe xa ngain Jesús ixin jehe cainxin jian vanchehe, mexinxin joinchechienxin xa Jesús nttiha.

¹⁹ Ngain rato mé are Pilato tajitaha ntaxintaoen tti vanchejuzguexin chojni, nĉhiĉihi rroenhe nĉha ná joajna que dindaĉho nĉha: “Dixintteha jaha ngain xí jian yá ixin are ttie, janha atto feo coxinanxin de ixin jehe xa.”

²⁰ Pero cain xidána que vaquetonha ngain icha xidána co xittetonha ngain nihgo ndache xa cain chojni que rrondaĉho na ixin Barrabás tti sachjexin cárcel, co ixin Jesús chonda que senhe.

²¹ Jehe Pilato joanchiangui ngain na iná, co ndaĉho:

—¿Quexehe de cayoi xí tti rinao ra tsanĉjanda para que jehe satsji?

Co cain jehe na vinttendaĉho na:

—Barrabás.

²² Pilato joanchiangui ngain na iná co ndaĉho:

—¿Co quehe sinttaha janha conixin Jesús, tti dinhi Cristo?

Cain na ndaĉho na:

—¡Nchecrucificá!

²³ Cottimeja Pilato ndaĉho ngain na:

—¿Quehe cosa jianha joinchehe?

Pero jehe na cjan na ndaĉho na sén iná:

—¡Nchecrucificá!

²⁴ Are Pilato vicon que ĉhoha na para que Jesús sarrocji, sino que cain na anto tedomao na, Pilato coetonha para que joí jinda, co contti rá ngattoxon con cainxin chojni nttiha, co ndaĉho ngain na:

—Janha ĵonhi sarica ixin ndasenhe xí jihi, ixin jehe xa ĵonhi cosa jianha joinchehe xa. Jaha ra tti sintteca ra yá.

²⁵ Co cainxin chojni ndaĉho na:

—¡Janha na conixin xanhna na, mé tti sintteca na ixin ndasenhe xí yá!

²⁶ Cottimeja Pilato joantsje Barrabás para coanĉjanda sacjoi, co coetonha para que vicaon Jesús. Cottimeja Pilato joanjo Jesús para que goan crucificado.

²⁷ Cottimeja xisoldadoe jehe Pilato joicao xa Jesús ngain palacio, co ĵatte cainxin xisoldado ngandanji Jesús.

²⁸ Cottimeja joantsjehe xa lontoe Jesús co joinchetsá xa ná lonto jatse.

²⁹ Co joinchecjinga xa Jesús ná corona de joxon nttanchaha, co joinchetse xa ná nttá ngain rá lado jian. Cottimeja vinttetoxin nttajochjihi xa ngatto con Jesús, co cjoanoa xa co ndaĉho xa ngain:

—¡Viva tti Rey de chojni judío!

³⁰ Cai cjoatjo xa nttatté xa, co coá xa tti nttá que joinchetse xa Jesús para xanguí xa nttá já Jesús.

³¹ Cottimeja are joexin cjoanoa xa jañá, joantsjehe xa tti lontto jatse que joinchetsá xa co coengaha xa lonttoe. Cottimeja sajoicoa xa para joinchecrucificá xa.

Are joinchecrucificá xa Jesús
(Mr. 15.21-32; Lc. 23.26-43; Jn. 19.17-27)

³² Co are tedačhjecaouxin xa Jesús de nttiha, vetan xa ná xí que vinhi Simón que joixin de ngain ciudad de Cirene; co joinchecame xa crue Jesús.

³³ Co jamé joijicaho xa Jesús conixin Simón ngain ná lugar que dinhi Gólgota que rročho Lugué Nttalorojá Chojni.

³⁴ Nttiha chjexin xa Jesús ná vino que jittecyan ná cosa anto tsja. Pero are Jesús joincheprobá vino mé, jehe čhoha vihi.

³⁵ Co are ojoinchecrucificá xa Jesús, cain xisoldado mé joantsje xa suerte de lonttoe Jesús, para jamé chjeyehe xa lontto mé. Jañá conhe para joiconhe tti dindatšo profeta: “Joantsje na suerte para chjeyehe na lonttona.”

³⁶ Cottimeja tavintte xa nttiha para vinttenda xa.

³⁷ Co nganito cruz icha noi que já Jesús coín xa ná letra que ndačho quedonda chonda que ndavenhe. Co letra mé ndačho: “Xí jihi Jesús, tti Rey de chojni judío.”

³⁸ Cai yó xichehe goan xa crucificado conixin Jesús, ná xa vehe crue xa lado cjon Jesús, co iná xa lado jian de Jesús.

³⁹ Co cain nivatto nttiha cjoanoa na Jesús co coenttjoinga rroha na.

⁴⁰ co ndačho na ngain Jesús:

—Jaha que rrojinchexante nihngo icha importante co nincoa nchanho ttjexinxin nchechjian nihngo iná, danianxin de cruz jaho, si ndoa jaha Xenhe Dios.

⁴¹ Jamé cai cjoanoa cain xidána que vaquetonha ngain icha xidána, ximae-stroe ley Israel, co xifariseo conixin cain xittetonha ngain nihngo, co ndache chó xa:

⁴² —Jehe nchao cjoenguijna icha chojni, pero jehe čhoha tsjenguijna cuerpoe jehe mismo. Si ndoa jehe tti Rey para ixin ján na, socon na sanianxin de ngain cruz yá para que sotticaon na jehe.

⁴³ Jehe chonda confianza ngain Dios, mexinxin jai socon na si Dios tsanchjandaha para senhe, si ndoa Dios anto rinao jehe ixin jehe ndattjo na que jehe tti Xenhe Dios.

⁴⁴ Jamé ndačho chojni hasta tti cayoi xichehe que vintte crucificado nttiha ngaca jehe cjoanoa xa Jesús cai.

Are ndavenhe Jesús
(Mr. 15.33-41; Lc. 23.44-49; Jn. 19.28-30)

⁴⁵ Cottimeja ngoixin ngataha nontte ndaconaxin xehe desde ngosine nchanho hasta ní hora tsocjin.

⁴⁶ Co inchin ní hora tsocjin Jesús coyao soji co ndačho:

—Elí, Elí ¿lama sabactani? —que rročho: Diona, Diona, ¿quedonda ndacointona na janho?

⁴⁷ Canxion de tti xite nttiha coínhi xa mé co ndačho xa:

—Xí jihi jidayé xa tti profeta Elías.

⁴⁸ Ngain rato mé ná tti xite nttiha coinga xa joirroé xa ná esponja. (Cosa mé datse jinda inchin chjon algodón.) Co jehe xa xanguí xa esponja mé ná

vino anto san inchin vinagre co coencjin xa con ná nttá. Cottimeja tsín xa noi ngaca rroha Jesús para que jehe rroguíhi.

⁴⁹ Pero xi icha ndačo xa:

—Tančhanda, socon na aco ndoa tsí Elías para tsjenguijna.

⁵⁰ Jesús cjan coyao soji iná, co ndavenhe.

⁵¹ Ngain rato mé tti manta que vettoa ngaxinhi tti nihngo icha importante, hasta yó vichjenga manta mé de noi hasta tti nontte. Co coingui nontte hasta ttjao vichjenga.

⁵² Co tsje lugar tti xavá chojni xiré co tsje chojni que vaguitticaon na Dios, co ndavenhe na, are mé xechon na.

⁵³ Cottimeja vachje cain chojni jihi de ngain tti xavá na, co después de xechon Jesús vinttecji na ngain ciudad de Jerusalén. Nttiha anto tsje chojni vicon jehe cain chojni mé que xechon.

⁵⁴ Are jehe xicapitán conixin cain xisoldadoe xa que tenda Jesús nttiha vintteguicon xa que coingui nontte co conaxin xehe co icha cosa que conhe, anto vintteñaon xa co vinttendačo xa:

—Ján ndoa que xí jihi Xenhe Dios.

⁵⁵ Co cjinha de ngain cruz nttiha tate canxion nchí que vacji conixin Jesús desde ngain Galilea co vagayaconhe ncha Jesús.

⁵⁶ Nttiha vehe María Magdalena, co María tti janné Jacobo co José, co janné cain xenhe Zebedeo.

Are Jesús xavá

(Mr. 15.42-47; Lc. 23.50-56; Jn. 19.38-42)

⁵⁷ Are coexinhi conaxin xehe, jói ná xí anto rico que vinhi xa José, xí mé rajné xa Arimatea, co jehe xa cai vitticaon xa Jesús.

⁵⁸ Jehe José mé cjoí joitsjehe Pilato para joanchiehe joachaxin de sasicao cuerpoe Jesús. Cottimeja Pilato coetonha que sanjo xa cuerpoe Jesús.

⁵⁹ José joinchegania cuerpoe Jesús co coensiha ná manta anto roa.

⁶⁰ Co joicán cuerpo ngain tti cueva que jehe José joinchegjian ngadoho ná ttjao para ixin jehe José o quexeho de nindoha que ndarroguenhe icha saho. Cottimeja jehe coejé cueva mé conixin ná xo jie co sacjoi.

⁶¹ Co nttiha tají María Magdalena, co tti iná María tate na ngandanguí jehe cueva mé.

Tti venda lugar tti xavá Jesús

⁶² Ngain nchanho yoxin, rročo sábado, cain xidána que vaquetonha ngain icha xidána co cain xifariseo vinttecji xa joitsjehe xa Pilato,

⁶³ co vinttendačo xa ngain:

—Janha na xaxanho na que tti xí ndavenhe que vanichja cosa ndoaha, jehe ndačo are xa vechon que ngain nchanho ninxin jehe rroxechon.

⁶⁴ Mexinxin janha na rinaho na que soixin rroanha canxion xisoldado para sinttenda xa tti jehe jiřavá hasta tti ngain nchanho ninxin para que chojni que vacao tsjiha na ngain ttie co siqué na cuerpoe. Cottimeja rrondate na icha chojni que ixin jehe xechon. Co si jamé rrondate na, icha feo tsonhe que are saho.

⁶⁵ Pilato ndačo ngain xa:

—Yá chonda ra canxion xisoldado. Jaha ra ttji ra co jian ttejehe ra cueva tti jiřavá.

⁶⁶ Cottimeja savinttecji na conixin xisoldado co coín na ná señal ngain tti xo que jijé cueva mé para que sicon na si xo mé tsingui xo. Co nttiha cointtohe na xisoldado para vinttenda xa.

28

Are xechon Jesús

(Mr. 16.1-8; Lc. 24.1-12; Jn. 20.1-10)

¹ Are vatto tti nchanho que nchejogaha ni, co ojidingasán tti saho nchanho de semana, María Magdalena co tti iná María cjoí na joitsjehe na tti xavá Jesús.

² Ngain rato mé coingui nontte anto soji. Are mé ná ángel de Dios xincanjinxin de ngajni co joí ngain cueva mé. Jehe vinttjia tti xo que jijé puerté cueva co tavehe ngataha xo mé.

³ Angel mé anto jitonguixima inchin tti xohi que xincanjinxin de ngajni, co lonttoe anto roa lontto inchin chintta que jí ngataha jnanchaha.

⁴ Are tti xisoldado que tenda nttiha vicon xa mé, anto vinttexaon xa hasta ndavinttji xa de joaxaon, xá ndavintteguenhe xa.

⁵ Cottimeja ángel mé ndačo ngain jehe yó nchí que vinttecji:

—Xaonha ra. Janha nona que tettjé ra Jesús, tti joinchecrucificá na.

⁶ Jehe coha nttihi ixin jehe oxechon inchin jehe ndačo. Xacoi ra sitsjehe ra tti lugar que jehe na coín na.

⁷ Jaicoa ttji ra co dindache ra tti chojni que vacao: “Jehe ndavenhe pero jai jehe oxechon co jehe tsji Galilea icha saho que jaha ra. Nttiha siconxin ra.” Jeho yá tti chonda janha que joindattjo ra.

⁸ Cottimeja jehe nchí mé jaicoa savinttecjixin ncha de nttiha. Jehe ncha vinttexaon ncha co xajeho tiempo anto vintteché ncha cai. Co coinga ncha joindache ncha tti chojni que vacao Jesús.

⁹ Co are jehe ncha tettinga ncha, Jesús conchienenhe ngain ncha co joanjo joajna ngain ncha. Jehe ncha vintteconchienenhe ncha ngain Jesús co vinttetoxin nttajochjihi ncha co cjóa ncha rotté Jesús co joinchesayehe ncha.

¹⁰ Co jehe ndačo ngain ncha:

—Xaonha ra. Ttji ra dindache ra chojnina que jehe na chonda na que tsji na Galilea co nttiha siconxin na na janha.

Tti coequin xisoldado que vinttenda tti xavá Jesús

¹¹ Are nchí mé savintteguicao ncha joajna mé, canxion xisoldado que vinttenda lugar tti xavá Jesús vinttecji xa joindache xa xidána que vaquetonha ngain icha xidána cain tti conhe.

¹² Co xí mé jaicoa joindache xa cain xittetonha ngain nihngo para que cjoao chó xa quexén sinttenchehe xa. Cottimeja vintteganjo xa anto tsje tomi ngain tti xisoldado que vinttenda lugar tti xavá Jesús,

¹³ co vinttendačo xa ngain xisoldado mé:

—Jaha ra ndačo ra que are jaha ra tatechin ra ttie, cjoí tti chojni que vacao Jesús co coé na cuerpoe.

¹⁴ Co si xigobernador tsonohe xa jihi, janha na sicjao na xa co jaha ra xonhi tsonha ra.

¹⁵ Cottimeja cain xisoldado mé vittoexin xa vinttegayé xa tomi mé, co vinttecji xa co vinttendačo xa inchin vitonhe xa. Co jamé ttequin chojni judío hasta jai.

*Tti coetonhe Jesús nirepresentanté jehe
(Mr. 16.14-18; Lc. 24.36-49; Jn. 20.19-23)*

¹⁶ Jamé tti ttejngo chojni que vacao Jesús savinttecji na para Galilea ngain tti jna que Jesús coetonhe na.

¹⁷ Co are vintteguicon na Jesús, jehe na joinchesayehe na Jesús, masqui ittoha na xa vitticaonha na ixin jehe Jesús.

¹⁸ Cottimeja Jesús conchienne ngain na co ndaço:

—Janha ovayá cainxin joachaxin de ngajni co de nttihi ngataha nontte.

¹⁹ Jai jaha ra ttji ra ngain chojni de cainxin nación co ndache ra na que sitticaon na na janha co sintte na chojnina, co ncheguitte ra na conixin joachaxin nombré Ndodana co joachaxin nombrena janha tti Xenhe Ndo conixin joachaxin nombré Espíritu Santo,

²⁰ co nchecoehne ra na sitticaon na sinchehe na cainxin tti janha coetonha ra. Co noha ra que janha rrihi nganji ra cainxin nchanho hasta are tsjexin mundo. Amén.

Tti Jian Joajné Jesucristo Que Dicjin Marcos

Juan ndache chojni ngagaha jna joajné Dios
(Mt. 3.1-12; Lc. 3.1-9, 15-17; Jn. 1.19-28)

¹ Janhi coexinxin joajné Jesucristo, Xenhe Dios.

² Profeta Isaías dicjin janhi:

Ndačo Dios ngain Xenhe: Tsjexin, saho rrorroanha ná tti sicao joajnana para sinchekhjian nttiha para ixin jaha.

³ Co tsinhi na ná tté chojni que tsoyaoxin ngagaha jna que rrondačo: “Nchekhjian ra ná nttiha para ixin jehe tti chonda cain joachaxin; danttjehe ra ná nttiha nao.”

⁴ Cottimeja, ndoa, jañá joí Juan ngagaha jna, vancheguitte chojni. Co vandačo ngain na ixin chonda na que tsentoxinhi na cain cosa jianha que tenchehe na co siguitte na. Co jamé Dios sinchetjañehe na cain cosa jianha que joinchehe na.

⁵ Mexinxin vacji cainxin chojni que vintte nonttehe Judea co chojni que vintte ngain ciudad de Jerusalén para vaquinhi na quehe vandačo Juan. Co are jehe na vaquendoenhe ñao na cainxin cosa jianha que vanchehe na, cottimeja Juan vancheguittexin na ngain río Jordán.

⁶ Lonttoe Juan diconchjian de joxon xehe cocamello, co cinturoen de joxon roa. Co tti vane Juan joxon coxoali co tsjén cormena que vagoan ngagaha jna.

⁷ Co Juan vandačo ngain chojni:

—Después de janha tsí iná chojni que chonda anto tsje icha joachaxin que janha. Co janha jiquininxinha na ni para sisehe para tsonxindangá corrié catté.

⁸ Janha nttaguittexin jaha ra conixin jinda; pero jehe sinttaguittexin ra conixin Espíritu Santo.

Are joiguitte Jesús
(Mt. 3.13-17; Lc. 3.21-22)

⁹ Co tiempo mé Jesús vachjexin de ngain rajna Nazaret jí ngain nonttehe Galilea para sacjoí ngain Juan. Co Juan joincheguitte Jesús ngain río Jordán.

¹⁰ Co are Jesús vachjenguixin de jinda, vicon que ngajni xiré, co Espíritu Santo de Dios xincanji xá ná contoanajni ngataha Jesús.

¹¹ Co rato mé coinhi na tté Dios que nichjxin de ngajni co ndačo:

—Jaha tti Xanhna que janha anto rinaho; co de ixin jaha, janha anto chahna.

Satanás rrojinao rrojincheyehe Jesús
(Mt. 4.1-11; Lc. 4.1-13)

¹² Cottimeja Espíritu Santo de Dios sajoicao Jesús para ngagaha jna tti xonhi chojni jí.

¹³ Co nttiha ngagaha jna tti vintte tsje coxigo chintto, vehe Jesús cuarenta nchanho. Cottimeja Satanás cjoí ixin joinao rrojincheyehe Jesús para rrojinchehe cosa jianha, pero coixinha joincheyehe. Cottimeja joí ángel de Dios para joincheatendehe Jesús.

Jesús coexinhi xe ngain Galilea
(Mt. 4.12-17; Lc. 4.14-15)

14 Después que coiaxinhí na Juan ngain cárcel, Jesús cjoí para nonttehe Galilea, co joindaço tti jian joajna de quexén ttetonha Dios.

15 Vandacho Jesús ngain chojni:

—Ojóí tiempo que Dios siquetonha daca ngataha nontte. Ttentoxinhí ra cain cosa jianha que tenchehe ra co ditticaon ra tti joajna que danjo iná vida noraixin.

Jesús nichjé nó xí que vatse copescado

(Mt. 4.18-22; Lc. 5.1-11)

16 Are Jesús jittji ngandehe lago de Galilea, Jesús vicon Simón co xanchó Simón xan Andrés. Cayoi nimé copescado vatse na, co rato mé tatetjahngui na nonchaha jinda.

17 Co Jesús ndaço ngain na:

—Xácoi ra rroehna ra; jaha ra tse ra copescado, pero janha tsjagoha ra quexén satse ra chojni para ixin Dios.

18 Co rato mé cointtohe na nonché na co sacjoí na conixin Jesús.

19 Cjinha joiji na are Jesús vicon Jacobo co Juan, cayoi nimé xenhe Zebedeo. Tate na ngá ná barco tetteyehe na nonché na.

20 Co rato mé Jesús vayé cayoi jehe na, co jehe na nttiha cointtohe na ndodé na Zebedeo ngain barco mé conixin ninchehe xé, co cayoi jehe na sacjoí na conixin Jesús.

Ná xí que vechonda espíritu jianha

(Lc. 4.31-37)

21 Cottimeja joiji na ngain rajna Capernaum. Co Jesús vixinhí nihngo nttiha para joinchecoehne chojni Israel ngain nchanho que nchejogaha na.

22 Co cain nivaquinhí tti vanichja Jesús vagoan na admirado ixin Jesús vanichja inchin ná chojni que chonda anto tsje joachaxin co jeha inchin vanichja ximaestroey ley Israel.

23 Co ngain ningoe rajna mé vehe ná xí que vechonda xa espíritu jianha co coyaotte xa Jesús co ndaço xa:

24 —¿Quehe sinchehe nganji janha na, jaha Jesús de Nazaret? ¿Ajaha joihí para santsjena ra joachaxin que chonda na? Janha chonxin jaha co nona ixin jaha tti anto jian de ngain Dios.

25 Cottimeja Jesús joinchesattehe espíritu jianha mé co ndaço:

—Tencoja jaha espíritu jianha, co sattjixin de ngain xí yá.

26 Co are espíritu jianha vachjexin de ngain tti xí mé, jehe espíritu jianha joincheguenda jehe xa, coyao soji co sacjoixin de ngain tti xí mé.

27 Co cainxin chojni que te nttiha xaon na co joanchianguihi chó na co ndaço na:

—¿Quehe jihí? Ojé cosa jitjagoo na xí jihí. ¡Xí jihí chonda xa joachaxin hasta ttetonhe xa espíritu jianha, co espíritu jianha ditticaon tti ndaço xa!

28 Co cainxin rajna que te ngain nonttehe Galilea anto daca conohe na quehe vanchehe Jesús.

Jesús joinchexingamehe jannché Simón Pedro

(Mt. 8.14-15; Lc. 4.38-39)

29 Cottimeja Jesús vachjexin de nihngo mé. Co jehe Jesús, conixin Jacobo co Juan sacjoí na para nchiandoha Simón co Andrés.

30 Co tiempo mé jannché Simón Pedro venihí jan ixin soa. Co ndaço na ngain Jesús ixin venihí naníta mé.

³¹ Cottimeja Jesús conchienne, co tsehe rá naníta mé co joinchengattjen. Co toin rato mé xingamehe co ixonhi soa veyá. Co jehe naníta mé joincheaten-dehe na.

Jesús joinchexingamehe anto tsje chojni nihi
(Mt. 8.16-17; Lc. 4.40-41)

³² Co are viataon nchanho co conaxin xehe, joicaohé na Jesús cainxin chojni venihi co cainxin chojni que vechonda espíritu jianha tiempo mé.

³³ Co cainxin chojni ngain rajna mé xatte na ngandanguí nchia tti vehe Jesús.

³⁴ Jesús joinchexingamehe anto tsje chojni que vechonda ojeje chin. Co chojni que vechonda espíritu jianha Jesús joantsjexin espíritu mé de ngain na. Pero Jesús joanjoha joachaxin para nichja cain espíritu jianha ixin cain espíritu jianha ovenohe quensen jehe Jesús.

Jesús nichje chojni ngain Galilea de ixin Dios
(Lc. 4.42-44)

³⁵ Co are ochian jidingasán, Jesús vingattjen co vathjexin de ngain rajna mé para sacjoi ngain iná lugar tti xonhi chojni vintte co nntiha joinchecoanxin Dios.

³⁶ Cottimeja Simón co icha chojni que vacao Jesús joicje na.

³⁷ Co are vittja na Jesús, ndačo na ngain:

—Cainxin chojni tedanchiangui na jaha.

³⁸ Pero Jesús ndačo:

—Ján, pero sachjin na ngain icanxin rajna chian para que janha rronichja nntiha cai tti joajné Dios que janha joiquinha, porque para ixin mé joihí janha nntihi.

³⁹ Jamé vacji Jesús ngain cainxin nihngo que vintte ngain nonttehe Galilea para ndache na de ixin Dios co para vaguenguixin espíritu jianha de ngain chojni.

Jesús joinchexingamehe ná xí que vechonda lepra
(Mt. 8.1-4; Lc. 5.12-16)

⁴⁰ Ná tattíta veninxin chin lepra conchienne ngain Jesús, co tattíta mé vettoxin nntajochihi co ndačo ngain Jesús:

—Si jaha rínao, nchao sinchexingamana de chin que rrichonda.

⁴¹ Jesús coiaconoehe, mexinxin cattede conixin rá co ndačo:

—Ján, rinaho. Xingamaha.

⁴² Co are Jesús joexin ndačo yá, tattíta mé ndavačhehe chin lepra que vechonda, co ixonhi chin vechonda.

⁴³ Cottimeja Jesús coetonhe sacjoi, co ndačo:

⁴⁴ —Pero xonhi chojni ndache, jehó tti ngain xidána para que jehe xa sicon xa que jaha ixonhi chin chonda. Co danjo cosa ngain Dios inchin coetonhe Moisés para que cainxin chojni tsonohe na ixin jaha oxingamaha.

⁴⁵ Pero tattíta mé sacjoi, co coequín chojni cainxin tti jehe conhe. Mexinxin Jesús ichoha vařago ngain rajna. Co vacji jehó ngain lugar tti xonhi chojni vintte. Pero masqui jamé, vacji tsje chojni de cainxin rajna ngain tti vehe Jesús.

2

Jesús joinchexingamehe ná xí que čhoha vacji
(Mt. 9.1-8; Lc. 5.17-26)

¹ Vatto canxion nchanho cottimeja Jesús cjan cjoi ngain rajna Capernaum. Co chojni conohe ttinó mero vehe Jesús nttiha.

² Anto daca xatte anto tsje chojni ngain Jesús que ni vittjaha nchia vixinhi na co hasta tti ndoja víxin na. Co nttiha Jesús ndache na joajné Dios.

³ Cottimeja nó tti xí tetsengui iná xí que čhoha vacji; vintteguicao xa ngain Jesús.

⁴ Pero čhoha vatto na para tti jí Jesús, ixin anto tsje chojni te ngandanguí nchia mé. Mexinxin cjoáso na ngataha nchia co vinttjian na rioho techoe nchia co nttiha joinchexincanjinxin na tti nihi mé conixin ná jino ngain camillé para ngain lugar tti jí Jesús.

⁵ Co are Jesús vicon quexén joinchehe na, jehe conohe ixin jehe na vitticaon na que jehe chonda joachaxin. Co Jesús ndačo ngain tti nihi mé:

—Ojointatjañaha jaha cain tti jianha joinchehe.

⁶ Co nttiha tate canxion ximaestroe ley Israel, co xaxaon xa:

⁷ “¿Quedonda jañá jinichja xí yá? Ixin ndačo xa nchao nchehe xa cosa que jehó Dios nchao nchehe. Xonhi quensen nchao nchetjañehe chojni tti jianha que nchehe na; jehó Dios tti nchao nchetjañehe na.”

⁸ Pero Jesús oconohe tti xaxaon ximaestro mé, co ndačo ngain xa:

—¿Quedonda jañá xaxaon jaha ra?

⁹ ¿Quexehe tti icha tanguiha, rronddattjan ná tti nihi: “Ovitjañaha jaha cain tti jianha joinchehe”, o rronddattjan: “Dingattjen, co tsinhi camillá co sattjixin rottea”?

¹⁰ Co tsjagoha ra cai ixin janha tti Xí que joixin de ngaini chonda joachaxin ngataha nontte nttihi para nttatjañá chojni tti jianha que nchehe na.

Cottimeja ndačo Jesús ngain tti nihi mé:

¹¹ —Jaha rronddattjo, dingattjen, co tsinhi camillá co sattji para nchiandoi.

¹² Co rato mé vingattjen tti nihi mé, co coame camillé, co vachjexin de nttiha are tatetsjehe ni icha. Co rato mé cainxin chojni que vintte nttiha goan na admirado co joinchesayehe na Dios ixin jehe anto jian co chonda cainxin joachaxin. Co ndache chó na:

—Xonhi nttiha vocon na ná cosa janhi.

Jesús nichjé Leví

(Mt. 9.9-13; Lc. 5.27-32)

¹³ Cottimeja Jesús cjoi ngandehe lago de Galilea iná, co are conchienne tsje chojni ngain Jesús, jehe joinchecoenhe na de ixin Dios.

¹⁴ Co are Jesús sacjoixin de ngandehe lago mé co vatto ngandanguí ná caseté cobro, Jesús vicon nttiha tají ná tattíta vinhi Leví jinchehe cobro nttiha, co ndodé vinhi Alfeo. Jesús ndačo ngain jehe Leví:

—Xácoi nganji co rroehna na.

Co Leví vingattjen co sacjoi conixin Jesús.

¹⁵ Co después are Jesús tajine ngaxinhi nchiandoha Leví, conchienne anto tsje xicobrador co icha chojni que vanchehe cosa jianha. Cain chojni mé jinecaho na Jesús conixin cain chojni que vacao ixin anto tsje chojni varroé.

¹⁶ Co cai cjoi canxion ximaestroe ley co icanxin xifariseo ngain nchiandoha Leví. Cain chojni mé vicon ixin Jesús jine conixin tsje chojni que nchehe cosa jianha, co ndačo cain xí mé ngain chojni que vacao Jesús:

—¿Quedonda ximaestro ra jinecaho xa co dicaho xa xicobrador co icha chojni que nchehe cosa jianha?

¹⁷ Are Jesús coinhi yá ndačo:

—Chojni que niha, chojni mé rrogondeha xincheʒoan, jeho tti chojni nihi, mé tti rrogondehe xincheʒoan. Mexinxin janha joiha para joinichjá chojni jian, sino que janha joihi para joinichjá chojni que tenchehe jianha.

Are joanchianguihi na Jesús ixin quedonda chojni jehe dinttecjaño na (Mt. 9.14-17; Lc. 5.33-39)

¹⁸ Nchanho mé chojni que vacao Juan co chojni que vacao xifariseo vinttecjaño na. Co icanxin chojni cjoí na ngain Jesús co joanchianguihi na co ndačo na:

—¿Quedonda chojni que ʒicao Juan co chojni que ʒicao xifariseo dinttecjaño na pero chojni que ʒjiho jaha nahi?

¹⁹ Jesús ndačo:

—¿Acaso cain chojni que tti ngain ná vandango tti tottehe na nchao sinttecjaño na are ʒa nttiha jí xinovio ngain na? Nahi, jehe na ʒhoja sinttecjaño na si ʒa jí xinovio ngain na.

²⁰ Pero are tsí nchanho que xinovio satsjixin de ngain na, cottimeja jehe na chonda que sinttecjaño na.

²¹ Co Jesús ndačo iyó ejemplo:

—ʒonhi chojni tteyehe rioho lonto nroa ngain ná lonto nttaxí ixin lonto nroa ndadixehe co ndattinchje lonto nttaxí, co tti diguichje icha tojie.

²² Co cai ʒanttjoa are jidatsoxinhí ʒan, ʒhoja siquia ʒan ngá ná roanʒan onttaxí ixin tsonchintaon ʒan roa mé, co ndasitján ʒanttjoa co ndasitján roanʒan. Mexinxin ʒanttjoa are jidatsoxinhí ʒan, chonda que siquia ʒan ngá ná roanʒan nroaxin para dacaha tsonchintaon ʒan roanʒan mé. Jañá tti costumbre que jaha ra chonda ra jiha de acuerdo ngain tti janha rrindattjo ra.

Chojni que vacao Jesús conchinji na trigo ngain nchanho que nchejogaha ni (Mt. 12.1-8; Lc. 6.1-5)

²³ Ná nchanho que nchejogaha ni, Jesús conixin chojni que vacao vatto na ngain canxion jngui tti diguinga trigo, co chojni que vacao Jesús conchinji na canxion ninchjan de trigo para joine na.

²⁴ Co canxion xifariseo vicon xa queʒén tenchehe na. Mexinxin ndačo xa ngain Jesús:

—Tsjexin, ¿quedonda chojni que ʒjiho nchehe ʒa jai que jiquininxinha nchehe chojni ʒa, ixin jai nchanho para nchejogaha cain chojni?

²⁵ Co Jesús ndačo:

—¿Aʒa tsjeha ra tti jitaxin de ixin queʒén joinchehe David conixin cain xicompañeroe are vechondaha na tomí co venhe na jintta?

²⁶ Are mé Abiatar vehe xidána icha importante, co David joixinhi ngaxinhí nchiandoha Dios co joine niottja que vehe ngataha altar, co jeho xidána jiquininxin para jine niottja mé. Co David ʒhjé chojni que vacao nio cai co joine na nio.

²⁷ Cai ndačo Jesús ngain xa:

—Nchanho que nchejogaha chojni jí nchanho para ixin chojni co jeha chojni te para ixin jehe nchanho mé.

²⁸ Mexinxin cai janha, tti Xí que joixin de ngajni, chonda joachaxin para ngain nchanho que nchejogaha ni.

3

Ná xí que ndadixemadoho ná rá (Mt. 12.9-14; Lc. 6.6-11)

¹ Iná nchanho Jesús cjoí ngaxinhi ná nihngo iná. Co nttiha tají ná xí que ndadixemadoho ná rá.

² Co nttiha tetsaya canxion xifariseo para sicon xa aco sinchexingamehe xí mé ngain nchanho que nchejogaha ni, para jamé rrochonda quehe rocjanguixin xa Jesús.

³ Cottimeja ndačo Jesús ngain tti xí que ndadixemadoho ná rá:

—Dingattjen co darihi nttimé ngosine.

⁴ Cottimeja joanchiangui Jesús ngain xicanxin co ndačo:

—¿Quehe jiquininxin sinchehe ni ngain nchanho que nchejogaha ni? ¿Asinchehe ni jian o sinchehe ni jianha? ¿Atsančhjadaha ni ndasenne ná chojni, o ani nasoexon ni?

Co cain xa tencoa xa.

⁵ Cottimeja Jesús goñao co tsjehe ngain xa co anto vechín ixin vicon que jehe xa joinaoha xa coinxin xa de ixin Dios. Co ndačo Jesús ngain tti venihi:

—Ttinxe rá.

Co jehe tti xí mé coinxe rá co ndaxingamehe ra.

⁶ Cottimeja cain xifariseo sacjoi xa co coexinhi xa cjoao xa chojni que vacao Herodes ixin quežén sinchehe na para nasoexon na Jesús.

Are anto tsje chojni xatte ngandehe lago

⁷ Cottimeja Jesús sacjoixin de nttiha conixin cainxin chojni que vacao co sacjoi na para ngandehe lago de Galilea co anto tsje chojni Galilea rroé na.

⁸ Co chojni joixin de nontte dinhi Judea, de ciudad de Jerusalén co de ngain iná nontte dinhi Idumea. Icha chojni joixin lado čhinxin nchanho de río Jordán. Icha na joixin na de ngain ciudad de Tiro co Sidón. Co icha na joixin na de icha rajna. Cainxin chojni mé cjoí na joitsjehe na Jesús ixin jehe na conohe na de ixin cainxin cosa jian que vanchehe Jesús.

⁹ Mexinxin Jesús ndache chojni que vacao ixin cjoé na ná barco para sengá ngataonhe jinda are rroxatte tsje chojni para sixintjaha chó na ngaca Jesús.

¹⁰ Ixin anto tsje chojni venihi joinchexingamehe Jesús, mexinxin cainxin nihni vačattetja na Jesús para vacatte na.

¹¹ Co are chojni que vechonda espíritu jianha vaguicon Jesús, vaguettoxin nttajochjihí co vandačo sén:

—¡Jaha tti Xenhe Dios!

¹² Pero Jesús vaquetonhe ixin rrondačhoja quensen jehe Jesús.

Jesús coinchiehe tti tteyó chojni que vacao

(Mt. 10.1-4; Lc. 6.12-16)

¹³ Cottimeja Jesús coani ná jna, co nttiha jehe vayé chojni que jehe joinao coinchiehe co jehe na conchienne na ngain jehe.

¹⁴ Co jehe coinchiehe tteyó chojni para sacao co para rrorroanha na icanxin rajna para rronichja na joajné Dios.

¹⁵ Co joanjo joachaxin ngain na para sinchexingamehe na chojni nihi co para senguixin na espíritu jianha de ngain chojni.

¹⁶ Co janhi vinhi tti tteyó chojni mé. Ná vinhi Simón, co Jesús joincheguinhí jehe Pedro cai;

¹⁷ co Jacobo conixin Juan xanchó jehe Jacobo, co cayoi nimé xenhe Zebedeo co cayoi nimé Jesús joincheguinhí na Boanerges ixin anto čhintto vintte na;

¹⁸ co icha chojni vinhi Andrés; Felipe; Bartolomé; Mateo; Tomás; co iná tti vinhi Jacobo cai, pero mé xenhe Alfeo; co Tadeo; co Simón, jehe ná de tti partidoe chojni político que vaquetocaho chojni romano;

¹⁹ co Judas Iscariote, tti joindačo para tse na Jesús.

*Are ndačo chojni ixin Jesús chonda joachaxín Satanás
(Mt. 12.22-32; Lc. 11.14-23; 12.10)*

Cottimeja Jesús sacjoi ngain nchia tti vehe conixin cain chojni que vacao.

²⁰ Co nttiha anto tsje chojni xatte iná co xonhi tiempo vechonda Jesús ni para joine conixin cain chojni que vacao.

²¹ Co are conohe niparienté Jesús ixin quehe vanchehe, jehe na cjoí na para sarrojicaó na Jesús ixin xaxaon na que Jesús ndajoinchetján sentidoé.

²² Cai canxion ximaestroé ley que joixin de ciudad de Jerusalén ndačo xa: —Xí jihi chonda xa Beelzebú, tti ttonha ngain cain espíritu jianha, ixin jehe xa nchao ttonha xa co dengui xa espíritu jianha.

²³ Cottimeja Jesús vayé cain chojni mé co ndačo ná ejemplo ngain na:

—¿Satanás quexén sengui xajeho Satanás?

²⁴ Co si ná gobierno chjea para tsetocaho chó, gobierno mé čhoha tsončjenhe sé

²⁵ co si ná nindoha ngain nchia atto tteto na, cai tsončjenha.

²⁶ Co cai Satanás si tseto jecho, cai tsončjenha sé. Chonda que ndatsjexin.

²⁷ Xonhi quensen sixinhi ngaxinhi nchiandoha ná xí que anto tsanga para santsjehe cosé xa que chonda xa ngaxinhi nchiandoha xa si tsiaha xa saho. Solo jamé para nchao sasicaó cosé xa que jí ngaxinhi nchiandoha xa.

²⁸ Anto ndoa tti rronhattjo ra: Cain chojni nchao sitjañehe cainxin cosa jianha que nchehe na co cainxin tti jianha que nichja na.

²⁹ Pero chojni que nichja jianha ixin Espíritu Santo, chojni mé nchoe sitjañehe, co cainxin tiempo sinteca na tti jianha mé.

³⁰ Jañá ndačo Jesús ngain na ixin jehe na ndačo na ixin Jesús vechonda espíritu jianha.

*Janné Jesús co xanchó
(Mt. 12.46-50; Lc. 8.19-21)*

³¹ Cottimeja cjoí janné Jesús conixin xanchó pero čhoha joixinhi na nchia ixin anto tsje chojni te ngain Jesús. Mexinxin tavintte na ndoja co coetonha na que rroquí ngain na.

³² Co chojni que tate ngaca Jesús ndačo na ngain:

—Janná co xanchó ndoja nttihi te na, co rinao na rronichjaha na jaha.

³³ Co Jesús ndačo:

—¿Quensen jannana, co quecá xanchian?

³⁴ Cottimeja Jesús tsjehe ngayehe cain nite ngandanji jehe co ndačo:

—Cain chojni tehe tti inchin jannana co jehe na tti inchin xanchian,

³⁵ ixin quexeho chojni que nchehe inchin rinao Dios, mé tti xanchian co mé tti jannana.

4

*Ejemploé tti joiquenga trigo ngataon jngui
(Mt. 13.1-9; Lc. 8.4-8)*

¹ Iná nchanho Jesús coexinhi cjoagoe chojni de ixin Dios ngandehe lago de Galilea, co xatte anto tsje chojni ngain Jesús nttiha. Mexinxin Jesús vengá ná barco que vehe nttiha ngataonhe jinda. Co cainxin chojni vittohe na ngandehe jinda.

² Cottimeja Jesús cjoagoe na anto tsje cosa de ixin ejemplo co cai ndačo janhi ngain na:

³—Ttinhí ra tti rrondačhjan janha. Ná xí cjoí xa joiquenga xa trigo ngataon jngui.

⁴ Pero are jitja xa trigo ngataon jngui toha noanchjan de trigo vinttji ngá nttiha co joí conttoa co ndajoine va trigo mé.

⁵ Co icha noanchjan de trigo vinttji ngataha tti jí ttjao tti ttjinha jinche jí. Co trigo mé anto daca čhinhi ixin ttjinha jinche xanotaon.

⁶ Pero nchanho toin ndajoinchexema catrigo mé ixin tsjeha noehe ca vechonda ca.

⁷ Co icha noanchjan de trigo vinttji ngagaha canchaha. Co canchaha icha daca vangui ca co coančhandaha ca trigo vangui, co cain catrigo mé xonhi joinchchjjan ca.

⁸ Pero icha noanchjan de trigo vinttji tti jian jinche, co trigo mé nchoe joanjo noa. Canxion nihi trigo mé joinchchjjan de treinta noanchjan cada ninchjan, co icanxin trigo joinchchjjan hasta sesenta noanchjan cada ninchjan, co icanxin trigo joinchchjjan hasta cien noanchjan cada ninchjan.

⁹ Co ndačo Jesús ngain na cai:

—Xo nchao ttinxin ra, ttinhí ra jian.

Quedonda Jesús joinchegonda tsje ejemplo

(Mt. 13.10-17; Lc. 8.9-10)

¹⁰ Cottimeja are sacjoí cainxin chojni co jehó Jesús conixin tti tteyó chojni que vacao co icanxin ni xa vittohe nttiha, joanchiangui na ngain Jesús ixin quehe rročo ejemplo mé.

¹¹ Co Jesús ndačo ngain na:

—Jaha ra Dios ndačo ixin tsonoha ra tti jima de ixin quexén ttetonha jehe. Pero janha nichja ngain chojni que čhjoia na jehó de ixin ejemplo.

¹² Jamé para que masqui dicon na tti nttaha pero inchin rroguiconha na, co masqui ttinhí na tti ndačhjan pero ttinxinha na, co para tsentoxinha vidé na ni sitjañeha na cain cosa jianha que nchehe na.

Jesús ndačo quehe rročo ejemplo tti joiquenga trigo

(Mt. 13.18-23; Lc. 8.11-15)

¹³ Ndačo Jesús ngain na cai:

—¿Attinxinha jaha ra quehe rročo ejemplo jihi? ¿Mexinxin quexén tsinxin jaha ra icha ejemplo que janha rrondačhjan?

¹⁴ Tti coenga trigo, mé inchin tti ndačo joajné Dios ngain icha chojni.

¹⁵ Canxion chojni inchin tti trigo que vetsinga ngá nttiha, rročo ixin ttinhí na joajné Dios, pero Satanás tti co ndanchetjañeha na palabra que coinhi na.

¹⁶ Icanxin chojni inchin tti trigo que vetsinga ngataha tti jí ttjao ixin are ttinhí na joajné Dios, anto čhjoin tonohé na dayé na joajna mé.

¹⁷ Pero inchin trigo que chondaha tsje noehe seha tončhenhe trigo, jamé jehe chojni mé cai; cottimeja are tanguí tonhe na co icha chojni feo nchehe ngain na ixin ditticaon na joajné Dios, jehe na ndadoan na desanimado.

¹⁸ Co icanxin chojni inchin tti trigo que vinttji ngagaha canchaha. Rročo que jehe na ttinhí na joajné Dios

¹⁹ Pero icha xaxaon na cain problema que jehe na chonda na nttihi ngataha nontte, co tomi ncheyeha na para icha ncheoxoxinhi na cosa que jí ngataha nontte. Co cain yá ndanchetjanji joajna mé, co incheha na inchin tettonha joajna jihi.

²⁰ Pero te icanxin chojni que ttinhi na joajné Dios co dayé na ngain ansén na co nchehe na inchin ttetonha joajna mé. Co cain chojni mé inchin tti trigo que vinttji tti jian jinche co joanjo tsje noatrigo. Canxion chojni mé inchin tti trigo que joinchekhjian de treinta noa ngain nacoa ninchjan, co icanxin na inchin tti trigo que joinchekhjian de sesenta co de cien noatrigo ngain nacoa ninchjan.

*Ejemploe lámpara
(Lc. 8.16-18)*

²¹ Cai ndačo Jesús:

—¿Apoco ná chojni sinchegacaon ná lámpara cottimeja tsema lámpara mé ngaxinhi ná cajón o ngangui saoen? Nahi, chonda que tsín lámpara ngataha ná cosa noi para nchao sinchegasán ngaxinhi nchia.

²² Xonhi cosa jima que tsononxinha, co xonhi cosa jima que teŕaxaon ni ngain ansén ni que chojni tsonoeha; cain cosa chonda que tsononxin cosa.

²³ Jaha ra que ttinxin ra, ttinhi ra jian.

²⁴ Cai ndačo Jesús:

—Ttjiho ra cuidado tti tsinhi ra. Inchin medida que jaha ra dattechoaxin ra, Dios jamé sattechoha jaha ra cai. Co Dios rrochjá ra icha, jaha ra xó ttinxin ra.

²⁵ Ixin chojni que chonda, Dios tsjenguijna na para rrochonda na icha, pero chojni que xonhi chonda, Dios santsjehe cainxin tti jehe na chonda na masqui tsjeha chonda na.

Ejemplo de quexén dangui jino

²⁶ Ndačo Jesús cai:

—Tti ttetonha Dios inchin noa que ttenga chojni ngataon jngui.

²⁷ Chojni ttenga co sacjan dinttejoa, cottimeja dingattjen co jamé datto tti co datto nchanho. Co noa čhintaon noa co čhinhi jino pero tti jnguihi noeha quexén dangui jino mé.

²⁸ Ixin nontte nchegangui jino mé. Saho čhinhi chán jino cottimeja ntté, cottimeja noa.

²⁹ Co are ocha noa mé ngain ní co ndaxema ní jian, ovittja tiempo para tsanda na ní mé.

*Ejemploe ná tsé que dinhi mostaza
(Mt. 13.31-32; Lc. 13.18-19)*

³⁰ Cai ndačo Jesús:

—¿Quehe cosa nchao sinttacaninxin tti ttetonha Dios?

³¹ Mé inchin ná tsé icha nčhin de cainxin tsehe ca co tsé mé dinhi mostaza.

³² Pero are dinga tsé mé, dangui qué tse icha que cainxin ca hasta conttoa nchao nchejogaha va ngagaha ntté ca mé.

*Quexén vanchegonda Jesús cain ejemplo
(Mt. 13.34-35)*

³³ Jañá vacjago Jesús joajné Dios conixin tsje ejemplo inchin cain ejemplo yá, hasta tti, chojni nchao coinxin jian.

³⁴ Jesús jeha nichjé chojni de ixin ejemplo, pero después, vandache chojni que vacao tti rročo cainxin ejemplo yá.

*Jesús tajoaquehe čhintto conixin olé lago
(Mt. 8.23-27; Lc. 8.22-25)*

³⁵ Nchanho mé are ndaconttie, Jesús ndache chojni que vacao:

—Sachjin na toenixin lago jihi.

36 Cottimeja nttiha cointtohe na cainxin chojni co sajoicao na Jesús ngá barco tti vengá. Co rroé icanxin barco cai.

37 Co joí ná ċhintto anto soji ngataon jinda; anto soji coeto nda co viquia nda barco tti jidicao Jesús.

38 Co are mé Jesús tajicjon ná almohada tajijoa ngá barco ngain ná lugar noton barco, co chojni que vacao Jesús joinchexingamehe na co ndaċho na ngain jehe:

—¡Maestro! ¿Andosanha ixin ndatexincanjingui na jinda?

39 Cottimeja vingattjen Jesús, co joinchesattehe ċhintto co jinda co ndaċho ngain:

—¡Tenco! ¡Co tadaríhi ndacoa!

Co rato mé tavehe ċhintto ndacoa co tavehe jinda ndacoa.

40 Cottimeja ndaċho Jesús ngain chojni que vacao:

—¿Quedonda anto ŋaon ra? ¿Quedonda ŋa chondaha ra confianza ngain Dios?

41 Pero jehe na anto ŋaon na, co jecho na ndache chó na:

—¿Quensen jiji que hasta ċhintto co jinda ditticaon tti jehe ndaċho?

5

Tti xí de ngain nonttehe Gadara que vechonda espíritu jianha

(Mt. 8.28-34; Lc. 8.26-39)

1 Joiji na toenxin lago mé, ngain nonttehe Gadara.

2 Co are Jesús vaċhjexin de ngá barco, joí ngain Jesús ná xí que vechonda espíritu jianha.

3 Xí mé vehe ngaxinhi tti vaŋanguindehe na chojni que ndavaguenhe tiempo mé. Co ŋonhi chojni coixinhi coia xa masqui conixin cadena.

4 Tsje nttiha are icha saho chojni ŋa vaquixinhi na vaquiixin na xa cadena rotté xa co rá xa, pero cainxin tiempo jehe xa vaconċhintaon xa cadena co vagaña xa cadena. Co iŋonhi chojni vaquixinhi ngain xa.

5 Co cain tti vacji xa ngagaha jna co ngaxinhi tti vaŋanguindehe na chojni que ndavaguenhe puro vacoyao xa ttie co nchanho, co vanchenihi nttaohe xa conixin ŋo.

6 Pero are vicon xa Jesús ŋa cjon, jehe xa coinga xa joí xa ngain Jesús co vettoxin nttajochjiji xa ngattoxon con Jesús;

7 co ndaċho xa sén:

—¿Quedonda dixintte nganji, jaha Jesús, Xenhe Dios que ttjen ngaini? Conixin nombre Dios nttatsanha ñao que ncheguetanha na tangui janha.

8 Ndaċho jañá ixin Jesús ojindaċho ngain:

—¡Jaha espíritu jianha, sattjixin de ngain xí jiji!

9 Co Jesús joanchiangui co ndaċho:

—¿Queŋén dinhi jaha?

Co jehe espíritu jianha ndaċho:

—Janha dinhi na Legión ixin janha na anto tsje na.

10 Co espíritu jianha anto joinchetsenhe ñao Jesús ixin senguixinha de ngain región mé.

11 Co ixin nttiha vintte anto tsje cocochi vajinea va chiaon rotté ná jna,

12 mexinxin cain espíritu jianha joinchetsenhe ñao Jesús co ndaċho:

—Rroanha ni ra ngain cocochi taha co tanċhjanda ni ra sixinhi na ngaxinhi va.

13 Cottimeja Jesús joanjo joachaxin, co cain espíritu jianha mé vachjexin de ngaxinhi xí mé, co sajoixinhi ngaxinhi cocochi. Nttiha vintte inchin yó mil cocochi, co cainxin cocochi mé ndavinttecoloco va co coinga va xincanji va ngain lago co nttiha joingui va jinda co ndavintteguenxin cainxin va ixin vintteccionhe va jinda.

14 Cottimeja cain chojni que vaquingaria cocochi mé x̄aon na co coinga na joiquequín na chojni ngagaha rajna co icha chojni que vintte ngataon jngui. Co cjo chojni mé joitsjehe na quehe conhe.

15 Co are joiji na tti jí Jesús, vicon na tti xí que vechonda tsje espíritu jianha ojingá xa lonttoe xa co tají xa ndacoa. Co jehe na are vicon na mé, anto x̄aon na.

16 Co cain chojni que vicon coequin na quexén conhe tti xí que vechonda tsje espíritu jianha co quexén conhe cain cocochi.

17 Cottimeja cain na coexinhi na joinchetsenhe na ñao Jesús que satsjixin de ngain nonttehe na.

18 Are Jesús coani barco, tti xí que vechonda tsje espíritu jianha joinchetsenhe ñao Jesús ixin rrocji ngain Jesús cai.

19 Pero Jesús çhoha, co ndaço:

—Sattji para nchiandoi co diquequinhi cain ni ichó cainxin tti joinchehe Dios nganji, co quexén coiaconoaha.

20 Cottimeja tti xí mé sacjoi co joiquequín chojni que vintte regioen Decápolis cainxin tti joinchehe Jesús ngain jehe. Co cainxin chojni que coinhi, goan na admirado.

Are xingamehe xannçhichjenhe Jairo conixin ná nçhí que catte lonttoe Jesús (Mt. 9.18-26; Lc. 8.40-56)

21 Co are Jesús cjan toenxin lago iná conixin barco, cjo anto tsje chojni ngain Jesús, co jehe nttiha tavehe ngandehe jinda.

22 Cottimeja joí ná xí que vaquetonha xa ngain nihngo nttiha, co vinhi xa Jairo. Are Jairo joí, vettoxin nttajochjiji ngain Jesús,

23 co anto joinchetsenhe ñao Jesús co ndaço:

—Xannçhichjanhna ndajidenhe xan. Nttatsanha ñao, chjin na co ttín rá ngataha xan para rroxingamehe xan co sechon xan icha.

24 Cottimeja sajoicao xí mé Jesús. Pero anto tsje chojni cjo cai co anto contedo na ngaca Jesús.

25 Co ngacjén chojni mé vehe ná nçhí que venihi nçha; ovechonda tteyo nano que veguenguihi nçha jni.

26 Co anto tsje ngain xinchexoan cjo nçha pero xonhi xoan vittja. Ojoexin joinchexinhi nçha cainxin tti vechonda nçha, pero icha co icha venihi nçha.

27 Co are coinhi nçha ixin Jesús vanchexingamehe tsje chojni, conchienne nçha ngacjén chojni co jimao catte nçha lonttoe Jesús,

28 ixin vaçaxaon nçha co vandaço nçha: “Si rrocatte masqui jeho lonttoe Jesús, janha rroxingamana.”

29 Co are nçhí mé catte nçha lonttoe Jesús, rato mé tavehe jni que jehe nçha vechonda nçha. Co conohe nçha ngain cuerpoe nçha ixin ondaxingamehe.

30 Cottimeja Jesús conohe ixin ná chojni ojoinchegonda joachaxin que chonda Jesús. Mexinxin ngaria Jesús co tsjehe ngayehe chojni co joanchianguí co ndaço:

—¿Quensen catte lonttona?

31 Cottimeja chojni que vacao Jesús ndaço na:

—Soixin dicen que anto tsje chojni tonttedo na ngaca soixin, mexinxin quedonda soixin danchiangui: “¿Quensen catte?”

³² Pero Jesús tsjehe ngayehe na para rroguicon quensen catte lonttoe.

³³ Cottimeja nchí mé onohe quehe conhe, co jixanga ncha de ixin joaxaon cjoí ncha vettoxin nntajochjiji ncha ngain Jesús, co ndačo ncha ixin quehe joinchehe ncha.

³⁴ Cottimeja Jesús ndačo ngain nchí mé:

—Jaha oxingamaha ixin vitticaon na. Sattji contenta ixin irrocjanha tsoniha de ixin chin que jaha joarichonda.

³⁵ xa jinichja Jesús jañá are joí canxion chojni de ngain nchiandoha Jairo co ndačo na ngain Jairo:

—Xanha ondavenhe xan. Inchemolestaha ximaestro.

³⁶ Pero Jesús joincheha caso tti ndačo na, co ndačo Jesús ngain Jairo:

—Xaonha; jehó ditticaon na janha.

³⁷ Co sajoicao Jairo Jesús ngain nchiandoha pero Jesús čhoha joicao tsje chojni, jehó Pedro, Jacobo co Juan xanchó Jacobo.

³⁸ Co are joiji na ngain nchiandoha Jairo, cainxin chojni que te nttiha anto tetsjanga na co tetoyao na.

³⁹ Jesús joixinhi co ndačo ngain na:

—¿Quedonda anto toyao jaha ra co tsjanga ra? Xannčhichjan ndavenha xan, jehó tajjoa xan.

⁴⁰ Pero jehé na cjoanoa na Jesús. Cottimeja Jesús ndache cain chojni mé que vačhjexin na de nchia. Co jehó Jesús conixin ndodé xannčhichjan co janné xan conixin tti ní chojni que joicao Jesús joixinhi na tti jí xannčhichjan mé.

⁴¹ Co Jesús tsehe rá xan co ndačo ngain xan:

—Talita, cumi —que rročo: Xannčí, janha rroundattjo, dingattjen.

⁴² Co rato mé, jehé xannčhichjan mé, que vechonda tteyó nano, vingattjen xan co nchao sacjoixin rotté xan. Co cain chojni nttiha anto goan na admirado.

⁴³ Pero Jesús anto coetonhe na ixin xonhi chojni rroundache na de ixin tti joinchehe Jesús. Co ndačo Jesús cai ixin rrochjé na xannčhichjan mé sine xan.

6

Jesús ngain Nazaret

(Mt. 13.53-58; Lc. 4.16-30)

¹ Cottimeja Jesús conixin chojni que vacao sacjoixin na de nttiha co sacjoí na para Nazaret, rajné Jesús.

² Co are joí nchanho para nchejogaha chojni Israel, Jesús coexinhi cjoagoe na de ixin Dios ngaxinhi nihngo. Co tsje chojni tti coinhi quehe nichja Jesús goan na admirado co ndačo na:

—¿Ttinó coanguixin xí yá cainxin cosa yá? ¿Quexén xí yá anto jian chonxin de ixin Dios, co quexén nchehe xa anto tsje milagro?

³ Xí yá tti carpintero, xenhe María co xanchó xa Jacobo, José, Judas co Simón; co cai cain xanchó xa xannčí nttihi te xan ngain rajná na.

Mexinxin čhoha na joinchehe na caso tti ndačo Jesús.

⁴ Pero Jesús ndačo ngain na:

—Cainxin chojni nchesayehe ná profeta, pero nahi profeta que ttixin de ngain xajeho rajné na ni profeta que ttixin de ngain xajeho familié na ni de ngain xajeho nindoha na.

⁵ Mexinxin Jesús chojaha joinchexingamehe tsje chojni nttiha. Pero Jesús catte nchion chojni nttiha co jehe na xingamehe na.

⁶ Co Jesús goan admirado ixin chojni nttiha choha na vitticaon na ngain jehe. Cottimeja Jesús coingaria icanxin rajna que te chiaon para joicjagoe chojni de ixin Dios.

Jesús rroanha chojni que vacao para joinichja na de ixin Dios
(Mt. 10.5-15; Lc. 9.1-6)

⁷ Cottimeja nichja ngain tti tteyó chojni que vacao co rroanha yó co yó na ngain icha rajna para joinichja na de ixin Dios. Co jehe Jesús joanjo joachaxin ngain na cai para sengui na espíritu jianha que te ngain chojni.

⁸ Co coetonha ngain na cai que xonhi sicao na ngoixin tti satsji na, ni ná bolsa, ni niottja, ni tomi. Jeho sicao na nttacotto para tsjixin na are tsonchjen na co

⁹ catte corriente tsjanga na co sinttengá na nanacoa camisa, choha sinttengá na yoyó camisa.

¹⁰ Co ndacho Jesús ngain na cai:

—Are saso ra ná nchiandoha na co jehe na rrondacho na ixin nchao tasintte ra nttiha, jaha ra tadintte ra nttiha hasta que satsjixin ra de ngain rajna mé.

¹¹ Co si chonja rajna sinaoha na sayaha ra na ni sinaoha na tsinhi na tti rronichja ra, dachjexin ra de nttiha co tontsjenga ra jinche que jiyá cattea ra. Jamé para ná señal ixin vitticaonha ra na. Co ndattjo ra que are tsí nchanho que Dios sinchejusguehe cainxin chojni, are mé, seguro que chojni que vintte ngain ciudad Sodoma co Gomorra icha sojiha castigo sayé que cain chojni ngain rajna tti rrochoha sayaha ra.

¹² Cottimeja savinttecji chojni que vacao Jesús ngain tsje rajna co ndache na cain chojni ixin chonda na que tsetoxinhi vidé na.

¹³ Co cai venguixin na tsje espíritu jianha de ngaxinhi cuerpoe chojni, co coinga na aceite ngataha já tsje chojni nihi, co jamé joinchexingamehe na na.

Are ndavenhe Juan, tti vancheguitte chojni
(Mt. 14.1-12; Lc. 9.7-9)

¹⁴ Are ngoixin mundo venohe quehe vanchehe Jesús, cai rey Herodes conohe co ndacho:

—Juan tti vancheguitte chojni cjan xechon, mexinxin chonda cain joachaxin yá.

¹⁵ Co icanxin chojni vandacho:

—Mé tti profeta Elías.

Co icanxin chojni vandacho:

—Mé ná profeta inchin cain profeta que vacji are saho.

¹⁶ Pero are Herodes coinhi cain yá, jehe ndacho:

—Jehe seguro Juan, tti janha coetonha para chinji já, co jai xechon.

¹⁷ Are saho Herodes coetonha para joicao na Juan viaxinhi co coia na conixin cadena ngaxinhi cárcel ixin ná nanita vinhi Herodías ndacho jamé. Jehe Herodías cjoí chihi Felipe, xanchó jehe Herodes, pero Herodes joantsjehe xanchó chihi xan para vecaho jehe Herodes.

¹⁸ Co are mé Juan ndacho ngain Herodes:

—Jianha ixin jaha rricoho čhihi xanchó.

¹⁹ Mexinxin jehe Herodías anto goñao ngain Juan ixin ndačo Juan jañá, co joinao narrogoenxon Juan. Pero čhoha joinchehe mé

²⁰ ixin Herodes venohe que Juan anto jian ngain ansén co vaguitti-caon ngain Dios. Mexinxin vañaon Herodes para narrogoenxon Juan, co coančhandaha Herodes Herodías para cjoaya ngain Juan. Co masqui Herodes antoha jian vaquinxin tti vandačo Juan, pero jehe ján vajinao vaquinhí.

²¹ Pero are quié Herodes, Herodías nchao coetonha para ndavenhe Juan. Ixin are mé Herodes vechonda ná vandango. Co jehe joanjo joine tsje xí que vaquetonha ngain regioen Galilea, co tsje xí que vaquetonha ngain xisoldado, co icha chojni importantante nttiha.

²² Co ná xannčí xenhe Herodías joixinhi xan co tte xan ngaxinhi nchia tti tenexin cainxin chojni mé. Herodes co icha chojni que tenecaho nttiha anto joinchexoxinhi na ixin quexén tte xannčí mé. Mexinxin Herodes ndačo ngain xannčí mé:

—¿Quehe cosa rinao? Danchiana co janha rrochjaha.

²³ Co jehe Herodes ndačo co joinchejurá ixin sanjo quexeho cosa sanchia xannčí mé masqui hasta ngosinexin región que jehe vaquetonha.

²⁴ Jehe xan vachje xan co ndačo xan ngain janné xan:

—¿Quehe sanchiá rey?

Co janné xan ndačo:

—Danchiehe rey já Juan tti ncheguitte chojni.

²⁵ Co jaicoa cjan xan joixinhi xan tti jí rey co ndačo xan ngain:

—Janha rinaho que jai rrochjana já Juan ngá ná láto.

²⁶ Cottimeja rey anto vechín. Pero ixin jehe ojoinchejurá ixin sanjo tti sanchia xan, co ixin coinhi cain chojni que te ngain, mexinxin jehe joihoa ndache xannčí mé nahi.

²⁷ Co rato mé coetonhe Herodes ná xisoldado para joiroo xa já Juan.

²⁸ Cjoi xisoldado mé ngain cárcel tti jiixinhi Juan co cončhinjihi xa já co ngá ná láto joiaoxin xa co joanjo xa ngain xannčí, co jehe xan joanjo xan ngain janné xan.

²⁹ Co are cain chojni que vacao Juan conohe na quehe conhe, joí na co sajoicao na cuerpo para joicjavá na cuerpo.

*Are Jesús joanjo joine naho mil xí
(Mt. 14.13-21; Lc. 9.10-17; Jn. 6.1-14)*

³⁰ Are nirepresentanté Jesús joixin na de ngain cain rajna tti sacjoi na, cjan na para ngain Jesús, co ndačo na quehe joinchehe na, co quehe cjoagoe na chojni ngoixin tti cjoi na.

³¹ Cottimeja Jesús ndačo ngain na:

—Ācoi ra, chjin na dinttojogaha na ná lugar tti xonhi chojni jí.

Jesús ndačo jañá ixin vacji co vacjan anto tsje chojni ngain na, co ni tiempo vechondaha na para vane na.

³² Cottimeja jehó Jesús conixin nirepresentanté sacjoi na ngá barco para iná lugar tti xonhi chojni vintte.

³³ Pero anto tsje chojni vicon are sacjoi co joatsoan na Jesús. Mexinxin anto tsje chojni de tsje rajna coinga na joichonhe na nttiha co icha saho joihi cain jehe na que Jesús.

³⁴ Co are Jesús vačhjexin de ngá barco, vicon anto tsje chojni nttiha iná, co Jesús coiaconoeha na ixin jehe na sín na nttiha xá coleco que xonhi chojni ttingaria. Co Jesús coexinhi joinchecoeha na nttiha tsje cosa de ixin Dios.

³⁵ Co are ocotsocjin chojni que vacao Jesús jói na ngain co ndačo na:
—Otsocjin co nttihi xonhi nchiandoha chojni te.

³⁶ Ttetonhe cain chojni satsji na tti jínchia o rajna icha chian para siquehna na tti sine na, ixin xonhi chonda na.

³⁷ Co Jesús ndačo:

—Jaha ra danjo ra tti sine na.

Co jehe na ndačo na:

—¿Quexén janha na tsji na siquehna na niottja para sine cainxin chojni yá? Ixin tomí que sitte cain niottja que sine cain chojni yá inchin tsjexin tomí que dacha ná ninchehe xa yáto conittjao.

³⁸ Co Jesús ndačo ngain na:

—¿Quejanhi niottja chonda ra? Sattji ra ditsjehe ra.

Co are jehe na conohe na quejanhi niottja techonda na, jói na co ndačo na ngain Jesús:

—Jí naho niottja co yó copescado.

³⁹ Cottimeja Jesús coetonhe cainxin chojni para tavintte na grupochjan co grupochjan ngataha cachji.

⁴⁰ Co tavintte na de cien na co de cincuenta na ngataha cachji.

⁴¹ Cottimeja Jesús cóa tti naho niottja co tti yó copescado co tsjehe para noi co chjé gracias ngain Dios. Cottimeja váña niottja co copescado co chjé chojni que vacao para conchjejehe na cainxin chojni.

⁴² Co cainxin chojni joine na co cojehe na jian.

⁴³ Cottimeja xa joinchecaon na tteyó ntaxa de tti xexin joine na, de niottja co copescado.

⁴⁴ Co jecho xí que joine niottja mé cjoí naho mil xa.

Jesús cjoixin rotté ngataonhe jinda (Mt. 14.22-27; Jn. 6.16-21)

⁴⁵ Cottimeja Jesús coetonhe chojni que vacao para coani na barco co coattoa na lago para sacjoi na ngain rajna Betsaida icha saho que jehe. Co Jesús vittohe nttiha para jindache chojni que onchao sasinttecji na.

⁴⁶ Co are cainxin chojni sacjoi, Jesús sacjoi para ngagaha ná jna para joinchecoanxinxin Dios.

⁴⁷ Co are ondacontie, barco ojoiiji ngosine jinda, co vé jecho Jesús vittohe nttiha.

⁴⁸ Co Jesús vicon ixin anto tanguí tedeca na barco ixin čintto anto soji joixin čintto de tti satettji na. Co ndoyo mé Jesús coingachjetaha jinda co sacjoi hasta tti ngain na co jehe joinchehe inchin rrogatto nao.

⁴⁹ Pero are jehe na vicon na Jesús sajittji conixin rotté ngataonhe jinda, jehe na xaxaon na ixin mé ná nttanchanha, co coyao na

⁵⁰ ixin cainxin na vicon na co anto xaon na. Pero Jesús nichja ngain na co ndačo:

—Xaonha ra, janha joihi.

⁵¹ Co coani barco tti tengá na, co rato mé tavehe čintto. Jehe na anto xaon na co anto goan na admirado

⁵² ixin xa coinxinha na quehe rročo tti joinchehe Jesús conixin niottja. Ixin xa cha ansén na.

*Jesús joinchexingamehe tsje chojni nihi ngain nonttehe Genesaret
(Mt. 14.34-36)*

⁵³ Coattoa na lago mé co joihi na nonttehe Genesaret. Co nttiha coenchoa na barco ngandehe jinda.

⁵⁴ Co are vaniáxin na de barco, chojni que te nttiha anto daca joatsoan na Jesús.

⁵⁵ Co anto daca joinchenohe chó na ngoixin región nttiha. Co cainxin lugar tti sacjoi Jesús, joicao na niníhi conixin camilla ngain Jesús.

⁵⁶ Co ngoixin tti vacji Jesús ngain colonia o ngain ranchería o ngagaha rajna, chojni vaquín na niníhi ngá nttiha co vanchetsenhe na ñao Jesús ixin sittoexin que niníhi rrotse na masqui rioho ngandehe lonttoe Jesús. Co cainxin chojni que tse lonttoe Jesús xingamehe na.

7

*Tti nchejianha chojni
(Mt. 15.1-20)*

¹ Co conchienne canxion xifariseo ngain Jesús conixin icanxin ximaestroe ley Israel que joixin de ngain ciudad de Jerusalén.

² Chojni mé vicon ixin canxion chojni que vacao Jesús vaconttiha na jinda rá na tsje nttiha are vane na inchin ttetonha costumbré na. Mexinxin xifariseo co ximaestroe ley feo nichja xa de ixin chojni que vacao Jesús.

³ (Jamé ixin cain xifariseo co icha chojni Israel anto vaguitticaon na co vanchehe na costumbré cain ndogelitoe na xanchjen are icha saho. Rrocho que cainxin tiempo vacontti na jinda rá na tsje nttiha saho de vane na.

⁴ Co are vaquixin na ndásin co si vaconttiha na jinda rá na tsje nttiha saho, vajineha na. Cai vechonda na tsje costumbre icha, inchin quexén vacjén na taza co chi co traste de chia co saoen na.)

⁵ Cottimeja joanchiangui na ngain Jesús co ndacho na:

—¿Quedonda chojni que tchiho ditticaonha na costumbré ndogelitoa na xanchjen? Ixin jehe na tonttiha na jinda tsje nttiha saho que jine na.

⁶ Cottimeja Jesús ndacho ngain na:

—¡Jaha ra chojni que ncheha inchin ndacho! Mexinxin nchao diquentaxin Isaías janhi de ixin jaha ra: Chojni tehe nchesayana na conixin rroha na, pero ngain ansén na xa icjin te na para sinoa na na janha.

⁷ Mexinxin xonhi xé masqui tenchecoanxinna na ixin tti jehe na tenchecoenhe na chojni joxon tti ttetonha xí nttihi ngataha nontte.

⁸ Jíhi ndoa de ixin jaha ra ixin jaha ra ditticaonha ra tti ttetonha Dios sino que nchehe ra inchin ndacho costumbré ndogelitoa ra xanchjen. Rrocho costumbre de quexén ttjén ra vaso co chi co icha costumbre inchin mé.

⁹ Co Jesús ndacho ngain na cai:

—Jaha ra coín ra ná lado tti ttetonha Dios para nchao nchehe ra inchin ndacho costumbrea ra.

¹⁰ Ixin ley que vayé Moisés ndacho: “Ttjiho ra respeto ngain ndodá ra co ngain janná ra”, co “Tti rronichja jianha ngain ndodé o ngain janné, chojni mé jiquininxin ndasenhe.”

¹¹ Pero jaha ra ndacho ra ixin ná chojni nchao rrondache ndodé o janné: “Janha choha tsjenguijna soixin ixin cain tti janha chonda, mé Corbán” (co jíhi rrocho ixin jehe ojoanjo cain mé ngain Dios).

¹² Co si ná chojni ndačo jaňá, jaha ra itančhاندaha ra para tsjenguijna ndodé o janné.

¹³ Co jaňá jaha ra incheha ra caso tti ttetonha Dios, sino que jehó nchehe ra inčhin costumbre que vayehe ra de ngain ndoguelitoa ra co tti jaha ra ncheoehne ra xanha ra jai. Co nchehe ra icha cosa jianha inčhin jiji cai.

¹⁴ Cottimeja Jesús nichjé cainxin chojni iná co ndačo ngain na:

—Ttinhí ra jian cainxin tti janha rrondačhjan co ttinxin ra.

¹⁵ Jehá tti jine chojni nchejianha na. Tti ttixin ansén chojni, mé tti nchejianha chojni.

¹⁶ Jaha ra que ttinxin ra, ttinhí ra jian.

¹⁷ Cottimeja Jesús cjan sajoixinhí nchia, co are Jesús ngaxinhí nchia, chojni que vacao Jesús joanchiangui na ngain jehé ixin quehe rročo ejemplo mé.

¹⁸ Co Jesús ndačo ngain na:

—¿Acai jaha ra ttinxinha ra? ¿Attinxinha ra que jehá tti jine chojni nchejianha na?

¹⁹ Tti jine chojni ttijha ngaxinhí ansén. Cain mé sattji ngaxinhí tsehe, cottimeja chonda que dačhje.

Jaňá rročo que chojni nchao jine cain cosa.

²⁰ Co ndačo Jesús cai:

—Tti ttixin de ngain ansén chojni, mé tti nchejianha na.

²¹ Ixin de ngaxinhí ansén na dačhjexin cosa jianha que jehé na řaxaon na: jehé na řaxaon na para sincheyehe na čhihi iná tattita, co para nasoenxon na chojni,

²² co para tsé na cosé iná chojni. Co ixin jianha řaxaon na, cai jehé na rinao na rrochonda na cosé icha chojni, co nchehe na cosa jianha, co ncheyehe na icha chojni, co tosoeha na para nchehe na tti jianha, co chjoehe na, co nichja na ndoaha de icha chojni, co anto orgulloso na, co ncheha na jian ngain icha chojni.

²³ Cainxin cosa jianha yá ttixin de ngaxinhí ansén na co nchejianha na.

Ná nčhí de iná nación que vitticaon nčha Jesús

(Mt. 15.21-28)

²⁴ Cottimeja sacjoixin Jesús de nttiha co sacjoi ngain region tti te ciudad de Tiro co Sidón. Co are Jesús joiji nttiha vittja ná nchia para vittohe. Pero joinaoha ixin rroconohe chojni ttinó vehe jehé. Pero masqui jamé, chojni conohe na ttinó vehe Jesús.

²⁵ Co ngain región mé vehe ná xannčhí que vechonda xan espíritu jianha. Co anto daca conohe janné xan ixin nttiha vehe Jesús. Co cjoí naníta mé tti vehe Jesús co vettoxin nttajochjihí ngain Jesús.

²⁶ Naníta mé jehá judía, jehé joixin iná nación dinhi Sirofenicia. Pero joinchetsenhe ñao Jesús ixin Jesús santsjexin espíritu jianha de ngain xenhe naníta mé.

²⁷ Pero Jesús ndačo ngain naníta mé:

—Tajanda que saho tsjenguijna chojni judío que mé chojni Dios. Ixin nchaoha jí si ná ndodaha santsjehe ndo xenhe ndo niottja para rrochjé ndo conia nio.

²⁸ Cottimeja naníta mé ndačo ngain Jesús:

—Ján, ndoa, pero conia que te nganguí mesa nchao jine va tti nchoe niottja que ttinttjingui čhan.

²⁹ Cottimeja ndačo Jesús:

—Ján, nchao ndačo jaha. Onchao sattji jaxon ixin espíritu jianha oscoixin de ngain xanha.

³⁰ Co are nanita mé joiiji nchiandoha, vittja xenhe ngataha saon tají xan co espíritu jianha que vechonda xan icoha; osadicjixin de ngain xan.

Jesús joinchexingamehe ná tti čhoha vanichja ni čhoha vaquinhi

³¹ Cottimeja Jesús sacjoixin de ngain región tti jí ciudad de Tiro co vatto ngain ciudad de Sidón co tti rajna que te regioen Decápolis, hasta que joiiji ngain lago de Galilea.

³² Co nttiha joiaoe na Jesús ná xí que čhoha vaquinhi co čhoha vanichja. Co joinchetsenhe na ñao Jesús ixin tsín rá ngataha xí mé, para rroxingamehe.

³³ Cottimeja Jesús vachjendacaho xí mé de ngayehe chojni, co žandoho dedoe ngadoho ndatsjoen xa co chjé nttaté dedoe co cattehe neje xa.

³⁴ Cottimeja tsjehe Jesús para ngajni, co váva soji co ndache xa:

—¡Efata! —que rročo: ¡Xirehe!

³⁵ Co xiré ndatsjoen xa co onchao coinhi xa co onchao nichja xa jian.

³⁶ Co Jesús coetonhe cain chojni nttiha ixin rrondačoha na quehe joinchehe Jesús. Pero masqui Jesús anto vaquetonhe na ixin rrondačoha na, jehe na icha vaquequin na.

³⁷ Co chojni mé anto vagoan na admirado co vandačo na:

—¡Cainxin nchao nchehe! Ixin hasta chojni que ttiha, jehe nchao nchequinhi co chojni que čhoha nichja, jehe nchao nchenichja.

8

Are Jesús joanjo joine nó mil chojni (Mt. 15.32-39)

¹ Co tiempo mé žatte anto tsje chojni ngain Jesús iná co vechondaha na tti vane na nttiha. Mexinxin Jesús nichjé chojni que vacao co ndačo ngain na:

² —Janha nchenina chojni tehe, ixin ochonda ní nchanho te na nttihi nganji na co žonhi chonda na para sine na.

³ Si rrondattjan na ixin satsji na para nchiandoha na co sineha na icha saho, ndatsončhjenxin na jinta co ndatsonttiehe na ngatja nttiha, ixin canxion na joixin na cjin.

⁴ Co chojni que vacao Jesús ndačo na:

—¿Pero quežén rrochjé na cain chojni yá sine na? Nttihi žonhi jí.

⁵ Jesús joanchiangui ngain na co ndačo:

—¿Quejanhi niottja chonda jaha ra?

Co jehe na ndačo na:

—Yáto niottja.

⁶ Cottimeja Jesús coetonhe cainxin chojni tavintte na ngataha nontte. Cottimeja coá tti yáto niottja mé co chjé gracias ngain Dios. Cottimeja váña Jesús nio co chjé chojni que vacao nio para que jehe na conchjea na nio ngain icha chojni.

⁷ Cai vechonda na icanxin copescadochjan, co Jesús chjé gracias ngain Dios co chjé chojni que vacao para que jehe na conchjeyehe na chojni para joine na.

⁸ Cainxin na joine na co cojehe na jian. Cottimeja ža joinchecaon na yáto nntaxa de tti xexin joine na.

⁹ Co cain chojni que joine mé, chian nó mil chojni. Cottimeja Jesús goan despedido de ngain cain chojni mé,

¹⁰ co jehe conixin chojni que vacao vinttengá na barco co sacjoi na para nonttehe Dalmanuta.

Xifariseo joanchia xa ixin Jesús rrojinchehe ná milagro
(Mt. 16.1-4; Lc. 12.54-56)

¹¹ Co are joihi na nttiha, conchienne canxion xifariseo ngain Jesús co joinchediscutihí xa Jesús. Co ndacho xa ixin Jesús rrojinchehe ná cosa para rrocjago ixin joachaxin que jehe chonda joixin de ngajni.

¹² Cottimeja Jesús váva soji co ndacho:

—¿Quedonda chojni que techon jai rinao sicon ná señal de milagro? Janha seguro rrondaçhjan que ni ná señal tsjagoaha na.

¹³ Cottimeja nttiha cointtohe xa co Jesús cjan vengá barco co sacjoi conixin chojni que vacao para toenxin lago.

Levaduré xifariseo
(Mt. 16.5-12)

¹⁴ Co chojni que vacao Jesús ndatjañehe na joicaoha na niottja para rrojine na. Co are ongá barco jecho nacoa niottja techonda na.

¹⁵ Cottimeja Jesús coetonhe na co ndacho:

—Ttjho ra cuidado de ixin levaduré xifariseo, co levaduré Herodes.

¹⁶ Co cain chojni que vacao Jesús ndache chó na:

—Jehe ndacho jañá ixin xonhi niottja chonda na.

¹⁷ Pero Jesús chonxin quehe ndache chó na co ndacho ngain na:

—¿Quedonda tendacho ra ixin xonhi niottja chonda ra? ¿Axa ttinxinha ra, ni xa noaha ra? ¿Achonda ra ansean ra anto cha?

¹⁸ Masqui dicon ra co ttinhi ra, pero xa ttinxinha ra. ¿Açhoha xaxaon ra de ixin tti naho niottja?

¹⁹ Are janha váña tti naho niottja para joine tti naho mil xí, ¿quejanhi nntaça joincheçaon ra de tti xexin joine na?

Cottimeja chojni que vacao Jesús ndacho na:

—Tteyó nntaça.

²⁰ Cottimeja ndacho Jesús iná:

—Co are janha váña tti yáto niottja para joine tti nó mil chojni, ¿quejanhi nntaça joincheçaon ra de tti xexin joine na?

Co chojni que vacao Jesús ndacho na:

—Yáto nntaça.

²¹ Cottimeja Jesús ndacho ngain na:

—¿Aco xa ttinxinha ra ni xa noaha ra tti janha ndattjo ra?

Jesús ngain rajna Betsaida joinchexingamehe ná tti vaguiconha

²² Cottimeja joihi na ngain rajna Betsaida. Co canxion chojni nttiha joiaho na ngain Jesús ná xí que çhoha vaguicon. Co joinchetsenhe na ñao Jesús para rrocatte co rrojinchexingamehe.

²³ Mexinxin Jesús tsehe rá xí mé co sajoicao para ngandehe rajna mé. Co nttiha Jesús cjoatjo nttatté ngain jmacon xa co vaquehe rá ngataha xa, co joanchianguihi xa si aonchao dicon xa.

²⁴ Co jehe xa tsjehe xa co ndacho xa:

—Dicon canxion xí satettji co xí yá inchin canxion nttá.

²⁵ Cottimeja vaquehe rá Jesús ngain jmacon xa iná. Co rato mé jehe xa tsjehe xa jian co jmacon xa ndaxingamehe. Co xí mé onchao vicon cain cosa jian.

²⁶ Cottimeja Jesús coetonhe xa para sacjoi xa nchiandoha xa, co ndache xa:

—Ttjha ngagaha rajna co xonhi chojni ndache ixin quehe conha.

Pedro ndacho que ixin Jesús, mé tti Cristo
(Mt. 16.13-20; Lc. 9.18-21)

²⁷ Cottimeja Jesús conixin chojni que vacao sacjoi na para ngain rajna que te ngain nonttehe Cesarea de Filipo. Co are tettji na ngatja nntiha Jesús joanchiangui ngain chojni que vacao co ndacho:

—¿Quehe ndacho chojni ixin quensen na janha?

²⁸ Co jehe na ndacho na:

—Canxion chojni ndacho ixin jaha Juan, tti vancheguitte chojni, co icanxin na ndacho na ixin jaha profeta Elías, co icanxin na ndacho na ixin jaha iná de tti profeta que vacji are saho.

²⁹ Cottimeja joanchiangui Jesús ngain chojni que vacao co ndacho:

—Co jaha ra, ¿quehe ndacho ra ixin quensen na janha?

Cottimeja ndacho Pedro ngain Jesús:

—Soixin tti Cristo. —co Cristo rrocho: tti Dios Coinchiehe.

³⁰ Pero Jesús coetonhe na ixin xonhi chojni rrondache na jiji.

Jesús ndacho ixin jehe ndasenhe
(Mt. 16.21-28; Lc. 9.22-27)

³¹ Cottimeja Jesús coexinhi ndacho ngain chojni que vacao ixin jehe, tti Xí que joixin de ngajni, chonda que anto tangui tsonhe. Co cain xittetonha ngain nihngo co cain xidána que ttetonha ngain icha xidána co cain ximaestroey anto rroningaconhe na. Co cain chojni mé nasoenxon na jehe pero nchanho ninxin jehe rroxechon.

³² Cain yá nao ndacho Jesús. Cottimeja Pedro joantsjenda Jesús para joinchesattehe Jesús.

³³ Pero Jesús ngaria co tsjehe ngain chojni que vacao, co joinchesattehe Pedro co ndacho Jesús:

—¡Sattjixin de nganji na janha, Satanás! Jaha xaxaonha inchin xaxaon Dios, sino que jaha jeho xaxaon inchin xaxaon chojni.

³⁴ Cottimeja Jesús nichjé chojni que vacao co icha chojni cai co ndacho ngain na:

—Si çhonja chojni rinao sacjinha na, pero chonda que rrotjañehe cain tti jeho jehe rinao co sacjinha masqui anto tangui tsonhe co hasta nasenxon.

³⁵ Ixin tti rinao que xonhi tsonhe vidé, mé sinchetján vidé. Pero tti sinchetján vidé de ixin causananxin janha o de ixin causexin tti jian joajna que janha joiquian, mé sechon para cainxin tiempo.

³⁶ Ixin xonhi xé masqui ná chojni sacha cainxin cosa ngataha nontte, si ndasinchetján almé.

³⁷ Ixin ¿quejanhi tsenanxin chojni almé are jehe ndasinchetján?

³⁸ Ixin si çhonja chojni tiempo jai tosoé de nichja jian de ixin janha co de ixin joajnana, cai janha, tti Xí que joixin de ngajni, tsosoahna de ixin chojni mé are sihi conixin ángel co gloria que rrochjana Ndodana que jí ngajni.

9

¹ Cai ndacho Jesús ngain na:

—Ndoa tti rrondattjo ra, que canxion ra xo te ra nntihi senha ra hasta que siconja ra quexén siquetonha Dios nntihi conixin joachaxin que jehe chonda.

Are vicon na Jesús anto ojé
(Mt. 17.1-13; Lc. 9.28-36)

² Vatto incjaon nchanho, cottimeja Jesús sajoicao Pedro, Jacobo co Juan ngagaha ná jna anto noi. Co nntiha canio nijoicao Jesús vicon na Jesús anto oje.

³ Co lonttoe conguxima lontto co ndacoroa lontto inchin thintta ngataha jnanchaha. Co xonhi chojni nntihi ngataha nontte nchao rrocjén lontto co rrojincheroa lontto jamé.

⁴ Co nntiha vicon na Elías co Moisés cjoao Jesús.

⁵ Cottimeja Pedro ndaço ngain Jesús:

—Maestro, anto nchao ixin janha na te na nntihi. Sinttachjian na ní nchiachjan nntihi: ná para ixin soixin, ná para ixin Moisés, co iná nchiachjan para ixin Elías.

⁶ Jañá cho Pedro ixin jehe noeha quehe rronichja ixin jehe co tti yó xicompañeroe anto xaoon na are vicon na jamé.

⁷ Cottimeja joi ná ttjoi co ndavittohe na ngacjan ttjoi mé. Co de ngagaha ttjoi mé coinhi na tté Dios que ndaço:

—Jihi tti Xanhna que anto rinaho. Ditticaon ra tti rrondattjo ra Xan.

⁸ Co rato mé ixonhi vicon na masqui tsjehe na ngoixin ngandanji na. Jeho Jesús vicon na tajangattjen nntiha, pero Elías co Moisés iviconha na.

⁹ Co are texincanji na de jna mé, Jesús coetonhe canio na ixin xonhi chojni rrondache na tti vicon na, hasta que jehe, tti Xí que joixin de ngajni, rrocjan rroxechon de ngacjén tti nindadiguenhe.

¹⁰ Mexinxin xonhi chojni ndache na tti vicon na. Pero anto vandache chó na jeho na de ixin quehe rrocho tti rroxechon de ngacjén tti nindadiguenhe.

¹¹ Cottimeja joanchianguihi na Jesús co ndaço na:

—¿Quedonda ndaço cain ximaestroey ley ixin Elías tti tsí saho que jaha?

¹² Jesús ndaço ngain na:

—Ján ndoa que Elías tti tsí icha saho que janha co jehe siquentoxinhi vidé chojni para que nchao sayehna na janha. ¿Co quehe ndaço ngain tti jitaxin Palabré Dios de ixin janha, tti Xí que joixin de ngajni? Ndaço nntiha ixin chonda que anto tangui tsonna, co ixin tsje chojni tsjanao na ixin sitticaonnaha na.

¹³ Pero janha rrondattjo ra que Elías ojoí. Co chojni joinchehe na feo ngain ixin joinchehe na inchin joinao na ngain jehe inchin jitaxin ngain Palabré Dios.

Jesús joinchexingamehe ná xanxichjan que vechonda espíritu jianha (Mt. 17.14-21; Lc. 9.37-43)

¹⁴ Co are joi na ngain tti vittohe icha chojni que vacao Jesús, vicon na anto tsje chojni te ngandanji tti nueve chojni que vittohe nntiha. Co cai nntiha te canxion ximaestroey ley co tenchediscutihi xa tti nueve chojni que vittohe nntiha.

¹⁵ Co are vicon cain chojni ixin joihi Jesús, cain na anto goan na admirado co coinga na cjoí na ngain Jesús para chjé na joajna.

¹⁶ Co Jesús joanchiangui ngain tti nueve chojni co ndaço:

—¿Quehe tetjao ra ximaestroey ley yá?

¹⁷ Co ná de tti chojni que ote nntiha ndaço:

—Maestro, nntihi joiquinha xanhna nganji ixin chonda xan ná espíritu jianha que ndajoinchettapo xan.

¹⁸ Cain tti tsexin xan espíritu jihi jehe danza xan ngataha nontte, co hasta ttoxo ttixin rroha xan co netaon neno xan. Cain yá tonhe xan co mexinxin

xonhi fuerza chonda xan. Ojointtatsán ñao chojni que ðhjiho tehe ixin rroguengi na espíritu jiji de ngain xanhna pero coixinha na.

¹⁹ Jesús ndaço:

—¿Quedonda chojni jai ðhoha ditticaon? ¿Hasta quesa janha chonda que sarihi nganji ra? ¿Co hasta quesa janha chonda que tsixinna nganji ra? Sicó ra chjan mé nttihi.

²⁰ Cottimeja joiaho na chjan mé ngain Jesús. Pero are espíritu jianha vicon Jesús, joincheguetan xan tangui co joanca xan ngataha nontte. Co conçhindoja xan co joixin ttoço rroha xan.

²¹ Cottimeja Jesús joanchianguihi ndodé xan co ndaço:

—¿Quejanhi tiempo tonhe xan janhi?

Co ndodé xan ndaço ndo:

—Desde xa nchín xan.

²² Co anto tsje nttiha dancatte espíritu jianha xan xohi co dancangui xan jinda, para rrogoen xan. Si nchao, nttatsaha ñao, ttiaconoana na co nchexingamena xanhna.

²³ Co ndaço Jesús:

—Ján, si jaha mismo nchao ditticaon, ixin chojni que ditticaon nchao nchehe cainxin cosa.

²⁴ Cottimeja jehe ndodé xannihi mé ndaço ndo sén:

—Ján, ditticanho nchin; ttjenguijna na para sitticanho icha.

²⁵ Co are vicon Jesús conchienne anto tsje chojni, Jesús joinchesattehe espíritu jianha que vehe ngain chjan mé co ndaço:

—Espíritu jianha, jaha tti rrinchetapo co rrinchecoço chjan jiji, jaxon janha rrittetonha que dachjexin de yá. Ttinttohe chjan jiji co icjanha ngain xan.

²⁶ Co jehe espíritu jianha mé coyao, co joincheguenda xan co joanca xan ngataha nontte iná co vaçhjexin de ngain xan. Cottimeja jehe xan ndavenhe xan nchin, hasta tsje chojni que te nttiha ndaço ixin ondavenhe xan.

²⁷ Pero Jesús tsehe rá xan co joinchengattjen xan co jehe xan vingattjen xan.

²⁸ Cottimeja Jesús conixin chojni que vacao joixinhi na ngain ná nchia. Co are jehó jehe conixin chojni que vacao, jehe na joanchiangui na ngain Jesús co ndaço na:

—¿Quedonda janha na ðhoha vengui na espíritu jianha yá?

²⁹ Co Jesús ndaço:

—Ixin espíritu inchin mé dengui ni jehó are nchecoanxinhí ni Dios co dintteçjáño ni saho.

*Jesús ndaço iná ixin jehe ndasenhe
(Mt. 17.22-23; Lc. 9.43-45)*

³⁰ Co are Jesús sacjoixin de nttiha conixin chojni que vacao, vatto na ngain regioen Galilea. Pero Jesús joinao que xonhi chojni conohe ttinó vehe Jesús,

³¹ para jehe vechonda tiempo para vacjagoe chojni que vacao. Co vandaço ngain na ixin chojni sinchechienhe na jehe, tti Xí que joixin de ngajni, para ngain chojni jianha, co icha chojni nasoexon na jehe. Pero ní nchanho después de ndasenhe, jehe rroxechon.

³² Pero chojni que vacao coixinha na tti ndaço Jesús ngain na, co xaoncoa na para joanchiangui na ngain Jesús ixin quehe rroço palabra mé.

*¿Quensen tti icha importante?
(Mt. 18.1-5; Lc. 9.46-48)*

³³ Cottimeja joihi na ngain rajna Capernaum co are ojoixinhi ngain nchia tti vintte na, Jesús joanchianguihi chojni que vacao co ndačo:

—¿Quehe tedanchianguihi chó ra are joihi na ngatja nttiha?

³⁴ Pero jehe na tencoa na ixin are jói na ngatja nttiha, joanchianguihi chó jecho na ixin quensen de jehe na tti icha importante.

³⁵ Cottimeja Jesús tavehe co nichjé tti tteyó chojni que vacao co ndačo ngain na:

—Si čhonja chojni rinao sehe tti icha importante, pero mé chonda que sehe tti icha importanteha co tti icha tsjenguijna cainxin icha chojni.

³⁶ Cottimeja Jesús tsehe rá ná chjan co sajoicao xan ngayé na, cottimeja cjóa xan co ndačo ngain na:

³⁷ —Chojni que sayé ná chjan inchin chjan jihi ixin ditticaon na janha, chojni mé jańá sayé na janha, co jeoha janha tti sayé na, cai sayé na tti rroanha na janha.

Chojni que ningacoanha na, chojni mé jí nganji na
(Lc. 9.49-50; Mt. 10.42)

³⁸ Cottimeja ndačo Juan ngain Jesús:

—Maestro, janha na vicon na ná xí que vanchegonda xa joachaxin de nombrea para vaguenguixin xa espíritu jianha, pero janha na ndattjan na xa ixin isincheha xa jańá ixin čjiha xa nganji na.

³⁹ Co Jesús ndačo:

—Cayacoenja ra chojni mé. Ixin cain chojni que nchehe milagro conixin joachaxin de nombrena, chojni mé čoha rronichja jianha de ixin janha.

⁴⁰ Ixin chojni que ningacoanha na, chojni mé ján rinao na.

⁴¹ Rrondattjo ra que Dios seguro tsenguehe hna cain chojni que rrochjá jaha ra masqui ná vaso de jinda jecho ixin jaha ra ditticaon ra ixin janha tti Cristo.

Tti sinchenchehe ni cosa jianha
(Mt. 18.6-9; Lc. 17.1-2)

⁴² Co Jesús ndačo cai:

—Quexeho chojni que sincheyehe iná chojni que xa antoha jian ditticaon na janha para sinchehe cosa jianha, icha jian sečhianito ná čochin ngain ttosin chojni mé para rroxincanjingui ndachaon.

⁴³ Co si ná rá sinttačaxaon para sinchehe jianha, ncheha cosa mé masqui hasta tončhinji rá. Ixin icha jian tsji conixin nacoa rá ngain Dios, co naha tsji conixin cayoxin rá ngain infierno tti čonhi tiempo nchao danga čohi.

⁴⁴ Co nttiha čonhi tiempo ditján cotsindo co čonhi tiempo danga čohi.

⁴⁵ Co si ná rottea sinttačaxaon para sinchehe jianha, ncheha cosa mé, masqui hasta tončhinji rottea. Ixin icha jian tsji conixin nacoa rottea ngain Dios co naha tsji conixin cayoxin rottea ngain infierno tti čonhi tiempo nchao danga čohi.

⁴⁶ Co nttiha čonhi tiempo ditján cotsindo, co čonhi tiempo danga čohi.

⁴⁷ Co si ná jmacon sinttačaxaon para sinchehe jianha, ncheha cosa mé, masqui hasta dantsjengui jmacon. Ixin icha jian tsji conixin nacoa jmacon ngain Dios co naha tsji conixin cayoxin jmacon ngain infierno,

⁴⁸ tti čonhi tiempo ditján cotsindo co čonhi tiempo danga čohi.

⁴⁹ Chojni čhé na xijntta ngain nntao que danjo na ngain Dios para nchejni na nntao icha. Co jai Dios čhé chojni cain cosa tangui para sicon si sachje na jian o ni nahi. Mexinxin cosa tangui inchin xijntta are saho ixin cosa tangui nchečhjojn chojni icha para ixin Dios.

⁵⁰ Xijntta jian, pero si xijntta rrocjan xijntta simple, chojni ičhoja sinchegonda xijntta iná. Mexinxin dintte ra chojni que ocojian, rrocho chojni que chonda xijntta. Co dintte ra čhjoin, co doñaoha chó ra, sino que rinao chó ra čhjoin.

10

Jesús ndačo de ixin xí que dachjendehe čhihi (Mt. 19.1-12; Lc. 16.18)

¹ Jesús vačhjaxin de ngain rajna Capernaum, co sacjoi para ngain regioen Judea co ngain región que jí toenixin río Jordán. Nttiha cjan xatte chojni ngain Jesús iná, co jehe joinchecoehne chojni nttiha inchin jehe vanchehe ngain cain lugar.

² Cottimeja conchienne canxion xifariseo ngain Jesús para rrojinchinichja xa Jesús ná cosa nchaoja para que nchao rrocjanguihi xa. Co joanchianguihi xa Jesús ixin anchao ná xí sačhjenjehe xa čhihi xa.

³ Cottimeja Jesús ndačo ngain xa:

—¿Quehe coetonha ley que vayé Moisés?

⁴ Cottimeja jehe xa ndačo xa:

—Ley ndačo ixin nchao para ná xí sinchexhjian xa ná xón dinhi acta para sačhjenjehe xa čhihi xa, co ndatsinttohe xa ncha.

⁵ Cottimeja ndačo Jesús ngain xa:

—Ley que vayé Moisés coetonha jańá ixin jaha ra atto cha ansean ra.

⁶ Pero are saho Dios joinchexhjian cainxin cosa; co ndačo ngain Palabré Dios janhi: “Dios joinchexhjian chojni xí co nčí.”

⁷ “Mexinxin xí dačhjenjehe xa ndodé xa co janné xa para decao xa jeho čhihi xa.

⁸ Co cayoxin chojni mé dintte na inchin nacoaxinxon chojni.” Jańá ijeha yó chojni, jeho nacoa chojni.

⁹ Mexinxin chojni čhoja santsjenjehe cosa que Dios joinchexhjian inchin nacoa.

¹⁰ Cottimeja are sacjan na ngain nchia, chojni que vacao Jesús joanchiangui na ngain jehe ixin cosa yá.

¹¹ Co Jesús ndačo ngain na:

—Si ná xí sačhjenjehe xa čhihi xa co secoa xa iná nčí, anto jianha sinchehe xí mé ngain čhihi xa nčisaho. Ixin rrocho que xí mé jicao xa yó nčí.

¹² Co si ná nčí sačhjenjehe ncha xixihi ncha co secoa ncha iná xí, cai nčí mé jianha sinchehe ncha ngain xixihi ncha xisaho. Ixin rrocho que nčí mé jicao ncha yó xí.

Jesús joinchenchaon xannchinnchinchjan (Mt. 19.13-15; Lc. 18.15-17)

¹³ Cottimeja joiaho na xannchinnchinchjenhe na ngain Jesús para catte xan conixin rá. Pero chojni que vacao Jesús joinchesattehe na cain chojni que joicao cain chjan mé.

¹⁴ Co are Jesús vicon yá, gońao co ndačo:

—Tančhanda ra xannchinnchinchjan tsí xan nganji; cayacoenha ra xan. Ixin tti tetonha Dios, nttiha para cain chojni inchin jehe xan.

15 Janha seguro rrondattjo ra que tti chojni que sitticaonha tti ttetonha Dios inchin ná xannchinchjan ditticaon xan tti ttetonhe xan nindoha xan, chojni mé xonhi tiempo rrochonda parte ngain tti ttetonha Dios.

16 Cottimeja Jesús cjóa xannchinnchinchjan mé, co vaquehe rá ngataha xan co joinchetsenhe ñao Dios ixin sinchenchaon xan.

Ná xanxí rico cjoao xan Jesús

(Mt. 19.16-30; Lc. 18.18-30)

17 Ná nchanho are Jesús sajittji ngatja nttiha, ná xanxí coinga xan jói xan vettoxin nntajochijhi xan ngain Jesús co ndačo xan:

—Maestro, soixin que anto jian, ¿quehe chonda que sinttaha janha para nchao rrochonda iná vida naroaxin que xonhi tiempo tsjexin?

18 Jesús ndačo:

—¿Quedonda ncheguinhí na janha jian? xonhi iná tti icha jian, jehó nacoaxinxon, co mé jehe Dios.

19 Jaha ochonxin tti coetonha Dios inchin: “Ncheyeha čhihi iná tattíta, dantsjeha vidé iná chojni, tteha cosé iná chojni, nichjaha cosa que ndoaha de iná chojni, ncheyeha icha chojni, co ttijho respeto ngain ndodá co ngain janná.”

20 Cottimeja xanxí mé ndačo xan:

—Maestro, cain yá ojointtaha de xa nčín na.

21 Are Jesús tsjehe, jehe joinao xanxí mé co ndačo ngain xan:

—Jehó nacoa cosa ditján sinchehe. Ttji co nchecji cainxin tti chonda co nchettonhe chojni noa tomí. Cottimeja nttiha ngajni jaha rrochonda cosa icha rentte. Cottimeja sihi co sacjin na tti janha sacji masqui anto tanguí tsonha hasta ndasenhe.

22 Pero are coinhi xan cain yá, anto vechín xan sacjoi xan ixin jehe xan anto rico vehe xan.

23 Cottimeja Jesús tsjehe ngayé chojni que vacao co ndačo ngain na:

—Atto tanguí para ná chojni que chonda anto tsje cosa rrochonda parte ngain tti ttetonha Dios.

24 Co chojni que vacao Jesús goan na admirado de ixin tti nichja Jesús. Pero Jesús cjan ndačo ngain na iná:

—Chojni que chonda confianza que ixin tomí tsjenguijna na, janto tanguí para jehe ná rrochonda na parte ngain tti ttetonha Dios!

25 Icha tanguiha sattoxinhí ná cocamello ná ttoechjenhe nttachiehe manta que para ná chojni rico rrochonda parte ngain tti ttetonha Dios.

26 Co are coinhi na yá, icha goan na admirado co joanchianguihi chó jehó na co ndačo na:

—¿Mexinxin quensen nchao rrochonda iná vida naroaxin remé?

27 Jesús tsjehe ngain na co ndačo:

—Chojni čhoja sinchehe jamé, pero Dios nchao sinchehe yá, ixin para Dios xonhi cosa tanguí.

28 Cottimeja Pedro ndačo ngain Jesús:

—Janha na cointtoa na cainxin tti vechonda na para čji na nganji soixin.

29 Jesús ndačo:

—Janha seguro rrondattjo ra ixin quexeho chojni que ttinttohe nchian-doha, o xanchó, o ndodé, o janné, o čhihi, o xenhe, o nonttehe de ixin causananxin janha co de ixin causexin joajna que danjo vida naroaxin,

30 chojni mé sayé cien nttiha icha tsje ngain tiempo jihi inchin nchiandoha, co xanchó, co ndodé, co janné, co xenhe, co nonttehe, masqui tsje chojni

rroningaconhe. Co ngain nchanho que tsí sayé vida naroaxin que xonhi tiempo tsjexin.

³¹ Pero tsje chojni que jai xaxaon na ixin anto importante na, are mé, xonhi tsorentte na. Co tsje chojni que jai xaxaon na ixin jehe na jeha importante na, pero are mé jehe na nisintte icha importante.

Jesús cjan ndacho iná ixin jehe ndasenhe
(Mt. 20.17-19; Lc. 18.31-34)

³² Jesús conixin tsje chojni que vacao tettji na ngatja nttiha para Jerusalén; Jesús jitaon nttiha, co chojni que vacao Jesús terroé na. Co jehe na anto tedoan na admirado, co terroé na pero conixin joaxaon. Co Jesús ngaria co vachjendacaho tti tteyó chojni que vacao de ngayé icha chojni para ndache na quehe tsonhe jehe.

³³ Co ndacho Jesús ngain na:

—Inchin jaha ra tedicon ra, jaxon satettjin na para Jerusalén. Nttiha janha, tti Xí que joixin de ngajni, sinchechienhe na na ngain xidána que ttetonha ngain icha xidána co ngain ximaestroe ley Israel, co nimé ni rrondatho que ixin janha nasexon na. Co sanjo na na janha ngain xí de ojé nontte,

³⁴ Co jehe xa tsjanao na xa janha, co rroxanguihna na cuarta de roa, co tsjatjo na xa nttatté xa co nasoenxon na xa. Pero ngain nchanho ninxin janha rroxechon na.

Tti joanchia Jacobo co Juan
(Mt. 20.20-28)

³⁵ Cottimeja Jacobo co Juan, cayoi xenhe Zebedeo, conchienenhe na ngain Jesús co ndacho na:

—Maestro, ná joatotsenhe ñaho na sanchia na nganji.

³⁶ Cottimeja Jesús ndacho:

—¿Quehe rinao ra?

³⁷ Co jehe na ndacho na:

—Nttatsanha ra ñao are soixin sayé joachaxin de tsetonha cainxin cosa, que janha na sintte na nganji, ná na lado jian, co ná na lado cjon.

³⁸ Cottimeja Jesús ndacho ngain na:

—Jaha ra noaha ra tti danchia ra. ¿Anchao tsonha ra tti anto tangui que janha tsonna, co anchao ndasenhe ra inchin janha ndasenhe na?

³⁹ Co jehe na ndacho na:

—Ján, nchao.

Co Jesús ndacho ngain na:

—Ján, ndoa, anto tangui tsonha ra, co senhe ra inchin janha senhe na.

⁴⁰ Pero jeha janha tti danjo joachaxin ixin quensen sehe lado jian na co quensen sehe lado cjon na. Jeho Ndodana tti danjo joachaxin mé ngain quexeho chojni que jehe ochonxin.

⁴¹ Are coinhi tti itte chojni que vacao Jesús ixin quehe joanchia Jacobo co Juan, anto goñao na nganji cayoi.

⁴² Pero Jesús nichjé na co ndacho ngain na:

—Jaha ra noha ra que cain xí que ttetonha ngain nación, ttetonha xa inchin rinao xa, co cain icha xí que chonda joachaxin nttiha anto ttetonha xa ngain chojni.

⁴³ Pero jeha jamé tsonhe ngayaha ra, sino que tti rinao icha tsetonha ngayaha ra, pero mé chonda que icha tsjenguijna icha chojni.

⁴⁴ Co quexeho de jaha ra xo rinao ra sintte ra icha importante, pero jehe mé cai chonda que sehe inchin esclavo para ngain icha chojni.

⁴⁵ Ixin janha, tti Xí que joixin de ngajni, joiha para que chojni sinchehe xana, sino que janha joihi para joicjenguijna chojni co para sanjo vidana para tsjenga hna tti teca tsje chojni.

Jesús joinchexingamehe Bartimeo, tti vaguiconha

(Mt. 20.29-34; Lc. 18.35-43)

⁴⁶ Cottimeja Jesús conixin chojni que vacao joihi na ngain ciudad de Jericó. Co are Jesús conixin chojni que vacao co anto tsje icha chojni vačhjegaxin na de ciudad mé, vicon na ngandehe nttiha tají ná xí vaganchiagaha ixin vaguiconha. Co tattíta mé vinhi Bartimeo, xenhe ná tti vinhi Timeo.

⁴⁷ Co are conohe que ochian jidiji Jesús que joixin Nazaret, jehe tti vaguiconha mé coexinhi ndačho sén:

—¡Jesús, tti razé David, ttiaconoana na janha!

⁴⁸ Anto tsje chojni joinchesattehe na ixin rrotenco, pero jehe ndačho icha sén:

—¡Soixin, razé David, ttiaconoana na janha!

⁴⁹ Cottimeja Jesús tavengattjen co ndačho:

—Dayehe ra xí yá.

Cottimeja jehe na vayé na xa co ndačho na:

—Taha joachjaon co dingattjen ixin Jesús jidayaha jaha.

⁵⁰ Cottimeja jehe tti vaguiconha mé nttihao vanca tti jitsá co vingattjen daca co conchienne ngain Jesús.

⁵¹ Cottimeja ndačho Jesús ngain:

—¿Quehe rinao sinttaha nganji?

Jehe tti vaguiconha ndačho:

—Maestro, janha rinaho sicon.

⁵² Co Jesús ndačho:

—Oxingamehe con ixin vitticaon nganji janha. Co onchao sattji nchiandoi.

Co rato mé jehe tti vaguiconha mé onchao vicon co rroé Jesús tti sacjoi Jesús.

11

Jesús joigaha ciudad de Jerusalén

(Mt. 21.1-11; Lc. 19.28-40; Jn. 12.12-19)

¹ Después joihi na ngandehe rajna Betfagé co rajna Betania que te chian Jerusalén co nttiha tavintte na rotté jnanchjan dinhi Nttaolivo. Nttiha Jesús coetonhe yó chojni que vacao jehe

² co ndačho ngain na:

—Ttji ra ngain rajnanchjan taha. Yá sinchí ra ná colochó jíchó co xa xonhi chojni diguetaha va. Tonxindanguehe ra va co sicó ra va.

³ Co si čhonja chojni sanchianguiha ra ixin quedonda jańá tenchehe ra, ndache ra na ixin ximaestroa ra rrongondehe xa va; cottimeja sicán ra va.

⁴ Cottimeja sacjoi cayoi chojni mé co vittja na colochó tajičhoa va ngain ná puerté nchia ngaxin nttiha, co conxindanguehe na va.

⁵ Co icaxin chojni que te nttiha ndačho na:

—¿Quehe tenchehe ra yá? ¿Quedonda tonxindanguehe ra colochó yá?

⁶ Co cayoi na ndačho na inchin ondačho Jesús ngain na. Co chojni que te nttiha coanhjanda na na sacjoi na conixin colochó.

⁷ Cottimeja joicao na colochó mé ngain Jesús co cjoanjihí na va tti tetsá na co Jesús vetaha va.

⁸ Co anto tsje chojni coingo na ngá nttiha tti tetsá na co icanxin na coingo na ramanchjenhe nttá para conchjian chaho tti coingachje colochöhe Jesús.

⁹ Co chojni que vitaonhe Jesús nttiha co chojni que rroé Jesús, cainxin na ndačo na sén:

—¡Gloria ngain Dios! Co anto jian tti joí conixin nombré Dios.

¹⁰ ¡Co anto jian tti siquetonha inchin coetonha David ndoguelitoa na xanchjen! ¡Gloria ngain Dios!

¹¹ Jañá joigaha Jesús ngain ciudad de Jerusalén co joixinhi nihngo icha importante nttiha. Co are joexin tsjehe Jesús cainxin cosa nttiha, sacjan Jesús para ngain rajna dinhi Betania conixin tti tteyó chojni que vacao, ixin ondacotsocjin.

Jesús nichja ngain nttahigo que xonhi ttochjoin jiyá
(Mt. 21.18-19)

¹² Nchanho yoxin are vathjexin na de Betania, Jesús venhe jintta.

¹³ Co de cjin viconxin Jesús ná nttahigo que jiyá ntta ca co Jesús joitsjehe ntta ixin ayá ntta ttohigo. Pero vittjaha Jesús ní ná tto ixin xa jeha tiempoe tto.

¹⁴ Cottimeja Jesús ndačo ngain nttahigo mé:

—Xonhi chojni rrocjan sine ttochjoian iná.

Co coinhi cain chojni que vacao Jesús.

Jesús joincheroa nihngo icha importante
(Mt. 21.12-17; Lc. 19.45-48; Jn. 2.13-22)

¹⁵ Cottimeja joí na Jerusalén iná. Co are Jesús joixinhi patioe nihngo icha importante, coexinhi joantsjexin de nttiha cain chojni que tenchecji co tettehna cosa nttiha. Jesús concjamangui mesé cain tti tedasinguixinhi icha chojni tomi para rrochondaxin na suelto, co concjamangui nttaxitaoen cain tti tenchecji conttoanajni.

¹⁶ Co ixonhi chojni coanchjanda Jesús para coattoa na patioe nihngo mé conixin cosé na.

¹⁷ Co Jesús joinchecoene na co ndačo ngain cain na:

—Jitaxin ngain Palabré Dios: “Nchiania sehe nchia para sinchecoanxinna na janha chojni de ngoixin mundo.” Pero jaha ra ndadinchchjian ra nchia ná lugar tti xatte tti chehe.

¹⁸ Co cain xidána que ttetonha ngain icha xidána co cain ximaestroe ley coinhi xa quehe ndačo Jesús, co joincheξoxinha xa. Mexinxin coexinhi xa cjoé xa queξén sinchehe xa para nasoenxon xa Jesús. Pero vaξaon xa ixin cainxin chojni tiempo mé joincheξoxinhi na cainxin tti cjoago Jesús.

¹⁹ Co are ondaconaxin xehe, Jesús sacjoixin de ngain ciudad mé.

Nttahigo que ndadixema
(Mt. 21.20-22)

²⁰ Co ndoexin dacao vatto na tti jí nttahigo que Jesús nichjé. Co vicon na ondadixema ngoixin ntta.

²¹ Cottimeja Pedro ξaxaon quehe ndačo Jesús co ndache Jesús:

—Maestro, tsjexin, nttahigo que nichjehe, ondadixema ntta.

²² Co Jesús ndačo:

—Ditticaon ra seguro ngain Dios.

²³ Co seguro rrondattjo ra ixin quexeho chojni que rrondache jna jimé: “Sattjixin de yá, co digaritsiahngui ndachaon”, co si chojni mé seguro ditticaon que Dios sinchehe jamé, seguro que jamé tsonhe.

²⁴ Mexinxin ndattjo ra que are sanchia ra ná cosa ngain Dios, ditticaon ra seguro que ovayehe ra co seguro jamé tsonhe.

²⁵ Co are tenchecoanxinhi ra Dios, si chonja chojni toñaohé ra, nchetjañehe ra. Jamé cai Ndodá ra que jí ngajni sinttatjañaha ra Ndo cain cosa jianha que nchehe ra.

²⁶ Pero si jaha ra sinchetjañehe ra chojni mé, cai Ndodá ra que jí ngajni choha sinttatjañaha ra Ndo cain cosa jianha que nchehe ra.

Tti joachaxin que chonda Jesús

(Mt. 21.23-27; Lc. 20.1-8)

²⁷ Cottimeja joiji na Jerusalén. Co cjoí na ngain nihngo icha importante. Co are Jesús tarridehe nttiha ngain nihngo, conchienne ngain Jesús canxion xidána que vaquetonha ngain icha xidána co canxion ximaestroé ley co icanxin xí que ttetonha ngain nihngo.

²⁸ Co ndačo xa ngain Jesús:

—¿Quehe joachaxin chonda jaha para nchehe cain cosa jihi? ¿Quensen chjá joachaxin jihi?

²⁹ Co Jesús ndačo:

—Cai janha sanchianguiha ra ná cosa, co si rrondachjenji ni ra tti janha sanchianguiha ra, cai janha rrondattjo ra quehe joachaxin nttaxin janha cain cosa jihi.

³⁰ Ndachjenji ni ra: ¿Quensen rroanha Juan para joincheguite chojni? ¿A Dios o ani chojni?

³¹ Cottimeja coexinhi xa joanchianguihi chó jehó xa co ndache chó xa:

—¿Quehe rrondačo na? Si rrondačo na ixin Dios rroanha, jehé rrondattjo na: “¿Quedonda vitticaonha ra tti ndačo Juan remé?”

³² ¿O apoco rrondačo na ixin chojni rroanha?

Ixin vařagoen na chojni ixin cainxin chojni vitticaon ixin Juan vanichja joajna que vagayé de ngain Dios.

³³ Mexinxin ndačo na ngain Jesús:

—Nonaha na.

Cottimeja ndačo Jesús ngain na:

—Mexinxin janha cai rrondattjoha ra quexehé joachaxin nttaxin cain cosa jihi.

12

Ejemplo ninchehe xa jianha

(Mt. 21.33-46; Lc. 20.9-19)

¹ Cottimeja Jesús coexinhi ndache na ixin ejemplo co ndačo:

—Vehe ná xí que cjoenga xa ná jnguí de nttauva co joinchexian xa cerco ngoixin ngandehé jnguí mé, co joinchexian xa ná lugar tti vagueninxin na ttouva, co joinchexian xa ná torre para vaguiconxin xa ngoixin ngataon jnguíhi xa.

‘Co después joanjo xa nttattochjoin media ngain canxion tti nchehe řa co jehé xa sacjoi xa cjin.

² Co are ojoí tiempoe cosecha, jehé xa rroanha xa ná ninchehe řé xa para joiganchia tti parte de cosecha que jiquininxin sayé tti xinajni mé.

³ Pero tti nicoá nttattochjoin media tse na tti nchehe řé xinajni mé, goen na co vengui na co řonhi chjé na.

⁴ Cottimeja xinajni mé rroanha xa iná tti nchehe řé xa, pero cai mé coaxin na řo, conchintaonhe na já co nichja na feo ngain.

⁵ Cottimeja rroanha xinajni mé iná tti nchehe Xé xa, pero mé nagoenxon na. Cottimeja xinajni mé rroanha xa tsje tti nchehe Xé xa, pero canxion na vicaon na co icanxin na nagoenxon na na.

⁶ Co jeho nacoa xenhe xa vechonda xa co anto vajinao xa xan co jeho xan mé vittohe ngain xa. Co rroanha xa xenhe xa mé cai íxin Xaxaon xa: “Chonda na que sicao na respeto ngain xanhna.”

⁷ Pero jehe tti nicoá nttattochjoin media cjoao na co ndačo na: “Jihi tti sayé ngoixin jngui jihi de herencia. Nadoenxon na co ján na ndasittoá na cain.”

⁸ Mexinxin tse na xan, co nagoenxon na xan co joantsjegaxin na cuerpoe xan de ngain jngui de nttauva.

⁹ Cottimeja Jesús ndačo:

—¿Quehe sinchehe xinajni mé? Tsí xa co nasoenxon xa jehe tti nicoá nttattochjoin media, co sanjo xa jnguihi xa ngain ojé chojni.

¹⁰ ¿Axa chonxinha ra tti ndačo ngain tti jitaxin Palabré Dios? Nttiha ndačo:

Tti xo que joinchegondaha xittette nchia, pero xo mé tti xo joiguehe icha importante.

¹¹ Co jihi joinchehe Dios, co para ixin ján na cosa jihi anto čhjoin.

¹² Cottimeja cain na joinao na rrotse na Jesús co rroquiaxinhi na, ixin jehe na nohe na que ejemplo jihi jinichja de ixin jehe na. Pero ixin vařagoen na cain chojni, mexinxin nttiha cointtohe na Jesús, co jehe na sacjoi na.

Tti rroxenga hna ngain impuesto

(Mt. 22.15-22; Lc. 20.20-26)

¹³ Cottimeja rroanha na ngain Jesús canxion xifariseo co icanxin chojni que vacao Herodes, para rojinchenichja na Jesús cosa ndoaha para nchao rocjanguihi na Jesús.

¹⁴ Co chojni mé joí na ngain Jesús co ndačo na:

—Maestro, janha na nona na que soixin nichja tti ndoa co ncheha caso tti ndačo icha chojni, ixin soixin ncheha juzgado chojni rico ojé que chojni noa, sino que nchecoehne jian cain chojni de ixin nttié Dios. Mexinxin ndachjenji ní ra: ¿Anchao jí tsjengá na hna impuesto ngain xiemperador o ni nahi? ¿Atsjengá na xa hna o ni tsjengaha na xa hna?

¹⁵ Pero Jesús oconohe de tti jianha que jehe xa teřaxaon xa, co Jesús ndačo ngain xa:

—¿Quedonda jaha ra rinao ra sincheyana ra? Sicohna ra ná tomi para janha sicon.

¹⁶ Co jehe na joicaohe na Jesús ná tomi co are vicon Jesús tomi mé, ndačo ngain na:

—¿Quensen con jinganito tomi jihi co quensen nombré jitaxin nganito nttihi?

Co jehe na ndačo na:

—Con xiemperador co nombré xa.

¹⁷ Cottimeja ndačo Jesús ngain na:

—Chjehe ra xiemperador tti jiquininxin xa co danjo ra ngain Dios tti jiquininxin sayé jehe.

Co goan na admirado ixin jañá čo Jesús.

Canxion chojni joanchiangui quexén rroxechon ni

(Mt. 22.23-33; Lc. 20.27-40)

18 Cottimeja cjoí canxion xisaduceo ngain Jesús. Xí mé vaguitticaon xa ixin cain tti ndadenhe irroxechonha. Co ndaço xa ngain Jesús:

19 —Maestro, Moisés diquinttoena na ná ley que ndaço: si ná xí ndasenne co tsinttohe xa çhihi xa, co çonhi chjan tsinttohe xa, mexinxin chonda que ná xanchó xa xanxí secoa nçhiganha mé para rrochonda na chjan para que xan mé sintte xan çá rrocji xenhe tti ndavenhe.

20 Nchao remé; vintte yáto xanxí chó xan. Xansaho vecao xan çhihi xan, pero ndavenhe xan co çonhi chjan cointtohe xan.

21 Co xanyoxin vecao xan jehe nçhiganha mé, pero cai ndavenhe xan co çonhi chjan cointtohe xan. Co çajeho conhe conixin xanninxin.

22 Co jamé tti yáto xanxí mé vinttecao xan jehó nçhiganha mé, co ni ná xan cointtoeha xan chjan hasta ndavenhe cain xan. Cottimeja ndavenhe nçhiganha mé cai.

23 Mexinxin are rroxechon na, co rrocjan sinttechon xan, ¿quexehe de tti yáto xan mé sehe mero xixihi jehe nçhí mé, ixin cain xan vinttecao xan nçhí mé?

24 Cottimeja Jesús ndaço:

—Jaha ra nchaoha jí tti tenichja ra ixin chonxinha ra tti jitaxin ngain Palabré Dios co chonxinha ra joachaxin que chonda Dios.

25 Are rroxechon cain chojni que ondavenhe, nttiha ni tsotteha na, ni sanjoha na xenhe na para tsottehe xan ixin sintte na inchin ángel que te noi.

26 Pero de tti jaha ra danchianguina ra de ixin tti chojni que ndadenhe, ¿atsjeha jaha ra libroe Moisés de ixin queçén Dios nichjé Moisés de ngagaha tti canchaha que jiche? Nttiha ndaço janhi: “Janha tti Dios de Abraham co Isaac co Jacob.”

27 Mexinxin Dios jeha Dios de nindadiguenhe, sino que Dios de chojni que techon, co para ixin Dios cainxin chojni techon na. Mexinxin jaha ra nchaoha jí tti tenichja ra.

Tti icha importante que ttetonha Dios

(Mt. 22.34-40)

28 Cottimeja ná ximaestroey ley que coinhi xa are Jesús cjoao xisaduceo ximaestro mé conchienne ngain Jesús. Co ixin joatsoan xa que ixin Jesús nchao ndajoinchetencoa xisaduceo, mexinxin joanchianguihi xa Jesús co ndaço xa:

—¿Quexehe tti icha importante que ttetonha Dios sinchehe ni?

29 Co Jesús ndaço:

—Tti icha importante de cainxin ndaço janhi: “Ttinhí ra jian jaha ra chojni Israel, nacoaxinxon Dios jí co jehó mé tti chonda cain joachaxin co jehó mé tti Dios de ján na.

30 Rinao ra Dios mé conixin ansean ra, conixin almá ra, conixin joarrixaoan ra co cainxin fuerza que jaha ra chonda ra.” Jihi tti mandamiento icha importante para sinchehe chojni.

31 Co iná mandamiento chian çajeho ixin ndaço: “Rinao ra cainxin chojni inchin rinao ra cuerpoa ra.” Co çonhi icha mandamiento icha importante para sinchehe chojni, jehó cayoi mandamiento yá.

32 Co ximaestroey ley ndaço xa:

—Ján, nchao tti ndaço, Maestro, ixin ján, ndoa tti ndaço. Jí jehó nacoaxinxon Dios co çonhi iná dios jí, jehó jehe.

33 Co para ná chojni rinao Dios conixin ansén, conixin cain joarrixaoen, conixin almé, co cainxin fuerza que chonda, co para rinao cainxin chojni

inchin jehe rinao cuerpoe; cain cosa jiji icha jian ndoa, que cain coxigo que tjaga ni ngataha xohi para ixin Dios, co icha jian que coxigo que doen ni para danjo ni ngain Dios.

³⁴ Are Jesús coinhi ixin cain tti ndačo xí mé nchao jí, jehe ndačo ngain xa:

—Jaha ochian rrihi para rrochonda parte ngain tti ttetonha Dios.

Cottimeja cain chojni ndaxaon na para joanchianguihi na Jesús icha cosa.

Tti dindačo David de ixin Jesucristo

(Mt. 22.41-46; Lc. 20.41-44)

³⁵ Ná nchanho are Jesús tajinchecoenhe chojni ngain nihngo icha importante, jehe ndačo:

—¿Quedonda ndačo ximaestroey ley ixin Cristo ná xanntí David?

³⁶ Ixin Espiritu Santo joinchenichja David co ndačo:

Tti Ttetonha cainxin cosa ndačo ngain tti Ttetonna janha:

“Darihi ngaca lado jian na

hasta janha sinttagacha jaha ngain cain tti ningaconha.”

³⁷ Pero ¿quexén que Cristo jehe ná xanttí David, si David mismo ndačo ixin Cristo tti Ttetonha ngain jehe?

Co tti tsje chojni que te nttiha anto ché na coinhi na cain tti nichja Jesús.

Jesús joinchesattehe ximaestroey ley

(Mt. 23.1-36; Lc. 11.37-54; 20.45-47)

³⁸ Co Jesús ndačo are jinchecoenhe na:

—Ttjiho ra cuidado de ncheha ra inchin nchehe ximaestroey ley ixin jehe xa nchexoxinhi xa chji xa conixin lonto icha jinjini, co rinao xa que chojni sanjo na joajna ngain xa conixin anto tsje respeto are ngain nttiha,

³⁹ co are ngaxinhi nihngo, jehe xa ttjé xa tti xintaon icha importante para dinttetaha xa, co are ttji xa dijine xa, jehe xa rinao xa tti icha jian lugar ngain mesa.

⁴⁰ Cai jehe xa dantsjehe xa nchiganha nchiandoha ncha ixin ittixinha ncha ttjenga ncha hna contribución. Co para xonhi chojni rroxaxaon ixin jehe xa jianha nchehe xa, jehe xa nchecoanxinhi xa Dios anto sé. Mexinxin cain ximaestro mé sayé xa anto soji castigo.

Tomi que joanjo ná nchiganha noa

(Lc. 21.1-4)

⁴¹ Ná nchanho Jesús tají ngaxinhi nihngo icha importante chian ngaca cain cajé alcancia. Tajitsjehe Jesús are chojni tettinttohe na tomi nttiha. Co tsje chojni rico cointtohe na anto tsje tomi.

⁴² Co are mé joí ná nchiganha co noa ncha, co cointtohe ncha ngain ná caja mé yó centavochjan que anto rentteha.

⁴³ Cottimeja Jesús vayé chojni que vacao co ndačo ngain na:

—Janha ndoa tti rrondattjo ra, que nchiganha noa jiji joanjo ncha icha tsje que cain chojni que tettenga tomi cain caja.

⁴⁴ Ixin cain chojni danjo na jecho tti xehe na. Pero nchí noa jiji vanjo ncha cain tomi que jehe ncha jichonda ncha.

13

Jesús ndačo ixin rroxantte nihngo icha importante

(Mt. 24.1-2; Lc. 21.5-6)

¹ Co are Jesús vachjexin de nihngo icha importante, ná de tti chojni que vacao ndačo ngain jehe:

—¡Maestro, tsjexin anto yeye xo tehe co anto yeye nchia co anto çhjoin diconchjian nchia!

² Co Jesús ndaço:

—¿Adicon cain nchia yeye yá? Pero yá sittoeha ni ná xo ngataha iná xo; cainxin rroxantte.

Quehe tsonhe icha saho que mundo ndatsjexin

(Mt. 24.3-28; Lc. 21.7-24; 17.22-24)

³ Cottimeja savinttecji na ngain jnanchjan que dinhi Nttaolivo, que jí chian de nihngo mé. Co are Jesús taji nttiha, Pedro, Jacobo, Juan, co Andrés ndaço na ngain Jesús:

⁴ —Rinaho na que rrondachjenji ni ra quesa tsonhe cain cosa yá. ¿Quehe señal sehe are cain cosa yá siconhe?

⁵ Cottimeja Jesús ndaço:

—Ttjiho ra cuidado que çonhi chojni sinttayaha ra.

⁶ Ixin anto tsje chojni tsí co sinchegonda na nombrena co rrondaço na: “Janha tti Cristo na”; co sincheyehe na tsje chojni.

⁷ Co are jaha ra tsinhi ra ixin jí guerra chian co cjin, jaha ra çaonha ra ixin jamé chonda que tsonhe. Pero ça jeha tiempo para ndatsjexin mundo.

⁸ Ixin ná nación tsetocaho iná nación. Co ná region tsetocaho iná región. Co tsingui nontte tsje lugar, co tsje chojni senxin jinta co chojni tsetocaho chó na. Are cain cosa jiji tsonhe nandá tsexinhi tsonhe tti anto tangui que tsonhe chojni.

⁹ Pero jaha ra ttjiho ra cuidado ixin rrotse ra na co sinttachianha ra na ngain xittetonha icha. Co soen ra na ngaxinhi nihngo. Co chonda que jaha ra tsonchienne ra ngain tsje xigobernador co tsje xirey de ixin causananxin janha. Cain jiji rrochondaxin ra oportunidad de rronichja ra ngain cain jeha xa de ixin janha.

¹⁰ Ixin icha saho que mundo ndatsjexin chonda que tsonohe chojni de cainxin nación ngoixin mundo tti joajna que danjo iná vida naroaxin.

¹¹ Co are rrotse ra na co sinttachianha ra na ngain xittetonha icha, taha ra joachjaon de ixin quehe rrondaço ra ngain xa, co ni çaxaonha ra de ixin mé. Jeho rrondaço ra tti Dios rrondattjo ra rato mé ixin jeha jaha ra tti rronichja ra, sino que Espíritu Santo tti sinttanichja ra.

¹² Co tsje chojni sinchechienne xanchó na ngá rá niningaconhe xan co rrondaço na para nasenxon xan. Co te nindoha çhjan que sinchechienne xenhe na ngá rá niningaconhe xan, co te çhjan que sinchechienne nindoha xan ngá rá niningaconhe na para que jeha na nasoenxon na na.

¹³ Co cainxin chojni rroningaconha ra de ixin causananxin na janha. Pero chojni que cainxin tiempo sitticaon jian nganji na janha, chojni mé rrochonda iná vida naroaxin.

¹⁴ Co profeta Daniel dicjin co ndaço de ixin ná cosa icha jianha de cainxin cosa co anto nchejianha icha cosa. Co are sicon ra cosa jianha mé ngain nihngo icha importante tti jiquininxinha sehe jeha mé —tti tsjehe çón jiji, chonda que tsinxin—, are mé chojni que te Judea chonda que satsinga na para ngagaha jna.

¹⁵ Co chojni que sintte ngataha techoe nchiandoha, are jeha sania, que sixinha ngaxinhi nchiandoha para sirroé cosé que jí ngaxinhi nchia co jaca satsinga.

¹⁶ Co chojni que sintte ngataon jngui, que rrocjanha ni para sirroé lonttoe ngain nchiandoha, sino que jaca satsinga.

17 ¡Anto tangui para ixin nchí que sintteyá chjan nchanho mé o nchí que rochonda chjan que xa tetai!

18 Nchetsenhe ra ñao Dios que jaha ra rrochondaha ra que satsinga ra mero ngain tiempoe quin

19 ixin ngain nchanho mé icha tangui tsonhe chojni, que xa xonhi tiempo tonhe jamé ni desde que Dios joinchechjian mundo, ni tsonhe después.

20 Co si Dios sinchenchinha tiempo mé, xonhi chojni rroxehhe. Pero Dios sinchenchin tiempo mé ixin jehe rinao chojni que coinchiehe.

21 'Co si chonja chojni rrondattjo ra: "Tsjexin ra nntihi jí Cristo", o "Tsjexin ra nojiha jí", pero jaha ra ditticaonha ra.

22 Ixin tsí anto tsje tti sincheyehe chojni ixin rrondačo na que jehe tti Cristo co rrondačo na ixin jehe na dayé na joajna de ngain Dios. Co sinchehe na tsje señal co milagro para sincheyehe na tsje chojni, co si nchao hasta tti chojni que Dios mismo coinchiehe, sincheyehe na.

23 Pero jaha ra xaxaon ra que ixin janha ondattjo ra jai cain de ixin nchanho mé.

Quexén tsí tti Xí que joixin de ngajni

(Mt. 24.29-35, 42-44; Lc. 21.25-36)

24 Co Jesús ndačo cai:

—Pero después de tiempo tangui mé, nchanho isinchegasanha, co conittjao isanjoha va chíxo.

25 Conotse sintttjixin va de ngajni, co hasta cain cosa que jí ngajni rroxanga.

26 Cotttimeja sicon na na janha, tti Xí que joixin de ngajni, sihi ngacjan ttjoi conixin anto tsje joachaxin co gloria.

27 Cotttimeja rrorroanha cain angelna para tsji sicjejo cain chojni que janha coinchiá de cainxin parte de ngoixin mundo co de ngajni.

28 'Tangui ra ejemploe nttahigo: Are xesan ramé ntta co činhi qué ntta, jaha ra onoha ra ixin ochian tsí tiempoe chin.

29 Co xajeho jamé cai, are jaha ra sicon ra tsonhe cain cosa yá, jaha ra noha ra ixin ochian sihi janha iná, ongandanguí puerta sihi.

30 Co seguro rrondattjo ra que cainxin cosa yá tsonhe icha saho que cain chojni de generaci3n jihi ndasenne.

31 Ngajni co nontte ndasitján, pero palabrana sitjanha; chonda que tsonhe cain tti janha ndačhjan.

32 'Pero nchanho co hora que tsonhe mé ni ná chojni noeha, ni cain ángel que te noi noeha, ni janha, tti Xenhe Dios, nonaha. Jeho Dios Nnodá na tti nohe.

33 'Mexinxin jaha ra dintte ra listo co nchecoanxinhi ra Dios, ixin noaha ra quesa tsí hora mé.

34 Jamé inchin ná xí que satsji cjin co tsinttohe xa nchiandoha xa. Pero icha saho que satsji xa, tetonhe xa cain ninchehe xé xa ixin sinttenda na jehe nchia mé. Co ndache xa cada na quehe xa sinchehe na, co ttetonha xa ngain xiportero ixin senda xa jian.

35 Mexinxin jaha ra dintte ra listo ixin jaha ra inchin tti nivittoenda nchia mé. Venoeha na quesa rrocjan xinajni na; ¿atsí xa are tsocjin, o atsí xa are tte, o tsí xa are ndoyo, o atsí xa are osingasán?

36 Co nchaoha si are sihi janha, jaha ra sintteha ra listo.

37 Tti ndattjo ra jeoha para ixin jaha ra, ndačhjan para ixin cainxin chojni: ¡Dintte ra listo!

14

Are vinttecjao na quexén sinchehe na para rrotse na Jesús
(Mt. 26.1-5; Lc. 22.1-2; Jn. 11.45-53)

¹ Vitján yó nchanho para tti quiai dinhi pascua are jine na niottja que chondaha levadura. Co are mé cain xidána que vaquetonha ngain icha xidána co cain ximaestroey ley cjoé xa quexén sinchehe xa para rrojinchehe xa Jesús co rrotse xa co nasoexon xa.

² Pero ndačo xa:

—Sonttoha na are mero quiai ixin cain chojni seguro tsoñaaoa na na co tsetocoho na na.

Nchí que cointtjitte aceite cuerpoe Jesús
(Mt. 26.6-13; Jn. 12.1-8)

³ Ná nchanho ngain rajna Betania Jesús tajine ngaxinhi nchiandoha Simón tti veninxin chin lepra. Co are jehe tají ngain mesa, joixinhi ná nchí que joicao ná xožo de marmol jíche de aceite que anto xajni que diconchjian joxon ca dinhi nardo co aceite mé anto rentte. Con dai ncha xo mé co cointtjitaha ncha cain aceite mé ngataha já Jesús.

⁴ Co canxion de tti nite nttiha goñao na co ndache chó na jecho na:

—¿Quedonda coxincoa aceite yá?

⁵ Nchao rrocchji aceite yá co anto tsje tomi rroguitte, inchin tsjexin dacha ná tti nchehe xa ngoixin ná nano. Co tomi mé nchao rrocjenguijna chojni noa.

Co joinchesattehe na tti nchí mé.

⁶ Pero Jesús ndačo ngain na:

—Tančhanda ra nchí yá. ¿Quedonda nchesattehe ra? Jehe ncha joinchehe ncha ná cosa jian nganji na janha.

⁷ Chojni noa cainxin tiempo sintte na ngayaha ra, co nchao tsjenguijna ra na are jaha ra sinao ra. Però janha cainxinha tiempo sarihi nganji ra.

⁸ Nchí jihí joinchehe ncha tti nchao conohe ncha joinchehe ncha. Ochjé ncha cuerpona aceite para rrožavá na.

⁹ Co seguro rrondattjo ra que ngoixin mundo tti rronichja na tti joajna que danjo iná vida nroaxin, cai rronichja na ixin quehe joinchehe nchí jihí nganji na janha, para rrožaxaon na de ixin jehe ncha.

Judas ndačo para rrotse na Jesús
(Mt. 26.14-16; Lc. 22.3-6)

¹⁰ Cottimeja Judas Iscariote, jehe ná de tti tteyó chojni que vacao Jesús, cjoí ngain canxion xidána que vaquetonha ngain icha xidána, para cjoao chó na quexén jehe Judas sanjo Jesús ngain xa.

¹¹ Co are jehe xa coinhi xa ixin quehe joindačo ngain xa anto ché xa, co ndačo xa ngain ixin sanjo xa tomi. Cottimeja Judas coexinhi xaxaon ixin quexén sinchehe para sinchechienhe Jesús ngain xa.

Are joincaho Jesús tti tteyó chojni que vacao
(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Ngain saho nchaoen quiai que jine na niottja que chondaha levadura, nchanho mé doen na coleco. Co chojni que vacao Jesús joanchianguihi na co ndačo na ngain:

—¿Ttinó rinao sinttachjianxin na tti sintte soixin ngain quiai pascua?

¹³ Cottimeja Jesús coetonhe yó chojni que vacao co ndačo ngain na:

—Ttji ra ngain ciudad de Jerusalén, co nttiha setan ra ná xí que jidicao ná nchíxa de jinda. Sattjiho ra xí mé.

¹⁴ Co tti nchia sixinhi xa, nttiha ndache ra tti ndoha mé: “Tti Maestro ndaço: ¿Ttinó jí cuarto tti sinexin ngain quiai pascua conixin cain chojni que dicao?” Jaña çhoache ra tti ndoha mé.

¹⁵ Cottimeja jehe tti ndoha mé tsjagoha ra ná cuarto jie ngain piso yoxin que onchao jí. Nttiha nchechjianxin ra tti sontte na.

¹⁶ Cottimeja cayoi chojni mé sacjoi na para ngain ciudad co vittja na cain inchin Jesús ndaço ngain na. Co nttiha joinchechjianxin na tti joine na ngain quiai pascua.

¹⁷ Co are ondaconttie Jesús co tti tteyó chojni que vacao çatte na para joinecaho na.

¹⁸ Co are tene na, Jesús ndaço ngain na:

—Janha seguro rrondattjo ra que ná de jaha ra ço tentte ra nganji na jaxon rrondache ra chojni queçén para rrotse na na janha.

¹⁹ Cottimeja cain jehe na tavinttechín na co coexinhi na joanchianguihi na Jesús ná na co ná na, co ndaço na:

—¿Apoco janha?

Co cai iná ndaço:

—¿Apoco janha?

²⁰ Co Jesús ndaço:

—Ná de tti tteyó jaha ra que tejintte ra ngain láto jihi conixin janha.

²¹ Janha, tti Xí que joixin de ngajni, chonda que ndasenne na inchin jitaxin ngain Palabré Dios, pero anto tangui tsonhe tti xí que rrondache chojni queçén para rrotse na na; ichta jian si jehe rrogoanha.

²² Co are tene na, Jesús cóá niottja co chjé gracias ngain Dios, cottimeja váña nio, co joanjo nio ngain cain na co ndaço:

—Jintte ra. Jihi rroçho cuerpona.

²³ Cottimeja cóá Jesús vaso co chjé gracias ngain Dios, co joanjo ngain na cai, co cain na vihi na nchinnchin.

²⁴ Co ndaço ngain na:

—Jihi rroçho jnina que nchese gurá tti trato naroaxin co sinttji jnina para tsjenguijna tsje chojni.

²⁵ Co seguro rrondattjo ra que janha isiha tti danjo ttouva hasta tsí tti nchanho que janha sihi tti vinó naroaxin ngain lugar tti ttetonha Dios.

*Jesús ndaço que Pedro rrondaço ixin jehe chonxinha Jesús
(Mt. 26.30-35; Lc. 22.31-34; Jn. 13.36-38)*

²⁶ Are vinttetsje na ná himno, cottimeja sacjoi na ngain jnanchjan que dinhi Nttaolivo.

²⁷ Cottimeja Jesús ndaço ngain na:

—Cain jaha ra sinttechinhi ra de ixin janha ngain ttie jihi, ixin jitaxin ngain Palabré Dios: “Janha, tti Dios, nasoenxon tti ttíngaria coleco, co cain coleco ndarrochjequé va.”

²⁸ Pero después que janha rroxechon na, cottimeja janha saho tsji Galilea que jaha ra.

²⁹ Cottimeja Pedro ndaço ngain Jesús:

—Masqui cain jehe na sinttechín na de ixin soixin, pero janha nahi.

³⁰ Cottimeja Jesús ndaço ngain:

—Janha seguro rrondattjo que ngain ttie jihi saho que conttaxichia rrotsje va yoxin nttiha, jaha orrondaço ninxin nttiha ixin chonxinha na janha.

³¹ Pero Pedro ʒa ndaʒo ngain Jesús:
—Masqui rrochonda que senhe na conixin jaha, pero janha rrondaʒjanha ixin chonxinha.
Cai cain ni icha ndaʒo na ʒajeho.

Jesús joinchetsenhe ñao Dios ngain Getsemani
(Mt. 26.36-46; Lc. 22.39-46)

³² Cottimeja joiji na ngain ná lugar dinhi Getsemani, co Jesús ndaʒo ngain na:

—Tadintte ra nttihi are janha sinttatsán ñao Dios.

³³ Co sajoicao jeho Pedro, Jacobo co Juan. Co Jesús coexinhi conohe ná joaʒaon anto soji co cai conohe anto jie joachjaon que joinchenihi ansén.

³⁴ Co ndaʒo ngain canio nijoicao:

—Janha tonona ngain ansenna ná joachjaon anto soji hasta rinaho ndasenhe na. Jaha ra dittoha ra nttihi, co dintteʒchinha ra.

³⁵ Cottimeja Jesús sacjoi nchion cjin de ngain na, co vejantaha ngataha nontte. Co joinchetsenhe ñao Dios que si nchao jehে rrogattoha ngain tiempo que jitonchian are jehে anto tanguí tsonhe.

³⁶ Co are jinchetsenhe ñao Dios, ndaʒo:

—Padre, soixin nchao nchehe cainxin cosa. Mexinxin si nchao, tanʒhándaha na janha satto ngain tti anto tanguí que tsonna. Pero tsoenha inchin janha rinaho, sino que tsonhe inchin soixin rinao.

³⁷ Cottimeja cjan Jesús ngain tti vittohe canio chojni que vacao, pero otatejoa canio na. Co ndaʒo ngain Simón Pedro:

—Simón, ¿aotarrichin? ¿Acoixianha tajoaritsjehe ni ná hora?

³⁸ Tadinttetsjehe ra co nchetsenhe ra ñao Dios para que ʒonhi cosa jianha sinttatjanji ra. Ndoa, espirítua ra anto rinao sintte jian, pero cuerpoa ra sojiha.

³⁹ Cottimeja cjan Jesús sacjoi para joinchetsenhe ñao Dios iná, co ndaʒo ʒajeho.

⁴⁰ Co are cjan joí ngain na jehে na otatejoa na iná ixin icoixinha con na de anto cottaʒhin. Co are xingamehe na ni inoenco na quehe rrondaʒo na ngain Jesús.

⁴¹ Cottimeja ninxin nttiha Jesús sacjoi para joinchetsenhe ñao Dios iná, co are cjan ngain na, ndaʒo:

—Janché dintteʒchin ra co nchejogaha ra ixin onchao; hora ojoi are janha, tti Xí que joixin de ngajni, chonda que tsonchian ngá rá chojni jianha.

⁴² Dingattjen ra, nttimé joí tti ndaʒo queʒén para rrotse na na janha.

Are tse na Jesús
(Mt. 26.47-56; Lc. 22.47-53; Jn. 18.2-11)

⁴³ Are Jesús ʒa jinichja ngain tti ní chojni mé, joí Judas, ná de tti tteyó chojni que vacao Jesús, co joicao Judas anto tsje xí que teyá espada co nttá. Xidána que vaquetonha ngain icha xidána, ximaestro e ley co xittetonha ngain nihngo, xí mé rroanha xa cain chojni mé.

⁴⁴ Judas, tti joindaʒo queʒén para tse na Jesús, odindaʒo ngain na ixin quexehe señal sinchehe ngain Jesús para jehে na nohe na quensen Jesús, co ndaʒo:

—Tti janha tsetoxin para rrochjaha joajna, jehে mé. Tse ra co sattjiho ra co ttjiho ra cuidado jian que satsingaha.

⁴⁵ Co are ojoi, jehে conchienhe ngain Jesús co ndaʒo:

—Maestro, Maestro.

Co coetoxin Jesús.

⁴⁶ Cottimeja tse na Jesús para sajoicao na.

⁴⁷ Pero ná de tti vintte nttiha joantsje espadé co cončinjihí na ndatsjoen ná xinchehe xé xidána icha importante.

⁴⁸ Cottimeja Jesús ndačo ngain cain chojni que jói:

—¿Quedonda jaha ra joihi ra conixin espada co nttá para rrotse ni ra janha como si janha rrocji ná tti chehe?

⁴⁹ Anto tsje nchanho joarihi janha ngayaha ra ngain nihngo icha importante para jointtacoanha ra, co xonhi tiempo tse ni ra. Pero janhi tsonhe, para tsonhe inchin jitaxin ngain Palabré Dios.

⁵⁰ Cottimeja cain chojni que vacao Jesús cointtohe na jeho, co jehe na sacoinga na.

Ná xanxí que sacoinga

⁵¹ Co cai nttiha ná xanxí vetsá xan jeho ná lonto roa. Co tse na xan.

⁵² Pero vachjenga xan lonto mé co sacoinga xan ttolocho xan.

Jesús ngain juzgadoe nihngo

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Cottimeja sajoicao na Jesús ngain xidána icha importante. Co xatte cainxin xidána que vaquetonha ngain icha xidána co cain xittetonha ngain nihngo, co cain ximaestroey ley.

⁵⁴ Co Pedro ta tti cjin jirroexin hasta joihi ngain patioe nchiandoha xidána icha importante, co nttiha tavehe xiXohe ngain Xohi, jehe conixin xipolicié nihngo icha importante.

⁵⁵ Cain xidána que vaquetonha ngain icha xidána, co cain xí que vechonda joachaxin ngain juzgadoe nihngo, cain xí mé cjoé xa queXén sinchecaxin xa Jesús para nasoexon xa Jesús. Pero čhoha vittjehe xa Jesús ni ná cosa jianha.

⁵⁶ Co tsje na joinchecaxin na Jesús, pero xonhi chojni nichja xajeho inchin nichja iná chojni para joinchese gurá chó na.

⁵⁷ Cottimeja canxion na vingattjen na co joinchecaxin na Jesús co ndačo na:

⁵⁸ —Janha na coian na ndačo xí yá ixin jehe tsonxantte nihngo icha importante jihí que dinchekhjian chojni, co nincoa nchanho jehe xa sinchekhjian xa iná nihngo que jaha chojni nchekhjian.

⁵⁹ Pero masqui ndačo na jañá, xa nichjaha na mero xajeho.

⁶⁰ Cottimeja xidána icha importante vingattjen xa ngayé cainxin na, co joanchiangui xa ngain Jesús co ndačo xa:

—¿Axonhi rrondačo jaha? ¿Quehe rročo cain tti jinichja chojni tehe de ixin jaha?

⁶¹ Pero Jesús xonhi nichja. Co jehe xa cjan xa joanchianguihi xa iná co ndačo xa:

—¿Ajaha tti Cristo, Xenhe Dios que anto jian?

⁶² Co Jesús ndačo:

—Ján, janha. Co sicon ni ra janha, tti Xí que joixin de ngajni, sarihi ngain lado jian de Dios, tti chonda cainxin joachaxin. Co cai sicon ni ra are rrocjan na sihi ngacjan ttjoi.

⁶³ Cottimeja jehe xidána icha importante mé goñao xa. Mexinxin coinchje xa lontoey xa, co ndačo xa:

—¿Quedonda tsjé na icha chojni de testigo?

⁶⁴ Jaha ra ocoinhi ra queXén nichja xa jianha de ixin Dios. ¿Quehe xaxaon ra?

Co cainxin na ndaŋho na ixin Jesús jiquininxin ndasenehe.

⁶⁵ Cottimeja canxion na coexinhi na cointtjitte na nttatté na, co coejehe na con Jesús, co ʒanguí na manazo, co ndache na:

—Si jaha ná profeta, ndaŋho quexehe tti goen.

Co cain xipolicíe nihngo icha importante cai xanguí xa Jesús manazo.

Pedro ndaŋho ixin jehe chonxinha Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Are Pedro tají nontte ngain patioe nchiandoha xidána icha importante, vatto ná nchimozé xidána mé.

⁶⁷ Co are vicon ncha Pedro tajixixohe ngandehe ʒohi, jehe ncha tavengat-tjen ncha, tsjehe ncha co ndaŋho ncha ngain:

—Jaha cai vacjiho Jesús, tti joixin de Nazaret.

⁶⁸ Co Pedro ndaŋho ixin ndoaha ngain ncha co ndaŋho:

—Janha chonxinha xí yá, ni nonaha de quehe rrinichja jaha.

Cottimeja sacjoi para ngain puerté patio mé. Co rato mé tsje ná conttaxichia.

⁶⁹ Co nchimoza mé cjan ncha vicon ncha iná, co coexinhi ndaŋho ncha ngain nite nttiha:

—Xí jiha ná xivacao Jesús.

⁷⁰ Pero Pedro cjan ndaŋho ixin ndoaha. Cottimeja icanxin nite nttiha ndaŋho na ngain Pedro:

—Jaha seguro ná chojni que vacao Jesús, ixin jaha cai joixin regioen Galilea. Co inghin nichja chojni de Galilea, jamé nichja jaha.

⁷¹ Cottimeja Pedro jeho joanchia ná castigo ngain Dios para ixin jehe ixin joinchejurá ngain Dios co ndaŋho:

—Janha chonxinha xí yá que jaha ra tendachjenji ni ra.

⁷² Co rato mé tsje conttaxichia yoxin nttiha. Cottimeja Pedro ʒaxaon tti ndaŋho Jesús: “Icha saho que conttaxichia rrotsje va yoxin nttiha, jaha orrondaŋho ninxin nttiha ixin chonxinha na janha.” Co are jehe ʒaxaon yá, jehe vehe tsjanga.

15

Jesús ngain Pilato

(Mt. 27.1-2, 11-14; Lc. 23.1-5; Jn. 18.28-38)

¹ Co are vingasán, ʒatte cain xidána que vaquetonha ngain icha xidána, co cain xittetonha ngain nihngo, co cain ximaestroé ley, co cain xivechonda joachaxin ngain juzgadoe nihngo. Co cainxin chojni mé coia na Jesús co joicao na ngain xigobernador Pilato.

² Cottimeja Pilato joanchianguihi Jesús, co ndaŋho:

—¿Ajaha tti Rey de chojni judío?

Co Jesús ndaŋho:

—Ján, jañá inchin jaha ndaŋho.

³ Co cain xidána que vaquetonha ngain icha dána cjoanguihi xa Jesús anto tsje cosa.

⁴ Cottimeja Pilato cjan joanchianguihi Jesús iná, co ndaŋho:

—¿Quedonda ʒonhi nichja jaha? Tsjexin quejanhi cosa tjanguiha na.

⁵ Pero Jesús ʒonhi ndaŋho. Co Pilato inoeha quehe rroʒaxaon de ixin jehe Jesús.

Are ndacho na ixin Jesús chonda que ndasenhe
(Mt. 27.15-31; Lc. 23.13-25; Jn. 18.38—19.16)

⁶ Co ngain cada quiai pascua, Pilato vechonda costumbre de vacançhjanda ná de tti teaxinhi. Quexeho de tti chojni que vaquinchiehe jehe na, Pilato vacançhjanda vagachje.

⁷ Co tiempo mé, veaxinhi ná tti vinhi Barrabás. Jehe co icanxin na vintteaxinhi ixin goen na canxion chojni are vaquetocaho na gobierno romano.

⁸ Co tsje chojni xatte co ndache na Pilato ixin tsançhjanda ná de tti teaxinhi, inchin vanchehe na cada quiai mé.

⁹ Co Pilato ndacho ngain na:

—¿Arinao ra tsançhjanda tti jaha ra ncheguini ra Rey de chojni judío?

¹⁰ Jañá cho ixin jehe ovenohe ixin xidána que vaquetonha ngain icha xidána conchjoehé xa ngain Jesús ixin jehe cainxin cosa jian vanchehe. Mexinxin joinchechienxin xa Jesús nttiha.

¹¹ Pero cain jehe xa ndache xa cain chojni ixin icha jian rrondaço na ixin sachje Barrabás.

¹² Cottimeja Pilato ndacho ngain na:

—¿Quehe rinao ra sinttaha janha ngain tti jaha ra ncheguini ra Rey de chojni judío?

¹³ Cottimeja cain jehe na coyao na, co ndaço na:

—¡Nchecrucificá!

¹⁴ Co Pilato ndacho ngain na:

—Pero ¿quedonda? ¿Quexehé cosa jianha joinchehe?

Pero cainxin na cjan na ndaço na sén:

—¡Nchecrucificá!

¹⁵ Co ixin Pilato joinao vittohe jian ngain chojni, mexinxin coançhjanda Barrabás sacjoi. Co are joexin coetonha para vicaon Jesús, cottimeja coançhjanda xisoldado para joinchecrucificá xa.

¹⁶ Cottimeja xisoldado sajoicao xa Jesús ngain patioe nchiandoha Pilato co nttiha vayé xa cainxin icha xisoldado cai.

¹⁷ Co coentsá xa Jesús ná lonto morado inchin lonto rey, co joinchecjinga xa Jesús ná corona de joxon nchaha.

¹⁸ Cottimeja coexinhi xa cjoanoa xa Jesús, co ndaço xa sén:

—¡Viva tti Rey de chojni judío!

¹⁹ Co xanguí xa nttá já Jesús, co cjoatjo xa nttatté xa, co vettoxin nttajochjiji xa ngain Jesús inchin rrojinchesayehe xa.

²⁰ Co are joexin joinchehe xa cain yá para cjoanoa xa Jesús, cottimeja joantsjehe xa tti lonto morado coentsá xa, co cjan xa joinchengá xa lonto Jesús. Cottimeja sajoicao xa Jesús para joinchecrucificá xa.

Are joinchecrucificá na Jesús
(Mt. 27.32-44; Lc. 23.26-43; Jn. 19.17-27)

²¹ Ná xí que vinhi Simón joixin ngain ciudad de Cirene. Co xí mé cjoí ndodé Alejandro co Rufo. Co are vatto nttiha, xisoldado joinchecame xa crué Jesús.

²² Joicao xa Jesús ngain ná lugar dinhi Gólgota, que mé rroço Lugué Nttalorójá Chojni.

²³ Co joanjo xa ngain Jesús vino que jittecjan ndé ná ca dinhi mirra ixin rroguíhi. Pero Jesús viha vino mé.

²⁴ Cottimeja joinchecrucificá na Jesús, co joantsje na suerte para chjeyehe na lonttoe Jesús.

²⁵ Las nueve ndoyo joinchecrucificá na Jesús.

²⁶ Co coentaxin na ná Xón ixin quedonda joinchecrucificá na, co Xón mé vetaxin: “Tti Rey de chojni judío.” Co coenganito na Xón mé já cruz.

²⁷ Co joinchecrucificá na yó tti chehe ngaca Jesús, ná vehe lado jian Jesús, co iná vehe lado cjon Jesús.

²⁸ Jañá conhe inchin jitaxin ngain Palabré Dios tti ndačo: “Nasoenxon na jehe inchin nadoenxon na chojni jianha.”

²⁹ Co cain nijoitsjehe ixin queXén jí Jesús nganito cruz coenttjoinga rroha na co cjoanoa na Jesús co ndačo na ngain:

—Jaha ndačo ixin sinchexante nihngo icha importante co nincoa nchanho otsjaha sinchexjian nihngo mé iná.

³⁰ Mexinxin jaxon daniaxin de nganito cruz yá jaho para senha.

³¹ Cai canxion xidána que vaquetonha ngain icha xidána, co ximaestroe ley cjoanoa xa Jesús, co ndache chó jeho xa:

—Jehe nchao cjoengujna icha chojni, pero čhoha tsjengujna cuerpoe jehe mismo.

³² Si jehe tti Cristo, Rey de chojni Israel, socon na saniixin jaxon de nganito cruz, cottimeja, ján, sotticaon na.

Co hasta cayoi tti xite nganito cruz nttiha cjoanoa xa Jesús.

Are ndavenhe Jesús

(Mt. 27.45-56; Lc. 23.44-49; Jn. 19.28-30)

³³ Are ngosine nchanho, ndaconaxin xehe ngoixin región mé, co cončjenhe tti naxin xehe mé hasta ní hora tsoctjin.

³⁴ Co hora mé Jesús coyao soji, co ndačo:

—Eloi, Eloi, ¿lama sabactani? —que rročo: Diona, Diona, ¿quedonda ndacointtona na janha?

³⁵ Co canxion nite nttiha coinhi na nichja Jesús pero coinxinha na quehe ndačo Jesús, co ndache chó na:

—Ttinhí ra, jidayé Elías.

³⁶ Cottimeja ná de jehe na coinga co coá ná cosa dinhi esponja. (Cosa mé datse jinda inchin chjon algodón.) Co jehe joinchetjao cosa mé conixin vino que anto san. Co coincjin ná nttá co tsín noi nganito cruz para Jesús rrocajindoe, co chojni mé ndačo ngain ni icha:

—Chonhe ra. Socon na aco tsí Elías para sinchegania.

³⁷ Cottimeja Jesús coyao soji, co ndavenhe.

³⁸ Co rato mé tti manta vettoa ngaxinhí nihngo icha importante vichjenga manta de noi hasta nontte.

³⁹ Co are xicapitán que jingattjen nttiha ngain Jesús vicon xa queXén coyao Jesús co queXén ndavenhe, ndačo xa:

—Seguro xí jihi Xenhe Dios.

⁴⁰ Co cai tsjehe canxion nčhí masqui de cjin. Co ngacjén cain nčhí mé, nttiha vehe Salomé co María Magdalena, co iná María tti cjoí janné José co Jacobo tti icha nčhín.

⁴¹ Icha saho are Jesús vehe ngain nonttehe Galilea, canio nčhí mé vangaria conixin jehe co vagayaconhe nča Jesús. Cai icha nčhí joí conixin Jesús ngain Jerusalén. Co are jehe nganito cruz, nttiha vinte cainxin nčhí mé cai.

*Are Jesús xavá**(Mt. 27.57-61; Lc. 23.50-56; Jn. 19.38-42)*

⁴² Omerocoa naxin xehe, co ixin nchanho mé víspera de tti nchanho para joinchejogaha na ngain quiai pascua, rroçho ixin nchanho are ndavênhe Jesús nchanho para joinchehjjan na cain tti joine na ndoexin are joinchejogaha na;

⁴³ mexinxin jaicoa joí ná tattíta vinhi José de rajna Arimatea. Jehe vechonda tsje joachaxin ngain juzgadoe nihngo Israel. Cai jehe anto joinao joí tti tiempo que Dios ttetonha. Co tattíta mé xañha joixinhi tti jí Pilato co joanchiehe cuerpoe Jesús.

⁴⁴ Pilato anto goan admirado ixin ondavenhe Jesús co rroanha xicapitán para joanchianguihi xa.

⁴⁵ Co are xicapitán ndaçho xa ixin ndoa ondavenhe Jesús, Pilato joanjo joachaxin para sajoicao José cuerpoe Jesús.

⁴⁶ Cottimeja José coehna ná manta fino, roa manta, co joinchegania cuerpoe Jesús co coensiha manta mé. Cottimeja coín cuerpoe Jesús ngain ná cueva naraixin que odingue na ngadoho ná ttjao nttiha, co coejé conixin ná xojie.

⁴⁷ María Magdalena co María janné José vicon na ttinó vittohe cuerpoe Jesús.

16*Are xechon Jesús**(Mt. 28.1-10; Lc. 24.1-12; Jn. 20.1-10)*

¹ Co are vatto nchanho para joinchejogaha na, Salomé co María Magdalena, co iná María janné Jacobo sajoicao na ná xñan que diquehna na co anto thjoin xajni xñan mé inchin perfume para rroçhé na cuerpoe Jesús.

² Co are çhinhi nchanho domingo, tti saho nchanho de semana, sacjoi na ngain tti vittohe cuerpoe Jesús.

³ Co ndache chó na ngatja nttiha:

—¿Pero quensen tsoxinca xojie que jijé cueva yá?

⁴ Pero are joihi na nttiha vicon na ixin tti xojie que vijé cueva icoha xojie nttiha, ojé jí xojie.

⁵ Co joixinhi na ngaxinhi cueva mé. Co nttiha vicon na ná xanxí tají xan lado jian, co lonttoe xan roa lontto, co hasta tti nonte jicaxin lontto. Co jehe na xñan na.

⁶ Co jehe xanxí mé ndaçho xan ngain na:

—Xañha ra. Onona ixin ttjé ra Jesús de Nazaret, tti joinchecrucificá na. Pero jehe oxechon co icoha nttihi. Tsjexin ra tti coín na cuerpoe.

⁷ Mexinxin ttji ra ngain chojni que vacao Jesús, co ngain Pedro cai, co ndache ra na: “Jesús icha saho tsji Galilea que jaha ra. Co nttiha siconxin ra jehe inchin jehe ndattjo ra.”

⁸ Cottimeja canio nçhí mé coinga nçha vaçhjexin nçha de cueva mé co vintteçanga nçha ixin anto vintteçañon nçha. Co xonhi chojni ndache nçha ixin vintteçañonco nçha.

*Are Jesús xago ngain María Magdalena**(Jn. 20.11-18)*

⁹ Co después que Jesús xechon ngain saho nchanho de semana, jehe xago ngain María Magdalena, tti vechonda yáto espíritu jianha hasta que Jesús joinchexingamehe sé tiempo icha saho.

¹⁰ Cottimeja jehe María mé sacjoi joidache cain nivacao Jesús ixin Jesús xechon. Jehe nivacao Jesús anto vinttechín na co vatsjanga na are mé ixin Jesús ndavenhe.

¹¹ Co are coinhi na tti ndaço María vitticaonha na palabré jehe.

Jesús xago ngain yó chojni que vacao

(Lc. 24.13-35)

¹² Co después de jihi, Jesús xago ngain yó de tti chojni que vacao are satettji na ngatja nttiha. Co cayoi chojni mé vicon na Jesús inchín ojé chojni.

¹³ Cottimeja are cayoi chojni mé vatsoan ixin jehe mé Jesús, cjan na co ndache na tti icha chojni que vacao Jesús, pero jehe na, ni icha, xa vitticaonha na.

Tti coetonhe Jesús nirepresentanté jehe

(Mt. 28.16-20; Lc. 24.36-49; Jn. 20.19-23)

¹⁴ Co icha después Jesús xago ngain cainxin tti ttejngo chojni que vacao are tatene na. Co joinchesattehe na ixin vitticaonha na co ixin cha ansén na ixin vitticaonha na tti ndaço chojni que vicon Jesús dixechon.

¹⁵ Cottimeja ndaço Jesús ngain na:

—Ttji ra ngoixin mundo co ndache ra cainxin chojni tti joajna que danjo iná vida naroaxin.

¹⁶ Chojni que sitticaon co siguitte, rrochonda iná vida naroaxin. Pero chojni que sitticaonha, mé Dios sinchecondená chojni mé.

¹⁷ Co janhi sinchehe chojni que sitticaon na janha: Jehe sinchegonda joachaxin de nombrena para senguixin espíritu jianha, co rronichja ojé idioma que ni jehe tsinxinha.

¹⁸ Si rrotse ná conché, xonhi tsonhe masqui conché mé sinehe va jehe. Co si sihi ná cosa que ndadoen chojni, pero jehe xonhi tsonhe. Co saquehe rá ngataha chojni nihi co sinchetsenhe ñao Dios conixin joachaxin de nombrena co jehe tti nihi rroxingamehe.

Are Jesús sacojín para ngajni

(Lc. 24.50-53)

¹⁹ Co are Jesús, tti chonda cain joachaxin, joexin ndaço cain cosa yá ngain na, jehe sacojín para ngajni, co joiguehe ngain Dios lado jian.

²⁰ Co chojni Jesús sacjoi na cainxin lugar co ndache na chojni joajna que danjo iná vida naroaxin. Co jehe Jesús vacjenguijna na ngoixin tti vacji na. Co cai jehe vanchesegurá cain tti vandaço na ixin chjé na joachaxin para vanchehe na señal de milagro. Amén.

Tti Jian Joajné Jesucristo Que Dicjin Lucas

Quedonda Lucas dicjin joajna jiji

¹ Tsje chojni cjin historié Jesucristo inchin jehe conhe co jehe joinchehe ngataha nontte jiji.

² Jehe na cjin na inchin joincheoanna na tti chojni que vicon cain tti joinchehe Jesús desde are nacoexinxon co cjoengujna na Jesús para ndache na chojni tti jian joajna que joixin de ngain Dios.

³ Janha cai joanchiangui jian de ixin cain tti joinchehe Jesús desde coexinxin xé, co janha xaxanho que jian jí para que janha rrocjin na cain cosa jiji inchin conhe para ixin jaha Teófilo, ixin jaha tti compañerona que anto jian,

⁴ para que jaha jian rrochonxin tti ndoa que jointtacoanha jehe na.

Ná ángel de Dios joindačo ixin tsoncjiji Juan, tti vancheguitte chojni

⁵ Are Herodes vehe rey de ngain Judea, are mé vehe ná xidána que vinhi Zacarías. Jehe vehe ngain grupoe xidána que vinhi Abías. Co čihi Zacarías vinhi ncha Elisabet. Co cayoi jehe na cjoí na de razé Aarón, tti cjoí saho xidána.

⁶ Jehe Zacarías conixin čihi, Dios ndačo ixin jian na co jehe na vaguitticaon na cain tti coetonha Dios co jańá xonhi chojni vanichja que ixin jehe na jianha vanchehe na.

⁷ Pero jehe na xonhi chjan vinttechonda na, ixin Elisabet deporsín xonhi chjan vancheconcjiji, co cayoi jehe na anto ojonchjan vintte na.

⁸ Ngain ná tiempo grupoe Zacarías joinchehe tocado joinchehe xa de dána ngaxinhi ningoe Dios,

⁹ ixin jamé costumbre vinttechonda cain xidána ngain tiempo mé, mexinxin ngain sorteo vittotaon Zacarías para que jehe joixinhi ngaxinhi ningoe Dios para joicjaga tsjoca.

¹⁰ Ngoi rato que jiche tsjoca ngaxinhi nihngo, ndoja cain chojni joincheoanxinhi na Dios.

¹¹ Co ngain rato mé Zacarías vicon ná ángel de Dios tajingattjen lado jian de ngain altar tti jichexin tsjoca.

¹² Are jehe vicon ángel mé, jehe ni inoeha quehe sinchehe ixin anto xaon.

¹³ Pero ángel mé ndačo ngain Zacarías:

—Zacarías xaonha, ixin Dios coinhi tti jaha joinchetsenhe ñao, mexinxin čiha Elisabet sincheconcjiji ná chjan que jaha sincheguini xan Juan.

¹⁴ Co jaha anto rrochaha co anto chjoin sarihi ngain vidá, co tsje chojni roché na ixin tsoncjiji chjan mé.

¹⁵ Ixin xanha mé sehe xan xí importante para ixin Dios. Chjan mé siha xan vino ni cosa que coanxin chojni, co rrochonda xan anto tsje joachaxín Espíritu Santo desde icha saho que tsoncjiji xan.

¹⁶ Co de ixin tti jehe xan sinchehe xan, tsje chojni de ngain nación Israel rrocjan na sinchesayehe na Dios de jehe na tti chonda cain joachaxin.

¹⁷ Jehe Juan jiji tti saho tsí que Cristo, co rrochonda xajeho espíritu co xajeho joachaxin que vechonda profeta Elías, para rrochache chojni quexén jehe na sinao na xenhe na, co para que tti chojni que ditticaonha Dios tsangui na sitticaon na Dios. Jamé para que chojni nchao sayé na Cristo are jehe tsí.

18 Zacarías joanchiangui ngain ángel mé co ndacho:

—¿Queñen rrochondaxin seguro janha de ixin jihi? Ixin janha atto dachi na co cai chihna.

19 Angel mé ndacho:

—Janha Gabriel na, co rrinttaha cain tti ttonha Dios. Jehe tti coetonna para joindattjo tti jian joajna jihi.

20 Pero jai ixin jaha vitticaonha tti janha ndattjo, jaha tsottapo; choha rronichja hasta que tsonciji xanha. Co jihi siconhe ngain mero tiempoe.

21 Co ngoi rato mé, cain chojni nttiha techonhe na jehe Zacarías ndoja, co vinttegoan na admirado ixin Zacarías anto conchjenhe ngaxinhi nihngo.

22 Co are jehe vache, ichoha nichja ngain na; cottimeja xaxaon na que Dios cjoagoe ná cosa ngaxinhi ningoe Dios. Co jehe nichja ngain na conixin joxon seña ixin ndacottapo.

23 Are joexin cain nchanho de xé Zacarías ngain nihngo icha importante, Zacarías sacjoi para nchiandoha.

24 Después de cain yá, chihi jehe Zacarías oveyá ncha chjan, co de jamé vehe ncha, ivachjexinha ncha de nchiandoha ncha naho conittjao, co xaxaon ncha:

25 “Dios joanjo joachaxin para que janha rriyá chjan jai para que chojni itsjanoha na na.”

Ná ángel joindacho ixin tsonciji Jesús

26 Vittjaxon incjaon conittjao, Dios rroanha jehe ángel Gabriel ngain regioen Galilea ngain ná rajna que dinhi Nazaret,

27 para joitsjehe ná xannchi que vinhi María. Xannchi mé virgen xan co ovechonda xan compromiso de rrocottehe xan ná xí que vinhi José, raze rey David.

28 Angel mé joixinhi tti nchia que jixinhi xannchi mé, co ndacho ngain xan:

—¡Janha joichjaha joajna jaha ixin Dios anto rinao jaha! Dios jí nganji jaha; Dios icha joittanchaon jaha de cainxin nchi.

29 Pero are xannchi mé vicon xan jehe ángel mé co coinhi xan tti nichja ángel mé, jehe xan goan xan admirado co inoeha xan ixin quedonda jamé ndacho ángel ngain xan.

30 Cottimeja ángel mé ndacho:

—María, xaonha, ixin Dios anto rinao jaha.

31 Jai jaha sariyaha ná chjan co are osincheconcijihi xan, jaha sincheguinh xan JESÚS.

32 Chjan mé anto importante sehe xan ngain Dios, co sinhi xan Xenhe Dios que ttjen ngajni, co jehe Dios rrochjé xan joachaxin de sehe xan rey inchin ndogelitoe xan xanchjen que vinhi David are saho.

33 Jamé para que jehe xan tsetonha xan ngain nación Israel para cainxin tiempo, co tti jehe xan tsetonha xan xonhi tiempo tsjexin.

34 Cottimeja María joanchiangui ngain ángel mé co ndacho:

—¿Queñen tsonhe jihi, ixin janha xonhi xí rriquinha?

35 Angel ndacho ngain María:

—Espíritu Santo tsí nganji jaha co joachaxin Dios que ttjen ngajni sisian-danji jaha inchin ná ttjoi. Mexinxin tti chjan que jaha sincheconcijihi, sehe xan jian ngattoxon con Dios co sinhi xan Xenhe Dios.

36 Cai n̄hiprimá, Elisabet, sincheconcjihí n̄ha ná chjan cai masqui onachichjan n̄ha, mexinxin tti n̄hí que ndācho chojni que čhoha ncheconcjihí chjan, jai jehe n̄ha ochonda n̄ha incjaon conittjao que jiyá n̄ha xenhe n̄ha.

37 Para ixin Dios xonhi cosa tangui.

38 Cottimeja María ndācho:

—Janha ditticanho cainxin tti ttetonha Dios; co mexinxin Dios nchao sinchehe nganji na janha inchin jaha ndachjenji na.

Conixin jecho yá, ángel mé sacjoi.

María cjoí joitsjehe Elisabet

39 Ngain tiempo mé María toin cjoí joitsjehe jehe Elisabet que vehe ngain ná rajna ngagaha jna ngain nonttehe Judea.

40 Co are María joiji nttiha jehe joixinhi nchiandoha Zacarías co chjé joajna jehe Elisabet.

41 Are Elisabet coinhi joajné María, chjan que veyá Elisabet coingui xan ngaxinhi tsehe, co ngain rato mé Espíritu Santo joí conixin anto tsje joachaxin ngain jehe Elisabet.

42 Cottimeja Elisabet ndācho sén ngain María:

—Dios jointtanchaon jaha icha que cainxin n̄hí, co joinchenaon xanha que rriyaha.

43 ¿Quensen na janha para que joitsjena jaha janné tti Dios que chonda cain joachaxin nganji na janha?

44 Ixin are janha coian joajná jaha, xanhna que rriyá, coingui xan ngaxinhi tsehe na ixin ché xan.

45 Anto čhjoin para ixin jaha ixin vitticaon ixin siconha inchin ndācho Dios.

46 Cottimeja ndācho María:

Almana nchecoanxinhi Dios.

47 Co ansenna ché ngain Dios, tti chjana vida naroaxin.

48 Ixin Dios xaxaon de ixin janha, tti rrihi inchin ná ninchehe x̄a para ixin jehe,

co jai pa ndaha chojni rrondācho na ixin anto čhjoin vidana.

49 Ixin Dios, tti chonda cain joachaxin, jian nganji na janha;

tsosayehe nombré jehe.

50 Jehe cainxin tiempo tsiaconoehe cain chojni que x̄aon ngain jehe.

51 Jehe joinchehe cosa anto importante;

co joacha ngain tti chojni que tonohé orgulloso ngain ansén.

52 Tti chojni que chonda tsje joachaxin jehe joinchenontte de ngain joachaxin,

co tti chojni que x̄onhi joachaxin chonda, jehe Dios chjé na importancia.

53 Tti chojni noa jehe chjé na cosa jian,

co tti chojni rico jehe cointtohe na te x̄oaxon rá na.

54 Jehe cjoenguijna nación Israel ixin mé ninchehe x̄é jehe;

jehe tjañeha de ttiaconoehe chojni mé,

55 ixin jamé ndācho jehe ngain ndogelitoa na x̄anchjen Abraham conixin cain xenhe ndo para cainxin tiempo.

56 Co nttiha tavehe María ngain Elisabet inchin ní conittjao, cottimeja sacjan para nchiandoha.

Are concjihí Juan, tti vancheguitte chojni

57 Después ovittja tiempo que Elisabet chonda que joincheconcjihi chjan, co jehe joincheconcjihi ná xanxí.

58 Cain nivecinoe co nifamilié cjoí na joichjé na joajna ixin conohe na que Dios anto jian ngain Elisabet.

59 Vittja jni nchanho, joichjé na xanxichjan mé tti xohe que dinhi circuncisión, co joinao na rroguinhi xan Zacarías inchin vinhi ndodé xan.

60 Pero janné xan ndačho jan:

—Nahi. Xanhna chonda que sinhi xan Juan.

61 Co jehe na ndačhao na ngain Elisabet:

—¿Quedonda? Xonhi nindoí dinhi jañá.

62 Cottimeja joanchiangui na conixin seña ngain ndodé xanxichjan mé para conohe na que xén rinao jehe ndo sinhi xan.

63 Jehe ndodé xan joanchia ndo rioho tabla para coentaxin ndo, co nttiha jehe ndo cjin ndo: “Jehe xan sinhi xan Juan.” Co cainxin nite nttiha vinttegoan na admirado de ixin nombre yá.

64 Ngain rato mé Zacarías cjan nichja iná, co coexinhi joinchecoanxinhi Dios.

65 Conixin jihi, cain nivecinoe vinttegoan na admirado, co ngoixin región mé de ngagaha jna de Judea vaquequin chojni de ixin quehe conhe.

66 Cain chojni que vaconohe jihi, va xaxaon na ixin quedonda jañá conhe co vajanchianguihi chó na co vandačo na:

—¿Quehe siguehe chjan yá?

Ixin ndoa Dios joinchenchaon xan.

Tti joinchecoanxin Zacarías

67 Espíritu Santo joí conixin joachaxin ngain Zacarías, ndodé xanxichjan mé, co Zacarías nichja tti palabra que Dios joanjo ngain co ndačo:

68 Cainxin chojni jiquininxin sinchecoanxinhi na Dios de Israel, tti chonda cain joachaxin,

ixin jehe joí nganji na ján na xo chojni jehe co joichjá na iná vida naroa.

69 Jehe chjá na ná chojni que chonda tsje joachaxin que danjo iná vida naroa, co chojni jihi joixin de ngayé razé David, tti cjoí jian ninchehe xa para ixin Dios.

70 Ixin Dios jehe jañá ndačo ngain profeta, co jehe profeta joindačo nganji ján na, desde ngain tiempo are saho:

71 que ixin Dios tsjenguijna na para ngain chojni que ningacoan na co ngain chojni que rinaoha na,

72 co joindačo profeta cai ixin Dios coiaconoehe nindogelitoa na xančhjen, co ixin jehe Dios xonhi tiempo rrotjañehe tti trato jian que jehe joinchchjan ngain na.

73 Janhi tti ndačo Dios conixin juramento que sinchehe ngain ndogelitoa na xančhjen Abraham:

74 que ixin jehe tsančhjangaha na ján na para ngain tti chojni que ningacoan na,

para que rroxaonha na sinttosayehe na jehe,

75 co sontte na chojni jian para sontte na chojni Dios cainxin nchanho que ján na sonttechon na.

76 Co jaha, xanxichjanhna, jaha sinhi profeté Dios que ttjen ngajni, ixin jaha tti tsji icha saho que Cristo para rrondache chojni que xén tsentoxinhi na vidé na, jamé jaha sinchchchjan ná nttiha nao para ixin Cristo.

⁷⁷ Co jaha tti sinchenohe chojni Israel que tti jianha que jehe na tenchehe na nchao sitjañehe na,

co jamé Dios nchao rrochjé na iná vida naraa.

⁷⁸ Ixin Dios de ján na, jehe anto rinao na co anto ttiaconoá na,

co jehe rroanha tti joadingasán de ngajni para sinchegasenhe cain chojni;

⁷⁹ para que sinchengasenhe tti chojni que te ngain tti naxin xehe ixin chojni mé rrocho que jehe na ondavenhe na,

co para que tsjagoa na queñén sonao na cain chojni.

⁸⁰ Co xanxichjan mé vangui xan co cada nchanho icha cosoji xan de ngain Espíritu Santo. Co cainxin tiempo mé jehe xan vehe xan ngagaha jna tti ñonhi chojni jí hasta que jehe xan coexinhi xan joinchecoehne xan chojni Israel.

2

Are concjiji Jesús

(Mt. 1.18-25)

¹ Chiaon tiempo are concjiji Juan, ximpérador vinhi Augusto César, co jehe xa coetonha xa que cjoinhi ná censo para vinttetaxin cainxin chojni de ngoixin nonttehe chojni romano.

² Jihi tti saho censo que cjoinhi are Cirenio vehe gobernador ngain Siria.

³ Cainxin chojni que vintteha ngain rajné chonda que cjoí na ngain rajné na para vinttetaxin na.

⁴ Mexinxin José vaçhixin de rajna Nazaret ngain regioen Galilea, co sacjoi para ngain regioen Judea ngain rajna Belén, tti diconcixin David, ixin José razé David.

⁵ José cjoí para Belén para joiguetaxin jehe conixin María, tti ovehe de novia ngain José para tsothehe. Co are mé María oveyá chjan.

⁶ Co are jehe na nttiha ngain Belén, ovittja tiempo que María sincheconcjiji chjan mé.

⁷ Nttiha joincheconcixin María tti saho xenhe, co jehe coensiha xan lonttochjenhe xan, co coenjoa xan nttiha ngá tti cajón que jinea coxintá ixin ñonhi cuarto vittja na ngain ni ná mesón nttiha.

Are ángel joinchenohe tti tettingaria coleco

⁸ Nttiha chian rajna Belén canxion xí que vaquingaria coleco vitttoecaho xa colecoe xa nttiha ngataon jngui ngain ttie mé.

⁹ Co de repente jehe xa vicon xa joí ná ángel de Dios ngain xa, co chíxo de Dios que jehe joiaho joinchengasán ngoixin ngandanji xa; co jehe xa anto vintteñaon xa.

¹⁰ Pero ángel mé ndacho ngain xa:

—Ñaonha ra ixin janha joiquian ná jian joajna nganji ra, que are tsinhi icha chojni anto rroché na cainxin na.

¹¹ Co mé rrocho ixin jai ngain rajné David concjiji ná tti rrochjá ra iná vida naraoxin, co jehe mé CRISTO, tti chonda cainxin joachaxin.

¹² Co jihi ná señal para que jaha ra sigatsoan ra chjan mé: jaha ra sinchí ra chjan jihi jisía xan lonttochjenhe xan co tajijoa xan ngá cajón tti jinea coxintá.

¹³ Co ngain rato mé, nttiha ngaca ángel mé cononxin anto tsje icha ángel que joixin de ngajni, co tenchecoanxinhi Dios tendacho:

¹⁴ ¡Nttosayehe na Dios que ttjen ngajni,

co ngataha nontte cain tti chojni que jehe Dios coinchiehe, que jehe na sinao chó na!

¹⁵ Cottimeja are cain ángel mé sacjoi para ngajni, jehe nitettingaria coleco ndache chó na:

—Chjin na para Belén, ditsjehe na tti conhe jihi, tti joindattjo na Dios.

¹⁶ Toin vinttecji na ndoa co nntiha vittjaxin na María co José, co vintteguicon na xannchinchjan tajijoa xa ngá cájón tti jinea coxinttá.

¹⁷ Are jehe na vintteguicon na xannchinchjan, jehe na coequin na cain tti ndačo ángel ngain na de ixin jehe chjan mé.

¹⁸ Co cainxin chojni que coinhi tti jehe na ndačo na vinttegoan chojni mé admirado.

¹⁹ Pero María cain cosa jihi coenchjinha ngain ansén, co anto vařaxaon de ixin cain cosa jihi.

²⁰ Jehe nitettingaria coleco sacjan na tti cointtohe na coe na, co joinchecoanxinhi na co joinchesayehe na Dios de ixin tti coinhi na de ngain ángel co ixin vicon na xannchinchjan jamé inchin ndačo ángel ngain na.

Are María co José joinchечienhe na Jesús ngain nihngo icha importante

²¹ Are vittja Jesús jni nchanho de concjihi, chjé na tti řohe que dinhi circuncisión co joincheguinihi na JESÚS, jamé inchin coetonha ángel ngain María icha saho que rroguéyá chjan mé.

²² Co are xette nchanho para María cosoji inchin ttetonha ley que vaye Moisés, jehe co José sajoicao na xanxichjan mé ngain nihngo icha importante que jí ngain ciudad de Jerusalén para coequinixin na xan ngain Dios.

²³ Jehe na joinchehe na jañá ixin ngain ley de Dios jitaxin: “Xanxí que saho sincheconcjihi ná nřhí, xan mé para ixin Dios.”

²⁴ Mexinxin María co José vinttecji na ngain nihngo icha importante para joicán na ngain altar inchin ttetonha ley de Dios; nntaohé yó coquín o yó coxentta.

²⁵ Ngain tiempo mé nntiha Jerusalén vehe ná xí que vinhi Simeón. Mé vehe ná xí anto jian de ngain ansén, co jehe vanchesayehe Dios, co vachonhe tti nchanho are Dios tsjenguijna chojni ngain nación Israel sacha na ngain chojni romano. Espíritu Santo vehe ngain Simeón,

²⁶ co Espíritu Santo mé joinchenohe que jehe Simeón senha hasta que jehe sicon Cristo tsí, tti rrorroanha Dios.

²⁷ Jehe Simeón jihi cjoi ngain nihngo mé ixin jamé coetonha Espíritu Santo. Co are María co José joijicaho na Jesús nntiha para joinchehe na inchin ttetonha ley de Dios,

²⁸ are mé Simeón cjóa xanxichjan Jesús ngá rá co joinchecoanxinhi Dios co ndačo:

²⁹ Janché, soixin onchao tančhjanda na senhe na, ixin janché ovicon janha tti soixin ndachjenji na.

³⁰ Janha oviconxin con tti joí para tsjenguijna na janha na,

³¹ que soixin rroanha ngattoxon con cain chojni.

³² Jehe chojni jihi tti joadingasán que sinchengasenhe chojni de icha nación, co de ixin jehe tsosayexin chojni Israel, chojnia soixin.

³³ José co María, janné Jesús, vinttegoan na admirado de ixin tti ndačo Simeón de ixin jehe Jesús.

³⁴ Cottimeja Simeón joinchetsenhe ñao Dios que sinchenchaon Jesús conixin María co José co ndačo ngain María, janné Jesús:

—Tsjexinxin, de ixin xanxichjan jihi Dios sinchecastigá tsje chojni Israel co icha na Dios rrochjé na iná vida naroaxin de ixin tti sinchehe xan. Co jehe xan ná señal que joixin de ngain Dios que anto tsje chojni sitticaonha na jehe xan.

³⁵ Co jamé rrořago tti řaxaon cada chojni ngain ansén na. Pero para jaha, cain jihi inchin ná espada que sattodoho almá, ixin anto joachjaon rrochonda.

³⁶ Nttilha vehe ná nřhí cai que vagayé nřha joajna de ngain Dios, co vinhi nřha Ana. Co mé nřhichjehe ná tti vinhi Fanuel, de ngain grupoe Aser de chojni Israel. Nřhí mé atto onañhichjan vehe nřha are mé. Co atto řa chjan nřha are dicottehe nřha, co vecao nřha xixihi nřha jeho yáto nano.

³⁷ Co are ngain tiempo mé ovechonda ochenta y cuatro nano de ndavenehe xixihi nřha. Jehe nřha vagachjexinha nřha de ngaxinhi nihngo mé, ixin de ttie co de nchanho vanchesayehe nřha Dios; vaguecřaño nřha co vanchecoanxinhi nřha Dios.

³⁸ Co ngain rato mé conchienne jehe Ana co después de joanjo gracias ngain Dios de ixin Jesús, coexinhi ndache cain chojni de ixin Jesús, tti chojni que techonha tti nchanho are Dios tsjenguijna chojni Israel para sacha na ngain chojni romano.

Are María co José sacjancho na Jesús para Nazaret

³⁹ Are joexin joinchehe na cain tti ttetonha ley de Dios, cjan na ngain Nazaret, rajné na, ngain regioen Galilea.

⁴⁰ Co Jesús icha vangui, co icha cosoji, co icha venohe jian, co Dios anto joinchennaon.

Are Jesús cjoí ngaxinhi nihngo icha importante

⁴¹ José co María, janné Jesús, cain nano vacji na ngain ciudad Jerusalén para ixin tti quiaí dinhi pascua.

⁴² Are Jesús joinchexette tteyó nano, jehe co José, co María, janné, canio na cjoí na Jerusalén inchin costumbré na ngain quiaí mé.

⁴³ Co are ojoexin quiaí mé, jehe na sacjan na co Jesús ndadigittohe ntilha Jerusalén, co José co María venoeha na.

⁴⁴ Jehe na řaxaon na que puede Jesús ntilha joí ngayé chojni, co jamé sacjoi na ngoixin nchanho mé. Pero are ondaconaxin xehe, jehe na cjoé na Jesús ngayé icha ni ichó co niamigoe na,

⁴⁵ co vittjaha na Jesús. Cottimeja sacjan na para Jerusalén iná para cjoé na Jesús ntilha.

⁴⁶ Vatto ní nchanho, cottimeja vittja na Jesús tají ngaxinhi nihngo icha importante, ngayé ximaestroey ley tajittinhi tti tendařo xa co jehe danchiangui ngain xa icha cosa de Dios.

⁴⁷ Cain chojni que coinhi tti ndařo jehe vinttegoan na admirado ixin tti nichja jehe jian jí, co de cain pregunta que joanchiangui xa ngain, jehe nchao ndařo cain.

⁴⁸ Are José co María vicon na mé, vinttegoan na admirado, co janné ndařo jan ngain jehe:

—Hijo, ¿quedonda jañá joinchehe nganji na janha na? Ndodá conixin janha tettjé ra jaha co anto řaon na.

⁴⁹ Cottimeja Jesús ndařo:

—¿Quedonda ttjé ni ra? ¿Añoaha ra que janha chonda que sarihi ngain nihngo para ixin asunto de Ndodana?

⁵⁰ Pero jehe na coinxinha na tti ndařo Jesús ngain na.

⁵¹ Cottimeja Jesús conixin José co María sacjan na para Nazaret, co Jesús anto vanchehe sigue vaguitticaon ngain cayoi na. Co María, janné Jesús, cain jihi coenchjinha jan ngain ansén jan.

⁵² Co de cain tiempo mé Jesús icha vangui de ngain cuerpoe co de ngain joarrixaoen, co Dios, conixin cain chojni que chonxin jehe Jesús anto joinao na jehe.

3

Are Juan ndache chojni ngagaha jna joajné Dios

(Mt. 3.1-12; Mr. 1.1-8; Jn. 1.19-28)

¹ Vittjaxon quince nanó de jittetonha xiemperador Tiberio César, are mé Poncio Pilato vehe gobernador ngain Judea, co Herodes vehe gobernador ngain Galilea, co xanchó Herodes que vinhi Felipe vehe gobernador ngain región que dinhi Iturea co ngain región que dinhi Traconite, co Lisantias vehe gobernador ngain regioen Abilinia.

² Co are mé ná tti vinhi Anás co iná tti vinhi Caifás nimé ni vintte xidána icha importante. Ngain tiempo mé, de ngagaha jna tti xonhi chojni te, Dios nichja ngain Juan, xenhe Zacarías,

³ co Juan vaçhje cjoí ngain cain lugar de ngandehe río Jordán para ndache chojni ixin chonda na que tsentoxinhi na vidé na co siguitte na, para que cainxin tti jianha que nchehe na Dios sinchetjañehe na.

⁴ Cain jihi conhe inchin diquentaxin profeta Isaías janhi: Tsinhi na ná tté chojni que tsoyaoxin de ngagaha jna co rrondaço: “Nchechjian ra nttiha para ixin jehe tti chonda cain joachaxin; danttjehe ra ná nttiha nao.

⁵ Cain tsaga singattea tsaga, co cain jna co jnanchjan tsonataonxin; cain nttiha que jeha nao, tsonao nttiha, co cain nttiha que jeha nataonxin, tsonataonxin nttiha.

⁶ Cottimeja cainxin chojni sicon na tti rroanha Dios para tsjenguijna jehe na.”

⁷ Are chojni vaconchienne na para que Juan rrojincheguitte na, jehe vandaço ngain na:

—Jaha ra xenhe conché ra! ¿Quensen jointtanoha jaha ra ixin nchao setanha ra tti castigo anto soji que jitonchian?

⁸ Saho nchehe ra jian para que jamé sicon icha chojni que ján ndoa coentoxinhi ra vidá ra co ndacheha chó ra: “Ján na razé Abraham na; mexinxin Dios tsjenguijna na”, ixin janha rronhattjo ra que hasta xo jihi Dios nchao sinchechjian xo chojni de razé Abraham.

⁹ Ojí listo hacha para tsonçhinji nttá, co cain nttá que danjoha jian ttochjoin rroçhinji ntta co rroche ntta ngain xohi.

¹⁰ Cottimeja cain chojni mé joanchiangui na ngain Juan co ndaço na:

—Mexinxin, ¿quehe chonda na que sinttaha na remé?

¹¹ Juan ndaço ngain na:

—Xo chonda ra yó camisa chonda ra que sanjo ra ná camisa ngain tti chondaha ni ná camisa. Co xo chonda ra tti jintte ra, jinttecoho ra tti chojni que chondaha.

¹² Nttiha vintteconchienne canxion xicobrador de impuesto cai para que joiguitte xa, co joanchiangui xa ngain Juan co ndaço xa:

—Maestro, ¿quehe chonda na que sinttaha na janha na?

¹³ Co Juan ndaço ngain xa:

—Ncheha ra cobro icha de tti ttetonha ley.

¹⁴ Cai canxion xisoldado joanchianguihi xa Juan co nda'cho xa:

—Co janha na, ¿quehe chonda na que sinttaha na?

Juan nda'cho ngain xa:

—Dantsjeha ra tomí chojni afuerza, ni tjanguiha ra cosa que jehe na xonhi joinchehe na; jaha ra dintte ra contento conixin tti tomí que jaha ra tedachara.

¹⁵ Cain chojni mé anto joinao na conohe na ixin quensen Juan ixin xaxaon na que puede Juan jehe mé tti Cristo.

¹⁶ Pero Juan ndache cainxin na:

—Janha ndoa nttaguittexin chojni conixin jinda, pero toin tsí iná xí que sinttaguittexin ra conixin Espíritu Santo co Espíritu mé tsiaho xá xohi para sincheróa almá ra xá tonhe oro toroaxin ngain xohi. Co xí mé chonda xa anto icha tsje joachaxin que janha, ixin janha ni jiquininxinha na ni tsonxindangá corrié catté xa.

¹⁷ Xí mé ojiyá xa palé xa, para tsjendoaxin xa trigo, co para sa'chjehe trigo paja. Sasicao xa cain trigo ngain nchiandoha xa, pero cain paja tsjaga xa ngain ná xohi que xonhi tiempo danga xoi.

¹⁸ Conixin jihi, co icanxin consejo, vandachexin Juan chojni tti jian joajna.

¹⁹ Co después, Juan joinchesattehe xigobernador Herodes ixin vecao xa jehó n'chiconadé xa que vinhi Herodías, mé cjoí çhihi Felipe, xichó jehe Herodes, co jehe Juan joinchesattehe Herodes de ixin icha cosa jianha cai que joinchehe Herodes.

²⁰ Pero Herodes vitticaonha. Co en lugar de roguitticaon, joinchehe iná cosa jianha ixin jehe coiaxinhí Juan ngain cárcel.

Are joiguite Jesús

(Mt. 3.13-17; Mr. 1.9-11)

²¹ Saho de viaxinhí Juan, ngain ná nchanho are Juan jinchequite anto tsje chojni, cai Jesús cjoí para que Juan joinchequite jehe. Co después que joiguite Jesús, are jehe joinchecoanxinhí Dios, ngajni xiré

²² co Espíritu Santo xincanji xá ná conttoanajni ngataha Jesús co vicon na, co coinhi na tté Dios de ngajni que nda'cho:

—Jaha tti Xanhna que janha anto rinaho, co de ixin jaha janha anto chahna.

Cain nindogoelito xanchjen de Jesús

(Mt. 1.1-17)

²³ Jesús vechonda inchin treinta nano are jehe coexinhí ndache chojni de ixin Dios. Cain chojni xaxaon na ixin jehe cjoí xenhe José. Jehe José mé cjoí chjan de Elí,

²⁴ co Elí cjoí chjan de Matat, co Matat cjoí chjan de Leví, co Leví cjoí chjan de Melqui, co Melqui cjoí chjan de Jana, co Jana cjoí chjan de José.

²⁵ José cjoí chjan de Matatías, co Matatías cjoí chjan de Amós, co Amós cjoí chjan de Nahum, co Nahum cjoí chjan de Esli, co Esli cjoí chjan de Nagai,

²⁶ Nagai cjoí chjan de Maat, co Maat cjoí chjan de Matatías, co Matatías cjoí chjan de Semei, co Semei cjoí chjan de José, co José cjoí chjan de Judá.

²⁷ Judá cjoí chjan de Joana, co Joana cjoí chjan de Resa, co Resa cjoí chjan de Zorobabel, co Zorobabel cjoí chjan de Salatiel, co Salatiel cjoí chjan de Neri.

²⁸ Neri cjoí chjan de Melqui, co Melqui cjoí chjan de Adi, co Adi cjoí chjan de Cosam, co Cosam cjoí chjan de Elmodam, co Elmodam cjoí chjan de Er.

²⁹ Er cjoy chjan de Josué, co Josué cjoy chjan de Eliezer, co Eliezer cjoy chjan de Jorim, co Jorim cjoy chjan de Matat.

³⁰ Matat cjoy chjan de Leví, co Leví cjoy chjan de Simeón, co Simeón cjoy chjan de Judá, co Judá cjoy chjan de José, co José cjoy chjan de Jonán, co Jonán cjoy chjan de Eliaquim.

³¹ Eliaquim cjoy chjan de Melea, co Melea cjoy chjan de Mainán, co Mainán cjoy chjan de Matata, co Matata cjoy chjan de Natán.

³² Natán cjoy chjan de David, co David cjoy chjan de Isaí, co Isaí cjoy chjan de Obed, co Obed cjoy chjan de Booz, co Booz cjoy chjan de Salmón, co Salmón cjoy chjan de Naasón.

³³ Naasón cjoy chjan de Aminadab, co Aminadab cjoy chjan de Aram, co Aram cjoy chjan de Esrom, co Esrom cjoy chjan de Fares, co Fares cjoy chjan de Judá.

³⁴ Judá cjoy chjan de Jacob, co Jacob cjoy chjan de Isaac, co Isaac cjoy chjan de Abraham, co Abraham cjoy chjan de Taré, co Taré cjoy chjan de Nacor.

³⁵ Nacor cjoy chjan de Serug, co Serug cjoy chjan de Ragau, co Ragau cjoy chjan de Peleg, co Peleg cjoy chjan de Heber, co Heber cjoy chjan de Sala.

³⁶ Sala cjoy chjan de Cainán, co Cainán cjoy chjan de Arfaxad, co Arfaxad cjoy chjan de Sem, co Sem cjoy chjan de Noé, co Noé cjoy chjan de Lamec.

³⁷ Lamec cjoy chjan de Matusalén, co Matusalén cjoy chjan de Enoc, co Enoc cjoy chjan de Jared, co Jared cjoy chjan de Mahalaleel, co Mahalaleel cjoy chjan de Cainán.

³⁸ Cainán cjoy chjan de Enós, co Enós cjoy chjan de Set, co Set cjoy chjan de Adán, co Adán cjoy chjan de Dios.

4

Are inchínji joinao rrojincheyehé Jesús (Mt. 4.1-11; Mr. 1.12-13)

¹ Espíritu Santo vittohe ngain Jesús, co joinchegayé Jesús anto tsje joachaxin. Are jehe cjanxin de rio Jordán Espíritu mé joicao Jesús para ngagaha jna tti xonhi chojni te.

² Nttiha vehe Jesús cuarenta nchanho, co inchínji joaquehe prueba ngain Jesús. Jesús xonhi joine de cainxin nchanho mé, co después Jesús venhe jinta.

³ Cottimeja inchínji ndacho ngain Jesús:

—Si ndoa jaha Xenhe Dios, ttetonha que xo tehe rrocjan xo niottja.

⁴ Jesús ndacho:

—Ngain tti jitaxin Palabré Dios ndacho: “Chojni techonxin jeoha de tti jine na sino que cai de cain palabra que Dios ndacho.”

⁵ Cottimeja inchínji sajoicao Jesús ngataha ná jna anto noi. Co de nttiha anto daca cjoagoexin inchínji Jesús cainxin nación que jí ngoixin mundo.

⁶ Co inchínji ndacho ngain Jesús:

—Janha rrochjaha jaha cainxin joachaxin de tsetonhe cain nación yá, co cainxin cosa chjoin que jí ngain nación yá. Ixin janha vayá cainxin yá, co janha rrochjaha cain yá tti chojni que janha rinaho rrochjaha.

⁷ Si jaha sarittoxin nttajochjiha co sinchesayana janha, cain yá cosá jaha.

⁸ Pero Jesús ndacho ngain inchínji:

—Sattjixin de nganji na janha, Satanás, ixin ndacho ngain tti jitaxin Palabré Dios: “Nchesayehé jehó Dios tti chonda joachaxin para ixin jaha co jehó jehe tti ditticaon jaha.”

⁹ Cottimeja jehe inchínji sajoicao Jesús para ngain ciudad de Jerusalén co nttiha inchínji joinchecani Jesús para ngataha techoe nihngo icha importante. Co ndaço ngain Jesús:

—Si ndoa jaha Xenhe Dios, daritsingaxin de nttihi hasta tti nontte;

¹⁰ ixin ngain tti jitaxin Palabré Dios ndaço:

Dios tsetonhe ángel de jehe para senda jaha.

¹¹ Cain ángel mé rrocaha conixin rá, para que xonhi tti tsonihi rottea de ixin xo.

¹² Jesús ndaço ngain inchínji:

—Cai ndaço ngain tti jitaxin Palabré Dios: “Daqueha prueba ngain Dios tti chonda joachaxin para ixin jaha.”

¹³ Co jañá are inchínji çhoha joincheyehe Jesús, jehe sacjoixin de ngain Jesús para ná tiempo.

Jesús coexinxin xé ngain Galilea

(Mt. 4.12-17; Mr. 1.14-15)

¹⁴ Jesús cjan para Galilea conixin anto tsje joachaxín Espíritu Santo, co cainxin chojni de ngain región mé vanichja na de ixin tti jian que vanchehe Jesús.

¹⁵ Jehe vanchecoenhe chojni de ixin Dios ngain cain nihngo de cain lugar nttiha, co cainxin chojni nttiha joinchesayehe na Jesús.

Jesús ngain Nazaret

(Mt. 13.53-58; Mr. 6.1-6)

¹⁶ Cottimeja, Jesús cjoí para Nazaret, tti rajna vanguixin jehe. Ngain nchanho que nchejogaha ni, Jesús cjoí ngaxinhi nihngo nttiha inchin costumbré jehe, co nttiha vingattjen para tsjehe tti xón que jitaxin Palabré Dios.

¹⁷ Jehe na çhjé na Jesús tti libro que dicjin profeta Isaías, co are jehe conxiré libro mé vittja tti jitaxin janhi:

¹⁸ Espíritu Santo de Dios jí nganji na janha, ixin Dios çhjana xa de ndaçhjan tti jian joajna ngain chojni que inchin ondadiguenhe espiritue;

Dios rroanha na janha para sinttaxingamá tti chojni que tedetan tanguí ngain ansén,

co para rrochjaha libertad tti chojni que teaxinhi,

co para rrochjaha jmacon tti chojni que diconha;

co para de ixin janha tti chojni que detan tanguí ngain icha chojni isetanha na tanguí mé;

¹⁹ co para que rrondattjan chojni que ojoí tiempo que Dios tsjenguijna na.

²⁰ Cottimeja Jesús coejé libro mé, co joanjo libro ngain tti vacjenguijna chojni ngain servicio, co jehe tavehe. Co ixin cainxin chojni nttiha anto xóan na de ixin Jesús,

²¹ jehe coexinhi nichja co ndaço:

—Jai mismo joiconhe ngattoxon con ra tti jitaxin jiji.

²² Cain chojni nttiha nichja na jian de ixin Jesús, co vinttegoan na admirado de ixin tti palabra çhjoín que ndaço Jesús ngain na. Co jecho na joanchianguihi chó na co ndaço na:

—¿Ajeha jiji tti xitsihi José?

²³ Jesús ndaço ngain na:

—Seguro que jaha ra rrondachjenji ni ra janhi: “Jaha que danjo xóan, toxoanha jaho”; co rrondachjenjí ni ra cai: “Tti coian na joinchehe jaha

ngain rajna Capernaum, nchehe nttihi ngain rajná cai para sicon na janha na.”

²⁴ Cottimeja joinchehe sigue nichja, co ndačo:

—Rrondattjo ra ndoa que ni ná profeta sitticaonha chojni de ngain rajné.

²⁵ Janha rrindattjo ra seguro que vintte tsje nčhiganha ngain nacioen Israel ngain tiempoe profeta Elías, are joiha čhin ní nano co rioho co anto vehe jintta ngoixin nación.

²⁶ Pero Dios rroanha Elías para joicjenguijna ni ná nčhiganha que vintte Israel, sino que jehe cjoí para joicjenguijna ná nčhiganha que vehe ngain Sarepta, chiaon ciudad de Sidón.

²⁷ Cai vintte ngain Israel tsje chojni que vintteninxin chin lepra ngain tiempoe profeta Eliseo. Pero Eliseo joinchexingameha ni ná de jehe na, sino que jehe joinchexingamehe Naamán de ngain nonttehe Siria.

²⁸ Cain nite ngaxinhi nihngo nttiha are vinttequinhi na cain cosa yá, anto vinttegoňao na.

²⁹ Vingtattjen na co vantsjexin na Jesús de nttiha, co joicao na hasta tti con jna nttiha, ngain tti jna diconchjian ciudad mé, para rrocjaxin na Jesús desde nttiha.

³⁰ Pero are orrocja na Jesús, jehe jion vatto ngayehe na co sacjoi.

*Ná xí que vechonda espíritu jianha
(Mr. 1.21-28)*

³¹ Cottimeja Jesús cjan para Capernaum, ngain nonttehe Galilea co nttiha cada nchanho que nchejogaha ni, jehe vacji ngain nihngo nttiha para vandache chojni de ixin Dios.

³² Chojni nttiha vaguinttegoan na admirado de ixin tti vandačo Jesús ixin vanichja conixin palabra de joachaxin.

³³ Ná nchanho ngain nihngo nttiha dicji ná xí que vechonda xa espíritu jianha ngaxinhi cuerpoe xa, co espíritu mé coyao co ndačo:

³⁴ —Sattjixin de nganji na jaha Jesús de Nazaret. ¿Ajoihí jaha para santsjena ra joachaxin que chonda na? Janha chonxin jaha co nona que jaha tti icha jian de ngain Dios.

³⁵ Jesús ndačo ngain espíritu jianha mé:

—¡Tencoá, co sattjixin de ngain xí yá!

Cottimeja jehe espíritu jianha joanca tti xí mé ngataha nontte ngattoxon con jehe na, co vachjexin de ngaxinhi cuerpoe xí mé, co xonhi tti conihí cuerpoe xa.

³⁶ Cainxin chojni que vicon nttiha řaon na, co vinttendache chó na:

—¿Quehe chonda palabré xí jihí? Ixin ttetonha xa conixin anto joachaxin ngain espíritu jianha que jehe satsji co espíritu mé jamé sattji.

³⁷ Co cain rajna de ngoixin region mé conohe chojni tti jian que vanchehe Jesús.

*Jesús joinchexingamehe jannché Simón Pedro
(Mt. 8.14-15; Mr. 1.29-31)*

³⁸ Cottimeja Jesús vachjexin de nihngo nttiha co sacjoi para nchiandoha Simón Pedro. Are mé jannché Pedro jinihi jan ixin ná soa anto soji, mexinxin joinchetsenhe na ñao Jesús para joinchexingamehe naníta mé.

³⁹ Jesús joisé para ngain naníta mé, co nichjayé soa mé, co ngain rato mé ndavachje soa mé, co naníta mé jaicoa vingtattjen co joincheatendehe na.

Jesús joinchexingamehe tsje ninihi

(Mt. 8.16-17; Mr. 1.32-34)

⁴⁰ Are viataon nchanho mé, cain chojni que vinttechonda ninihi que vintteninxin de tsje chin, joiaho na cain chojni mé para ngain Jesús; co jehe coin rá ngataha cada na, co jamé Jesús joinchexingamehe cain na.

⁴¹ Tsje de jehe ninihi mé vinttechonda na espíritu jianha co are vachjexin espíritu mé de ngaxinhi cuerpoe na, coyao co ndaço:

—Jaha tti Xenhe Dios.

Pero Jesús joinchesattehe espíritu jianha mé co Jesús coanthjandaha espíritu mé para nichja espíritu icha ixin vinttenohe que Jesús jehe tti Cristo.

Jesús nichjé chojni ngain Galilea de ixin Dios

(Mr. 1.35-39)

⁴² Are ovingasán ngain nchanho iná, Jesús vachjexin de ngain ciudad co sacjoi ngain ná lugar tti xonhi chojni te. Pero chojni cjoé na Jesús hasta que vittja na tti jí, co joinchetsenhe na ñao Jesús ixin tarroquehe nntiha Capernaum ngain na.

⁴³ Pero jehe ndaço ngain na:

—Janha chonda que sindattjan chojni ngain icanxin lugar ixin ojoí tiempo are Dios tsetonha ngain ansén na ixin para mé rroanxin na Dios janha.

⁴⁴ Co jañá vacji Jesús ngain cain nihngo ngoixin regioen Galilea para vandache chojni de ixin Dios.

5

Are Jesús joinchehe milagro para que jehe na tse na copescado

(Mt. 4.18-22; Mr. 1.16-20)

¹ Ná nntiha, Jesús tají ngandehe lago que dinhi Genesaret, co nntiha xatte anto tsje chojni que hasta conttedoguehe Jesús ixin cain na joinao na coinhi na joajné Dios.

² Co Jesús vicon nntiha tate yó barco ngandehe jinda que xonhi chojni teringa rato mé ixin xí que tse copescado ovania xa de barco mé co tatettjén xa nonchaha.

³ Cottimeja Jesús joixinhi ná de tti yó barco mé, co barco mé barcoe Simón Pedro, co Jesús ndaço ngain Pedro que sinchengaxinton barco de ngandehe nda. Cottimeja nntiha tavetaha Jesús ngataha barco co de nntiha ndachexin Jesús cain chojni que te ngandehe jinda de ixin Dios.

⁴ Are joexin nichja Jesús, jehe ndaço ngain Simón Pedro:

—Ttjiho barco ngain jinda tti icha nihnga, co nntiha dancahngui ra nonchá ra para rrotse ra copescado.

⁵ Pedro ndaço ngain Jesús:

—Maestro, ngoixin ttie jointtaha na xa co xonhi copescado tse na; pero jaxon soixin rritettona, mexinxin janha sigancahngui nonchaha iná ngain jinda.

⁶ Are jamé joinchehe na, ndoa anto tsje copescado tse na que hasta ocoexinhi chintaon nonchaha.

⁷ Cottimeja joinchehe na seña xicompañeroe na que teringa ngain barco jngo para que joinchecienhe na barco mé para cjoenguijna chó na. Co cayoi barco joinchecaon na de copescado que hasta joinao sarroxincajngui barco jinda.

⁸ Are vicon Simón Pedro jiji, jehe vettoxin nntajochjiji ngain Jesús co ndaço:

—Nttatsanha ñao sattjixin soixin de nganji na janha ixin janha anto tsje cosa jianha jointtaha.

⁹ Simón Pedro ndačho jañá ixin jehe anto xaon conixin cain chojni que te ngain, ixin anto tsje copescado tse na.

¹⁰ Cai Jacobo co Juan, cayoi xenhe Zebedeo, tti xicompañeroe Pedro, anto vinttexaon xa cai. Pero Jesús ndačho ngain Pedro:

—Xaonha jaha ixin jai pa ndaha en lugar de copescado, jaha satse chojni para ixin Dios.

¹¹ Cottimeja are joinchechienhe na barco ngandehe ndachaon, vintteganha na co nttiha cointtohe na cainxin cosé na co savinttecji na conixin Jesús.

Jesús joinchexingamehe ná tti vechonda lepra

(Mt. 8.1-4; Mr. 1.40-45)

¹² Are Jesús vehe ngain ná rajna nttiha, conchienenhe ná xí ngain Jesús. Xí mé vechonda xa chin lepra. Co are vicon xa Jesús, jehe xa vettoxin nttajochjihi xa co visé xa hasta tti ngataha nontte co joinchetsenhe xa ñao Jesús co ndačho xa:

—Si soixin rinao, nchao sinchexingamana de chin que rrichonda.

¹³ Cottimeja Jesús catte xí mé co ndačho ngain xa:

—Ján rinao; xingamaha.

Co ngain rato mé ndavitján tti chin lepra que vechonda xí mé.

¹⁴ Cottimeja Jesús coetonhe xí mé que xonhi chojni rrondache xa. Jesús ndačho ngain xí mé:

—Jeho tti ngain xidána para que jehe xa sicon xa que jaha ixonhi chin chonda co danjo cosa ngain Dios inchin ttetonha ley que vayé Moisés para que cainxin chojni tsonohe na ixin jaha ixonhi chin chonda.

¹⁵ Pero nchanho co nchanho icha tsje chojni vaconohe de ixin tti jian que vanchehe Jesús. Co anto tsje chojni vaʒatte ngain para vaquinhi na de ixin Dios, co para que Jesús vanchexingamehe na de quexeho chin que vinttechonda na.

¹⁶ Pero Jesús tsje nttiha vagachjenda savacji ngain lugar tti xonhi chojni te, co nttiha jehe vanchecoanxinhi Dios.

Jesús joinchexingamehe ná tti čoha vacji

(Mt. 9.1-8; Mr. 2.1-12)

¹⁷ Ná nchanho Jesús tajindache tsje chojni de ixin Dios, co no nttiha tate canxion xifariseo co canxion ximaestrore ley que vinttequixin de cainxin rajna de ngain regioen Galilea co de ngain regioen Judea co de ngain ciudad de Jerusalén. Co are mé Jesús cjoago que joachaxín Dios jí ngain jehe ixin joinchexingamehe tsje chojni nihi.

¹⁸ Are mé, vinttequí canxion xí que vinttequiaoxin xa camilla ná tti čoha vacji, co joinao chojni mé rroʒanxinhi na jehe tti nihi mé ngaxinhi nchia tti jí Jesús co rroquín na nttiha ngattoxon con Jesús.

¹⁹ Pero čoha vixinhi na ixin anto tsje chojni te ngandanguí nchia mé. Cottimeja coani na ngataha techoe nchia co vinttjian na canxion teja, para que nttiha joinchexincanjinxin na tti nihi conixin camilla ngayehe chojni para vehe ngattoxon con Jesús.

²⁰ Are Jesús vicon que cain xí mé chonda xa seguro que Jesús sinchexingamehe jehe tti nihi mé, Jesús ndačho ngain tti nihi:

—Cain tti jianha que jaha joinchehe, janha ojointtatjañaha.

²¹ Cottimeja cain ximaestrore ley que te nttiha, co xifariseo vintteʒaxaon xa: “¿Quensen xí jihi, que nchaoha jinichja xa para ixin Dios? xonhi chojni

nchao sinchetjañehe iná chojni tti jianha que nchehe na, jecho Dios tti nchao sinchehe mé.”

²² Pero Jesús ovenohe tti teŕaxaon xa co ndaŕho ngain xa:

—¿Quedonda ŕaxaon ra jañá?

²³ ¿Quexehe tti icha tanguiha rronhattjan ná tti nihi: “Tti jianha que jaha joinchehe janha ojointsatjañaha”, o rronhattjan: “Dingattjen co sattji?”

²⁴ Nchao jí remé, janha tsjagoha jaha ra que janha, tti Xí que joixin de ngaini, chonda joachaxin nttihi ngataha nontte para nttatjañá chojni tti jianha que nchehe na.

Cottimeja Jesús cjan ngain tti nihi mé co ndaŕho:

—Janha rrinhattjo jaha que dingattjen, co tsinhi camillá co sattji para nchiandoi.

²⁵ Ngain rato mé jehe tti ŕhoha vacji mé vingattjen ngattoxon con cain chojni nttiha, co tsín camillé tti vetsingataha co sacjoi para nchiandoha. Co ngoixin sacjoi jehe joinchecoanxinhi Dios.

²⁶ Cain chojni que te nttiha vinttegoan na admirado co cain na joinchecoanxinhi na Dios cai, co hasta teŕaon na ndaŕho na:

—Jai gocon na cosa ŕhjoin que ni ná nchanho goconha na jiji.

Jesús nichjé Leví

(Mt. 9.9-13; Mr. 2.13-17)

²⁷ Después de cain jiji Jesús vaŕhjexin de nttiha, co jehe vicon ná xicobrador de impuesto que vinhi Leví. Jehe xí mé tají xa ngain mesa tti xengaxin hna impuesto, co Jesús ndaŕho ngain xí mé:

—ŕxacoí chjin na.

²⁸ Cottimeja jehe Leví, ngain rato mé vingattjen co nttiha cointtohe cain, co sarroé Jesús.

²⁹ Después Leví coín ná fiesta jie ngain nchiandoha para ixin Jesús, co nttiha joincecho na tsje xicobrador de impuesto ngain nacoa mesa co icha chojni cai.

³⁰ Pero tsje xifariseo co ximaestroey ley coexinhi xa nichja xa feo ngain tti chojni que vacao Jesús, ndaŕho xa ngain na:

—¿Quedonda jinttecho ra co dicoŕo ra xicobrador de impuesto co icha chojni que nchehe jianha?

³¹ Jesús ndaŕho ngain xa:

—Chojni que niha, chojni mé rrongondeha xincheŕoan, jecho tti chojni nihi, mé tti rrongondehe xincheŕoan.

³² Janha joiha para joinichjá tti chojni que tenchehe jian, sino que chojni que tenchehe jianha para que jehe na tsentoxinhi na vidé na para isincheha na cosa jianha.

Are joanchianguihi na Jesús ixin quedonda chojni jehe dinttecjañoha na

(Mt. 9.14-17; Mr. 2.18-22)

³³ Cottimeja jehe xa joanchianguihi xa Jesús co ndaŕho xa:

—¿Quedonda chojni que xicao Juan co chojni xifariseo anto dinttecjañó na co anto nchecoanxinhi na Dios, pero chojni que ŕhjiho jaha cainxin nchanho jine na co dihi na?

³⁴ Jesús ndaŕho ngain xa:

—¿Apoco jaha ra nchao sinchecjáñó ra tti chojni que rronddache ra siji ngain ná vandango tti tottehe na are xinovio xa jí xa ngain na?

³⁵ Pero tsí rato que chojni sasicao na xinovio, cottimeja jehe na sinttecjañó na.

³⁶ Cai nda'cho Jesús ejemplo jiji ngain xa:

—Xonhi chojni ttinchje rioho lontto naroa para tteyehe lontto nttaxichjan. Si ná chojni sinchehe jamé, jehe ndasinchetján lontto naroa; co deporsín rioho lontto naroa chjoinha dicon ni ngain lontto nttaxichjan.

³⁷ Cai t'choha siquia ná xan que jidatsoxinhi ngá roanxan nttaxí, ixin si jamé tsonhe, tti xan que jidatsoxinhi tsonchintaon xan roanxan, co xan co roanxan cayoixin ndasitján.

³⁸ Mexinxin xan que jidatsoxinhi chonda que siquia xan ngá roanxan naroaxin, co jamé cayoi cosa xonhi tsonhe.

³⁹ Co xonhi chojni que dihi xantsja, cottimeja sincheXoxinhi sihi xan que dica tsjen, ixin nda'cho na: “xantsja, xan mé tti icha jian.” Jañá tti costumbre que jaha ra chonda ra jiha de acuerdo ngain tti janha rrindattjo ra.

6

Chojni que vacao Jesús conchínji na trigo ngain nchanho que nchejogaha ni (Mt. 12.1-8; Mr. 2.23-28)

¹ Ná nchanho que nchejogaha ni, Jesús co tti chojni que vacao vatto na canxion ngui que diguinga trigo, co chojni que vacao Jesús conchínji na canxion ninchjan de trigo, co ngá rá na joincheroaxin na trigo co joine na noanchjan.

² Co canxion xifariseo joanchiangui xa ngain na co nda'cho xa:

—¿Quedonda jaha ra nchehe ra ná xa que jiquininxinha sinchehe ni ngain tti nchanho que nchejogaha ni?

³ Cottimeja Jesús nda'cho ngain xa:

—¿Adiconha jaha ra tti jitaxin ngain Palabré Dios de ixin queXén joinchehe David, jehe conixin cain xicompañeroe ngain ná nchanho are anto vinteguenhe na jintta?

⁴ David conixin cain xicompañeroe joixinhi na nihngo icha importante co David coá tti niottja que joixin ngataha alté Dios co joine nio, co joanjo nio ngain cain xicompañeroe que joicao. Co niottja mé jehó xidána jiquininxin vane xa nio.

⁵ Cai nda'cho Jesús ngain xa:

—Janha, tti Xí que joixin de ngajni, chonda joachaxin cai para tti nchanho que nchejogaha ni.

Tti xí que ndadixemadoho ná rá (Mt. 12.9-14; Mr. 3.1-6)

⁶ Iná nchanho que nchejogaha ni, Jesús joixinhi iná nihngo co coexinhi joinchecoenhe chojni de ixin Dios. Co nttiha tají ná xí que ndadixemadoho ná rá xa, ra jian.

⁷ Co ximaestrore ley, co xifariseo tatetsayehe xa Jesús para sicon xa asinchexingamehe xí mé ngain nchanho que nchejogaha ni, para jamé rrochonda xa quehe rrocjanguixin xa Jesús.

⁸ Pero Jesús ovoenhe quehe teXaxaon ximaestrore ley co xifariseo, co jehe ndache tti xí que ndadixemadoho ná rá:

—Dingattjen co darihi ngosine.

Tti xí vingattjen co cjoí vengattjen ngosine.

⁹ Cottimeja Jesús nda'cho ngain ximaestrore ley co xifariseo:

—Janha sanchianguiha ra ná cosa: ¿Quehe jiquininxin sinchehe ni ngain nchanho que nchejogaha ni; asinchehe ni jian, o asinchehe ni tti jianha? ¿Atsan'chjandaha ni chojni ndasenhe, o ani nasoexon ni?

10 Cottimeja Jesús tsjehe ngain nite ngandanji jehe, co ndačo ngain tti xí mé:

—Ttinxé rá.

Co tti xí coinxé rá, co ngain rato mé ixonhi chin vechonda rá tti xí mé; ondaxingamehe.

11 Pero xicanxin anto vinttegoñao xa co coexinhi xa joanchianguihi chó xa ixin quehe sinchehe xa ngain Jesús.

Jesús coinchiehe tti tteyó chojni que vacao

(Mt. 10.1-4; Mr. 3.13-19)

12 Ná nchanho ngain tiempo mé Jesús sacjoi ngagaha ná jna para joinchecoanxinhi Dios, co ngoixin ttie mé Jesús joinchecoanxinhi Dios.

13 Are vingasán, jehe vayé cain chojni que vacao, co coinchiehe tteyó de jehe na, tti ní jehe joincheguini representanté jehe.

14 Co nombré na cada na janhi: “Simón, tti jehe Jesús joincheguini Pedro; Andrés xanchó Simón; Jacobo co Juan, Felipe co Bartolomé,

15 Mateo co Tomás, Jacobo, tti xenhe Alfeo; Simón jehe ná de tti partidoe chojni politico que vaquetocaho chojni romano;

16 Judas tti xanchó Jacobo; co Judas Iscariot tti joindačo para tse na Jesús.

Are Jesús cjoagoe tsje chojni de ixin Dios

(Mt. 4.23-25)

17 Jesús xincanjinxin de ngagaha jna conixin tti tteyó chojni co tavintte na ngataon ná jnguí, jehe conixin chojni. Co xatte anto tsje chojni de ngoi región de Judea co de ciudad de Jerusalén co de ngoixin ngandehe ndachaon ngain region ciudad de Tiro co Sidón. Cain chojni mé conchienze na para joiquinhi na tti nichja Jesús de ixin Dios co para joixingamehe na de ixin quexeho chin que techonda na.

18 Tti nivinttechonda espíritu jianha ngaxinhi cuerpo, cai xingamehe na.

19 Cain chojni joinao na catte na Jesús, ixin jehe vanchexingamehe cain chojni conixin joachaxín Dios que jehe chonda.

Quensen tti çhjoin sehe ngain vidé co quensen tangui tsonhe

(Mt. 5.1-12)

20 Cottimeja Jesús tsjehe tti chojni que vacao co ndačo ngain na:

—Anto çhjoin para ixin jaha ra ço noa ra ixin jiquininxin ra ngajni tti ttetonha Dios.

21 'Anto çhjoin para ixin jaha ra ço denhe ra jintta jai, ixin después jaha ra tsojaha ra.

'Anto çhjoin para ixin jaha ra ço tsjanga ra jai, ixin después jaha ra tsjano ra.

22 'Anto çhjoin para ixin jaha ra are chojni tsoñao nganji ra co are sengui ra na, co are rronichja na feo nganji ra, co are rronichja na jianha de ixin jaha ra ixin jaha ra chojnina janha, tti Xí que joixin de ngajni.

23 Are tsonha ra jamé jaha ra chaha ra co anto çhjoin tonoha ra, ixin ngajni rrochonda ra ná cosa anto jian, ixin cain chojni que sinchehe jamé nganji ra, jamé joinchehe nigoelitoe na xanchjen ngain cain profeta que jói are saho.

24 'Pero anto tangui tsonha jaha ra ço chonda ra tsje, ixin jaha ra ochaha ra ntíhi ngataha nontte.

25 'Anto tangui tsonha jaha ra ço jai chonda ra tsje para sintte ra, ixin después jaha ra senhe ra jintta.

'Anto tangui tsonha jaha ra ço tjano ra jai, ixin después jaha ra rrotsjanga ra de joachjaon.

²⁶ 'Anto tangui tsonha jaha ra are caín chojni rronichja na jian de ixin jaha ra ixin jañá cain nigoelitoe na xan'chjen vanchesayehe na tti chojni que jeha ndoa profeté Dios.

Jesús nda'cho chonda que sinao ni chojni que ningaconhe ni
(Mt. 5.38-48; 7.12)

²⁷ 'Nganji ra xo tettinna ra janha rroundattjo ra: Rinao ra tti chojni que ningaconha ra, nchehe ra jian ngain tti chojni que toñao nganji ra,

²⁸ nchetsenhe ra ñao Dios ixin jehé sinchenchaon tti chojni que nichja jianha de ixin jaha ra, co nchetsenhe ra ñao Dios para ixin tti chojni que nichja feo nganji ra.

²⁹ Si 'chonja chojni rroxanguiha ná manazo ngá con, dittoaxin que rroxanguiha iná manazo. Si 'chonja tti santsjaha chamarrá, danjo cai hasta camisa.

³⁰ Co quexeho chojni que sanchiaha ná cosa jaha chjehe; co are santsjaha na cosá, idanchieha na cosa mé iná.

³¹ Nchehe ra ngain chojni inchin jaha ra rinao ra sinchehe jehé na nganji ra.

³² 'Si jaha ra rinao ra jehé tti chojni que rinao jaha ra, ¿quehe jian tenchehe ra? Ixin hasta tti chojni que nchehe jianha, jehé na nchehe na jañá cai.

³³ Co si jehé nchehe ra jian ngain tti chojni que nchehe jian nganji ra, cai ¿quehe jian tenchehe ra? Ixin cai tti chojni que nchehe jianha nchehe na jamé cai.

³⁴ O si nhecjen ra tomi jehé tti chojni que nchao tsjengaha ra hna, cai jeha jian tenchehe ra, ixin hasta tti chojni que nchehe jianha nhecjen tomi ngain icha chojni que nchehe jianha, ixin chonda na seguro que tsjenguehe chó na hna.

³⁵ Jaha ra chonda ra que rinao ra chojni que ningaconha ra, co chonda ra que sinchehe ra jian ngain na, co nhecjen ra na cosá ra, co xaxaonha ra ixin sacha ra 'chonja cosa. Co jamé ngajni nttiha rroxengaxin ra hna icha jian, co jaha ra sintte ra xenhe Dios que ttjen ngajni, ixin Dios jehé cai danjo cain cosa ngain tti chojni jianha co tti ni xonhi tiempo chjé gracias.

³⁶ Ttiaconoehe ra icha chojni, jañá inchin Ndodá na que ttjen ngajni ttiaconoehe Ndo cain chojni.

Ncheha ra juzgado iná chojni
(Mt. 7.1-5)

³⁷ 'Ncheha ra juzgado iná chojni, para que Dios sincheha juzgado nganji ra. Ncheha ra condenado iná chojni para que Dios sinttaha ra condenado jaha ra. Nchetjañehe ra cain chojni, para que jamé Dios sinttatjañaha jaha ra cai.

³⁸ Chjehe ra tti chojni que rrongondehe, co Dios rrochjá ra tti rrongondaha ra. Dios rrochjá ra ngain bolsá ra ná medida jian, que tsonttedo jian, tsontsjenga ra jian co rrocaon jian. Ixin inchin medida que jaha ra dattechoaxin ra, Dios jamé sattechoha ra cai.

³⁹ Jesús nda'cho ejemplo jihu ngain na:

—¿Apoco ná tti chejo nchao sicao noxon nttiha iná tti chejo? Seguro que cayoxin chojni mé sinttjian ngain ná ttoe.

⁴⁰ Ni ná tti jitangui jeha icha nohe que ximaestroe, masqui are tsjexin tsanguj jehé sehe inchin ximaestroe.

41 '¿Quedonda ttijho cuidado de ixin tti anto nchín caxineno que jinganguí jmacon iná chojni co ttijoha cuidado de ixin tti nttá jie que jinganguí jmacon jaha?

42 Si jaha diconha tti nttá jie que jinganguí jmacon, ¿quedonda nda'cho ngain iná chojni ixin jehe sittoexin para que jaha santsjenguihi caxineno nchín que jinganguí jmacon jehe? ¡Jaha ná chojni jianha que ncheyaxon! Saho dantsjengui tti nttá jie que jinganguí jmacon para que jamé nchao sicon jian para santsjengui caxineno nchín que jinganguí jmacon iná chojni.

Nttattochjoin datsoan ni ntta de ixin ttochjoín ntta
(Mt. 7.17-20; 12.33-35)

43 'Xonhi nttattochjoin jian que sinchechjian ntta ttochjoin que xonhi xé, ni nttattochjoin que xonhi xé sinchechjian ntta ttochjoin jian.

44 Naná nttattochjoin datsoan ni ntta de ixin ttochjoin que nchechjian ntta. Nttanchaha nchechjianha ntta higo, ni canchaha nchechjianha ca uva.

45 Tti chojni jian, jehe nichja cosa jian ixin tti jian jí ngain ansén; co tti chojni jianha, jehe nichja cosa jianha ixin tti jianha jí ngain ansén. Mexinxin cain tti jí ngain ansén chojni, mé tti nichja rroha.

Tti nchia que jingattjen ngataha ttjao co tti nchia que jingattjen ngataha jinchexonda
(Mt. 7.24-27)

46 'Jaha ra, ¿quedonda nda'cho ra ixin janha ttetonha nganji ra co ncheha ra tti janha ndattjo ra?

47 Tti chojni que tsí nganji janha, co jehe na tsinhi na tti rrondattjan na co sitticaon na,

48 chojni mé inchin ná xí que ngue anto nihnga para que cjoenga xa basé nchiandoha xa ngataha ná ttjao. Are coyé jinda ngain río, soji vinqé nda nchia mé, pero choha coingui nchia mé ixin soji jixenga nchia ngataha ttjao.

49 Pero tti chojni que ttinhi tti janha ndathjan co ditticaonha na na, chojni mé inchin tti joinchechjian nchiandoha ngatacoa jinchexonda ni cjoavaha ttjarioho. Co are coyé jinda ngain río, soji vinqé nda nchia mé, co ndacjamangui nchia. Jamé ndaxante ngoixin nchia mé.

7

Jesús joinchexingamehe ná xinchehe xé ná xicapitán romano
(Mt. 8.5-13)

¹ Are Jesús joexin ndache chojni cain jiji, jehe sacjan para rajna Capernaum.

² Nttiha vehe ná xicapitán romano vechonda xa ná tti nchehe xé xa que jehe xa anto vajinao xa, co jehe tti nchehe xa mé ondajidenhe.

³ Are xicapitán mé coinhi xa de ixin Jesús, jehe xa rroanha xa canxion nijudio que vinttechonda joachaxin ngain ningoe na para joinchetsenhe na ñao Jesús para que jehe rrocji rrojoinchexingamehe tti nchehe xé xa mé.

⁴ Cain nimé conchienne na ngain Jesús co coexinhi na anto joinchetsenhe na ñao co vinttenda'cho na ngain:

—Xicapitán jiji jiquininxin que soixin tsjenguijna xa,

⁵ ixin jehe xa anto rinao na xa ján na xo judío na, co jehe xa mismo cjoenga xa hna para conchjian ná ningona na.

⁶ Cottimeja joicaio na Jesús. Pero are ochian joiiji na ngain nchiandoha xicapitán mé, jehe xa coetonhe xa canxion xiamigoe xa para joindačo xa ngain Jesús:

—Idoanha molestado soixin, ixin xicapitán ndačo xa que jehe xa jiquin-xinha xa para soixin sixinhi nchiandoha xa.

⁷ Mexinxin jehe xa ni joiha xa para joichoanxin xa ngatja nttiha. Jehe xa rinao xa que jecho ttetonha soixin para tti nchehe xé xa orroxingamehe.

⁸ Jehe xa nohe xa jamé ixin jehe xa mismo chonda que ditticaon xa ngain tti icha ttetonha de jehe xa, cai jehe xa chonda xa joachaxin de ttetonha xa ngain cain xisoldadoe xa. Are jehe xa ttetonhe xa ná de jehe xisoldado que tsji xa quexeho parte, jehe xa ttji xa. Co are jehe xa ttetonha xa que tsí xa, jehe xa ttí xa. Co are jehe xa ttetonhe xinchehe xé xa que sinchehe xa quexeho xa jehe xa nchehe xa xa.

⁹ Are Jesús coinhi jihi, jehe goan admirado de ixin jehe xa co ngaria tsjehe ngain chojni que terroé, co ndačo ngain na:

—Ndoa, ni de ngacjan cainxin chojni judío viconha janha ná chojni que anto ditticaon inchin xicapitán jihi.

¹⁰ Are cain xiamigoe xicapitán mé cjan xa nchia, vintteguicon xa jehe tti nchehe xa mé odixingamehe; ixonhi chin jichonda.

Jesús joinchexechon xanxichjenhe ná nchiganha

¹¹ Después de cain jihi, Jesús sacjoi para ngain ná rajna dinhi Naín conixin chojni que vacao co tsje icha chojni cai.

¹² Are ojoiji na chian ngain rajna mé, jehe vicon que tedicjavá na ná chojni ndadiguenhe que mé tti nacoaxinxon xanxichjenhe naníta janné xan, co jehe naníta mé, ganha. Anto tsje chojni de ngain rajna mé tedicjao jehe naníta para tedicjavá na xenhe.

¹³ Are Jesús vicon naníta, jehe coiaconoehe co ndačo ngain:

—Itsjangaha.

¹⁴ Cottimeja Jesús conchienne co catte cajón, co tti chojni que tedicjao cajón tavinttengattjen na. Co Jesús ndache tti ndadiguenhe:

—Janha rronattjo jaha: ¡Dingattjen!

¹⁵ Cottimeja jehe tti ndadiguenhe xendoa vengá chinttihi co ocoexinhi nichja, co jamé Jesús joanjo xanxí mé ngain janné xan.

¹⁶ Are chojni vicon na jihi, cainxin na anto xaon na co coexinhi na joinchecoanxinhi na Dios co ndačo na:

—Ná profeta anto importante ngattoxon con Dios cononxin ngayá na.

Cai ndačo na:

—Dios jói para joicjenguijna chojni jehe.

¹⁷ Co ngoixin regioen Judea co icha región que te ngandanji regioen Judea conohe chojni ixin quehe joinchehe Jesús.

Tti chojni que rroanha Juan

(Mt. 11.2-19)

¹⁸ Juan, tti vancheguitte chojni, conohe cain jihi ixin chojni que vacao coequín na jehe. Cottimeja jehe vayé yó de jehe na,

¹⁹ co jehe rroanha na para ngain Jesús para joiganchianguihi na Jesús si ndoa jehe tti Cristo tti chonda que tsí, o ni chonda que rrochonhe na iná.

²⁰ Tti chojni que rroanha Juan vintteconchienne na ngain Jesús, co ndačo na ngain:

—Juan coetonna na para joiganchiangui na nganji jaha si ndoa jaha tti Cristo tti chonda que tsí, o ni xa chonda na que rrochoan na iná.

²¹ Ngain rato que jehe na joiji na, Jesús joinchexingamehe anto tsje chojni que vinttechonda ojejé chin, co tti vinttechonda espíritu jianha, co cai chjé jmacon tsje chojni chejo.

²² Mexinxin Jesús ndačo ngain chojni que rroanha Juan:

—Ttji ra co dindache ra Juan tti jaha ra vicon ra co tti jaha ra coinhi ra. Ttequinhi ra ixin tti chojni chejo, jai onchao dicon na, co tti chojni rrengo, jai onchao chji na, co tti chojni que vinttechonda chin lepra, jai ixonhi chin mé techonda na, co tti chojni que vaquinha, jai onchao ttinhi na, co tti chojni que ondavenhe, jai xechon na, co tti chojni que inchin ndadiguenhe de ngain espiritue, jai ocoinhi na ixin Dios rrochjé na iná vida naroaxin.

²³ Co anto chjoin para ixin tti chojni que sitticaon nganji na janha cain tiempo.

²⁴ Are savinttecji tti chojni que rroanha Juan, Jesús coexinhi ndache cain chojni que vittohe nttiha de ixin Juan, co ndačo:

—Are cjoí ra ngagaha jna tti xonhi chojni te para joitsjehe ra Juan, ¿quehe xaxaon ra rroguicon ra ngain jehe? ¿A xaxaon ra ixin joarrixaoen seguroha inchin ná nttaxiji que nchequingui chintto?

²⁵ Si jeha jamé, ¿quehe xaxaon ra rroguicon ra? ¿Aná xí que jingá lonto anto rentte? ¡Nahi, jeha jamé! Jaha ra chonxin ra ixin tti chojni que tengá lonto rentte, mé te ngain nchiandoha rey, chojni mé teha ngagaha jna.

²⁶ Mexinxin ¿quehe tipo de chojni xaxaon ra rroguicon ra? ¿Ani ná profeta de Dios? ¡Ján ndoa, co xí mé icha rentte que ná profeta!

²⁷ Juan, mé tti jindačoxin ngain tti jitaxin Palabré Dios:

Icha saho que jaha tsji, janha rrorroanha ná tti sicao joajnana, para que jehe mé sinchexjian nttiha para ixin jaha.

²⁸ Janha rrindattjo ra que de cainxin chojni xonhi iná profeta icha importante joí que jeha Juan tti ncheguitte chojni; pero masqui jamé, tti chojni que icha importanteha ngain tti parte que ttetonha Dios ngain ansén chojni, mé tti icha importante que Juan.

²⁹ Are coinhi na jiji, cain chojni co cain xicobrador de impuesto que joiguitte ngain Juan joatsoan na que Dios nchehe cain cosa inchin jiquininxin.

³⁰ Pero xifariseo co ximaestroey ley que čhoha xa para que Juan rrojinchequite xa, joinaoha xa tti jian que ndačo Dios rrojinchehe ngain xa.

³¹ Co Jesús ndačo:

—¿Quehe sintticaninxin chojni de ngain tiempo jiji? ¿Que xén te joarrixaoen na?

³² Joarrixaoen na te inchin joarrixaoen xannchinnchinchjan que dintte xan tsontaon xan ngain ndásin, co toyaotte xan icha xan amigoe xan co ndačo xan: “Janha na jointtachjian na són conixin ná nttaxo pero jaha ra tteha ra, mexinxin janha na tsje na canto que ttiaho joachjaon pero jaha ra tsjangaha ra.”

³³ Ixin Juan, tti ncheguitte chojni joí, co jehe jineha tsje ni diha vino, co jaha ra ndačo ra ixin jehe chonda ná espíritu jianha.

³⁴ Cottimeja joihi janha, tti Xí que joixin de ngajni, que jine co dihi vino, pero jaha ra ndačo ra ixin janha anto jine co anto dihi hasta coan na co ixin janha amigoe cain chojni que nchehe jianha, co cain xicobrador de impuesto.

³⁵ Pero tti nohe Dios, mé jian ixin chojni que Dios nchequinxin nchehe na jian.

Are Jesús ngain nchiandoha Simón, tti cjoy ná xifariseo

³⁶ Ná de xifariseo ndache xa Jesús ixin joiijine ngain nchiandoha xa co jehe Jesús cjoy ngain nchiandoha xa, co are ontitiha, jehe vehe ngain mesa.

³⁷ Co ntitiha ngain rajna mé vehe ná nchí que vanchehe ncha jianha; co are conohe ncha ixin Jesús cjoy joiijine ngain nchiandoha xifariseo mé, jehe ncha cjoy ncha conixin ná xoxao de marmol jíche de aceite xajni.

³⁸ Co joi ncha toenixin rotté Jesús, vettoxin nttajochjihi ncha co tsjanga ncha. Mexinxin vinttjite ndacon ncha rotté Jesús. Cottimeja jehe ncha joinchexemanxin ncha rotté Jesús conixin xajá ncha co coetoxin ncha rotté Jesús. Cottimeja coinga ncha aceite xajni rotté Jesús.

³⁹ Are xifariseo mé vicon xa cain jiji, jehe xa xaxaon xa: “Si xí jiji rrocji xa ná profeta ndoa, jehe xa rroconohe xa quensen jicatte xa, co quehe clase de nchí yá; rroconohe xa ixin nchí yá anto tsje cosa jianha nchehe ncha.”

⁴⁰ Cottimeja Jesús ndačo ngain xifariseo mé:

—Simón, janha chonda ná cosa que rrondattjo jaha.

Xifariseo mé ndačo xa:

—Ndachjenji na, Maestro.

⁴¹ Jesús ndačo:

—Vehe yó tti xí vintteca tomi ngain ná tti vacjadoa tomi. Ná de tti xí mé veca naho ciento de tomi, co tti iná veca cincuenta.

⁴² Pero ixin xonhi tomi vinttechonda cayoi tti xí mé, jehe tti cjoadoa tomi, joinchetjañehe cayoi tti xí mé tti tomi que jehe vintteca. Jai ndachjenji na jaha, ¿quexehe de cayoi tti xí mé icha sinao jehe tti vanjo tomi mé?

⁴³ Simón mé ndačo ngain Jesús:

—Janha xaxanxo que tti xí que vitjañehe icha tsje tomi.

Jesús ndačo:

—Ndoa tti ndačo.

⁴⁴ Cottimeja Jesús tsjehe ngain nchí mé co ndačo ngain Simón:

—¿Adicon jaha nchí jiji? Janha joixinhi nchiandoi, co jaha chjanaha jinda para cjoenixin rottena; pero nchí jiji cjoenna ncha rottena conixin ndacon ncha, co joinchexemanxin ncha conixin xajá ncha.

⁴⁵ Jaha coetoxinha na de joajna, pero jehe ncha, desde que janha joixinhi nchiandoi coexinhi ncha coetoxin ncha rottena hasta jaxon.

⁴⁶ Jaha coingaha na aceite ngataha jaha; pero jehe ncha cointtjite ncha aceite xajni ngain rottena.

⁴⁷ Mexinxin janha ndattjo que ixin jehe ncha anto rinao na ncha janha, co mé xago que tti anto tsje jianha que jehe ncha joinchehe ncha jai ovitjañehe ncha; pero tti chojni que tsjeha jianha vitjañehe, cai tjago que antoha rinao na janha.

⁴⁸ Cottimeja ndačo Jesús ngain tti nchí mé:

—Cain tti jianha que joinchehe ovitjañaha.

⁴⁹ Co cain chojni que te ngain mesa ntitiha conixin Jesús coexinhi na ndache chó na:

—¿Quensen xí jiji, que hasta nchao nchetjañehe xa tti jianha que nchehe chojni?

⁵⁰ Pero Jesús ndačo ngain tti nchí:

—Jaha ochonda vida naroxin ixin vitticaon na janha; mexinxin sattji contenta.

8

Cain nchí que vacjenguijna Jesús

¹ Después de cain jihi, Jesús vangaria ngain tsje rajna conixin tsje rajnanchjan para joidache chojni de ixin Dios co ixin Dios otsetonha ngain ansén na. Co vacao tti tteyó nirepresentanté jehe.

² Co nttiha vacao canxion nchí cai que jehe venguixin espíritu jianha de ngaxinhi cuerpoe ncha co vinttjian cain chin que vinttechonda cada ncha. Co de cain nchí mé, nttiha vehe María Magdalena tti vachjexin yáto espíritu jianha de ngain cuerpoe.

³ Co cai nttiha vehe Juana, nchihihi ná tattíta vinhi Chuza tti vaquetonha ngain nchiandoha Herodes; co cai nttiha vehe Susana co icha nchí que vacjenguijna ncha Jesús conixin tti jehe ncha vachonda ncha, jehe conixin tti chojni que vacao.

Ejemploe tti joiquenga trigo ngataon jngui

(Mt. 13.1-9; Mr. 4.1-9)

⁴ Tsje chojni de ngain tsje rajna cjoí na para joitsjehe na Jesús, co are oʒatte tsje chojni ngain Jesús, jehe nichjé na de ixin ejemplo; co ndačo ngain na:

⁵ —Ná xí cjoí xa joiquenga xa trigo ngataon jngui. Are jehe xa coexinhi xa cjoa xa trigo ngataon jngui, canxion noanchjan de trigo vinttji ngá nttiha, co are vatto chojni, ngachje na trigo mé. Co cai conttoa vittja va trigo mé co ndajoine va noanchjan mé.

⁶ Co ittoha noanchjan de trigo vinttji ngataha tti jí ttjao, co are trigo mé čhinhi, anto daca ndaxema ixin xonhi tjao vechonda ttjao.

⁷ Co ittoha noanchjan de trigo vinttji ngacjan canchaha co canchaha thinhi ca co icha daca vangui ca; icoančjandaha ca trigo vangui trigo.

⁸ Pero icha noanchjan de trigo vinttji noa tti jí jian jinche. Co are vangui trigo mé joanjo jian cosecha, ixin de ná noanchjan de trigo que vetsinga joiuchejjian hasta cien noanchjan.

Are Jesús jindačo cain jihi, jehe nichja soji ngain na, co ndačo:

—Si jaha ra ttinxin ra, ttinhi ra jian.

Quedonda Jesús joiuchegonda tsje ejemplo

(Mt. 13.10-17; Mr. 4.10-12)

⁹ Cottimeja tti chojni que vacao Jesús joanchianguihi na Jesús ixin quehe rročo ejemplo jihi.

¹⁰ Jehe ndačo ngain na:

—Jaha ra, Dios nttanoha ra tti jima de ixin quexén Dios tsetonha ngain ansén chojni; pero are janha nichjá icha chojni, nichjá na de ixin ejemplo para que are sicon na, sittohe na inchin rroguiconha na, co are tsinhi na, jehe na tsinxinha na.

Jesús ndačo quehe rročo ejemplo tti joiquenga trigo

(Mt. 13.18-23; Mr. 4.13-20)

¹¹ Jihi tti rročo ejemplo tti joiquenga trigo: Tti trigo rročo joanjé Dios:

¹² co tti trigo que vinttji ngá nttiha, mé rročo tti chojni que ttinhi joanjé Dios, pero tti inchnji co ndanchetjanji na de ngain ansén na tti joajna que coinhi na para que sitticaonha na co rrochondaha na iná vida naraoxin.

¹³ Co tti trigo que vinttji ngataha tti jí ttjao, mé rročo tti chojni que are ttinhi na joanjé Dios, jehe na anto čhjoin tonoho na dayé na joajna mé, pero ixin palabra mé techondaha na tsje noehe ngain ansén na, ditticaon na jecho

nchion, co are Dios daquehe prueba ngain na, jehe na incheha na tti ttetonha Dios.

¹⁴ Co tti trigo que vinttji ngagaha canchaha, mé rrocho tti chojni que ttinhi na joajné Dios, pero jehe na ncheha na caso. Jehe na nchehe na sigue inchin te na ngain vidé na, co icha xaxaon na ngain problemé na, co ngain cosé na, co ngain cosa chjoin que jí nttihi ngataha nontte. Cain cosa jihi tančhjandaha na para ditticaon na joajné Dios, co jamé chojni mé idanguiha na de ngain espiritue na.

¹⁵ Pero tti trigo que vinttji ngain jinche jian, mé tti chojni jian de ngain ansén, co anto rinao na ttinhi na co nchehe na caso joajné Dios. Co jamé ditticaon na cainxin tiempo, co jehe na anto dangui na de ngain espiritue na ixin ttenchjinha na palabré Dios.

*Ejemploe lámpara
(Mr. 4.21-25)*

¹⁶ Xonhi chojni sinchegacaon ná lámpara cottimeja jehe tsjanotaon lámpara o rrožangui lámpara ngangui saoen, sino que chojni mé chonda que saquehe lámpara ngataha ná cosa noi para que cain chojni que sixinhi nchia mé nchao sicon na joadingasán.

¹⁷ Xonhi cosa jima que tsononxinha, co xonhi cosa jima que te xaxaon ni ngain ansén ni que chojni tsonoeha; cain cosa chonda que tsononxin cosa.

¹⁸ Mexinxin jaha ra ttinhi ra jian; ixin tti chojni que chonda, Dios tsjenguijna para que rrochonda icha, pero tti chojni que xonhi chonda, Dios santsjehe hasta tti jehe xaxaon que ochonda.

*Janné Jesús co xanchó
(Mt. 12.46-50; Mr. 3.31-35)*

¹⁹ Cottimeja janné Jesús conixin canxion xanchó Jesús joiiji na tti jí Jesús, pero čhoħa conchienne na hasta tti ngaca Jesús ixin anto tsje chojni te nttiha.

²⁰ Cottimeja ná chojni viquetonhe Jesús:

—Janná conixin xanchó nttimé ndoja te na, co rinao na rronichjaha na jaha.

²¹ Pero Jesús ndačho:

—Cain tti chojni que ttinhi quehe ndačho joajné Dios co nchehe na inchin ndačho joajna jihi, cain chojni mé inchin jannana co xanchian.

*Jesús tajoaquehe čhintto conixin olé lago
(Mt. 8.23-27; Mr. 4.35-41)*

²² Ná nchanho Jesús conixin tti chojni que vacao joixinhi na ngaxinhi ná barco, co nttiha jehe ndačho ngain na:

—Sachjin na toenxin lago jihi.

Co sajcoi na.

²³ Co are jehe na tatetaonhe na jinda, Jesús tavejoa ngaxinhi barco. Co are de repente cjoa ná čhintto anto soji, que hasta ocoexinhi viquia jinda ngá barco, co ojoinao sarroxincanjingui barco jinda.

²⁴ Cottimeja vinttecji tti chojni que vacao Jesús para joinchexingamehe na Jesús, co ndačho na ngain:

—¡Maestro! ¡Maestro! ¡Ndatexincanjingui na jinda!

Cottimeja vingattjen Jesús co jehe coetonhe čhintto co olé lago que tasehe, co cayoi cosa mé jaicoa tavehe; icjoaha čhintto co icjoinha olé lago.

²⁵ Cottimeja jehe ndačho ngain tti chojni que vacao:

—¿Quedonda jaha ra chondaha ra confianza nganji na?

Pero jehe na anto vintteᵗaon na, co vinttegoan na admirado, co vintte-ganchianguihi chó na, naná na, co ndaᵗo na:

—¿Quensen xí jihi, que jehe xa ttetonhe xa ᵗhintto co jinda, co tonhe inchin jehe xa ndaᵗo xa?

Tti xí de ngain nontte Gadara que vechonda espíritu jianha
(Mt. 8.28-34; Mr. 5.1-20)

²⁶ Cottimeja joihi na ngain nontte Gadara que jí toenxin lago mé, ᵗhica Galilea.

²⁷ Are Jesús vanianxin de barco mé conchienen ngain jehe ná xí de ngain ná rajna de ngain nontte Gadara. Antó sé xí jihi chonda xa tsje espíritu jianha. ᵗonhi lontto vengá xa, ni jeha ngain ná nchia vehe xa, sino que jehe xa vehe xa nganguinihi tti vacjavá chó chojni que ndavaguenhe.

²⁸ Are jehe xí mé vicon xa Jesús, jehe xa vettoxin nntajochjihí xa ngain Jesús co espíritu jianha joinchecoyao xa co joinchenichja xa co ndaᵗo xa:

—¿Quedonda dixintte nganji na, jaha Jesús, Xenhe Dios que ttjen ngajni? Nttatsanha ñao que ncheguetanha na tangui janha.

²⁹ Jehe xí mé ndacho xa jañá ixin Jesús ojittetonhe espíritu jianha que sachjexin de ngain xí mé. Otsje nntiha espíritu jianha tse xa. Co masqui chojni vaquiixin na xa conixin cadena de rá xa co de rotté xa para vagueᵗoa xa; pero are espíritu jianha vatse xa, jehe xa vaconᵗhintaon xa cadena co espíritu jianha savanchequina xa para ngá tsaga o ngagaha jna tti ᵗonhi chojni te.

³⁰ Jesús joanchianguihi xí mé:

—¿Queᵗén dinhi jaha?

Co jehe xa ndaᵗo xa:

—Janha dinhi na Legión.

Jehe xa ndaᵗo xa jañá ixin anto tsje espíritu jianha vehe ngaxinhi cuerpoe xa.

³¹ Co cain espíritu mé ndache Jesús ixin rinaoᵗa tsji infierno co joinchetsenhe ñao Jesús que jehe rrorroanha para ngain infierno.

³² Co ixin nntiha chian tene tsje cocochi ngain ná jnanchjan, cain espíritu jianha mé joinchetsenhe ñao Jesús ixin jehe tsanᵗhanda cain espíritu mé sixinhi ngaxinhi cain cocochi mé. Co Jesús joanjo joachaxin.

³³ Cottimeja cain espíritu jianha mé vachjexin de ngaxinhi cuerpoe xí jihi co savintteguixinhi ngaxinhi cocochi. Co cain cocochi jihí savinttecant-jenhngui va jinda, co nntiha ndavintteguenxin cainxin va ixin vintteconhe va jinda.

³⁴ Cain tti chojni que vaquingaria cocochi, are jehe na vicon na cocochi tecjonhe va jinda, jehe na anto ᵗaon na co coinga na joindache na chojni ngain rajna co cai nite nchiandoha ngataon jngui.

³⁵ Co cain chojni mé cjoí na joitsjehe na quehe conhe nntiha. Co are joihi na tti jí Jesús, vicon na nntiha tají tti xí que vachjexin cain espíritu jianha de ngaxinhi cuerpoe; tají xa ᵗhica rotté Jesús, co ojingá xa lonttoe xa, co joarrixaoen xa ondacoa jí; co cain chojni mé vintteᵗaon na.

³⁶ Co cain chojni que vicon quehe conhe nntiha ndaᵗo na queᵗén xingamehe tti xí que vechonda espíritu jianha.

³⁷ Mexinxin cainxin chojni de ngain regioen Gadara joinchetsenhe na ñao Jesús ixin jehe satsjixin de nntiha, ixin jehe na anto vintteᵗaon na. Mexinxin Jesús coani barco co sacjoi.

³⁸ Tti xí que vačhjexin cain espíritu jianha de ngain cuerpoe joinchetsenhe xa ñao Jesús para que Jesús rroganjo joachaxin sarrojicaó xa ngain jehe, pero Jesús coetonhe xí mé que sittohe xa, co ndačho ngain xa:

³⁹ —Cjan para nchiandoi, co ttequinhi cain chojni cain tti joinchehe Dios nganji.

Co tti xí mé sacjoi co coequín cain chojni ngoixin rajna tti joinchehe Jesús ngain jehe.

Are xingamehe xannčichjenhe Jairo, conixin ná nčí que catte lonttoe Jesús

(Mt. 9.18-26; Mr. 5.21-43)

⁴⁰ Are Jesús cjan para toenixin lago mé, cain chojni que te nttiha anto ché na ixin joiji Jesús, ixin cainxin na techonhe na Jesús.

⁴¹ Cottimeja jói ná xí que vinhi Jairo, xí mé vaquetonha xa ngain nihngo nttiha. Xí jihi vettoxin nttajochjihi xa ngain Jesús co joinchetsenhe xa ñao ixin jehe rrocji nchiandoha xa

⁴² ixin jehe xí mé vechonda xa nacoaxinxon xannčichjenhe xa que vechonda xan tteyó nano. Co are mé ondajindenhe xannčichjenhe xa. Are Jesús sacjoi nchiandoha Jairo conixin jehe Jairo, rroé anto tsje chojni que hasta anto contedo na ngaca Jesús.

⁴³ Co de ngacjén cain chojni mé nttiha conchienen ná nčí que venihi ncha tteyó nano. Jehe ncha veguenguihi ncha jni, co jehe nčí mé ojehe ncha joinchexinhí ncha de ngain xinchexoan cainxin tti vechonda ncha, pero ní ná xinchexoan čhoja joinchexingameha xa ncha.

⁴⁴ Jehe nčí mé conchienen ncha ngaca Jesús notonxin co catte ncha rioho ngandeh lonttoe Jesús que jitsá. Co rato mé tavehe tti jni que venguihi ncha.

⁴⁵ Cottimeja Jesús joanchiangui co ndačho:

—¿Quensen catte na?

Pero ixin cain chojni ndačho na xonhi quensen, mexinxin Pedro conixin cain xicompañeroe ndačho xa:

—Maestro, cain chojni tonttedo na ngaca soixin, co tonxinca na de ná lado co iná lado, mexinxin ¿quedonda soixin xa danchiangui quensen catte?

⁴⁶ Pero Jesús ndačho:

—Jí ná chojni que catte na, ixin janha conona que jointtaxingamá ná chojni conixin joachaxin que janha chonda.

⁴⁷ Nčí mé are conohe ncha ixin conohe Jesús, jehe ncha conchienen ncha jixanga ncha de joaxaon, co vettoxin nttajochjihi ncha ngaca rotté Jesús. Co ngattoxon con cain chojni nttiha ndačho ncha ngain Jesús ixin quedonda jehe ncha catte ncha co quexén ngain rato mé ndacoxoehenhe ncha.

⁴⁸ Cottimeja Jesús ndačho ngain ncha:

—Jaha coxoanha ixin vitticaon na. Jai sattji contenta.

⁴⁹ Xa jinichja Jesús yá, are ojoí ná chojni de ngain nchiandoha Jairo, tti vaquetonha ngain nihngo nttiha; co ndačho chojni mé ngain Jairo:

—Xannčichjanha ondavene xan; inchemolestaha ximaestro.

⁵⁰ Pero are Jesús coinhi yá, jehe ndačho ngain Jairo:

—Jaha xaonha; jehó ditticaon na janha, co xanha rroxingamehe xan.

⁵¹ Are joiji na nchiandoha Jairo, Jesús coančjandaha vixinhi ní ná chojni, jehó jehe, Pedro, Jacobo, Juan, co jehe ndodé xannčichjan conixin janné xan.

⁵² Cain chojni que te nttiha tetsjanga na co tetaxin na xan joachjaon. Pero Jesús ndačho ngain na:

—Tsjangaha ra; xannchichjan ndadiguenha xan; sino que tajioa xan.

⁵³ Pero jehe na cjoanoa na Jesús ixin ndacho jañá, ixin cain na venohe na que xannchichjan ondavenhe xan.

⁵⁴ Cottimeja Jesús tsehe rachjenhe xannchichjan co ndacho sén ngain xan: —Jaha xannchichjan, dingattjen.

⁵⁵ Co jehe xannchichjan xechon xan iná, co ngain rato mé jehe xan vingattjen xan. Co Jesús coetonha rrochjé na xan sine xan.

⁵⁶ Nindoha xannchichjan anto vinttegoan na admirado, pero Jesús coetonhe na ixin xonhi chojni rrondate na tti joinchehe jehe.

9

Are Jesús rroanha tti tteyó chojni que vacao

(Mt. 10.5-15; Mr. 6.7-13)

¹ Jesús nichjé tti tteyó chojni que vacao, co jehe joanjo joachaxin ngain na para que jehe na nchao senguixin na cain clase de espíritu jianha de ngaxinhi cuerpoe chojni, co para sinchexingamehe na chojni nihi de ixin chin que chonda.

² Jehe rroanha na para joidache na chojni ixin Dios osiquetonha ngain ansén na, co para joinchexingamehe na chojni nihi.

³ Jehe ndacho ngain na:

—Xonhi ttijho ra de tti sondaha ra ngatja nntiha, ni nttacotto, ni bolsa ni niottja, ni tomi. Ttjho ra jeho nacoa camisa que tengaha ra co ttjioha ra yó camisa.

⁴ Cada rajna que saso ra dittoha ra jeho nacoa nchia hasta que satsjixin ra de ngain rajna mé.

⁵ Si chonja rajna sinaoha na tsinhi na tti jian joajna que jaha ra tsijho ra jaha ra sattjixin ra de nntiha, co tontsjenga ra jinche que yá rottea ra, mé ná señal que vitticaonha na jaha ra.

⁶ Jamé sacjoi cain chojni mé, cjoí na ná co ná rajna, joidache na chojni tti jian joajna co joinchexingamehe na chojni nihi.

Are ndavenhe Juan, tti vanheguitte chojni

(Mt. 14.1-12; Mr. 6.14-29)

⁷ Are xigobernador Herodes conohe xa cain tti jian que vanchehe Jesús, jehe xa anto xaon xa, ni inoeha xa quehe xaxaon xa ixin canxion chojni ndacho na que mé Juan, tti vanheguitte chojni, co jai xechon.

⁸ Icanxin na vandacho na ixin Jesús, jehe tti profeta Elías que cononxin iná, co icanxin na vandacho na que ixin Jesús ná de tti profeta que joí are icha saho co jai xechon.

⁹ Pero Herodes ndacho:

—Janha mismo coetonha chinji já Juan, tti vanheguitte chojni. Mexinxin ¿quensen xí jiji que chojni ttequin na anto tsje cosa jian que jehe xa rridinchehe xa?

Co Herodes anto cjoé quexén para que jehe rroguicon Jesús.

Are Jesús joanjo joine naho mil xí

(Mt. 14.13-21; Mr. 6.30-44; Jn. 6.1-14)

¹⁰ Are tti tteyó chojni que rroanha Jesús cjanxin na de tti joidacho na tti jian joajna, jehe na ndacho na ngain Jesús tti jehe na joinchehe na. Cottimeja Jesús sajoicao na ngain ná lugar tti xonhi chojni te, chian ngain rajna Betsaida.

11 Pero are conohe icha chojni ixin ttinó sacjoi Jesús, jehe na rroé na co jehe nichjé cain na, co ndačo ngain na ixin quexén siquetonha Dios ngain ansén na, co joinchexingamehe cain ninihi.

12 Co are ondacotsocjin, conchienne tti tteýo chojni que vacao Jesús, co ndačo na ngain:

—Ndache cain chojni que satsji na, para sasinchejogaha na co siquehna na tti sine na ngain rajna o nchia que te chian, ixin nttihi tti te na xonhi jí.

13 Pero Jesús ndačo ngain na:

—Jaha ra danjo ra tti sine na.

Jehe na vinttendačo na:

—Janha na xonhi chonda na, jehó naho niottja co yó copescado, o çapoco janha na siquehna na tti sine cainxin chojni jilhi?

14 Ixin cain chojni mé, jehó xí inchin naho mil xa. Pero Jesús ndačo ngain tti chojni que vacao:

—Ndache ra na tasintte na de cincuenta na cada grupochjan.

15 Co jamé joinchehe na; tavintte na cainxin na.

16 Cottimeja Jesús coá tti naho niottja mé co tti yó copescado. Co jehe tsjehe para ngajni, joanjo gracias ngain Dios de ixin niottja mé conixin copescado, co después de váña niottja, jehe joanjo nio ngain tti chojni que vacao, para que jehe na conchjejehe na cainxin chojni mé jehe niottja conixin copescado.

17 Cainxin chojni mé joine na co cojehe na jian, co después xa joinchecaon na tteýo ntaça de ixin tti niottja rioho que xexin joine na.

*Pedro ndačo que ixin Jesús, mé tti Cristo
(Mt. 16.13-19; Mr. 8.27-29)*

18 Ná nchanho are Jesús jincheoanxinhi Dios, co jehó tti chojni que vacao nttihi tate na ngain, jehe joanchiangui ngain na co ndačo:

—¿Quehe ndačo chojni ixin quensen na janha?

19 Jehe na vinttendačo na:

—Canxion na ndačo na que ixin soixin Juan, tti vancheguitte chojni; icanxin na ndačo na que ixin soixin tti profeta Elías; co icanxin na ndačo na que ixin soixin ná de tti profeta que vacji are saho.

20 Cottimeja Jesús joanchiangui ngain jehe na, co ndačo:

—Co jaha ra çquehe ndačo ra ixin quensen na janha?

Co Pedro ndačo ngain Jesús:

—Soixin tti Cristo que joixin de ngain Dios.

*Are Jesús ndačo ixin jehe ndasenhe
(Mt. 16.20-28; Mr. 8.30—9.1)*

21 Pero Jesús anto coetonhe na ixin xonhi chojni rrondate na.

22 Cottimeja Jesús ndačo ngain tti chojni que vacao:

—Janha, tti Xí que joixin de ngajni, chonda que anto tsje cosa tangui tsonna, co cain xittetonha ngain nihngo, co cain xidána que ttetonha ngain icha xidána, conixin cain ximaestroey ley Israel, sinaoha na xa. Co nasoenxon na xa, pero ngain nchanho nixxin janha rroxechon na.

23 Después jehe ndačo ngain cain chojni que te nttiha:

—Si çhonja chojni rinao sitticaon na janha, pero chonda que rrotjañehe tti jehe icha rinao para sitticaon na janha cainxin nchanho, masqui tangui tsonhe co hasta puede nasenxon de ixin causananxin janha.

²⁴ Ixin tti chojni que rinao xonhi tsonhe vidé, mé ndasinchetján vidé; pero tti chojni que sinchetján vidé de ixin causananxin janha, chojni mé rrochonda iná vida naroaxin.

²⁵ Ixin xonhi xé que ná chojni sacha cainxin cosa que jí ngain mundo jihi co ndasitján jehe mismo.

²⁶ Ixin tti chojni que tosoé de ixin janha co de ixin palabrana, cai janha, tti Xí que joixin de ngajni, tsosoahna de ixin jehe chojni mé are janha sihi inchin ná Rey conixin cain gloria que chonda Ndodana co que chonda cain ángel que te ngain Ndo.

²⁷ Atto seguro tti rrindattjo ra, que chonja de jaha ra xo te ra nttihi jai, xa senha ra hasta que siconja ra que Dios siquetonha ngain ansén chojni.

Are vicon na Jesús anto ojé

(Mt. 17.1-8; Mr. 9.2-8)

²⁸ Inchin jni nchanho después de Jesús ndacho cain jihi, jehe coani ná jna para joinchecoanxinhí Dios co joicao Pedro, Jacobo co Juan.

²⁹ Co are Jesús jinchecoanxinhí Dios, ngá con Jesús ndavitoxinhí co lonttoe ndacjan lontto anto roa co hasta jidaquima lontto.

³⁰ Cottimeja cononxin yó xí que tatetjao xa Jesús, co cayoi xí mé, ná Moisés co iná Elías.

³¹ Co ngoixin ngandanji na vehe ná joadingasán anto chjoin. Co cjoao na ixin quexén ndasenne Jesús ngain Jerusalén, co ixin anto tangui ndasenne.

³² Masqui Pedro co tti cayoi xicompañeroe anto chjé na cottachin, pero jehe na tavinttetsjehe na co vicon na gloria que chonda Jesús, co vicon na tti yó xí canxin que jói ngain Jesús.

³³ Are cayoi xí mé saconcjin xa de ngain Jesús, cottimeja Pedro ndacho ngain Jesús:

—Maestro, atto nchao ixin te na janha na nttihi, janha na sinttachjian na ní nchiachjan; ná para ixin soixin, ná para ixin Moisés, co iná nchiachjan para ixin Elías.

Pero Pedro noeha quehe ndacho ngain rato mé.

³⁴ Co Pedro xa jinichja jañá are jói ná ttjoi ngain na co jehe na ndavittohe na ngacjan ttjoi mé. Pedro co cayoi xicompañeroe vinttexaon ixin ndavittohe na ngacjan ttjoi mé.

³⁵ Cottimeja de ngacjan ttjoi mé coinxin na tté Dios que ndacho:

—Yá tti Xanhna que anto rinaho. Ditticaon ra tti rrondattjo ra Xan.

³⁶ Después que nichja Dios jañá, vicon na que Jesús jehó tají nttiha. Jehe na vinttetencoá na, co xonhi chojni coequín na tti jehe na vicon na.

Jesús joinchexingamehe ná xanxichjan que vechonda espíritu jianha

(Mt. 17.14-21; Mr. 9.14-29)

³⁷ Ndoexin are vanianxin na de ngain jna mé, anto tsje chojni joichoexin na Jesús ngatja nttiha.

³⁸ De ngayé cain chojni mé, ná xí nichja xa sén co ndacho xa ngain Jesús:

—Maestro, nttatsanha ñao, tsjehe xanxichjanhna ixin jehó xan jihi chonda.

³⁹ Ná espíritu jianha tse xan co nchecoyao xan, co tadetsinga xan xá ndadenhe xan co hasta ttochjo ttixin rroha xan. Antó ncheguetan xan tangui co xonhi rato tachjanda xan para tadehe xan chjoin.

⁴⁰ Janha ojointtatsán ñao chojnia que chjiho ixin rrogantsje na espíritu jianha yá, pero coixinha na.

⁴¹ Jesús ndaĉho:

—Ĵaha ra Űo chojni que ditticaonha ra co jianha ra! ĴHasta tti quesa chonda que sarihi nganji ra cō tsixinna nganji ra? Sicohna xanha nntiĥi.

⁴² Pero are jehe xanxichjan mé jitonchienhe xan ngain Jesús, espíritu jianha mé joincheguenda xan, co joanca xan ngataha nontte. Pero Jesús joinchesattehe espíritu jianha mé, co jehe joinchexingamehe xanxichjan co joanjo xan ngain ndodé xan.

⁴³ Co cainxin chojni que te nntiĥa anto vinttegoan na admirado de ixin tti anto tsje joachaxin que chonda Dios.

Jesús ndaĉho iná ixin jehe ndasenhe

(Mt. 17.22-23; Mr. 9.30-32)

Are cain chojni mé Űa teŰaxaon na de ixin tti jian que joinchehe Jesús, jehe ndaĉho ngain tti chojni que vacao:

⁴⁴ —Ttini ra jian tti janha rrondattjo ra, co tjañaha ra que janha, tti Xí que joixin de ngajni, sinchechienhe na na ngain xí jianha.

⁴⁵ Pero tti chojni que vacao vaquinxinha na tti jehe vandaĉho ngain na, ixin Űa Űonhi joachaxin vinttechonda na para coinxin na. Co jehe na Űaoncoa na para joanchianguihi na Jesús ixin quehe rroĉho tti jehe ndaĉho.

ĴQuensen tti icha importante?

(Mt. 18.1-5; Mr. 9.33-37)

⁴⁶ Cottimeja tti chojni que vacao Jesús, coexinhi na cjoao chó na ixin quensen de jehe na tti icha importante,

⁴⁷ pero Jesús conohe quehe tendache chó na. Cottimeja jehe cjóa ná xanxichjan co joaquehe xan ngaca jehe,

⁴⁸ co ndaĉho ngain jehe na:

—Tti chojni que sayé ná chjan inchin xanxichjan jiĥi conixin nombrena ixin ditticaon na janha; chojni mé sayehna janha cai. Co tti chojni que sayehna janha, cai sayé tti rroanha na janha. ĴArinao ra tsonoha ra quensen icha importante? Tti rrocjan icha importanteha ngayaha ra, mé tti sehe icha importante ngattoxon con na janha.

Tti chojni que ningacoanha na, chojni mé jí nganji na

(Mr. 9.38-40)

⁴⁹ Cottimeja Juan ndaĉho ngain Jesús:

—Maestro, janha na vicon na ná tti jidengui espíritu jianha conixin joachaxin nombrea; co janha na ndattjan na que isincheha jamé, ixin jehe ĉjiĥa nganji na.

⁵⁰ Pero Jesús ndaĉho:

—Cayacoenha ra chojni mé, ixin tti chojni que ningacoanha na, jehe jí nganji na.

Jesús joinchesattehe Jacobo co Juan

⁵¹ Are ojoiconchiaon tiempo que Jesús sacojín para ngajni, jehe Űaonha para sacjoi ngain Jerusalén.

⁵² Jehe rroanha canxion chojni que joicao joajné icha saho, co chojni mé cjoi na ngain ná rajna ngain regioen Samaria para joicjé na ná nchia tti sintte jehe na conixin Jesús.

⁵³ Pero chojni samaritano mé ĉhoĥa na joanjo na joachaxin nntiĥa ixin chonxin na que chojni Jesús conixin jehe satettji na para Jerusalén.

⁵⁴ Are Jacobo co Juan conohe que ixin nisamaritano ĉhoĥa na danjo na joachaxin, jehe ndaĉho ngain Jesús:

—¿Arinao soixin que tsetonha na janha na que rroxincanji xohi de ngajni, para soen cain chojni yá inchin joinchehe profeta Elías?

⁵⁵ Cottimeja Jesús ngaria tsjehe na, co joinchesattehe na, ndačo:

—Jaha ra noaha ra quehe clase de espíritu chonda ra.

⁵⁶ Ixin janha, tti Xí que joixin de ngajni, joiha para nasoenxon chojni, sino que para rrochjaha na vida nroaxin.

Cottimeja sacjoi na para ngain iná rajna.

Tti chojni que joinao rrogacao Jesús

(Mt. 8.19-22)

⁵⁷ Are tettji na ngatja nttiha, ná xí ndačo xa ngain Jesús:

—Janha rinaho sacjin na cain lugar tti soixin sacji.

⁵⁸ Jesús ndačo ngain tti xí mé:

—Cain condanixa chonda va cuevé va, co cain conttoa chonda va caqué va, pero janha, tti Xí que joixin de ngajni, chondaha ni ttinó saričhin.

⁵⁹ Jesús ndačo ngain iná tti xí:

—Jaha chjin na.

Pero tti xí mé ndačo:

—Nttatsanha ñao, chonna na saho ndasenja ndodana para que janha tsjavá ndo.

⁶⁰ Jesús ndačo:

—Tančhanda tti chojni que chondaha vida nroaxin tsjavá chó na; pero jaha ttji co dindache chojni ixin Dios osiquetonha ngain ansén na.

⁶¹ Cottimeja iná tti xí ndačo ngain Jesús:

—Janha rinaho satsjin na, pero saho chonna na tsji sinttanoa ninchiana.

⁶² Pero Jesús ndačo:

—Tti jitse ningue, cottimeja tsjehe para noton, chojni mé xonhi xé para ngain tti ttetonha Dios.

10

Are Jesús rroanha tti setenta chojni

¹ Después de cain jihi, Jesús coinchiehe isetenta chojni, co jehe saho rroanha de yó na co yó na ngain cain rajna co icha lugar chian nttiha tti jehe chonda que cjoí después.

² Co ndačo ngain na:

—Atto seguro tti rroundattjo ra, que coseché Dios atto tsje, pero ninchehe xa tsjeha na. Mexinxin nchetsenhe ra ñao Xinajni para que jehe rrorroanha icha ninchehe xa para tsjejo na cain cosecha jihi.

³ Ttji ra jai jaha ra co xaxaon ra que janha rroanha ra inchin coleco ngayé condanixa.

⁴ Ttjioha ra bolsa, ni tomi, ni icha catte que jecho tti ca jaha ra techjanga ra. Co tadinttengattjenha ra para chjehe ra chojni joajna ngatja nttiha, ixin jamé sinchetjanguí ra tiempo.

⁵ Are saso ra ngain ná nchia, saho danjo ra joajna co ndačo ra: “Que chojni de ngain nchia jihi tsonohe čhjoin ngain ansén.”

⁶ Co si ngain nchia mé te chojni jian, ján, chojni mé tequininxin tti joajna que jaha ra sanjo ra; pero si nahi, joajná ra mé sarrocjan nganji ra.

⁷ Are saso ra ngain ná rajna, dittoha ra jecho ngain nacoa nchia co jintte ra co dihi ra tti rrochjá ra na de ngain nchia mé. Ixin tti nchehe xa jiquininxin rroxenguehe hna. Chondaha ra que sittoha ra ojejé nchia.

⁸ Are saso ra ngain ná rajna tti chojni ján sayaha ra, jintte ra cain tti rrochjá ra na.

⁹ Nchexingamehe ra chojni nihi que te ngain rajna mé, co ndache ra na: “Ochian joí tiempo para Dios siquetonha ngain ansean ra.”

¹⁰ Pero si saso ra ngain ná rajna tti rroçhoaha chojni sayaha ra na, jaha ra dachje ra para ngá nttiha co ndaço ra:

¹¹ “Hasta tti jinche de ngain rajná ra jihi que tse rotena na, tsontsjenga na para ná señal que jaha ra vitticaonha ra joajna que joiquianha ra. Pero xaxaon ra que tti ttetonha Dios ochian joí nganji ra.”

¹² Janha rrindattjo ra seguro, que para ngain nchanho que Dios sinchejuzguehe cainxin chojni, are mé chojni de ngain rajna que vitticaonha na joajné Dios icha soji castigo sayé na que tti castigo que vayé chojni de ngain ciudad de Sodoma.

*Rajna que vintteguitticaonha
(Mt. 11.20-24)*

¹³ ¡Anto tangui tsonha jaha ra chojni de ngain rajna Corazín! ¡Co anto tangui tsonha jaha ra, chojni de ngain rajna Betsaida! Ixin si cain milagro que jointtaha ngayaha ra rroconhe ngayé chojni de ngain ciudad de Tiro co Sidón, seguro que chojni mé osé rroquentoxinhi na vidé na de tti jianha que vanchehe na. Co para rrocjago na ixin jehe na orroquentoxinhi na vidé na, rroguinttengá na lontto ttie co rroguinga na nntesoguihi.

¹⁴ Pero ngain tti nchanho que Dios sinchejuzguehe cainxin chojni, are mé jaha ra sayehe ra castigo icha soji que chojni de ngain Tiro co Sidón.

¹⁵ Co jaha ra de ngain rajna Capernaum, ¿A xaxaon ra que jaha ra tsji ra para ngajni? Nahi, jeha jamé, ixin jaha ra tsjixin já ra ngain infierno.

¹⁶ Jesús xa ndaço ngain chojni:

—Tti chojni que sitticaon tti rrondaço jaha ra, cai sitticaon na na janha. Co tti chojni que sitticaonha tti rrondaço ra, cai chojni mé sitticaonha na na janha. Co tti chojni que sitticaonha na janha, cai sitticaonha na tti rroanha na janha.

Are cjan tti setenta chojni

¹⁷ Cottimeja sacjoi tti setenta chojni co después cjan na anto contento, co ndaço na:

—Hasta cain espíritu jianha vitticaon joinchehe tti ndačhjan na are nichja na conixin joachaxín nombrea soixin.

¹⁸ Jesús ndaço ngain na:

—Ján, ixin janha vicon que xén vetsingaxin Satanás de ngajni inchin ná rayo.

¹⁹ Janha chjaha ra joachaxin para tsingachje ra conché conixin contanchia, co para tsixinha ra ngain tti jianha, co xonhi tsonha ra.

²⁰ Pero tonoaha ra çhjoin ixin espíritu jianha ditticaon co nchehe tti ndaço ra, sino que ixin nombrea ra ojitaxin ngajni.

*Ndodaha conixin Xenhe Ndo
(Mt. 11.25-27; 13.16-17)*

²¹ Ngain rato mé, Jesús anto ché de ixin Espíritu Santo, co jehe ndaço:

—Janha rrinttacoanxinha soixin, que joinchechjian nontte co joinchechjian ngajni, ixin tti chojni que chonda confianza nganji soixin inchin nchinnchinchjan chonda confianza ngain ndodé, soixin cjoagohe

chojni mé tti soixin coemehe tti chojni que anto nohe co tti chojni que anto tinxin. Ján, Padre, jañá joinchehe soixin ixin jañá rinao.

²² 'Nnodana Ndo chjana joachaxin para tteonha cainxin cosa. Xonhi chojni nohe quensen tti Xenhe jehe Ndo, sino que jehe Ndo mismo nohe Ndo quensen mé. Co xonhi chojni nohe quensen jehe Ndo, sino que jehe Xenhe Ndo, tti Xan nohe, conixin cain tti chojni que jehe Xan sinao Xan sinchegatsoan Xan jehe Ndo.

²³ Cottimeja Jesús tsjehe ngain chojni que vacao co ndaço ngain jeho na: —Anto chjoin para ixin tti chojni que tedicon tti jaha ra tedicon ra jai,

²⁴ ixin tsje profeta co tsje rey joinao na rroguicon na jihi, tti jaha ra tedicon ra, pero jehe na viconha na. Co jehe na joinao na rroquinhí na tti jaha ra tteitinhí ra jai, pero coinha na.

Ejemploe ná chojni jian de ngain Samaria

²⁵ Cottimeja ná ximaestroe ley Israel cjoí xa joitsjehe xa Jesús jeho para joincheyehe xa Jesús, co joanchiangui xa ngain co ndaço xa:

—Maestro, ¿quehe sinttaha janha para rrochonda iná vida naroaxin?

²⁶ Jesús ndaço ngain xa:

—¿Quehe jitaxin ngain ley que vayé Moisés? ¿Quexén cho ley mé?

²⁷ Jehe ximaestroe ley mé ndaço xa:

—Ngain ley mé jindaço: “Rinao Dios conixin ngoi ansean, conixin ngain almá, conixin ngoi fuerzá, conixin ngoi joarrixaoan; co rinao cainxin nivecinoa inchin rinao cuerpoa jaha.”

²⁸ Cottimeja Jesús ndaço ngain xa:

—Nchao jí tti jaha ndaço. Sí jaha sinchehe cain yá, ján rrochonda iná vida naroaxin.

²⁹ Pero ximaestroe ley mé joinao xa rroguittohe xa jian ngattoxon con Jesús de ixin tti ndaço xa, mexinxin joanchiangui xa ngain Jesús co ndaço xa:

—Pero, ¿quensen vecinona?

³⁰ Cottimeja ndaço Jesús ngain xa:

—Ná xí joixin xa de Jerusalén para sajittji xa ngain rajna Jericó, co ngatja nntiha cayacoen xa canxion xichehe, co cain xichehe mé coehe xa jehe tti xí mé cainxin tomí co hasta lonttoe que jingá, co anto goen xa jehe tti xí mé, hasta merocoa narrogoenxon xa. Cottimeja savintteci xa.

³¹ Co nchion después nntiha vatto ná xidána judío, pero are jehe xa vicon xa que nntiha tajitsinga tti xí mé, jehe xidána mé vatto ojé lado.

³² Cai nonttiha vatto ná chojni razé Leví, pero are jehe vicon tti xí que tajitsinga nntiha, cai vatto ojé lado.

³³ Pero nchion después nntiha vatto ná xí samaritano, co are jehe xa vicon xa tti xí judío que tajitsinga ngandehe nntiha mé, jehe xa coiaconoehe xa.

³⁴ Cottimeja jehe xa conchiennehe xa ngaca tti xí mé, co joinchexoennehe xa cain tti diconihi ngain cuerpo conixin aceite co vino, co coensia xa jian. Cottimeja jehe xa joinchetaha xa colochoehe xa co sajoicao xa ngain ná nchia, co nntiha jehe xa venda xa.

³⁵ Co ndoexin are jehe xí mé sacjoi xa, joantsje xa yó tomi que anto rentte co joanjo xa ngain tti nchiandoha mé, co ndaço xa ngain: “Darinda xí jihi, co si jaha sinchexinhí icha tomi ixin jehe xa, janha tsjengaha hna are rrocjan na.”

³⁶ Mexinxin ndachjenji na ¿quexehé de tti ní xí mé tti joinchehe inchin ná nivecinoe tti xí que nihi?

³⁷ Ximaestroe ley ndačho xa:

—Tti xí que coiaconoehe jehe tti nihi mé.

Cottimeja Jesús ndačho ngain xa:

—Janché, jaha cai ttji co nchehe jamé.

Are Jesús ngain nchiandoha Marta co María

³⁸ Jesús joinchehe sigue sacjoi, co joihi ngain ná rajna nchín, co nttiha ná nchí que vinhi Marta joanjo ncha nchiandoha ncha tti vittohe Jesús.

³⁹ Jehe Marta vechonda ná xanchó que vinhi María, co are mé, jehe María tavehe čhica rotté Jesús para que coinhi quehe ndačho Jesús.

⁴⁰ Pero Marta anto jidoan purado de jinchehjian comida, ixin jeho jinchehe xa, mexinxin conchienne co ndačho ngain Jesús:

—¿Ačaxaonha que ixin xanchian ttinttona xan janho rrinttaha cain xa jihi? Ndache xan que tsjenguijna na xan.

⁴¹ Pero Jesús ndačho ngain Marta:

—Marta, Marta, jaha anto čaxaon de ixin cain cosa yá,

⁴² pero jí jeho nacoa cosa que anto importante. Co María ocoinchiehe tti cosa icha importante mé, co čonhi chojni santsjehe cosa mé.

11

Are Jesús cjoago quexén sinchecoanxinhi ni Dios

(Mt. 6.9-15; 7.7-11)

¹ Ná nchanho Jesús jinchecoanxinhi Dios ngain ná lugar, co are joexin joinchecoanxinhi Dios, ná de tti chojni que vacao ndačho ngain:

—Nchecoanna ni ra sinttacoanxian na Dios, jańá inchin Juan, tti vanche-guitte chojni, joinchecoanxian chojni que vacao.

² Jesús ndačho:

—Are sinchecoanxinhi ra Dios, ndačho ra:

Padre soixin que ttjen ngajni,
nombrea soixin jiquininxin tsosayehe.
Siquetonha nttihi soixin.

Co tsonhe inchin soixin rinao nttihi ngataha nontte, jańá inchin tonhe nttiha ngajni.

³ Chjana ra jai tti sine na que rrogondana na.

⁴ Nchetjańana ni ra tti jianha que jointtaha na, ixin janha na cai nttatjańá na tti chojni que nchehe jianha nganji na.

Nchegattoha ni ra tangui: tančhjandaha ni ra ngain tti jianha.

⁵ Cai ndačho Jesús ngain na:

—Tsín na ná ejemplo, que ná de jaha ra chonda ra ná xiamigoa ra, co ngosine ttie siji xa nchiandoi ra co rrondattjo ra xa: “Amigo, nchecjen na ni niottja,

⁶ ixin ná xiamigona nandá joixin xa viaje, co joihi xa nchiania co janha čonhi chonda que rochjaha xa.”

⁷ Co si jaha ra rrondačho ra desde ngaxinhi nchiandoi ra: “Nchemolestaha na; ocoejá puerta co otarričhinquinha xanhna ngataha cama; čhoha singat-tjen para rrochjaha tti jaha rinao.”

⁸ Pero si xiamigoa ra mé sinchehe xa sigue rronichjaha ra xa jaha ra singattjen ra co rrochjehe ra xa tti jehe xa rinao xa pero ijeha ixin amigo ra, sino que jaha ra sanjo ra mé para que isincheha xa sigue sinttamolestá ra xa icha.

⁹ Mexinxin janha rrindattjo ra: Danchia ra co Dios rrochjá ra; ttjé ra co sinchí ra; dinga ra puerta, co puerta mé rroxiré puerta.

¹⁰ Ixin tti danchia, jehe dayé; co tti ttjé, jehe dittja; co tti dinga puerta, puerta xiré puerta para ixin jehe.

¹¹ ¿Apoco çhôngja de jaha ra que ochonda ra xanha ra anchao rrochjehe ra xan ná xo are sanchiaha ra xan niottja? ¿O arrochjehe ra xan nnttaohe conché are jehe xan sanchia ra xan nnttaohe copescado?

¹² ¿O arrochjehe ra xan ná conttanchia are sanchiaha ra xan joja?

¹³ Mexinxin si jaha ra masqui chojni jianha ra pero noha ra danjo ra cosa jian ngain xanha ra, jmé Nnodá na que ttjen ngaini xijanjoha Ndo Espiritu Santo ngain tti chojni que sanchia ngain Ndo!

Are ndaço chojni ixin Jesús chonda joachaxín inchínji

(Mt. 12.22-30; Mr. 3.19-27)

¹⁴ Ná nchanho Jesús vengui ná espíritu jianha de ngaxinhi cuerpoe ná xí que ndadicottapo xa de ixin jehe espíritu mé; co are espíritu jianha ovaçhjehe de ngaxinhi cuerpoe xa, jehe xa onchao nichja xa. Tsje chojni que te nnttiha vinttegoan na admirado de ixin tti joinchehe Jesús.

¹⁵ Pero icanxin na ndaço na:

—Xí jìhi dengui xa espíritu jianha de ixin joachaxín Satanás, tti cai dinhi Beelzebú, tti ttetonha ngain cain espíritu jianha.

¹⁶ Co icanxin na para rrojincheyehe na Jesús, joanchiehe na que ixin jehe rrojinchiehe ná milagro que ttixin de ngaini.

¹⁷ Pero jehe ovenohe quehe teçaxaon na, co jehe ndaço ngain na:

—Quexeho gobierno que chjéa para ttetocaho chó, gobierno mé toin ndat-tjexin, co si ná nindoha ngain ná nchia, si atto tteto na, cai toin ndachjequé na.

¹⁸ Jañá cai, si Satanás tseto jehó, ¿queçén tsonçhjenhe joachaxin que jehe chonda? Jìhi ndaçhjan janha, ixin jaha ra ndaço ra que janha dehngui espíritu jianha de ixin joachaxín Satanás.

¹⁹ Pero si janha jamé na, ¿quensen chjé chojnia ra joachaxin para dengui na espíritu jianha? Mexinxin jehó na tjago na que ndoaha tti teçaxaon ra.

²⁰ Pero janha dehngui espíritu jianha de ixin joachaxín Dios, co jìhi rroço que tti ttetonha Dios ochian jói nganji ra.

²¹ Are ná xí tsanga jinda xa nchiandoha xa conixin tsje espada co lanza, are mé cain cosé xa que jichonda xa jí seguro.

²² Pero si tsí iná xí icha tsanga que jehe xa co tsixinha xa ngain xí mé, ndasantsjehe xa cain espadé xa co lanzé xa que chonda xa, cottimeja nchao sasicao xa cosé xí mé que jichjian.

²³ Tti chojni que rinaoha na janha, chojni mé ningaonna janha; co tti chojni que ttenchjianha tti janha rrindaçhjan, chojni mé ttingo na palabrana inchin chojni que ttingo caxineno.

Tti espíritu jianha que cjan

(Mt. 12.43-45)

²⁴ Are ná espíritu jianha daçhjehe de ngain cuerpoe ná chojni, espíritu jìhi sattji ngain lugar xema dicjé ná lugar tti jehe sinchejogaha. Co are idiraha lugar mé, jehe çaxaon: “Janha sarrocjan na ngain nchiania tti vathjexin.”

²⁵ Are espíritu mé cjan, jehe dittja cuerpoe chojni mé inchin ná nchia que diganjo na çhjoin, co çhjoin diconchjian ngaxinhi nchia mé.

²⁶ Cottimeja espíritu jianha mé dirroé iyáto espíritu icha jianha que jehe espíritu mé, co cain espíritu mé sadixinhi ngaxinhi cuerpoe chojni mé para tadintte cai. Co después, chojni mé icha tangui tonhe que are saho.

Quensen tonohe ċhjoin ngain vidé

²⁷ Are Jesús jindaċho cain cosa jihi, ná nċhí nttiha ngayé chojni ndaċho nċha sén:

—¡Anto ċhjoin para ixin tti nċhí que jointtaconcjia co jointtagangui!

²⁸ Pero Jesús ndaċho:

—¡Icha ċhjoin para ixin tti chojni que ttinhi tti ndaċho Dios co ditticaon na!

Are chojni jianha joanchia na ná milagro

(Mt. 12.38-42; Mr. 8.12)

²⁹ Chojni joinchehe na sigue ċatte na ngandanji Jesús, co jehe coexinhi nichja co ndaċho:

—Cain chojni ngain tiempo jihi, jehe na jianha na co danchia na sicon na ná señal de milagro; pero ċonhi icha señal sicon na que jecho tti señal que vattohe profeta Jonás.

³⁰ Ixin jańá inchin Jonás cjoí ná señal para ixin chojni que vintte ngain ciudad de Nínive, jamé janha cai, tti Xí que joixin de ngajńí, janha ná señal para ixin chojni de ngain tiempo que te na jai.

³¹ Are chojni de tiempo jihi soenhe na juzgado, tti reina que joixin de ngain nontte Sabá icha sur singattjen co jehe reina mé rroċho jie para ixin chojni jihi ixin jehe reina mé joixin anto cjin para joiquinhi tti venohe Salomón, co nttihi jí nganji ra ná tti icha importante que Salomón pero ċonhi chojni nchehe caso.

³² Co chojni que vintte ngain ciudad de Nínive singattjen na ngain tti nchanho que Dios sinchejuzguehe cain chojni, para rroċho na jie para ixin chojni de tiempo jihi ixin cain chojni de ngain Nínive coentoxinhi na vidé na are Jonás joindache na joajné Dios, co nttihi jí ná tti icha importante que Jonás pero ċonhi chojni nchehe caso.

Jmacon ni, mé tti lamparé cuerpoe ni

(Mt. 5.15; 6.22-23)

³³ ċonhi chojni nchengasán ná lámpara para ttema lámpara ni para daquehe ngaxinhi ná cajón, sino que dehe lámpara noi para que cain chojni que dixinhi nchia dingasenhe na.

³⁴ Jmacon ni inchin ná lámpara para ngain cuerpoe ni. Mexinxin si jmacon jaha jian, cai ngoixin cuerpoe chonda joadingasán. Rroċho si joadingasán que Dios rroanha jí ngain ansean, jaha chojni jian. Pero si jmacon jianha, cai ngoixin cuerpoe jí ngain tti naxin xehe.

³⁵ Ttjiho cuidado para que tti joadingasán que rrichonda rrocjanha inchin tti naxin xehe.

³⁶ Ixin si ngoixin cuerpoe jichonda joadingasán, ni rioho de ngain cuerpoe jichondaha ni rioho tti naxin xehe; cain cosa jaha sicon jian ċajeho inchin are ná lámpara jinttangasańaha conixin ċoi.

Are Jesús joinchesattehe xifariseo co ximaestroey ley

(Mt. 23.1-36; Mr. 12.38-40; Lc. 20.45-47)

³⁷ Are Jesús joixin ndaċho cain yá, ná xifariseo ndache xa Jesús ixin sinecaho xa ngain nchiandoha xa. Jesús cjoí nchiandoha xa co joixinhi vehe ngain mesa.

³⁸ Jehe xifariseo mé goan xa admirado ixin vicon xa que Jesús vehe joine co conttiha jinda tsje nttiha inchin costumbré icha chojni judío.

³⁹ Pero Jesús ndačo ngain xa:

—Jaha ra xifariseo ra inchin vaso co láto que chojni ncheroa de ngama, pero de ngaxinhi ansean ra tecaon ra de cain cosa jianha ixin ttehe ra cosé chojni co nchehe ra icha cosa jianha.

⁴⁰ Jaha ra tonto ra! ¿Anoaha ra que Dios tti joinchechjian ngama ra, cai joinchechjian ngaxinxin ra?

⁴¹ Are danjo ra tomi ngain chojni noa, cai danjo ra de ngain ansean ra, co jamé tsoroa almá ra.

⁴² ¡Anto tangui tsonha ra jaha ra xifariseo! Ixin jaha ra danjo ra ngain Dios tti ttexin parte de ca que dinhi menta, co de caruda, co de icha clase de ca, pero ncheha ra caso de tti jian que nchehe ra ngain vidá ra co rinaoha ra Dios. Co jiji tti chonda ra que sinchehe ra co cai nchehe ra sigue danjo ra tti ttexin parte de cain ca mé.

⁴³ ¡Anto tangui tsonha ra, jaha ra xifariseo! Jaha ra ntaꝑoxinha ra dayehe ra ntaxintaon icha importante ngaxinhi nihngo, co ntaꝑoxinha ra dayehe ra joajna conixin anto respeto are ngatja nttiha.

⁴⁴ ¡Anto tangui tsonha ra jaha ra ximaestroe ley co jaha ra xifariseo, ꝑo ncheha ra inchin ndačo ra! Ixin jaha ra te ra ꝑá sepultura que idiconha ni co chojni datto na ngataha nttiha pero noeha na ixin nttiha jiꝑavá cosa dirrenga.

⁴⁵ Cottimeja ná ximaestroe ley, ndačo xa ngain Jesús:

—Maestro, are soixin ndačo yá, rrinichja feo de ixin janha na cai.

⁴⁶ Pero Jesús ndačo:

—¡Cai jaha ra anto tangui tsonha ra jaha ra ꝑo maestroe ley! Ixin jaha ra tti ttetonhe ra icha chojni que sinchehe na para ixin Dios cosa anto tangui, co mé ná carga anto ye para ixin jehe na ixin ttixinha na nchehe na cain mé, co jaha ra ttjenguijnaha ra na para sinchehe na cain tti jaha ra ttetonha ra.

⁴⁷ ¡Anto tangui tsonha ra jaha ra! Ixin jaha ra nchechjian ra monumento anto ꝑjoin ngataha tti teꝑavá cuerpoe cain profeta que nindogoelitoa ra ꝑanꝑjen nagoenxon na are saho.

⁴⁸ Conixin yá jaha ra tjago ra, que ntaꝑoxinha ra tti joinchehe nindogoelitoa ra ꝑanꝑjen, ixin jehe na vinttegoen na profeta are saho co jaha ra nchechjian ra ꝑjoin ngataha tti teꝑavá cuerpoe profeta.

⁴⁹ Mexinxin Dios ixin jehe anto jian nohe, mexinxin ndačo: “Rrorroanha ra profetana co representantena nganji ra, co jaha ra nasoenxon ra ꝑhonda de jehe na co ittoha na feo sinchehe ra ngain na.”

⁵⁰ Mexinxin chojni de ngain tiempo jiji jehe na niteca vidé cain profeta que vintteguenhe desde are nontte conchjian hasta jai;

⁵¹ rročo desde are ndavenhe Abel hasta are joiguenhe Zacarías, tti goenxin na ngain lugar entre altar co lugar santísimo. Yá tti rrindattjoxin ra janha, que chojni de ngain tiempo jiji tti teca na cain yá.

⁵² ¡Anto tangui tsonha ra jaha ra, ꝑo maestroe ley! Ixin jaha ra chonda ra tti ꝑón que jitaxin cain tti ttetonha Dios. Pero jaha ra mismo rinaoha ra ttinxin ra, ni tanꝑjandaha ra icha chojni que rinao tsinxin ꝑón mé.

⁵³ Are Jesús ndačo cain cosa jiji ngain xa, ximaestroe ley co xifariseo anto vinttegoñoa xa ngain Jesús, cottimeja joanchianguihi xa Jesús anto tsje pregunta,

⁵⁴ para que rroguiconxin xa si jehe rronichja ná cosa ndoaha, para que jehe xa nchao rrocjanguihi xa Jesús.

12

Jesús cjoagoe chojni ixin cainxin cosa, masqui jimao, pero tsononxin

¹ Ngain rato mé, xatte anto tsje miles de chojni nttiha que hasta conxinha chó na soji. Co Jesús coexinhi ndačo saho ngain tti chojni que vacao:

—Ttjiho ra cuidado de ixin levaduré xifariseo, rročo tti jeha ndoa que jehe xa ndačo xa.

² Ixin xonhi ná cosa que ttema chojni que tsononxinha, co xonhi ná cosa jimao que tsononxinha.

³ Mexinxin, cain tti jaha ra nichja ra are naxin xehe, tsononxin are osingasán; co cain tti jaha ra nichja ra jimao are puerté nchia tajijé, pero cai tsononxinin desde noi ngataha nchiandoi ra.

Quensen jiquininxin rroxagoen ni
(Mt. 10.28-31)

⁴ Nganji jaha ra, xiamigona ra, janha rrindattjo ra que chondaha ra que rroxagonhe ra tti chojni que natjayaxon ngain cuerpoe ni, ixin chojni mé choha nasoenxon almé ni.

⁵ Pero janha rrondattjo ra quensen tti chonda que rroxagonhe ra: xagonhe ra jeho Dios, ixin jeho jehe tti nchao nasoenxon cuerpoa ra co rrorroanha almá ra para ngain infierno. Ján seguro que xagonhe ra jehe Dios.

⁶ ¿Quejanhi rentte naho conttoachjan? Jeho yó tomichjan que anto rentteha. Pero Dios tjañeha ni ná de jehe va.

⁷ Ixin Dios, jehe nohe hasta quejanhi xajá ra chonda ra. Mexinxin jaha ra xaonha ra, ixin jaha ra icha rentte ra que tsje conttoachjan.

Tti chojni que ndačo ngattoxon con icha chojni ixin Jesús jian
(Mt. 10.32-33; 12.32; 10.19-20)

⁸ Janha rrondattjo ra que quexeho chojni que rrondačo nttihi ngataha nontte ixin amigoe na janha, cai jahna, tti Xí que joixin de ngajni, rrondathjan ngattoxon con cain ángel de Dios que ixin jehe na amigona na cai.

⁹ Pero tti chojni que rrondačo ngattoxon con icha chojni que ixin jehe chonxinha de ixin janha, cai janha rrondačhjan ngattoxon con cain ángel de Dios que ixin chonxinha jehe mé.

¹⁰ Co quexeho chojni rronichja jianha de ixin janha, tti Xí que joixin de ngajni, nchao sitjañeha chojni mé; pero tti chojni que rronichja jianha de ixin Espíritu Santo, xonhi tiempo sitjañeha chojni mé.

¹¹ Are tsjiho ra na ngain nihngo, o ngain xijuez, o ngain icha xittetonha, taha ra joachjaon de ixin quexén rrondačo ra ngain xa de ixin tti joinchehe ra, co taha ra joachjaon de ixin quexén rronichja ra,

¹² Ixin are sinqué momento que jaha ra rronichja ra, Espíritu Santo tti sinttaxaxaon ra quehe rrondačo ra.

Tti rico que xaxaon cosa que xonhi xé

¹³ De ngayé cain chojni nttiha, ná chojni ndačo ngain Jesús:

—Maestro, ndache xanchian que rrochjana xan tti partena que jiquininxin na de herencia.

¹⁴ Pero Jesús ndačo:

—¿Quensen coín na janha de juez ngain cosa yá?

15 Cai nda'cho Jesús:

—Ttjiho ra cuidado que antoha sinao ra tomi, ixin vidé chojni tsixinha de ixin tti tsje tomi que rrochonda ni.

16 Cottimeja Jesús ndache na ejemplo jiji:

—Vehe ná xí rico, co ngoixin jnguihi xa anto goan noa.

17 Cottimeja tti rico mé vehe xaxaon: “¿Quexén sinttaha janha? Chondaha tinó tsenchjianxin cain cosechana.”

18 Ngain rato mé jehe xaxaon: “Onona quexén sinttaha. Sinttaxante granerona que chonda para sinttachjian iná granero icha jie, co nttiha tsenchjinha cainxin cosechana, co cainxin cosa que janha chonda.

19 Cottimeja rrondattjan almana: Alma, jaha ochonda anto tsje cosa jichjian para anto tsje nano. Jai nchejogaha, jintte co dihi, co chaha.”

20 Pero Dios nda'cho ngain xí mé: “Jaha tonto. Ngain ttie jiji senhe jaha; co cain tti coenchjinha, ¿para ixin quensen?”

21 Jañá tonhe tti chojni que anto datse tomi co icha cosa que jehe dondehe, pero que xonhi chonda para ngain Dios.

Dios jinda cain xenhe

(Mt. 6.25-34)

22 Despues nda'cho Jesús ngain chojni que vacao:

—Janha rrondattjo ra que taha ra joachjaon de ixin tti sintte ra para sinttechonxin ra, ni de ixin lontto que sinttetsí ra.

23 Vidé ni icha rentte que tti jine ni, co cuerpoe ni icha rentte que lonttoe ni.

24 Tsjehe ra conttaha, que co mé ni xonhi ttenga va, ni xonhi cosecha datsín va, ni chondaha va graneroe va, pero ixinha mé, Dios chjé va tti jine va. ¡Co para ixin Dios jaha ra icha rentte ra que conttoa!

25 Co ¿Apoco ná de jaha ra, ixin anto ta ra joachjaon, anchao sahngui ra iriho metro icha de tti jinixin ra?

26 Mexinxin si choha nchehe ra cosa tanguiha ¿quedonda ta ra joachjaon de ngain cosa tanguí?

27 Xaxaon ra jian quexén dangui cain tsjo ngataon jngui, cain tsjo mé ncheha tsjo xa ni tajinha tsjo chjon. Co janha rrondattjo ra que ni rey Salomón, que jehe anto chjoin vaguitsá, pero xonhi tiempo vetsá inchin ná de jehe tsjo jiji.

28 Si Dios jañá nchetsá cain ca que jehó jai jí ngataon jngui co ndoe ondarroche ca ngain xohi, ¡mé jaha ra xichjaha ra Dios cain tti rrogondaha ra, masqui jaha ra xa antoha jian ditticaon ra ngain Dios!

29 Mexinxin, taha ra joachjaon de ixin quehe sintte ra ni de quehe sihi ra.

30 Ixin chojni de ngain mundo jiji ta na joachjaon de ixin cain cosa yá; pero jaha ra chonda ra ná Ndojá ra ngajni, que jehe Ndo onhe Ndo que jaha ra rrogondaha ra cain cosa yá.

31 Pero cain tiempo ditticaon ra cain tti ttetonha Ndo, co jamé sayehe ra cain cosa jiji.

Cosa rentte que rrochonda na ngajni

(Mt. 6.19-21)

32 Xaonha ra jaha ra xo inchin colecona, ixin masqui tsjehe ra pero Ndojá na que ttjen ngajni, jehe Ndo rinao Ndo rrochjá ra Ndo tti jehe Ndo ttetonha Ndo ngajni.

33 Nchecji ra cain cosa que chonda ra co ttjenguijna ra tti chojni que rrogondehe; jañá nchechjian ra bolsé tomi que xonhi tiempo sichje, rrocho

que ngajni rrochonda ra cosa icha rentte co cosa mé ðonhi tiempo tsjexin, ixin nttiha xichehe sijiha xa ni cochí sinchexantteha.

³⁴ Ixin ngain lugar tti jaha ra rrochonda ra cosá ra icha importante para ixin jaha ra, cai nttiha sehe ansean ra.

Chonda que sontte na listo

³⁵ Dintte ra listo, co ttjiho ra cuidado que lampará ra que sacaon cain tiempo.

³⁶ Dintte ra inchin ninchehe ða que techonhe na xinajní na tsixin xa de ngain tti cotehe. Ixin ninchehe ða mé dintte na listo para tsonxiré na puerté nchia are singa xa puerta.

³⁷ Anto ðhjoin para ixin tti ninchehe ða que are tsí xinajní na, jehe na tatetsjehe na; atto seguro tti janha rrindattjo ra, que mismo xinajni mé tsaoxin xa cinturoen ða jian co tsintte xa na ngain mesa. Co jehe xa tsequia xa comida que sine na.

³⁸ Masqui jehe xinajni mé tsí xa ngosine ttie o are ndoyo, co ninchehe ðé xa tatetsjehe na, anto ðhjoin para ixin ninchehe ða mé.

³⁹ ðaxaon ra cosa jihi, que si xinajní ná nchia rroconohe xa quehe hora rroquí xichehe are ttie, xinajni mé rroquejoaha xa para rrocanðhjandaha xa xichehe rroguixinhi xa rroqué xa.

⁴⁰ Jaha ra cai dintte ra listo; ixin janha, tti Xí que joixin de ngajni, sihi iná are jaha ra ni rroðaxaonha ra ixin sihi.

Ná tti ninchehe xa jian, co ná tti ninchehe xa jianha

(Mt. 24.45-51)

⁴¹ Cottimeja Pedro joanchiangui ngain Jesús co ndaço:

—¿Acoín ejemplo jihi para ixin janho na, ani para ixin cainxin chojni?

⁴² Jesús ndaço:

—ðaxaon ra quensen tti nchehe ða que ditticaon jian co ttinxin jian tti jiquininxin sinchehe. Mé tti nchehe ða que xinajní rrochjé xa ða de rrochjé tti sine cain ninchehe ðé xinajní mé.

⁴³ Anto ðhjoin para ixin tti nchehe ða que are tsí xinajní, jehe jinchehe inchin vitonhe.

⁴⁴ Ndoa tti rrondattjo ra que xinajni mé rrondaço xa ngain tti nchehe ða mé que jehe senda cain cosa que chonda xa.

⁴⁵ Pero si tti nchehe ða mé sinchesattehe xinchehe ðé xinajni mé conixin nchimozé xa, co sehe sine co sihi co rrocoan;

⁴⁶ cottimeja xinajní tsí xa ngain ná nchanho co ngain ná hora que ni jehe noeha, co sinchecastigá xa anto soji inchin tti castigo que sayé cain chojni que ditticaonha Dios.

⁴⁷ Tti nchehe ða que onohé quehe rinao xinajní, pero rinaoha nchehe mé co ncheha inchin tti ttetonha xa, tti nchehe ða mé anto soji sicaon.

⁴⁸ Pero tti nchehe ða que noeha quehe rinao xinajní, co nchehe cosa que jiquininxin castigo, nchehe ða mé icha sojiha sicaon. Tti chojni que dayé icha tsje, rroðanchiehe icha tsje, ixin jehe chonda icha responsabilidad.

Causexin Jesús ðhjeyaxin chojni

(Mt. 10.34-36)

⁴⁹ Janha joihi inchin ná ðohi ngataha nontte para sinttaxantte tti ðonhi ðé co sinttajian tti jian para ixin Dios. ¡Co janha rrojinaho que orrogacaon ðohi mé!

⁵⁰ Chonda que atto tanguí tsonna, co mé inchin janha siguittexin na ngain cosa tanguí. Co janha anto feo tonona hasta tsoenja cain jiji.

⁵¹ Jaha ra puede xaxaon ra que ixin janha joihi para que chojni sicon chó na contento ngataha nontte jiji. Janha rrindattjo ra que nahi, ixin chojni toñahe chó na jai ixin joihi janha.

⁵² De jai pa ndaha naho chojni ngain ná nchia rrochjeya na de ixin causananxin janha; ní na sitticaon na na janha, co yó na sitticaonha na na; o yó na sitticaon na na janha, co ní na sitticaonha na na.

⁵³ Ixin de causananxin janha, ná ndodaha rroningaconhe ndo xenhe ndo, co ná chjan rroningaconhe xan ndodé xan. Ná jannaha rroningaconhe jan nchichjehe jan, co xannchí rroningaconhe xan janné xan. Ná jannchaha rroningaconhe jan nchideindehe jan, co nchideinda rroningaconhe ncha jannché ncha.

Quexén jí tiempo
(Mt. 16.1-4; Mr. 8.11-13)

⁵⁴ Cai ndacho Jesús ngain chojni:

—Are jaha ra dicon ra que ttjoi chinxin ttjoi tti diataonxin nchanho, jaha ra ndacho ra que ixin otsí chin, co jamé ndoa tonhe.

⁵⁵ Co are tjaxin chintto no sur, jaha ra ndacho ra que sania soa, co ndoa jamé tonhe.

⁵⁶ Jaha ra ncheha ra tti ndacho ra! Jaha ra noha ra datsoenhe ra quehe tsonhe de ngajni co ngataha nontte, ¿co quedonda choha datsoan ra tti tsonhe ngain tiempo que te ra jai?

Tsjehe ra quexén nchehe ra para itsoñaoha ra ngain tti chojni que ninga-conha ra

(Mt. 5.25-26)

⁵⁷ ¿Quedonda ttinchieha ra jaha ra mismo cain cosa jian?

⁵⁸ Si ná chojni sicho jie para ixin jaha co tsjiho jaha ngain xijuez, icha jian de ngatjao nttiha tjao chó ra de ixin quexén tsonhe para que jehe itsjioha ngain xijuez. Ixin si nahi, xijuez rrondache xa xipolicia para tsiaxinha xa.

⁵⁹ Co janha rrindattjo que choha sachjexin de nttiha hasta que jaha tsengaja hna cainxin tomi que jaha rrica.

13

Chonda ra que tsentoxinhi ra vidá ra

¹ Ngain rato mé nttiha vintteconchienhe canxion chojni ngain Jesús co coequín na ixin Pilato nagoenxon canxion xí de ngain regioen Galilea mero ngain rato que jehe xa tedoen xa coxigo para tedanjo xa ngain Dios. Co nttiha vinttji jni xí mé, tti vinttji jni coxigo.

² Co Jesús ndacho ngain tti chojni que tettequín mé:

—¿Axxaon jaha ra que jamé vintteconhe xí tehe ixin icha jianha jehe xa que cain chojni ngain nacioen xa?

³ Janha rrindattjo ra que jaha jamé. Co si jaha ra tsentoxinha ra vidá ra, cain ra ndasitján almá ra.

⁴ ¿O ani xaxaon jaha ra que tti dieciocho chojni que ndavenhe are vetsingatja na tti torre de Siloé, ani nimé icha jianha na que cain chojni que vintte Jerusalén?

⁵ Janha rrindattjo ra que jaha jamé. Co si jaha ra tsentoxinha ra vidá ra, cainxin ra ndasitján almá ra.

Ejemplo tti nttahigo que danjoha ttochjoin

⁶ Cottimeja Jesús coín na ejemplo jihi:

—Ná xí vechonda xa ná nttahigo ngataon jnguihi xa co cjoí xa joitsjehe xa si vanjo nttá ttochjoin, pero xonhi ttochjoin vittja xa ngagaha nttá.

⁷ Cottimeja ndačo xa ngain tti xí que jinda jngui mé: “Tsjexinxin, janha oní nano ttjihi dicjé ttochjoin ngain nttá jihi, co ni ná nttiha dittjaha ttochjoin ngain nttá. Tončhinji nttá: ¿quedonda xa sehe nttá ngataha jnguihna co xonhi ttochjoin danjo nttá?”

⁸ Pero tti xí que jinda jngui mé ndačo: “Soixin, xa ttinttohe nttá iná nano jihi. Janha sinttandanguia nttá jinche co tsingonguia nttá abono.

⁹ Coxin jamé puede osanjo nttá ttochjoin, pero si nahi, cottimeja tončhinji nttá.”

Are Jesús joinchexingamehe ná nčí ngain tti nchanho que nchejogaha ni

¹⁰ Ná nttiha, ngain tti nchanho que nchejogaha ni, Jesús tajincheoenhe chojni de ixin Dios ngain ná nihngo.

¹¹ Co nttiha vehe ná nčí que venihi ncha ovechonda dieciocho nano. Ná espíritu jianha ndadinchechatto ncha, co jehe ncha ičhoha vaxendoa ncha.

¹² Co are Jesús vicon nčí jihi, jehe ndačo ngain ncha:

—Jaha oxingamaha de ixin tti chin que joarichonda.

¹³ Cottimeja jehe coín rá ngataha nčí mé, co ngain rato mé jehe ncha xendoa ncha co coexinhi ncha joinchecoanxinhi ncha Dios.

¹⁴ Pero xittetonha ngain nihngo mé coñao xa ixin Jesús joinchexingamehe nčí mé mero ngain tti nchanho que nchejogaha ni. Mexinxin jehe xí mé ndačo xa ngain cain chojni que te nttiha:

—Semana chonda injaon nchanho tti jiquininxin doan xa; ngain nchanho mé sihi ra para que tsoxoanha ra co nahi ngain nchanho que nchejogaha ni.

¹⁵ Cottimeja Jesús ndačo ngain xí mé:

—Jaha ra ncheha ra tti ndačo ra, ixin čhonja de jaha ra, ¿atonxindanguera ra coxintaha ra o colochoha ra para ttjiho ra va diguihi va jinda nchanho que nchejogaha ni?

¹⁶ Co nčí jihi que jehe ncha razé Abraham ncha, co Satanás diquia ncha coixin chin jihi ochonda dieciocho nano, ¿apoco janha chondaha que tsonxindangá ncha de ixin chin yá ngain nchanho que nchejogaha ni?

¹⁷ Are Jesús ndačo jihi, cainxin chojni que ningaonhe anto cosoé na; co icha chojni anto ché na are vaguicon na milagro anto importante que Jesús vanchehe.

Ejemplo ná tsé que dinhi mostaza

(Mt. 13.31-32; Mr. 4.30-32)

¹⁸ Cottimeja ndačo Jesús:

—¿Quehe cosa nchao sinttacininxin tti ttetonha Dios?

¹⁹ Mé inchin tsehe ná ca que dinhi mostaza que ttenga ná xí ngain jnguihi xa. Co ca mé dangui ca inchin ná nttá jie, que hasta conttoa que tjanganga nchechjian va caqué va ngagaha rama.

Ejemplo levadura

(Mt. 13.33)

²⁰ Cai ndačo Jesús:

—¿Quehe cosa nchao sinttacininxin tti ttetonha Dios?

²¹ Mé inchin levadura que ta ngain hariné niottja co nchehe xa hasta nchegatjoe nchoho.

*Tti puerta jno**(Mt. 7.13-14, 21-23)*

²² Are sacjan Jesús para Jerusalén, jehe joinchecoehne chojni de ixin Dios ngain rajna co ngain rajnanchjan que vatto.

²³ Co vehe ná chojni que joanchiangui ngain Jesús co ndacho:

—¿Ajeho nchion chojni tti rrochonda iná vida naroaxin?

Co Jesús ndacho:

²⁴ —Nchehe ra de que dixinxin ra ngain puerta jno, ixin rrindattjo ra que tsje chojni sinao na sixinxin na nttiha pero čhoha.

²⁵ Co are tti nchiandoha singattjen co tsejé puerta, cottimeja jaha ra xo sittoha ra ndoja, singa ra puerta co rrondačo ra: “Soixin, danttjena ni ra puerta.” Pero jehe rrondačo: “Janha nonaha quettinó joixin jaha ra.”

²⁶ Cottimeja jaha ra tsexinhi ra rrondačo ra: “Janha na tti joine na co vihi na nganji soixin, co soixin tti joinchecoanna ra de ixin Dios ngá nttiha de ngain rajnana na.”

²⁷ Pero jehe rrondačo nganji ra: “Janha otendattjo ra que nonaha ttinó joixin ra. Sattjixin ra de nganji na, xo nchehe ra jianha.”

²⁸ Nttiha jaha ra rrotsjanga ra co sinttetaon neno ra are sicon ra que Abraham, Isaac, Jacob, conixin cain profeta tate na ngajni tti ttetonha Dios, co jaha ra Dios tsanchjandaha ra para sintte ra nttiha.

²⁹ Ixin are mé tsixin chojni de cainxin parte de nontte; de ngain tti čhinxin nchanho, co de ngain tti diataonxin nchanho, co de ngain norte co de ngain sur para sintte na sine na ngain mesa de ngain lugar que ttetonha Dios.

³⁰ Are mé tsje chojni que jai jeha importante na, pero are mé jehe na nisintte icha importante; co cain chojni que jai tonohe na ixin anto importante, are mé jehe na jeha importante na.

*Jesús tsjanga por ixin Jerusalén**(Mt. 23.37-39)*

³¹ Ngain nchanho mé vinttecji canxion xifariseo co vinttendačo xa ngain Jesús:

—Sattjixin de nttihi, ixin rey Herodes rinao nasoenxon soixin.

³² Pero Jesús ndačo ngain xa:

—Ttji ra co ndache ra xí mañoso mé, que jai co ndoe sinttaha sigue senguixin espíritu jianha de ngaxinhi cuerpoe chojni, co sinttaxingamá chojni nihi, co rejngui otsjena xana.

³³ Pero janha chonda que sinttaha sigue nttiana jai co ndoe co rejngui, ixin cain profeta denxin de ngain Jerusalén.

³⁴ ¡Jaha ciudad de Jerusalén, jaha tti nadoenxon cain profeta co taxin xo tti chojni que ttiaho joajné Dios que jehe rroanha nganji! ¡Janha anto tsje nttiha joinha rrogatse chojnia inchin cochia datse va xenhe va nganguí nenehe va, pero jaha čhoha!

³⁵ Mexinxin tsjexin ra; nchiandoi ra ndasittohe nchia; co rrondattjo ra que irrocjanha ra sicon ni ra hasta que tsjija nchanho que are jaha ra rrondačo ra: “Anto jian tti joí de ngain nombré Dios.”

14*Are Jesús joinchexingamehe ná xí que veninxin chicjan*

¹ Ná nchanho que nchejogaha ni, Jesús cjoí joijine ngain nchiandoha ná kittetonha ngain xifariseo, co are mé icha xifariseo tatetsayehe xa Jesús.

² Cai ngattoxon con Jesús tají ná xí que veninxin xa de chicjan.

³ Cottimeja Jesús joanchiangui ngain ximaestroe ley conixin ngain xifariseo:

—¿Ají joachaxin sinchexingamehe ni ná chojni nihi ngain nchanho que nchejogaha ni o ani nahi?

⁴ Pero jehe xa tavinttetencoa xa. Cottimeja Jesús catte tti nihi mé, joinchexingamehe co ndačo ngain ixin satsji jehe tti nihi mé.

⁵ Co ndačo Jesús ngain xifariseo:

—¿Quexehe de jaha ra, si ná colochoha ra o ná coxinttaha ra setsingá va ná pozo, asantsjeha ra va rato mé masqui nchanho que nchejogaha ni?

⁶ Co cain jehe xa čhoha ndačo xa ni ná palabra ngain Jesús.

Chojni que ttji tti tottehe na

⁷ Are vicon Jesús ixin cainxin chojni que cjoy ngain tti cottehe na puro ttinchieho na nttaxintaon icha importante ngain mesa, jehe ndache na janhi:

⁸ —Are ná chojni rroundattjo que tsji ngain ná quiai tti tsothehe na, dariha ngain lugar importante, ixin puede siji iná chojni icha importante que jaha.

⁹ Co tti ndattjo para cjoy jaha conixin jehe tti icha importante mé, nchao siji co rroundattjo jaha: “Danjo lugar que rrichonda ngain iná chojni jihi.” Cottimeja jaha chonda que satsjixin de nttiha conixin joasoaxin para sigarihi ngain tti nttaxintaon icha importanteha.

¹⁰ Mexinxin, are ná chojni rroundattjo que jaha tsji ná quiai, jaha darihi tti lugar icha importanteha, para que are tsí tti ndattjo ixin jaha cjoy ngain quiai mé, jehe nchao rroundattjo: “Amigo, jaha datto ngain iná lugar icha importante.” Jamé jaha tsosayaha ngattoxon con cain chojni que te ngain mesa nttiha.

¹¹ Ixin tti chojni que řaxaon ixin jehe anto importante, chojni mé tsonohe ixin jehe řonhi rentte; co tti chojni que řaxaon ixin jehe řonhi rentte, chojni mé icha tsoarentte.

¹² Cai ndačo Jesús ngain tti xí que coetonhe Jesús para que Jesús cjoy ngain quiai mé:

—Jaha are tsín ná vandango ttetoenha jeha xiamigoa, ni jeoha xanchó, ni jeoha niparientea, ni jeoha nivecinoa que chonda tsje tomi, ixin cain chojni jihi nchao tsín na iná vandangoe na co tsetonha na jaha para que tsji sinttecoho na co jamé jehe na otsoncjañaha na tti jehe na joine na ngain vandangoa.

¹³ Mexinxin are jaha tsín ná vandango, cai ttetonha chojni noa, co tti chojni que čhoha ttingui, co tti chojni rrengo, co tti chojni chejo.

¹⁴ Co jamé Dios sinttančaon jaha, ixin are rroxechon cain chojni que joinchehe jian, Dios tsjengaha hna jaha ixin jaha joanjo joine tti chojni que čhoha tsjengaha hna jaha.

Ejemploe tti sena que Dios sanjo ngajni

¹⁵ Are vinttequinhí na jihi ná de tti nite ngain mesa ndačo ngain Jesús:

—Anto čhoin para ixin tti chojni que sine niottja nttiha ngain lugar tti ttetonha Dios.

¹⁶ Cottimeja Jesús ndačo ngain chojni mé:

—Ná xí coín xa ná vandango anto jie, co coetonha xa para joiguitonhe anto tsje chojni para rrocji na rrojine na.

¹⁷ Co are ocainxin vehe listo, xí mé rroanha xa ná tti nchehe řé xa para joiquetonhe cain chojni mé ixin onchao jí cain cosa, onchao tsí na para sijine na.

18 Pero cain chojni mé coexinhi na ndačo na ixin čhoha tsji na. Tti saho ndačo: “Najoexincoa coehna ná nontte, co chonda que tsji sitsjá nontte mé; janha nttatsanha ñao que nchetjañana na ixin tsjinha na.”

19 Iná ndačo: “Janha ocoehna naho yunta de coxinttá, co tsji para sicon si nchao tsaon va; mexinxin nttatsanha ñao nchetjañana na ixin tsjinha na.”

20 Co iná ndačo: “Janha najoexincoa cottena, co mexinxin čhoha tsjin na.”

21 Are tti nchehe xa mé cjan, ndačo cain jihi ngain xinajní. Cottimeja jehe xinajni mé coñao xa co ndačo xa ngain jehe tti nchehe xa mé: “Jaicoa ttji ngain cain nttiha yeye co ngain nttiha nchinnchin de ngain ciudad jihi co sicohna nttihi chojni noa co tti čhoha ttingui, co tti rrengo, co tti chejo.”

22 Nchion después jehe tti nchehe xa mé ndačo: “Ojointsaha inchin soixin coetonna, co ján xa jí icha lugar.”

23 Jehe xinajni mé ndačo xa ngain tti nchehe xé xa: “Ttji ngá nttiha yeye co ngain nttiha nchinnchin de ngandehe ciudad jihi co ndache icha chojni que tsí na, para que rrocaon nchiana.”

24 Ixin janha rinaoha sixinhi ni ná de tti chojni que janha coetoan rroquí icha saho para rrojine na.”

Tti tangui que tonhe ni are ditticaon ni Jesucristo

25 Anto tsje chojni rroé na Jesús; co jehe ngaria co ndačo ngain na:

26 —Si čhonja ra rinao ra sitticaon ni ra janha para cainxin tiempo, chonda ra que icha sinoa ni ra janha que ndodá ra, o janná ra, o čhiha ra, o xanha ra, o xanchó ra, co cai hasta icha que vidá ra. Tti chojni que sincheha jamé čhoha sehe chojnina.

27 Jañá tti chojni que sanjoha vidé de ixin causananxin janha, chojni mé čhoha sehe chojnina.

28 Si čhonja de jaha ra sinoa ra sinchechjian ra ná nchia anto noi, ¿apoco jeha saho rrořaxaon ra quejanhi tomi tsonchjianxin nchia mé, para que tsonoha ra achonda ra cain tomi para tsjexinxin tsonchjian nchia mé?

29 Ixin si nahi, puede jeha coín ra base co ndajoexin tomia ra co ijoexinha joinchechjian ra nchia mé. Cottimeja cain chojni que sicon tsexinhi na tsjanao ra na jaha ra,

30 co jehe ni mé rroundacho: “Xí jiha coexinxin xa joinchechjian xa nchia co joeha xa.”

31 O si čhonja rey chonda que rrořanguí guerra ngain iná rey, ¿apoco jeha saho rrořaxaon si nchao conixin tte mil soldado rrochoenxin tti iná rey que tsiaho veinte mil soldado?

32 Co si rey mé tsonohe que tsixinha, jehe rrorroanha canxion chojni para que sicao na joajna ngain tti iná rey are jehe joí xa icjion para que itsetoha.

33 Jañá, cai si čhonja de jaha ra tsinttoeha ra cain tti chonda ra, čhoha sintte ra chojnina.

Are xijntta ndarroccjan simple

(Mt. 5.13; Mr. 9.50)

34 Xijntta jehe jian, pero si ndarroccjan simple, ¿queéñ rrocjan sonda iná?

35 Mé ixonhi xé ni para jinche ni para ngain montoe abono, sino que mé dingo jañao. Jaha ra řo ttinxin ra, ttinhi ra jian.

15

Ejemploe tti coleco que diguitján

(Mt. 18.10-14)

¹ Cain xicobrador de impuesto co xí que nchehe cosa jianha vint-teconchienhe xa ngaca Jesús para vinttequinhi xa tti jindačo Jesús,

² co mexinxin xifariseo co ximaestroe ley feo nichja xa de ixin Jesús, co ndačo xa:

—Xí jihi nchehe xa caso cain chojni que ncheha jian co jinecaho xa na.

³ Cottimeja Jesús coinhi xa ejemplo jihi:

⁴ —¿Quexehe de jaha ra, si chonda ra cien coleco, co sinchetján ra ná va, atsinttoeha ra tti noventa y nueve va ngataon jngui co tsji ra sicjé ra tti co ndavitján, hasta que sinchija ra va?

⁵ Co are dinchí ra va, jaha ra chaha ra co tame ra va ngataha nttachán ra

⁶ co are daso ra nchiandoi ra, datse ra xiamigoa ra co nivecinoa ra co ndache ra na: “Jai sontte na contento ixin ovittja tti coleco que jointttatján.”

⁷ Janha rrindattjo ra, que xajeho jañá ngajni cai, Dios conixin cain ángel icha ché ngain ná chojni que jinchehe jianha are jehe ttentoxinhi vidé, que ngain tti noventa y nueve chojni jian que chojni mé rrogondeha na tsentoxinhi na vidé na.

Ejemploe tti tomi que ditján

⁸ Co cai iná ejemplo. Ná nchí chonda tte tomi de plata co joinchetján ncha ná tomi mé. ¿Quehe nchehe ncha? Jehe ncha nchegacaon ncha ná lámpara para ttjexin ncha tomi mé ngoixin ngaxinhi nchia co danjo ncha ngoixin ngaxinhi nchia hasta que dittja ncha tomi mé.

⁹ Co are dittja ncha tomi mé, jehe ncha dirroé ncha cain nchiamigué ncha conixin cain nchiveciné ncha co ndačo ncha ngain cain nchí mé: “Janché sontte na contento ixin janha ovittja tti tomi que jointttatján.”

¹⁰ Janha rrindattjo ra que xajeho jamé ngajni cai ixin ché cain ángel de Dios are ná chojni que jinchehe jianha ttetonxinhi vidé.

Ejemploe tti ná chjan que sacjoixin de ngain nindoha

¹¹ Jesús ndačo cai:

—Ná xí vechonda xa yó xenhe xa xanxí,

¹² co tti xan icha nchín ndačo xan ngain ndodé xan: “Padre, chjana tti herencia que jiquinxin na janha.” Cottimeja jehe ndo conchjejehe ndo cayoi chjan mé herencié xan.

¹³ Tsjeha nchanho después, jehe tti xan icha nchín mé joinchecji xan tti nontte que vittoeha xan. Cottimeja conixin tomi mé sacjoixin xan cjin ngain iná nación; nttiha joinchexinxin xan cain tomí xan de ngain nchí co de ngain icha cosa jianha.

¹⁴ Co are ondajoehe xan cain tomi mé, anto ndacochjonga tti joine na ngain nación mé, co jehe xan anto vaguenhe xan jintta.

¹⁵ Cottimeja sajoiganchia xan xa ngain ná xinajni de ngain nación mé, co xinajni mé joanjo xa xa. Coetonhe xa jehe xan sajoiquingaria xan cocochi ngataon jnguihi xa.

¹⁶ Co jehe xan anto vaguenhe xan jintta, hasta que jehe xan joinao xan rrojine xan ná tipo de raja que dinhi algarroba que vajine cocochi, pero xonhi chojni vachjé xan cosa mé.

¹⁷ Cottimeja xaxaon xan co ndačo xan: “¡Anto tsje ninchehe xa chonda ndodana! ¡Co jehe na chonda na tti jine na hasta xehe, co ntilhi janha ndasexin na jintta!

¹⁸ Icha jian janha sarrocjan na tti jí ndodana co rrondattjan ndo: Padre, janha jianha jointtaha ngain Dios co nganji soixin.

19 Janha ijiquininxinha na sinhi na xanha soixin; jeho dayehna na inchin ná de ninchehe xá.”

20 Co jamé joinchehe xan; coá xan nttiha para sacjan xan ngain nchian-doha ndodé xan.

21 Xa icjion joihi xan vicon ndodé xan que jitonchienhe xan, jehe ndo coiaconoehé ndo xan. Co coinga ndo cjoí ndo vichoenxin ndo xan ngatja nttiha co cjóa ndo xan co coetoxin ndo xan.

22 Cottimeja jehe xan ndačo xan ngain ndodé xan: “Padre, janha jianha jointaha ngain Dios co nganji soixin; janha ijiquininxinha na sinhi na xanha soixin.”

23 Pero jehe ndodé xan ndačo ndo ngain ninchehe xé ndo: “Jaca sicohna ra tti lontto icha jian co ttentoxinna ra xanhna jihi; co cai ttengaha ra ná cochianingo dedoe xan, co nchecjanga ra xan jian tteroa.

24 Sicó ra tti coxinttachjan que jointtantao co doehne ra va. ¡Sontte na co sontte na contento!

25 Ixin xanhna jihi ondavenhe xan de ngattoxon con na, co jai cjan xechon xan. Ondavitján xan co xa cjan na jonttó na xan.” Co coexinhi na joinchchjan na comida para joine na.

26 Co are mé tti xansaho ngataon jngui jí xan. Co are ocjan xan co joí xan chiaon nchia, coinhi xan són co coinhi xan ixin tette na.

27 Cottimeja vayé xan ná de tti ninchehe xa que te nttiha para joanchian-guihi xan quehe jí nttiha.

28 Jehe tti nchehe xa mé ndačo: “Joí xanchó, co ndodá coetonha ndo venhe tti coxinttachjan que cjonttao ixin joí xanchó co xonhi tti nihi xan.”

29 Pero tti xansaho mé coñao xan, co ixin choha xan vixinhi xan nchia, jehe ndodé xan chonda ndo que vačhje ndo para joinchetsenhe ndo ñao xan ixin rroguixinhi xan nchia.

30 Co jehe xan ndačo xan ngain ndodé xan: “Soixin noha quejanhi nano janha rrinttaha xa nganji, co cainxin tiempo janha vitticanho cain tti tetonna na, pero soixin xonhi tiempo chjaha ni ná cochivatochjan para rrogonhe rrojinequina xiamigona.

31 Pero jai joí xanha jihi, que joinchexincoa xan tomia de ngain nchí que nchecji cuerpoe, co jai soixin gonhe para ixin jehe xan tti coxinttachjan jittjonttao.”

32 Cottimeja ndodaha mé ndačo ndo ngain xan: “Hijo, jaha cainxin tiempo rrihi nganji na, co cainxin cosa que chonda janha, mé cosá jaha.

33 Pero jai atto jiquininxin tsín ná vandango co sontte na contento, ixin xanchó que inchin ondavenhe xan, pero para ixin ján na jai cjan xechon xan. Co jehe xan ondavitján xan, pero para ixin ján na jai jonttó na xan.”

16

Ejemploe ná xivaquetonha ngain ná rancho

1 Jesús ndačo cai ngain tti chojni que vacao:

—Vehe ná xí rico que vechonda xa ná xivaquetonha ngain ranchoe xa pero cjoí na joindache na xinajni mé que ixin xinchehe xa mé jinchexincoa xa tomí xinajni.

2 Cottimeja xinajni mé vayé xa jehe tti nchehe xa mé co ndache xa: “¿Aco ndoa tti joindachjenji na chojni de ixin jaha que ixin rritena na? Ndachjenji na queén jí cuenta co quejanhi xa jaha joexin, ixin jaha isincheha sigue tsetonha ngain xana.”

³ Cottimeja tti vaquetonha mé xaxaon: “¿Quexén sinttaha jai ixin xinajnina irrochjanaha xa xa sinttaha? Janha itsangaha na para sinttaha xa ngataon ngui, co chjana joasoaxin para sanchiagaha.

⁴ Onona quexén sinttaha para rrochonda amigo tti sayehna ngain nchian-doha are janha ixonhi xa rrochonda.”

⁵ Cottimeja tti vaquetonha mé vayé cada chojni que teca ngain xinajni. Ngain tti saho joanchianguihi: “¿Jaha, quejanhi rrica ngain xinajnina?”

⁶ Co jehe ndaço: “Janha rrica ngain xa cien barril de aceite de oliva.” Jehe tti vaquetonha mé ndaço: “Ntitihi jí nota tti jitaxin. Ttinchje co jaca nchechjian iná nota jeha de cincuenta barril.”

⁷ Después, jehe tti vaquetonha mé joanchiangui ngain iná de tti jica ngain xinajni mé: “Co jaha, ¿quejanhi rrica ngain xinajnina?” Co jehe ndaço: “Cien medida de trigo.” Cottimeja jehe tti vaquetonha mé ndaço: “Ntitihi jí nota tti jitaxin. Jaha ttinchje co jaca nchechjian iná nota que setaxin jeha ochenta medida.”

⁸ Co jehe xinajni mé joatsoan xa que jehe tti vaquetonha ngain xé xa mé atto listo vehe para xaxaon quexén joinchehe. Ixin chojni que ditticaonha ngain Dios icha daca para nchehe na cosa jianha, co chojni que ditticaon ngain Dios icha yao para nchehe na cosa jian.

⁹ Janha rritettonha ra, que ttjenguijna ra icha chojni conixin tomia ra para que chojni mé sintte amigoa ra. Co are ondatsjexin tomia ra ntitihi ngataha nontte sehe quensen sayaha ra ntitiha ngajni.

¹⁰ Tti chojni que dicao cuidado are tsjeha chonda, cai sicao cuidado are rrochonda tsje; co tti chojni que dicaoha cuidado are tsjeha chonda, cai sicaoha cuidado are rrochonda tsje.

¹¹ Mexinxin si jaha ra ttjioha ra cuidado ngain tti tomi que jaha ra chonda ra ngataha nontte jianha jiji, ¿quensen rrochonda confianza nganji ra para sayeha ra tti icha rentte que jí ngajni?

¹² Si jaha ra ttjioha ra cuidado ngain cosé iná chojni, Dios rrochjaha ra cosa que jiquininxin ra.

¹³ Xonhi ninchehe xa nchao sinchehe xé yó xinajni ngain nacoa tiempo, ixin icha sinoa ná xinajni co rroningaconhe iná xinajni, o icha sitticaon ngain ná xinajni co ngain iná xa isincheha caso. Jañá cai çhoha sinoa ni tomi co sinoa ni Dios ngain nacoa tiempo.

¹⁴ Xifariseo anto vaquiaconhe xa tomi, co jehe xa tatettinhi xa cain jiji, co cjoanoa xa Jesús.

¹⁵ Cottimeja Jesús ndaço ngain xa:

—Jaha ra para ngattoxon con chojni nchehe ra que ixin atto jian ra, pero Dios chonxin ngain ansean ra. Ixin tti tonohe chojni que anto importante cosa que jehe chonda, Dios ncheha caso ngain cosa mé.

Ley que vayé Moisés co tti ttettonha Dios

¹⁶ Hasta ngain tiempo que Juan, tti vancheguitte chojni, joindache chojni de ixin Dios, ley que vayé Moisés conixin cain tti dindaço cain profeté Dios vechonda joachaxin para vaquetonhe chojni. Desde ngain tiempo mé para ndahi nchenohe na chojni tti jian joajna de ixin quexén ttettonha Dios ngain ansén chojni. Co tsje chojni anto rinao na rrochonda na parte ngain tti ttettonha Dios.

¹⁷ Pero masqui jamé icha tanguiha sitján ngajni co nontte, que tsoenha inchin jitaxin cainxin ngain ley mé.

*Jesús ndaŕho de ixin xí que dachjendehe  hihi
(Mt. 19.1-12; Mr. 10.1-12)*

¹⁸ Si ná xí sa hjenjehe xa n hi hihi xa co secao xa iná n h , x  mé jianha sinchehe xa ixin x  mé inchin x  que jicao ná n h  que jeha n hi hihi xa. Co tti x  que despu s decao ná n h  que digachjendehe n ha xixihi n ha, x  mé cai jianha nchehe xa ixin jeha inchin x  que joantsjehe iná x  n hi hihi xa.

Tti x  rico conixin L zaro

¹⁹ Vehe ná x  rico que vagueng  xa joxon lontto rentte, co cain nchanho vaqu n xa jie vandango.

²⁰ Cai vehe ná x  noa que vinhi L zaro que vechonda xa anto tton ngain cuerpoe xa co tavaguehe xa ngandangu  nchiandoha jeha xirrico m ,

²¹ ixin jeha xinoa jih  joinao xa rrojine xa tti vaxexin vane jeha xirrico m . Co hasta conia vaconchienhe para vagoni va tton que vechonda xa ngain cuerpoe xa.

²² N  nchanho tti xinoa m  ndavenhe co  ngel de Dios sajoicao para joiguehe ngain tti j  Abraham ngain tti lugar tti tti cain chojni jian. Cai tti rico m  ndavenhe co cjoav  na.

²³ Co are tti rico m  vetan tangui ngain infierno, jeha tsjehe para noi, co de cjin viconxin Abraham conixin L zaro.

²⁴ Cottimeja jeha tti rico m  coyao co nda ho: “Padre Abraham, nttatsanha  ao ttiacoana na janha, co rroanha L zaro para que sinchetjao masqui jeho con dedoe conixin jinda, co ts  sinchetjao neje na janha, ixin anto tangui tonna ngatte xohi jih .”

²⁵ Pero Abraham nda ho ngain tti rico m : “Hijo, xaxaon que jaha anto jian joarihi ngoi tiempo que jaha joarichon ngataha nontte, co L zaro anto tangui conhe are jeha vechon nttiha. Jai jeha day  consuelo nttihi co jaha rridetan tangui jaxon.

²⁶ Co cai j  ná tsaga anto nihnga ngay  na janha na co jaha ra. Mexinxin tti chojni que te nttihi que rinao siji para tti te ra,  hoha siji; co tti chojni que te y   hoha ts  na nttihi tti te janha na.”

²⁷ Cottimeja nda ho tti rico m : “Mexinxin padre Abraham, nttatsanha  ao que rroanha L zaro para ngain nchiandoha ndodana

²⁸ tti te naho xanchian xanx , para que sinchenohe xan que  n sinchehe xan para que jam  jeha xan tsiha xan nttihi ngain lugar jih  tti detan ni tangui.”

²⁹ Pero Abraham nda ho ngain tti rico m : “Xanch  chonda xan tti X n tti jitaxin tti dicjin Mois s co tti dicjin cain profeta. Si jeha xan sinchehe xan caso tti nda ho X n m , jeha xan sijiha xa y  tti rrihi jaha.”

³⁰ Jeha tti rico m  nda ho: “J n, padre Abraham, pero si n  chojni que ondavenhe co rrocjan tsji siquetonhe xan, j n jeha xan tsentoxinhi xan vid  xan.”

³¹ Pero Abraham nda ho ngain: “Si rinaoha xan sinchehe xan caso tti diquetonha Mois s, co tti dinda ho cain profeta, cai sitticaonha xan are sicon xan n  tti ondavenhe rroxechon in .”

17

*Tti sinchenchehe ni cosa jianha
(Mt. 18.6-7, 21-22; Mr. 9.42)*

¹ Jes s nda ho ngain tti chojni que vacao:

—Ngataha nontte jiji cain tiempo sehe cosa que sinchenchehe chojni tti jianha, pero janto tangui tsonhe tti chojni que sincheyehe iná chojni para sinchehe jamé!

² Icha jian si chojni mé rroguetçhianito ná xochin ttosin co rroguetsingan-gui ndachaon, que sinchecanttjen chojni tehe ngain cosa jianha.

³ Ttjiho ra cuidado jaha ra.

'Si ná chojni que ditticaon nganji na janha sinchehe jianha nganji jaha, nchesattehe; co si tsentoxinhi vidé, nchetjañehe.

⁴ Masqui chojni mé yáto nttiha sinchehe jianha nganji jaha ngain nacoa nchanho, co yáto nttiha tsí sindattjo: “Irrocjanha na sinttaha jamé”, jaha chonda que sinchetjañehe.

Tti joachaxin que chonda chojni que ditticaon Dios

⁵ Co cain representanté Jesucristo ndaço na ngain Jesús:

—Ttjenguijna ni ra para que sitticanho na icha nganji.

⁶ Cottimeja Jesús ndaço ngain na:

—Si tti ditticaon ra jixin rroguetche inchin ná tsehe ca dinhi mostaza, jaha ra nchao rrondache ra nttasicómoro jiha: “Jaha daçhjenguixin de yá, co sadixenga ngangui ndachaon”, co nttá yá rrojinchehe nttá jamé.

Tti jiquininxin nchehe ná tti nchehe xa

⁷ 'Si ná de jaha ra chonda ra ná tti nchehe xa co ttixin de ngataon jngui después de joigüeca yunta o joiçuingaria coleco ngoixin nchanho, çapoco ndache ra: “xacoí darihi jintte”?

⁸ Nahi, jaha ra ndaçoaha ra jamé, sino que ndache ra tti nchehe xa mé: “Nchechjanna tti sine, co darihi listo sicohna cain tti sinaho are janha rrine co rridihi. Cottimeja jaha nchao sintte co sihi.”

⁹ ¿Co apoco jaha ra ndaço ra ngain tti nchehe xa mé: “Dio rrotsjengaha hna”? Nahi, ixin jehe jehó joinchehe tti jaha coetonhe jehe.

¹⁰ Jamé jaha ra cai, are tsjexin sinchehe ra cain tti ttetonha Dios, chonda ra que rrondaço ra: “Ján na ninchehe xa que xonhi rentte, ixin jointtoho na jehó tti jiquininxin sonttoho na.”

Are Jesús joinchexingamehe tte chojni que vinttechonda lepra

¹¹ Are Jesús joinchehe sigue viajé para Jerusalén, jehe vatto ngain regioen Samaria co Galilea.

¹² Are joiji na chiaon ngain ná rajna, ngandehe rajna mé te tte xí que teninxin chin lepra co joichoexin xa Jesús ngatja nttiha pero xa icjin de jehe tavinttengattjen xa

¹³ co vinttendaço xa sén:

—Jesús, Maestro, ttiaconoana ni ra janha na!

¹⁴ Are Jesús vicon cain xí mé jehe ndaço ngain xa:

—Sattji ra co dicjagohe ra xidána que ixonhi chin chonda ra.

Co are satettji xí mé, chinhi xa ndavitján chin.

¹⁵ Cottimeja ná de jehe xa are vicon xa que ixonhi chin jichonda xa, sacjan xa co coyao xa co joinchecoanxinhi xa Dios.

¹⁶ Co vettoxin nttajochjihí xa ngain Jesús, co visé xa hasta tti ngataha nontte, para que joanjo xa gracias ngain Jesús. Co xí mé Samaria nonttehe xa.

¹⁷ Cottimeja ndaço Jesús:

—¿Apoco jeha tte xí que xingamehe xa de ixin chinhi xa? ¿Quettinó te tti icha xí?

18 ¿Ajeho xí jihi que joixin iná nontte tti cjan para joinchecoanxinhi Dios?

19 Cottimeja ndačo Jesús ngain xí mé:

—Dingattjen co sattji; jaha ondaxingamaha ixin vitticaonna.

Quehe tsonhe icha saho que tsí tti Xí que joixin de ngajni
(Mt. 24.23-28, 36-41)

20 Cain xifariseo joanchiangui xa ngain Jesús ixin quesa tsí tti ttetonha Dios, co Jesús ndačo ngain xa:

—Are tsí tti ttetonha Dios, mé jeha cosa que nchao sicon ni.

21 čhoħa rrondačo ni: “Ntitihi jí”, o “Nojiha jí”, ixin tti ttetonha Dios oji ngayaha ra.

22 Cottimeja ndačo ngain tti chojni que vacao:

—Tsí tiempo are jaha ra sinao ra que janha, tti Xí que joixin de ngajni, sarihi nganji ra masqui nacoa nchanho, pero janha ičhoħa sarihi nganji ra.

23 Co masqui rrondattjo ra chojni que ntitihi rrihi janha o nojiha rrihi, pero jaha ra ditticaonha ra tti jehe na rrondačo na, ni ttjiha ra tti jehe na rrondačo na.

24 Ixin jańá inchin dicon ni xoi rayo de ná lado hasta iná lado de ngajni, jamé tsonhe ngain mero nchanho que janha, tti Xí que joixin de ngajni, sihi iná.

25 Pero saho chonda que anto tangui tsonna co chojni de ngain tiempo jihi rrondačo na ixin janha xonhi rentte na.

26 Inchin conhe ngain tiempo que vechon Noé, jamé tsonhe cai are janha, tti Xí que joixin de ngajni, sihi iná.

27 Ngain tiempo que Noé vechon, xonhi chojni vitticaon ixin toin ndasitján mundo, mexinxin vanchehe na sigue vane na co vaguihi na co vacottehe na co vaganjo na xenhe na xannčí para vacottehe xan hasta ngain tti nchanho que Noé vixinhi arca co joi jinda para ndagoen cainxin chojni.

28 Jamé conhe cai ngain tiempoe Lot. Are mé cain chojni vanchehe na sigue vajine na co vaguihi na, vaquehna na co vanhecji na, vanchehe na xa ngataon jngui co vanchechjan na nchia.

29 Pero are Lot vachjexin de ngain ciudad de Sodoma, vingoxin xohi co azufre de ngajni, co ndagoen cainxin chojni ntitiha.

30 Jamé sinchehe chojni sigue de rroxaxaonha na de ixin Dios are janha, tti Xí que joixin de ngajni, sihi iná.

31 Ngain nchanho mé si čhonja chojni sintte ngataha nchia noi, co chonda cosé ngaxinhi nchia mé, ni rrochjeha tiempo para sania sicá cosé. Co si čhonja chojni sintte ngataon jngui, rrochjeha na tiempo para rrocjan na nchiandoha na.

32 Xaxaon ra quehe conhe čihi Lot.

33 Tti chojni que rinao xonhi tsonhe vidé, mé ndasinchetján vidé, pero tti chojni que sinchetján vidé, mé rrochonda iná vida naroa.

34 Janha rrindattjo ra, que ngain tti mé, si yó chojni tejoa ngataha nacoa saon, ná rrochonda iná vida naroaxin co ná nahi.

35 Co ngain rato mé, si yó nčí tedaho nča, ná nča sayá nča co iná nča nahi.

36 Co si yó xí tenchehe xa xa ngataon jngui, ná xa ján sayá xa co iná xa nahi.

37 Are chojni coinhi jihi, joanchiangui na ngain Jesús co ndačo na:

—¿Quettinó tsoenxin cain jihi?

Co Jesús ndačo:

—Tti sarihi janha, ntitiha rroxatte chojnina.

18

Ejemplos tti ná nchiganha co ná xijuez jianha

¹ Jesús ndache tti chojni que vacao ná ejemplo para joinchecoehne na ixin chonda na que sinchetsenhe na ñao Dios cain tiempo co chondaha na que soan na desanimado.

² Jehe ndačho ngain na:

—Ngain ná rajna vehe ná xijuez que vechondaha xa respeto ngain Dios, ni ndosenha xa de icha chojni.

³ Ngain rajna mé vehe ná nchiganha cai que vacji ncha ngain xijuez jiji para vaganchia ncha jie para ixin tti chojni que vaquetocaho ncha.

⁴ Anto sé co xijuez jiji čhoaha xa joinchehe xa jie ngain nčí mé, pero después xaxaon xa: “Masqui janha chondaha respeto ngain Dios ni ndosenaha de icha chojni,

⁵ pero ixin nchiganha jiji nchehe ncha sigue nchemolestá na ncha, janha tsjenguijna ncha para que isincheha ncha sigue tsí ncha co ndatsjehe ncha pacienciana.”

⁶ Co Jesús ndačho:

—Jihi tti ndačho xijuez jianha.

⁷ Co ¿apoco Dios tsjenguijnaha cain tti chojni que jehe coinchiehe que nchetsenhe na ñao jehe de nchanho co de tti? ¿Apoco jehe tsončhenhe para tsjenguijna na?

⁸ Janha rrindattjo ra ixin jehe tsončhenha de tsjenguijna cain chojni mé. Pero are janha, tti Xí que joixin de ngajni, sihi iná, ¿aša sitta chojni que ditticaon na janha nttihi ngataha nontte?

Ejemplo xifariseo co xicobrador de impuesto

⁹ Jesús ndačho iná ejemplo para ixin tti chojni que tonohe ixin jeho tti anto jian, co xaxaon na ixin icha chojni xonhi rentte. Jesús ndačho:

¹⁰ —Yó xí cjoí xa ngain nihngo icha importante para joinchecoanxinhí xa Dios. Ná xa fariseo xa, co iná xa cobrador de impuesto xa.

¹¹ Xifariseo mé tavengattjen xa joinchecoanxinhí xa Dios, co ndačho xa janhi: “Oh Dios, janha chjaha gracias ixin janha jeha inchin canxion chojni que jehe na chehe na, co nchehe na icha cosa jianha, co chonda na tsje nčí, co janha ni jeha inchin xicobrador de impuesto jiji.

¹² Janha tocjáño na yó nttiha ngain semana, co janha danjo para ixin soixin ná tti tteixin parte de cain tti janha dacha.”

¹³ Pero xicobrador de impuesto vittohe xa cjinxin, co jehe xa ninchin tsinha con xa para rrotsjehe xa ngajni, sino que xanguí xa tton pechoe xa co ndačho xa: “¡Oh Dios, nttatsanha ñao ttiaconoana na ixin janha anto jianha jointtaha!”

¹⁴ Cottimeja Jesús ndačho:

—Janha rrindattjo ra que are xicobrador de impuesto jiji sacjan xa nchiandoha xa, Dios ojoiñchetañehe xa cain tti jianha que jehe xa joinchehe xa, pero xifariseo nahi. Ixin tti chojni que tonohe que jeho tti icha jian, pero ngain tti nchanho que Dios sinchejuzguehe cain chojni, chojni mé xonhi rentte na, co tti chojni que jai tonohe que jehe xonhi rentte, are mé Dios sinchesayehe chojni mé.

Jesús joinchenciaon xannchinnchinchjan
(Mt. 19.13-15; Mr. 10.13-16)

¹⁵ Cai tsje chojni vaquiaho na xannchinnchinchjenhe na ngain Jesús para que vacatte xan, pero are tti chojni que vacao Jesús vicon na jihi, coexinhi na joinchesattehe na tti chojni que vaquiaho xannchinnchinchjan mé.

¹⁶ Pero Jesús ndache xannchinnchinchjan mé ixin icha tsonchienne xan ngain co Jesús ndačo ngain chojni que vacao:

—Tančhjanda ra que xannchinnchinchjan tsí xan nganji na janha, co cayacoenha ra xan ixin tti ttetonha Dios, mé para ixin tti chojni inchin jehe xannchinnchinchjan.

¹⁷ Atto ndoa tti rrindattjo ra que tti chojni que sitticaonha tti ttetonha Dios inchin ná xannchinchjan ditticaon xan tti ttetonhe xan nindoha xan, chojni mé xonhi tiempo rrochonda parte ngain tti ttetonha Dios.

*Ná xí rico cjoao xa Jesús
(Mt. 19.16-30; Mr. 10.17-31)*

¹⁸ Ná xí importante para ngain chojni judío joanchiangui xa ngain Jesús co ndačo xa:

—Maestro, soixin que anto jian, ¿quehe icha sinttaha janha para rrochonda iná vida naroaxin que xonhi tiempo tsjexin?

¹⁹ Jesús ndačo ngain xa:

—¿Quedonda ndačo jaha que janha jian na? xonhi iná tti jian, jeho nacoaxinxon, co mé Dios.

²⁰ Jaha onoha cain mandamiento de Dios que ndačo: “Ncheyeha čhihi iná chojni, dantsjeha vidé iná chojni, tteha cosé iná chojni, nichjaha cosa ndoaha de iná chojni, co ttijho respeto ngain ndodá co ngain janná.”

²¹ Jehé tti xí mé ndačo:

—Cain yá janha rrinntaha desde are řa nčhín na.

²² Are coinhi Jesús jihi, jehe ndačo ngain xa:

—Jaha řa nchetján sinchehe nacoa cosa. Nchecji cain tti chonda co tonchjeyehe chojni noa tomi; jamé ngajni jaha rrochonda cosa icha rentte. Cottimeja sihi para sacjin na tti janha sacji.

²³ Pero are xí mé coinhi xa jihi, anto vechín xa ixin anto rico vehe xa.

²⁴ Are vicon Jesús ixin anto vechín xa jehe ndačo:

—¡Atto tangui para que chojni rico rrochonda na parte ngain tti ttetonha Dios!

²⁵ Icha tanguiha para ixin ná cocamello sattoxinhi va ttoechjenhe ná ntatchiehe manta que para chojni rico rrochonda na parte ngain tti ttetonha Dios.

²⁶ Co cain tti nicoinhi jihi ndačo na:

—Mexinxin, ¿quensen nchao rrochonda iná vida naroaxin remé?

²⁷ Jesús ndačo ngain xa:

—Tti čhoha sinchehe chojni, Dios nchao sinchehe.

²⁸ Pedro ndačo ngain Jesús:

—Janha na cointtoa na cain tti joichonda na para que jai čhjin na soixin.

²⁹ Cottimeja Jesús ndačo:

—Atto ndoa tti rrindattjo ra que quexeho chojni que ttinttohe nchiandoha, o ndodé, o janné, o xanchó, o čhihi, o xenhe para sindache icha chojni de ixin quežén ttetonha Dios ngain ansén ni,

³⁰ chojni mé ngataha nontte ntthi sayé na anto icha tsje cosa, co ngain mundo que tsí sayé na vida naroaxin que xonhi tiempo tsjexin.

*Jesús cjan ndačo iná ixin jehe ndasenje
(Mt. 20.17-19; Mr. 10.32-34)*

³¹ Jesús joantsjenda tti tteýó chojni que vacao co ndačo ngain na:

—Jai jaha ra onoha ra que satettjin na para Jerusalén. Nttiha tti tsoenxin cainxin tti dindačo cain profeta de ixin janha, tti Xí que joixin de ngajni.

³² Chojni nttiha sanjo na na janha ngain chojni que jeha judío co jehe na tsjanao na na, co feo rronichja na de ixin janha, co tsjatjo na na nttatté na.

³³ Sicaon na janha co después nasoenxon na na. Pero ngain nchanho ninxin janha rroxechon na.

³⁴ Jehe tti tteýó chojni que vacao Jesús xonhi coinxin na de ixin jihi, ni venoeha na de ixin tti ndačo Jesús, ixin para ixin jehe na jihi ná cosa que čhoha coinxin na.

Are Jesús joinchexingamehe ná tti xí que čhoha vaguicon de ngain Jericó (Mt. 20.29-34; Mr. 10.46-52)

³⁵ Are Jesús conixin tti chojni que vacao ochiaon tediji na ciudad de Jericó, ná tti xí que čhoha vaguicon tají ngandehe nttiha jidanchiagaha.

³⁶ Are jehe xa coinhi xa que nttiha tedatto tsje chojni, joanchiangui xa ixin quehe conhe.

³⁷ Icha chojni ndache xa na que ixin Jesús de Nazaret jidatto nonttiha.

³⁸ Cottimeja jehe xa ndačo xa sén:

—¡Jesús, tti razé David, co tti chonda joachaxin que vechonda rey David, ttiaconoana na janha!

³⁹ Tti chojni que tetaon nttiha joinchesattehe xa para que rrotencoaxa, pero jehe xa ndačo xa icha sén:

—¡Soixin, tti razé David, co tti chonda joachaxin que vechonda rey David, ttiaconoana na janha!

⁴⁰ Cottimeja Jesús tavengattjen co coetonha para que joiaho na ngain Jesús jehe tti vaguiconha mé. Co are ojoí ngaca Jesús, jehe Jesús joanchiangui ngain jehe tti vaguiconha mé co ndačo:

⁴¹ —¿Quehe rinao sinttaha janha nganji?

Jehe tti vaguiconha mé ndačo:

—Janha rinaho que nchao sicon.

⁴² Jesús ndačo:

—¡Ján, jaha onchao dicon! Jaha oxingamaha ixin vitticaon na janha.

⁴³ Ngain rato mé jehe tti vaguiconha mé onchao vicon, co sarroé tti sacjoi Jesús, co joinchecoanxinhi Dios. Co cain chojni que vicon jihi cai joinchecoanxinhi na Dios.

19

Are Jesús vetan Zaqueo

¹ Cottimeja Jesús conixin chojni que vacao ojoigaha na ciudad de Jericó co vattogaha na ciudad mé.

² Co nttiha vehe ná xí rico vinhi Zaqueo. Xí mé vaquetonha ngain cain xicobrador de impuesto,

³ co jehe Zaqueo joinao joatsoan Jesús. Pero čhoha vicon Zaqueo Jesús ixin anto tsje chojni tettji ngaca Jesús co Zaqueo atto nčhín vehe.

⁴ Cottimeja jehe Zaqueo coinga vitaon nttiha, co para que nchao vicon Jesús, jehe Zaqueo coani ngagaha ná nttá dinhi sicómoro chiaon de tti vatto Jesús.

⁵ Are Jesús vatto nonttiha, jehe tsjehe para noi tti jí Zaqueo co ndačo:

—Zaqueo, jaicoa danianxin de yá ixin jai janha chonda que sittona nchi-andoi.

⁶ Cottimeja Zaqueo jaicoa vanianxin de nttiha co anto ché ixin Jesús cjoí nchiandoha.

⁷ Are icha chojni vicon na jihi, cain na coexinhi na nichja na feo de ixin Jesús, co ndacho na que ixin Jesús cjoí joiguittohe ngain nchiandoha ná xí que jinchehe janha.

⁸ Cottimeja Zaqueo vingattjen co ndacho ngain Jesús:

—Tsjexinxin, soixin, janha rrochjaha chojni noa ngosinenxin de cainxin cosa que janha rrichonda. Co si chonja chojni jointtayá para coehe tomí, janha tsoncjañá chojni mé nó nttiha icha tsje que tti janha coehe.

⁹ Jesús ndacho ngain Zaqueo:

—Jai Dios rroanha iná vida narao ngain xí de nchia jihi. Co jehe xa razé Abraham xa cai.

¹⁰ Ixin janha, tti Xí que joixin de ngajni, joihi para joicjé co joichjaha vida narao tti chojni que ondavitján de ngain cosa janha.

Ejemploe tti tte tomí que anto rentte

¹¹ Are chojni xa tettinhi na Jesús jindacho cain cosa jihi, jehe ndacho ná ejemplo ngain na ixin jehe ochiaon jidiji ngain Jerusalén, co jehe na xaxaon na que are Jesús siji nttiha, Dios rroquexinhi rroquetonha nttihi ngataha nonte de ixin jehe Jesús.

¹² Mexinxin jehe ndacho ngain na:

—Vehe ná xí importante que sacjoi xa cjin ngain iná nación para joigayé xa joachaxin de sehe xa rey ngain nonttehe xa, co después cjan xa ngain nonttehe xa.

¹³ Saho de sacjoixin xa de ngain nonttehe xa jehe xa vayé xa tte de ninchehe xé xa para joanjo xa ngain cada na naná tomí que anto rentte, co ndacho xa ngain na: “Nchehe ra negocio conixin tomí jihi hasta que janha rocjan na sihi.”

¹⁴ Pero chojni de ngain nonttehe xa nttiha vacoñao na ngain xa, co rroanha na chojni para joicao na joajna jihi: “Rinaoha na que xí jihi sehe xa rey para ixin janha na.”

¹⁵ Pero jehe xa vayé xa joachaxin de vehe xa rey, co cjan xa para nonttehe xa. Co are jehe xa ongain nonttehe xa, vayé xa tti tte chojni que joinchegayé xa tomí para conohe xa quejanhi joacha na cada na.

¹⁶ Tti saho conchienne co ndacho: “Tti ná tomia que soixin chjana joacha tomí, itte tomí.”

¹⁷ Jehe rey mé ndacho: “Atto nchao jí; jaha atto jian ná ninchehe xa. Jaha cjoí jian ninchehe xa de ngain tti tomí que chjaha masqui tsjeha, mexinxin jai janha rrochjaha joachaxin de tsetonhe tte rajna.”

¹⁸ Cottimeja conchienne iná co ndacho: “Tti ná tomia que soixin chjana joacha tomí, inaho tomí.”

¹⁹ Cai ngain chojni jihi ndacho rey mé: “Jaha tsetonhe naho rajna.”

²⁰ Cottimeja conchienne iná co ndacho: “Nttihi jí tomia que chjana soixin. Janha coenchjinha tomí ngá ná paníto

²¹ Ixin janha xagonha soixin ixin soixin ná xí que atto soji de ngain ansén, que dantsjehe chojni tti soixin danjoha, co jamé tsinhi cosecha de tti soixin tengaha.”

²² Cottimeja rey mé ndacho: “Jaha jianha ninchehe xa ixin jaho ndacho que ixin janha soji ansenna. Si onoha que janha soji na de ngain ansenna, co

ixin dantsjá chojni tti janha danjoha co jamé janha ttjejo cosecha de tti janha ttengaha,

²³ mexinxin ¿quedonda joicanha jaha tomina ngain ná banco para que janha rrogayá tomina conixin tti rrogacha tomi are janha rrocjan na nchi-ania?”

²⁴ Co ndačo rey mé ngain tti chojni que te nttiha: “Dantsjehe ra xa tomi co danjo ra tomi ngain xí que chonda tte tomi.”

²⁵ Co jehe na ndačo na: “Pero chojni mé ochonda tti tte tomi.”

²⁶ Rey mé ndačo: “Janha rrondattjo ra que tti chojni que ochonda, sayé icha, pero tti chojni que xonhi chonda sachjehe hasta tti nchion que chonda.

²⁷ Co cain tti chojni que ningaconna, que mé joinaoha na para que janha rrogarihi rey ngain na, sicohna ra na nttihi co nadoenxon ra na ngattoxon con janha.”

Are Jesús joigaha ciudad de Jerusalén
(Mt. 21.1-11; Mr. 11.1-11; Jn. 12.12-19)

²⁸ Después de ndačo Jesús cain jihi, jehe joinchehe sigue sacjoi para Jerusalén.

²⁹ Are ochian joihi na ngain rajna Betfagé co Betania, chiaon ngain tti jnanchjan que dinhi Nttaolivo, Jesús rroanha yó de tti chojni que vacao,

³⁰ co jehe ndačo ngain tti yó chojni mé:

—Ttji ra ngain rajnanchjan que jí chiaon jiha, co are saso ra nttiha sinchí ra ná colochochjan jíchoa va nttiha que xa xonhi chojni diguinttetaha va. Tonxindanguehe ra va co sicó ra va.

³¹ Co si čhonja chojni sanchianguiha ra ixin quedonda tetonxindanguehe ra va, jaha ra ndačo ra que janha, tti chonda cain joachaxin, rrogondana va.

³² Jamé, savintteci cayoi chojni mé, co jamé conhe inchin ndačo Jesús.

³³ Co are otetonxindanguehe na colochochjan mé, nicolochoe joanchian-gui na co ndačo na:

—¿Quedonda tetonxindanguehe ra colochochjan yá?

³⁴ Tti yó chojni mé ndačo na:

—Ixin ximaestrona na sondehe xa va.

³⁵ Jamé sajoicao na va hasta tti ngain Jesús, co nttiha jehe na cjoajinhi na va tti manta que tetsá na co joinchetaha na Jesús jehe colochochjan mé.

³⁶ Are Jesús conchian para ngagaha ciudad de Jerusalén, chojni coingo na tti manta que tetsá na para coingachjetaha colochochjan mé.

³⁷ Co are ochian tediji na para sania na tti jnanchjan de Nttaolivo, cain chojni que terróe nttiha que vitticaon na Jesús, coexinhi na coyao na ixin anto ché na co joinchecoanxinhi na Dios de ixin anto tsje milagro vicon na joinchehe Jesús.

³⁸ Co ndačo na:

—¡Anto jian tti Rey que joí conixin nombré Dios! ¡Anto čhjoin tonohé cain ángel ngajni! ¡Gloria ngain Dios!

³⁹ Cottimeja canxion xifariseo que te nttiha ngayé chojni mé vinttendačo xa ngain Jesús:

—Maestro, nchesattehe chojnia tehe.

⁴⁰ Pero Jesús ndačo ngain xa:

—Janha rrondattjo ra que si chojni tehe rrotencoá na, xo tsoyao xo.

⁴¹ Are Jesús joihi chiaon de Jerusalén, are jehe vicon ciudad mé jehe tsjangaxin ciudad mé,

42 co ndaĉho ngain:

—Ĵi chojni de nganji jaha rroquinxin na jai jehe tti joichjaha na tti ĉjoin de ngain ansén na! Pero jai, mé tavema, co ĉhoha tsinxin na.

43 Tsí nchanho anto tangui para ixin chojnia. Are mé chojni que ningaconhe na sinchechjian na ttjarioho ngoixin ngandanji jaha, ciudad Jerusalén, co ngoixin ngandanji jaha sinttendanji na, co cain lado sixinttexin na ngain chojnia para soen na na.

44 Co chojni que ningaconhe chojnia sacha ngain chojnia. Nasoenxon na cain chojni que te nganji, co tsinttoeha na nganji jaha ni ná ʒo ngataha iná ʒo. Jamé tsonhe ixin chojnia joincheha na caso tti rato que Dios joí joitsjehe na.

Are Jesús joincheroa nihngo icha importante

(Mt. 21.12-17; Mr. 11.15-19; Jn. 2.13-22)

45 Cottimeja joixinhi Jesús nihngo icha importante co venguixin de nttiha cain chojni que tencheĉji co tettehna.

46 Co ndaĉho ngain na:

—Ngain tti jitaxin Palabré Dios ndaĉho: “Nĉhiania para sinchecoanxinh na Dios.” Pero jaha ra ndadinchechjian ra nĉhia cueva tti ʒatte tti chehe.

47 Cain nchanho que Jesús vehe ngain Jerusalén, ngaxinh ni nihngo mé vancheoexin chojni de ixin Dios. Pero cain xidána que vaquetonha ngain icha xidána, co cain ximaestro ley, co cain xivaquetonha ngain ciudad mé joé ʒa queʒén sinchehe ʒa para nasoenxon ʒa Jesús.

48 Pero ĉhoha joinchehe ʒa jamé ixin cainxin chojni tatettinh na tti jinichja Jesús.

20

Tti joachaxin que chonda Jesús

(Mt. 21.23-27; Mr. 11.27-33)

1 Ná nchanho Jesús tají ngaxinh ni nihngo icha importante para jincheoenhe chojni de ixin Dios, co jindache na tti jian joajna are vintteguiji canxion xidána que vaquetonha ngain icha xidána, canxion ximaestro ley, co canxion xí que chonda joachaxin ngain nihngo mé.

2 Co vinttendaĉho ʒa ngain Jesús:

—Ndachjenji ni ra quehe joachaxin chonda jaha para nchehe cain cosa jihi. ʒQuensen ĉjá joachaxin jihi?

3 Cottimeja ndaĉho Jesús ngain ʒa:

—Janha cai sanchianguiha ra ná cosa. Co rrondachjenji ni ra:

4 ʒQuensen rroanha Juan para joincheguite chojni? ʒA Dios o ani chojni?

5 Pero coexinh ni ʒa joanchianguihi chó ʒa co ndaĉho ʒa:

—ʒQuehe rrondaĉho na? Si rrondaĉho na que Dios tti rroanha Juan, jehe rrondattjo na: “ʒQuedonda vitticaonha ra remé?”

6 Co si rrondaĉho na que chojni tti rroanha Juan, cainxin chojni nasoenxon na ján na de ixin ʒo ixin jehe na chonda na seguro que Juan vanichja joajna que vagayé de ngain Dios.

7 Co jehe ʒa vinttendaĉho ʒa ixin noeha ʒa quensen rroanha Juan para joincheguite chojni.

8 Cottimeja ndaĉho Jesús ngain ʒa:

—Cai janha rrondattjoha ra quehe joachaxin nttaxin janha cain cosa jihi.

Ejemplo ninchehe xa jianha

(Mt. 21.33-44; Mr. 12.1-11)

⁹ Cottimeja coexinhi Jesús nichjé chojni, co ndačo ngain na ejemplo jiji:

—Vehe ná xí que cjoenga xa ná jngui de nttauva co después joanjo xa nttatohjoin media ngain canxion tti nchehe xa co jehe xa sacjoixin xa de nttiha para tsje tiempo.

¹⁰ Co are ojoí tiempo de cosecha, jehe xa rroanha xa ná tti nchehe xé xa para joiganchia tti parte de cosecha que jiquinixin sayé tti xinajni mé. Pero jehe tti nicoá nttatohjoin media mé coaxin na tti nchehe xa mé nttá co vengui na co xonhi chjé na.

¹¹ Cottimeja xinajni mé rroanha xa iná tti nchehe xé xa pero cai tti nicoá nttatohjoin media nichja na feo ngain tti nchehe xa mé co coaxin na nttá co vengui na co xonhi chjé na.

¹² Xinajni mé cjan xa rroanha xa iná tti nchehe xa, pero cai joinchenihi na tti nchehe xa mé co vengui na co xonhi chjé na.

¹³ Cottimeja xinajni mé ndačo xa: “¿Quehe sinttaha? Janha rrorroanha tti xanhna que janha anto rinaho. Are jehe na sicon na xanhna jiji puede rrochonda na respeto ngain xan.”

¹⁴ Pero are jehe na vicon na xan, ndache chó na: “Xan jiji xan sayé ngoi nontte jiji inchin herencia, mexinxin nasoexon na xan para que ján na sittoá na cain.”

¹⁵ Cottimeja joantsjegaxin na xan de nttauva mé co nagoexon na xan.

Cottimeja joanchiangui Jesús ngain chojni co ndačo:

—¿Quehe sinchehe xinajni mé ngain tti chojni que vittoehe jnguihi xa?

¹⁶ Jehe xa tsí xa co nasoexon xa chojni mé co sanjo xa jnguihi xa ngain ojé chojni.

Are vinttequinhi chojni jiji, vinttendačo na:

—¡Que Dios sanjoha joachaxin yá!

¹⁷ Pero Jesús tsjehe ngain jehe na co ndačo:

—Mexinxin, ¿quehe rročo tti jitaxin ngain Palabré Dios? Nttiha ndačo:

Tti xo que joinchegondaha xittette nchia,

xo mé tti xo joiguehe icha importante.

¹⁸ Quexeho chojni que tsonstenguixin xo jiji, tsonchjian pedazo cuerpoe na. Co si xo jiji setsinga xo ngataha ná chojni, chojni mé rrocjan cuerpoe polvo.

Tti rroxenga hna ngain impuesto

(Mt. 21.45-46; 22.15-22; Mr. 12.12-17)

¹⁹ Cainxin xidána que vaquetonha ngain icha xidána co ximaestroey ley nttiha jinoaxa na rrotse xa Jesús ngain rato mé ixin coinxin xa que ixin ejemplo jiji rročo de ixin jehe xa. Pero xagoen xa cain chojni.

²⁰ Mexinxin rroanha xa canxion xí que tsaya ngain Jesús co xí mé vanchehe xa que ixin jehe xa anto jian xa para que rrojinchenichja xa Jesús ná cosa nchaoxa para nchao rrocjanguihi xa Jesús ngain xigobernador.

²¹ Mexinxin joanchiangui xa ngain Jesús co ndačo xa:

—Maestro, janha na nona na que soixin nichja co ncheoenhe chojni tti ndoa, co ncheha juzgado chojni rico ojé que chojni noa, sino que soixin ndoa ncheoenhe na de ixin tti rinao Dios.

²² Ndachjenji ni ra: ¿Anchao jí tsjenga na hna impuesto ngain xiemperador, o ani nahi?

²³ Pero Jesús oconohe de tti jianha que jehe xa texaxaon xa de ixin jehe, co jehe ndačo ngain xa:

—¿Quedonda rinao ra sincheyana ni ra?

²⁴ Tjagohna ni ra ná tomi. ¿Quensen con jinganito jihi, co quensen nombré jitaxin jihi?

Jehe xa vinttendačo xa:

—Con xiemperador co nombré xa.

²⁵ Cottimeja ndačo Jesús ngain xa:

—Mexinxin chjehe ra xiemperador tti jiquininxin xa, co danjo ra ngain Dios tti jiquininxin sayé jehe.

²⁶ Co jamé čhoha joinchenichja xa Jesús ni ná cosa nchaoha; sino que vinttegoan xa admirado de ixin tti ndačo jehe co jamé ndavinttetencoá xa.

Canxion chojni joanchiangui quexén rroxechon ni

(Mt. 22.23-33; Mr. 12.18-27)

²⁷ Después de cain jihi canxion xisaduceo vinttecji xa ngain Jesús. Xisaduceo váguitticaon xa que chojni que ndadenhe irroxechonha na; mexinxin ndačo xa ngain Jesús:

²⁸ —Maestro, ley que vayé Moisés jitaxin que si ná xí ndadenhe xa co sittohe čhihi xa co si xonhi chjan joichonda na, xichó xindavenhe chonda xa que secoa xa jehe nčhiganha mé co rrochonda na chjan para que chjan mé sehe xan inchin xenhe tti ndavenhe.

²⁹ Nchao remé; vintte yáto xí, chó xa. Xisaho vecao xa nčhičhihi xa pero ndavenhe xa co xonhi chjan cointtohe xa.

³⁰ Xiyoxin vecao xa jehe nčhiganha mé, pero cai ndavenhe xa co xonhi chjan cointtohe xa ngain nčhiganha mé.

³¹ Cottimeja xininxin vecao xa jehe nčhiganha mé pero xajeho jamé conhe xa. Co jamé hasta tti yatoxin xa ndavenhe xa cai co xonhi chjan cointtohe xa ngain nčhiganha mé.

³² Co después ndavenhe nčhiganha mé cai.

³³ Mexinxin are rroxechon na, ¿Quexehe de tti yáto xí mé sehe mero xixihi jehe nčhi mé, ixin cain xa vinttecao xa nčhi mé?

³⁴ Cottimeja ndačo Jesús ngain xa:

—Ngain mundo jihi, xí co nčhi tottehe na.

³⁵ Pero tti chojni que tequininxin tsji para ngajni co rroxechonxin na de tti ndavenhe na, nttiha ni tsotteha na, ni sanjoha na xenhe na para tsottehe xan

³⁶ ixin nttiha ičhoha ndasenne na. Are mé sintte na inchin ángel de Dios co sintte na xenhe Dios ixin Dios tti sinchexechon na.

³⁷ Hasta ngain tti parte que coentaxin Moisés ixin vicon xohi ngagaha canchaha, jehe mismo jointtanoa na que ixin chojni que ndadenhe rroxechon na. Nttiha ndačo que Dios, Dios de Abraham, co Isaac, co Jacob.

³⁸ Pero Dios jeha Dios de nindadiguenhe, sino que Dios de tti nitechon. Co mé rročo que para ixin Dios cain chojni techon na.

³⁹ Cottimeja cainxin ximaestroey ley vinttendačo xa:

—Nchao ndačo, Maestro.

⁴⁰ Co icjanha xa joanchiangui xa icha ngain Jesús.

Tti dindačo David de ixin Jesucristo

(Mt. 22.41-46; Mr. 12.35-37)

⁴¹ Jesús ndačo ngain na:

—¿Quexén ndačoxin chojni que ixin Cristo ná xanntí David?

⁴² Ixin David mismo dindačo janhi ngain libroe Salmo:

Tti Ttetonha cainxin cosa ndačo ngain tti Ttetonna janha:

“Darihi ngain lado jian na,

⁴³ hasta que janha sinttagacha jaha de ngain cain tti ningaconha.”

⁴⁴ ¿Pero que xén que Cristo jehe ná xanntí David, si David mismo ndačo ixin Cristo tti Ttetonha ngain jehe?

Are Jesús joinchesattehe ximaestroe ley

(Mt. 23.1-36; Mr. 12.38-40; Lc. 11.37-54)

⁴⁵ Cainxin chojni nntiha tatettinhi na are Jesús ndačo janhi ngain tti chojni que vacao:

⁴⁶ —Ttjiho ra cuidado de ncheha ra inchin nchehe ximaestroe ley ixin jehe xa nche xoxinhi xa çhi xa conixin lontto icha jinjini, co rinao xa que chojni sanjo na joajna ngain xa conixin anto tsje respeto are ngain ndásin, co are ngaxinhi nihngo jehe xa ttjé xa tti ntaxintaon icha importante para dinttetaha xa, co are ttji xa dijine xa jehe xa rinao xa tti icha jian lugar ngain mesa.

⁴⁷ Cai dantsjehe xa nçhiganha nchiandoha nçha ixin ittixinha nçha ttjenga nçha hna contribución, co para xonhi chojni rroxaxaon tti jianha que nchehe xa, jehe xa ncheoanxinhi xa Dios anto sé. Cain jehe xa xisayé icha soji castigo.

21

Tomí que joanjo ná nçhiganha noa

(Mr. 12.41-44)

¹ Ngain nihngo icha importante nntiha vicon Jesús que xén tettinttohe cain chojni rico tomí ngá cajé alcancia.

² Cai vicon Jesús ná nçhiganha noa que vancá nçha nntiha yó centavochjan.

³ Co ndačo Jesús:

—Janha ndoa tti rrondattjo ra que nçhiganha noa jiji joanjo nçha icha tsje que cain chojni.

⁴ Ixin cain chojni danjo na tti xehe na, pero jehe nçha, masqui noa nçha, joanjo nçha cainxin tomí que jehe nçha jichonda nçha.

Jesús ndačo que rroxante nihngo icha importante

(Mt. 24.1-2; Mr. 13.1-2)

⁵ Canxion de tti chojni que vacao Jesús tetjao na de ixin nihngo icha importante co ixin anto çhjoin xo que diconchjan nihngo mé co de icha cosa que chojni diganjo na para ixin nihngo. Cottimeja Jesús ndačo ngain na:

⁶ —Tsí nchanho que cain tti jaha ra tedicon ra yá rroxante, co ni ná xo sittoeha ngataha iná xo.

Tti tsonhe icha saho que mundo ndatsjexin

(Mt. 24.3-28; Mr. 13.3-23)

⁷ Cottimeja joanchianguihi na Jesús co ndačo na:

—Maestro, ¿quesa siconhe jiji? ¿Quehe señal rroxago ixin cain cosa jiji osiconhe?

⁸ Jesús ndačo:

—Ttjiho ra cuidado que xonhi chojni sinttayaha ra. Ixin atto tsje chojni tsí co sinchegonda na nombrena rrondačo na: “Janha tti Cristo na”, co “Jai mero tiempo que mundo ndatsjexin.” Pero jaha ra ditticaonha ra mé.

⁹ Co are tsinhi ra ixin jí guerra co ixin tettetocaho chojni gobiernoe na, jaha ra xaonha ra ixin jiji chonda que tsonhe saho, pero xa jaha tiempo para ondatsjexin mundo.

¹⁰ Jesús joinchehe sigue ndačo ngain na:

—Ná nación tsetocaho iná nación, co ná región tsetocaho iná región.

¹¹ Tsje parte tsingui nontte anto soji, co sehe jintta co chin ngain tsje parte, co ngajni sicon ni cosa que sinchexaon ni, co anto tsje señal importante sicon ni.

¹² Pero saho de cain jihi, chojni rrotse ra na jaha ra co feo sinchehe na nganji ra. Tsjiho ra na para que soan ra juzgado ngain nihngo, co tsiaxinha ra na ngain cárcel co tsjiho ra na ngain rey co ngain xigobernador de ixin causananxin janha.

¹³ Cain jihi rrochondaxin ra oportunidad de rronichja ra de ixin janha.

¹⁴ Co are tsonha ra mé, xaxaonha ra icha saho de ixin quexén rrondaço ra ngain cain tti tsjiho ra na.

¹⁵ Ixin janha tti rrochjaha ra palabra jian que rrondaço ra co sinttanoha ra jian, para que ni ná chojni que ningaonha ra tsixinha na nganji ra, sino que jehe na sitticaon na tti jaha ra rrondaço ra.

¹⁶ Pero jaha ra hasta jehó ndodá ra, xanchó ra, niparientea ra, co xiamigoa ra; chojni mé sinttachianha ra na ngá rá niningaonha ra. Co nasoenxon na çhonja de jaha ra,

¹⁷ co ngoixin mundo rroningaonha ra chojni de ixin causananxin janha.

¹⁸ Pero masqui jamé, sitjanha ni ná xajá ra ixin vidá ra sehe seguro ngain Dios.

¹⁹ Si cainxin tiempo jaha ra seguro sitticaon ni ra, rrochonda ra iná vida naroaxin.

²⁰ Are sicon ra que ciudad de Jerusalén ngoixin sixindanji xisoldado, jaha ra onoha ra que are mé orroxantte.

²¹ Mexinxin are mé tti chojni que te Judea rrochonda na que satsinga na para ngagaha jna. Co tti nite ngain ciudad de Jerusalén rrochonda na que satsingaxin na de nntiha. Co tti nisintte ngataon jngui are mé, rochjeha na tiempo para rrocjan na ngain ciudad mé.

²² Ixin nchanho mé nchanho de castigo, are tsonhe cain tti jitaxin ngain Palabré Dios.

²³ ¡Anto tangui para ixin tti nchí que sintteyá chjan ngain nchanho mé o tti rrochonda chjan que xa tetai xan! Ixin are mé atto tangui tsonhe chojni nntihi ngataha nontte, co mé ná castigo anto soji para ixin nación Israel jihi.

²⁴ Are mé çhonja chojni nasoenxon na ngain guerra co icha de chojni mé rrotse na na co tsia na na co jamé sacao na na ngoixin región. Co chojni de iná nación sinchehe na inchin sino na ngain ciudad de Jerusalén hasta que tsjexin tti tiempo que sayé na joachaxin de sinchehe na jamé.

Quexén tsí tti Xí que joixin de ngajni

(Mt. 24.29-35, 42-44; Mr. 13.24-37)

²⁵ Cottimeja sehe señal ngain nchanho co ngain conittjao co ngain conotse. Co nntihi ngataha nontte cainxin chojni rroxaon na ixin anto soji saçoin ndachaon ixin anto soji rrocjamanguiataon chó nda.

²⁶ Chojni ndatsonttiehe na de ixin joaxaon are rroxxaon na ixin quehe siconhe ngain mundo jihi, ixin hasta cainxin cosa que jí ngajni rroxanga.

²⁷ Cottimeja sicon na na janha, tti Xí que joixin de ngajni, sihi are mé ngacjan na ttjoi conixin joachaxin co gloria.

²⁸ Are tsexinhi tsonhe cain cosa jihi, jaha ra xo xa sinttechon ra, doan ra animado co tsjehe ra para ngajni ixin are mé janha atto toin sihi para tsjenguijna ra co isetanha ra cain cosa tangui mé.

²⁹ Cai ndaço Jesús ngain na ejemplo jihi:

—Xaxaon ra ngain nttahigo, o quexeho ntá.

³⁰ Are sicon ra que oçinhi cachjenhe nttá, jaha ra mismo onoha ra que ojoiconchian tiempoe çhin.

³¹ Jamé cai are sicon ra que tsonhe cain cosa jihi, jaha ra onoha ra que osiconchian tiempo are siqúetonha Dios nttihi ngataha nontte.

³² Janha ndoa tti rrindattjo ra que cain jihi tsonhe saho que ndasenhe chojni de ngain generaci3n jihi.

³³ Masqui ngajni co nontte ndatsjexin, pero tti janha ndaçhjan chonda que tsonhe.

³⁴ Ttjiho ra cuidado que tsosojiha ansean ra de ixin vicio, inchin tti rrocoan ra co cain problema de ngain vida jihi, para que ngain nchanho mé rroçaonha ra

³⁵ inchin are coxigo çxaon va are ngain trampa que anto daca dijé, ixin jaña tsí nchanho mé ngain cainxin chojni ngoixin mundo.

³⁶ Mexinxin jaha ra dintte ra listo, co cainxin tiempo nchecoanxinhi ra Dios para que çonhi tsonha ra de ngain cain cosa que siconhe, co para que are mé nçhao tsonchienhe ra nganji na janha, tti Xí que joixin de ngajni.

³⁷ Ngain tiempo jihi, are nchanho, Jesús vanchecoenhe chojni de ixin Dios ngain nihngo icha importante, co are ttie jehe savacji para vaguittohe ngagaha tti jnanchjan que dinhi Nttaolivo.

³⁸ Co cada nchanho ndoyo vaconchienhe chojni ngain nihngo mé para vaquinhí na tti vandaço Jesús.

22

*Are cjoao na queçén sinchehe na para rrotse na Jesús
(Mt. 26.1-5, 14-16; Mr. 14.1-2, 10-11; Jn. 11.45-53)*

¹ Co are Jesús ça tají nttiha ngain Jerusalén, ochiaon joí tti quiai que jine na niottja que chondaha levadura, co mé tti quiai que dinhi pascua.

² Ngain tiempo mé merocoa cain chojni anto vancheçoxinhi na tti vandaço Jesús. Mexinxin cain xidána que vaquetonha ngain icha xidána, co cain ximaestroey ley vaçaon ça ngain cain chojni mé para que jehe ça nasoenxon ça Jesús; mexinxin jehe ça vacjé ça queçén sinchehe ça para tsjaya ça co chojni tsoñaoha na.

³ Cottimeja Satanás joixinhi ngain ansén Judas Iscariote, jehe ná de tti tteyo chojni que vacao Jesús.

⁴ Co Judas jihi cjoi joitsjehe xidána que vaquetonha ngain icha xidána, co xipolicié nihngo icha importante, para cjoao ça de ixin queçén jehe tsjago ttinó jí Jesús para sitse ça.

⁵ Cain jehe ça anto vintteché ça co ndaço ça ixin sanjo ça tomi ngain jehe Judas.

⁶ Co Judas vittoexin co ocoexinhi çaxaon ixin queçén sinchehe para que sinchechienhe Jesús ngá rá ça are çonhi chojni sintte ngain Jesús.

*Are joinecaho Jesús tti tteyo chojni que vacao
(Mt. 26.17-29; Mr. 14.12-25; Jn. 13.21-30; 1 Co. 11.23-26)*

⁷ Are joí tti nchanho de quiai que dinhi pascua are vagoen na coleco para vaganjo na ngain Dios.

⁸ Ngain nchanho mé Jesús rroanha Pedro co Juan co jehe ndaço ngain na: —Ttji ra dinchechjian ra tti sontte na ngain quiai pascua jihi.

⁹ Jehe na ndaço na ngain Jesús:
—¿Ttinó rinao sinttachjianxin na?

¹⁰ Jesús ndaço ngain na:

—Are jaha ra sigaha ra ciudad jiji, setan ra ná xí que jidicao ná nchíxa de jinda. Rroehé ra xí mé hasta tti ngain nchia que jehe xa sixinhi xa

¹¹ co ndache ra tti nchiandoha nttiha: “Ximaestro ndačo xa nganji: ¿Quettinó jí tti cuarto que jehe xa sinenxin xa ngain quiai pascua conixin tti tteyó chojni que xicao xa?

¹² Cottimeja jehe tti ndoha mé tsjagoha ra ná cuarto jie ngain piso yoxin que ojí listo. Nttiha nchechjianxin ra tti sontte na.

¹³ Cayoi chojni mé savintteci na co vittja na cain inchin ndačo Jesús. Co nttiha joinchechjianxin na tti joinecaho na Jesús ngain quiai pascua.

¹⁴ Are ovittja hora para joine na, Jesús conixin tti tteyó representanté vintte na ngain mesa.

¹⁵ Cottimeja Jesús ndačo ngain na:

—¡Janha anto joinaho joine conixin jaha ra ngain quiai pascua jiji saho que janha ndasenhe na!

¹⁶ Janha rrindattjo ra seguro que rrocjanha na sinttasayá quiai pascua hasta que cain tti rročo quiai jiji tsoenja ngain tti ttetonha Dios.

¹⁷ Cottimeja coá ná vaso de vino co joanjo gracias ngain Dios, co ndačo ngain na:

—Dihi ra jiji co tonchjeyehé chó ra,

¹⁸ ixin janha irrocjanha na sihi vino hasta que tsija tti ttetonha Dios.

¹⁹ Después coá niottja co joanjo gracias ngain Dios, cottimeja váña nio co joanjo nio ngain jehe na co ndačo:

—Jihi rročo cuerpona janha que rroñanjo para ndasenhe para tsjenguijna ra. Cain tiempo nchehe ra janhi para rroñaxaonxin ni ra.

²⁰ Cai jamé joinchehe conixin vaso de vino are ojoexin joine na co ndačo:

—Vaso jiji rročo tti trato naroaxin que jnina sinchese gurá. Co jnina mé singo jni para que tsjenguijna ra.

²¹ Pero jaxon rá tti xí que rrondache chojni quexén para rrotse na na janha, rá xí mé nttihi jí ngataha mesa conixin rana janha.

²² Janha chonda que senhe na inchin jiquininxin, pero janto tangui tsonhe tti rrondache chojni quexén para rrotse na na!

²³ Cottimeja tti tteyó chojni que vacao Jesús coexinhi na joanchianguihi chó na ixin quexehe tti rrondache chojni quexén para rrotse na Jesús.

Are joinchediscutí na ixin quensen sehe icha importante

²⁴ Cottimeja joinchediscutí na ixin quexehe de jehe na tti sehe icha importante ngain tti ttetonha Dios.

²⁵ Pero Jesús ndačo ngain na:

—Ngain mundo jiji, cain rey de cain nación, jehe ttetonha inchin jehe rinao, co cain xí que chonda cargo de ngain cain nación, dinhi xa xí que nchehe jian.

²⁶ Pero jaha ra chondaha ra que sintte ra jamé, ixin tti sehe icha importante ngayaha ra, pero mé chonda que sehe inchin tti icha nchín. Co tti tsetonha ngayaha ra, mé tti chonda que icha tsjenguijna ra.

²⁷ Ndachjenji ni ra, ¿quensen icha importante, a tti dehe jine ngain mesa, o ani tti nchehe xa que diquenhe jehe tti jine ngain mesa? Seguro jehe tti jí ngain mesa, mé tti icha importante. Pero janha rrihi nttihi ngayaha ra inchin ná tti nchehe xa.

²⁸ Jaha ra tti vintte ra cainxin tiempo nganji na janha are janha vetan tangui.

²⁹ Mexinxin janha rrichjaha ra ná joachaxin para que jaha ra tsetonha ra, jañá inchin joachaxin que chjana Ndodana janha,

³⁰ para que sintte ra co sihi ra ngain mesana nttiha tti janha tte-tonha, co sintte ra ngain lugar de joachaxin para sinchejuzguehe ra tti tteyó grupoe chojni Israel.

*Jesús ndacho que Pedro rrondacho ixin jehe chonxinha Jesús
(Mt. 26.31-35; Mr. 14.27-31; Jn. 13.36-38)*

³¹ Ndacho Jesús cai:

—Simón, Simón, tsjexin; Satanás danchia joachaxin para que tsontsjenga ra jaha ra como si rrocji ra trigo.

³² Pero janha rrinttatsán ñao Dios para ixin jaha, para que xonhi tiempo rrotjañaha tti jaha ditticaon. Co jaha are saçhjahe joaxaon, ttjenguijna icha chojni que ditticaon para que sitticaon na jian cainxin tiempo.

³³ Simón Pedro ndacho ngain Jesús:

—Janha rinaho tsji cain lugar conixin soixin, masqui siaxinna conixin soixin o hasta tti senxin soixin cai janha nttiha senxin na.

³⁴ Jesús ndacho ngain Pedro:

—Pedro, janha rrindattjo que jai mismo icha saho que rrotsje conttaxichia, jaha orrondacho ninxin nttiha que chonxinha na.

Are ojoí tiempo que Jesús tangui conhe

³⁵ Cottimeja Jesús joanchiangui ngain tti chojni que vacao co ndacho:

—Are janha coetonha ra para joindache ra chojni de ixin Dios, co ixin cjoioha ra ni bolsa, ni tomi, ni catte, ¿açhonja gondaha ra?

Jehe na ndacho na:

—Nahi, xonhi.

³⁶ Cottimeja ndacho Jesús ngain na:

—Co jai jaha jamé, xo chonda ra bolsa, ttjiho ra, co cai tomi; co xo chondaha ra espada nheceji ra chamarrá ra para ttenanxin ra espada.

³⁷ Ixin janha rrindattjo ra que chonda que siconna janha inchin jitaxin Palabré Dios: “Jehe venhe inchin chojni que nchehe jianha.” Ixin cain tti jitaxin de ixin janha chonda que tsonhe.

³⁸ Cottimeja jehe na vittendacho na:

—Nttihi jí yó espada.

Co Jesús ndacho:

—Conixin yao.

*Are Jesús joinchetsenhe ñao Dios ngain Getsemani
(Mt. 26.36-46; Mr. 14.32-42)*

³⁹ Cottimeja vaçhje Jesús co inchin costumbre que jehe vanchehe, jehe sacjoi para ngagaha tti jnanchjan de Nttaolivo, co rroé tti chojni que vacao.

⁴⁰ Co are ojoiji na nttiha, jehe ndacho ngain na:

—Nchetsenhe ra ñao Dios para que sitaha ra de sinchehe ra cosa jianha.

⁴¹ Cottimeja Jesús sacjoi nchion cjin de ngain na, inchin cjinxin ttixinhi ni de tja ni ná xo, co nttiha vettoxin nntajochjihi para joinchetsenhe ñao Dios.

⁴² Co jehe ndacho:

—Padre, si rinao, tançhjandaha na para que janha sattoha ngain tti anto tangui que tsonna, pero tsoenha inchin janha rinaho, sino que tsonhe inchin soixin rinao.

⁴³ Cottimeja joicononxin ná ángel de Dios ngain Jesús para que joinchesoji espiritue Jesús.

44 Co ixin jehe icha tangui conohe ngain ansén, jehe icha jian joinchetsenhe ñao Dios co ndachjín cjan inchin jni, co yeye gota vinttji ngataha nontte.

45 Co are joexin joinchetsenhe ñao Dios, vingattjen co cjoi ngain tti chojni que vacao; co jehe na otatejoa na ixin icoixinha na de joachjaon.

46 Cottimeja jehe ndačo ngain na:

—¿Quedonda tatečhin ra? Dingattjen ra, co nchetsenhe ra ñao Dios para que sitaha ra de sinchehe ra cosa jianha.

Are tse na Jesús

(Mt. 26.47-56; Mr. 14.43-50; Jn. 18.2-11)

47 Jesús xa jinichja jaña are ojoj anto tsje chojni. Tti vinhi Judas, jehe ná de tti tteyó chojni que vacao Jesús, jehe mé tti jitaon nttiha de cainxin chojni mé, co are ojoi, jehe conchienenhe ngaca Jesús para coetoxin.

48 Cottimeja Jesús ndačo ngain Judas:

—Judas ¿acoetoxin na para cjoago ixin janha tti Xí que joixin de ngajni?

49 Co tti icha chojni que vacao Jesús, are vicon na jihi, ndačo na ngain Jesús:

—¿Atsjaya na conixin espada?

50 Co ná de chojni mé joinchenihi ná xinchehe xé xidána icha importante, ixin cončhinjihi ná ndatsjoen xa lado jian xa.

51 Pero Jesús ndačo ngain tti chojni que vacao:

—Tanchjanda ra xa; conixin yao.

Cottimeja Jesús catte ndatsjoen xí mé co ndatsexin.

52 Cottimeja ndačo Jesús ngain cain xidána que vaquetonha ngain icha xidána, conixin ngain xipolicie nihngo icha importante, co ngain cain xitte-tonha ngain nihngo mé, tti xicjoi para sajoicao xa Jesús:

—¿Ajojhi ra joiroehna ni ra conixin espada co nttá inchin janha rrocji ná tti chehe?

53 Cain nchanho are janha joarihi nganji ra ngain nihngo icha importante, jaha ra xonhi tiempo joinao ra rrotse ni ra. Pero jai hora jihi tti mero hora para sinchehe ra jihi, ixin Satanás tti jichonda joachaxin jaxon.

Pedro ndačo ixin jehe chonxinha Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

54 Cottimeja tse na Jesús, co sajoicao na para ngain nchiandoha xidána icha importante. Co Pedro cjinxin jirroexin.

55 Nttiha ngain patioe nchia mé cjoaga na ná xohi co nttiha tavinttendanji na xohi mé para xižohe na. Co cai Pedro nttiha tavehe ngayé na.

56 Cottimeja ná nchimozé xidána mé, are vicon ncha que Pedro tajixixohe ngandehe xohi nttiha tavetsjehe ncha jian co ndačo ncha:

—Cai xí jihi vacao xa Jesús.

57 Pero Pedro čhoha ndačo ndoa, co jehe ndačo:

—Janha chonxinha xí mé.

58 Nchion después vicon ná xí, co xí mé ndačo xa ngain:

—Jaha cai ná de chojni Jesús.

Pero Pedro ndačo:

—Nahi, janha jaha chojni jehe.

59 Inchin ná hora después iná xí xa cjan xa ndačo xa:

—Ján ndoa xí jihi vacao xa Jesús, ixin jehe xa cai Galilea regioen xa.

60 Cottimeja Pedro ndačo:

—Janha nonaha de quehe rrinichja jaha.

Ngain rato mé are Pedro ꝥa jinichja jamé, otsje ná conttaxichia.

⁶¹ Cottimeja Jesús ngaria co tsjehe ngain Pedro, cottimeja Pedro ꝥaxaon ixin Jesús ondaço: “Saho que conttaxichia rrotsje va jai, jaha orrondaço ninxin nttiha que chonxinha na janha.”

⁶² Cottimeja Pedro vaçhjexin de nttiha co anto tsjanga.

Are cjoanoa xa Jesús

(Mt. 26.67-68; Mr. 14.65)

⁶³ Xisoldado que tenda Jesús cjoanoa xa co ꝥanguí xa nttá.

⁶⁴ Jehe xa coejehe xa con Jesús co ꝥanguí xa tton ngá con co ndaço xa ngain:

—¡Datsoenhe quensen goen!

⁶⁵ Co ndaço xa icha cosa feo ngain.

Are Jesús ngain juzgadoe nihngo

(Mt. 26.59-66; Mr. 14.55-64; Jn. 18.19-24)

⁶⁶ Co are ovingasán ꝥatte cain xittetonha ngain nihngo, cain xidána que vaquetonha ngain icha xidána, co cain ximaestroe ley para sajoicao xa Jesús ngain juzgadoe nihngo. Nttiha joanchianguixin xa Jesús, co ndaço xa:

⁶⁷ —Nttili ndachjenji ni ra, ꝥajaha tti Cristo?

Jehe ndaço ngain xa:

—Si rrondattjo ra que ján, sitticaonnaha ra.

⁶⁸ Co si sanchianguiha ra ná cosa, jaha ra rrondachjenjiha ni ra, ni tsançjandaha ni ra satsji.

⁶⁹ Pero desde jai, janha, tti Xí que joixin de ngajni, osarihi ngain lado jian de Dios que chonda cainxin joachaxin.

⁷⁰ Cottimeja cainxin xa joanchianguihi xa Jesús co ndaço xa:

—Mexinxin, ꝥajaha tti Xenhe Dios?

Jesús ndaço:

—Ján, janha inchin ndaço jaha ra mismo.

⁷¹ Cottimeja vinttendaço xa:

—¿Quedonda tsjé na icha chojni de testigo? Ján na mismo coinhi na tti jianha que ndaço xí jiji.

23

Jesús ngain Pilato

(Mt. 27.1-2, 11-14; Mr. 15.1-5; Jn. 18.28-38)

¹ Cottimeja cainxin xa vingattjen xa co sajoicao xa Jesús ngain Pilato.

² Nttiha coexinhi xa nichja xa tti jeha ndoa de ixin Jesús, co ndaço xa:

—Janha na vicon na que xí jiji jinchequeto xa chojnina na. Co ndaço xa que janha na chondaha na que tsjenga ná hna impuesto ngain xiemperador romano, co cai ndaço xa que jehe xa tti Cristo, co mé rroço que jehe xa ná rey.

³ Cottimeja Pilato joanchiangui ngain Jesús:

—¿Ajaha tti Rey de chojni judío?

Jesús ndaço:

—Ján janha, jañá inchin jaha ndaço.

⁴ Cottimeja Pilato ndaço ngain xidána que vaquetonha ngain icha xidána, co ngain cain chojni que joinchechienhe Jesús nttiha:

—Janha ꝥonhi cosa jianha dittjá xí jiji.

⁵ Pero cain jehe xa icha coyao xa co ndaço xa:

—Jehe xa joincheyehe xa chojni ngoixin Judea de ixin tti jehe xa nichja xa. Coexinxin xa ngain Galilea, co jai ontthi jinchehe xa jamé.

Jesús ngain Herodes

⁶ Are Pilato coinhi jiji, jehe joanchiangui ngain xa si Jesús joixin de ngain Galilea.

⁷ Co are vinttendačo xa que ján, Pilato sarroanha Jesús para ngain Herodes ixin mé tti vehe gobernador de ngain Galilea tiempo mé, co ngain conittjao mé nttiha vehe Herodes ngain ciudad de Jerusalén.

⁸ Are Herodes vicon Jesús, jehe anto ché ixin anto sé jehe jixaxaon sicon Jesús ixin jehe coinhi vanichja chojni de ixin tti jian que vanchehe Jesús. Co jehe Herodes joinao rroguicon ná milagro que rrojinchehe Jesús.

⁹ Herodes anto tsje joanchiangui ngain Jesús pero Jesús xonhi ndačo.

¹⁰ Cai nttiha conchienne tsje xidána que vaquetonha ngain icha xidána co tsje ximaestroey ley para ndačo xa tsje cosa ndoaha de ixin Jesús ixin anto coñao xa.

¹¹ Cottimeja Herodes conixin cain xisoldadoe xaxaon xa que Jesús xonhi rentte, co para cjoanoa xa Jesús, joinchengá xa lontto čhjoin inchin lonttoey. Cottimeja Herodes rroanha Jesús para ngain Pilato iná.

¹² Ngain nchanho mé Pilato co Herodes vinttegoan amigo. Icha saho jehe na vaningaonhe chó na.

Are ndačo na ixin Jesús chonda que ndasenhe

(Mt. 27.15-26; Mr. 15.6-15; Jn. 18.39—19.16)

¹³ Cottimeja Pilato vayé cain xidána que vaquetonha ngain icha xidána co cain xí que vechonda joachaxin ngain chojni judío, conixin icha chojni,

¹⁴ co ndačo ngain na:

—Jaha ra joicoihna ra xí jiji, co ndačo ra ixin jinchequeto xa chojni, pero janha joanchiangui xa ngattoxon con ra, co ovicon ra que janha xonhi vittjá xa que ixin jehe xa jinchehe xa ná cosa jianha inchin jaha ra tjanguihí ra xa.

¹⁵ Cai Herodes sarroanna xí jiji iná, ixin jehe xa xonhi cosa jianha jica xa. Ovicon ra que xí jiji xonhi jianha dinchehe xa para que sequininxin ndasenhe xa.

¹⁶ Janha tsetonha soan xa castigado, cottimeja tsančjanda xa satsji xa.

¹⁷ Ngain quiai mé, Pilato vechonda costumbre de tančjanda ná de tti tteaxinhi para sattji para que chojni judío icha vaché na.

¹⁸ Pero cainxin na coexinhi na coyao na co ndačo na:

—¡Dantsje xí yá para siguenhe xa co tančjanda Barrabás satsji!

¹⁹ Co Barrabás jiji coixinhi na ngain cárcel ixin jehe joinchequeto chojni ngain ciudad de Jerusalén co ixin jehe nagoenxon chojni.

²⁰ Pilato joinao rrocanchjanda Jesús, mexinxin jehe cjan ndačo ngain na iná,

²¹ pero jehe na icha vinttecoyao na sén co ndačo na:

—¡Nchecrucificá xa! ¡Nchecrucificá xa!

²² Ninxin nttiha ndačo Pilato ngain na:

—Mexinxin, ¿quehe cosa jianha joinchehe xí jiji? Janha xonhi cosa jianha dittjá xa para que sequininxin senhe xa. Janha tsetonha que soan xa castigado, cottimeja tsančjanda xa satsji xa.

²³ Pero jehe na vittoexinha na, co icha coyao na co joanchia na que ixin Pilato sinchecrucificá Jesús. Co anto vinttecoyao na jehe na conixin cain

xidána que vaquetonha ngain icha xidána hasta que conhe inchin tti jehe na joinao na.

²⁴ Pilato joinchehe inchin jehe na joinao na,

²⁵ co jamé jehe coačhjanda sacjoi jehe tti vehe ngaxinhi cárcel ixin joinchequeto chojni co nagoenxon chojni. Co jehe Pilato joanjo Jesús ngain na para que jehe na joinchehe na inchin joinao na ngain Jesús.

Are joinchecrucificá na Jesús

(Mt. 27.32-44; Mr. 15.21-32; Jn. 19.17-27)

²⁶ Are osatedicao xisoldado romano Jesús para joinchecrucificá xa, vetan xa ná xí de Cirene que vinhi Simón. Jehe Simón rato mé joigaha ciudad de Jerusalén. Co jehe xa tse xa Simón mé co joincheca xa crue Jesús co joincherroé xa Jesús.

²⁷ Co terroé anto tsje chojni, co tsje nchí que tetsjanga ncha co tetoyao ncha de ixin joachjaoen Jesús.

²⁸ Pero Jesús tsjehe ngain cain nchí mé co ndačo:

—Jaha ra xó nchí ra de ngain Jerusalén, tsjangaxinha ni ra janha, sino que de ixin jaha ra misma, co de ixin xanha ra.

²⁹ Ixin ojitonchiaon nchanho que chojni rrondačo na: “Anto thjoin para ixin tti nchí que čhoħa rrochonda ncha chjan, tti nchí que xonhi chjan joincheconcjihí, ni joinchecai.”

³⁰ Co are mé chojni tsexinhi na rrondačo na ngain tsje jna: “Dinttji ra ngataha janha na”; co rrondačo na ngain tsje jnanchjan: “Ttema ni ra.”

³¹ Ixin si janha inchin ná nttá que jichon co janhi nchehe na nganji na janha, ¿mé quehe sinchehe na nganji jaha ra, que jaha ra inchin tti nttaxema?

³² Cai nttiha tedicao xa yó xichehe para joigoen xa xichehe mé conixin Jesús.

³³ Are ojoiĵi na ngain tti lugar que dinhi Nttaloroĵá Chojni, nttiha joinchecrucificá xa Jesús conixin jehe tti yó xichehe: ná xa ngain lado jian de Jesús, co iná xa ngain lado cjon.

³⁴ Co are otenchecrucificá xa Jesús jehe ndačo:

—Padre, nchetjañehe xí tehe ixin noeha xa quehe tenchehe xa.

Co cain xisoldado mé joantsje xa suerte para chjejehe xa lonttoe Jesús.

³⁵ Co tsje chojni cĵoi na nttiha para vicon na, co cai cĵoi tsje xí que vinttechonda joachaxin ngain chojni judío; cain xí mé cĵoanoa xa Jesús co ndačo xa:

—Jehe nchao cĵoenguiĵna icha chojni, pero jai si ndoa jehe tti Cristo tti Dios coinchiehe, socon na sanianxin de nganito cruz yá.

³⁶ Cai cain xisoldado nttiha cĵoanoa xa Jesús; vintteconchiennehe xa ngain cruz co joanjo xa vino san para vihi Jesús,

³⁷ co ndačo xa ngain:

—Si jaha tti Rey de chojni judío, danianxin de nganito cruz jaho.

³⁸ Co nttiha já cruz que vengano Jesús vehe ná Xón que vetaxin ixin nguigoa griego, latín, co hebreo que ndačo: “Xí ĵihi tti Rey de chojni judío.”

³⁹ Ná de tti xichehe que tengano cruz nttiha, ndačo xa feo ngain Jesús:

—Si jaha tti Cristo, danianxin de nganito cruz co nchegania ni ra janha na cai.

⁴⁰ Pero tti xí iná joinchesatthehe xa xicompañeroe xa co ndačo xa:

—¿Aħagoenħa Dios, jaha que rridatto ngain xajeho castigo?

⁴¹ Ján na jí razón que tedotan na tangui jiji ixin tettjenga na hna tti jianha que jointtoho na, pero xí jiji xonhi cosa jianha joinchehe xa.

⁴² Cottimeja ndačo xí mé ngain Jesús:

—Jesús, xaxaon na janha are soixin tsexinhi tsetonha.

⁴³ Jesús ndačo:

—Janha seguro rrindattjo que desde jai jaha osarihi conixin janha nttiha ngajni.

Are ndavenhe Jesús

(Mt. 27.45-56; Mr. 15.33-41; Jn. 19.28-30)

⁴⁴ Are inchin ngosine nchanho, cottimeja ndaconaxin xehe ngoixin ngataha nontte nttiha, co mé cončhenhe hasta ní hora tsocjin.

⁴⁵ Nchanho ndaconaxin xehe, co tti manta que vettoa ngaxinhi tti nihngo icha importante ndavichjenga ngosinexin manta.

⁴⁶ Cottimeja Jesús coyao co ndačo:

—Padre, ngá rá tsín espirituna.

Co are jehe joexin ndačo jiji, jehe ndavenhe.

⁴⁷ Are vicon xicapitán romano ixin quexén conhe, jehe xa xoon xa ngain Dios co ndačo xa:

—Ján, ndoa xí jiji xonhi jianha jica xa ngattoxon con Dios.

⁴⁸ Cain chojni que te nttiha, are vicon na cain mé, savinttecji na co xanguí na pechoe na tton ixin anto coá na joachjaon.

⁴⁹ Co cain niamigoe Jesús, co cain nčí que joixin desde Galilea para vacao ncha, cjinxin tavintte na para vicon na cain cosa jiji.

Are xavá Jesús

(Mt. 27.57-61; Mr. 15.42-47; Jn. 19.38-42)

⁵⁰ Vehe ná xí jian de ngain ansén xa que vinhi xa José, co rajné xa Arimatea ngain regioen Judea. Xí mé ná xijuez ngain juzgadoe nihngo.

⁵¹ José jiji cai jichonhe tiempo are Dios siquetonha ngataha nontte. Co jehe coñaao de ixin tti joinchehe icha xijuez ngain Jesús.

⁵² Mexinxin jehe cjoí joitsjehe Pilato para joiganchiehe joachaxin ixin jehe sasicao cuerpoe Jesús.

⁵³ Co después de joinchegianxin cuerpoe Jesús de nganito cruz, jehe coensiha cuerpoe Jesús ná manta roa co joiquín cuerpo ngain ná cueva que odingue na ngadoho ná ttjao tti xa xonhi chojni dixavá.

⁵⁴ Mé cjoí tsocjin víspera de ngain tti nchanho que nchejogaha na.

⁵⁵ Tti cain nčí que joixin desde Galilea conixin Jesús cjoí ncha vinttegit-sjehe ncha cueva mé, para vicon ncha quexén vittohe cuerpoe Jesús.

⁵⁶ Co are sacjan ncha para nchiandoha ncha, joinchechjian ncha perfume co pomada para cuerpoe Jesús; cottimeja ngain tti nchanho que nchejogaha na, jehe ncha vinttenchejogaha ncha cai inchin ttetonha ley que vayé Moisés.

24

Are xechon Jesús

(Mt. 28.1-10; Mr. 16.1-8; Jn. 20.1-10)

¹ Domingo, saho nchanho de semana, ndoyo, cain nčí mé cjan ncha ngain sepultura joicaao ncha tti cain perfume que jointtecan ncha, co icha nčí joicao chó ncha.

² Are vintteguiji ncha nttiha, vicon ncha tti xo que vejé sepultura mé ijiha xo nttiha.

³ Co jehe n̄ha vintteguixinhi n̄ha sepultura mé pero ivittjaha n̄ha cuerpoe Jesús.

⁴ Anto vintteḅaon n̄ha co ni inoeha n̄ha quehe sinchehe n̄ha, are vicon n̄ha yó xí tatengattjen xa ngaca n̄ha tengá xa lonto tedaquima.

⁵ Co ixin jehe n̄ha anto vintteḅaon n̄ha vintteguisé n̄ha hasta tti ngataha nontte, co jehe cayoi xí mé vinttendaḅo xa ngain n̄ha:

—¿Quedonda jaha ra tettjé ra ngain sepultura tti jichon jai?

⁶ Jehe icoha nttihi ixin jehe xechon. ḅaxaon ra queḅén ndattjo ra are jehe ḅa vehe ngain Galilea.

⁷ Jehe ndaḅo que jehe, tti Xí que joixin de ngajni, chonda que sinchecchienhe na ngá rá chojni jianha, co jehe na sinchecrucificá na, pero ngain nchanho n̄xin jehe rroxechon.

⁸ Cottimeja ḅaxaon cain n̄hí mé tti ndaḅo Jesús,

⁹ co después de cjanxin n̄ha de ngain sepultura, coequin n̄ha cain jihi ngain tti ttejngo chojni que vacao Jesús, co ngain icha chojni cai.

¹⁰ Co tti cain n̄hí que joicao joajna jihi ngain tti ttejngo chojni que vacao Jesús, cjoí María Magdalena, co Juana co iná María, janné Jacobo, co icanxin n̄hí.

¹¹ Pero tti chojni que vacao Jesús vitticaonha na tti ndaḅo cain n̄hí mé.

¹² Pero masqui jamé ḅaxaon cain na, Pedro vaḅhe co coinga cjoí ngain sepultura. Co are jehe tsjehe ngaxinhi sepultura, jehe vicon tti manta roa que vesia cuerpoe Jesús tají manta ná lado. Cottimeja sacjan para tti nchia co anto goan admirado de ixin quehe diconhe.

*Tti conhe are ngatja nttiha para Emaús
(Mr. 16.12-13)*

¹³ Ngain ḅajeho nchanho mé, yó de chojni que vitticaon Jesús satettji na ngain ná rajna dinhi Emaús, inchin ttejngo kilometro cjinxin de Jerusalén.

¹⁴ Tetjao na de ixin cain tti conhe Jesús.

¹⁵ Co are jehe na tetjao na mé, Jesús mismo conchienenhe ngaca na co sacjoi conixin jehe na.

¹⁶ Pero masqui vicon na que nttiha jittji Jesús, jehe na joatsoanha na, ixin inchin ná cosa cayacoen jmacon na para joatsoanha na Jesús daca.

¹⁷ Cottimeja Jesús joanchiangui ngain na co ndaḅo:

—¿Quehe tetjao ra jaxon que satettji ra ngain nttiha jihi? ¿Quedonda techinhi ra?

¹⁸ Ná de jehe na que vinhi Cleofas ndaḅo:

—Ngoixin mundo nohe chojni tti coenxin Jerusalén ngain nchanho tehe. ¿Apoco jaha masqui joixin nttiha noaha quehe conhe?

¹⁹ Cottimeja Jesús ndaḅo:

—¿Quehe conhe?

Co jehe na ndaḅo na:

—De ixin tti conhe Jesús de Nazaret, que jehe cjoí ná profeta jian ngattoxon con Dios co ngattoxon con cainxin chojni. Co jehe joichonda anto tsje joachaxin de ngain tti vanchehe co de ngain tti jehe vanichja.

²⁰ Co de ixin queḅén cain xidána que ttetonhe icha xidána co cain xittetonha nganji na joinchecchienhe xa ngain chojni romano para goenxin na nganito cruz.

²¹ Janha na vaḅaxanho na que jehe tti rrochjé libertad chojni de ngain nación Israel. Co jai ochonda ní nchanho que jehe ndavenhe.

²² Masqui canxion nchí que cai vacao jehe conixin janha na, nchí mé joinchexaon na ncha ixin vinttecji ncha ndoyo ngain sepulturé jehe,

²³ co ixin vittjaha ncha cuerpoe Jesús, cjan ncha ngain tti nchia que vintte na co ndachjenji na ncha que ixin vintteguicon ncha yó ángel que ndaño ngain ncha que ixin Jesús nichon jai.

²⁴ Cottimeja canxion de nicompañerona na cjoí na ngain sepultura co vicon na nttiha jamé inchin ndaño nchí que vinttecji saho, pero Jesús viconha na.

²⁵ Cottimeja Jesús ndaño ngain cayoi xí mé:

—¡Atto ttinxinha ra jaha ra, co anto tetonchjanha ra para sitticaon ra cain tti dindaño profeta!

²⁶ ¿Apoco Cristo chondaha que rroconhe cain tti tangui jihi icha saho que vayé cain joachaxin que jiquininxin?

²⁷ Cottimeja jehe coexinhi ndache na quehe rrocho cain texto de ngain tti jitaxin Palabré Dios tti jinichja de ixin jehe Jesús; coexinxin de ngain libroe Moisés, co joinchehe sigue ngain libro que dicjin cain profeta.

²⁸ Are joiji na ngain tti rajna que tettji na, Jesús joinchehe que jehe rrojinchehe sigue nttié.

²⁹ Pero jehe na joinchetsenhe na ñao que sittohe ngain na, co ndaño na:

—Dittoha nttihi nganji na, ixin ondajitonaxin xehe.

Cottimeja Jesús joixinhi nchia mé para vittohe nttiha ngain na.

³⁰ Co are jehe otavehe ngain na ngain mesa coá niottja co joanjo gracias ngain Dios, cottimeja jehe conchinji nio co joanjo nio ngain na.

³¹ Ngain rato mé, Dios vinttjian tti tecayacoen jmacon na, co jehe na joatsoan na que jehe Jesús; pero jehe anto daca ndavitján de ngattoxon con na.

³² Co ndache chó na:

—¿Ajeha conohe ansean na anto chjoin are jehe nichja nganji na ngatja nttiha co jindattjo na de ixin tti jitaxin Palabré Dios?

³³ Cottimeja jehe na ixonhi chonhe na, sino que jaicoa coá na nttiha co sacjan na para Jerusalén. Nttiha vittjaxin na tti ttejngo chojni que vacao Jesús tate na cain na conixin icha nicompañeroe na.

³⁴ Co jehe na ndaño na ngain tti yó xí que joí:

—Ján, ndoa dixechon Jesús, ixin Pedro vicon.

³⁵ Cottimeja tti yó xí que nandá joí ndaño xa tti conhe ngatja nttiha, co quexén joatsoan xa Jesús are jehe conchinji niottja.

Are Jesús xago ngain chojni que vacao

(Mt. 28.16-20; Mr. 16.14-18; Jn. 20.19-23)

³⁶ Xa tetjao na de ixin jihi, are xago Jesús, joiguengattjen ngayé na co joanjo joajna ngain na co ndaño:

—Dayehe ra tti chjoin que tsonohe ansean ra.

³⁷ Jehe na anto vinttexaon na co xaxaon na ngain rato mé que jehe na tedicon na espirítue ná nindadiguenhe.

³⁸ Pero Jesús ndaño ngain na:

—¿Quedonda anto texaon ra? ¿Quedonda xa chondaha ra seguro ngain ansean ra de ixin janha?

³⁹ Tsjexin ra ngain rana co ngain rottena tti joinchenina na. Catte ni ra si rinao ra, co sicon ra que ján, janha. Ná espíritu chondaha nntao ni nttaloro inchin jaha ra tedicon ra que janha rrichonda jaxon.

⁴⁰ Are jehe ndaño jihi, jehe cjoago ngain na rá co rotté tti dijidoho clavo are ngainito cruz.

⁴¹ Pero ixin anto ché na co cai x̄aon na hasta jehe na x̄a choha vitticaon na ixin jehe mero nttiha, mexinxin Jesús ndaço ngain na:

—¿Achonda ra nttihi tti sine ni?

⁴² Cottimeja jehe na chjé na Jesús rioho copescado dichjan co rioho niottja de tsjén cormena.

⁴³ Co jehe tse mé co joine nttiha ngattoxon con na.

⁴⁴ Cottimeja ndaço ngain na:

—Tti janha conna, mé tti joindattjo ra are janha x̄a joarihi nganji ra, que chonda que joiconhe cain tti jitaxin de ixin janha ngain ley que vayé Moisés co ngain cain libro que dicjin cain profeta co ngain salmo.

⁴⁵ Cottimeja jehe joinchequinxin na tti jitaxin ngain Palabré Dios,

⁴⁶ co ndaço ngain na:

—Janhi jitaxin ngain Palabré Dios que Cristo chonda que ndasenhe, co nchanho ninxin jehe chonda que rroxéchon.

⁴⁷ Co de ixin nombré jehe icha chojni chonda que sinchenohe na chojni de cainxin nación ixin chonda na que tsentoxinhi na vidé na para que cain tti jianha que tenchehe na nchao sitjañehe na. Co tsexinxin tsonohe chojni jamé desde ngain Jerusalén.

⁴⁸ Jaha ra tti testigo ra de cain cosa jihi.

⁴⁹ Co tsjexin ra, janha rrorroanha nganji ra Espíritu Santo tti ndaço Ndodana sanjo Ndo nganji ra. Pero tadintte ra nttihi ngain ciudad de Jerusalén hasta que sayeja ra tti joachaxin mé que tsixin de noi.

Are Jesús sacojín para ngajni

(Mr. 16.19-20)

⁵⁰ Cottimeja Jesús savaçhjecaouxin na de ngagaha ciudad co sacjoi na hasta rajna Betania, co nttiha jehe tsín rá noi para joinchençaon na.

⁵¹ Co are jehe mero jinchençaon na, jehe sacjoixin de ngayé na, co sacojín para ngajni.

⁵² Jehe na, después de joinchecoanxinhi na Jesús, sacjan na para Jerusalén, co anto ché na.

⁵³ Co cainxin tiempo jehe na vintte na ngain nihngo icha importante para vanchecoanxinhi na Dios. Amén.

Tti Jian Joajné Jesucristo Que Dicjin Juan

Tti Palabra que Dios nichja conchjian ná xí

¹ Are cainxin coexinhi vehe, ovehe Xenhe Dios tti dinhi Palabra que Dios nichja, co jehe mé vehe ngain Dios, co jehe ján Dios.

² Are mé jehe ovehe ngain Dios.

³ Co de ixin jehe mé, Dios joinchechjian cainxin cosa; xonhi cosa que jí que jeha Dios joinchechjian de ixin jehe mé.

⁴ Co jehe mé tti danjo vida, co are chojni ditticaon ngain jehe mé, vida jihi inchin joadingasán para ixin cain chojni.

⁵ Co joadingasán jihi jinchengasán ngain tti jí naxin xehe, co tti naxin xehe ttixinha ncheganga jehe joadingasán mé.

⁶ Co Dios coinchiehe ná xí que vinhí Juan.

⁷ Co xí mé vehe xa ná testigo para nichja xa de ixin jehe joadingasán mé para que cain chojni rroguitticaon na de ixin jehe tti nichja xí mé.

⁸ Juan jeha jehe tti joadingasán, jehe jeha ná testigo que joí para nichja ndoa de ixin joadingasán mé.

⁹ Tti mero joadingasán que nchengasenhe cain chojni, ojittí ngataha nontte ngain tiempo mé.

¹⁰ Co jehe Xenhe Dios, tti dinhi Palabra que Dios nichja, vehe ngataha nontte, co masqui jehe joinchechjian nontte, chojni ngataha nontte joatsoanha na jehe.

¹¹ Jehe joí ngain nacioen pero chojni de nacioen vayeha na.

¹² Pero ixinha mé, icanxin chojni vayé na jehe co vitticaon na. Co ngain chojni jihi jehe joanjo joachaxin de dinhi na xenhe Dios.

¹³ Co jehe na jeha inchin xenhe ná ndodaha de ngataha nontte nntihi que doan inchin cain chojni, co jeha ixin ná xí joinao ná nchí, o ixin ná xí joinao concjihi xenhe; jehe na jeha jamé na, jehe na mero xenhe Dios ixin Dios ndačho jañá.

¹⁴ Co jehe Xenhe Dios, tti dinhi Palabra que Dios nichja, conchjian ná xí co vehe ngayá na, co jehe anto rinao cainxin chojni, co jehe chonxin cainxin tti ndoa. Co janha na vicon na tti joachaxin que jehe chonda ixin jehe tti nacoaxinxon Xenhe Ndodá na que ttjen ngajni.

¹⁵ Juan nichja jian de ixin jehe xí mé, co ndačho:

—Xí jihi tti janha vandachjan are ndachjan que jehe tti tsí después de janha, mé tti icha importante que janha ixin ovehe icha saho que janha.

¹⁶ Jehe chonda cainxin tti jian co cain ján na dayé na tti jian mé cada nchanho ixin jehe nttanchaon na.

¹⁷ Tti ley de Dios vayé na de ixin Moisés, pero tti rinao na cain chojni co tti ndoa, cayoi mé ttixin de ngain Jesucristo.

¹⁸ xonhi tiempo ná chojni vicon Dios. Pero tti nacoaxinxon Xenhe Dios que jí ngain jehe chonxin Xan jian ngain jehe, co Xan mé Xan jointtagatsoan na de ixin Dios.

Tti ndačho Juan que vancheguite chojni

(Mt. 3.11-12; Mr. 1.7-8; Lc. 3.15-17)

¹⁹ Chojni judío que vinttechonda joachaxin ngain Jerusalén rroanha na canxion dána co canxion xí que vinttechonda xa xa ngain nihngo icha

importante. Rroanha na chojni mé ngain Juan, tti vancheguitte chojni, para joanchianguihi na ixin quensen jehe.

²⁰ Co jehe ndačho claro:

—Janha jeha Cristo na tti Dios rroanha.

²¹ Cottimeja cjan na joanchianguihi na:

—¿Quensen jaha remé? ¿Ajaha tti profeté Dios dinhi Elías?

Co Juan ndačho:

—Nahi, jeha janha.

Cottimeja joanchianguihi na:

—¿Quexén remé? ¿Ajaha tti profeté Dios que Moisés ndačho que tsí?

Co Juan ndačho:

—Nahi.

²² Cottimeja ndache na:

—¿Quensen jaha remé? Ixin chonda na que rrondattjan na tti chojni que rroanha na nntihi tti rrondačho jaha. ¿Quehe rrondachjenji ni ra ixin quensen jaha remé?

²³ Juan ndačho:

—Profeta Isaías nichja de ixin janha are jehe ndačho que tsinhi ra tté ná chojni que toyaoxin de ngagaha jna que rrondačho: “Danttjehe ra ná nntiha nao para ixin jehe tti chonda cain joachaxin.”

²⁴ Co chojni mé xifariseo rroanha na para joanchianguihi na Juan cain mé.

²⁵ Co jehe na ndačho na ngain:

—Mexinxin, si jeha jaha tti Cristo que Dios rrorroanha, ni jeha Elías, ni jeha tti profeté Dios, ¿quedonda ncheguitte chojni?

²⁶ Juan ndačho:

—Janha nttaguitte chojni conixin jinda, pero de ngayá ján na xó judío na jí ná chojni que chonxinha ra.

²⁷ Chojni mé tsí después de janha masqui jehe icha importante que janha. Co janha jiquininxinha na ni siquiera tsonxindangá corrié catté.

²⁸ Cain jihi conhe ngain tti lugar que dinhi Betábara, que jí lado čhinxin nchanho de río Jordán, tti vancheguittexin Juan chojni.

Jesús cjoí inchin coleco para ixin Dios

²⁹ Ndoexin Juan vicon Jesús jitonchienhe ngain jehe, co Juan ndačho:

—Tsjenxin ra, xí jihi inchin tti coleco que xanjo para ngain Dios ixin jehe xa sanjo xa cuerpoe xa inchin ná coleco para tsjenga xa hna cain cosa jianha que nchehe chojni ngataha nontte.

³⁰ Janha nichja de ixin jehe xa are ndačhjan: “Después de janha, tsí iná xí co jehe xa icha importante xa que janha ixin ovehe xa icha saho que janha.”

³¹ Janha mismo venonaha quexehe xí mé, pero janha joihi para jointtaguitte chojni conixin jinda para que chojni judío satsoan na jehe xí jihi.

³² Cai ndačho Juan:

—Janha vicon Espíritu Santo xincanjinxin de ngajni inchin ná conttoana-ni, co vittohe ngataha jehe xí jihi.

³³ Hasta ngain nchanho mé, janha xa venonaha quensen jehe xa, pero Dios, tti coetonna para jointtaguitte chojni conixin jinda, jehe ndachjenji na: “Are sicon Espíritu Santo rroxincanji co sittohe ngataha ná xí, xí mé tti sincheguittexin chojni conixin Espíritu Santo.”

³⁴ Janha ovicon xí mé, co janha ná testigo na de ixin jehe xí mé que jehe xa ndoa tti Xenhe Dios.

Tti saho chojni que vacao Jesús

³⁵ Ndoexin nttiha vehe Juan iná conixin yó xí que vacao.

³⁶ Co are vicon Juan vatto Jesús, ndačo Juan:

—Tsjenxin ra, yá tti inchin coleco que xanjo para ngain Dios.

³⁷ Tti yó xí que vacao Juan coinhi xa tti ndačo, co sarroé xa Jesús.

³⁸ Cottimeja Jesús tsjehe tti joixin, co vicon ixin terroé cayoi xí mé, co ndačo ngain xa:

—¿Quehe tettjé ra?

Jehe xa vinttendačo xa:

—Maestro, ¿quettinó rrihi?

³⁹ Jesús ndačo:

—Xacoi ra sitsjehe ra.

Cottimeja vinttecji cayoi xí mé para vintteguin xa quettinó vehe Jesús co ngoixin rato mé nttiha tavintte xa ngain Jesús hasta ndajoexin nchanho mé ixin hora mé cjoí inchin nó hora tsocjin.

⁴⁰ Ná de jehe tti yó xí que vinttequinhi tti ndačo Juan co sarroé xa Jesús, ná de jehe xa vinhí xa Andrés, co mé cjoí xanchó Simón Pedro.

⁴¹ Andrés ixonhi chonhe, jehe sacjoí joicjé Simón, xanchó jehe Andrés, co ndačo ngain Simón:

—Vittja na tti Mesías.

Co Mesías rročo Cristo tti Dios rroanha.

⁴² Cottimeja Andrés joicao Simón tti jí Jesús, co are Jesús vicon Simón, ndačo ngain:

—Jaha dínhi Simón, xitsihi Jonás, pero jai jaha sinhi Cefas.

Co Cefas rročo xajeho Pedro ixin nguigoa griego; co cayoi nombre yá rročo xo.

Jesús vayé Felipe co Natanael

⁴³ Ndoexin Jesús xaxaon para que jehe cjoí ngain nonttehe Galilea, pero icha saho jehe vetan Felipe, co ndačo Jesús ngain:

—Xacoi chjin na.

⁴⁴ Co Felipe mé joixin de ngain rajna Betsaida, xajeho rajné Andrés co Pedro.

⁴⁵ Cottimeja cjoí Felipe joicjé Natanael, co ndačo ngain:

—Janha na vicon na tti xí que dicjin Moisés de ixin xí mé ngain libroe ley, co dicjin cainxin profeta de ixin xí mé cai. Jehe Jesús, xitsihi José, rajné Nazaret.

⁴⁶ Ndačo Natanael:

—¿Apoco nchao sachjexin ná xí jian de ngain Nazaret?

Felipe ndačo:

—Xacoi sitsjehe.

⁴⁷ Are Jesús vicon que Natanael jitonchienne, Jesús ndačo:

—Ntithi joí ná xí mero chojni Israel co xí jhi xonhi chojni ncheyehe xa.

⁴⁸ Cottimeja Natanael joanchiangui co ndačo:

—¿Quexén chonxinxin na?

Co Jesús ndačo:

—Janha vicon jaha are jaha tarrihi ngangui nttahigo icha saho que Felipe rogayaha.

⁴⁹ Cottimeja Natanael ndačo:

—Maestro, jaha tti Xenhe Dios; jaha tti Rey de Israel.

⁵⁰ Jesús ndačo:

—¿Avitticaon na jecho ixin ndattjo vicon jaha tarringahngui nttahigo? Jaha sicon cosa icha jian que jiji.

⁵¹ Cai nda'cho Jesús:

—Rrindattjo ra ndoa que jaha ra sicon ra ngajni jixangué co ángel de Dios tsajinhi co rroxincanji ngataha na janha, tti Xí que joixin de ngajni.

2

Are cottehe yó chojni ngain Caná de Galilea

¹ Ní nchanho después vehe ná quiai para yó chojni que cottehe ngain rajna Caná ngain regioen Galilea. Janné Jesús nttiha vehe jan,

² co ndache na Jesús ixin jehe cjoí ngain quiai mé, jehe conixin chojni que vacao.

³ Co are jehe na te nttiha, ndajoexin vino, mexinxin janné Jesús nda'cho jan ngain:

—Ichondaha na vino.

⁴ Pero Jesús nda'cho:

—Soixin, ¿quedonda ndachjenji na janha yá? Tiempo xa ttiha para janha tsjenguijna chojni.

⁵ Pero jehe janné Jesús nda'cho jan ngain chojni que tedanjo jehe vino mé:

—Nchehe ra cain tti jehe rrondattjo ra.

⁶ Nttiha vintte incjaon nchíxa de xo, tti vanchegonda chojni judío para vaconttixin na jinda rá na tsje nttiha inchin costumbré jehe na. Co cada nchíxa mé vaguiquia inchin ochenta o cien litro de jinda.

⁷ Jesús nda'cho ngain chojni que tettequia vino:

—Nchehe ra cain nchíxa tehe de jinda.

Co jehe na hasta joincheçhetaonca na cain nchíxa mé,

⁸ cottimeja Jesús nda'cho ngain na:

—Janché, dantsje ra nchin nda co ttiohe ra niencargado.

Co jamé joinchehe na.

⁹ Co jinda mé ondadicjan nda vino co jehe noeha ttinó joixin vino mé, jecho cain chojni que cointtjecjan vino mé vinttenohe na ixin jehe na joantsje na jecho jinda. Co tti encargado vayé xinovio

¹⁰ co nda'cho ngain xa:

—Cainxin chojni saho danjo na tti vino icha jian, co are cain chojni que dihi, atto ovihi na, cottimeja dihi na tti vino corriente. ¡Pero jaha diquenchjinha tti vino icha jian hasta jaxon!

¹¹ Jiji tti joinchehe Jesús ngain Caná de Galilea co jiji tti saho milagro que jehe joinchehe co milagro mé çagoxin ixin jehe Jesús chonda anto tsje joachaxin. Co cain chojni que vacao Jesús vitticaon na ngain jehe.

¹² Después de jiji, jehe Jesús co janné, co xanchó conixin cain chojni que vacao jehe Jesús sacjoi na para ngain rajna Capernaum, co nttiha vintte na canxion nchanho.

Jesús joincheroa nihngo icha importante

(Mt. 21.12-13; Mr. 11.15-18; Lc. 19.45-46)

¹³ Ixin ojoiconchian tti quiai dinhi pascua para ixin cain chojni judío, Jesús sacjoi para ngain ciudad de Jerusalén.

¹⁴ Nttiha ngain patioe nihngo icha importante vittja Jesús chojni que tenchecji coxintá, coleco, co conttoa, co chojni que tate ngain puestoe tti dasinguinxin na tomi para chojni vachonda na suelto.

¹⁵ Are Jesús vicon jihi, joinchechjian ná cuarta de jino, co joantsjexin cain chojni mé de nttiha, jehe na conixin colecoe na, co coxinttehe na. Co tti chojni que tedasinguixin tomi, joanqué tomi na ngataha nontte co cjoa mesa ndaha.

¹⁶ Co Jesús nichja ngain cain chojni que tenhecji conttoa co ndaço:
—¡Dantsjexin ra cain jihi de nttihi! ¡Nchechjianha ra ngain nchiandoha Ndodana ná ndásin!

¹⁷ Cottimeja tti chojni que vacao Jesús xaxaon na ixin ndaço ngain tti jitaxin Palabré Dios: “Janha anto toñaonxin nchiandoi.”

¹⁸ Cottimeja chojni judío que vinttechonda joachaxin joanchiangui na ngain Jesús co ndaço na:

—¿Quehe señal tsjagohna ni ra para que janha na rrochonxin na seguro que jaha chonda joachaxín Dios para nchehe jihi?

¹⁹ Jesús ndaço:

—Tonxantte ra nihngo icha importante jihi, co nincoa nchanho janha sinttachjian nihngo iná.

²⁰ Cottimeja chojni mé ndaço na:

—Cuarenta y seis nano conçhenhe chojni para joinchechjianxin na nihngo icha importante jihi. ¿Co apoco jaha nchao sinchechjian nihngo nincoa nchanho?

²¹ Pero tti nihngo que Jesús nichja, nichja de ixin mero cuerpoe jehe.

²² Mexinxin are Jesús xechon de tti jehe ndavenhe, cain chojni que vacao jehe xaxaon na de ixin jihi tti jehe ndaço, co vitticaon na tti ndaço ngain tti jitaxin Palabré Dios, co cai vitticaon na tti ndaço Jesús ngain na.

Jesús chonxin quehe xaxaon cain chojni

²³ Are Jesús vehe ngain Jerusalén ngain quiai que dinhi pascua, atto tsje chojni vitticaon na jehe are vicon na tsje milagro que jehe joinchehe.

²⁴ Pero Jesús vechondaha confianza ngain na ixin jehe ovechonxin ngain ansén cain na.

²⁵ Jehe gondeha ni ná chojni que rrondache de ixin icha chojni ixin jehe mismo venohe quehe xaxaon cain chojni.

3

Are Jesús nichja ngain Nicodemo

¹ Vehe ná xifariseo vinhi Nicodemo, mé cjoí ná xí importante ngayé chojni judío.

² Nicodemo jihi ná ttie cjoí para joitsjehe Jesús co ndaço:

—Maestro, nona na que Dios rroanha jaha para sinchecoaanna ni ra, ixin xonhi chojni nchao sinchehe tsje cosa inchin jaha rrinchehe si Dios coha ngain chojni mé.

³ Cottimeja ndaço Jesús:

—Janha rrindattjo ndoa, que xonhi chojni nchao rrochonda parte ngain tti ttetonha Dios si jehe tsoncjiha iná.

⁴ Nicodemo ndaço:

—Pero ¿quexén ná xí ojje rrocjan tsoncjihi iná? ¿Apoco nchao rrocjan xa ngaxinhi tsehe janné xa para rrocjan xa tsoncjihi xa iná?

⁵ Co Jesús ndaço:

—Janha rrindattjo ndoa, que tti chojni que tsoncixinha de ixin jinda co de ixin Espíritu Santo çhoaha sehe ngain parte tti ttetonha Dios.

⁶ Tti toncjixin de ngain chojni, jehe jichjon jeho de ngain cuerpoe, co tti otoncjihi de ixin Espíritu Santo, jehe ojichjon de ngain espirítue.

⁷ Xaonha que rrindattjo: “Cainxin chojni chonda na que tsoncjihí na iná.”

⁸ Çhintto danotte ttinó jehe rinao, co jaha ttinhi ruido que nchechjian çhintto, pero noaha de ttinó ttixin çhintto co ni ttinó sattji çhintto. Jañá cai chojni çhoja ttinxin na quexén chojni toncjihí de ixin Espíritu Santo.

⁹ Cottimeja, Nicodemo cjan joanchiangui iná:

—¿Quexén nchao tsonhe jihí?

¹⁰ Jesús ndaçho:

—Jaha, que ná jian maestroe ley de Dios para chojni Israel, ¿aça noaha cain cosa jihí?

¹¹ Janha rrindattjo ndoa, que janha na nichja na de lo que tti nona na co janha na nichja na de lo que tti vicon na, pero jaha ra ditticaonha ra tti ndattjo ra janha na.

¹² Si ditticaonnaha ni ra are rrinichjaha ra de ixin cosa ngataha nontte jihí, ¿quexén sitticaon ra si rronichjaha ra de ixin cosa que jí ngajni?

¹³ Xonhi chojni coajinhí para ngajni, sino janha, tti Xí que joixin de ngajni, co janha rrihi nttiha.

¹⁴ Co jañá inchin Moisés joinchechjian ná conché de chia co coenganito conché mé nttá ngagaha jna, cai janha, tti Xí que joixin de ngajni, chonda que saringanito ná nttá

¹⁵ para que cainxin chojni que ditticaon nganji na janha, chojni mé tsjiha na ngain infierno, sino que rrochonda na iná vida naroaxin que xonhi tiempo tsjexin.

Quexén Dios rinao cainxin chojni

¹⁶ Dios anto rinao cainxin chojni ngataha nontte, mexinxin joanjo tti nacoaxinxon Xenhe para que cainxin chojni que ditticaon ngain jehe Xan tsjiha na ngain infierno, sino que rrochonda na iná vida naroaxin que xonhi tiempo tsjexin.

¹⁷ Dios jeha rroanha Xenhe ngataha nontte para sinchecastigá Xan chojni; Dios rroanha Xenhe para tsjenguijna Xan cain chojni para rrochondaha na castigo de cainxin cosa jianha que nchehe na.

¹⁸ Tti chojni que ditticaon ngain Xenhe Dios, chojni mé rrochondaha na castigo, pero tti chojni que ditticaonha, mé Dios ondaçho ixin sinchecastigá na ixin ditticaonha na tti nacoaxinxon Xenhe Dios.

¹⁹ Dios sinchecastigá tti chojni que ditticaonha Jesucristo ixin are Jesucristo joí ngataha nontte, jehe joí inchin joadingasán, co jehe na icha joincheçoxinhí na tti naxin xehe ixin vanchehe na cosa jianha.

²⁰ Cain chojni que nchehe jianha ningaconhe na joadingasán co tonchienha na ngain tti jí joadingasán para que tsononxinha tti jianha que tenchehe na.

²¹ Pero chojni que tenchehe jian, chojni mé tonchienhe na ngain tti jí joadingasán para que sicon icha chojni que jehe na tenchehe na inchin rinao Dios.

Juan, tti vancheguitte chojni, cjan nichja de ixin Jesús

²² Después de cain jihí, Jesús cjoí conixin tti chojni que vacao para ngain nonttehe Judea, co vintte na canxion tiempo nttiha. Co joincheguitte na chojni nttiha.

²³ Cai tiempo mé, Juan joincheguitte chojni ngain ná rajna que dinhi Enón, chian ngain rajna Salim ixin nttiha vehe atto yé jinda co chojni vaquí na co vajiguitte na.

²⁴ Jihi conhe icha saho que are Juan coiaxinhi na ngain cárcel.

²⁵ Cottimeja canxin chojni que vacao Juan joinchediscutí na ngain canxion chojni judío de ixin queXén icha jian ncheguitte na chojni para toroaxin na de tti jianha que nchehe na.

²⁶ Mexinxin cjoí na co joindache na Juan:

—Maestro, ¿axaxaon tti vehe nganji are jaha joarihi lado čhinxin nchanho de río Jordán, tti jaha ndachjenji ni ra? Jai jehe mé jincheguitte chojni co cainxin na teditticaon na jehe.

²⁷ Cottimeja Juan ndačho:

—Ni ná chojni čhoha rrochonda joachaxin si Dios rrochjeha.

²⁸ Jaha ra mismo coinna ra are ndachjan claro que janha jeha tti Cristo que Dios rroanha, pero janha tti chojni que joihi icha saho de jehe.

²⁹ Are chojni tottehe na, tti chonda xannovia, mé tti novio, co tti amigoe xinovio jí nttiha co atto ché are ttihi nichja xinovio. Jañá janha jai cai anto chahna are chojni cjoí na ngain Jesús.

³⁰ Jehe chonda que icha co icha importante sehe, co janha chonda que sarihi icha co icha menos importante.

Juan nichja de ixin tti ttixin de ngajni

³¹ Juan ndačho cai:

—Tti ttixin de ngajni chonda icha tsje joachaxin de cainxin. Co tti ttixin de ngataha nontte jehe de ngataha nontte, co nichja de ixin cosa de ngataha nontte. Pero tti ttixin de ngajni, jehe chonda joachaxin ngain cainxin cosa,

³² co nichja de ixin tti jehe vicon co tti jehe coinhi, pero xonhi chojni ditticaon tti jehe ndačho.

³³ Pero si čhoan ni ditticaon, jañá xago ixin jehe ditticaon que Dios ndačho tti ndoa.

³⁴ Jehe tti Dios rroanha nichja palabré Dios, ixin Dios danjo Espíritu Santo ngain jehe hasta tti ičhoha.

³⁵ Ndo dé rinao Ndo jehe, co chjé Ndo cainxin joachaxin.

³⁶ Chojni que ditticaon Xenhe Ndo chonda na iná vida naroaxin que xonhi tiempo tsjexin. Pero tti rinaoha ditticaon Xenhe Ndo, rrochondaha vida mé, co sayé tti anto soji castigo de Dios.

4

Tti ndačho Jesús ngain ná nčhí de Samaria

¹ Cottimeja xifariseo coinhi na que Jesús vechonda icha tsje chojni que vaguitticaon co icha tsje chojni vancheguitte que Juan.

² Pero jeha Jesús tti vancheguitte chojni; jeho tti chojni que vacao Jesús tti vancheguitte na.

³ Co are Jesús conohe jihi, jehe vačhjexin de Judea para sacjan ngain Galilea.

⁴ Co ngain viajé chonda que vatto ngain regioen Samaria.

⁵ Co nttiha joihi ngain ná rajna que vinhi Sicar, chian ngain nontte que Jacob joanjo ngain xenhe, xan vinhi José, anto tsje nano icha saho.

⁶ Co nttiha vehe tti pozo que vancheguini na pozo de Jacob. Jesús ocončhen jói, mexinxin tavetanda ngandehe pozo nttiha. Co hora mé inchin ngosine nchanho.

7-8 Co cain chojni que vacao Jesús savinttecji na ngain rajna para joiquehna na cosa que sine na. Co hora mé ná nchí de Samaria jói ncha ngain pozo mé para joica ncha jinda, co Jesús ndacho ngain ncha:

—Chjana nchin jinda sihi.

9 Cottimeja jehe tti nchí samaritana mé ndacho ncha ngain Jesús:

—Jaha ná chojni judío, ¿quedonda danchiana jinda janha, que janha samaritana na?

(Jehe ncha ndacho ncha jamé ixin chojni judío čhoha na nichjé na chojni samaritano.)

10 Cottimeja Jesús ndacho:

—Si rroconoha jaha tti danjo Dios co quensen tti jidanchiaha jinda, seguro que jaha rroganchiana jinda janha, co janha rrochjaha jaha jinda que danjo vida.

11 Tti nchí mé ndacho:

—Soixin, ni chondaha tti santsjexin jinda co pozo atto nihnga. ¿De ttinó rrochjananxin jinda que danjo vida?

12 Ndogoelitona na žančhjen que vinhi Jacob cointtoena na pozo jihi, tti jehe ndo mismo vaguihi ndo jinda nttihi, co nttihi vaguihi cain xenhe ndo jinda co cain coxigoe ndo. ¿Apoco jaha icha que jehe ndo?

13 Jesús ndacho:

—Cain chojni que dihi jinda jihi rrocjan rrondačo sihi na jinda iná;

14 pero tti chojni que sihi tti jinda que janha danjo, ixonhi tiempo rrocjan rrondačo sihi na jinda mé iná, ixin tti jinda que janha danjo rročhinhi jinda mé inchin ná manantial ngaxinhi cuerpoe chojni que sihi nda para sanjo nda iná vida naroaxin que žonhi tiempo tsjexin ngain chojni que dihi jinda mé.

15 Cottimeja ndačo jehe tti nchí mé:

—Soixin, chjana jinda yá janha, para que janha irrocjanha rrondačo sihi jinda iná, ni irrochondaha que sihi nttihi ngain pozo jihi para sigantsje jinda.

16 Jesús ndačo:

—Ttji digayehe xixiha, cottimeja sihi nttihi iná.

17 Jehe tti nchí ndačo:

—Janha chondaha xixihna.

Cottimeja ndačo Jesús:

—Jaha chonda razón ixin ndačo que chondaha xixiha

18 ixin jaha ojoaricoho naho xí, co tti naho xí mé cjoí mero xixiha, pero tti xí que chonda jai jaha xixiha. Mexinxin jaha ndačo tti ndoa de ixin jihi.

19 Tti nchí mé are coinhi jihi ndačo:

—Soixin, janha ttianxin que soixin ná profeté Dios.

20 Nigoelitona na žančhjen samaritano joinchesayehe na Dios ngataha jna jiha, pero jaha ra žo chojni judío ndačo ra que ngain Jerusalén, nttiha tti jiquininxin sinttasayaxin na Dios.

21 Jesús ndačo:

—Ditticaon tti rrindattjo, que tsí nchanho que jaha ra sinchesayehe ra Ndođá na pero irrochondaha ra que tsji ra ngain jna yá ni ngain Jerusalén.

22 Jaha ra žo samaritano ra noaha ra de ixin quensen nchesayehe ra, pero janha na nona na de ixin quensen nttasayá na ixin tti chojni que tsjenguijna icha chojni para rrochondaha na castigo de cain cosa jianha que nchehe na, jehe chojni mé joixin de ngain chojni judío.

23 Pero tsí nchanho para que tti chojni que ndoa nchesayehe na Ndođá na pero sinchehe na conixin ansén na jian co inchin jehe Ndo rinao Ndo, co jai

ojói nchanho mé. Ixin Nnodá na rinao Ndo que jañá sinchehe tti chojni que nchesayehe Ndo.

²⁴ Dios jehe espíritu, co tti chojni que nchesayehe Ndo chonda na que sinchehe na conixin ansén na jian co inchin jehe Ndo rinao Ndo.

²⁵ Tti nčí mé ndačo:

—Janha nona que tsí tti Cristo que Dios rroanha, co are jehe tsí, jehe rrondachjenji na cainxin.

²⁶ Jesús ndačo:

—Janha tti Cristo na, tti jinichja nganji jaha.

²⁷ Co rato mé vinttequí tti chojni que vacao Jesús, co jehe na vinttegoan na admirado ixin Jesús tajitjao ná nčí. Pero ni ná na joinaoha na joanchianguihi na Jesús ixin quehe rinao nčí mé o de quehe jitjao Jesús ncha.

²⁸ Cottimeja tti nčí mé nttiha cointtohe nchihehe co sacjoi para ngagaha rajna para joindache chojni:

²⁹ —Āacoi ra sitsjehe ra ná xí que ndachjenji na janha cainxin tti janha jointtaha. ¿Ajehe jehe xí jiji tti Cristo que Dios rroanha?

³⁰ Cottimeja tsje chojni vinttegachjexin na de rajna mé para vinttecji na tti jí Jesús.

³¹ Co are nčí mé jindache ncha chojni ngain rajné ncha, chojni que vacao Jesús joinchetsenhe na ñao jehe Jesús co ndačo na:

—Maestro, jintte.

³² Pero Jesús ndačo:

—Janha chonda tti jine que jaha ra chonxinha ra.

³³ Co tti chojni que vacao Jesús coexinhi na joanchianguihi chó na jeha na co ndačo na:

—¿Ani choan chojni joiaöhe tti joine?

³⁴ Pero Jesús ndačo:

—Are janha nttaha inchin rinao jehe tti rroanha na, co tsjena xé jehe, jiji inchin tti jine janha.

³⁵ Jaha ra ndačo ra: “Āa ditján nó conittjao para cosecha”, pero janha ndattjo ra: tsjehe ra; tsje chojni ttí nganji na. Co cain nimé inchin trigo que odicha co onchao jí para tsjejo ni.

³⁶ Tti nchehe Āa que ttjejo chojni mé, jehe inchin ninchehe xana ngain cosechana que datse chojni para rrochonda na iná vida naroaxin que xonhi tiempo tsjexin. Mexinxin tti tenga co tti tsín cosecha ché na nataonxin.

³⁷ Ixin ndoa tti ndačo dicho: “Jé tti tenga co jé tti tsín cosecha.”

³⁸ Janha rroanha jaha ra para joitsinhi ra cosecha tti xonhi Āa joinchehe ra jaha ra. Jañá jé ni joinchehe Āa, co jaha ra tsjejo ra cosecha.

³⁹ Tsje chojni ngain jehe rajna mé de ngain Samaria vitticaon na Jesús, jeha ixin tti ndačo tti nčí jiha are ndačo ncha: “Jehe ndachjenji na cainxin tti jointtaha janha.”

⁴⁰ Mexinxin are jói tsje chojni samaritano, jehe na joinchetsenhe na ñao Jesús ixin tarroquehe ngain na. Co Jesús vittohe ngain na nttiha yó nchanho,

⁴¹ co icha tsje na vitticaon na are coinhi na tti ndačo Jesús.

⁴² Cottimeja jehe na ndache na jehe tti nčí mé:

—Jai ditticanho na, co jeoha ixin tti jaha ndachjenji ni ra, cai ixin janha na mismo coian na tti nichja jehe, co nona na que ndoa jehe tti Cristo que Dios rroanha para que tsjenguijna cain chojni ngoixin mundo para rrochondaha na castigo de cain cosa jianha que nchehe na.

Jesús joinchexingamehe ná xenhe ná xiempleadoe gobierno

⁴³ Yó nchanho vatto, cottimeja Jesús vačhjexin de jehe rajna ngain regioen Samaria co joinchehe sigue viajé para ngain nonttehe Galilea.

⁴⁴ Co ndačo Jesús: “Chojni nchesayeha na ná profeté Dios que joxin de ngain řajeho rajné na.”

⁴⁵ Are joiĵi Jesús ngain Galilea, chojni nttiha vayé na Jesús jian ixin cai dintteĵi na tti quiai dinhi pascua ngain Jerusalén co nttiha vintteguicon na cain tti joinchehe Jesús ngain quiai mé.

⁴⁶ Cottimeja Jesús cjan para ngain rajna Caná ngain Galilea, tti cjoncjaman-gaxin Jesús jinda vino. Co nttiha vehe ná xí vechonda jie joachaxin ngain gobiernoey rey. Co xí mé vechonda xa ná xenhe xa que venihi ngain rajna Capernaum.

⁴⁷ Co are xí mé conohe xa que Jesús ojoxin de Judea co joĵi ngain Galilea, xí mé cĵoi xa, joĵsjehe xa, co joinchetsenhe xa ñao Jesús ixin tsĵi ngain nchiandoha xa para sinchexingamehe xenhe xa de chin que chonda xa ixin ovehe de ndarroguenhe xan.

⁴⁸ Cottimeja Jesús ndačo ngain xí mé:

—Jaha ra ditticaonha ra si diconha ra canxion seńal co milagro.

⁴⁹ Pero tti xí mé ndačo:

—Soixin, daca řacoi, ante que ndasenhe xanhna.

⁵⁰ Cottimeja ndačo Jesús:

—Sacjan ngain nchiandoi; xanha oxingamehe xan.

Tti xí mé vitticaon tti ndačo Jesús, co sacĵoi xa.

⁵¹ Co are ochian jidiĵi xa nchiandoha xa, vačhje ninchehe řé xa para joichoexin na xa ngatĵa nttiha, co ndačo na ngain xa:

—Xanha oxingamehe xan.

⁵² Cottimeja jehe xa joanchiangui xa ngain na ixin quehe hora coexinhi xingamehe xenhe xa de ixin tti chin que veyá xan, co jehe na ndačo na:

—Jna, ná hora después de ngosine nchanho ndavačhjehe xan soa.

⁵³ Cottimeja jehe xa řaxaon xa que hora mé ndačo Jesús ngain xa: “Xanha oxingamehe xan”; co jehe xa conixin cain nindoha xa vitticaon na Jesús.

⁵⁴ Jihi tti yoxin milagro que joinchehe Jesús are jehe cjanxin de ngain Judea para joĵi ngain Galilea.

5

Jesús joinchexingamehe ná xí que čhoha vacĵi ngain rajna Betesda

¹ Después de jihi, chojni judío joinchechĵian na ná quiai; co Jesús cjan ngain ciudad de Jerusalén.

² Ngain ciudad mé, chian ngain tti puerta que dinhi “Puerté Coleco” nttiha jí ná ttoe que jiria jinda que ngain nguigoa hebreo dinhi ttoe mé Betesda. Co ngain ttoe mé jí naho portal.

³ Nttiha tetsinga tsje chojni nihi ngataha nontte. Nttiha te chojni tti čhoha dicon, co tti čhoha ttĵi, co tti čhoha ttingui; co cain chojni mé techonhe na nttiha hasta que jinda mé tsinguittjen nda.

⁴ Ixin te rato que nttiha vaxincanĵi ná ángel ngain ttoe mé co vanchengui-tĵen jinda, co tti nihi que saho vajingui jinda mé, jehe ndavaxingamehe de quexeho chin que jehe vechonda.

⁵ Co nttiha vehe ná xí que ovechonda treinta y ocho nano de venihi xa.

⁶ Are Jesús vicon que xí mé tajtsinga xa nttiha, jehe ovenohe ixin anto sé venihi xa. Mexinxin ndačo ngain xa:

—¿Arinao rroxingamaha?

⁷ Co jehe tti nihi mé ndačo:

—Soixin, janha chondaha quensen rrožangui na jinda are tsinguittjen nda. Cada nttiha que janha rinaho sihngui nda, oje ni dingui nda icha saho.

⁸ Jesús ndačo:

—Dingattjen, co tsinhi caniaha co sattjixin de nttihi.

⁹ Co rato mé jehe xí mé ndaxingamehe xa co tsín xa caniehe xa co coexinhi xa sacjoixin rotté xa. Pero ixin nchanho mé, mero nchanho para vanchejogaha na,

¹⁰ chojni judío que vinttechonda joachaxin ndačo na ngain jehe tti xí que xingamehe:

—Jai nchanho que ncheha ni ža, mexinxin jianha para que jaha tsame caniaha.

¹¹ Tti xí mé ndačo:

—Tti joinchexingamana ndachjenji na: “Tsinhi caniaha co sattji.”

¹² Cottimeja joanchiangui jehe na co ndačo na:

—¿Quexehe tti ndattjo: “Tsinhi caniaha co sattji”?

¹³ Pero tti xí mé venoeha quensen joinchexingamehe ixin Jesús sacjoi ngayehe tti anto tsje chojni que te nttiha.

¹⁴ Después Jesús vetanxin tti xí mé ngain nihngo icha importante, co ndačo Jesús ngain xa:

—Tsjenxin, jai jaha oxingamaha, mexinxin cjanha nchehe cosa jianha para que rrocjanha tsonha icha tangui.

¹⁵ Cottimeja tti xí mé sacjoi co joindačo ngain chojni judío que vinttechonda joachaxin ixin Jesús tti joinchexingamehe jehe.

¹⁶ Mexinxin chojni mé joiningaconhe na Jesús co joinao na narrogoenxon na are maho ixin vanchehe Jesús jańá ngain nchanho que jiquininxinha nchehe ni ža.

¹⁷ Pero Jesús ndačo ngain na:

—Ndodana cainxin tiempo jinchehe Ndo ža, co janha cai rrinttaha žajeho ža mé.

¹⁸ Mexinxin chojni mé icha joinao na narrogoenxon na Jesús, jeoha ixin vancheha Jesús caso ley tti nchanho que jiquininxinha nchehe ni ža, cai joinao na narrogoenxon na Jesús ixin jehe vandačo ixin jehe inchin Dios are jehe ndačo ixin Dios tti Ndođe jehe.

Tti joachaxin que chonda Xenhe Dios

¹⁹ Cottimeja Jesús ndačo ngain na:

—Ndoa tti rrindattjo ra que janha, tti Xenhe Dios, čhoha sinttaha ni ná cosa inchin janho sinaho, jeho nttaha tti dicon nchehe Ndodana. Cainxin tti nchehe Ndodana, cai janha, tti Xenhe Ndo, sinttaha.

²⁰ Ndodana rinao na Ndo co tjagohna Ndo cain tti jehe Ndo nchehe Ndo; co tsjago Ndo nganji na cosa que chonda icha joachaxin que hasta jaha ra soan ra admirado.

²¹ Co jańá inchin Ndodana nchexingamehe Ndo chojni que ondavenhe co chjé Ndo vida, cai janha, tti Xenhe Ndo, danjo vida ngain chojni que rinaho sayé vida mé.

²² Co Ndodana žonhi chojni nchejuzguehe Ndo, ixin chjana Ndo janha, tti Xenhe Ndo, cainxin joachaxin para que janha sinttajuzgá cain chojni,

²³ para que cainxin chojni sinchesayana na janha, tti Xenhe Ndo, inchin nchesayehe na jehe Ndo. Tti chojni que nchesayanaha janha, tti Xenhe Ndo, cai nchesayehe na jehe Ndodana que rroanha na janha.

24 Janha rrindattjo ra ndoa: Tti chojni que nchehe caso tti janha rrindačhjan, co ditticaon chojni mé ngain jehe tti rroanha na janha, chojni mé chonda na iná vida naroaxin que xonhi tiempo tsjexin, co jehe na rrochondaha na castigo ixin ovattohe na tti ndadenhe ni co te na ngain tti techon ni.

25 Janha rrindattjo ra ndoa que tsí nchanho are chojni que inchin ondavenhe tsinhi na ttana janha, tti Xenhe Dios, co chojni que sitticaon tti ndačhjan rrochonda na iná vida naroaxin, co jehe nchanho mé ojoí nchaon jai.

26 Nnodana chonda Ndo joachaxin para danjo Ndo iná vida naroaxin jehe Ndo mismo, co cai chjana Ndo joachaxin mé janha, tti Xenhe Ndo, para que janha cai sanjo vida mé.

27 Co chjana Ndo joachaxin para que janha sinttajuzgá chojni ixin janha tti Xí que joixin de ngajni.

28 Jaha ra doanha ra admirado de ixin jiji ixin tsí nchanho que cain chojni que ondavenhe tsinhi na ttana,

29 co sačhjenguxin na de tti teřavá na. Co tti nijoinchehe jian rroxechon na para rrochonda na iná vida naroaxin, pero tti nijoinchehe jianha rroxechon na para rrochonda na castigo.

Queřén chojni nchao rrochonxin ixin Jesús tti Xenhe Dios

30 Janha čhoha sinttaha ni ná cosa inchin janho rinaho. Janha nttaha juzgado inchin ttetonna Nnodana co cain tti nttaha, mé jian ixin řaxaonha sinttaha inchin janha rinaho, sino que janha nttaha joxon inchin rinao Nnodana que rroanha na.

31 Si janho rrondačhjan ixin janha anto jian na, palabra mé xonhi řé si coha icha chojni tti rrondačo jian de ixin janha.

32 Pero Nnodana cai nohe Ndo jian tti janha nttaha, co janha nona que tti ndačo Ndo de ixin janha, ján rentte.

33 Co jaha ra rroanha ra chojni para joanchianguihi na Juan co ndoa tti jehe ndattjo ra de ixin janha.

34 Pero janha gondanaha para que chojni rronichja jian de ixin janha; janha jeho ndačhjan jiji para que jaha ra nchao sitticaon ra tti ndačhjan para rrochonda ra iná vida naroaxin.

35 Juan, jehe vehe inchin ná lámpara que vanchengasán. Co jaha ra joinao ra co chaha ra de ixin jehe joadingasán mé, pero seha.

36 Juan vanichja jian de ixin janha, pero jai cain tti rinao Nnodana, mé tti janha rrinttaha ngayaha ra co mé tti tjagoha ra icha jian ixin ndoa que Nnodana tti rroanha na.

37 Cai Nnodana que rroanha na janha, jehe Ndo ndačo Ndo que cain tti ndačhjan ndoa. Pero jaha ra xonhi tiempo coinhi ra tté Ndo ni diconha ra Ndo.

38 Co joajné Ndo joixinha ngain ansean ra ixin ditticaonha ra nganji na, tti jehe Ndo mismo rroanha Ndo.

39 Jaha ra tetangui ra tti libro que jítaxin Palabré Ndo conixin anto tsje ciudadano, ixin rinao ra sinchí ra nttiha queřén rrochonda ra iná vida naroaxin que xonhi tiempo tsjexin, co jehe libro mé tti nichja de ixin janha.

40 Pero jaha ra rinaoha ra ditticaon ra nganji na para que sayehe ra vida mé.

41 Janha rinaoha que chojni sinchesayana.

42 Janha chonxin jaha ra co nona que jaha ra rinaoha ra Dios.

⁴³ Janha joihi ixin Ndodana rroanha na co jaha ra rinaoha ni ra, pero si jecoa iná chojni rroquí para rrojindattjo ra tti jeha xaxaon, chojni mé, nchoe, rrojinao ra.

⁴⁴ Jaha ra çhoha ditticaon ra nganji na ixin jaha ra joho rinao ra icha chojni sinttasayaha ra co rinaoha ra sinttasayaha ra tti nacoaxinxon Dios.

⁴⁵ Jaha ra xaxaonha ra ixin janha tsjanguiha ra ngattoxon con Ndodana. Janha nahi, ixin ley que vayé Moisés, mé tti tsjanguiha ra masqui jaha ra xaxaon ra ixin ley mé sinttaroa ra ngattoxon con Dios.

⁴⁶ Ixin si jaha ra rroguitticaon ra tti ndaço Moisés, cai rroguitticaon ni ra janha ixin Moisés dicjin de ixin janha.

⁴⁷ Pero jaha ra ditticaonha ra tti jeha dicjin, mexinxin ¿queçén sitticaon ra tti janha rrindattjo ra?

6

*Are Jesús joanjo tti joine naho mil xí
(Mt. 14.13-21; Mr. 6.30-44; Lc. 9.10-17)*

¹ Después de cain jiji, Jesús sacjoi para toenxin lago de Galilea, que xajeho lago mé tti dinhi Tiberias.

² Anto tsje chojni varroé Jesús ixin vaguicon na que Jesús vanchehe tsje milagro are vaguicon na que Jesús vanchexingamehe chojni nihi.

³ Cottimeja Jesús co cain tti chojni que vacao coani na ná jna co tavintte na ntthi nchion.

⁴ Co jamé conhe chian ngain tiempoe tti quiai dinhi pascua.

⁵ Co are Jesús vicon ixin anto tsje chojni terroé, Jesús ndaço ngain Felipe: —¿Quettinó siquehna na tti sine cainxin chojni jiji?

⁶ Pero jeha ndaço jañá para viconxin quehe rrondaço Felipe ixin Jesús ovenohé jian quehe sinchehe.

⁷ Cottimeja Felipe ndaço:

—Cain tomi que dacha ná tti nchehe xa yáto conittjao xa sittjaha tomi mé para sinanxin cain niottja que sine cain chojni yá.

⁸ Cottimeja Andrés, xanchó Simón Pedro co cai jeha ná de tti chojni que vacao Jesús; jeha Andrés ndaço ngain Jesús:

⁹ —Ntthi jí ná xanxichjan que chonda naho niottja de cebada co yó copescado, pero ¿queçén sittjaxin jiji para cainxin chojni yá?

¹⁰ Cottimeja ndaço Jesús:

—Ndache ra cainxin na que tasintte na ngataha nontte.

Anto cachji vehe ngain lugar mé, co tavintte cain nimé. Co jeha xí vintte naho mil xa.

¹¹ Cottimeja Jesús coá tti naho niottja mé ngain rá, co joanjo gracias ngain Dios. Cottimeja Jesús joanjo niottja mé ngain tti chojni que vacao, co jeha chojni mé conchjea na niottja mé ngain chojni que tate ntthi. Co cai jamé joinchehe Jesús ngain copescado co chojni que vacao Jesús conchjea na ngain chojni cain tti joinao na.

¹² Co are ojoexin joine na co ndacojehe na, Jesús ndaço ngain chojni que vacao:

—Datse ra cain pedazo de niottja que xehe para que xonhi sitján.

¹³ Jeha na joatse na nio rioho mé, co joincheaon na tteyo nntaxa de ixin tti pedazo que xexin joine na de tti naho niottja de cebada.

¹⁴ Cottimeja cain chojni mé are vicon na tti milagro jiji que Jesús joinchehe ndaço na:

—Ndoa jehe jiji tti profeté Dios que chonda que tsí ngataha nontte.

¹⁵ Pero Jesús conohe ixin cain chojni mé joinao na sarrojicaon na Jesús masqui jehe rroçhoha para que jehe na rrojincheguinhi na Jesús rey de jehe na. Mexinxin sacjoi Jesús hasta tti con jna para que nchao tavehe jehó.

Jesús cjoixin rotté ngataonhe jinda

(Mt. 14.22-27; Mr. 6.45-52)

¹⁶ Co are ondaconttie cain tti chojni que vacao Jesús xincanji na para ngain lago,

¹⁷ co joixinhi na ngain ná barco co coexinhi na coattoa na lago mé para joihi na ngain Capernaum. Co rato mé ondaconaxin xehe co Jesús xa cjanha.

¹⁸ Cottimeja coexinhi cjoa ná çhintto soji, co jinda anto soji cjamanguitaon chó nda.

¹⁹ Co are osacjoi na inchin naho o incjaon kilómetro de ngandehe nda, jehe na vicon na que Jesús jitonchienhe ngain barco mé; conixin rotté jittjixin ngataonhe nda, co cain jehe na vintteçhaon na.

²⁰ Pero jehe ndaçho ngain na:

—Janha joihi, çhaonha ra!

²¹ Cottimeja jehe na içaonha na co chonhe na Jesús para que jehe coani barco cai. Co rato mé ojoihi na ngain tti nontte que jehe na tettji na.

Are chojni cjoé na Jesús

²² Ndoexin tti chojni que ndavittohe toenxin ndachaon tti sacjoixin Jesús conixin tti chojni que vacao, vintteguicon na que cain chojni que vacao Jesús savicaon na jehó tti nacoa barco que vehe nttiha, co vintteguicon na que Jesús cjoiha ngain chojni mé.

²³ Pero de cain yá, icanxin barco joixin de ngain ciudad de Tiberias co cjoichiaon ngain lugar tti joinenxin na niottja después que Jesús joanjo gracias.

²⁴ Mexinxin are vintteguicon cain chojni mé ixin iveha Jesús nttiha ni cain chojni que vacao jehe icoha na nttiha, cain chojni mé vixinhi na barco mé co sacjoi na para rajna Capernaum para joicjé na Jesús.

Jesús tti niottja que danjo vida que çonhi tiempo tsjexin

²⁵ Are cain chojni mé vintteguiji na toenxin lago mé, nttiha viconxin na Jesús iná co joanchianguihi na co ndaçho na:

—Maestro, çquesa joihi nttihi?

²⁶ Pero Jesús ndaçho ngain na:

—Janha rrindattjo ra ndoa que jaha ra ttjé ni ra ixin jointte ra hasta cojaha ra co jeha ixin jaha ra coinxin ra quehe rroçho tti milagro que janha jointtaha.

²⁷ Ncheha ra ça para ixin comida que ndattjexin, nchehe ra ça para ixin tti comida que ttjexinha co rroçhá ra iná vida naroaxin que çonhi tiempo tsjexin. Co janha, tti Xí que joixin de ngajni, rroçhjaha ra tti comida mé ixin Dios Nnodana çjana joachaxin mé.

²⁸ Cottimeja jehe na joanchiangui na co ndaçho na:

—¿Quehe chonda na que sinttaha na para que sinttaha na inchin Dios rinao?

²⁹ Co Jesús ndaçho:

—Dios rinao que jaha ra dittaon ra nganji na janha, tti jehe rroanha.

³⁰ Cottimeja jehe na joanchianguihi na Jesús co ndaçho na ngain:

—¿Quehe señañ nchao sinchehe jaha para que janha na sicon na co sitticanho na jaha? ¿Quehe cosa nchehe jaha?

³¹ Nindogoelitona na xanchjen joine na maná ngagaha jna inchin ndacho tti libro que jitaxin Palabré Dios: “Dios joanjo niottja de ngajni para joine na.”

³² Jesús ndacho:

—Janha rrindattjo ra ndoa que jeha Moisés tti joanjo niottja de ngajni ngain jehe na; Ndodana danjo tti mero nio que ndoa joixin de ngajni.

³³ Ixin tti niottja que Dios danjo, mé tti jehe joinchexincanjinxin de ngajni para danjo ngain chojni iná vida naroaxin que xonhi tiempo tsjexin.

³⁴ Cottimeja vinttendacho jehe na:

—Soixin, chjana ra niottja yá cainxin nchanho.

³⁵ Co Jesús ndacho ngain na:

—Janha tti niottja que danjo vida. Tti chojni que tsí nganji co sitticaon ngain na janha, chojni mé xonhi tiempo senhe na jintta ni senhe na jinda.

³⁶ Pero inchin ondattjo ra, jaha ra ditticaonha ra masqui ovicon ni ra.

³⁷ Cainxin chojni que chjana Ndodana, tsí na nganji na janha, co cain chojni que sattí nganji na, janha sayá na,

³⁸ ixin janha joixin de ngajni pero jeha para sinttaha inchin janho rinaho, sino para sinttaha inchin rinao jehe tti rroanha na nttihi.

³⁹ Co janhi rinao Ndodana que rroanha na janha nttihi; que janha sinttatjanha ni ná chojni que jehe Ndo chjana Ndo, sino que janha sinttaxechon chojni mé de ngain tti ndadenhe ni ngain tti nchanho are ndatsjexin mundo.

⁴⁰ Co Ndodana que rroanha na rinao Ndo que cain chojni que dicon na janha, tti Xenhe Dios, co ditticaon nganji na, nimé chonda na iná vida naroaxin que xonhi tiempo tsjexin. Co janha sinttaxechon na ngain tti nchanho are tsjexin mundo.

⁴¹ Are Jesús joexin nichja jañá, chojni judío coexinhi na nichja na feo de ixin jehe Jesús ixin jehe ndacho: “Janha tti niottja que joixin de ngajni.”

⁴² Co ndacho na:

—¿Ajeha jihi Jesús, tti xitsihi José? Ján na chonxin na ndodé co janné. ¿Queén jehe nchao ndacho ixin jehe joixin de ngajni?

⁴³ Cottimeja Jesús ndacho ngain na:

—Nichjaha ra feo.

⁴⁴ xonhi chojni nchao tsí nganji na si tsiaoha na Ndodana que rroanha na, co janha sinttaxechon chojni mé ngain tti nchanho are ndatsjexin mundo.

⁴⁵ Ngain libroe profeté Dios ndacho janhi: “Dios sinchecoenhe cain chojni.” Jañá cain chojni que coinhi tti ndacho Ndodana co coangui na tti ndacho Ndo, chojni mé tsí nganji na janha.

⁴⁶ Jeha ixin chonja chojni vicon Ndodana; xonhi chojni vicon Ndo; tti vicon Ndo, mé jeho tti joixin de ngain Ndo.

⁴⁷ Janha rrindattjo ra ndoa que tti chojni que ditticaon nganji na, chojni mé chonda iná vida naroaxin que xonhi tiempo tsjexin.

⁴⁸ Janha tti niottja que danjo iná vida naroaxin.

⁴⁹ Nindogoelitoa ra xanchjen joine na maná ngagaha jna, pero masqui joine na mé, jehe na ndavenhe na;

⁵⁰ pero janha nichja de ixin tti niottja que joixin de ngajni que are ná chojni jine niottja jihi, chojni mé senha almé.

⁵¹ Janha mismo jehe tti niottja que danjo vida que joixin de ngajni. Tti chojni que jine nio, chojni mé rrochonda iná vida naroaxin que xonhi tiempo tsjexin. Tti niottja que janha sanjo, mé rrocho cuerpona. Janha sanjo

cuerpona para que cainxin chojni ngoixin mundo rrochonda na iná vida naroaxin que xonhi tiempo tsjexin.

⁵² Cottimeja chojni judío coexinhí vitticaoenha chó na co vinttendaço na:

—¿Queñén nchao chojni jhi rrochjá na cuerpoe sontte na?

⁵³ Jesús ndaço ngain na:

—Janha rrindattjo ra ndoa que si jaha ra sintteha ra cuerpona janha, tti Xí que joixin de ngajni, co siha ra jnina, jaha ra rrochondaha ra iná vida naroaxin que xonhi tiempo tsjexin.

⁵⁴ Tti chojni que sine cuerpona co sihi jnina, chojni mé chonda iná vida naroaxin que xonhi tiempo tsjexin, co janha sinttaxechon chojni mé ngain tti nchanho are ndatsjexin mundo.

⁵⁵ Cuerpona, mé tti ndoa comida; co jnina, mé tti ndoa jinda que dihi na.

⁵⁶ Tti chojni que jine cuerpona co dihi jnina, chojni mé jí nganji na co janha rrihi ngain jehe.

⁵⁷ Ndodana que rroanha na chonda Ndo vida, co janha rrichon de ixin jehe Ndo, mexinxin tti chojni que sine na janha sechon de ixin janha.

⁵⁸ Janha nichja de ixin tti niottja que joixin de ngajni. Co niottja jhi jeha inchin tti maná que joine nindogoelitoa ra xanchjen, que masqui joine na mé, jehe na vintteguenhe na, ixin tti chojni que sine tti niottja que janha ndachjan, chojni mé rrochonda iná vida naroaxin que xonhi tiempo tsjexin.

⁵⁹ Jesús joinchecoenhe na cain cosa jhi ngain servicio ngain ninngo ngain rajna Capernaum.

Are Jesús nichja de ixin tti iná vida naroaxin

⁶⁰ Are coinhi na cain tti ndaço Jesús jhi, tsje chojni que varroé Jesús ndaço na:

—Tti ndaço xí jhi atto tangui para que rrondaço na ján; ¿quensen nchao sinchehe caso tti ndaço xí jhi?

⁶¹ Cottimeja Jesús conohe tti tendaço chojni mé, co jehe joanchiangui ngain na co ndaço:

—¿Afeo tonoha ra de ixin tti janha rrindachjan?

⁶² ¿Quehe rroxaxaon jaha ra si rroguicon ní ra janha, tti Xí que joixin de ngajni, sarrocajín tti joarihi are saho?

⁶³ Espíritu Santo, mé tti danjo iná vida naroaxin que xonhi tiempo tsjexin; cuerpoe ni çhoha danjo vida mé. Co cain palabra que janha ndattjo ra, mé de ixin Espíritu co danjo iná vida naroaxin que xonhi tiempo tsjexin.

⁶⁴ Pero xa te canxion jaha ra que xa ditticaonha ra.

Jamé ndaço Jesús ixin are nacoexinxon xé jehe ovenohe quecá chojni que vaguitticaonha, co quensen tsjago ttinó sehe jehe para rrotse niningaconhe.

⁶⁵ Co Jesús ndaço:

—Mexinxin janha ndattjo ra que xonhi chojni nchao tsí nganji na si Ndodana tsiaoha.

⁶⁶ Desde are maho, tsje chojni que varroé Jesús ndacointtohe na jehe, co ivagacaoha na.

⁶⁷ Cottimeja Jesús joanchianguihi tti tteyo chojni que vacao co ndaço:

—¿Acai jaha ra rinao ra satsji ra?

⁶⁸ Pero Simón Pedro ndaço:

—Soixin, ¿quensen ngain nchao satsji na? Palabrá soixin palabra que danjo iná vida naroaxin que xonhi tiempo tsjexin.

⁶⁹ Janha na ovitticanho na, co nona na que soixin tti Cristo tti Dios rroanha co tti Xenhe Dios que jichon.

⁷⁰ Jesús nda'cho:

—Janha coincia' tti tteyó jaha ra. Co ixinha jamé, ná de jaha ra ná chojní inchínji.

⁷¹ Are nda'cho Jesús jiji, Jesús nichja de ixin Judas Iscariote, xitsihi iná Simón, ixin jehe Judas tti joinda'cho para tse na Jesús masqui jehe Judas ná de tti tteyó chojní que vacao Jesús.

7

Xanchó Jesús vaguitticaonha xan ngain

¹ Después de cain jiji, Jesús vangaria ngain regioen Galilea. Jehe joinaoha cjoí ngain Judea ixin nntiha chojní judío que vinttechonda joachaxin joíno na narrogoenxon na.

² Pero ixin tiempo mé joiconchian tti nchanho que chojní judío vanchechjian tti quiai de chozas, mé ná de tti quiai que chojní Israel chonda,

³ mexinxin cain xanchó Jesús nda'cho xan ngain:

—Tadariha nntihi; tji para Judea para que cain chojní que te nntiha, tti nite de acuerdo de ixin tti nda'cho jaha, cai sicon na tti nchehe jaha.

⁴ Ixin si ná ni que rinao ni tsje chojní satsoan ni, jehe ni ncheha ni cain cosa jímáo. Si jaha nchao nchehe cain cosa inchin cain cosa jiji, jaha nchehe ngattoxon con cainxin chojní ngoixin mundo.

⁵ Xanchó Jesús vinttenda'cho xan ja'ná ixin vaguitticaonha xan ngain jehe.

⁶ Cottimeja Jesús nda'cho:

—Xa ttiha nchanho para que janha tsononxin na ngattoxon con chojní que nchehe tti jianha, pero para ixin jaha ra quexeho nchanho nchao tsononxin ra ngattoxon con chojní mé.

⁷ Chojní que joxon nche'oxinhi cosa ngataha nontte 'choha rroningaconha ra na, pero janha ningaconna na ixin janha ndattjan na claro ixin tti jehe na tenchehe na jianha jí.

⁸ Sattji jaha ra ngain quiai; janha tsjiha ixin nchanho xa ttiha para que janha tsji.

⁹ Co después que Jesús ndache xanchó jiji, jehe vittohe ngain Galilea nchion nchanho.

Are Jesús cjoí ngain tti quiai de chozas

¹⁰ Pero después de que savintte'ciji xanchó Jesús, jehe Jesús cai sacjoi ngain quiai mé, masqui 'xonhi chojní conohe ixin jehe cjoí jímáo.

¹¹ Chojní judío que vinttechonda joachaxin vintte'cé na Jesús ngain quiai mé, co nda'cho na:

—¿Quettinó jí xí jiha?

¹² Co de ngayé cainxin chojní ngain quiai, nntiha tsje ni tenichja de ixin jehe Jesús. Canxion na nda'cho na: “Jehe ná xí jian”; pero icanxin na nda'cho na: “Jeha jian ixin nchehehe chojní.”

¹³ Pero 'xonhi chojní cjoao chó s'én para icha chojní rroquinhi na de ixin Jesús ixin 'xaon na ngain chojní judío que vinttechonda joachaxin.

¹⁴ Ojidiji inchin ngosinenxin quiai are Jesús joixinhi ngaxinhi nihngo icha importante co coexinhi joinchecoehne chojní.

¹⁵ Co chojní judío que vinttechonda joachaxin goan na admirado co ndache chó na:

—¿Que'én noenxin xí jiji anto tsje cosa co jehe xa 'xonhi tiempo coangui xa Palabré Dios inchin ján na?

16 Jesús ndačho ngain na:

—Tti janha nttacoanha ra jeha jeha tti nona janha, sino cosa que nohe tti rroanha na janha nttihi.

17 Si čhonja chojni rinao sinchehe tti rinao Dios, chojni mé satsoan si tti rrinttacoanha joixin de ngain Dios o ani jeha cosa que janha rinaho.

18 Tti chojni que ndačho inchin jeha rinao, chojni mé nchehe para que icha chojni sinchesayehe na jehe; pero tti chojni que nchehe que tsosayehe tti rroanha jehe, chojni mé nichja tti ndoa co xonhi tti ndoaha nichja chojni mé.

19 Moisés chjá ra ley, co ni ná de jaha ra ditticaon ley mé. ¿Quedonda rinao ra nasoenxon ni ra?

20 Chojni mé ndačho na ngain Jesús:

—Jaha chonda ná espíritu jianha, mexinxin jaho tti xaxaon que ixin janha na rinaho na nasoenxon ra jaha, pero janha na xaxaonha na jamé.

21 Jesús ndačho ngain na:

—De ixin nacoaxinxon cosa que janha jointtaha ngain nchanho que nchejogaha ni, cain jaha ra doan ra admirado.

22 Pero Moisés chjá jaha ra costumbre para chjehe ra cada xanxichjan letsjochjan tti xöhe que dinhi circuncisión, (masqui coexinxin ngain nin-dogolitoa ra xančhen que cjoí icha saho que Moisés.) Co mexinxin jaha ra chjehe ra naná xanxichjan letsjo xöhe mé masqui ngain nchanho que nchejogaha ni.

23 Nchao jí remé, si para sinchehe ni inchin ttetonha ley que vayé Moisés jaha ra chjehe ra ná xanxichjan letsjo xöhe masqui ngain nchanho que nchejogaha ni, ¿quedonda doňao ra nganji na ixin jointtaxingamá ngoixin cuerpoe ná xí ngain nchanho que nchejogaha ni?

24 Ncheha jaha ra juzgado jeha inchin xaxaon ra; nchehe ra inchin jiquininxin.

Jesús ndačho ttinó joixin jehe

25 Cottimeja canxion chojni que vintte Jerusalén coexinhi na joanchian-guihi chó na co ndačho na:

—¿Ajeha xí jihi tti rrittjé na ixin nasoenxon na?

26 Co yá jinichja xa co cain chojni tettinhi, co ni ná chojni xonhi ndache xa. ¿O ani cain chojni que chonda joachaxin ngain autoridad xaxaon que ixin xí jihi tti Cristo que Dios rroanha?

27 Pero ján na noa na ttinó joixin xí jihi, co are tsí Cristo, tti Dios rrorroanha, xonhi chojni tsonohe ttinó tsixin.

28 Jehe Jesús tajinchecoenhe chojni ngaxinhi nihngo icha importante, co are coinhi Jesús cain jihi, jehe ndačho sën:

—¿Ajamé ixin chonxin ni ra co noha ra ttinó joixin janha? Pero janha joiha inchin janho rinaho, janha joihi ixin tti rroanha na janha jehe anto jian co jehe mé tti jaha ra ditticaonha ra.

29 Janha ditticanho jehe ixin joixin de ngain jehe, co jehe rroanha na.

30 Cottimeja joinao na rrotse na Jesús para rroquiaxinhi na ngain cárcel, pero ni ná na joincheha na ixin xa jeha nchanho para que jehe siaxinhi.

31 Pero tsje chojni vitticaon na jehe, co ndačho na:

—Are tsí Cristo, ¿apoco sinchehe icha tsje milagro que xí jihi?

Xifariseo joinao xa rroquiaxinhi xa Jesús

³² Xifariseo vinttequinhi xa tti vandačo chojni de ixin Jesús, co jehe xa co canxion xidána que vaquetonha ngain icha xidána, cain xí mé rroanha xa xipolicie nihngo icha importante para rrotse xa Jesús.

³³ Cottimeja Jesús ndačo:

—Janha sarihi nganji ra pero seha, cottimeja sarrocjan na ngain tti rroanha na.

³⁴ Jaha ra tsjé ni ra pero sinchiha ni ra ixin jaha ra čhoha tsji ra ngain tti janha sarihi.

³⁵ Cottimeja chojni judío que vinttechonda joachaxin coexinhi na vintte-ganchianguihi chó na:

—¿Tinó satsji xí jihi que ján na čhoha sonttó na xa? ¿Apoco satsji xa ngain icha chojni judío que te ngayé chojni griego que te ngain nontte icha cjin para sinchecoehne xa chojni griego?

³⁶ ¿Quehe rročo yá tti ndattjo na xa: “Tsjé ni ra pero sinchiha ni ra ixin jaha ra čhoha tsji ra ngain tti janha sarihi”?

Jesús inchin jinda que danjo vida naroaxin

³⁷ Tti último nchanho de quiai, nchanho mé nchanho icha importante. Co nchanho mé Jesús vingattjen co ndačo sén:

—Si čhonja chojni venhe jinda, tsí nganji na co sihi jinda.

³⁸ Inchin ndačo ngain tti jitaxin Palabré Dios; de ngain ansén tti chojni que sitticaon na janha, nttiha rročinxin vida naroaxin inchin jinda čhinxin de ngain ná manantial.

³⁹ Conixin yao, Jesús joinao ndačo que cain chojni que sitticaon jehe sayé na Espíritu Santo; ixin tiempo mé xa joiha Espíritu mé ixin Jesús xa sacojinha para ngajni.

Quexén ndachjea chojni

⁴⁰ Canxion na ngayé chojni nttiha, are coinhi na jihi, ndačo na:

—Ndoa xí jihi tti profeté Dios que ján na chonhe na.

⁴¹ Icanxin na ndačo na:

—Xí jihi tti Cristo que Dios rroanha.

Pero icanxin na ndačo na:

—¿Quexén tsixin Cristo ngain regioen Galilea?

⁴² Tti jitaxin Palabré Dios ndačo que Cristo chonda que tsixin de ngain ná chojni rey David, co chojni mé tsixin de Belén, xajeho rajné David.

⁴³ Jańá que chojni ndachjea na de ixin Jesús.

⁴⁴ Co canxion na joinao na rrotse na Jesús para rroquixinhi na, pero xonhi ni tse.

Chojni que ttetonha ngain juzgado vitticaonha na Jesús

⁴⁵ Xipolicie nihngo icha importante savinttecan xa para ngain tti te xifariseo co xidána que vaquetonha ngain icha xidána, co cain xí jihi joanchi-angui xa ngain xipolicia co ndačo xa:

—¿Quedonda joicoha ra xa?

⁴⁶ Co xipolicia vinttendačo xa:

—¿Xonhi tiempo ná chojni nichja jian inchin nichja xí yá!

⁴⁷ Cottimeja jehe xifariseo vinttendačo xa ngain xipolicia mé:

—¿Acai jaha ra jointtayaha ra xí mé?

⁴⁸ ¿Apoco canxion xittetoan na ján na o xí que ttetonhe xifariseo vinttegui-tticaon xa de ixin jehe xí mé?

⁴⁹ Pero chojni que ditticaon jehe xí mé chonxinha na ley que vayé Moisés, co Dios sinchecastigá na.

⁵⁰ Co ntthiha jí Nicodemo, jehe cai ná de jehe xifariseo, tti cjoí para joitsjehe Jesús are ná ttie; co mé ndačo ngain icha xifariseo:

⁵¹ —Pero leya na ttetonha ixin ján na čhoha sonttoho na jie ngain ná xí si řa ttinha na saho palabré xa para jamé tsonoa na quehe joinchehe xa.

⁵² Cottimeja vinttendačo xa ngain jehe Nicodemo:

—¿Ajaha cai joixin de Galilea? Tsjehe ngain tti jitaxin Palabré Dios, co sicon que ni ná profeta joixinha de Galilea.

Nčhí que dejoacaho iná xí

⁵³ Cottimeja cada xa savinttecji xa para nchiandoha xa.

8

¹ Pero Jesús sacjoi para ngagaha tti jna dinhi Nttaolivo,

² co ndoexin are ovingasán, Jesús sacjan para ngain nihngo icha importante iná. Cainxin chojni conchienne na ngain Jesús, co jehe tavehe co coexinhi joinchecoehne na.

³ Cottimeja ximaestroee ley co xifariseo vinttequiaho xa ná nčhí que dinteguitja xa mero tajjioacaho nčha iná xí. Coín xa nčhí mé ngosine cainxin chojni que te ntthiha,

⁴ co vinttendačo xa ngain Jesús:

—Maestro, nčhí jihi vittja na nčha mero tajjioacaho nčha iná xí.

⁵ Co ley que vayé Moisés ttetonna na que nasoexon na conixin řo cain nčhí que nchehe janhi. ¿Jaha, quehe čho?

⁶ Jehe xa vinttendačo xa jihi para joaquehe xa prueba ngain Jesús co jamé rroconohe xa de quehe rrocjanguixin xa Jesús. Cottimeja Jesús visé co coexinhi cjin ngataha nontte conixin dedoe.

⁷ Pero jehe xa joinchehe xa sigue joanchianguihi xa. Cottimeja Jesús xendoa co ndačo ngain xa:

—Quexeho jaha ra que řonhi cosa jianha joinchehe ra ttedoehe ra nčha saho řo.

⁸ Co jehe cjan visé co joinchehe sigue cjin ngataha nontte.

⁹ Pero cain jehe xa co cain chojni que te ntthiha are vinttequinhi na jihi jehe na feo conohe na ixin řaxaon na que jehe na cai joinchehe na cosa jianha. Co vinttegáčhe ná na co ná na, saho vinttegáčhe ni icha nttanttaxí, cottimeja vinttegáčhe tti ni icha chjan hasta cainxin na vinttegáčhe na co vittohe jeho Jesús conixin jehe nčhí mé.

¹⁰ Cottimeja xendoa Jesús, iřonhi icha chojni vicon, jeho jehe nčhí mé. Co Jesús ndačo ngain nčha:

—¿Ttinó te chojni que cjoanguiha? ¿Ani ná na goenha na?

¹¹ Jehe nčha ndačo nčha ngain Jesús:

—Nahi, ni ná na.

Cottimeja Jesús ndačo ngain nčha:

—Pues ni janha čhoha sonhe. Jaxon sattji, co icjanha nchehe cosa jianha yá.

Jesús jehe tti joadingasán de ngoixin mundo

¹² Jesús nichjé chojni iná, co ndačo ngain na:

—Janha tti joadingasán de ngoixin mundo. Tti chojni que sitticaon na janha rrochonda na jehe tti joadingasán mé que sanjo iná vida naroaxin ngain na, co xonhi tiempo sacji na ngain tti naxin xehe.

¹³ Cottimeja cain xifariseo ndačo xa ngain Jesús:

—Jaho rrinichja jian de ixin jaho, co ixin jaho rrinichja yá xonhi rentte.

¹⁴ Jesús ndačo ngain xa:

—Tti janha rrindačhan ján rentte, masqui janho rrindačhan de ixin janha, ixin janha nona ttinó joixin co ttinó satsji. Pero jaha ra noaha ra ttinó joixin janha ni noaha ra ttinó satsji.

¹⁵ Jaha ra nchejuzgá ra inchin nohe chojni nttili ngataha nontte. Janha nttaha juzgado ni ná chojni;

¹⁶ pero si janha rrojintaha juzgado, janha sinttaha inchin jiquininxin, ixin jaonha tti nttaha juzgado, sino Nodana que rroanha na, Ndo mé Ndo nchehe juzgado conixin janha.

¹⁷ Ngain ley que chonda ra jitaxin que are yó chojni testigo rrondačo xajeho, chonda que sitticaon ni chojni mé.

¹⁸ Pues, nchao remé, janha mismo ná testigo na de ixin janho ixin ndačhan que janha jian na, co Nodana que rroanha na, jehe Ndo iná testigo ixin ndačo Ndo xajeho de ixin janha.

¹⁹ Cottimeja vintteganchianguihi xa Jesús co ndačo xa:

—¿Quettinó jí Ndadá?

Jesús ndačo ngain xa:

—Jaha ra ttinxinha ra tti janha rrinttaha, jamé cai tsonoaha ra de ixin Ndadana. Si rroquinxin ra tti janha rrinttaha, cai rroconoha ra de ixin Ndadana.

²⁰ Jesús ndačo cain cosa jihu are jehe jitjagoe chojni ngaxinhi nihngo icha importante, mero ngain lugar tti te cajé tomí alcancia. Pero xonhi chojni tse Jesús para rroquiainhi na Jesús ixin xa jaha tiempo para que jehe rroguiaxinhí.

Jesús ndache chojni ixin jehe na čhoha tsji na ngain lugar tti jehe tsji

²¹ Jesús cjan ndačo ngain na iná:

—Janha satsji co jaha ra tsjé ni ra, co are ndasenne ra xa sintteca ra tti jianha que nchehe ra, mexinxin tti janha satsji, jaha ra čhoha tsji ra.

²² Cottimeja chojni judío que vinttechonda joachaxin ndačo na:

—¿Apoco sasiguenhe jeho, mexinxin ndačo que ján na čhoha tsjin na tti satsji jehe?

²³ Cottimeja Jesús ndačo ngain na:

—Jaha ra de nttili ngain mundo ra, pero janha de noi na: jaha ra de ngain mundo jihu ra, pero janha jaha de ngataha nontte jihu na.

²⁴ Mexinxin ndattjo ra que are senhe ra xa sintteca ra tti jianha que nchehe ra ixin si ditticaonha ra que janha mero inchin janha ndačhan, senhe ra co xa sintteca ra tti jianha que nchehe ra.

²⁵ Cottimeja jehe na joanchianguihi na Jesús co ndačo na:

—¿Quensen jaha?

Co Jesús ndačo ngain na:

—Ondattjo ra de are saho.

²⁶ Janha chonda atto tsje que rrondačhan de ixin jaha ra co sinttajuzgá ra. Co tti rroanha na janha, jehe nichja tti ndoa, co janha ndačhan ngain chojni de mundo jihu jeho tti coian nichja jehe tti rroanha na.

²⁷ Pero jehe na coinxinha na ixin ndačo jehe de ixin Dios Ndadé.

²⁸ Mexinxin Jesús ndačo ngain na:

—Are jaha ra rrotsinhi ni ra noi janha, tti Xí que joixin de ngajni, cottimeja tsonoha ra que janha ndoa inchin janha ndačhjan, co ixin xonhi ndačhjan inchin janho rinaho, sino que janha jeha ndačhjan tti cjoagohna Nnodana.

²⁹ Ixin Nnodana que rroanha na janha, jeha Ndo jí Ndo nganji na; co jeha Ndo ttinttonaha Ndo janho, ixin janha cainxin tiempo nttaha inchin jeha Ndo rinao Ndo.

³⁰ Are Jesús ndačo jiji tsje na vitticaon na ngain jeha.

Jesús ndačo quexehe tti chojni xenhe Dios co quexehe tti chojni inčínji

³¹ Cottimeja Jesús ndache chojni judío que vitticaon ngain jeha:

—Si jaha ra sitticaon ra cainxin tiempo tti janha ndattjo ra, jaha ra ndoa sinhi ra chojnina.

³² Co rrochonxin ra tti ndoa, co tti ndoa rrochjá ra libertad.

³³ Jeha na ndačo na ngain Jesús:

—Janha na nirazé Abraham na co xonhi tiempo cjoji na esclavo de ni ná chojni. ¿Quexén ndačhoxin jaha ixin rrochonda na libertad?

³⁴ Jesús ndačo ngain na:

—Janha rrindattjo ra ndoa que cainxin chojni que nchehe jianha, chojni mé tti te inchin esclavo de ngain cosa jianha.

³⁵ Ná esclavo tadeha ngain nchiandoha xinajni para cainxin tiempo; pero ná xenhe xinajni tadehe xan ngain nchiandoha ndodé xan para cainxin tiempo.

³⁶ Jamé janha, tti Xenhe Dios, rritjenguijna ra para que isintteha ra esclavo de ngain cosa jianha, para que jaha ra ndoa sintte ra inchin chojni que chonda libertad.

³⁷ Onona que jaha ra razé Abraham, pero rinao ra nasoenxon ni ra janha ixin rinaoha ra tti janha ndattjo ra.

³⁸ Janha nichja tti cjoagohna Nnodana co jaha ra nchehe ra tti dindattjo ra ndodá ra.

³⁹ Jeha na vinttendačo na ngain Jesús:

—Nnodana na jeha Abraham.

Pero Jesús ndačo ngain na:

—Si jaha ra rrocji ra ndoa razé Abraham, jaha ra rrojinchehe ra tti jeha joinchehe.

⁴⁰ Co ixinha jamé, masqui ndattjo ra tti ndoa que Dios cjoagohna, jaha ra rinao ra nasoenxon ni ra. ¿Co Abraham xonhi tiempo joinchehe jaña!

⁴¹ Jaha ra nchehe ra xajeho tti nchehe ndodá ra.

Cottimeja jeha na ndačo na ngain Jesús:

—Janha na jeha chjan na que digoama ixin janha na chonda na nacoaxinxon Nnodana na que mé jeha Dios.

⁴² Cottimeja Jesús ndačo ngain na:

—Si ndoa Dios rrocji Nnodá ra, jaha ra rrojiniao ni ra janha ixin janha joixin de ngain Dios co nttihi rrihi. Joiha janha inchin janho joinaho, Dios tti rroanha na.

⁴³ ¿Quedonda čhoha jaha ra ttinxin ra tti janha ndattjo ra? Mé ixin jaha ra rinaoha ra ttinhi ra joajnana.

⁴⁴ Tti ndodá jaha ra, mé tti inčínji; jaha ra chojni jeha mé, co rinao ra sinchehe ra tti jeha rinao. Inčínji jeha tti nadoenxon chojni desde are saho. Co jeha xonhi tiempo jí ngain tti ndoa co xonhi tiempo nichja tti ndoa. Are jeha nichja tti ndoaha, jeha nichja de ixin jeha mismo ixin jeha puro ndoaha co jeha tti ndodé cainxin chojni que nichja ndoaha.

⁴⁵ Pero ixin janha nichja tti ndoa, mexinxin jaha ra ditticaonha ni ra.

⁴⁶ ¿Quensen de jaha ra nchao rrondačo que janha jointtaha jianha? Pero si janha ndačhjan tti ndoa, ¿quedonda ditticaonnaha ra?

⁴⁷ Tti chojní Dios, jehe na ttinhi na palabré Dios, pero ixin jaha ra jaha chojní Dios ra, mexinxin rinaoha ra ttinhi ra.

Cristo ovehe icha saho que Abraham

⁴⁸ Cottimeja jehe tti chojni judío que vinttechonda joachaxin ndačo na ngain Jesús:

—Janha na chonda na razón are ndačhjan na que jaha ná chojni de ngain nonttehe Samaria co chonda ná espíritu jianha.

⁴⁹ Jesús ndačo ngain na:

—Janha chondaha ni ná espíritu jianha. Tti janha nttaha mé para nttasayá Ndodana, co jaha ra nichja ra feo de ixin janha.

⁵⁰ Janha taha joachjaon si sinchesayana ra o ni nahi, pero masqui jamé, jí ná tti rinao que tsosayana, co jehe nchehe juzgado ixin atenchesayana ra o ni nahi.

⁵¹ Janha rrindattjo ra ndoa que tti chojni que nchehe caso tti ndačhjan, chojni mé xonhi tiempo ndasenhe.

⁵² Cottimeja jehe chojni judío mé vinttendačo na ngain Jesús:

—Jaxon seguro chonxin na que jaha chonda ná espíritu jianha. Abraham co cain profeté Dios ndavintteguenhe na, co jaha ndačo: “Tti chojni que sinchehe caso tti janha ndačhjan, xonhi tiempo ndasenhe na.”

⁵³ ¿Apoco jaha icha jian que ndodana na Abraham? Jehe ndo mé venhe ndo co cain profeté Dios cai ndavintteguenhe na. ¿Quensen toena jaha?

⁵⁴ Jesús ndačo ngain na:

—Si janha jitosayana janho, tti janha rrinttaha xonhi rentte. Pero tti nchesayana janha mé Ndodana, co jehe Ndo mé mero tti ndačo jaha ra que jehe mé tti Dios de jaha ra.

⁵⁵ Pero jaha ra chonxinha ra de ixin jehe Ndo, janha nchoe ján chonxin Ndo. Si janha rrondačhjan que chonxinha Ndo, janha rronichja ndoaha inchin jaha ra cai. Pero janha ndoa chonxin Ndo, co ján nttaha caso tti jehe Ndo ndačo Ndo.

⁵⁶ Abraham, tti ndogelitoa ra xančhjen, anto ché ixin jehe venohe que janha sihi ngataha nontte; co jehe vicon co anto ché.

⁵⁷ Cottimeja chojni judío mé vinttendačo na ngain Jesús:

—Ŷa chondaha jaha ni cincuenta nano, ¿queŷén ndačhoxin ixin vicon Abraham?

⁵⁸ Jesús ndačo ngain na:

—Janha rrindattjo ra ndoa que icha saho que Abraham vehe, janha ojoarihi.

⁵⁹ Cottimeja vinttecjé na xo para rrožanguí na Jesús, pero jehe tavema ngayehe ni icha, cottimeja jimao vačhje yexin de ngayehe na co de ngaxinhi nihngo icha importante para sacjoi.

9

Jesús joinchexingamehe ná xí que choha vaguicon

¹ Are jidatto Jesús ngain ná lugar, jehe vicon ná xí que desde are diconcjihí xa čhoha vaguicon xa.

² Co cain chojni que vacao Jesús joanchiangui na ngain jehe co ndačo na:

—Maestro, ¿quedonda diconcjihi xí yá jañá ixin čoha dicon xa? ¿Puede de ixin tti jianha que joinchehe ndodé xa o janné xa, o ni de ixin tti jianha que jehe xa joinchehe xa?

³ Jesús ndačo:

—Jeha de ixin tti jianha que jehe xí yá joinchehe xa ni jeha de ixin tti jianha que joinchehe nindoha xa. Jañá jí xí yá para que de ngain xa rrořago tti nchao nchehe Dios.

⁴ Jai que nchanho janha chonda que sinttaha xé tti rroanha na nttihi ixin otsí ttie que ni ná chojni čoha sinchehe xa.

⁵ Jai que janha xa rrihi nttihi ngataha nontte jihi, janha inchin tti joadin-gasán de ngoixin ngataha nontte jihi.

⁶ Are joexin ndačo Jesús cain jihi, jehe cointtji nttatté ngataha nontte co joinchechjian nchion nchetjaho conixin nttatté, co coinga nche nganito con tti xí que vaguiconha.

⁷ Cottimeja ndačo Jesús ngain tti xí mé:

—Janché, ttji dicontti jinda ngain estanque de Siloé.

Co Siloé rročo Tti Joí.

Tti vaguiconha mé cjoí co joicontti jinda, co are jehe cjan, onchao vicon.

⁸ Cottimeja cain nivecinoe, co cain tti nivicon are saho ixin jehe vaguiconha, vinttendačo na:

—¿Ajeha xí jihi xí que vaganchiagaha?

⁹ Canxion na ndačo na:

—Ján, jehe xa.

Icanxin na ndačo na:

—Nahi, jeha xa, pero inchin jitsjehe xí mé jitsjehe xí jihi.

Pero jehe xí que vaguiconha mé ndačo xa:

—Ján, janha.

¹⁰ Cottimeja vintteganchianguihi na xí mé co vinttendačo na:

—¿Quexén conhe ixin jaha onchao dicon?

¹¹ Jehe xa ndačo xa:

—Tti xí jiha que dinhi Jesús joinchechjian xa nchetjaho, co coinga xa nche nganito con co ndachjenji na xa: “Janché, ttji ngain estanque de Siloé co tontti jinda.” Mexinxin janha cjoí, co are contti jinda, janha onchao vicon.

¹² Cottimeja jehe na joanchiangui na co ndačo na:

—¿Quettinó jí xí mé?

Co jehe tti vaguiconha ndačo:

—Janha nonaha.

Xifariseo joanchianguihi tti xí que vaguiconha

¹³ Cottimeja joicao na jehe tti vaguiconha mé ngain xifariseo.

¹⁴ Co tti nchanho que Jesús joinchechjian nchetjaho co joinchexingamehe con jehe tti xí que vaguiconha, nchanho mé nchanho para nchejogaha ni.

¹⁵ Mexinxin chojni fariseo cai joanchianguihi na jehe tti xí que vaguiconha ixin quexén jehe onchao dicon. Co jehe ndačo:

—Xí mé coinga xa nchetjaho nganito con, co contti jinda; co jai onchao dicon.

¹⁶ Cottimeja canxion xifariseo vinttendačo xa:

—Tti xí que joinchehe jihi jeha chojni Dios ixin chondaha xa respeto ngain nchanho que nchejogaha ni.

Pero icanxin xa vinttendačo xa:

—¿Quexén ná xí que nchehe jianha nchao sinchehe xa ná milagro?

Co mexinxin jehe xa ndachjea xa yó grupo.

¹⁷ Co cjan xa iná joanchianguihi xa jehe tti vaguiconha mé, co ndačo xa: —¿Co jaha quehe ndačo de ixin tti xí que chjá con?

Co jehe ndačo:

—Janha ndačhjan que xí mé ná profeté Dios.

¹⁸ Pero chojni judío que vinttechonda joachaxin joinaoha na rroguitticaon na que ixin xí mé vaguiconha xa co are mé onchao vaguicon xa hasta que vayeja na ndodé xa co janné xa,

¹⁹ co joanchianguihi na na co ndačo na:

—¿Ajíhi tti xitsiha ra, que jaha ra ndačo ra que de concjiho xa vaguiconha xa? ¿Quexén jai onchao dicon xa?

²⁰ Ndodé co janné xí mé ndačo na:

—Nona na que jíhi xitsihna na co vaguiconha xa de concjiho xa,

²¹ pero nonaha na quexén jai jehe xa onchao dicon xa, ni nonaha na quensen joinchexingamehe jmacon xa. Danchianguihi ra xa, ochonda xa tsje nano, co jehe xa nchao rrochjá ra xa razón.

²² Nindoha jehe tti vaguiconha ndačo na jíhi ixin xáon na ixin chojni judío que vinttechonda joachaxin ocjoao chó na ixin quexeho chojni que rrondačo ixin Jesús jehe mé tti Cristo que Dios rroanha, chojni que rrondačo jíhi senguixin na de ngaxinhi ningoe na.

²³ Mexinxin nindoha jehe tti vaguiconha ndačo na: “Danchianguihi ra xa, otsje nano chonda xa.”

²⁴ Cottimeja cain chojni judío cjan na vayé na jehe tti xí que vaguiconha, co ndačo na ngain:

—Ndachjenji ni ra tti ndoa ngattoxon con Dios quexén conha ixin janha na nona na que xí yá nchehe xa jianha.

²⁵ Cottimeja jehe tti xí que vaguiconha ndačo ngain na:

—Janha nonaha si jianha xa ani nahi. Janha jehó nona que janha vaguiconha co jai odicon.

²⁶ Co jehe na cjan na joanchianguihi na iná co ndačo na:

—¿Quehe joinchehe xa nganji? ¿Quexén joinchehe xa para joinchekhjian xa jmacon?

²⁷ Jehe tti vaguiconha ndačo:

—Ondattjo ra, co ncheha ni ra caso, mexinxin ¿quedonda rinao ra que janha rrocjan na rronhattjo ra iná? ¿Asoixin ra cai rinao ra sitticaon ra xí mé?

²⁸ Cottimeja jehe na nichja na feo ngain jehe tti vaguiconha mé, co ndačo na ngain:

—Jaha ditticaon xí mé, pero janha na ditticanho na Moisés.

²⁹ Janha na nona na que Dios nichja ngain Moisés; pero xí yá ni nonaha na ttinó joixin xa.

³⁰ Tti xí que vaguiconha ndačo ngain na:

—Janha ttianxinha quexén xaxaon ra de ixin xí yá. Soixin ra noaha ra quettinó joixin xa, pero janha nona que ngain Dios joixin xa ixin joinchekhjian xa jmacon na.

³¹ Ján na noa na jian que Dios ttinha tti ndačo chojni que nchehe jianha, jehó ttinhi ngain chojni que nchesayehe jehe co nchehe na tti rinao jehe.

³² Xonhi tiempo coinhi ni que ná chojni joinchekhjian jmacon ná chojni que desde concjiho diconha.

³³ Si xí jíhi jeha ngain Dios rroquixin xa, jehe xa čhoha rrojinchehe xa jíhi.

³⁴ Cottimeja chojni judío ndačo na:

—Jaha anto jianha desde concijha ¿co jai arinao sinchecoanna ni ra de ixin Dios?

Co venguixin na de ngaxinhi nihngo.

Tti chojni que ditticaonha Cristo te na inchin tti chojni que diconha

³⁵ Jesús conohe ixin vengui na jehe tti vaguiconha mé, co are vetan Jesús, Jesús ndačo ngain:

—¿Aditticaon jaha ngain Xenhe Dios?

³⁶ Co jehe tti vaguiconha mé ndačo:

—Ndachjenji na soixin, quensen mé, para que janha sitticanho ngain.

³⁷ Jesús ndačo:

—Jaha ovicon; mé janha tti jaha rritjao jaxon.

³⁸ Cottimeja jehe tti vaguiconha mé vettoxin nttajochjihi ngain Jesús, co ndačo:

—Ján, ditticanho, soixin.

³⁹ Cottimeja ndačo Jesús:

—Janha joihi ngataha nontte jiji para que janha sinttajuzgá chojni para que tti chojni que te inchin tti diconha, rročo ixin jehe na chonxinha na de ixin Dios, para que jai chojni mé nchao sintte na inchin tti dicon ixin sitticaon na nganji na janha. Co para que tti chojni que te inchin tti dicon, rročo ixin jehe na ndačo na que anto chonxin na de ixin Dios, chojni mé sintte na inchin tti diconha ixin sitticaonha na nganji na janha.

⁴⁰ Cottimeja canxion xifariseo que te ngain Jesús nttiha vinttequinhi xa jiji, co vintteganchianguihi xa Jesús co ndačo xa:

—¿Apoco janha na cai diconha na?

⁴¹ Jesús ndačo ngain xa:

—Si jaha ra rroguintte ra inchin tti diconha, xonhi rroguintteca ra de ixin tti jianha que nchehe ra. Pero ixin jaha ra ndačo ra que dicon ra, mexinxin tecaxin ra tti jianha que nchehe ra.

10

Ejemplo corré coleco

¹ Janha rrindattjo ra ndoa que tti chojni que dixinxinha de ngain puerté corré coleco, co dixinxin ojé lado, chojni mé chehe ixin tté coleco.

² Pero tti chojni que dixinxin de ngain puerta, chojni mé tti ttingaria jehe coleco co dicao cuidado de ixin jehe va.

³ Tti jinda puerta jehe danttjé puerta para dixinhi jehe tti ttingaria coleco, co jehe va datsoan va tté jehe. Co jehe dayé va de ixin nombré va co dantsjexin va de corra.

⁴ Co are ottjexin dantsje cainxin coe, jehe ditaonhe va nttiha co jehe va rroé va ixin datsoan va tté jehe.

⁵ Co jehe va rroeha va iná chojni que chonxinha va, sino que sattinga va de ngain ixin chonxinha va tté chojni mé.

⁶ Jesús ndache xifariseo ejemplo jiji, pero jehe xa coinxinha xa quehe rročo tti ndačo Jesús.

Jesús tti chojni que jian ttingaria coleco

⁷ Cottimeja Jesús cjan ndache xa:

—Janha rrindattjo ra ndoa que janha tti puerta na tti dixinxin coleco.

⁸ Cainxin chojni que joi icha saho que janha, tti ndačo que jehe na joixin na de ngain Dios, chojni mé tti chehe, pero coleco joincheha va caso.

⁹ Janha tti puerta na; co tti chojni que sixinhi de ixin janha, chojni mé janha tsjenguijna para rrochondaha na castigo de cain cosa jianha que nchehe. Co sehe inchin ná coleco que dixinhi co dachje de ngain corra co dittja va cachji que jine va.

¹⁰ Tti chehe jehó tti para tté co para nadoenxon chojni, co para nchexantte, pero janha joihi para rrochonda ra iná vida naroxin, co cai para que janha rrochjaha ra ngain vida mé tsje tti jian que danjo Dios.

¹¹ Janha tti chojni que jian ttingaria coleco. Tti jian ttingaria coleco jehé danjo vidé para ixin jehé va,

¹² pero tti nchehe xa jehó para sacha tomi, are jehé dicen ttí condanixa, jehé ttinttohe coleco co jehé satinga ixin jehé jeha tti mero ttingaria coleco co ixin coleco jeha coe jehé. Co condanixa tonchjequé va coleco co tse va va.

¹³ Xí jihí satinga xa ixin nchehe xa xa jehó para dacha xa tomi, co jehé xa ndosenha xa coleco.

¹⁴⁻¹⁵ Janha tti chojni que jian ttingaria coleco. Jañá inchin Ndodana chonxin Ndo jian ngain ansenna, jamé janha cai chonxin jian ngain ansén jehé Ndo; co Xajehó jamé janha chonxin jian ngain ansén cain colecona, co jehé va cai chonxin va jian ngain ansenna. Co janha sanjo vidana para ixin jehé cona.

¹⁶ Cai janha chonda icanxin coleco que jeha de ngain corra jihí, co chonda que siquinha va cai. Jehé va sitticaon na va janha, co sehe nacoaxinxon tájo co nacoaxinxon tti tsingaria va.

¹⁷ Ndodana rinao na Ndo janha ixin janha sanjo vidana para nchao rrocjan na sayá vida iná.

¹⁸ Xonhi chojni santsjena vidana, janho tti sanjo vidana ixin janha jañá rinaho. Janha chonda joachaxin para sanjo vidana, co cai chonda joachaxin para rrocjan na sayá vidana iná. Jehé jihí tti coetonna Ndodana.

¹⁹ Are chojni judío coinhi na cain palabra jihí, jehé na cjan na chjea na yó grupo iná.

²⁰ Tsje jehé na ndačho na:

—¿Quedonda nchehe ra caso xí yá? Jehé xa chonda xa ná espíritu jianha co ndadixenga xa.

²¹ Pero icanxin na ndačho na:

—Xonhi chojni que chonda espíritu jianha nchao rronichja jañá. ¿Apoco ná espíritu jianha nchao rrochjé jmacon chojni que diconha?

Chojni judío vayeha na Jesús

²² Co ngain tiempo mé mero tiempoe quin, co ngain ciudad de Jerusalén chojni judío mero techonda na tti quiai para Xaxaonxin na tti nchanho are joexin conchjian tti nihngo icha importante.

²³ Co are mé, Jesús tarridehe ngain nihngo mé ngain lugar que vinhi portal de Salomón.

²⁴ Co chojni judío vixindanji na Jesús co ndačho na ngain:

—¿Hasta tti quesa sinchenona ni ra jaha? Si jaha tti Cristo, ndačho ndacoa nao jaxon.

²⁵ Jesús ndačho ngain na:

—Janha ondačhan co jaha ra vitticaonnaha ra. Cain cosa que janha nttaha, nttaha ixin Ndodana ttetonna. Co tti nttaha janha jamé Xago claro quensén janha,

²⁶ pero jaha ra ditticaonha ra ixin jaha ra jeha colecona ra inchin ondattjo ra are saho.

²⁷ Colecona datsoan va ttana janha co janha chonxin jehe va co jehe va roehna va.

²⁸ Janha rrochjaha va iná vida naroaxin que xonhi tiempo tsjexin co xonhi tiempo ndasitján va, ni xonhi chojni santsjenanxin va de ngá rana.

²⁹ Ndodana chjana Ndo va co jehe Ndo chonda Ndo joachaxin de cainxin cosa, co xonhi chojni santsjehe Ndo va de ngá rá Ndo.

³⁰ Janha co Ndodana jeho nacoa na.

³¹ Cottimeja chojni judío cjan na coá na xo para rrožanguí na Jesús.

³² Co Jesús ndačo ngain na:

—Janha jointtaha tsje cosa jian ngattoxon con ra conixin joachaxín Ndo-dana; ¿quexehe de cain cosa jihi rinao ra rrožanguinanxin ra xo?

³³ Jehe chojni judío ndačo na:

—Janha na rrožanguiaha ra xo de ni ná cosa jian que jaha joinchehe; janha na rinaho na rrožanguiha ra xo ixin jaha chondaha respeto ngain Dios de ixin tti jaha ndačo. Jaha jeho ná xí, pero jaha rridoan Dios.

³⁴ Cottimeja Jesús ndačo ngain na:

—Ngain ley que chonda ra jitaxin que Dios ndačo: “Jaha ra dios ra.”

³⁵ Noa na que čhoha rrondačo na nahi de ixin tti ndačo ngain tti jitaxin Palabré Dios, co Dios joincheguini chojni dios, tti nivayé joajné jehe.

³⁶ Co si Dios joantsjenda na janha co rroanha na ngataha nontte nttihi, ¿quexén nchao ndačo ra que janha chondaha respeto ngain Dios ixin ndačhjan que janha Xenhe Dios?

³⁷ Si janha čhoha ntaha cain cosa que nchehe Ndodana, ditticaonha ni ra janha.

³⁸ Pero si janha ján ntaha, masqui ditticaonha ra nganji na, ditticaon ra ngain cosa que janha ntaha para que tsonoha ra que Ndodana jí Ndo nganji na co janha rrihi ngain jehe Ndo.

³⁹ Jehe na joinao na rrotse na Jesús iná, pero Jesús sacinguehe na.

⁴⁰ Cottimeja Jesús sacjan para lado čhinxin nchanho de río Jordán co nttiha vittohe ngain tti lugar que vancheguittexin Juan chojni are icha saho.

⁴¹ Tsje chojni cjoí na joitsjehe na Jesús co ndačo na:

—Ján ndoa, masqui Juan xonhi milagro joinchehe, pero cainxin tti jehe ndačo de ixin xí jihi ján ndoa.

⁴² Co tsje chojni vitticaon na Jesús ngain lugar mé.

11

Are ndavenhe Lázaro

¹ Vehe ná xí venihi que vinhi Lázaro, xí mé Betania rajné xa, xajeho rajné María co xanchó María xanMarta.

² Jehe María jihi, nčhichó jehe Lázaro, tti venihi, co María jihi tti cointtjitte aceite que anto xajni ngataha rotté Jesús co joinchexemanxin conixin xajá.

³ Jańá cayoi nčhí mé rroanha nča joajna ngain Jesús co ndačo nča:

—Xiamigoa soixin nihi xa.

⁴ Are Jesús coinhi jihi, ndačo:

—Chin yá nasoexinhao chin Lázaro, jeho para rrožagoxin joachaxín Dios co para de ixin chin yá cai rrožagoxin joachaxín Xenhe Dios.

⁵ Masqui Jesús anto joinao jehe Marta, conixin cayoi xanchó Marta, María co Lázaro,

⁶ are ndache na Jesús ixin Lázaro venihi, Jesús xa vittohe iyó nchanho nttiha ngain tti lugar que vehe.

7 Después nda'cho ngain tti chojni que vacao:

—Chjin na iná para ngain Judea.

8 Co tti chojni que vacao nda'cho na:

—Maestro, xa seha chojni judío que techonda joachaxin de ngain lugar mé joinao na narrogoenxon na jaha ixin xo, ¿co xa rinao tsji nttiha iná?

9 Jesús nda'cho:

—¿Ajeha ndoa que nchanho chonda tteyó hora? Co si ná ni čhji ni de nchanho, tonttenguixinha ni ixin dicon ni joadingasán que jí ngataha nontte jihi,

10 pero si ná ni čhji ni de ttie, tonttenguixin ni ixin diconha ni joadingasán.

11 Cottimeja nda'cho Jesús ngain tti chojni que vacao:

—Xiamigoa na Lázaro tajijoa xa, pero sinttaxingamá xa.

12 Cottimeja tti chojni que vacao Jesús nda'cho na:

—Soixin, si tajijoa, rro'cho orroxenga'ño.

13 Pero tti nda'cho Jesús rro'cho que Lázaro ondavenhe. Co cain tti chojni que vacao Jesús xaxaon na que ndoa tti nda'cho Jesús ixin tavejoa Lázaro.

14 Cottimeja Jesús nda'cho ngain na claro:

—Lázaro ondavenhe.

15 Janha chahna ixin joariha nttiha; icha jian jañá para ixin jaha ra sitticaon ra. Pero chjin na sistsjehe na Lázaro.

16 Cottimeja Tomás, tti vanchequinhi na Xancoata, nda'cho ngain tti icha chojni que vacao Jesús:

—Chjin na ján na cai para senhe na conixin Jesús.

Jesús nda'cho ixin jehe tti rroxechonxin chojni co jehe tti danjo iná vida naroaxin

17 Are jehe na joiiji na nttiha, chojni nttiha joinchenohe na Jesús que Lázaro ovechonda nó nchanho que jíxavá.

18 Rajna Betania vehe chiaon Jerusalén, inchin yoto kilómetro co rioho tecaoxin chó rajna mé.

19 Co tsje chojni judío joitsjehe jehe Marta co María para joantsjehe na joachjaon ansén cayoi n'chí mé de ixin xanchó n'cha que ndavenhe.

20 Are Marta conohe que Jesús ojoiji nttiha, jehe Marta vachjexin de nchia co joichoexin Jesús ngatja nttiha, pero María ndavittohe ngaxinhi nchia.

21 Co Marta nda'cho ngain Jesús:

—Si soixin rrogarihi nttihi, rroguenha xanchian.

22 Pero janha nona que Dios rrochjá cain tti sanchiehe.

23 Jesús nda'cho:

—Xanchó rrocjan xan sechon xan.

24 Marta nda'cho ngain Jesús:

—Ján, janha nona que rrocjan xan sechon xan are rroxechon cainxin nindadenhe ngain nchanho are ndatsjexin mundo.

25 Cottimeja Jesús nda'cho:

—Janha tti rroxechonxin cainxin chojni, co janha tti danjo iná vida naroaxin. Tti chojni que ditticaon na janha, masqui jehe senhe, pero rrochonda iná vida naroaxin.

26 Co cainxin chojni que xa techon co ditticaon na, chojni mé xonhi tiempo sinchetján na almé na ixin ochonda na vida mé. ¿Aditticaon jaha jihi?

27 Marta nda'cho:

—Ján, janha ditticanho que soixin tti Cristo, tti Xenhe Dios, tti vandačo profeta que sihi ngataha nontte jihi.

Jesús tsjanga ngaca tti vexavá Lázaro

²⁸ Are Marta joexin ndačo jihi, cottimeja cjoí joigayé María, jehe xanchó, co ndačo Marta jimao ngain María:

—Tti Maestro nntihi jí co dayaha jaha.

²⁹ Are María coinhi jihi, jehe jaicoa vingattjen co cjoí joitsjehe Jesús.

³⁰ Jesús xa joigaha rajna rato mé; ixin jehe xa vittohe ngain tti lugar vetanxin Marta.

³¹ Are ni icha vicon na que María jaicoa vingattjen co vachje, tti chojni judío que te nntiha ngain nchiandoha María ixin tedantsjehe na joachjaon ansén, jehe na rroé na María ixin jehe na xaxaon na que María sarrocji ngain tti jixavá xanchó para rrotsjangaxin nntiha.

³² Cottimeja María, are joiji tti jí Jesús, María vettoxin nntajochjihi ngaca rotté Jesús, co ndačo:

—Si soixin rrogarihi nntihi, xanchian rroguenha xan.

³³ Are Jesús vicon que María jitsjanga co cain chojni judío que joicao María tetsjanga na cai, Jesús vechín co anto soji ná joachjaon conohe ngain ansén.

³⁴ Cottimeja Jesús joanchiangui co ndačo:

—¿Ttinó cjoavá ra Lázaro?

Co jehe na ndačo na:

—Xacoi soixin, sitsjehe.

³⁵ Co Jesús tsjanga.

³⁶ Cottimeja chojni judío ndačo na:

—Tsjenxin ra, anto joinao xí jihi Lázaro.

³⁷ Pero icanxin de jehe na ndačo na:

—Xí jihi tti chjé jmacon tti xí que vaguiconha, ¿co jai, axonhi ná cosa nchao rrojinchehe xa para que Lázaro rroguenha?

Are xechon Lázaro

³⁸ Jesús cjan conohe iná joachjaon anto soji, co jehe conchienhe ngain tti jixavá Lázaro ngain ná cueva, co jiji ná xo tti dixinxin na.

³⁹ Jesús ndačo:

—Dinttjian ra xo.

Marta, nchichó jehe tti ndavenhe, ndačo ncha ngain Jesús:

—Pero puede atto xa ixin ochonda nó nchanho que ndavenhe.

⁴⁰ Pero Jesús ndačo:

—¿Andattjoha que si sitticaon nganji na janha, jaha sicon joachaxín Dios?

⁴¹ Cottimeja vinttjian na xo mé. Co Jesús tsjehe para ngajni co ndačo:

—Padre soixin, chjaha gracias ixin coinhi tti janha ndachjan.

⁴² Janha nona que cainxin tiempo ttinhi tti janha ndachjan, pero jai janha rrindačjan jihi para que chojni tehe sicon na que soixin ttinhi tti janha ndachjan nganji, co para que sitticaon na que soixin rroanha na janha.

⁴³ Are joexin ndačo Jesús jihi, jehe ndačo sén:

—¡Lázaro, dachjexin de yá!

⁴⁴ Co jehe tti ndavenhe mé vachje. Ngoixin cuerpoe jisiandangi ná tira de manta que jichiaxin de rá co de rotté, co ngá con jisía iná manta. Jesús ndačo:

—Tonxindanguhe ra co tančjanda ra satsji.

*Quexén xaxaon na para rrotse na Jesús**(Mt. 26.1-5; Mr. 14.1-2; Lc. 22.1-2)*

⁴⁵ Conixin jihí, tsje chojni judío vitticaon na Jesús, tti nijoicao María co vicon na tti joinchehe Jesús.

⁴⁶ Pero icanxin de jehe na cjoí na ngain xifariseo joitsjehe na xa co coequín na xa tti joinchehe Jesús.

⁴⁷ Cottimeja tsje xifariseo, co tsje xidána que vaquetonha ngain icha xidána co cain xí que vechonda joachaxin ngain juzgadoe nihngo xatte xa co vinttendačo xa:

—¿Quehe sinttoho na? Xí jihí atto tsje milagro jinchehe xa.

⁴⁸ Si tsančhanda na xa jañá, cainxin chojni sitticaon na jehe xa, co tsí autoridad romano co sinchexantte ningoa na icha importante conixin nacioan na.

⁴⁹ Pero ná de jehe xa, que vinhi Caifás que jehe mé xidána icha importante tiempo mé, jehe mé ndačo ngain xa:

—Jaha ra xonhi noha ra,

⁵⁰ ¿anoaha ra que icha jian para ixin ján na que senhe jecho nacoaxinxon xí para ixin ngoixin nación, que rroxantte ngoixin nación?

⁵¹ Pero Caifás ndačhoha jihí por ixin jecho, pero ixin jehe vehe xidána icha importante tiempo mé, mexinxin Dios ndačo ngain jehe para que jehe ndačo jañá ixin Jesús ndasenhe para ixin ngoixin nación judía,

⁵² co jeha para ixin jecho nación mé, cai para ixin cainxin chojni que ditticaon Dios ngoixin mundo sinchesayehe na jecho nacoaxinxon Dios.

⁵³ Co de ngain nchanho mé chojni judío que vechonda joachaxin oaxaon na para nasoexon na Jesús.

⁵⁴ Mexinxin Jesús ivačagoha ni ivacjija ngayé chojni judío, mexinxin jehe vačhjexin de ngain regioen Judea co sacjoi ngain ná lugar chian ngagaha jna, ngain ná rajna que dinhi Efraín. Nttiha vittohe jehe conixin cain tti chojni que vacao.

⁵⁵ Tsjeha nchanho vitján para tti quiai que dinhi pascua para ixin chojni judío. Co mexinxin tsje chojni ngain tsje rajna sacjoi na para Jerusalén para joicoroa na saho de quiai mé inchin costumbré jehe na.

⁵⁶ Saho de rroguintteguixinhi na nihngo jehe na cjoé na Jesús, co are ovinttexinhi na nihngo joanchianguihi chó ná na co iná na:

—¿Quehe xaxaon ra? ¿Atsí Jesús ngain quiai jihí ani nahi?

⁵⁷ Xifariseo co cain xidána que vaquetonha ngain icha xidána ocoetonha xa que ixin quexeho chojni nohe quettinó vehe Jesús, que rrondačo chojni mé para que nchao sitse xa Jesús co tsiaxinhi xa.

12*Ná nčí que coinga Jesús aceite**(Mt. 26.6-13; Mr. 14.3-9)*

¹ Incjaon nchanho saho de tti quiai dinhi pascua, Jesús cjoí ngain Betania, tti rajna vehe Lázaro, tti Jesús joinchexechon de ndavenhe.

² Co nttiha nindoha Lázaro joinchexchian na ná comida para ixin Jesús. Marta joanjo tti joine na co Lázaro vehe ngain mesa para joincaho Jesús conixin tti chojni que vacao.

³ Cottimeja María joiaho inchin rioho litro de aceite diconchjian joxon ca que dinhi nardo, co aceite mé anto xajni co anto rentte, co María coinga

aceite mé rotté Jesús. Cottimeja joinchexemanxin conixin xajá. Ngoixin ngaxinhi nchia concaxajni aceite mé.

⁴ Cottimeja nichja Judas Iscariote, xitsihi ná tti vinhi Simón. Judas mé ná de tti tteoy chojni que vacao Jesús co jehe mé tti joindačo para tse na Jesús. Co Judas mé ndačo:

⁵ —¿Quedonda cochjiha aceite jihi? Ixin rentte inchin tsjexin dacha ná tti nchehe xa ngoixin ná nano. Co nchao rrocjenguijnaxin na chojni noa.

⁶ Pero Judas ndačoha jihi ixin jehe ndoa rrojinchenihi chojni noa, jehe ndačo jañá ixin jehe chehe. Co ixin jehe vehe tesorero de tomí cain tti tteoy chojni que vacao Jesús, mexinxin jehe vaqué ttoha tomí que vaganjo na nttiha.

⁷ Mexinxin Jesús ndačo:

—Tančhjanda nthí jihi ixin jehe ncha ojoinchehe ncha jihi para ngain nchanho que janha rroxává na.

⁸ Jaha ra cainxin tiempo sintte chojni noa ngayaha ra, pero janha cainxinha tiempo sarihi ngayaha ra.

Are xaxaon na para narrogoenxon na Lázaro

⁹ Tsje chojni judío conohe na ixin Jesús vehe ngain rajna Betania, co jehe na vintteci na nttiha, pero jeoha Jesús joitsjehe na nttiha, cjoí na para joitsjehe na Lázaro cai, tti joinchexechon Jesús are ndavenhe.

¹⁰ Cottimeja canxion xidána que vaquetonha ngain icha xidána cjoao chó xa para quexén sinttenchehe xa para narrogoenxon xa Lázaro cai,

¹¹ ixin causexin jehe tsje chojni judío vačhjejexin de ngain chojni xa para vitticaon na Jesús.

Are Jesús joigaha ciudad de Jerusalén

(Mt. 21.1-11; Mr. 11.1-11; Lc. 19.28-40)

¹² Tsje chojni odicji Jerusalén para tti quiai que dinhi pascua, co para ndoexin conohe na ixin Jesús siji ngain ciudad mé.

¹³ Mexinxin cončhinji na cajne co joichoexin na Jesús ngatja nttiha, co ndačo na soji:

—¡Gloria para ixin Dios! ¡Anto jian jehe tti joí conixin nombré Dios, co anto jian jehe tti Rey de chojni Israel!

¹⁴ Jesús vittja ná colochó co jehe vetaha va, inchin čo ngain tti jitaxin Palabré Dios:

¹⁵ xaonha jaha, ciudad de Sión;

tsjenxin que joí tti Rey de jaha

jitaha ná colochó.

¹⁶ Ngain momento jihi cain chojni que vacao Jesús coinxinha na cosa jihi, pero después, are Jesús ndavenhe co xechon, cottimeja xaxaon na que cain jihi jitaxin de ixin Jesús, co jañá conhe.

¹⁷ Cain chojni que vintte ngain Jesús are jehe vayé Lázaro de ngain tti vexává co joinchexechon are ndavenhe, cain chojni mé coequin na tti jehe na vicon na.

¹⁸ Mexinxin tsje chojni vačhje na para joiguetanxin na Jesús ngatja nttiha ixin venohe na tti joinchehe Jesús ngain Lázaro.

¹⁹ Cottimeja xifariseo ndache chó xa:

—Tsjenxin ra, chojni ditticaonha na na ján na: cainxin na sattji na ngain jehe.

Canxion chojni griego cjoé na Jesús

20 De ngayehe cainxin chojni que cjoí Jerusalén para joinchesayehe na quíai nttiha, vintte canxion chojni griego que cai vitticaon inchin chojni judío.

21 Chojni griego jihi conchienne na ngain Felipe, tti rajné Betsaida ngain Galilea, co joinchetsenhe na ñao ndačo na:

—Rinaho na que soixin tsjagohna ra Jesús ixin rinaho na rronichjá na.

22 Felipe joindache Andrés, co cayoi na joindache na Jesús.

23 Cottimeja Jesús ndačo:

—Ojoí tiempo que janha, tti Xí que joixin de ngajni, tsosayana.

24 Janha rrindattjo ra ndoa que si ná noanchjan de trigo detsingaha ngataha jinche co ndadenha, jehe noanchjan mé xajeho nacoa noanchjan, pero si noanchjan mé ndasenne, cjan soan anto tsje noanchjan iná.

25 Tti chojni que anto rinao vidé, chojni mé ndasinchetján vida mé, pero tti chojni que rinaoha vidé ngain mundo jihi, chojni mé tsenchjinha vidé para ngain vida naroaxin que xonhi tiempo tsjexin.

26 Si chonja chojni rinao sinchehe xana janha, pero jehe chonda que sitticaon palabrana; co tti janha sarihi, nttiha sehe jehe cai. Tti chojni que sinchehe xana janha, Ndodana sinchesayehe Ndo chojni mé.

Jesús ndačo ixin jehe ndasenne

27 Janha jai atto soji joachjaon tonohé ansenna; ¿quehe rrondačhan janha? Janha rrondačhanha: “Padre, tanchjandaha na janha ngain tti tsona jai.” Ixin para mé joixin janha.

28 Mexinxin janha rrondačhan: “Padre, nttatsanha ñao, nchehe de que cain chojni sinttasayaha.”

Cottimeja coinhi na tté Dios de ngajni que ndačo:

—Janha ojointtaha jamé, co xa sinttaha iná.

29 Co canxion chojni que coinhi nttiha ndačo na que joatte, co icanxin na ndačo na:

—Ná ángel nichjé.

30 Cottimeja Jesús ndačo ngain na:

—Tti jaha ra coinhi ra, yá para ixin jaha ra co nahi para ixin janha.

31 Jai joí nchanho que Dios sinchejuzgá mundo jihi, co jai Dios senguixin de ngain mundo jihi tti ttetonha ngain mundo jai.

32 Co are chojni rrotsín na na janha noi nganito cruz, chojni de cain nación sinao na sitticaon na na janha.

33 Jesús ndačo jihi para que coinxin jehe na quexén senxin jehe.

34 Co chojni ndačo na ngain Jesús:

—Janha na coian tti jitaxin ley que Cristo, tti Dios rrorroanha, chonda que sechon para cainxin tiempo. ¿Quexén ndačoxin jaha que tti Xí que joixin de ngajni chonda que rrotsín na noi nganito cruz? ¿Quensen yá tti Xí que joixin de ngajni?

35 Cottimeja Jesús ndačo ngain na:

—Jai que janha xa rrihi ngayaha jaha ra rročo que xa chonda ra joadingasán jihi, pero jeho para nchion tiempo. Dacji ra jaxon que xa chonda ra joadingasán jihi para que sinttaxaonha ra tti naxin xehe ixin tti chojni que čhi ngain tti naxin xehe noeha na ttinó rridintte na.

36 Ditticaon ni ra janha que janha inchin tti joadingasán jaxon que janha rrihi nganji ra, para que sintte ra chojni joadingasán.

Co are joexin ndačo Jesús cosa jihi, jehe sacjoi co tavemehe na.

Quedonda chojni judío vaguitticaonha na Jesús

³⁷ Masqui Jesús joinchehe anto tsje milagro, co masqui joinchehe milagro mé ngattoxon con jehe na, jehe na vaguitticaonha na jehe

³⁸ ixin chonda que joiconhe jamé ixin profeta Isaías dicjin janhi:

¿Quensen vitticaon joajnana na?

¿Quensen vicon tti joachaxin jie que chonda Dios?

³⁹ Jañá mexinxin ðhoaha vitticaon na, co cai dicjin Isaías janhi:

⁴⁰ Dios joinchechjan jehe na de chejo na ngain joarrixaoen na co de cha ansén na,

para que siconxinha na conixin joarrixaoen na,

ni tsinxinha na jian de ixin cosa jihi,

ni tsiha na nganji na para que janha sinttaxingamá na.

⁴¹ Isaías ndaño cain jihi ixin jehe vicon anto tsje joachaxin que Jesús chonda, co mexinxin jehe vanichja jañá de ixin Jesús.

⁴² Masqui jañá jitaxin, pero tsje chojni judío vitticaon na Jesús hasta icanxin de jehe na tti ni icha vaquetonha. Pero jehe na vandacheha na icha chojni ixin vitticaon na Jesús ixin vañaon na que xifariseo senguixin na xa de ngain nihngo.

⁴³ Jehe na icha joinao na tti jian que nichja chojni de ixin jehe na pero xaxaonha na de queñén sinchehe na para que Dios rroxxaon jian de ixin jehe na.

Palabré Jesús sinchejuzgá ngain chojni

⁴⁴ Jesús nichja sén co ndaño:

—Tti chojni que ditticaon na janha, jeoha nganji na ditticaon, cai ditticaon ngain Ndodana que rroanha na.

⁴⁵ Co tti chojni que dicon na janha, cai chojni mé inchin jehe rroguicon tti rroanha na janha.

⁴⁶ Janha que inchin tti joadingasán joihi ngataha nontte para que cain chojni que ditticaon na janha sittoeha na ngain tti naxin xehe.

⁴⁷ Pero si canxion na ttinhi na palabrana co ncheha na caso, jeha janha tti sinttastigá na ixin janha joiha para sinttastigá chojni ngain mundo jihi; janha joihi para que tsjenguijna na para que rrochondaha na castigo de cain cosa jianha que nchehe na.

⁴⁸ Are ndatsjexin mundo tti ndoa que janha ndačhjan, mé tti sinchecastigá tti chojni que rinaoha na janha co ncheha caso palabrana.

⁴⁹ Jamé ixin janha nichjaha inchin janho rinaho; Ndodana que rroanha na, Ndo mé Ndo ttetonna tti janha rrondačhjan co tti janha tsjagoa chojni.

⁵⁰ Co nona que tti ttetonha Ndodana, mé para vida naroaxin que xonhi tiempo tsjexin. Jañá mexinxin tti janha ndačhjan, ndačhjan inchin Ndodana coetonna.

13

Jesús joinchetsinda rotté cain chojni que vacao

¹ Ná nchanho saho de tti quiai dinhi pascua Jesús ovenohe que ojitonchian tiempo que jehe satsjixin de ngataha nontte nttihi co satsji para ngain Ndodé. Jehe cainxin tiempo joinao chojni jehe nttihi ngataha nontte, co nchanho mé jehe cjoagoe na que jehe anto rinao na.

²⁻⁴ Inchínji joinchexxaon Judas Iscariote, xitsihi ná tti vinhi Simón, para que jehe xaxaon queñén sinchehe para sicjagoe chojni que ningaconhe Jesús ttinó jí Jesús para rrotse na. Jesús ovenohe que jehe joixin de ngain Dios,

co ixin rrocjan satsji ngain Dios iná, co venohe que jehe Ndodé joanjo Ndo cainxin joachaxin; mexinxin are tejine na, Jesús vingattjen de ngain mesa, co joantsje lonttoe jingá, tti lontto jidattexin co coiixin nttachajnoe conixin ná toalla.

⁵ Cottimeja coequia jinda ná chiavandejachjan co coexinhi joinchetsinda rotté cain chojni que vacao jehe, co joinchexemanxin rotté na conixin tti toalla que jidicaoxin ngain nttachajnoe.

⁶ Co are jehe coexinhi joinchetsinda rotté Simón Pedro, jehe jiji ndačo:

—¿Asoixin sinchetsinda rotnena?

⁷ Jesús ndačo:

—Jai jaha ttinxinha tti rrinttaha janha, pero después jaha tsinxin.

⁸ Pero Pedro ndačo ngain:

—Janha xonhi tiempo rrochjaha joachaxin para sinchetsinda rotnena.

Jesús ndačo ngain:

—Si janha sinttatsindaha rottea, jaha jeha chojnina.

⁹ Simón Pedro ndačo:

—Jeoha rotnena sinchetsinda na remé; cai sinchetsinda rana co jana.

¹⁰ Pero Jesús ndačo ngain:

—Tti chojni que nandá ditsinda irrogondaha rrotsinda icha, jeho rotté ixin ngoixin cuerpoe oroa. Jaha ra oroa ansean ra masqui jeha cainxin ra.

¹¹ Jehe ndačo: “Jeha cainxin ra roa ra”, ixin jehe ovenohe quexehe tti rronache chojni quexén para rrotse na Jesús.

¹² Are joexin joinchetsinda rotté cain na, jehe ejan vengá lonttoe, tti lontto jidattexin, co tavehe ngain mesa iná co ndačo ngain na:

—¿Attinxin jaha ra tti jointtaha janha nganji ra?

¹³ Jaha ra ncheguinha ni ra janha Maestro co tti chonda cain joachaxin para ixin jaha ra, co nchao ndačo ra jañá ixin janha ndoa jañá na.

¹⁴ Janha Maestro na co chonda joachaxin para ixin jaha ra, pero masqui jamé janha jointtatsinda rottea ra, mexinxin cai jaha ra xaxaonha ra ixin anto importante ra; chonda ra que sinchetsindehe chó rottea ra naná ra.

¹⁵ Janha jointtaha jiji para chjaha jaha ra ná ejemplo para que jaha ra sinchehe ra xajeho tti janha jointtaha.

¹⁶ Janha rrindattjo ra ndoa que ni ná tti nchehe xa čhoja rrochonda icha joachaxin que xinajní, co ni ná tti dicao ná joajna čhoja rrochonda icha joachaxin que jehe tti roanha joajna mé.

¹⁷ Si ttinxin ra cosa jiji, co jañá sinchehe ra, jaha ra atto čjoin sintte ra.

¹⁸ Janha rrinichjaha de cainxin jaha ra ixin janha nona quecá ra xo coinchiaha ra. Pero chonda que tsonhe inchin jitaxin Palabré Dios: “Tti chojni que jinequina, mé tti rroningaonna.”

¹⁹ Janha ndattjo jaha ra jiji jai para que are siconhe, jaha ra sitticaon ni ra janha que janha ndoa tti Cristo na inchin ndačhjan.

²⁰ Janha rrindattjo ra ndoa que tti chojni que sayé quexeho chojni que janha rrorroanha, cai chojni mé sayé na janha; co tti chojni que sayé na janha, cai sayé na tti rroanha na.

Jesús ndačo ixin Judas tsjago quexén rrotse na Jesús

(Mt. 26.20-25; Mr. 14.17-21; Lc. 22.21-23)

²¹ Are joexin ndačo Jesús jiji, jehe conohe ngain ansén ná joachjaon anto soji, co ndačo claro:

—Janha rrindattjo ra ndoa que ná de jaha ra tti rronache chojni quexén para rrotse na na janha.

²² Cottimeja cain chojni que vacao Jesús coexinhi na tsjehe chó na pero noeha na quexehe de jehe na tti ndačo Jesús.

²³ Ná de tti tteýo chojni que vacao Jesús, tti Jesús anto joinao, jehe mé tajine ngaca Jesús,

²⁴ co Simón Pedro joinchehe seña ngain mé para que jehe mé sanchiangui ngain Jesús de ixin quensen tti ndačo Jesús.

²⁵ Cottimeja jehe mé icha conchienne ngain Jesús para joanchiangui co ndačo:

—Ndachjenji na soixin quensen mé.

²⁶ Jesús ndačo:

—Janha sinttatjao rioho niottja, co tti rrochjaha nio, jehe mé.

Jamé, joinchetjao rioho niottja co joanjo nio ngain Judas Iscariote, tti xitsihi ná tti vinhj Simón.

²⁷ Co are vayé Judas niottja mé, inchínji joixinhi ngain ansén. Cottimeja Jesús ndačo ngain:

—Tti sinchehe, jaicoa nchehe.

²⁸ Pero ni ná de tti nitejine ngain mesa nttiha coinxinha na ixin quedonda ndačo Jesús yá ngain Judas.

²⁹ Judas tti vehe tesoreroe tti chojni que vacao Jesús, mexinxin canxion na xaxaon na que Jesús ndache yá para que Judas rroquehna choan cosa que rrogonda para ngain quiai, o rroganjo nchin tomi ngain chojni noa.

³⁰ Are joexin vayé Judas niottja mé, jehe vachjexin de nttiha. Co rato mé ottie.

Cosa naroaxin que Jesús coetonha

³¹ Are Judas ovačhje, Jesús ndačo:

—Jai rrožago tti joachaxin que chonda janha, tti Xí que joixin de ngaini, co joachaxín Dios rrožagoxin de ngaini na,

³² ixin si janha, tti Xí que joixin de ngaini, tjago joachaxín Dios, cai Dios tsjago que janha chonda joachaxin, co jehe otoin sinchehe.

³³ Jaha ra inchin xannchinnchinchjanhna co janha ndattjo ra ixin isariha tsje tiempo nganji ra. Jaha ra tsjé ni ra, pero xajeho inchin ndattjan chojni judío rroundatto jaha ra jai: Jaha ra choha tsji ra tti satsji janha.

³⁴ Janha rrittonha jaha ra ná cosa naroaxin jihí: rinao chó ra. Janhi inchin janha rinaho jaha ra, jaha ra chonda ra que sinoa chó ra.

³⁵ Si sinoa chó ra, cainxin chojni ngoixin nontte tsonohe na que jaha ra ndoa ditticaon ni ra janha.

Jesús ndačo que Pedro rrondačo ixin jehe chonxinha Jesús (Mt. 26.31-35; Mr. 14.27-31; Lc. 22.31-34)

³⁶ Simón Pedro joanchianguihi Jesús co ndačo:

—¿Quettinó satsji soixin?

Co Jesús ndačo ngain:

—Tti janha satsji, jaha ichoha rrorroehna jai, pero rrorroehna después.

³⁷ Cottimeja ndačo Pedro ngain:

—¿Quedonda choha rrorroaha soixin jai? Janha nchao sanjo vidana para ixin soixin.

³⁸ Jesús ndačo ngain:

—¿Aco ndoa jaha sanjo vidá para ixin janha? Janha rrindattjo ndoa que saho de rrotsje conttaxichia, jaha orrondačo ninxin nttiha que chonxinha na janha.

14

Jesús ndačo ixin jehe tti nttiha para ngain Ndodé

¹ Taha ra joachjaon. Ditticaon ra ngain Dios co ditticaon ni ra janha cai.

² Ngain lugar tti jí Ndodana jí tsje lugar para sintte ni. Co si rrocjiha jamé, janha orrondattjo ra. Mexinxin janha tsji para siguinchiá ná lugar tti sintte ra.

³ Co are onchao sehe cain cosa, janha sihi iná para sirroaha ra co satsjin na nttiha para que sintte ra xajeho lugar tti janha sarihi.

⁴ Jaha ra chonxin ra ttinó satsji janha co cai ochonxin ra quexehe nttiha.

⁵ Tomás ndačo ngain Jesús:

—Chonxinha na quettinó satsji soixin, mexinxin ¿quexén rrochonxinxin na nttiha?

⁶ Jesús ndačo ngain:

—Janha tti nttiha na, co janha tti tjago tti ndoa, co janha tti danjo iná vida nroaxin. Jeho de ixin janha nchao sijixin cain chojni ngain Ndodana.

⁷ Si jaha ra ochonxin ni ra janha, cai ochonxin ra Ndodana. Co ochonxin ra Ndo desde jai ixin jaha ra ovicon ra Ndo.

⁸ Cottimeja Felipe ndačo ngain Jesús:

—Chjana ra joachaxin sicon na Ndodá na; conixin maho janha na anto rochahna na.

⁹ Jesús ndačo ngain:

—Felipe, ochonda anto tsje tiempo que janha rrihi nganji ra, ¿aco xa chonxinha na? Tti chojni que dicon na janha, cai jehe dicon Ndodana. ¿Quedonda ndachjenji na ixin rrochjaha joachaxin para sicon Ndodá na?

¹⁰ ¿Aditticaonha que janha rrihi ngain Ndodá na co jehe Ndo jí Ndo nganji na? Cain cosa que rrindattjo ra, rrindattjoha ra inchin janho rinaho; Ndodana que jí nganji, jehe Ndo nchehe Ndo tti jehe Ndo rinao Ndo.

¹¹ Ditticaon ni ra que janha rrihi ngain Ndodana co jehe Ndo jí Ndo nganji na, pero si nahi, jehó ditticaon ni ra ixin janha nttaha tsje cosa jian.

¹² Janha rrindattjo ra ndoa que tti chojni que ditticaon nganji na janha, cai sinchehe cain cosa que janha nttaha, co sinchehe cosa icha jian ixin janha satsji tti jí Ndodana.

¹³ Co cain tti joatosenhe ñao ra que jaha ra sanchia ra conixin joachaxín nombrena, janha rrochjaha ra para que Ndodana tsosayehe Ndo de ixin janha tti Xenhe Ndo.

¹⁴ Janha sinttaha quexehe cosa que jaha ra sanchia ra conixin joachaxín nombrena.

Jesús ndačo ixin jehe rrorroanha Espíritu Santo

¹⁵ Si jaha ra rinao ni ra janha, ditticaon ra tti janha rritetonha ra.

¹⁶ Co janha sinttatsán ñao Ndodana que rrorroanha ra Ndo iná tti tsjengui-na ra co sehe para cainxin tiempo nganji ra:

¹⁷ Mé tti Espíritu Santo que tsjagoha ra tti ndoa de ixin Dios. Tti chojni que icha ncheçoxinhi cosa de ngataha nontte jiji, chojni mé choha sayé Espíritu jiji ixin ni diconha na co ni chonxinha na de ixin Espíritu jiji. Pero jaha ra chonxin ra de ixin Espíritu jiji ixin jehe Espíritu jiji jí nganji ra, co sittohe ngaxinhi jaha ra para cainxin tiempo.

¹⁸ Janha tsinttoaha ra jaho ra, rrocjan na para sarihi nganji ra.

¹⁹ Iseha para que cain chojni isiconha na na janha, pero jaha ra sicon ni ra janha. Co jaha ra sinttechon ra ixin janha rrichon.

²⁰ Ngain nchanho mé jaha ra tsonoha ra que janha rrihi ngain Ndodana, co jaha ra te ra nganji janha, co janha rrihi nganji ra.

²¹ Tti chojni que nohe co ditticaon tti janha ttonha, jehe tjago que ndoa rinao na. Co Ndodana sinao Ndo tti chojni que sinao na janha, co cai janha sinaho jehe na co rroŋago na ngain na.

²² Iná Judas, jeha tti Iscariote, jehe mé ndaŋho:

—¿Quedonda rroŋago nganji janha na co nahi ngain chojni que icha ncheŋoxinhi cosa de ngataha nontte?

²³ Jesús ndaŋho ngain:

—Tti chojni que rinao na janha, jehe nchehe caso tti ndaŋhjan janha, co Ndodana sinao Ndo jehe, co Ndodana co janha sihi na sintte na ngain jehe chojni mé.

²⁴ Tti chojni que rinaoha na janha, jehe ncheha caso tti janha ndaŋhjan. Tti joajna que jaha ra tettinhi ra jeha joajnana janha, mé joajné Ndodana que rroanha na.

²⁵ Janha rrindattjo ra cain jiji jaxon que ŋa rrihi nganji ra,

²⁶ pero janha rrodattjan Ndodana co jehe Ndo rrorroanha Ndo Espiritu Santo para que tsjenguijna jaha ra co santsjaha ra joachjaon. Jehe mé tti tsjagoha ra cain tti ndoa, co sinttaŋaxaon ra cainxin tti janha ndattjo ra.

²⁷ Jai que chiaon tiempo para janha satsjixin de nganji jaha ra, janha danjo nganji ra tti ŋjoin que tsonhe ansean ra. Pero mé jeha inŋin tonhe ansén chojni que ncheŋoxinhi cosa jianha de ngataha mundo jiji. Mexinxin taha ra joachjaon ni ŋaonha ra.

²⁸ Jaha ra ocoinna ra tti ndaŋhjan que janha satsji, co rrocjan na sihi para sarihi nganji ra iná. Si ndoa rinao ni ra, chonda que chaha ra are conoha ra que janha satsji ngain Ndodana ixin jehe Ndo chonda Ndo icha joachxin que janha.

²⁹ Janha rrindattjo ra jiji jaxon para que are siconhe, cottimeja sitticaon ra.

³⁰ Ironichjaha icha nganji ra ixin ojoí tti ttonhe cain chojni que icha ncheŋoxinhi cosa de ngataha nontte jiji. Masqui jehe chondaha ni ná joachxin para ixin janha.

³¹ Pero tti tsonhe jiji chonda que tsonhe para que chojni ngoixin mundo tsonhe na que janha rinaho Ndodana co janha nttaha cainxin tti jehe Ndo coetonna Ndo. Dingattjen ra co sachjinxin na de nttihi.

15

Jesús inŋin nttauva

¹ Janha inŋin tti mero maté nttauva, co Ndodana inŋin tti jinda nttta.

² Cainxin chojni que ditticaon na janha, jehe inŋin rama que danjo ttochjoin. Pero tti chojni que ncheha inŋin rinao Ndodana, chojni mé inŋin tti rama que danjoha ttochjoin. Mexinxin Ndodana dantsjenda Ndo chojni mé inŋin nchehe tti jinda nttauva tonŋinji rama que danjoha ttochjoin. Pero cain chojnina que nchehe inŋin rinao Ndodana, jehe Ndo dinttjian Ndo cain cosa jianha de ngain chojni mé inŋin nchehe tti jinda nttauva damehe co ncheroa cain rama que danjo ttochjoin para que sanjo rama mé icha ttochjoin.

³ Jaha ra oroa ra de ixin tti janha jointtacoanha ra.

⁴ Cainxin ra dintte ra nganji na inŋin janha rrihi nganji jaha ra. ŋajeho inŋin ná ramé nttá ŋoha sinchehjian rama mé ttochjoin si jehe rama mé

jitsexinha ngain mero nttá jieto, jamé jaha ra cai choha sitticaon ra tti janha tetonha ra si jaha ra sintteha ra nganji na.

⁵ Janha tti nttattochjoin na, co jaha ra rama ra. Tti sehe nganji janha co janha sarihi ngain jehe, jehe sanjo atto tsje ttochjoin, pero jaha ra xonhi sinchehe ra si janha coha na nganji ra.

⁶ Tti seha nganji na, mé inchin cain nttarama xonhi xé que dinttji co ndaxema. Co ttjejo na rama mé co tsjaga na ngain xohi.

⁷ Si jaha ra sinchehe ra sigue sintte ra nganji na, co rrotjañaha ra tti janha jointtacoanha ra, danchia ra tti sinao ra, co sayehe ra.

⁸ Ndodana tsosayehe Ndo are jaha ra sinchehe ra jian co mé inchin tti anto tsje ttochjoin que sanjo ra, co jañá sintte ra chojni que ndoa ditticaon na janha.

⁹ Janha rinaho jaha ra, jañá inchin Ndodana rinao na janha; jañá nchehe ra sigue cosa jian para que janha sinaho ra.

¹⁰ Si ditticaon ra tti janha ttetonha ra, janha sinttaha sigue sinaho ra, jañá inchin janha ditticanho tti ttetonna Ndodana co jehe Ndo nchehe Ndo sigue rinao na Ndo.

¹¹ Janha nichja nganji ra jañá para que rrochaha ra jaha ra inchin janha chahna co jañá cainxin ra anto rrochaha ra.

¹² Tti janha ttetonha ra janhi sinchehe ra: que sinao chó ra inchin janha rinaho jaha ra.

¹³ xonhi iná cosa icha jie sinchehe ni para tsjagoxin ni que ndoa rinao chó ni. Jeho hasta jehe ni sanjo ni cuerpoe ni para ndasenhe para ixin xiamigoe ni.

¹⁴ Jaha ra tti xiamigona si sinchehe ra sigue ngain tti janha ttetonha ra.

¹⁵ Isinttaguinha ra ninchehe xana ixin tti nchehe xa noeha quehe nchehe xinajni. Jaha ra nttaguinhi ra amigona ixin jointtagatsoan ra cainxin tti ndachjenji na Ndodana.

¹⁶ Jeha jaha ra coinchiene ni ra janha, sino que janha tti coinchiaha jaha ra, co coetonha ra que ttji ra co ndache ra tsje chojni palabrana, co cain chojni que sitticaon palabrana, mé tti tsje ttochjoin que jaha ra sanjo ra, co cain ttochjoin mé tsonchjenhe tto. Co jamé Ndodana rrochjá ra Ndo cain tti sanchiehe ra Ndo conixin joachaxín nombrena.

¹⁷ Janha rritetonha ra que nchehe ra sigue rinao chó ra.

Chojni ningaconhe na Jesús conixin chojni jehe

¹⁸ Si chojni que icha nchexoxinhi cosa de ngataha nontte rroningaconha jaha ra, noha ra que janha tti saho joiningaonna na.

¹⁹ Si jaha ra rrocji ra inchin jehe na co rrojnttaxoxinha ra cosa inchin jehe na nchexoxinhi na, jehe nimé rrojinao ra na inchin jehe na rinao na chojni na. Pero janha coinchiaha jaha ra de ngayé chojni mé, co mexinxin chojni mé ningaconha ra na ixin jaha ra incheha ra inchin jehe na.

²⁰ xaxaon ra janha ndattjo ra: “Ni ná tti nchehe xa choha chonda icha joachaxin que xinajni.” Si janha ningaonna tsje chojni, cai jaha ra rroningaconha ra na. Co si jehe na vitticaon na tti janha jointtacoán na, cai sitticaon na tti jaha ra sinchecoene ra na.

²¹ Cain jiji sinchehe na nganji ra ixin causananxin janha ixin jehe na chonxinha na de ixin tti rroanha na janha.

²² Si janha rrojiaha rronichjá na, jehe na rroquinttecaha na cosa jianha que nchehe na. Pero jai jehe na teca na cainxin tti jianha que nchehe na,

²³ ixin tti chojni que ningaonna, cai ningaconhe na Ndodana.

²⁴ Si janha xonhi tiempo rrojinttaha ngayé na lo que ni iná chojni çhoha nchehe, jehe na rroguinttecaha na cosa jianha que nchehe na. Pero jehe na ovicon na cain cosa jihi, co masqui jointtaha cain jihi, jehe na ningaconna na co ningaconhe na Ndodana cai.

²⁵ Pero jihi conhe ixin chonda que conhe palabra que jitaxin ngain ley que jehe na chonda na. Co ley jitaxin janhi: “Jehe na joiningaconna na co janha xonhi jianha jointtaha.”

²⁶ Pero tsí tti ttjenguijna ni. Co jehe mé tti Espíritu Santo que joixin de ngain Ndodana co jehe mé tti janha rrorroanha nganji ra. Co jehe Espíritu mé nichja joxon cosa ndoa co jehe rronichja de ixin janha.

²⁷ Co cai jaha ra rronichja ra de ixin janha ixin vintte ra nganji na desde are nacoexianxon ndattjan chojni de ixin quehe rinao Ndodana.

16

¹ Janha rrindattjo ra cain cosa jihi para que are anto tangui tsonha ra, jaha ra tsinttoeha ra de sitticaon ni ra.

² Jehe na senguixin ra na de ngain nihngo. Co sinqué momento de que quexeho de jehe na nasoenxon ra na co jehe na rroxaxaon na que jamé jiquinixin para ixin Dios.

³ Jehe jihi sinchehe na ixin jehe na xonhi tiempo ditticaon na ni Ndodana ni janha.

⁴ Janha rrindattjo ra cain jihi para que are tsí rato mé, jaha ra rroxaxaon ra que janha ondattjo ra.

Tti nchehe Espíritu Santo

¹ Janha ndattjoha ra cain jihi desde are saho ixin janha joarihi nganji ra.

⁵ Pero jai janha satsji sigarihi ngain tti rroanha na, co ni ná de jaha ra tedanchianguinaha ra ixin ttinó satsji.

⁶ Puede ixin anto vinttechinhi ra ixin ndattjo ra cain cosa jihi.

⁷ Pero rrindattjo ra ndoa que icha jian para ixin jaha ra janha satsji. Ixin si janha satsjiha, tsiha Espíritu Santo para sehe nganji ra, mé tti tsjenguijna ra co santsjehe joachjaon ansean ra. Pero si janha satsji, janha rrorroanha jehe mé.

⁸ Are jehe tsí, jehe sincheguitticaon chojni de ngataha nontte jihi que jehe na nchehe na jianha, co jehe sinchenohe chojni ixin jehe na chonda que sinchehe na jian, co jehe sinchenohe na que ixin Dios sinchejuzguehe na.

⁹ Jehe sincheguitticaon na que nchehe na jianha ixin ditticaonha na na janha.

¹⁰ Jehe sinchenohe na ixin chonda na que sinchehe na jian ixin janha satsji tti jí Ndodana, co jaha ra isiconha ni ra.

¹¹ Co jehe sinchenohe na ixin Dios sinchejuzguehe na ixin ogoan conedado tti ttetonha ngain cain cosa jianha de mundo jihi.

¹² Janha chonda atto tsje que rinao rrondattjo ra, pero jaha ra çhoha tsinxin ra jai.

¹³ Are tsí Espíritu Santo, tti nichja ndoa, jehe tsjagoha ra cainxin tti ndoa ixin jehe rronichjaha inchin jeha rinao, jehe rrondaçho cainxin tti jehe ttinhi ngain Ndodana, co jehe sinttanoaha ra cosa que siconhe.

¹⁴ Jehe sinchesayana janha ixin jehe sayé tti ndoa de ixin janha co jehe sinttagatsoan ra.

¹⁵ Cainxin tti chonda Ndodana cai para ixin janha, mexinxin janha ndaçhjan que Espíritu Santo sayé tti ndoa de ixin janha co jehe sinttagatsoan ra.

Jesús ndacho ixin jehe na tsa na joachjaon pero seha

¹⁶ 'Iseha, jaha ra isiconha ni ra, pero nchion icha después jaha ra rrocjan ra sicon ni ra. Co después janha satsji tti jí Ndodana.

¹⁷ Cottimeja canxion de tti chojni que vacao Jesús joanchianguihi chó na co ndacho na:

—¿Quehe rrocho jiji? Jehe ndattjo na que iseha ján na isoconha na jehe, co nchion icha después rrocjan socon na jehe iná, co ixin después jehe satsji tti jí Ndodé.

¹⁸ ¿Quehe rrocho yá “iseha”? Já n na ttinxinha na quehe rrocho tti jehe ndacho.

¹⁹ Jesús conohe que jehe na rinao na sanchiangui na ngain jehe, co jehe ndacho ngain na:

—Janha ndattjo ra que iseha jaha ra isiconha ni ra, co nchion icha después jaha ra rrocjan ra sicon ni ra iná. ¿Ajehe jiji tti tedanchianguihi chó ra?

²⁰ Janha rrindattjo ra ndoa que jaha ra rrotsjanga ra co sinttechinhi ra, pero chojni de ngataha nontte que ditticaonha na janha, jehe nimé rroché na. Pero masqui jamé, co masqui jaha ra sinttechinhi ra, pero jaha ra rrocjan rrochaha ra iná.

²¹ Are ná nchí sincheconcjihi xenhe, jehe ncha ta ncha joachjaon ixin ojoí hora de que anto tsín ncha, pero are ojoexin toncjihi xenhe ncha, ni ixaxaonha ncha de ixin anto coín ncha ixin anto ché ncha ixin joincheconcjihi ncha ná chjan.

²² Jañá jaha ra cai, ta ra joachjaon jai, pero janha rrocjan na sicon ni ra, cottimeja ansean ra anto rroché co ixonhi iná chojni nchao santsjaha ra tti rroché ansean ra.

²³ Ngain nchanho mé ixonhi joatotsenhe ñao saqué ra nganji na. Janha rrindattjo ra ndoa que Ndodana rrochjá ra Ndo cainxin tti jaha ra sanchiehe ra Ndo conixin joachaxín nombrena.

²⁴ Hasta jaxon jaha ra xa xonhi danchia ra conixin joachaxín nombrena; danchia ra co sayehe ra para que anto rroché ansean ra.

Jesucristo coixinhi ngain cain cosa jianha de ngataha nontte

²⁵ Janha ndattjo ra cain cosa jiji conixin ejemplo, pero tsí hora que janha irrondattjoha ra conixin ejemplo, janha rrondattjo ra claro de ixin Ndodana.

²⁶ Ngain nchanho mé jaha ra sinchetsenhe ra ñao Ndo conixin joachaxín nombrena, co janha rrindačhjanha ixin janha tti sinttatsán ñao Ndo para ixin jaha ra

²⁷ ixin jehe Ndo mero rinao ra Ndo. Jehe Ndo rinao ra Ndo ixin jaha ra rinao ni ra janha, co ditticaon ra ixin janha joixin de ngain jehe Ndo.

²⁸ Janha vačhjexin de ngattoxon con jehe Ndo para que janha joihi ngataha nontte jiji, pero jai tsinttoa nontte jiji para sarrocjan na ngain Ndo.

²⁹ Cottimeja cain chojni que vacao Jesús ndacho na:

—Janché, soixin rrinichja claro, co irrinchegondaha ni ná ejemplo.

³⁰ Janché, ttianxin na que soixin noha cainxin cosa, co rrogondaha para iná chojni sanchiangui nganji soixin ixin soixin chonxin quehe rronichja ni icha saho que jehe ni rronichja ni. De ixin jiji janha na ditticanho na que soixin joixin de ngain Dios.

³¹ Jesús ndacho ngain na:

—Jai ditticaon ra.

³² Jai ojoí tiempo co xajeho jai jaha ra rrochjequehe ra. Co satsji ra tti jaha ra sino ra, co tsinttona ra janho. Pero jaonha rrihi ixin jehe Ndo ttjen Ndo nganji na.

³³ Janha rrandattjo ra cain jihi para que tchjoin tsonohe ansean ra ixin te ra nganji na. Ngataha nontte jihi chonda que anto tangui tsonha ra, pero xaonha ra ixin janha coixinna ngain cainxin cosa de ngataha nontte jihi.

17

Jesús joinchetsenhe ñao Dios para ixin chojni que ditticaon

¹ Are joexin ndacho Jesús cain cosa jihi, jehe tsjehe para ngajni co ndacho: —Padre, horana ojoí hora. Nchesayehe Xanha para que jehe Xan cai sinttasayaha Xan soixin.

² Soixin chjehe Xanha joachaxin para ngain cain chojni, para que jehe Xan joanjo Xan iná vida naroaxin ngain tti chojni que soixin joanjo ngain Xan.

³ Co vida mé rrocho que jehe na rrochonxin na de ixin soixin, tti nacoaxinxon Dios ndoa, conixin Jesucristo, tti soixin rroanha.

⁴ Janha jointtasayaha soixin nntihi ngataha nontte, co ojoena jointtaha tti soixin coetonna.

⁵ Co jai soixin nchesayana ngattoxon con soixin xajeho inchin joinch-esayana icha saho de que nontte vehe.

⁶ Tti chojni que soixin coinchiehe de ngayehe icha chojni ngataha nontte para chjana na janha, janha jointtanoa na quensen soixin. Chojni mé chojnia soixin, co soixin chjana na janha, co jehe na vitticaon na joajná soixin.

⁷ Co jai jehe na nohe na que cainxin tti chjana soixin joixin de nganji soixin.

⁸ Janha chjaha na tti joajna que soixin chjana, co jehe na vayé na joajna mé. Jehe na conohe na ndoa que janha joixin de nganji soixin, co vitticaon na que soixin rroanha na.

⁹ Janha nttatsanha ñao para ixin jehe na; janha jeha nttatsanha ñao para ixin tti chojni que icha ncheXoxinhi cosa de ngataha nontte, janha nttatsanha ñao para ixin tti chojni que soixin chjana ixin chojni mé chojnia soixin.

¹⁰ Cainxin chojni que janha chonda, mé chojnia soixin, co cain chojni que soixin chonda, mé chojnina, co joachaxinna tononxin de ngain jehe na.

¹¹ Janha isittonaha nntihi ngataha nontte ixin janha sasaso para sarihi nganji soixin, pero jehe na sittohe na nntihi ngataha nontte. Soixin que anto jian, darinda conixin joachaxian tti chojni que soixin chjana na para que jehe na ngoixin tiempo sintte na unido inchin soixin co janha.

¹² Are janha joarihi ngain jehe na ngataha nontte jihi, janha joarinda cain tti chojni que soixin chjana conixin joachaxian soixin, co joarinda na jian. Ni ná de jehe na vitjanha na, jeha vitján tti jiquininxin vitján para que tsonhe tti ndacho ngain tti jitaxin Palabrá soixin.

¹³ Jai janha osaso tti ttjen soixin. Co rrandachjan cain cosa jihi jaxon que xa rrihi ngataha nontte jihi para que jehe na xajeho rroché na inchin janha chahna.

¹⁴ Janha chjana na joajná soixin, pero chojni que icha rinao jeha cosa de ngataha nontte toñao na ngain chojnina ixin chojnina rinaoha na jeha cosa de ngataha nontte inchin janha cai rinaoha jeha cosa de ngataha nontte.

¹⁵ Janha jeha rrinttatsanha ñao soixin que santsjexin jehe na de ngataha nontte jihi, jeha rrinttatsanha ñao ixin tančhchandaha jehe na ngain inchínji.

¹⁶ Jañá inchin janha rinaoha jeho cosa ngataha nontte, jamé jehe na cai rinaoha na jeho cosa de ngataha nontte.

¹⁷ Dantsjenda jehe na de ngain cain cosa jianha co nchecoenhe na tti ndoa; tti joajná soixin, mé tti ndoa.

¹⁸ Inchin rroanha na janha ngayé tti chojni de ngataha nontte, jamé janha cai rrorroanha jehe na ngayé tti chojni de ngataha nontte.

¹⁹ Janha rrinttaha jeho inchin soixin rinao para que jehe na cai sinchehe na jeho inchin soixin rinao, co sinchehe na mé ixin chonxin na tti ndoa.

²⁰ Pero joatotsenhe ñao jihi jeha para jeho jehe na, cai para ixin cain chojni que sitticaon na después, are chojni mé tsinhi na tti joajna que chojni tehe sicao.

²¹ Janha danchia nganji soixin que cainxin jehe na sintte na inchin nacoa chojni, inchin soixin ttjen nganji na co janha rrihi nganji soixin, que jehe na sintte na nganji ján na para que tti chojni de ngataha nontte sitticaon na que soixin rroanha na janha.

²² Janha jointtasayá jehe na inchin soixin nchesayana janha para que jehe na sintte na inchin nacoa chojni, jañá inchin soixin co janha xajeho nacoa na.

²³ Janha ngain jehe na, co soixin nganji na para que jehe na sintte na mero ndoa nacoaxinxon na, co jamé chojni de ngataha nontte tsonohe na que soixin rroanha na janha, co soixin anto rinao jehe na inchin rinao na janha.

²⁴ Padre, soixin tti chjana jehe na co rinaho que jehe na sintte na nganji na tti janha sarihi para que jehe na sicon na que xén soixin nchesayana janha ixin soixin joinao na desde icha saho que vehe nontte.

²⁵ Padre soixin que anto jian, tti chojni que icha nche xoxinhi cosa de ngataha nontte chonxinha na de ngain ansean soixin, pero janha chonxin, co chojni tehe onoho na que soixin rroanha na janha.

²⁶ Janha jointtagatsoan jehe na quensen soixin, co xa sinttaha sigue sinttagatsoan jehe na de ixin soixin para que jehe na rrochonxin na ixin soixin rinao na jehe na xajeho inchin rinao na janha, co para que janha mero sarihi ngain jehe na.

18

Are tse na Jesús

(Mt. 26.47-56; Mr. 14.43-50; Lc. 22.47-53)

¹ Are joexin ndacho Jesús cain cosa jihi, jehe conixin chojni que vacao vachjexin na de nttiha para sacjoi na toenixn ná tsaga que dinhi Cedrón. Nttiha vehe ná huerta, tti joigaha Jesús conixin chojni que vacao.

² Cai Judas, tti joindacho para tse na Jesús, jehe vechonxin ngain lugar mé ixin tsje nttiha Jesús conixin jehe cjoí na ngain lugar mé conixin cain icha chojni que vacao Jesús.

³ Co Judas cjoí nttiha conixin anto tsje xisoldado conixin icanxin xipolicié nihngo icha importante que vintterroanha xifariseo co xidána que vaquetonha ngain icha xidána. Cjoí na nttiha conixin nttá co joicao na canxion cosa inchin candil para joinchengasanxin na, co icanxin na joicao na jeho nttá conixin mecha ngain con nttá.

⁴⁻⁵ Co Judas, tti joindacho para tse na Jesús, nttiha joí ngayehe na cai. Pero Jesús ovenohe cain tti jehe tsonhe, mexinxin jehe vachjeyé co ndacho ngain na:

—¿Quensen tettjé ra?

Jehe na ndacho na ngain:

—Jesús de Nazaret.

Jesús ndaicho ngain na:

—Mé, janha.

⁶ Co are Jesús ndaicho: “Mé, janha”, jehe na vintteguixinto na co hasta vintteguittji na ngataha nontte.

⁷ Cottimeja Jesús cjan joanchianguihi na ndaicho:

—¿Quensen tettjé ra?

Co jehe na ndaicho na:

—Jesús de Nazaret.

⁸ Cottimeja Jesús ndaicho ngain na:

—Ondattjo ra que janha. Si tettjé ni ra janha, tančhanda ra chojni tehe satsji na.

⁹ Jihi joiconhe inchin ndaicho Jesús: “De tti chojni que jehe Ndo chjana Ndo, ni ná na vitjanha na.”

¹⁰ Cottimeja Simón Pedro vechonda ná espada, co jehe joantsje espada mé co cončhinjihi ndatsjoen lado jian ná tti vinhi Malco, mé ná tti nchehe xé xidána icha importante.

¹¹ Pero Jesús ndaicho ngain Pedro:

—Cjan ttín espada lugué espada. Si Ndodana ndaicho Ndo que janha anto tangui tsonna jaxon, mexinxin janha chonda que tsonna.

Jesús ngain Anás

(Mt. 26.57-58; Mr. 14.53-54; Lc. 22.54)

¹² Cottimeja cain xisoldado que cjoí conixin xicomandanté xa co xipolicie chojni judío, cain nimé tse na Jesús co coia na.

¹³ Cottimeja sajoicao na Jesús para ngain nchiandoha Anás. Anás mé icha saho cjoí tti dána icha importante, co mé ndonché Caifás, tti dána icha importante tiempo mé.

¹⁴ Caifás jihi tti ndaicho ngain chojni judío que icha jian para ixin jehe na si senhe nacoa xí para ngoixin nación.

Pedro ndaicho ixin jehe chonxinha Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro co iná de tti chojni que vacao Jesús terroé na Jesús. Co jehe Anás, tti cjoí dána icha importante are icha saho, jehe mé vechonxin tti iná chojni que joicao Simón Pedro. Mexinxin joixinhi jehe chojni mé conixin Jesús ngain patioe nchiandoha jehe Anás.

¹⁶ Pero Pedro ndavittohe ndojaxin de puerté patio mé. Mexinxin vačhje tti iná chojni mé co nichjé tti nčhí que jinda puerta ntilha para xanxinhi ncha Pedro.

¹⁷ Cottimeja jehe tti nčhí mé joanchianguihi ncha Pedro, co ndaicho ncha:

—¿Ajeha jaha ná de tti chojni que xicao xí jiha?

Pedro ndaicho:

—Nahi, jeha janha.

¹⁸ Ixin rato mé anto quin, mexinxin canxion xinchehe xé Anás co xipolicie nihngo dicjaga xa xohi, co ntilha tatengattjen xa texixöhe xa. Pedro cai ntilha jixixöhe ngayé xa ngaca xohi mé.

Anás joanchianguihi Jesús

(Mt. 26.59-66; Mr. 14.55-64; Lc. 22.66-71)

¹⁹ Jehe Anás coexinhí joanchianguihi Jesús ixin quecá chojni vacao Jesús co quehe vanchecoenhe Jesús chojni.

²⁰ Jesús ndaicho:

—Janha ndaichjan ngayé chojni ngoixin mundo. Janha cainxin tiempo jointtacoán chojni ngain icha nihngo co ngain nihngo icha importante, tti xatte cainxin chojni judío, jañá janha jeha jimao ndaichjan.

²¹ ¿Quedonda danchianguina janha? Danchianguihí cain tti chojni que coinhi tti janha ndaichjan, co jehe na rrondaicho na de ixin quehe ndattjan na. Jehe na nohe na tti janha ndaichjan.

²² Are Jesús ndaicho jihí, ná de tti xipolicié nihngo icha importante que te nttiha xanguí xa Jesús ná manazo rroha Jesús co ndaicho xa ngain:

—¿Ajañá ndache tti dána icha importante?

²³ Jesús ndaicho ngain xa:

—Si ndaichjan ná cosa que jí jianha, jaha ndaicho que xenxin jixin jianha; pero si tti ndaichjan janha jí jian, ¿quedonda donhe na?

²⁴ Cottimeja Anás rroanha Jesús ngain Caifás, tti dána icha importante tiempo mé. Co xa vechia Jesús.

Pedro ndaicho iná ixin jehe chonxinha Jesús

(Mt. 26.71-75; Mr. 14.66-72; Lc. 22.58-62)

²⁵ De cainxin mé, Pedro xa tajingattjen jixixöhe ngandehe xohi, co joanchianguihí na co ndaicho na ngain:

—¿Ajeha jaha ná de tti chojni que xicao xí jiha?

Co Pedro ndaichoha ixin ján, jehe ndaicho:

—Nahí, jeha janha.

²⁶ Cottimeja ná de tti nchehe xé Anás, jehe tti nchehe xa mé xa ichó tti xí que Pedro conchinjhi ndatsjoen, jehe tti nchehe xa mé ndaicho ngain Pedro:

—¿Apoco viconha janha jaha conixin jehe xí yá are ngagaha ntattochjoin?

²⁷ Pedro ndaicho iná ixin nahi, co rato mé tsje ná conttaxichia.

Jesús ngain Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Cottimeja sajoicoaxin na Jesús de nchiandoha Caifás para ngain palacioe xigobernador. Co rato mé ocoexinhi vingasán, pero chojni judío joixinha na palacio. Si jehe na rrojixinhi na palacio mé, jehe na rroguinte na roaha inchin costumbre que vinttechonda na co choha rrojine na ngain tti quiai pascua.

²⁹ Mexinxin Pilato vaçhje para nichjé na, co ndaicho ngain na:

—¿De quehe tjanguihi ra xí jihí?

³⁰ Jehe na ndaicho na:

—Si jehe xa jeha ná chojni que nchehe tsje cosa jianha, janha na rro-
jiquianha na xa nganji.

³¹ Cottimeja Pilato ndaicho ngain na:

—Sattjiho ra xa jaha ra, co jaha ra nchejuzguehe ra inchin ttetonha ley que chonda ra.

Chojni judío ndaicho na:

—Pero janha na chojni judío na, co chondaha na joachaxin para na-
soenxon na ni ná chojni.

³² Jañá joiconhe inchin ndaicho Jesús de ixin que xén jehe chonda que senhe.

³³ Pilato cjan joixinhi palacio, co jehe vayé Jesús co joanchianguihí co ndaicho:

—¿Ajaha tti Rey de chojni judío?

³⁴ Jesús ndaicho ngain:

—¿Ajaho xaxaon danchiangui jihi, ni ixin iná chojni ndattjo de ixin jamé na janha?

³⁵ Pilato ndačo:

—¿Apoco janha judío na? Chojni nacioan jaha co xidána que vaquetonha ngain icha xidána, nimé ni joicoho nttihi. ¿Quehe joinchehe?

³⁶ Cottimeja Jesús ndačo:

—Tti janha ttetonha jaha nttihi ngataha nontte. Si rrocji de nttihi, cottimeja cain chojni que vitticaon na janha rroguittoexinha na para que janha rrotse na chojni judío. Pero tti janha ttetonha jaha nttihi.

³⁷ Cottimeja Pilato ndačo:

—¿Ajaha tti rey remé?

Jesús ndačo:

—Ján, janha rey na inchin jaha ndačo. Janha concjina co joihi ngataha nontte jihi para ndačhjan tti ndoa. Cainxin chojni que ditticaon tti ndoa, jehe na ttinhi na tti ndačhjan.

³⁸ Pilato ndačo ngain Jesús:

—¿Quexehe tti ndoa mé?

*Are ndačo na ixin Jesús chonda que ndasenhe
(Mt. 27.15-31; Mr. 15.6-20; Lc. 23.13-25)*

Are joexin joanchiangui Pilato jihi, jehe vačhje iná para nichjé chojni judío co ndačo ngain na:

—Janha xonhi jianha dittjá xí jihi.

³⁹ Pero jaha ra chonda ra costumbre que ttetonna ra ngain quiai pascua para que janha tančhjanda quexeho ná de tti teaxinhi. Mexinxin çarinao ra que janha tsančhjanda satsji tti Rey de ngain chojni judío?

⁴⁰ Cottimeja cainxin na cjan coyao na co ndačo na:

—¡Mé nahi! ¡Icha jian tančhjanda Barrabás!

Co Barrabás jihi jehe ná tti chehe.

19

¹ Cottimeja Pilato coetonha para vicaon Jesús.

² Mexinxin xisoldado coentaha xa já Jesús ná corona de nchaha, co joinchengá xa Jesús ná lontto morado inchin lonttoe ná rey.

³ Cottimeja vintteconchienhe xa ngaca Jesús co cjoanoa xa ndache xa:

—¡Viva tti Rey de chojni judío!

Co xanguí xa manazo ngá con Jesús.

⁴ Cottimeja Pilato cjan vačhje iná, co ndačo ngain na:

—Tsjenxin ra, janha santsje xa nttihi para que sicon ra que janha ni ná cosa jianha dittjaha ngain xa.

⁵ Co vačhje Jesús conixin tti corona de nchaha ngataha já co jingá jehe tti lontto morado. Cottimeja Pilato ndačo ngain na:

—Nttihi jí xa.

⁶ Are vicon xipolicié nihngo icha importante co xidána que vaquetonha ngain icha xidána, vinttecoyao xa co ndačo xa:

—¡Nchecrucificá xa! ¡Nchecrucificá xa!

Pilato ndačo ngain na:

—Sattjiho ra xa co jaha ra nchecrucificá ra xa ixin janha dittjaha ni ná cosa jianha ngain xa.

⁷ Pero chojni judío ndačo na:

—Janha na chonda na ná ley co jitaxin ngain ley mé ixin xí yá chonda que senhe xa ixin ndaño xa que jehe xa Xenhe Dios.

⁸ Are coinhi Pilato jihi, jehe icha xaon.

⁹ Jehe cjan joixinhi palacio, co joanchianguihi Jesús co ndaño:

—¿Queñén dinhi rajná jaha?

Pero Jesús ixonhi ndaño.

¹⁰ Cottimeja Pilato ndaño ngain:

—¿Quedonda tencoa jaha nganji na? ¿Anoaha que janha chonda joachaxin para sinttacrucificá jaha, co janha chonda joachaxin cai para que tsanchjanda satsji jaha?

¹¹ Jesús ndaño ngain Pilato:

—Jaha rrochondaha ni ná joachaxin para ixin janha si Dios rrochjaha joachaxin mé. Mexinxin tti chojni que joiquinha nganji jaha, nimé ni icha tsje jianha teca que jaha.

¹² Ngain rato mé Pilato cjoé queñén rrojinchehe para rrocanchjanda Jesús sarrocji, pero chojni judío coyaotte na co ndaño na:

—¡Si tsanchjanda Jesús satsji, jaha jeha amigoe xiemperador César que ttetonha ngain tsje nación! ¡Quexeho chojni que doan rey, chojni mé jeha amigoe xiemperador!

¹³ Cottimeja Pilato are coinhi jihi, jehe vañhjecaho Jesús para ndoja co jehe Pilato vetaha tti lugar que vinhi tribunal, co ngain nguigoa hebreo lugar mé vinhi Gabata, co rroño lugar que diguittexin xo.

¹⁴ Nchanho mé cjoí víspera de ngain tti nchanho que nchejogaha na are ngain tti quiai pascua. Co mé conhe inchin ngosine nchanho. Cottimeja ndaño Pilato ngain chojni judío:

—¡Ntthi chonda ra tti rey de jaha ra!

¹⁵ Pero jehe na coyao na co ndaño na:

—¡Jehe chonda que ndasenhe! ¡Jehe chonda que ndasenhe! ¡Nchecrucificá! Pilato ndaño ngain na:

—¿Apoco janha sinttacrucificá tti rey de jaha ra?

Pero xidána que vaquetonha ngain icha xidána vinttendaño xa:

—Janha na chondaha na icha rey que jeha xiemperador César que ttetonha ngain tsje nación.

¹⁶ Conixin jeha jihi, Pilato joanjo Jesús ngain jehe na para goan crucificado, co jeha na sajoicoxin na Jesús de ntthi.

Are Jesús goan crucificado

(Mt. 27.32-44; Mr. 15.21-32; Lc. 23.26-43)

¹⁷ Co Jesús de ntthi vañhjaxin coame crué para sajoicao na ngain tti lugar que vancheguinhí na Nttalorjá Chojni, co ngain nguigoa hebreo vinhi Gólgota.

¹⁸ Ntthi joinchecrucificaxin na Jesús, co are joinchecrucificá na Jesús, joinchecrucificá na iyó xí cai, naná xa cada lado, co Jesús vehe ngosine.

¹⁹ Pilato coetonha vehe nganito cruz ná letra que ndaño: “Jesús de Nazaret, Rey de chojni judío.”

²⁰ Co tsje chojni judío tsjehe na letra mé ixin tti lugar que joinchecrucificaxin na Jesús vehe chian ngaca ciudad de Jerusalén co letra mé vetaxin ngain nguigoe hebreo, co griego, co latin.

²¹ Mexinxin xidána que vaquetonha ngain icha xidána de chojni judío vinttendache xa Pilato:

—Ttentaxinha “Rey de chojni judío”; icha jian ttentaxin, “Tti ndačo ixin jehe Rey de chojni judío.”

²² Pero Pilato ndačo ngain xa:

—Tti janha coentaxin, jañá sittohe.

²³ Are xisoldado joexin joinchecrucificá xa Jesús, cottimeja canoi xa chjeyehe xa lonttoe Jesús. Cottimeja coá xa camisé Jesús, co camisa mé xonhi tti ditsexinxin chó manta, jeho nacoa pieza camisa mé.

²⁴ Mexinxin xisoldado ndache chó xa:

—Tsinchjeha na camisa, icha jian dantsje na suerte de ixin jehe camisa para socon na quensen sittoehe camisa.

Jañá joiconhe tti jitaxin ngain Palabré Dios que ndačo: “Chjeyehe na lonttona, co joantsje na suerte de ixin jehe lontto.” Jehe jiji tti joinchehe xisoldado.

²⁵ Ngaca crué Jesús nttiha vehe janné, co nchichó janné, co María, tti cjoí chihi Cleofas, co María Magdalena.

²⁶ Are Jesús vicon janné tajingattjen jan nttiha, co ngaca jan tajingattjen tti chojni que vacao Jesús que jehe anto joinao, Jesús ndačo ngain janné:

—Yá rrichonda xitsiha.

²⁷ Cottimeja ndačo Jesús ngain chojni mé:

—Yá chonda janná.

Co rato mé jehe chojni mé vayé jehe janné Jesús inchin janné jehe, co jamé vayaconhe jehe janné Jesús.

Are ndavenhe Jesús

(Mt. 27.45-56; Mr. 15.33-41; Lc. 23.44-49)

²⁸ Después de cain jiji, are Jesús conohe que cainxin oconhe, co para xettexin conhe tti jitaxin ngain Palabré Dios, Jesús ndačo:

—Venhe na jinda.

²⁹ Nttiha vehe ná chi que veche de vino que dicjan inchin vinagre; cottimeja nttiha xanguí ná de xisoldado ná cosa que dínhi esponja, co cosa mé tse jinda inchin chjon algodón, co coencjin xa cosa mé con ná ntté nttahisopo co tsín xa hasta ngain rroha Jesús.

³⁰ Jesús vihi jehe vino san mé, cottimeja ndačo:

—Cainxin oconhe.

Cottimeja joinchesé já co ndavenhe.

Ná xisoldado conxiré xa nttantacoin Jesús conixin lanzé xa

³¹ Nchanho mé cjoí víspera de tti quiai pascua, co chojni judío joinaoha na para canio cuerpo mé rroguittohe nganito cruz ngain nchanho que vanchejogaha na ixin jehe nchanho que vanchejogaha na, mé nchanho anto santo. Mexinxin ndache na Pilato que jehe tsetonhe xisoldadoe ixin tsondai xa rotté tti chojni que te crucificado para que chojni mé ndasenne icha daca, co sinttjianxin xa cuerpoe de nttiha.

³² Cottimeja xisoldado vinttecji xa co condai xa rotté tti saho, co cai rotté tti iná, cayoixin tti vintte crucificado conixin Jesús.

³³ Pero are vintteconchienne xa ngain Jesús, vicon xa que jehe ondaguenhe, co mexinxin icondaiha xa rotté Jesús.

³⁴ Pero masqui jehe ndavenhe, ná de tti xisoldado mé conxirehe xa nttantacoin Jesús conixin ná lanza, co rato mé vachjedoho jni co jinda.

³⁵ Janha tti cjin na jiji co vicon cain jiji co ndačhjan tti ndoa. Co janha chonda seguro que ndačhjan tti ndoa para que jaha ra cai sitticaon ra.

³⁶ Ixin cain cosa jiji conhe para joiconhe inchin jitaxin ngain Palabré Dios que ndaço: “Condaiha na ni ná nttaloroe.”

³⁷ Co jí iná parte que ndaço: “Sicon na tti joinchenihi na.”

Are xavá Jesús

(Mt. 27.57-61; Mr. 15.42-47; Lc. 23.50-56)

³⁸ Después de cain jiji, José, tti joixin rajna Arimatea, joanchiehe joachaxin Pilato para sajoicao cuerpoe Jesús. José mé cjoí ná chojni que vitticaon Jesús, pero jehe joiha para conohe icha chojni que jehe vitticaon ixin vaçagoen José chojni judío que vinttechonda joachaxin. Pilato chjé José joachaxin, mexinxin jehe cjoí co sajoicao cuerpoe Jesús.

³⁹ Cai Nicodemo, tti joinichjé Jesús ngain ná ttie, jehe mé cjoí conixin ná cantte kilo de mirra co áloes, cayoi mé diguittecan.

⁴⁰ Co José co Nicodemo coensiha na cuerpoe Jesús conixin venda que anto thjoin çajni de ixin tti cayoi cosa que joicao Nicodemo. Co coensiha na cuerpoe Jesús inchin vanchehe chojni judío are vacjavá na chojni que ndavaguenhe.

⁴¹ Ngain lugar tti joinchecrucificaxin na Jesús nttiha vehe ná huerta de nttattochjoin, co ngain huerta mé vehe ná cueva nroaxin que ça çonhi cuerpo diguenhe diçanxinhi na nttiha.

⁴² Nttiha coín na cuerpoe Jesús ixin cueva mé chiaon vehe co ixin otsexinhi tti nchanho que nchejogaha chojni judío.

20

Are xechon Jesús

(Mt. 28.1-10; Mr. 16.1-8; Lc. 24.1-12)

¹ Ngain nchanho domingo María Magdalena cjoí ngain cueva mé atto ndoyo are ça naxion xehe, co vicon que içoha tti ço que vejé cueva mé.

² Cottimeja coinga sacjoí tti vehe Simón Pedro co iná de tti chojni que vacao Jesús, tti chojni que Jesús anto joinao, co ndaço ngain na:

—Sadijicaoxin na de ngain cueva cuerpoe Jesús, co noaha na ttinó coín na cuerpo.

³ Cottimeja Simón Pedro co tti iná chojni vaçhje na co cjoí na ngain cueva mé.

⁴ Cayoixin na tettinga na nataonxin, pero tti iná icha coinga que Pedro, co jehe mé tti icha saho joiji ngain cueva mé.

⁵ Visé tsjehe co vicon jeho venda tate nttiha, pero jehe joixinha.

⁶ Cottimeja joiji Simón Pedro, co jehe vixinhi cueva mé. Jehe cai vicon jeho venda tate nttiha,

⁷ co cai vicon tti manta que gonda para vesia já Jesús, ijiha manta conixin venda, jehe manta dixea manta co ndaha jí manta.

⁸ Cottimeja vixinhi tti iná chojni cai, tti joiji icha saho ngain cueva mé, co vicon tti diconhe, co jehe vitticaon,

⁹ masqui jehe na ça coinxinha na tti jitaxin Palabré Dios que Jesús chonda que rroxechon de noayehe nindadiguenhe.

¹⁰ Cottimeja cayoi chojni mé sacjan na para nchiandoha na.

Are Jesús çago ngain María Magdalena

(Mr. 16.9-11)

¹¹ Pero María Magdalena nttiha vittohe ndoja ngaca cueva mé, co jitsjanga. Co are jitsjanga visé para tsjehe ngaxinhi cueva mé,

12 co jehe vicon yó ángel que tengá lontto roa co tate tti vehe cuerpoe Jesús. Ná de jehe tají tti vehe já Jesús co iná tají tti vehe rotté Jesús.

13 Co cayoi ángel mé joanchianguihi María co ndaço:

—¿Quedonda rritsjanga?

Jehe María ndaço:

—Ixin sajoicao na cuerpoe Jesús, co nonaha ttinó coín na.

14 Are joexin ndaço yá, cjoendoa já co vicon Jesús que nttiha tají pero jehe venoeha ixin jehe Jesús.

15 Cottimeja Jesús joanchianguihi:

—¿Quedonda rritsjanga? ¿Quensen rritjté?

Jehe María xaxaon que puede xí mé tti jinda nttattochjoin nttiha co ndaço ngain:

—Si soixin sacoiho cuerpo que vehe nttihi, ndachjenji na ttinó cointtohe cuerpo para que janha sirroá cuerpo co satsjinha cuerpo mé.

16 Cottimeja ndaço Jesús ngain:

—¡María!

Co jehe María cjan, co ndaço ixin nguigoa hebreo ngain Jesús:

—¡Raboni!

Co raboni rrotho Maestro.

17 Jesús ndaço:

—Tançhanda na ixin xa tajinha ngain tti jí Ndodana. Pero ttji co ndache cain chojni que vacinha que janha tsajín ngain tti ttjen Ndodana co Ndadá jaha ra cai, tti Dios de janha co Dios de jaha ra.

18 Cottimeja María Magdalena joiquetonhe cain chojni que vacao Jesús ixin jehe María vicon Jesús, co ixin jehe Jesús ndache María para ixin rrondaço ngain na.

Jesús xago ngain chojni que vacao

(Mt. 28.16-20; Mr. 16.14-18; Lc. 24.36-49)

19 Ngain xajeho nchanho mé, tti nchanho domingo, are ottie, canxion chojni que vacao Jesús tate na ngain ná nchia co jian diquejé na puerté nchia mé ixin vaçagoen na chojni judío. Co rato mé Jesús xago ngayé na, co jehe joanjo joajna ngain na, co ndaço:

—Dayehe ra tti çhjoin que tsonohe ansean ra.

20 Co are joexin ndaço jihi, jehe cjoago ngain na rá jehe co nttanttacoín tti conihí. Co jehe na ché na ixin vicon na Jesús iná.

21 Cottimeja Jesús cjan ndaço ngain na:

—Dayehe ra tti çhjoin que tsonohe ansean ra. Inchin rroanha na Ndodana, jamé janha rrorroanha jaha ra cai.

22 Cottimeja Jesús vanottetaon na co ndaço ngain na:

—Dayehe ra Espíritu Santo.

23 Cain chojni que jaha ra sinchetjañehe ra tti jianha que jehe joinchehe, jamé ndasitjañehe ixin cai Dios ndasinchetjañehe chojni mé; co cain chojni que jaha ra sinchetjañeha ra, jamé xa sitjañeha chojni mé ni de ngain Dios.

Tomás vicon ixin Jesús dixechon

24 Pero Tomás, mé ná de tti tteyó chojni que vacao Jesús, tti vancheguinhi na Xancoata, jehe mé coha ngain na are cjoí Jesús.

25 Pero tti icanxin chojni que vacao Jesús ndaço na ngain:

—Janha na vicon na Jesús.

Pero jehe Tomás ndaço ngain na:

—Si siconha janha ngá rá tti joidoho clavo, co rroʒanxinha dedona nttiha, co rroʒanxinha rana ngain nttanttacoín, janha čhoħa sitticanho.

²⁶ Vatto jni nchanho de mé co cain chojni que vacao Jesús cjan na ngain nchia iná, co are mé nttiha vehe Tomás ngain na cai. Co masqui cain puerta tatejé ĵian, Jesús joixinhi, joiguehe ngayé na co joanjo joajna ngain na co ndačho:

—Dayehe ra tti čhjoin que tsonohe ansean ra.

²⁷ Cottimeja ndačho ngain Tomás:

—Tsjenxin rana, co ʒanxinhi dedoa nttihi; co ʒanxinhi rá ngain nttanttacoín na. Iʒaxaonha ixin ndoaha, pero ditticaon nganji na.

²⁸ Cottimeja Tomás ndačho:

—ĵsoixin tti chonda cain joachaxin, co soixin tti Dios de janha!

²⁹ Jesús ndačho ngain:

—Tomás, janché ditticaon ixin vicon na. Icha čhjoin vidé tti chojni que diconha na janha co masqui jamé jehe na ditticaon na.

Quedonda Juan dicjin libro ĵihi

³⁰ Jesús joinchehe anto tsje seħal que vicon chojni que vacao jehe, pero cainxinha seħal mé ĵitaxin ngain libro ĵihi.

³¹ Pero cain ĵihi ĵitaxin para que ĵaha ra sitticaon ra que Jesús mé tti Cristo que Dios rroanha, co jehe mé Xenhe Dios, co para que rrochonda ra iná vida naroaxin que ʒonhi tiempo tsjexin are sitticaon ra jehe.

21

Jesús ʒago ngain yáto chojni que vacao

¹ Después de cain ĵihi, Jesús cjan ʒago iná ngain chojni que vacao are ngandehe lago que dinhi Tiberias. Janhi conhe:

² tate yáto na, Simón Pedro; Tomás, tti Xancoata; Natanael, tti joixin rajna Caná de Galilea; co cayoi xitsihi Zebedeo; co iyó chojni que vacao Jesús.

³ Simón Pedro ndačho ngain na:

—Janha sitse copescado.

Cain jehe na ndačho na ngain:

—Janha na cai tsjin na.

Jańá savintteĵi na coani na ná barco, pero ttie mé ʒonhi copescado tse na.

⁴ Co are ocoexinhi vingasán, Jesús ʒago ngandehe ĵinda, pero cain chojni mé venoeha na ixin jehe Jesús.

⁵ Cottimeja Jesús ndačho ngain na:

—¿Aʒa ʒonhi copescado tse ra?

Co jehe na ndačho na:

—Ķa ʒonhi va.

⁶ Cottimeja Jesús ndačho ngain na:

—Dancaħgui ra nonchaha lado ĵian de barco, co rrotse ra va.

Co jamé joinchehe na, cottimeja ndoa hasta ni ičhoħa dantsjengui na nonchaha de ngangui ĵinda ixin anto tsje copescado vingachĵian nonchaha.

⁷ Cottimeja tti chojni que Jesús anto joinao, mé ndačho ngain Pedro:

—ĵJehe Jesús!

Nandá coinhi Simón Pedro yá que ixin jehe Jesús, jehe Pedro ĵaicoa vingá lontoe, lontoe ĵidattexin ixin jehe joantsje lontoe, co coataonhe ĵinda.

⁸ Co rato mé tti icha chojni que vacao Jesús ʒa vittohe na inchin cien metro ĵjinxin de ngandehe ĵinda. Cottimeja jehe na joí na ngandehe ĵinda conixin barco que ĵiĵtianganĵi nonchaha ĵicaontja copescado.

⁹ Are ojoí na ngandehé nda ngataha jinche, vittja na ná montochjan de xoittja conixin ná copescado ngataha xohi, co niottja.

¹⁰ Jesús ndačo ngain na:

—Sicohe ra canxion copescado que tse ra jaxon.

¹¹ Simón Pedro cjan ngain barco para joica nonchaha que jiringa copescado co jehe coianganji nonchaha mé hasta tti ngandehé lago co nttiha jiringa de joxon copescado yeye hasta ciento cincuenta y tres va. Co masqui anto tsje va, vichjeha nonchaha.

¹² Cottimeja Jesús ndačo ngain na:

—Xácoi ra jintte ra.

Co ni ná de jehe nimé xaxaonha na para joanchianguihi na Jesús ixin quensen jehe ixin venohe na que jehe Jesús.

¹³ Cottimeja Jesús conchienne, co jehe cóá niottja co joanjo nio ngain jehe na, co cai copescado.

¹⁴ Jíhi ninxin nttiha que xago Jesús ngain chojni que vacao después de xechon.

Jesús nichja ngain Pedro

¹⁵ Are joexin joine na, Jesús joanchianguihi Simón Pedro co ndačo:

—Simón, xitsihi Jonás, ¿arinao na janha icha que nitehe?

Pedro ndačo:

—Ján, soixin noha que ján rinaho.

Jesús ndačo:

—Mexinxin jaha darinda chojnina, jañá inchin tti ttingaria coleco dicao cuidado de ixin jehe va.

¹⁶ Yoxin nttiha, Jesús joanchianguihi iná co ndačo:

—Simón, xitsihi Jonás, ¿arinao na janha?

Pedro ndačo ngain:

—Ján, soixin noha que ján rinaho.

Jesús ndačo:

—Mexinxin jaha darinda chojnina, jañá inchin tti ttingaria coleco dicao ciudadano de ixin jehe va.

¹⁷ Ninxin nttiha joanchianguihi Jesús co ndačo:

—Simón, xitsihi Jonás, ¿arinao na?

Pedro tavechín ixin Jesús joanchianguihi ninxin nttiha ixin arinao jehe Pedro Jesús. Co Pedro ndačo ngain Jesús:

—Soixin noha cainxin. Soixin noha que janha ján rinaho soixin.

Jesús ndačo ngain:

—Mexinxin darinda chojnina, jañá inchin tti ttingaria coleco ciudadano de ixin jehe va.

¹⁸ Janha rrindattjo ndoa que jaha are xa joarihi icha chjan, jaha vaguitoxinha co savacjji tti jaha vajinao, pero are otsonttaxi, jaha tsinxé rá co ojé ni sintangá lontoa, co tsjiho na tti jaha sinaoha tsji.

¹⁹ Are Jesús ndačo jíhi, jehe jinchequinxin na ixin quexén senhe Pedro, co ixin jehe Pedro jañá sinchesayehe Dios. Cottimeja ndačo Jesús ngain Pedro:

—¡Jaha nchehe sigue ditticaon na!

Tti chojni que Jesús anto joinao

²⁰ Are Pedro ngaria, jehe vicon que nttiha jirroé tti chojni que Jesús anto joinao, xajeho tti vehe ngaca Jesús are joine na ngain quiai pascua co

joanchiangui ngain Jesús co ndaĉho: “Soixin, ¿quexehe tti tsjagoe chojni que ningaconha ttinó ttjen soixin?”

²¹ Co are Pedro vicon jehe mé, jehe Pedro joanchianguihi Jesús co ndaĉho:

—Xí jihi, ¿quexén tsonhe xa?

²² Jesús ndaĉho ngain Pedro:

—Si janha rinaho que jehe xa sechon xa hasta que are janha rrocjan na sihi iná, ¿jaha quehe ndosán? Jaha nchehe sigue ditticaon na janha.

²³ Mexinxin řaxaon icha chojni que vacao Jesús que ixin jehe mé rrogenha. Pero Jesús ndaĉhoha ngain Pedro ixin chojni mé rrogenha, Jesús jeho ndaĉho que: “Si janha rinaho que jehe xa sechon xa hasta que are janha rrocjan na sihi iná, ¿jaha quehe ndosán?”

²⁴ Jehé chojni mé, mé tti janha, co janha tti vicon cain cosa jihi, co cjin na cain jihi. Co noa na que ndaĉhjan ndoa.

²⁵ Cai jí icha cosa que Jesús joinchehe, pero si rroguetaxin ná co ná cosa mé, janha řaxanho que ngoixin mundo rroguittjaha rroguingachjian cain libro que rroguetaxin cain cosa mé. Amén.

Tti Joinchehe Nirepresentanté Jesucristo

Are Jesús ndačo ixin tsí Espíritu Santo

¹ Ngain saho librona janha cjin na para ixin jaha, Teófilo, cainxin tti joinchehe Jesús co cainxin tti cjoago Jesús desde nchanho are jehe coexinhi cjoago

² hasta nchanho que jehe sacjoi para ngajni. Co antes que Jesús sarrocji ngajni, jehe coincié co coetonhe nirepresentanté jehe conixin joachaxin que chonda Espíritu Santo. Jehe Jesús coetonhe na de ixin queXén sinchehe na.

³ Co después de ndavenhe co xechon, jehe Xago ngain cain chojni jehe. Co ngoixin cuarenta nchanho Jesús joinchehe tsje cosa para que chojni mé vinte na seguro que ixin jehe cjan jichon iná. Co vandačo ngain na de ixin queXén ttetonha Dios.

⁴ Co Jesús, are Xa vehe ngain na, coetonhe na ixin rrochonhe na ngain ciudad de Jerusalén. Co ndačo ngain na:

—Chonhe ra hasta tsoenja tti ndačo Nnodana icha saho, inchin janha ondačhjan nganji ra cai.

⁵ Ndoa que Juan joincheguitte chojni conixin jinda, pero nntihi quejanhi nchanho jaha ra siguutte ra conixin Espíritu Santo.

Are Jesús sacojín para ngajni

⁶ Co are Jesús Xa vehe ngain na, jehe na joanchianguihi na co ndačo na:

—Soixin, ¿arato jihí, rrochjehe chojni Israel joachaxin para tsetonha ngain nonttehe iná?

⁷ Co Jesús ndačo ngain na:

—Jaha ra Xonhi joachaxin chonda ra para rrochonxin ra quesa o quehe hora Ndadá na sinchehe Ndo cosa jihí ixin jehó jehe Ndo chonda Ndo joachaxin para sinchehe Ndo cosa jihí.

⁸ Pero are tsí Espíritu Santo nganji ra, jaha ra rrochonda ra joachaxín Dios co mexinxin sachjexin ra de nntihi co rronichja ra de ixin janha. Co jaha ra rronichja ra nntihi ngoixin Jerusalén, cottimeja satsji ra ngain ngoixin nonttehe Judea, co ngoixin nonttehe Samaria, co hasta cain lugar que jí icha cjin de nntihi ngataha nontte.

⁹ Co are Jesús joexin ndačo cain yá, cain representanté jehe tatetsjehe na queXén sacojín Jesús are sacjoi para ngajni. Co are onoi joi, joí ná ttjoi cjoanotaon co iviconha na.

¹⁰ Xa tatetsjehe na para ngajni ixin ttinó sacojín Jesús are cononxin ngaca na yó xí tengá lontto roa

¹¹ co ndačo cayoi xí mé ngain na:

—Jaha ra chojni Galilea, ¿quedonda tatetsjehe ra para ngajni? Xajeho Jesús que sacjoixin de nganji ra rrocjan tsí iná inchin are jaha ra vicon ra sacjoi.

Are coinciehe na Matías para vehe ngain lugar de Judas

¹² Cottimeja cain nirepresentanté Jesús sacjoixin de ngagaha tti jnanchjan que dinhi Jné Nttaolivo, co sacjan na para ciudad de Jerusalén. Co jna mé anto chiaon jí jna de ngain Jerusalén inchin ley Israel tajanda chojni para sattji ngain nchanho que nchejogaha ni.

¹³ Co are joihi na ngain nchia tti vintte na ngain ciudad mé, jehe na coani na yoxin piso tti jehe na vintte na. Co de cain na vehe Pedro, Jacobo, Juan, Andrés, Felipe, Tomás, Bartolomé, Mateo, iná Jacobo xenhe Alfeo, Simón tti vaquetocaho gobierno romano, co Judas xenhe Jacobo.

¹⁴ Cain chojni mé vaʒatte na para vanchecoanxinhí na Dios conixin cain xanchó Jesús xanxí, co María, janné Jesús, co icha nanita cai.

¹⁵ Ná nchanho tiempo mé nttiha vintte inchin ciento veinte chojni co Pedro vingattjen ngayé na co ndaʒho ngain na:

¹⁶ —Tsjexin ra hermanos, chonda que joiconhe tti joindaʒho Espíritu Santo ngain David co jehe dicjin ngain tti jitaxin Palabré Dios. Ndaʒho nttiha de ixin Judas tti ndaʒho para queʒén tse na Jesús co sajoicoa na.

¹⁷ Judas vacji nganji na janha na, ixin jehe vechonda ʒajeho ʒa que janha na techonda na.

¹⁸ Pero conixin tti tomi que cjoenguehe na hna para ixin tti jianha que jehe joinchehe ngain Jesús, coehna ná nontte. Co nttiha Judas cjoí co cjoixin já ngataha nontte mé co ʒhintaon cuerpoe co vaʒhe cain tti jiringa.

¹⁹ Co are cain chojni que vintte ngain ciudad de Jerusalén conohe na ixin jamé conhe, jehe na joincheguinhí na nontte mé Acéldama, ixin nguigoehé hebreo, pero rroʒho ʒajeho Jnguihi Jni.

²⁰ Ixin ngain libroe Salmo David ndaʒho janhi:

Chonda que sittohe nchiandoha jeho nchia,

co ʒonhi chojni sintte ngaxinhí nchia.

Co ndaʒho cai:

Iná chojni rrochonda tti ʒa que jehe vechonda.

²¹ Co nttihi ngayá na te xí que vacjinho na cainxin tiempo are Jesús vehe nttihi nganji na

²² desde nchanho que Juan joincheguitte Jesús co hasta nchanho are Jesús saocoajín para ngajni. Mexinxin chonda que ná de xí mé sehe nganji na para rrondate icha chojni ixin jehe seguro vicon ixin Jesús xechon después de ndavenhe.

²³ Cottimeja coinchiehe na yó xí de nivacao na ngain cain nchanho mé. Ná vinhi José co cai vaguinhí Justo co Barsabás. Co yoxin tattita vinhi Matías.

²⁴ Co are joexin coinchiehe na cayoi xí mé, joinchecoanxinhí na Dios co ndaʒho na:

—Soixin que chonxin ansén cainxin chojni, tjagohna na ra quexehe de cayoi xí tehe soixin ocoinchiehe

²⁵ para sinchehe ʒá soixin inchin ʒa que vanchehe Judas. Pero jehe joinchetján ʒa mé ixin joinchehe jianha co jaxon jí ngain lugar tti jiquinxin sehe.

²⁶ Cottimeja vantsje na suerte co suerte mé vittotaon tattita vinhi Matías. Co rato mé jehe Matías vehe conixin ittejngo representanté Jesús.

2

Are Espíritu Santo jói ngain chojni que vaguitticaon Jesús

¹ Co are jói quíai dinhi Pentecostés, cainxin chojni que vaguitticaon Jesús tate na ngain nacoa lugar.

² Co rato mé coinhi na ná ruido anto soji que joixin de ngajni, inchin are tja ʒhintto soji. Jamé vaʒoin ngoixin ngaxinhí nchia tti texinhí na.

³ Cottimeja vicon na tsje neje ʒohi, co jói naná neje ʒohi mé ngataha cada na.

⁴ Co Espíritu Santo joixinhi cuerpoe cain na conixin joachaxin. Co jehe na coexinhi na nichja na oje nguigoa inchin Espíritu Santo joinchenichja na.

⁵ Co tiempo mé nttiha vintte tsje chojni judío ngain Jerusalén que joixin de tsje nación ngoixin mundo. Co chojni mé anto vaguitticaon ley Israel co cjoingain Jerusalén para joinchesayexin Dios inchin ndačo ley mé.

⁶ Co are coinhi na ruido ngain nchia mé, anto tsje chojni mé xatte nttiha. Co ni inoenco na quehe rrořaxaon na ixin naná na coinhi na nguigoe na tenichja entre cain chojni que vaguitticaon Jesús.

⁷ Co tavinttetsjecoa chó na co vinttegoan na admirado. Co ndache chó na: —Pero cain chojni que tenichja janhi; ¿jehe na ajeha de nttihi nonttehe Galilea na na?

⁸ ¿Quehe jitonhe? Cain ján na tettinhi na tenichja na ojeje nguigoaha na cada na.

⁹ Nttihi ngayá na te chojni que joixin de Partia, Media, Elam, Mesopotamia, Judea, Capadocia, Ponto, co de ngain nonttehe Asia,

¹⁰ de Frigia, Panfilia, Egipto, co cai te chojni que joixin de lugar ngain Africa que jí icha ndaha de ciudad de Cirene. Cai tsje chojni romano te nttihi. Co de cain chojni romano, canxion na goan na chojni judío, co icanxin na goanha na de razé chojni judío pero ditticaon na religioen chojni judío.

¹¹ Cai jí chojni que joixin de Creta, co Arabia. Pero cainxin na ján na tettinxin na ttí ndačo jehe na ixin nichja na de ixin tsje cosa jian que Dios nchehe co nichja na cain ojeje nguigoaha na ján na.

¹² Co vinttegoan admirado cain chojni mé co noeha na quehe řaxaon na co joanchianguihi chó na, co ndačo na:

—¿Quehe rročo cain jihi?

¹³ Pero icanxin na cjoanoa na na co ndačo na:

—Ixin diguinttecoan chojni yá, mexinxin jańá tečo.

Tti nichja Pedro ngain chojni

¹⁴ Cottimeja Pedro conixin ittejngo representanté Jesús vingattjen co Pedro nichja sén co ndačo:

—Chojni de nonttehe Judea co cainxin chojni que te ngain ciudad de Jerusalén, tonoha ra co ttinhi ra jian ttí rronhattjo ra.

¹⁵ Xí tehe dicoanha xa inchin jaha ra řaxaon ra, ixin jaxon řa ndoyo; nandá las nueve.

¹⁶ Tti jaha ra vicon ra jaxon, jihi ttí ondačo profeta Joel are nichja co ndačo:

¹⁷ Dios ndačo: ngain tiempo are ochiaon ndatsjexin mundo, rrorroanha Espíritu Santo ngain cainxin chojni.

Co chjan sayé joajnana para rronddache xan icha chojni de ixin janha, co janha sinttaguicon xanxí co xannčí tsje cosa řá are toxinxin xan.

Co cain chojni que ojonchjan tsoxinxin tsje cosa de ixin janha.

¹⁸ Rrorroanha Espíritu Santo nchanho mé ngain cain ninchehe řana.

Co jehe na sayé na joajnana para rronddache na icha chojni de ixin janha.

¹⁹ Co de ngajni noi tsjagoa na tsje cosa que vaguiconha chojni are saho.

Co ngataha nontte tsjagoaxin na tsje señal.

Tsjagoa na jni, řohi co ttjoi de joxon jihnchin.

²⁰ Are mé nchanho isinchengasanha co ndatsonttie,

co conittjao ndarroçjan va inchin jni.

Cain yá tsonhe saho; cottimeja tsí nchanho are Jesús rrocjan tsí ngataha nontte,

co tsjago ngain cain chojni joachaxin que jehe chonda.

²¹ Co cainxin chojni que nichja jian de ixin Jesús, tti chonda cain joachaxin, ngain cain chojni mé jehe sanjo iná vida naroa.

²² Cai Pedro ndačho:

—Ttinhí ra ŋo jaha ra chojni Israel, tti rrondačhjan: Janha nichja de ixin Jesús tti joixin rajna Nazaret. Dios cjoagoha ra ixin jehe coinchiehe Jesús are chjé jehe jie joachaxin para joinchehe tsje cosa jian co para joinchehe tsje milagro, co para joinchehe tsje señal inchin jaha ra onoha ra.

²³ Co anto icha saho Dios ochonxin ixin jaha ra sinchehe ra nchaoha ngain Xenhe. Co ndoa, jaha ra tse ra Jesús co joinchechienhe ra ngá rá chojni jianha. Co jehe na joinchecrucificá na Jesús ixin jaha ra joinao ra.

²⁴ Pero Dios joinchexechon Jesús. Dios vantsje jehe de ngain tti nindadiguenhe ixin Jesús čhoha sittohe ngayé nindadiguenhe.

²⁵ Jañá conhe ixin Jesús joinchenichja rey David co ndačho:

Janha cainxin nchanho chonxin ixin Dios jí nganji janha.

Jí ngain lado jian na para que ŋonhi cosa sincheŋaon na.

²⁶ Mexinxin ansenna anto čjoin tonohe, co neje na nichjaxin palabra jian ixin anto chahna.

Mexinxin masqui cuerpona ndasenne, pero janha ŋonhi rroŋagoan

²⁷ ixin soixin tsinttoeha almana ngain lugué chojni ndadenhe, ni sanjoha joachaxin para rroxantte cuerpona janha tti nttaha ŋá soixin ixin soixin anto rinao na.

²⁸ Cjoagohna na nttiha que danjo iná vida naroa.

Co anto rochahna are janha sicon soixin.

²⁹ Co Pedro joinchehe sigue nichjé chojni co ndačho:

—Janha ndattjo ra ndoa ixin David ndogelitoa na ndavenhe co ŋavá. Co lugar tti jehe ŋavá, mé ŋa jí jai.

³⁰ Pero David cjoí ná profeté Dios co nichja lo que Dios cjoagoe, co venohe ixin Dios ndačho ngain jehe ixin ná de xanntí ŋančhjen rrojiguehe xan rey inchin David co jehe rey mé Cristo.

³¹ Mexinxin osé tiempo vatto David chonxin quehe siconhe ngain Cristo. Co jehe nichja ixin queŋén rroxechon Cristo. Co ndačho ixin almé rroguitoeha nttiha tti dittohe cain nindadiguenhe ni cuerpo rroxantteha.

³² Co ján Dios joinchexechon jehe Jesús, co cain janha na vicon na que Jesús ndoa xechon.

³³ Co jehe sacojín para ngajni co jí ngain lado jian de Dios. Co jehe Ndo chjé Ndo Jesús joachaxin para rroanha Espíritu Santo inchin jehe Ndo ndačho Ndo. Co Jesús rroanha Espíritu Santo nttihi, co Espíritu Santo mé tti nchehe cosa jihi que jaha ra dicon ra co ttinhí ra.

³⁴ Ixin jeha David tti sacjoi para ngajni. Ixin David ndačho:

Tti Ttetonha ndačho ngain tti Ttetonna:

“Darihi ngaca lado jian na,

³⁵ hasta que janha sinttagacha jaha de ngain cainxin tti ningaonha.”

³⁶ Mexinxin cainxin chojni ngain nación Israel chonda que tsonohe na seguro ixin Jesús, tti jaha ra coenganito ra cruz, Dios ndačho ixin jehe Jesús chonda cain joachaxin para ixin ján na, co jehe mé Cristo.

³⁷ Co are jehe na coinhi na cain tti ndačho Pedro, anto cóá na joachjaon co joanchianguihi na Pedro co icha representanté Jesús co ndačho na:

—¿Quehe nchao sinttaha na?

³⁸ Cottimeja Pedro ndačho ngain na:

—Ttontoxinhi ra vidá ra ngattoxon con Dios, co diguitte ra cada ra de ngain nombré Jesucristo para que sitjañaha ra cain tti jianha que joinchehe ra. Co jamé Dios rrorroanha Espíritu Santo nganji ra,

³⁹ ixin Espíritu Santo jí para ixin jaha ra, co para ixin xanha ra, co cai para cainxin chojni que te cjin, rrocho para cain chojni que sinao sayé Dios.

⁴⁰ Conixin palabra jihi, co icanxin icha palabra, Pedro nichjexin na, co ndacho ngain na:

—Ncheha ra inchin tenchehe cain chojni jianha que sinchetján almé na, co nchehe ra cosa jian para que rrochonda ra iná vida naroaxin.

⁴¹ Co cain chojni que vitticaon tti ndacho Pedro, jehe na joiguitte na. Co nchanho mé inchin ní mil chojni coexinhi vitticaon Jesús co joiguitte na.

⁴² Co cain chojni mé vaguitticaon na jian co vanchehe na inchin vacjago nirepresentaté Jesús. Co vaguitticaon chó ná, co vanchecoanxinhi na Dios co vaʒatte na cain na para vajine na tti niottja que dinhi Santa Cena.

Vidé chojni que vitticaon Cristo tiempo mé

⁴³ Conixin joachaxin que Dios chonda, nirepresentaté Jesús joinchehe na tsje milagro co tsje señal, co cainxin chojni goan na admirado.

⁴⁴ Co cainxin chojni que vaguitticaon Jesús anto vagoan na unido co vacjenguijna chó na ʒjoin.

⁴⁵ Co coexinhi joinchecji na cosé na co vaconchjea na tomi ngain ni-vagondehe.

⁴⁶ Nchanho co nchanho vaʒatte na ngain nihngo icha importante. Co ngain nchiandoha na vanecaho chó na. Co cain na anto vaché na co ni ná na conoeha na orgulloso.

⁴⁷ Jehe na vanchecoanxinhi na Dios. Co cainxin icha chojni ngain rajna vechonda respeto ngain cain na. Co cada nchanho Jesús, tti chonda cain joachaxin, vancheguitticaon icha co icha chojni.

3

Ná tti rrengo xingamehe

¹ Ná nchanho, Pedro co Juan sacjoi na nihngo icha importante ní hora tsocjin ixin hora mé hora para vanchecoanxinhi na Dios.

² Co cainxin nchanho are mé, nttiha icanxin chojni vaguicao na ná tti xí rrengo desde que digoan. Cainxin nchanho vagaquehe na tti rrengo mé ngain puerté nihngo mé que dinhi Puerta que ʒjoin Jí, para vaganchiagaha tomi ngain chojni que vaguixinhi nttiha.

³ Co are tti rrengo mé vicon Pedro co Juan tedixinhi na nihngo, jehe joanchiagaha tomi ngain na.

⁴ Cottimeja Pedro co Juan tsjehe na jian jehe tti rrengo mé, co Pedro ndacho ngain:

—Tsjehe nganji janha na.

⁵ Co tti rrengo mé tsjehe jian ngain na, ixin ʒaxa puede rrochjé na ʒhoan cosa.

⁶ Pero Pedro ndacho ngain:

—Janha chondaha tomi para rrochjaha, pero lo que janha chonda rrochjaha jaha: ngain nombré co de ixin joachaxin Jesucristo, dingattjen co ttjixin rottea.

⁷ Cottimeja Pedro tsehe rá tti xí mé lado jian co joinchengattjen, co rato mé cosoji cayoi rotté.

⁸ Co tti rrengo mé čhinca co vingattjenxin rotté, co ocoexinhi sacjoixin rotté. Co sajoixincaho cayoi na ngaxinhi nihngo. Jehe jittjixin rotté co jičhinca co jinichja jian de ixin Dios.

⁹ Cainxin chojni vicon na sacjoixin rotté co nichja jian de ixin Dios.

¹⁰ Co cain chojni mé anto řaon na ixin queřén conhe ixin cain jehe na chonxin na jehe tti xí mé co nohe na que jehe tti vaguehe ngandanguí tti puerté nihngo que dinhi Puerta čhjoin Jí para vaganchiagaha tomi.

Tti nichja Pedro ngain Portal de Salomón

¹¹ Co jehe tti rrengo que ndaxingamehe vacataonxin Pedro co Juan. Co jehe sacjoi conixin Pedro co Juan ngain parté nihngo icha importante que dinhi Portal de Salomón. Co cainxin chojni goan na admirado co ttinga na cjoí na tti te canio nicanxion.

¹² Pedro are vicon cain chojni nttiha, ndačo ngain na:

—Chojni de Israel, ¿quedonda doan ra admirado jaha ra? ¿Quedonda tsjena ni ra janha na, inchin janha na mero rrojinttaxingamá na xí jihi conixin joachaxin que janha na chonda na, o ixin janha na anto chonda na respeto ngain Dios? Jeha de ixin janha na,

¹³ sino que Dios de ndogelitoa na řančhjen Abraham, Isaac, co Jacob, Dios mé tti chjé icha tsje joachaxin ngain Xenhe que dinhi Jesús. Co Jesús mé tti jaha ra cjoiho ra ngain Pilato. Co masqui Pilato joinao rrocanchjanda Jesús, jaha ra joinaoha ra.

¹⁴ Co jaha ra ndačoha ra para rrocanchjanda na Jesús, tti Dios coinchiehe co tti joxon jian vanchehe. Sino que ndačo ra ixin icha jian para coanchjanda na ná chojni que vagoen icha chojni.

¹⁵ Co jamé ndagonhe ra chojni que danjo vida. Pero Dios joinchexechon chojni mé. Co janha na vicon na cain yá.

¹⁶ Co nombré jehe Jesús, o icha jian ndačhjan, tti confianza que janha na chonda na ngain jehe, mé tti joinchexingamehe xí jihi que jaha ra dicon ra co chonxin ra. Ján, seguro que ixin confianza mé tti joinchexingamehe jian xí jihi inchin jaha ra nchao dicon ra.

¹⁷ 'Co janha onona are jaha ra conixin cain xittetonha ra gonhe ra Jesús, noaha ra quehe joinchehe ra.

¹⁸ Pero Dios joinchehe jańá, inchin ondačo are icha saho ngain profeté que nichja lo que tti jehe Dios cjoagoe. Co jehe ndačo ixin Cristo chonda que rrojiguenhe.

¹⁹ Mexinxin ttentoxinhi ra vidá ra, co ditticaon ra Dios, para sitjańaha ra cain cosa jianha que nchehe ra. Cottimeja Dios nchao tsjengujna ra para que jaha ra anto rroché ansean ra.

²⁰ Co cai Dios rrorroanha Jesús, tti Cristo, ixin Dios coinchiehe jehe icha saho para que jehe tsjengujna jaha ra.

²¹ Masqui jai Jesucristo chonda que tasehe ngajni hasta que tsí nchanho para Dios sinchechjian jian cain cosa, inchin ndačo osé tiempo vatto ngain cain řón que dicjin profeté Dios ngain tiempo mé.

²² Moisés ndačo janhi ngain nindogelitoa na řančhjen: “Dios, tti chonda cain joachaxin, rrorroanha nganji ra ná profeta que sačhjin de ngayaha ra, inchin jehe Dios rroaha na janha. Ditticaon ra cainxin tti rrondatto ra jehe mé.

²³ Co cainxin chojni que sitticaonha, profeta mé sintteha na ngain chojni Dios co ndasitján na.”

²⁴ Jañá cain profeté Dios desde Samuel co icha profeta que jói después, nichja de ixin quexén conhe tiempo jai.

²⁵ Co jaha ra xanntí xançhjen de cain chojni mé. Mexinxin cain tti cjoagoe Dios cain profeta, mé para ixin jaha ra. Co para tsjenguijna jaha ra, Dios joinchexjiancaho ná trato ndogoeitoa na xançhjen are Dios ndaço ngain Abraham: “Co de ixin chojnia, janha sinttanchaon cainxin chojni ngataha nontte jihi.”

²⁶ Are Dios joinchexechon Xenhe, rroanha Xan saho nganji ra. Jañá Dios jointtanchaon ra para que tsinttohe ra cada ra tti jianha que nchehe ra.

4

Are nittetonha ngain nihngo tse na Pedro co Juan

¹ Pedro co Juan xa tenichja na ngain chojni are jói canxion xidána conixin tti xittetonhe cain xisoldadoe nihngo icha importante conixin icanxin xisaduceo.

² Tedoñao xa ixin Pedro co Juan vacjagoe na chojni co vandatho na ixin chojni que ndadenhe rroxechon na inchin Jesús oxechon.

³ Cottimeja jehe xa tse xa Pedro co Juan para saviquiaxinhi xa na hasta tti ndoexin ixin nchanho mé otsocjin.

⁴ Pero tsje chojni que coinhi tti ndaço cayoi jehe na, vitticaon na Jesús. Co de cain chojni que coexinhi vitticaon Jesús nchanho mé, jehó xí ovittja chiaon naho mil xa.

⁵ Co nchanho yoxin xatte nttiha ngain Jerusalén canxion xivaquetonha ngain chojni judío, conixin canxion nivachonda joachaxin ngain nihngo co canxion ximaestroey ley Israel.

⁶ Co nttiha cai vehe ná xí vinhi Anás, mé xidána icha importante. Co nttiha cai vehe Caifás, Juan, Alejandro, co vintte cainxin ni ichó xidána icha importante.

⁷ Cottimeja rroanha na joajna para joiçacoa Pedro co Juan. Co coín na Pedro co Juan ngosine para joanchianguihi na, co ndaço na:

—¿Quehe joachaxin chonda ra, o quensen chjá ra joachaxin para jaha ra nchehe ra cain jihi?

⁸ Cottimeja Pedro, conixin joachaxin Espíritu Santo, ndaço ngain na:

—Soixin ra xo ttetonha ra ngain chojni Israel, co soixin ra xo chonda ra joachaxin ngain nihngo icha importante:

⁹ jai soixin ra danchianguina ra ixin quexén cjoenguijna na ná tti rrengo co quexén jointtaxingamá na.

¹⁰ Rrondaçhjan na ngattoxon con ra, para que tsonohe cainxin chojni Israel ixin xí jihi que jí ngattoxon con ra, jehe xa xingamehe xa pero de ixin nombré co joachaxin Jesucristo tti joixin de rajna Nazaret. Co Jesucristo mé xajeho tti soixin ra joinchecrucificá ra. Co Dios joinchexechon jehe.

¹¹ Inchin ndaço ngain tti jitaxin Palabré Dios de ixin Jesús: “Jehe mé tti xo que soixin ra, xo tette ra nchia, joinaoha ra. Pero jehe goan tti xo icha importante de ngain nchia.”

¹² Ni ná chojni nchao rrochjá na ján na iná vida naroa, ixin Dios ndaço que xonhi iná chojni ngataha nontte jihi chonda joachaxin mé; jehó Jesús.

¹³ Are cainxin nivaquetonha coinhi na tti nichja Pedro co Juan, jehe na goan na admirado ixin venohe na que Pedro co Juan venoeha xón jian, co ixin cayoi jehe na inchin chojni que xonhi chonxin. Pero masqui jamé,

xaonha na para nichja na. Cottimeja vinttegatsoan na ixin cayoi nimé vacao na Jesús.

¹⁴ Co tti xí que joinchexingamehe Pedro co Juan nttiha tajangattjen ngayé na, mexinxin čhoha joinchecaxin na Pedro co Juan ni ná cosa.

¹⁵ Cottimeja coetonhe na Pedro co Juan vachjeyexin de ngain na co jeha na vitthe na nttiha para cjoao na ixin quežén sinchehe na.

¹⁶ Co ndačo na:

—¿Quehe sonttoho na ngain cayoi xí tehe? Cainxin chojni que te nttihi Jerusalén nohe na ixin cayoi xí tehe joinchehe milagro jihi. Co ján na čhoha rrondačo na ixin ndoaha.

¹⁷ Pero para tsonoeha icha chojni ixin quehe joinchehe cayoi xí tehe, ján na sonttoxaon na de soen na para que ixonhi chojni rronichjexin conixin nombré co joachaxín Jesús.

¹⁸ Cottimeja vayé na Pedro co Juan para coetonhe na ixin čhoha rrondačo na ni tsjago na conixin nombré co joachaxín Jesús.

¹⁹ Pero Pedro co Juan ndačo ngain na:

—Āaxaon ra, soixin ra, ¿andačo Dios ixin icha jian jí si sitticanho na tti rrondačo ra soixin ra co sitticaonha na tti ndačo Dios, o ani nahi?

²⁰ Janha na čhoha tsinttoa na de rronichja na cain cosa que vicon na co coian na.

²¹ Cottimeja cain xittetonha nichja xa icha para joinchexaon xa na, pero coančjanda xa Pedro co Juan para sacjoi, ixin xonhi razón vittja xa para rroquiaxinhi xa icha, ixin cainxin chojni nichja jian de ixin Dios are vicon na tti joinchehe Pedro co Juan.

²² Co tti xí que xingamehe de ixin joachaxín Dios vechonda icha que cuarenta nano.

Nirepresentanté Jesucristo joanchiehe na Dios para que rrochjé na icha confianza

²³ Are Pedro co Juan ocoančjanda na, cayoi jeha na sacjoi na para tti vintte tti icha nirepresentanté Jesús co ndache na cain tti ndačo cain xidána que vaquetonha ngain icha xidána, co cain nichonda joachaxin ngain nihngo.

²⁴ Co are tti icha nirepresentanté Jesús coinhi cain yá, cain na joinchecoanxinhi na Dios, co ndačo na:

—Ndodana na, soixin tti Dios, tti joinchechjian ngajni, co nontte, co ndachaon, co cainxin cosa que jí.

²⁵ Co soixin tti ndačo ngain Espiritu Santo para jeha joinchenichja xinchehe xá David. Mexinxin David ndačo:

¿Quedonda cain nación toñao nganji?

¿Quedonda cain chojni xaxaon cosa que xonhi xé?

²⁶ Cainxin xirey ngataha nontte co cainxin xittetonha coato chó xa para tsetocaho xa Dios co para tsetocaho xa Cristo tti coinchiehe Dios para rey, jañá čho David.

²⁷ Co ndoa, ngain ciudad jihi Herodes, Poncio Pilato co chojni que joixin oje nación, co chojni Israel coato chó na para coetocaho na Jesús, tti Xanha jian, tti soixin rroanha para ttjenguijna na.

²⁸ Jañá joinchehe na cainxin tti soixin ndačo are icha saho que chonda que roguiconhe.

²⁹ Co jai tsjexin, jeha na toñao na nganji na janha na co rinao na sinchexaon na na. Mexinxin ttjenguijna ni ra para rroxaonha na are rronichja na joajná soixin.

³⁰ Co nttatsán na ñao soixin, conixin joachaxian ttjenguijna ni ra para sinttaxingamá na chojni nihi co para sinttaha na icha milagro de ngain nombré Jesús, tti Xanha icha jian.

³¹ Co are joexin nichja na jañá ngain Dios, lugar tti te na nttiha coingui, co cain na chonda na tsje joachaxin de Espíritu Santo. Co joinchehe na sigue nichja na de ixin Palabré Dios sin joaxaon.

Cainxin cosa que vechonda ná na, cai cosé cain ni icha

³² Inchin xaxaon ná chojni que vaguitticaon Jesús xaxaon cain na, co xajehe conohe ngain ansén cain na. Ni ná na ndačho na ixin cosé na jeha para ixin jehe na, pero cain na ndačo na ixin cosé ná na cai cosé cainxin ni icha.

³³ Co nirepresentanté Jesús joinchehe na sigue ndache na icha chojni ixin Jesús xechon. Co Dios vaganjo ngain na anto tsje joachaxin are vanichja na, co vanchenchaon cain na.

³⁴ Co xonhi chojni que vaguitticaon Jesús vanchehe falta ná cosa ixin chojni que vechonda nonttehe o nchiandoha vanchecji na cosa que vechonda na co vaquiao na tomi

³⁵ co vaganjo na tomi ngain nirepresentanté Jesús. Co jehe na vaconchjeya na tomi mé inchin vagondehe ni icha para čhoan cosa.

³⁶ Jañá joinchehe ná xí vinhi José co ndogoelitoe xančhjen vinhi Leví. Jehe joixin de ngain ná nontte ngosine ndachaon dinhi Chipre. Co nirepresentanté Jesús joincheguinhí na Bernabé. Nombre yá rročo tti nchega-vanguehe ñao chojni.

³⁷ Xí mé joinchecji xa ná nonttehe xa co joiaho xa tomi co joanjo xa tomi ngain nirepresentanté Jesús para ixin jehe na sanjo na tomi mé ngain chojni noa que vaguitticaon Jesús.

5

Cosa jianha que joinchehe Ananías co Safira

¹ Pero vehe iná xí que vinhi Ananías, co Safira vinhi čhihi xa. Xí mé co čhihi xa joinchecji na ná nonttehe na cai.

² Pero xí mé vittoehe xa ná tanto de tomi co jeha ttoha tomi joicao xa ngain nirepresentanté Jesús, pero ndačo xa ixin joicao xa cainxin tomi ngain na. Co čhihi xa venohe cainxin.

³ Cottimeja Pedro ndačo ngain xa:

—Ananías, ¿quedonda jaha coanthjanda Satanás para coetonha nganji jaha para joincheyehe Espíritu Santo, co vittoaha ttoha tomi que cjoengaxin na hna de ixin nontteha?

⁴ Nontte que jaha joinchecji nontteha. Co are ojoinchecji nontte mé, cainxin tomi tomia, para que jaha nchao sinchehe inchin jaha rinao conixin tomi mé. Nchao para jaha danjo cain tomi mé, ní danjo johu ttoha tomi. Pero jaha nchehe jianha ixin ndačo que ixin rridanjo cain tomi nontteha co ndoaha. Jaha chojni tti jaha rrittemehe tti ndoa, sino Dios tti jaha rinao tsemehe tti ndoa.

⁵ Are Ananías coinhi cain yá, jehe vetsinga co ndavenhe. Co cainxin chojni que conohe na yá anto xaoon na.

⁶ Rato mé joí canxion xanxí. Co jehe xan mé coensiha xan cuerpoe Ananías co sajoicao xan para cjoavá xan.

⁷ Vatto inchin ní hora, cottimeja cjoí nchičhihi Ananías cai. Co venoeha nča ixin quehe conhe xixihi nča.

⁸ Co Pedro joanchianguihi ncha co ndacho Pedro:

—Ndachjenji na, ¿ajoinchecjixin ra nontte inchin precio que jaha ra ndacho ra?

Co jehe ncha ndacho ncha:

—Ján, precio mé.

⁹ Cottimeja Pedro ndacho ngain ncha:

—¿Quedonda ndache chó ra para ttema ra tti ndoa ngain Espiritu Santo? Nttimé ndoja jói nioicjavá xixiha. Co jai tsjiho na jaha cai.

¹⁰ Co rato mé vetsinga ncha ngaca Pedro co ndavenhe ncha cai. Co are vinttequí xanxí que joicjavá xixihi ncha, vittja xan jehe ncha cai ondadiguenhe ncha. Cottimeja joantsje xan ncha co sajoicjavá xan ncha ngaca tti xavá xixihi ncha.

¹¹ Co cainxin chojni que vaguitticaon Jesús nttiha, conixin cain icha chojni que conohe cosa jihi anto xaon na.

Tsje milagro co señal joinchehe nirepresentanté Jesucristo

¹² Co tiempo mé nirepresentanté Jesús vanchehe na anto tsje señal co milagro. Co cain chojni que vaguitticaon Jesús vaʒatte na ngain parté nihngo icha importante que dinhi Portal de Salomón. Co nttiha vechondaxin na servioe na.

¹³ Co icha chojni anto vechonda respeto ngain chojni que vaguitticaon Jesús pero vaʒaon na vacji na servioe na.

¹⁴ Pero masqui jamé, icha tsje chojni, xí co nchí vitticaon Jesús, tti chonda cain joachaxin.

¹⁵ Co hasta cainxin chojni que vechonda ninihi vagantsje na tti nihi ngandehe nttiha ngataha cania o ngataha saon. Ixin vajinao na que are vagatto Pedro masqui cara jeha saoen vagattotaon jehe ninihi mé para vanchexingamehe na.

¹⁶ Cai tsje chojni vaquixin de icha rajna que vintte chiaon Jerusalén co vaquiaho na tsje chojni nihi co tsje chojni que veninxin espíritu jianha. Co cainxin chojni mé vaxingamehe na.

Nittetonha ngain nihngo joiningaconhe na Pedro co Juan

¹⁷ Cottimeja xidána icha importante co cain xicompañeroe xa que dinhi xisaduceo anto vintteconchjoehe xa ngain nirepresentanté Jesús,

¹⁸ co tse xa chojni mé co coiaxinhí xa na ngaxinhí cárcel tti jí tsje chojni que joinchehe tsje cosa jianha.

¹⁹ Pero ná ángel de Dios conxiré puerté cárcel are ttie co joantsje cain nirepresentante mé co ndacho ngain na:

²⁰ —Sattji ra ngain nihngo icha importante. Co nttiha ttequinhi ra cain chojni cainxin de ixin tti vida naraoxin que danjo Jesucristo.

²¹ Co cain chojni Jesús vitticaon tti ndacho ángel. Co are vingasán joixinhí na nihngo icha importante co coexinhí na joincheconhe na chojni.

Co rato mé xidána icha importante co xicompañeroe xa coetonhe xa cain nivechonda joachaxin ngain juzgadoe na para ʒatte na. Cottimeja rroanha na xipolicía ngain cárcel para joixacoa nirepresentanté Jesús.

²² Pero are xipolicía joihi xa ngain cárcel, ivittjaha xa nirepresentanté Jesús. Co sacjan xa para joiquetonhe xa xidána.

²³ Co vinttendacho xa:

—Vittja na puerté cárcel jijé jian co cain xisoldado tatenda xa nttiha. Pero are conxirá na puerta, ixonhi chojni te ngaxinhí nttiha.

24 Are xicapitén xisoldadoe nihngo ichta importante co cain xidána que vaquetonha ngain ichta xidána coinhi xa cain yá, anto joanchianguihi chó xa ixin quehe conhe, co quehe rrocho cain jihí.

25 Co rato mé joí ná xí co ndacho xa ngain na:

—Cain tti xí que jaha ra coiaxinhi ra, te xa ngain nihngo ichta importante co tencheoenhe xa chojni.

26 Cottimeja tti xicapitén xipolicía cjoí xa conixin canxion xipolicía para joiaho xa cain nirepresentanté Jesús. Pero xonhi joinchehe xa ngain chojni mé ixin xaon xa que puede cain chojni que te nttiha ngain nirepresentanté Jesús rrocaxin na xa xo.

27 Co are ojoiaho xa cain nirepresentanté Jesús ngain juzgado tti te xi ichta, nttiha coengattjen xa cain na. Co xidána ichta importante ndacho xa ngain na:

28 —Janha na coetonha ra ixin itsjagoeha ra chojni conixin nombré co joachaxín Jesús. ¿Co quehe joinchehe ra? Ngoixin ciudad de Jerusalén joixin joincheoenhe ra chojni tti jaha ra noha ra, co jaha ra nchecaxin ni ra ixin janha na gonhe na xí yá co rinao ra que chojni sitticaon na jamé.

29 Cottimeja Pedro co cain ichta nirepresentanté Jesús ndacho na:

—Janha na chonda que sitticanho na Dios saho que chojni.

30 Tti Dios de nindogelitoa na xančhjen joinchexechon Jesús, tti soixin ra coeriahnda ra nganito ná cruz co nagoenxon ra.

31 Co Dios joinchecajinhi para ngajni. Co nttiha Dios coín ngain lado jian co chjé joachaxin para que jehe ttetonha cain chojni co para jehe danjo ngain na iná vida naraoxin. Co cai Dios chjé Jesús joachaxin para ttjenguujna chojni Israel tsentoxinhi vidé na co para ixin Jesús sinchetjañehe na cain cosa jianha que nchehe na.

32 Co cain yá janha na vicon na, co cai Espíritu Santo tjago ixin ndoa conhe. Co Dios rroanha Espíritu mé ngain cain chojni que ditticaon ngain jehe Dios.

33 Co are coinhi na cain yá, coñao na co joinao na narrogoenxon na na.

34 Pero nagueú cain chojni que vechonda joachaxin nttiha vehe ná xifariseo vinhi Gamaliel, co xí mé vanchecoenhe xa ichta chojni quehe vaquetonha ngain ley Israel. Co cain chojni vařaxaon na anto jian de ixin xí mé. Co vingattjen xa co coetonha xa vantsjeyexin na nchion rato cain chojni Jesús.

35 Cottimeja ndacho xí mé ngain cain ichta chojni nttiha:

—Cain jaha ra xo xí Israel ra, ttjiho ra cuidado tti sinchehe ra ngain xí tehe.

36 Xaxaon ra que ná tiempo vatto, joí ná xí vinhi Teudas, co ndacho xa ixin jehe xa anto importante xa. Co inchin nó ciento xí vaguitticaon co vacao jehe Teudas. Pero ichta chojni vitticaonha co ndagoen Teudas, co cain chojni que vacao ndachjequé na, co ndajoexin cainxin.

37 Co cai ichta después, are cjoinhi ná censo para vinttetaxin cain chojni, are mé joí ná xí de nonttehe Galilea que vinhi Judas. Cai ndacho xa ixin jehe xa anto importante xa, co tsje chojni vacao xa cai. Pero cai ichta chojni vitticaonha co ndagoen xa, co cain chojni que vacao xa ndachjequé na cai.

38 Mexinxin jaha ra ichta jian tančhjanda ra cain xí tehe co dixintteha ra ngain xa. Ixin si cain cosa yá jeho xa tenchehe xa, chonda que ndatsjexin toin,

39 pero si Dios ndacho cain cosa yá, jaha ra čhoja rrondacho ra ixin ndatsjexin. Mexinxin tančhjanda ra cain na para jaha ra tsetocoha ra Dios.

40 Co cainxin na vitticaon na tti ndacho Gamaliel. Cottimeja vayé na cain nirepresentanté Jesús, vintja na na ixin nttá, cottimeja coetonha na cain

chojni mé ixin irronichjaha na conixin nombré co joachaxín Jesús. Cottimeja coançhanda na na sacjoi na.

⁴¹ Co are cain chojni Jesús sacjoixin de ngain cain chojni ngain juzgado, anto ché na ixin Dios coançhanda na para vetan na tangui de ixin nombré Jesús.

⁴² Co vaquinttoeha na de vacjagoe na chojni, ixin cainxin nchanho vanichja na de ixin Jesús ngain nihngo icha importante co ngain nchiandoha tsje chojni cai.

6

Are coinchiehe na yáto xí para cjoengujna nirepresentanté Jesús

¹ Co tiempo mé, anto cotsje chojni que vaguitticaon Jesús. Pero chojni que vaguitticaon Jesús que vanichja griego nchion coñaõ na ngain chojni que vaguitticaon Jesús que vanichja hebreo. Ixin nimé ni vinttendaço na ixin cain nçhiganha que vanichja griego que vintte ngain na vacaha ncha jian vane ncha are vaonchjea na cada nchanho tti vane cain chojni que vaguitticaon ngain Jesús.

² Cottimeja tti tteyó nirepresentanté Jesús joatse cainxin chojni co ndaço ngain na:

—Nchaoha jí si janha na tsinttoa na de rronichja na joajné Dios ngain icha chojni jehõ por ixin rrochjaha na tti sine na.

³ Mexinxin icha jian ttinchiehe ra yáto xí de ngacjan jaha ra, pero xí que ditticaon jian ngain Jesucristo, co chonda joachaxin de Espíritu Santo, co chonxin quehe rinao Dios. Co tti yáto xí mé ndache ra xa para sinchehe xa xa jiji.

⁴ Co janha na rrocjan na sinttacoanxian na Dios, co sinttacoán na icha chojni joajné Dios.

⁵ Co cainxin na vitticaon na tti ndaço nirepresentanté Jesús, co coinchiehe na yáto xí. Saho coinchiehe na Esteban, tti anto vaguitticaon Jesús co tti chonda tsje joachaxin de Espíritu Santo. Co xí icha vinhi xa Felipe, Prócoro, Nicanor, Timón, Parmenas, co yatoxin xí vinhi Nicolás. Co jehõ xa joixin xa de ciudad dinhi Antioquia, co icha saho xí mé coexinhi xa vaguitticaon xa religioen chojni judío.

⁶ Cottimeja joiaho na tti yáto xí mé para ngain nirepresentanté Jesús. Co jehõ na joinchedoanxinhi na Dios co cóin rá na ngataha já tti yáto xí mé para ná señal que cain xí mé coexinhi xa joinchehe xa xa para ixin Dios.

⁷ Co ttinga icha tsje chojni coinhi joajné Dios ngain Jerusalén. Co icha cotsje chojni que vitticaon Jesús, hasta tsje xidána de ngain religioen chojni judío cai vitticaon xa ngain Jesucristo.

Are coiixinhi na Esteban

⁸ Esteban vachonda anto tsje joachaxin de Espíritu Santo co Dios anto vanchenchaon jehõ Esteban. Co jehõ Esteban vanchehe tsje milagro co señal ngattoxon con chojni.

⁹ Cottimeja joí canxion chojni de ná nihngo Israel que vinhi los Esclavos Libertados. Co cai icanxin chojni joixin de ngain ná rajna dinhi Cirene, co de ciudad de Alejandría. Co joí icha chojni cai que joixin na ná nación que dinhi Cilicia co icha chojni que joixin na nonttehe Asia. Cainxin chojni mé coexinhi na joinchediscutí na ngain Esteban.

¹⁰ Pero coixinha na ngain ixin Espíritu Santo anto cjoenguijna Esteban co cjoagoe jehe queẓén nichja ngain chojni mé.

¹¹ Mexinxin chojni mé cjoenguehe na hna icanxin chojni para ndaĉho ixin jehe na coinhi na nichja Esteban jianha de ixin Moisés co de ixin Dios.

¹² Co jañá joinchehe na para joincheguitticaon na cain chojni, co cain nivechonda joachaxin ngain nihngo Israel, co cain ximaestroé ley Israel. Cottimeja cain na coñaöhe na Esteban co tse na co joicao na ngain juzgadoe nihngo Israel.

¹³ Co cai cjoé na icanxin chojni que ndaĉho ixin Esteban nichja jianha, masqui ndoaha tti ndaĉho na. Co chojni mé ndaĉho:

—Jan, ndoa, xí yá anto nichja xa jianha de ixin nihngo icha importante co de ixin ley Israel.

¹⁴ Coian na ndaĉho xa ixin Jesús que joixin Nazaret sinchexantte nihngo icha importante jihi co tsentoxinhi cain cosa que coetoan na Moisés sonttoho na.

¹⁵ Cottimeja cain chojni nttiha tsjehe na Esteban. Co vicon na ixin jidaquín ngá con Esteban inchin ngá con ná ángel.

7

Tti ndaĉho Esteban

¹ Cottimeja xidána icha importante joanchianguihi xa Esteban co ndaĉho xa:

—¿Andoa cain tti ndaĉho chojni jihi?

² Co Esteban ndaĉho:

—Soixin ra, ttinna ni ra tti rrondaĉhjan. Dios de ján na anto jian co ẓago ngain ndoguelitoa na Abraham are vehe ndo ngain nonttehe Mesopotamia antes que jehe ndo sacjoi ndo Harán.

³ Co Dios ndaĉho ngain ndo: “Ttinttohe nontteha co cain ni ẓa ichó, co sattji ngain nontte que janha tsjagoha.”

⁴ Cottimeja ndoguelitoa na Abraham vaĉhjexin ndo de ngain nonttehe Caldea co sacjoi ndo ngain nonttehe Harán. Co vehe ndo nttiha Harán. Cottimeja ndavenhe ndodé ndoguelitoa na Abraham, co Dios rroanha ndoguelitoa na Abraham ngain nontte jihi, tti ján na te na jai.

⁵ Pero Dios ẓa joanjoha ni rioho nontte nttihi ngain ndoguelitoa na Abraham. Pero Dios ndaĉho ixin sanjo nontte mé ngain xenhe ndoguelitoa na Abraham masqui ẓa vechondaha ndo chjan tiempo mé.

⁶ Co masqui jamé, pero Dios ndaĉho ngain ndoguelitoa na Abraham ixin xanntí ndo xanĉhjen sintte xan ojé nontte que jeha nonttehe xan co ngain nontte mé tsochji xan ngain ẓa co icha chojni sinchehe feo ngain xan para nó ciento nano.

⁷ Pero cai Dios ndaĉho ngain ndoguelitoa na Abraham: “Janha rrochjaha castigo tti chojni que sinchehe feo ngain xannttia. Cottimeja jehe xan satsjixin xan de nttiha para sinchesayana xan ngain lugar jihi.”

⁸ Co are Dios joinchexhjan trato mé ngain ndoguelitoa na Abraham, Dios coetonhe ndo para chjá na ndo ná ẓohe que dinhi circuncisión. Mé rroĉho ixin cain chojni que chonda ẓohe mé, chonda parte ngain trato mé. Mexinxin are concjiji xenhe Abraham, xanIsaac, co vatto jni nchanho de concjiji xan, Abraham chjé xan ẓohe mé. Co ẓajeho jamé joinchehe Isaac después ngain Jacob, xenhe jehe Isaac. Co ẓajeho jamé joinchehe Jacob

después ngain cain tti tteyó xenhe, tti xancjoi ndogoelitoe tti tteyó grupoe chojni Israel.

⁹ 'Co cain xenhe Jacob mé, tti cjoi ndogoelitoa na xančhjen, conchjoehe na ngain José tti xanchó na icha nchin. Co jehe na joinchecji na xan ngain chojni que sacjoi ngain nonttehe Egipto. Pero Dios cjoenguijna José,

¹⁰ co masqui tsje cosa tangui conhe José nntiha Egipto, después Dios coančhjangaha José ngain cain cosa mé. Co Dios chjé jehe jian joarrixaon, co cjoenguijna José para que Faraón joinao jehe José. Faraón tti rey ngain Egipto co jehe rey mé chjé José anto tsje joachaxin para vehe gobernador de Egipto co vaquetonha ngain nchiandoha rey mé.

¹¹ 'Cottimeja vehe jinta ngain nonttehe Egipto co ngain nonttehe Canaán. Mexinxin anto tangui vehe para cain chojni ngoixin nontte mé. Co cain nindogoelitoa na xančhjen ivaguittjaha na tti vane na.

¹² Pero are Jacob conohe ixin vehe trigo ngain Egipto, rroanha nntiha canxion xenhe, tti xancjoi ndogoelitoa na xančhjen. Co mé tti saho nntiha que cjoi xan nntiha.

¹³ Co hasta tti yoxin nntiha que joiqehna xan trigo nntiha Egipto, José ndačo ngain xanchó ixin quensen jehe. Co are mé tti rey ngain Egipto conohe cai quensen nichó José.

¹⁴ Cottimeja José ndačo para joí ndodé José, ndoJacob, conixin cainxin nichó. Co cain jehe na vittja setenta y cinco chojni.

¹⁵ Jañá conhe para Jacob sacjoi Egipto, co nntiha vehe hasta ndavenhe, co cai nntiha venxin cain ndogoelitoa na xančhjen.

¹⁶ Co después xenhe sajoicao xan nntaloroe na ngain nonttehe Siquem para xavá nnta ngain cueva tti coenanxin Abraham conixin tomi ngain xenhe Hamor nntiha Siquem.

¹⁷ 'Co are ochiaon joí tti tiempo para tsonhe tti ndačo Dios ngain Abraham, cainxin chojni Israel anto cotsje na ngain Egipto.

¹⁸ Cottimeja iná rey coexinhi coetonhe na nntiha. Rey mé vechonxinha José.

¹⁹ Co rey mé joincheyehe nindogoelitoa na xančhjen co anto feo joinchehe ngain na. Co jehe rey mé coetonhe nindogoelitoa na xančhjen que tsinttohe na xenhe na que nandá vagoan para ndasenhe xan.

²⁰ Co ngain tiempo mé concjihi Moisés. Dios anto joinchexoxinhi chjan mé. Co nindoha Moisés joincheganguixin na ngain nchiandoha na, ní conittjao.

²¹ Cottimeja chonda que cointtohe na para ndarroguenhe. Co nchanho mé ná nchichehe rey vittja Moisés co sajoicao ncha para nchiandoha ncha co joinchegangi ncha Moisés inchin ná xenhe ncha.

²² Mexinxin Moisés coangui cain tti venohe chojni Egipto co jehe anto vechonxin para vanichja co cain tti vanchehe jehe, vanchehe jian.

²³ 'Are jehe ovechonda cuarenta nano, jehe xaxaon joitsjehe cain nirajné, tti chojni Israel.

²⁴ Co nntiha vicon Moisés ná chojni Egipto jittjáya ngain ná chojni Israel. Co Moisés para cjoenguijna chojni Israel que jidicaon, Moisés nagoenxon chojni Egipto que jittjáya.

²⁵ Jañá joinchehe Moisés ixin xaxaon que cain chojni Israel xajeho nirajné jehe. Co xaxaon ixin jehe na venohe na que Dios rroanha Moisés para santsjexin na de nntiha. Pero jehe na venoeha na mé.

²⁶ Co nchanho yoxin, Moisés vetan yó chojni Israel que tetteto co jehe joinao ixin irroquetoha na. Mexinxin ndacho ngain na: “Jaha ra de xajeho rajna ra, ¿quedonda tедonhe chó ra jaho ra?”

²⁷ Cottimeja tti jidoen xicompañeroe conxinca Moisés co ndacho ngain: “¿Quensen coín jaha de juez co xinajni para tsetonha nganji na?”

²⁸ ¿Arinao nasoenxon na janha cai inchin nagoenxon ná chojni Egipto jna?”

²⁹ Co are coinhi Moisés yá, sacoingaxin de nttiha co sacjoí ngain nonttehe Madián. Masqui jehe vechon nttiha, pero nttiha jeha nonttehe. Co nttiha vechonda yó xenhe xanxí.

³⁰ Vatto cuarenta nano. Cottimeja ngain rotté ná jna dinhi Sinaí, viconxin Moisés ná ángel de Dios ngacjan ná xohi. Co xohi mé jiche ngagaha ná canchaha.

³¹ Moisés medio xaoon ixin tti jehe vicon, co are conchienen ngain canchaha para vicon icha jian, coinhi ndacho Dios janhi:

³² “Janha tti Dios de nindogoelitoa xançhjen, janha tti Dios de Abraham, de Isaac, co de Jacob.” Cottimeja Moisés coexinhi xanga de joaxaoon, co ni çhoaha tsjehe icha ixin anto xaoon.

³³ Co Dios ndacho ngain: “Dantsjenga cattea de rottea ixin tti lugar que rrittingachje yá ná lugar santo.

³⁴ Janha vicon que anto tettín chojnina ngain Egipto, janha coian que tedetan na tangui, co janha xincanji na para itsoenja na jañá. Tsjexin, janha rrorroanha jaha ngain Egipto.”

³⁵ Mexinxin masqui jehe na cjoanoa na Moisés co ndacho na ngain: “¿Quensen coín jaha para ixin tsetonha co sarihi juez?”, pero Dios rroanha Moisés mé inchin ná tti tetonha co para coançhandaha na conhe na icha feo nttiha. Co rroanha tti ángel que Moisés viconxin ngacjan xoi canchaha para ndache jehe cain yá.

³⁶ Co Moisés tti joantsjexin nindogoelitoa na xançhjen de ngain Egipto, jehe tti joinchehe tsje milagro co tsje señal. Jehe joinchehe cosa mé ngain nonttehe Egipto co ngain ndachaon que dinhi Mar Rojo co ngagaha jna tti vacji na ngoixin cuarenta nano.

³⁷ Co Moisés mé tti ndacho ngain cain chojni Israel: “Dios rrorroanha ra ná chojni que sachjexin de nganji ra que rronichja tti jehe Dios tsjagoe, inchin rroanha na janha. Nchehe ra caso ngain.”

³⁸ Co Moisés mé tti vehe ngagué cain chojni are ngagaha jna. Co cai jehe vehe conixin tti ángel que nichjaxin ngataha jna Sinaí. Co cai Moisés nichjaxin ngain cain nindogoelitoa na xançhjen. Co jehe mé tti vayé palabré Dios que danjo vida, co jehe dicjin palabra mé para que ján na jai chonda na palabra cai.

³⁹ Pero nindogoelitoa na xançhjen çhoaha na vitticaon na, co coñaöhe na co joinao na sarrocjan na para Egipto.

⁴⁰ Co are Moisés xa vehe ngataha jna Sinaí cain na nichja na ngain Aarón, tti dána icha importante, co ndache na Aarón: “Rinaho na que sinchechjianna ni ra canxion dio que sitaonna na nttiha. Ixin nonaha na quehe conhe Moisés tti joantsjexin na de ngain nonttehe Egipto.”

⁴¹ Cottimeja joinchechjian na ná coxinttachjan co goen na tsje coxigo para coín na ngain dio mé. Co anto ché na ngain tti jehe na joinchechjianxin na rá na.

⁴² Cottimeja Dios sacjoixin de ngain na. Co coančhjanda na para jehe na joinchesayehe na cosa que dicen ni ngajni. Co janhi jitaxin ngain libro que dicjin profeté Dios:

Jaha ra chojni Israel, ¿agonhe ra coxigo para vachjana ra va janha ngoixin cuarenta nano ngagaha jna?

⁴³ Nahi, vachjanaha ra va tiempo mé. Sino que jaha ra vacjiho ra tti dio dinhi Moloc, co tti cosa inchin ná conotse que jaha ra ndačho ra ixin dio co ncheguini ra Renfán.

Cain retrato yá jaho ra joinchechjian ra para joinchesayehe ra.

Mexinxin janha santsjexin ra de ngain nacioan ra co rrorroanha ra icha ndaha de Babilonia.

⁴⁴ Ndačho Esteban cai:

—Ngagaha jna nindogoelitoa na xančhjen joinchechjian ná nchia de joxon manta para ixin Dios, co nttiha vaquenchjinha na tabla que jitaxin ley de Dios. Co jehe na joinchechjian na nchia mé inchin coetonha Dios ngain Moisés, ixin Dios cjoagoe Moisés co ndačho: “Nchechjian nchia inchin nchia jaha vicon.”

⁴⁵ Co are Moisés ndavenhe, Dios coinciehe Josué para coetonhe chojni Israel, co jehe sajoicao nchia mé are vantsje nindogoelitoa na xančhjen de ngagaha jna co are savacao na ngain nontte que Dios vanjo ngain na. Pero tiempo mé icha chojni vintte nttiha. Pero Dios cjoenguijna nindogoelitoa na xančhjen para vantsjexin na chojni mé de nonttehe. Co jañá cjo hasta que David joiguehe rey.

⁴⁶ Dios anto jinao rey David. Co David jinao rrojinchechjian ná nchia para ixin Dios de ndogoelitoa na Jacob.

⁴⁷ Pero Salomón tti joinchechjian nchia mé para ixin Dios.

⁴⁸ Jañá joinchehe Salomón masqui Dios que jí noi seha ngaxinhi nchia que nchechjian chojni. Ixin profeté Dios ndačho janhi:

⁴⁹ Janha Dios na co ngajni inchin nttaxintaonna co ngataha nontte inchin tti tingachje rottena. Mexinxin, ¿quehe nchia sinchechjian ra para ixin janha? ¿O ngain quexehe nchia nchao sinttajogaha?

⁵⁰ ¿Ajeha janha conixin rana tti jointtachjianxin cain cosa yá? čho Dios.

⁵¹ Pero Esteban joinchehe sigue ndačho:

—Pero soixin ra cainxin tiempo atto cha ansean ra co vittoaxinha ra vitticaon ra. Co soixin ra inchin cain tti chonxinha Dios ixin rinaoha ra sitticaon ra Dios co ttinxinha ra Palabré Dios. Cainxin tiempo ningaconhe ra Espiritu Santo inchin vanchehe cain ndogoelitoa ra xančhjen.

⁵² Nindogoelitoa ra xančhjen joinchehe na feo ngain cainxin niprofeté Dios. Co jehe na goen na cainxin chojni mé que ondačho are icha saho de ixin quexén tsí Cristo tti anto jian. Co are ojoí Cristo, soixin ra joinchechienhe ra ngain chojni romano co nagoenxon ra.

⁵³ Co masqui ángel ndache nindogoelitoa ra xančhjen ley de Dios, pero soixin ra ditticaonha ra.

Are Esteban ndavenhe

⁵⁴ Co are cain na coinhi na cain cosa yá, icha co icha coñao na ngain Esteban co hasta joinetaon neno na ixin anto coñao na ngain.

⁵⁵ Pero Esteban anto vechonda joachaxin de Espiritu Santo hasta jehe nchao tsjehe ngajni co vicon chíxo tti jí Dios co cai vicon Jesús tajingattjen ngain Dios lado jian.

⁵⁶ Cottimeja ndaĉho:

—¡Tsjexin ra, janha dicon ngajni jiĵangué co tti Xí que joixin de ngajni tajngattjen Xa ngain Dios lado jian!

⁵⁷ Pero jehe na coejé na ndatsjoen na conixin rá na co coyao na soji. Co cainxin na tse na Esteban.

⁵⁸ Joantsjexin na de ciudad mé co coaxin na Esteban ʒo. Co chojni que coaxin ʒo joantsje na lonttoe na que tetsá na co cointtohe na lonto nttiha ngain ná xanxí que vinhi Saulo.

⁵⁹ Co are tetaxin na Esteban ʒo, jehe joinchecoanxinhi Dios co ndaĉho:

—Jesús, soixin tti chonda cain joachaxin, dayehe espirituna.

⁶⁰ Cottimeja vettoxin co ndaĉho sén:

—Soixin tti chonda cain joachaxin, nchetjañehe na tti jianha que jehe na tenchehe na jaxon.

Co are joexin ndaĉho yá, jehe ndavenhe.

8

Saulo vaningaconhe chojni que vaguitticaon Jesús

¹ Co Saulo cai anto ché ixin Esteban ndavenhe.

Co ʒajeho nchanho que Esteban ndavenhe anto tsje chojni coexinhi joinchehe feo ngain chojni que vaguitticaon Jesús ngain Jerusalén. Co cainxin na chjequé na sacjoi na ngain ngoixin nonttehe Judea co nonttehe Samaria. Joho nirepresentanté Jesús sacjoixinha na de Jerusalén.

² Co canxion xí que anto jian vaguitticaon xa ngain Jesús cjoavá xa cuerpoe Esteban co anto tsjangaxin xa Esteban.

³ Co tiempo mé Saulo anto feo vanchehe ngain chojni que vaguitticaon ngain Jesús, hasta vaguixinhi nchiandoha na para vagantsje xí co nĉhí co vaquianganji na co vaquixinhi na ngain cárcel.

Are chojní Jesús nichja tti jian joajna ngain nonttehe Samaria

⁴ Pero chojni que vaĉhjexin de Jerusalén, ngoixin tti vacji na, vandache na icha chojni tti joajna que danjo iná vida naroa.

⁵ Ná de jehe na que vaĉhjexin de Jerusalén vinhi Felipe, co jehe cjoí ngain ná rajna nonttehe Samaria co coexinhi ndache chojni nttiha de ixin Cristo.

⁶ Co chojni nttiha vaquinhi na jian tti vandaĉho Felipe. Co jehe na vaguicon na cain milagro que jehe vanchehe conixin joachaxin Dios,

⁷ ixin tsje chojni que vechonda espíritu jianha vagaĉhjehe na cain tti jianha mé, co espíritu jianha mé vacoyao are vagaĉhjexin de ngain na. Co tsje chojni que choha vaquingui co chojni que choha vacji cai vacoʒoenhe na.

⁸ Mexinxin ngain rajna mé chojni anto vaché na.

⁹ Pero nttiha cai vehe ná xí que vinhi Simón. Icha saho jehe xa vehe xa ná ttošo ngain rajna mé, co jehe xa vancheyehe xa co vancheʒaon xa chojni nttiha ngain nonttehe Samaria. Co vandaĉho xa ixin jehe xa ná chojni anto importante.

¹⁰ Niyeye co ninchinnĉhin, cainxin na anto jian vaquinhi na tti vandaĉho xí mé co vandaĉho na:

—Xí yá tti chonda jie joachaxin Dios.

¹¹ Co cain na anto vaquinhi na tti vandaĉho xí mé ixin jehe xa vancheyehe xa na conixin joattosohe xa anto sé tiempo.

12 Pero are Felipe ndache na tti jian joajna de ixin que xén Dios ttetonha co de ixin nombré Jesucristo, are jehe nichja jañá, anto tsje chojni, xí co nchí vitticaon na co joiguitte na.

13 Co cai Simón vitticaon co joiguitte. Cottimeja jehe vacao Felipe. Co anto vagoan admirado are vicon tsje milagro co señal que vanchehe chojni Jesucristo.

14 Are mé cain nirepresentanté Jesús xa vintte na Jerusalén. Co are jehe na conohe na ixin chojni Samaria vitticaon na joajné Dios, rroanha na Pedro co Juan nttiha.

15 Co are cayoi nimé joiji na nttiha, joinchetsenhe na ñao Dios que jehe rrorroanha Espiritu Santo ngain chojni que vitticaon Jesús nttiha Samaria

16 ixin xa joiha Espiritu Santo conixin joachaxin ngain ni ná na, ixin jeh joiguitte na de ngain nombré Jesús.

17 Cottimeja Pedro co Juan coín rá ngataha já na co jañá joí Espiritu Santo ngain na conixin joachaxin.

18 Co are Simón vicon ixin Espiritu Santo ttí ngain chojni are nirepresentanté Jesús vaquín rá na ngataha já na, jehe joinchentoxinhi na tomí

19 co ndaço:

—Chjana ra janha joachaxin yá cai, para que are janha cai tsín rana ngataha já quexeho chojni, Espiritu Santo tsí ngain jehe na conixin joachaxin.

20 Cottimeja Pedro ndaço ngain:

—Dios sinttatján jaha conixin tomia cai ixin jaha xaxaon que tti danjo Dios nchao sina conixin tomí.

21 Jaha jiquininxinha sinchehe xa jihi ixin ansean jeha jian ngain Dios.

22 Ttendoenhe ñao cosa jianha jihi, co nchetsenhe ñao Dios para ver si jañá sinttatjañaha tti jaha xaxaon ngain ansean.

23 Janha chonxin ixin jaha anto tonchjoaha co ansean jianha, co cain cosa jianha yá tti tançhjangaha jaha para ttinxin tti jian.

24 Cottimeja Simón ndaço:

—Nchetsenhe ra ñao Dios para ixin janha para xonhi tsonna de ixin tti jaha ra ndachjenji ni ra.

25 Cottimeja Pedro co Juan ndache chojni nttiha quehe joinchehe Jesús are vacao na. Co cai jehe na nichja na palabré Dios. Cottimeja sacjan na para Jerusalén, co are ngatja nttiha, nichja na tti jian joajné Jesucristo ngain tsje rajna ngain nonttehe Samaria.

Felipe co ná xí de Etiopía

26 Are joexin cain yá, ná ángél Dios, tti chonda cain joachaxin, ndaço ngain Felipe:

—Dingattjen co sadingajin ngain nttiha que xincajinxin de Jerusalén para Gaza.

Nttiha mé datto nttia lugar tti xonhi chojni te.

27 Felipe vingattjen co sacjoi. Co ngatja nttiha mé vetanxin ná xí de nación que dinhi Etiopía. Xí mé vechonda xa tsje joachaxin ngain nchí que vaquetonhe nación mé. Co nchí mé vinhi ncha Candace. Xí mé tti venda cain tomí co cosé nchí mé. Co jehe xa cjoí ná xí eunuco ixin xonhi chjan vechonda ni xonhi nchí veaço xa. Dicji xa ngain Jerusalén para joinchesayehe xa Dios.

28 Co nchanho mé sajicjan xa para ngain nonttehe xa jingá xa carro que ttinganji conxin co jitjao xa xón que dicjin profeta Isaías.

29 Cottimeja Espiritu Santo ndaço ngain Felipe:

—Tonchienhe tti jí carro jiha co tato tti jidicao carro.

³⁰ Co are Felipe conchienne nttiha, coinhi ixin xí mé jitjao xa xón que dicjin Isaías. Felipe joanchiangui ngain xa co ndaço:

—¿Attinxin quehe rroço xón que rritjao?

³¹ Co xí mé ndaço xa:

—¿Quexén janha tsianxin, si xonhi quensen ndachjenji na quehe rroço?

Cottimeja joinchetsenhe xa ñao Felipe ixin tsani carro mé co sehe ngaca xa.

³² Co tti parte de tti jitaxin Palabré Dios que jitjao xa, mé ndaço:

Joicao na joigoen na inchin are doen na ná coleco, jamé savicao na jehe.

Co jamé inchin corregochjan tencoa va are cjinhi na va, jamé jehe cai conxireha rroha.

³³ Icha chojni cjoanoa na jehe co anto feo joinchehe na ngain masqui xonhi tiempo jehe joinchehe cosa jianha.

Co de chojni jehe, ¿quensen nchao rronichja?

Ixin jehe na nagoenxon na are jehe vehe ngataha nontte jihi.

³⁴ Co xí mé joanchianguihi xa Felipe co ndaço xa:

—Ndachjenji na nttatsanha ñao, ¿de ixin quensen ndaço Isaías? ¿Ade ixin jehe o de ixin iná chojni?

³⁵ Cottimeja Felipe coexinxin nichja de ixin lugar de Palabré Dios tti jitjao xí mé. Cottimeja jehe ndaço ngain xa tti jian joajné Jesús.

³⁶ Co are jidattocaho xa ngain ná lugar tti jí jinda, ndaço xa ngain Felipe:

—Nttihi jí jinda. ¿Açhoha siguittexin na nttihi?

³⁷ Felipe ndaço ngain xa:

—Si ndoa ditticaon jaha, nchao.

Co jehe xa ndaço xa:

—Ditticanho que Jesucristo ján Xenhe Dios.

³⁸ Cottimeja xí mé coetonha xa ixin coengattjen na carro mé, co cayoixin na vania na co sacjoi na para ngain jinda; co Felipe joincheguite xí mé.

³⁹ Co are vaçhenguixin na de jinda, Espíritu Santo que Jesús rroanha sajoicao Felipe. Co xí mé icjanha xa vicon xa Felipe, pero sacjoi xa noxon nttiha jiyá xa co anto ché xa.

⁴⁰ Co rato mé Felipe xago ngain rajna que dinhi Azoto, co sacjoi de rajna co rajna para ndache chojni tti jian joajna hasta joiji ngain ciudad de Cesarea.

9

Quexén Saulo coexinhi vitticaon ngain Jesús (Hechos 22.6-16; 26.12-18)

¹ Co tiempo mé Saulo xa anto feo vanchehe ngain chojni que vaguitticaon Jesús, tti chonda cain joachaxin. Co jehe vanchexaon de narrogoenxon cain na. Mexinxin joitsjehe xidána icha importante

² para joanchiehe xa carta que chjé jehe joachaxin para rrocjixin ngain ningoe ciudad de Damasco para rrocjé cainxin chojni que vaguitticaon tti jian joajné Jesús co para rrotse na co sarrojicao na cain na, xí co nçhi para ngain Jerusalén.

³ Pero are ngatja nttiha, ochiaon ngain ciudad de Damasco, vingasante ná xohi que joixin de ngajni ngá nttiha tti jittji.

⁴ Cottimeja Saulo vetsinga ngataha nontte co coinhi tté Jesús que ndaço:

—Saulo, Saulo, ¿quedonda ningaonna co feo nchena?

⁵ Cottimeja Saulo joanchiangui co ndaço:

—¿Quensen soixin?

Co tté mé ndačo:

—Janha Jesús tti jaha ningaconhe co feo nchehe ngain. Pero jaho rritoniha ixin jaha inchin coxinttá are xantoe va con garrocha.

⁶ Cottimeja Saulo jixanga de joaxaon co ndačo:

—¿Quehe rinao soixin que janha sinttaha?

Co Jesús ndačo:

—Dingattjen co ttji ciudad de Damasco, co nntiha jí chojni que rronhattjo quehe chonda que sinchehe jaha.

⁷ Co cain xí que joicao Saulo tavinttetsjecoa xa ixin coinhi xa tti jinichja pero xonhi quensen vintteguicon xa.

⁸ Cottimeja vingattjen Saulo de ngataha nontte, pero are conxiré jmacon ichoha vicon ixin ndacochejo. Mexinxin tsehe na rá co sajoicao na ngain ciudad de Damasco.

⁹ Are joihi na Damasco, Saulo viconha ngoixin ní nchanho, co ngoixin nchanho mé xonhi joine ni xonhi vihi.

¹⁰ Co ngain Damasco vehe ná xí vinhi Ananías co xí mé vaguitticaon xa Jesús. Co jehe xí mé cononxinhí xa Jesús, co Jesús ndačo:

—¡Ananías!

Co jehe ndačo:

—Nntihi rrihi. ¿Quehe rinao, soixin?

¹¹ Cottimeja Jesús ndačo:

—Dingattjen co sattji ngain tti nntiha dinhi Nao. Co are saso ngain nchiandoha Judas, danchiangui de ixin ná xí que joixin Tarso, dinhi Saulo. Co xí mé jincheoanxinna xa janha jaxon.

¹² Co jehe xa cononxinhí xa co vicon xa ná xí dinhi Ananías jitonchienhe ngain xa co ttín rá ngataha já xa para nchao rrocjan xa sicon xa.

¹³ Are Ananías coinhi cain yá, ndačo:

—Soixin, tsje chojni ndachjenji na de ixin xí yá co de ixin cainxin cosa jianha que joinchehe xa ngain chojni que ditticaon soixin ngain ciudad de Jerusalén.

¹⁴ Co jai jói xa nntihi conixin joachaxín xidána que tetonha ngain icha xidána para rrotse xa cain chojni nntihi que nichja jian de ixin soixin.

¹⁵ Pero Jesús ndačo ngain:

—Sattji ixin janha coinchiá xí mé para rronichja xa de ixin janha ngain chojni de icha nación co ngain cain rey de cain nación co ngain chojni Israel cai.

¹⁶ Janha tsjagoa xa cain cosa tanguí que chonda que tsonhe xa ixin jehe xa sitticaon na xa janha.

¹⁷ Cottimeja Ananías sacjoi para ngain nchia tti vehe Saulo. Co are jehe joxinhí nchia mé, jehe coín rá ngataha já Saulo, co ndačo ngain:

—Hermano Saulo, Jesús, tti chonda cain joachaxin, tti nichjaha jaha ngatja nntiha, mé tti coetonna para joihi nntihi para que jaha nchao sicon iná co para que Espíritu Santo tsí nganji jaha conixin tsje joachaxin.

¹⁸ Co rato mé vinttjixin de ngain jmacon Saulo nchin cosa inchin jochochjenhe copescado, co Saulo onchao vicon iná. Cottimeja Saulo vingattjen co joiguite.

¹⁹ Cottimeja joine co cjan vechonda fuerza iná. Co nntiha vehe ngain ciudad de Damasco canxion nchanho ngain chojni que vaguitticaon Jesús nntiha.

Are Saulo nichjé chojni ngain ciudad de Damasco de ixin Cristo

²⁰ Saulo toin coexinhi nichja ngain cain ningoe chojni judío co ndačo ixin Jesús ján tti Xenhe Dios.

²¹ Cain chojni que vaquinhi tti vandačo Saulo vagoan na admirado, co vandačo na:

—¿Ajeha xí jihi tti vanchehe feo ngain chojni ngain ciudad de Jerusalén que vaguitticaon Jesús? Co ¿ajeha xí jihi tti joí nntihi cai para ixin rrotse xa cain chojni que ditticaon Jesús co para ixin sasicao xa na para sinchechienhe xa na ngain xidána que ttetonha ngain icha xidána?

²² Pero Saulo icha vañaonha para vanichja, co cjoagoe na conixin tti xón que jitaxin Palabré Dios que ixin Jesús jehe tti Cristo, hasta chojni judío que vintte ciudad de Damasco vinttegoan na admirado ixin Saulo oditticaon ngain Cristo.

Are Saulo sacoioguehe chojni judío

²³ Cottimeja vatto tsje nchanho, co chojni judío vinttendache chó na para rrogoen na Saulo.

²⁴ Pero Saulo conohe que cjoao chó na ixin rrogoen na co ixin nchanho co ttie vachonhe na Saulo ngain cain lugar tti dačhjexin chojni de ngain ciudad ixin rrogoen na.

²⁵ Pero chojni que vaguitticaon Jesús, chojni mé ngá ná nntaša jie coengaha na Saulo co ná ttie vantsje na ngadoxin ná ventané ttjariho co joinchegania na Saulo para nontte. Ttjariho mé vehe ttjario ngoixin ngandehe ciudad mé, co jamé jehe nchao sacoiंगा.

Are Saulo vehe ngain Jerusalén

²⁶ Are Saulo joihi Jerusalén, joinao coato chojni que vaguitticaon Jesús, pero cainxin na vañagoen na ixin jehe na vitticaonha na ixin Saulo ovitticaon Jesús.

²⁷ Masqui jamé, Bernabé joicoa jehe ngain nirepresentanté Jesús. Co Bernabé ndache na ixin ngatja nntiha Saulo vicon Jesús, tti chonda cain joachaxin, co ixin Jesús nichja ngain, co ixin después de mé Saulo nichja sin joañaon ngain ciudad de Damasco conixin nombré co joachaxín Jesús.

²⁸ Co Saulo vittohe canxion nchanho ngain Jerusalén co vacao nirepresentanté Jesús.

²⁹ Jehe vañaonha para vanichja conixin nombré co joachaxín Jesús, tti chonda cain joachaxin, co cjoao chojni judío que vanichja na nguigoa griego. Pero chojni mé joinao na rrogoen na Saulo.

³⁰ Co are chojni que vaguitticaon Jesús coinhi na cainxin mé, savicao na Saulo ngain ciudad de Cesarea. Co de nntiha rroanha na ngain ciudad de Tarso.

³¹ Cottimeja cain chojni Jesús vajinao chó na, co vaquetocaoha chó na ngain ngoixin nonttehe Judea, nonttehe Galilea, co ngoi nonttehe Samaria. Co coangui na icha co icha de ixin Dios. Cainxin na vanchehe na cainxin cosa inchin joinao Jesús, tti chonda cain joachaxin. Co Espíritu Santo cjoenguijna na para que xatte icha tsje chojni.

Are Eneas coxoehenhe

³² Pedro ngaria rajna co rajna para vaguistsjehe chojni que vaguitticaon Jesús. Co ná de nchanho mé sajoitsjehe nivintte rajna Lida.

³³ Nntiha vetan ná xí vinhi Eneas que venihi co vetsinga jni nano vaquin-guiha.

³⁴ Co Pedro ndache:

—Eneas, Jesucristo sinttaʒoanha. Dingattjen co datsín caniaha.

Co rato mé vingattjen Eneas.

³⁵ Co cainxin chojni que vintte ngain rajna Lida co ngain nontte Sarón vicon na quehe conhe tti Eneas. Co cainxin chojni mé coentoxinhi na vidé na co vitticaon na Jesús, tti chonda cain joachaxin.

Are xechon nanita vinhi Dorcas

³⁶ Co tiempo mé vehe ngain ciudad de Jope ná nanita vinhi Tabita que vaguitticaon Jesús. Co ngain nguigoa griego nanita mé vinhi Dorcas. Ngoixin vidé jehe vanchehe cosa jian co vacjenguijna chojni noa.

³⁷ Co are Pedro vehe ngain rajna Lida, conihi nanita mé co ndavenhe. Cottimeja joinchetsinda na cuerpoe co vaquehe na ngain ná cuarto noi.

³⁸ Jope vehe chiaon rajna Lida, co chojni que vaguitticaon Jesús ngain Jope conohe na ixin Pedro vehe ngain rajna Lida. Mexinxin rroanha na yó xí ngain Pedro co xí mé ndaʒo xa ngain:

—Chjin na toin para rajnana na.

³⁹ Cottimeja Pedro sacjoi ngain na. Co are joihi na nchiandoha nanita, savicao na Pedro ngain cuarto tti jí cuerpoe. Co cainxin nʒhiganha vixin ndaji na co tsjanga nʒha co cjoago nʒha lontto que Dorcas vanchechjian are vechon.

⁴⁰ Cottimeja Pedro vantsje cain na. Co jehe vettoxin nttajochjihi co joinchecoanxinhi Dios. Cottimeja tsjehe nanita ndadiguenhe, co ndache:

—Tabita, dingattjen.

Cottimeja jehe nanita mé conxiré jmacon. Co are vicon nanita mé Pedro, xendoa co tavehe.

⁴¹ Cottimeja Pedro tsehe rá co joinchengattjen. Vayé cainxin chojni que vaguitticaon Jesús, conixin nʒhiganha cai, co cjoagoe na nanita jichon nanita.

⁴² Cosa jihi conohe na ngoixin ciudad de Jope co tsje chojni vitticaon na ngain Jesús, tti chonda cain joachaxin.

⁴³ Co Pedro vittohe canxion nchanho ngain ciudad mé ngain nchiandoha ná tti vinhi Simón que vagatse roé coxigo.

10

Pedro co Cornelio

¹ Co tiempo mé vehe ná xí vinhi Cornelio ngain ciudad de Cesarea. Co xí mé vehe xa capitán ngain ná grupo de cien xisoldado. Co grupo mé vinhi Italiano.

² Cornelio jeha judío, pero masqui jamé, jehe conixin nindoha anto vanchesyehé na Dios, co vanchehe na inchin joinao Dios. Co cai, jehe vanganjo tsje tomi ngain chojni judío noa. Co cainxin nchanho vanchecoanxinhi Dios.

³ Co ná nchanho inchin ní hora tsocjin jehe Cornelio vicononxinhi jian ná ángel Dios. Co ángel mé jói tti jí Cornelio co ndache:

—¡Cornelio!

⁴ Jehe Cornelio tavetsjecoa tti ángel co anto ʒaon. Cottimeja joanchiangui co ndaʒo:

—¿Quehe rinao soixin?

Cottimeja ángel mé ndache:

—Dios ján joinchehe caso tti jaha nchecoanxinhi nanao co ixin tti jaha ttjenguijna cain ninoa.

⁵ Mexinxin rroanha jaha canxion xí ngain ciudad de Jope para tsiaho na ná xí dinhi Simón co xí mé dinhi xa Pedro cai.

⁶ Jehé xa jí xa ngain nchiandoha iná tti xí dinhi Simón, pero mé datse roé co, co nchiandoha jí nchia chiaon čhica ndachaon. Co Simón Pedro rronhattjo quehe chonda que sinchehe.

⁷ Cottimeja sacjoi tti ángel nichjé, co Cornelio vayé yó ninchehe xé co ná xisoldadoe que vaguitticaon Dios cai. Co Cornelio vechondehe xisoldado mé confianza.

⁸ Co coequín na cainxin tti conhe. Cottimeja Cornelio rroanha na para Jope.

⁹ Nchanho yoxin are satettji ninchehe xé co xisoldadoe Cornelio co are ochiaon ciudad de Jope, Pedro cjoí ngataha nchia tti vehe inchin ngosine nchanho para joinchecoanxinhi Dios.

¹⁰ Co anto venhe jintta co joinao rrojine. Ngoixin tenchechjian na tti rrojine, jehé Pedro vicononxinhi tsje cosa que cjoagoe Dios.

¹¹ Vicon ngajni xiré co xincanji ná cosa inchin ná manta jie jitte canoi esquiné.

¹² Ngá manta mé vehe cain coxigo que chonda nó rotté, conché, co conttoa.

¹³ Cottimeja coinhi tté Dios que ndačho:

—Pedro, dingattjen, donhe quexeho co rinao co jintte va.

¹⁴ Pero Pedro ndačho:

—Nahi, soixin, xonhi tiempo janha joine cosa ttjoaha co ley Israel jitaxin ixin coxigo mé ttjoaha va.

¹⁵ Cottimeja Dios nichjé iná co ndačho:

—Cosa que Dios joincheroa, jaha čhoha rrondačho ixin ttjoaha.

¹⁶ Jihi conhe ní nttiha, cottimeja sacjan manta mé para ngajni.

¹⁷ Are Pedro jiřaxaon ixin quehe rročho tti vicon, ninchehe xé co xisoldadoe Cornelio ttinga tedanchiangui na ixin ttinó jí nchiandoha Simón co ojoiji na ngain puerté nchia.

¹⁸ Cottimeja joanchiangui na sén ixin anttiha jí ná tti dinhi Simón co cai dinhi Pedro.

¹⁹ Co Pedro řa jiřaxaon ixin tti vicon are Espíritu Santo ndache:

—Tsjexin, ní xí tedanchiangui xa ixin jaha.

²⁰ Dingattjen co dania co nchedudaha de sattjiho xa ixin janha rroanha chojni yá.

²¹ Cottimeja Pedro vania tti te chojni rroanha Cornelio, co Pedro ndache na:

—Janha tti tettjé ra. ¿Quehe rinao ra?

²² Jehé na ndačho na:

—Coetonna na ná xicapítan dinhi Cornelio. Jehé ná xí jian que ditticaon Dios co cainxin chojni judío chondehe na respeto co rinao na xa. Mé ná ángel de Dios jói co ndačho ngain xa ixin rrorroanha xa joajna para que soixin tsji ndoha xa co jehé xa tsinhi xa tti soixin rrondache xa.

²³ Cottimeja Pedro ndache na para vixinhi na nchia. Co ttie mé vittohe na nttiha. Nchanho yoxin Pedro sajoicao na conixin icanxin chojni que vaguitticaon Jesús que vintte ciudad de Jope.

²⁴ Ndoexin joiji na ciudad de Cesarea. Nttiha Cornelio joichonhe conixin nindoha co chojni que navacaon, cain nimé vayé Cornelio para que chonhe na njoirroé Pedro.

²⁵ Are Pedro joiji nchiandoha, Cornelio vačhje para chjé joajna co vettoxin nttajochjihi para rrojinchesayehe.

26 Pero Pedro joinchengattjen co ndache:

—Dingattjen. Caixon janha ná xí na inchin jaha.

27 Co are jehe na nichjé chó na, joixincaho chó na nchia, co nttiha dixejo tsje chojni.

28 Cottimeja Pedro ndache na:

—Jaha ra noha ra ixin chojni judío čhoha xatte ngain chojni jé ni dixinha nchiandoha na. Pero Dios cjoagohna janha ixin irrondačjanha ixin xonhi chojni o cosa ttjoaha.

29 Mexinxin are joihi chojni que jaha ra rroanha ra, toin sajoihi co xonhi joanchianguia na. Mexinxin, jaxon rinaho tsonona quedonda vayahna ni ra.

30 Cottimeja Cornelio joattehe:

—Jai vittja nó nchanho janha nttihi nchiania jointtacoanxian Dios are otsocjin, co hora mé xa joineha ixin jointtasayá Dios. Are mé vicon ná xí que jingá ná lonto jidaquín.

31 Co xí mé ndachjenji na xa: “Cornelio, Dios coinhi ixin jaha nichjehe co xaxaon tti nchehe jaha para ttjenguijna cain chojni noa.

32 Mexinxin rroanha jaha joajna ciudad de Jope para tsí Simón, tti xí que dinhi Pedro cai. Xí mé ji xa ndoha iná tti dinhi Simón, pero mé datse roé co, co nchiandoha jí nchia chiaon čhica ndachaon. Are tsí Simón Pedro, jehe rronichjaha jaha.”

33 Co jañá janha rroanha joajna jaicoa para joicjé na co anto nchao ixin jaha joihi daca. Dios jitsjehe ixin cain na te na nttihi co rinaho na tsian na cainxin cosa que jehe coetonha jaha para rrondachjenji ni ra.

Tti ndačo Pedro ngaxinhi nchiandoha Cornelio

34 Cottimeja Pedro coexinhi nichja co ndačo:

—Jai ttianxin que ndoa Dios rinao cainxin chojni, masqui ojé chojni, pero para ixin jehe cainxin na xajejo na.

35 Dios čhoha sinchejé chojni que joixin iná nontte, sino que Dios rinao cainxin chojni que nchesayehe jehe co nchehe jian.

36 Dios rroanha Jesucristo ngagué chojni Israel para que Jesucristo, tti chonda joachaxin para cainxin chojni, nichja tti jian joajna que ndačo ixin Dios itoñaoha ngain chojni.

37 Co jaha ra anto jian noha ra quehe joinchehe Jesucristo ngain nonttehe chojni judío. Co jehe coexinhi joinchehe xé ngain regioen Galilea después de que Juan joexin nichjé co joincheguitte chojni.

38 Co noha ra quexén Dios joanjo joachaxin Espíritu Santo ngain Jesús que joixin rajna Nazaret co quexén Jesús vangaria co joinchehe jian co joinchexingamehe cainxin chojni que vaguetan tangui de ixin tti jianha que vanchehe inchinji ngain. Jañá vanchehe Jesús ixin Dios jí ngain.

39 Co janha na vicon na cainxin tti vanchehe Jesús ngain nonttehe Judea co ngain ciudad de Jerusalén. Cottimeja goen na are coenganito na nttacruz.

40 Pero nchanho ninxin Dios joinchexechon Jesús co Dios cjoagohna na ixin ján xechon Jesús.

41 Cainxinha chojni vicon Jesús, jeho janha na vicon na ixin Dios co-inchieha na desde are saho para ixin rronichja na ngain icha chojni. Janha na joinequinha na Jesús co viquinha na Jesús después de xechon.

42 Co Jesús coetonna na que rrondattjan na icha chojni ixin Dios coinchiehe Jesús para sehe Juez ngain chojni techon co ngain chojni ndavintteguenhe.

⁴³ Co anto saho que Jesús joí ngataha nontte jiji, cainxin profeté Dios vandačo ixin cainxin chojni que ditticaon Jesús, Dios nchetjañehe na cainxin cosa jianha que nchehe na conixin nombré co joachaxin Jesús.

Are Espíritu Santo joí ngain chojni que jeha judío

⁴⁴ ǵa jinichja Pedro are joí Espíritu Santo ngain cainxin chojni que jittinhi joajné Pedro.

⁴⁵ Co chojni judío que vaguitticaon Jesús co joixin ciudad de Jope conixin Pedro vintegoan na admirado ixin Espíritu Santo joí cai ngain chojni que jeha judío.

⁴⁶ Ixin coinhi na oje nguigoa jinichja chojni mé co cai joinchesayehe na Dios.

⁴⁷ Cottimeja Pedro ndačo:

—Espíritu Santo joí ngain na conixin joachaxin inchin joí nganji na janha na. Mexinxin, ¿ají ná chojni que rročoha ixin jehe na siguitte na?

⁴⁸ Co Pedro coetonha ixin joiguitte na ngain nombré Jesucristo. Cottimeja chojni de Cesarea joinchetsenhe na ñao Pedro ixin sittohe ngain na icanxin nchanho.

11

Tti joinchenohe Pedro cain chojni que vaguitticaon Jesús ngain Jerusalén

¹ Nirepresentanté Jesús conixin icha chojni que vaguitticaon Jesús que vintte na nonttehe Judea, chojni mé coinhi ixin chojni que jeha judío cai vitticaon joajné Dios.

² Co are Pedro joí ngain ciudad de Jerusalén, chojni que vandačo ixin cai chojni que jeha judío chonda na que sitticaon na ngain circuncisión co ngain icha costumbré chojni judío are ditticaon na ngain Jesucristo, chojni que vandačo jañá nichja na feo de ixin Pedro.

³ Co joanchianguihi na Pedro co ndačo na:

—¿Quedonda joitsjehe co jointtecoho chojni que jeha judío?

⁴ Cottimeja Pedro coequín na cainxin lo que conhe co ndačo:

⁵—Are janha tarrihi ciudad de Jope co are rrinttacoanxian Dios, vicononx-inna ná cosa inchin ná manta jie que xincanjinxin de ngajni co jitte canoi esquiné co joí hasta tti janha rrihi.

⁶ Co are janha vicon jian ngaxinhi manta mé, vicon anto tsje coxigo que chonda nó rotté, coxigo čhintto, conché, co conttoa.

⁷ Co coian tté Dios que ndachjenji na: “Pedro, dingattjen, donhe va co jintte va.”

⁸ Pero janha ndačhan: “Nahi, soixin. ǵonhi tiempo janha joine cosa ttjoaha, co ley Israel jítaxin ixin coxigo yá ttjoaha va.”

⁹ Cottimeja tté Dios nichjahna iná co ndachjenji na: “Cosa que Dios joincheroa, jaha čhoha rrondačo ixin ttjoaha.”

¹⁰ Jiji conhe ní nttiha, cottimeja sacjan cainxin mé para ngajni.

¹¹ Rato mé joiji ní xí ngain tti nchia joarihi. Vinttequixin xa ciudad de Cesarea ixin joicé na xa.

¹² Co Espíritu Santo coetonna ixin sacjoinha xa co nchao jointtaha para sacjoinha xa. Cai cjoinha incjaon nitehe tti niditticaon Jesús. Co cain na joixinhi na nchiandoha Cornelio.

13 Xí mé coequinna na xa ixin queñén vicon xa ná ángel tajingattjen ngaxinhi nchiandoha xa co ndache xa: “Rroanha joajna ngain ciudad de Jope ixin tsí Simón tti dinhi Pedro cai.

14 Co jehe rrondattjo queñén jaha co cainxin nindoi nchao rrochonda ra iná vida naraa que xonhi tiempo tsjexin.”

15 Co are janha coexian nichjá na, Espíritu Santo ojoí ngain na conixin tsje joachaxin inchin are jói nganji na ján na are saho.

16 Cottimeja xaxanho tti ndachjenji na Jesús, tti chonda cain joachaxin; jehe ndaño: “Ndoa que Juan joincheguittexin ni conixin jinda, pero jaha ra siguittexin ra conixin Espíritu Santo.”

17 Jañá Dios rroanha Espíritu Santo ngain jehe na inchin rroanha nganji ján na are coexinhi na votticaon na Jesucristo, tti chonda cain joachaxin. Mexinxin si Dios joinchehe jamé, janha çhoha ndachjan nahi.

18 Cottimeja are chojni que vaguitticaon Jesús que vintte na ciudad de Jerusalén coinhi na yá, inichjaha na feo de ixin Pedro, co vitticaon na ixin Dios anto jian co ndaño na:

—¡Caxion Dios chjé chojni que jeha judío joachaxin para ttentoxinhi na vidé na co para rrochonda na iná vida naraa que xonhi tiempo tsjexin!

Chojni que vaguitticaon Jesús ngain ciudad de Antioquía

19 Are saho are nagoenxon na Esteban, are mé, coexinhi na anto feo joinchehe na ngain icha chojni que vaguitticaon Jesús. Co tsje chojni que vaguitticaon Jesús chonda que sacoinga na hasta tti ngain nonttehe Fenicia co ngain nontte ngosine ndachaon dinhi Chipre co cai ngain ciudad de Antioquía. Nttiha nichja na tti jian joajna pero jeha ngain chojni judío co ngain icha chojni nahi.

20 Pero canxion nivaguitticaon Jesús que joixin nontte ngosine ndachaon dinhi Chipre co rajna Cirene, chojni mé joiji na ciudad de Antioquía co ndache na chojni que jeha judío tti jian joajna de ixin Jesús, tti chonda cain joachaxin.

21 Chonda na joachaxin jehe Jesús co jañá tsje chojni coentoxinhi na vidé na co vitticaon na Jesús, tti chonda cain joachaxin.

22 Are chojni que vaguitticaon Jesús ngain ciudad de Jerusalén, conohe cain mé, rroanha na Bernabé ngain ciudad de Antioquía.

23 Are Bernabé joiji, jehe vicon ixin queñén Dios joinchenaon chojni nttiha, co are vicon mé, anto ché. Jehe ndache cain na co ndaño:

—Conixin ansean ra ditticaon ra Jesús, tti chonda cain joachaxin.

24 Co Bernabé ná chojni jian, co Espíritu Santo anto vaquetonha ngain co jehe anto vaguitticaon Jesús. Co jañá icha tsje chojni vitticaon Jesús por ixin Bernabé.

25 Cottimeja Bernabé sacjoi para ciudad de Tarso para ixin joicjé Saulo. Co are vetan Bernabé Saulo, joicao ngain ciudad de Antioquía.

26 Co vintte na nttiha ngagué chojni que vaguitticaon Jesús ngoixin ná nano co joinchecoeha na tsje chojni. Nttiha ngain ciudad de Antioquía tti saho lugar que chojni coexinhi na joincheguinhhi na chojni que vaguitticaon Jesús, cristiano.

27 Co tiempo mé canxion chojni que vanichja tti vagayé de ngain Dios joixin na de ngain Jerusalén co sacjoi na ngain ciudad de Antioquía.

28 Co ná de chojni mé vinhi Agabo vingattjen ngagué chojni que vaguitticaon Jesús. Co Espíritu Santo cjoengujna para conohe quehe nichja jehe

co ndacho ixin tsí tiempo que ngoixin mundo seha tti sine chojni. Co jaña joiconhe después, are Claudio vehe emperador.

²⁹ Cottimeja chojni que vaguitticaon Jesús ngain ciudad de Antioquía ndache chó na ixin cjoengujna na chojni que vaguitticaon Jesús, nite nonttehe Judea. Co naná na joanjo na segun inchin chonda na.

³⁰ Co jaña joinchehe na co rroanha na Bernabé co Saulo para joicaohe na tti xí que vaquetonhe chojni que vaguitticaon Jesús que vintte nonttehe Judea cain tti joatse na.

12

Are ndavenhe Jacobo co are coiaxinhi na Pedro

¹ Co tiempo mé rey Herodes coexinhi vanchehe feo ngain nivaguitticaon Jesús.

² Jehé coetonha ixin nagoenxon na Jacobo, xanchó Juan, conixin espada.

³ Co are jehe vicon ixin chojni judío joinche xoxinhi yá, jehe coetonha ixin tse na Pedro. Cosa jihu conhe ngain quiai pascua are jine na niottja que chondaha levadura.

⁴ Are tse na Pedro, coiaxinhi na ngain cárcel. Co nttiha jí nó grupo xisoldado jinda cárcel mé co cada grupo chonda nó xisoldado. Herodes xaxaon ixin are tsjexin quiai pascua, rrogantsjexin Pedro de ngain cárcel para ixin rroguicon chojni are Pedro ngain juzgado co are ndarroguenhe.

⁵ Co jaña Pedro tajiixinhi co tsje xisoldado jinda. Pero chojni que vaguitticaon Jesús nchanho co ttie vanchetsenhe na ñao Dios para ixin Pedro.

Dios vantsjexin Pedro de ngain cárcel

⁶ Ttie mé co ndoexin Herodes rrogantsjexin Pedro de ngain cárcel para rrojinchejuzguehe, co ttie mé Pedro tajihoa ngagué yó xisoldado co tajiçhiixin yó cadena co icanxin xisoldado tenda xa cárcel ndojaxin.

⁷ Co rato mé joi ná ángel Dios co ngoixin ngaxinhi cárcel anto vingasán xohi. Angel mé catte nttachén Pedro co joinchexingamehe co ndache Pedro:

—Dingattjen jaicoa.

Cottimeja cadena tti jichixin rá Pedro vinttji cadena ngataha nontte.

⁸ Co ángel mé ndache:

—Nchenttedo cinturoan co tjanga cattea.

Co are Pedro joinchehe cain yá, ángel mé ndacho ngain:

—Daritsí noxá co chjin na.

⁹ Co Pedro rroé ángel co sacjoi, masqui noeha andoa ni nahi tti jitsjehe. xaxaon ixin jitsjehe inchin are toxinxin ni.

¹⁰ Pero vatto na tti te xisoldado saho co xisoldado yoxin, co are joihi na ngain puerta chia que jixin nongaxin nttiha, xiré puerta jehó puerta. Co vachje na, co cjoi na inchin ná esquina. Cottimeja ángel cointtohe jehó Pedro.

¹¹ Cottimeja Pedro coinxin co ndacho:

—Janché onona ixin Jesús, tti chonda cain joachaxin, rroanha ná ángel co vantsjexin na de ngá rá Herodes co de ngain cainxin tti rrojinchena chojni judío.

¹² Co are Pedro xa ji xaxaon de ixin cain yá, sacjoi nchiandoha María, janné Juan que cai vinhi Marcos. Co nttiha anto tsje chojni tenchetsenhe na ñao Dios.

¹³ Co are Pedro vinga puerta, vachje ná xannchí vinhi Rode para joitsjehe xan quensen joi.

¹⁴ Co are coinhi xan tté Pedro, anto ché xan co xa conxireha xan puerta. Sacjan xan ttinga xan joiquetonha xan ngaxinhi ixin Pedro ngain puerta tají.

¹⁵ Cottimeja ndačho cainxin na:

—¡Ndadixenga jaha!

Co jehe xan anto ndačho xan ixin ndoa. Pero masqui jamé, jehe na ndačho na:

—Jeha jehe Pedro. Yá tti ángel que jinda Pedro.

¹⁶ Co ngoi rato mé ndoja Pedro xa jidinga puerta. Co are conxiré na puerta co vicon na Pedro, cainxin na xaon na.

¹⁷ Pero jehe joinchehe seña conixin rá para que jehe na tencoa na co coequinhi na quexén Jesús vantsjexin de ngaxinhi cárcel co ndache na:

—Ttequinhi ra cain yá Jacobo co ni icha que ditticaon Jesús.

Cottimeja vachje co sacjoi ojé lugar.

¹⁸ Co are vingasán xisoldado anto xaon xa ixin noeha xa quehe conhe conixin Pedro.

¹⁹ Herodes coetonha joicjé na pero čho ha vittja na. Cottimeja Herodes joanchianguihi xisoldado ixin quexén Pedro sacjoi, co coetonha nagoenxon na cainxin xisoldado mé. Cottimeja Herodes sacjoixin de nonttehe Judea co sacjoi ngain ciudad de Cesarea. Co nttiha vehe tsje nchanho.

Are ndavenhe Herodes

²⁰ Icha saho Herodes vaganjo tti vane chojni ciudad de Tiro co Sidón. Cottimeja Herodes coñao ngain chojni mé. Co jehe na cjoao chó na ixin joitsjehe na Herodes. Co jehe na joincheconvensé na Blasto, ná xinchehe xé Herodes que chonda xa tsje joachaxin, ixin ndache xa Herodes ixin itsoñaoha ngain cayoi ciudad mé.

²¹ Co Herodes coín ná nchanho para ixin coinhi tti ndačho na. Co nchanho mé vengá lonttoe rey co tavetaha ntaxintaon tti dehe are ttetonha, co coexinhi nichja ngain cain chojni.

²² Cottimeja cainxin chojni coexinhi coyao na co ndačho na:

—¡Jeha ná xí tti jinichja! ¡Jihi ná dios!

²³ Co rato mé ná ángel Jesús, tti chonda cain joachaxin, joinchehe que tse ná chin co joxon cotsindo coexinhi joine cuerpoe hasta ndavenhe jehe Herodes. Jañá conhe Herodes ixin joinao que chojni joinchequinhi na dios jehe.

²⁴ Pero icha co icha tsje chojni coinhi joajné Dios co jamé icha co icha tsje lugar chojni vitticaon na Jesús.

²⁵ Co are Bernabé co Saulo joexin joinchehe na xé na, cjanxin na de ngain ciudad de Jerusalén co joicao na Juan que vinhi Marcos cai.

13

Are Bernabé co Saulo coexinhi nichja joajné Dios ngain icha lugar

¹ Ngagué chojni que vaguitticaon Jesús ngain ciudad de Antioquía vintte canxion chojni que vagayé joajna de ngain Dios co cai vintte canxion tti joinchecoenhe chojni de ixin Dios. Chojni mé vinhi Bernabé, Simón (que vinhi cai tti Ttie), Lucio de ciudad de Cirene, Manaén (que vanguicaho Herodes tti vaquetonha ngain nonttehe Galilea), co Saulo.

² Ná nchanho are tecjáno na co tenchecoanxinhi na Jesús, tti chonda cain joachaxin, Espíritu Santo ndačho ngain na:

—Rroanha ra Bernabé co Saulo ngain tti xa que janha ochjaha na.

³ Cottimeja cjáno na co joinchecoanxinhi na Dios icha, co después coín rá ni icha ngataha já cayoi na. Cottimeja rroanha na na savinttecji na.

Bernabé co Saulo ngain nontte ngosine ndachaon dinhi Chipre

⁴ Cottimeja Bernabé co Saulo sacjoi ngain ciudad de Seleucia inchin coetonha Espíritu Santo. Co nntiha coaxin na barco que sajoicao na ngain nontte ngosine ndachaon dinhi Chipre.

⁵ Co are joihi na ciudad de Salamina, tti dengattjen barco, coexinhi na nichja na joainé Dios ngaxinhi cainxin ningoe chojni judío. Co cai joicao na Juan Marcos ixin cjoenguijna na.

⁶ Joingaria na ngoixin nontte mé hasta joihi na ciudad de Pafos. Nntiha vetan na ná chojni judío que vinhi Barjesús. Co xí mé ttoso xa. Co jehe xa joincheyehe xa chojni ixin ndaço xa que nichja xa para ixin Dios.

⁷ Xittoso mé anto xiamigoe xa xigobernador que vinhi Sergio Paulo. Xigobernador mé vechonda xa jian joarrixaon. Co xí mé rroanha xa joajna ixin jói Bernabé co Saulo ixin joinao xa coinhi xa joainé Dios.

⁸ Co xittoso mé, que cai vinhi xa Elimas, choha xa co joinaoha xa ixin xigobernador rroguitticaonxin xa tti nichja na.

⁹ Cottimeja Saulo, que cai vinhi Pablo, tavetsjehe xittoso mé jian. Co Pablo anto tsje joachaxín Espíritu Santo chonda.

¹⁰ Co jehe ndache xa:

—Jaha tti ncheyehe chojni, co jaha nchehe jianha; jaha xenhe inchínji co jaha tti ningaconhe cainxin tti jian. ¿Quedonda toncjamangui palabré Jesús, tti chonda cain joachaxin, para que chojni sitticaonha na jehe?

¹¹ Janché, jehe Jesús sinttastigá jaha co tsejé jmacon co jaha siconha canxion nchanho.

Co rato mé ndaconaxinhi xa xehe. Cottimeja cjoé xa ná tti rrotse rá xa ixin idiconha xa.

¹² Co are xigobernador vicon quehe conhe jehe xittoso mé, vitticaon xa Jesús ixin jehe xa tavetsjecoa xa ixin tti cjoagoe na xa de ixin Jesús, tti chonda cain joachaxin.

Pablo co Bernabé ngain ciudad de Antioquía que jí nonttehe Pisidia

¹³ Pablo co xijoicao ngain ciudad de Pafos nntiha coaxin na barco co sacjoi na ngain ciudad de Perge ngain nonttehe Panfilia. Pero Juan Marcos cointtohe na co sacjan ngain ciudad de Jerusalén.

¹⁴ Cottimeja jehe na sacjoixin na de ngain ciudad de Perge co sacjoi na ciudad de Antioquía que jí ngain nonttehe Pisidia. Co nntiha are nchanho que nchejogaha na, joixinhi na ningoe chojni judío co tavintte na.

¹⁵ Cottimeja are xivaquetonhe nihngo mé joexin tsjehe xa xón que jitaxin ley que vayé Moisés co xón que jitaxin tti dicjin profeté Dios, xí mé rroanha xa joajna ngain na co ndaço xa:

—Si jaha ra noha ra choan palabra jian para ixin chojni nntihi, nchao nichja ra jaxon.

¹⁶ Cottimeja Pablo vingattjen co joatsín rá para ixin chojni rrotenco na co ndaço:

—Tsjexin ra jaha ra chojni Israel co jaha ra que xagonhe ra Dios.

¹⁷ Dios de chojni Israel coinchiehe ndogolitoa na xanchjen co jehe cjoenguijna na para anto cotsje na are xa vintte na nonttehe Egipto. Co después Dios vantsjexin na de nntiha conixin joachaxín.

¹⁸ Co Dios anto venda cainxin chojni mé ngoixin cuarenta nano ngagaha jna, masqui jehe na antoha jian vaguitticaon na ngain Dios.

19 Cottimeja Dios conxante yáto nación que vintte ngain nonttehe Canaán. Co cainxin nontte mé joanjo Dios ngain ndogoelitoa na xançhjen para inchin cuatrocientos cincuenta nano.

20 Co ngoixin tiempo mé Dios coinchiehe tsje xijuez para coetonhe chojni mé hasta are jói profeta que vinhi Samuel.

21 Cottimeja chojni Israel joinchetsenhe na ñao Dios para que ná xirey rroquetonha ngain na. Mexinxin Dios joanjo ná xí vinhi Saúl, xenhe Cis, co mé ná xanntti ndogoelitoa na xançhjen que vinhi Benjamín. Co xí mé vehe rey ngoixin cuarenta nano.

22 Cottimeja Dios joantsjehe Saúl joachaxin de rey, co chjé David joachaxin de rey. Co Dios ndaço de ixin David: “David, tti xenhe Isaí, ná xí que janha anto ncheçoxinna co jehe sinchehe cainxin tti janha rinaho.”

23 Jesús vehe ná xanntti xançhjen de David mé co Dios rroanha Jesús para danjo chojni Israel iná vida nara que xonhi tiempo tsjexin, inchin jehe ndaço are saho.

24 Icha saho que Jesús jói, Juan vanichjé cainxin chojni Israel co ndache na ixin chonda na que tsentoxinhi na vidé na co siguitte na.

25 Co are Juan chiaon jittjexin vidé, ndaço: “Janha jeha tti jaha ra xaxaon ra. Co después de janha, tsí ná tti rrochonda anto tsje joachaxin co janha jiquininxinha na ni para sisehe tsonxindangá corrié catté.”

26 Hermanos, joajné Dios tti danjo iná vida naraixin, mé para ixin jaha ra xo xanntti xançhjen de Abraham co jaha ra xo xagonhe ra Dios.

27 Chojni que vintte ciudad de Jerusalén co xivaquetonhe chojni joinoeha na quensen Jesús co ni vaquinxinha na tti vacjin profeté Dios masqui vatsjehe na xón mé ngaxinhi ningoe na cada nchanho que nchejogaha na. Pero masqui jamé, are ndache chó na ixin nagoenxon na Jesús, jañá joinchehe na inchin ondaço profeté Dios icha saho.

28 Co masqui chondaha na razón para nasoenxon na Jesús, pero joinchetsenhe na ñao Pilato ixin rrorroanha xisoldado para nasoenxon xa Jesús.

29 Mexinxin are joexin goen xa Jesús inchin jitaxin ngain Palabré Dios, chojni jehe joinchegania na de nganito cruz co cjoavá na.

30 Pero Dios joinchexechon jehe Jesús.

31 Co para tsje nchanho Jesús xago ngain chojni que vacao are joixin nonttehe Galilea co sacjoi ngain ciudad de Jerusalén. Co chojni mé tti ndache icha chojni de ixin Jesús jai.

32 Co jañá janha na tenichja na tti jian joajna de ixin tti ndaço Dios ngain nindogoelitoa na xançhjen are saho.

33 Co ján na xanntti xançhjen na de nindogoelitoa na. Mexinxin jai Dios ojoinchexechon Jesús. Co jehe Dios joinchehe mé para ixin ján na inchin jehe ndaço ngain yoxin Salmo sé tiempo vatto. Co Salmo mé ndaço: “Jaha Xanhna. Co janha chjaha vida jai.”

34 Co cai are saho Dios cjoago ixin rrojinchexechon Jesús para que rrorrengaha cuerpo are ndaço ngain Palabré Dios: “Janha sinttanchaon jaha ra inchin ndattjan David.”

35 Mexinxin cai ndaço ngain iná Salmo: “Co soixin sanjoha joachaxin para rrorrenga cuerpona janha tti nttaha xá soixin ixin soixin anto rinao na.”

36 Co, ndoa, David joinchehe xé Dios ngagué chojni que vintte are tiempoe David inchin coetonha Dios. Pero cottimeja ndavenhe co xavá çhica nindoha co cuerpo ndarrenga.

³⁷ Pero cuerpoe Jesús que Dios joinchexechon, xonhi conhe.

³⁸ Mexinxin cain jaha ra chonda que tsonoha ra ixin Jesús nchao nchetjañehe chojni cain tti jianha que nchehe na.

³⁹ Ley que vayé Moisés çhoha nchetjañehe cain tti jianha que nchehe chojni, pero conixin Jesús cainxin chojni que ditticaon Jesús, ditjañehe cain tti jianha que nchehe na.

⁴⁰ Mexinxin ttijho ra cuidado ixin tsoenha nganji ra inchin dicjin profeté Dios ngain tti jitaxin Palabré Dios are ndaço na:

⁴¹ Tsjexin ra, jaha ra xo tjanoa ra, tadinttetsjecoa ra co ndasenne ra ixin janha Dios na. Co janha sinttaha ná cosa ngain tiempoa ra co cosa mé sitticaonha ra masqui chojni rrondatjo ra.

⁴² Cottimeja are Pablo co xijoicao vaçhjexin na de ningoe chojni judío, chojni que jaha judío joinchetsenne na ñao Pablo ixin are sinchejogaha na iná nttiha ijni nchanho, tsinhi na çajeho tti nichja Pablo.

⁴³ Are cainxin chojni vaçhjexin nihngo, tsje chojni judío co canxion chojni que jaha judío pero que vaguitticaon na inchin chojni judío, cain nimé rroé na Pablo co Bernabé. Co Pablo co Bernabé ndache na ixin jehe na tsinttoeha na de sinao na Dios.

⁴⁴ Are jói nchanho que nchejogaha chojni judío iná, merocoa ngoixin ciudad çatte ngain ningoe chojni judío ixin tsinhi na joajné Dios.

⁴⁵ Pero are chojni judío vicon ixin jói anto tsje chojni, coexinhi na conchjoehe na co coexinhi na nichja na ojé que Pablo jinichja co nichja na jianha de ixin Pablo.

⁴⁶ Cottimeja Pablo co Bernabé çaonha are nichja co ndache na:

—Chonda que nichja na joajné Dios nganji ra saho ixin jaha ra judío ra. Pero jaha ra rinaoha ra tsinhi ra co jaha ra çaxaonha ra ixin jian para rrochonda ra iná vida naroaxin que xonhi tiempo tsjexin. Mexinxin jaxon janha na rronichja na ngain chojni que jaha judío.

⁴⁷ Ixin jañá coetonna na Dios, tti chonda cain joachaxin, ixin ndaço:

Janha Joaqué jaha inchin ná xohi para ixin cainxin nación.

Co para rronichjehe chojni ngoixin mundo que nchao rrochonda na iná vida naraa que xonhi tiempo tsjexin.

⁴⁸ Are coinhi chojni que jaha judío, anto ché na co coexinhi na ndaço na ixin joajné Jesucristo, tti chonda cain joachaxin, atto jian. Co cainxin nicoinchiehe Dios ixin chonda na iná vida naroaxin que xonhi tiempo tsjexin, cainxin nimé vitticaon na Jesús.

⁴⁹ Co jañá coexinhi na nichja na ngoixin nonttehe Pisidia joajné Jesús, tti chonda cain joachaxin.

⁵⁰ Pero chojni judío nichja ngain canxion nanita que anto jian vaguitticaon inchin chojni judío, co ngain tattita que vinttechonda joachaxin ngain ciudad mé. Co ndache na cain nimé ixin ningaconhe na Pablo co Bernabé. Co hasta vantsjexin na na de ngain nontte mé.

⁵¹ Cottimeja Pablo co Bernabé contsjenga na rotté na para ixin vinttji jinche co jamé joinchehe na señal ixin chojni nttiha vitticaonha na joajné Jesucristo. Cottimeja sacjoi na ngain ciudad de Iconio.

⁵² Co chojni que vaguitticaon Jesús anto ché na co anto vacançhjanda na Espíritu Santo para vaquetonhe na.

14

Are Pablo co Bernabé ngain ciudad de Iconio

¹ Ngain ciudad de Iconio Pablo co Bernabé joixinhi ningoe chojni judío co nichja na jian. Jañá tsje chojni judío co tsje chojni que jeha judío vitticaon na ngain Jesús.

² Pero chojni judío que vitticaonha Jesús ndache chojni que jeha judío para ningaonhe na co ʒaaxon na jianha de ixin chojni que vaguitticaon Jesús.

³ Mexinxin Pablo co Bernabé vittohe na nttiha sé co nichja na co ʒaonha na co chonda na confianza ngain Jesús, tti chonda cain joachaxin. Co Jesús joinchesegurá tti jeha na ndačo na de ixin que ʒén Dios rinao cain chojni ixin joanjo joachaxin para joinchehe na tsje milagro.

⁴ Co nchion chojni de ciudad mé ʒaaxon na inchin chojni judío, co nchion na ʒaaxon na inchin nirepresentaté Jesús.

⁵ Mexinxin chojni judío co chojni que jeha judío nichjé na xinchíxin co cjoao chó na ixin rrocoyaotte na na co rrocaxin na na ʒo.

⁶ Are Pablo co Bernabé conohe mé, sacoinga na co sacjoi na ngain rajna Listra co ngain rajna Derbe, co ngain nontte te chiaon, co cayoi rajna mé te nonttehe Licaonia.

⁷ Co nttiha cai nichja na tti jian joajnέ Jesús.

Are coaxin na ʒo Pablo ngain rajna Listra

⁸ Nttiha rajna Listra vehe ná xí que ʒhoa vacji desde are goan.

⁹ Xí mé tajittinhi xa tti ndačo Pablo, co Pablo tsjehe xa jian co conohe ixin xí mé vitticaon xa co vechonda xa fe de que ixin nchao rroxingamehe xa.

¹⁰ Cottimeja Pablo ndache xa sén:

—Daringattjen jian conixin rottea.

Co xí mé ʒhinca xa vingattjen xa co coexinhi xa cjoi xa.

¹¹ Co are chojni vicon tti joinchehe Pablo, coexinhi na coyao na ixin nguigoehē nonttehe Licaonia co ndačo na:

—Joi yó dios nganji na inchin xí.

¹² Co nimé ndačo na ixin Bernabé ná dios vinhi Júpiter co Pablo ná dios vinhi Mercurio ixin jeha tti nichja.

¹³ Co ngandehē rajna vehe ná nihngo tti vanchecoanxinhi na Júpiter. Co ná xidané Júpiter joiaho coxinttá jitte va tsjo. Co xidána co chojni mé joinao na rrogoen na coxintta para rrojinchesayehe na Pablo co Bernabé.

¹⁴ Pero are Bernabé co Pablo, yó de tti representanté Jesús, conohe na yá coinchje na lonttoe na co coinga na cjoi na ngain tti jí tsje chojni co ndačo na sén:

¹⁵ —¿Quedonda jañá tenchehe ra? Janha na xí na inchin jaha ra. Co janha na joihi na para ixin rroundattjo ra ixin chonda ra que tsinttohe ra cosa jiji que ʒonhi ʒé co sitticaon ra Dios tti jichon. Dios mé tti joinchechjian ngajni, nontte, ndachaon co cainxin cosa que jí.

¹⁶ Are icha saho Dios coančhanda chojni joinchehe na inchin joinao na.

¹⁷ Co masqui jamé, cainxin tiempo jeha nchehe jian ngain chojni co jamé tjago ixin jeha Dios. Jeha nchegania ʒhin co danjo jian cosecha, co ʒhá na cain tti jontte na co cai ʒhá na icha cosa para que ján na anto chá na.

¹⁸ Pero masqui ndačo na cain yá, jeha na anto tangui cayacoenxin na chojni ixin goenha na coxinttá rrococayexin na.

¹⁹ Cottimeja canxion chojni judío que vitticaonha Jesucristo joixin de ngain ciudad de Antioquía co Iconio co jeha na ndache na chojni rajna Listra

ixin coaxin na Pablo xo. Co are joexin coaxin na xo, jehe na xaxaon na ixin ondavenhe Pablo co coinganji na hasta tti ngandehe rajna.

²⁰ Pero are chojni que vaguitticaon Jesús xatte na ngandaji Pablo, jehe vingattjen co sacjan ngaxinhi rajna iná. Co nchanho yoxin sajoicao Bernabé ngain rajna Derbe.

²¹ Ngain rajna Derbe nichja na tti jian joajné Jesucristo, co jañá tsje chojni vitticaon Jesús. Cottimeja cjan na iná ngain rajna Listra co ngain ciudad de Iconio co ngain ciudad de Antioquía.

²² Co ngain cainxin lugar mé Pablo co Bernabé ndache chojni que joinchehe sigue jian vaguitticaon Jesús. Co ndache na na ixin cain chojni chonda que tsixinhi na are anto tangui tsonhe na, co jamé rrochonda na parte ngain tti tetonha Dios.

²³ Co coinchiehe na canxion xí ngain cada lugar para vaquetonhe chojni que vaguitticaon Jesús nttiha. Co are joexin joinchecoanxinhi na Dios co are xa vintteçjáño na, jehe na joinchetsenhe na ñao Jesús, tti chonda cain joachaxin, ixin cjoenguijna cain chojni mé que vaguitticaon ngain jehe Jesús.

Pablo co Bernabé sacjan ngain ciudad de Antioquía nonttehe Siria

²⁴ Cottimeja vatto na ngain nonttehe Pisidia co joiji na ngain nonttehe Panfilia.

²⁵ Co nichja na tti jian joajné Jesucristo nttiha ngain ciudad de Perge. Cottimeja sacjoi na ngain rajna Atalia.

²⁶ Nttiha coaxin na barco co sacjoi na ngain ciudad de Antioquía, tti ciudad joixin na are coexinhi na sacjoi na are chojni que vaguitticaon Jesús nttiha joinchetsenhe na ñao Dios ixin cjoenguijna na ngain xa, co jaxon Pablo co Bernabé sacjan na ixin ojehe na xa mé.

²⁷ Co are joiji na ciudad de Antioquía joatse na cain chojni que vaguitticaon Jesús co coequinhi na na cainxin tti joinchehe Dios ngain na co quexén Dios coanchjanda vitticaon chojni que jeha judío.

²⁸ Co Pablo co Bernabé vittohe sé nttiha ngain chojni que vaguitticaon Jesús.

15

Are xatte na ngain Jerusalén

¹ Co tiempo mé canxion xí que sacjoixin xa de nonttehe Judea para ngain ciudad de Antioquía coexinhi xa joinchecoenhe xa chojni ixin cain chojni que rinao sayé iná vida narao chonda que tsa na xohe que dinhi circuncisión inchin coetonha Moisés.

² Pero Pablo co Bernabé vitticaonha na ixin chojni que ditticaon Jesús chonda que tsa na xohe. Mexinxin anto joinchediscutí chó na. Cottimeja chojni que vaguitticaon Jesús nttiha Antioquía coinchiehe Pablo co Bernabé co icha xí para tsji sicjao representanté Jesús co tti vaquetonhe nivaguitticaon Jesús que jí ngain Jerusalén. Jehe na tsji na sicjao na na quexén tsonhe, ¿atsa na xohe ani nahi?

³ Chojni que vaguitticaon Jesús ngain ciudad de Antioquía rroanha na na. Sacjoi na co vatto na ngain nonttehe Fenicia co nonttehe Samaria. Co ndache na chojni nttiha ixin tsje chojni que jeha judío jai ovitticaon na ngain Dios. Co cainxin chojni que vaguitticaon Jesús nttiha anto ché na are coinhi na yá.

⁴ Are Pablo co Bernabé joiji na ngain ciudad de Jerusalén, cain chojni que vaguitticaon Jesús conixin cain representanté Jesús co cain xí que

vaquetonhe chojni que vaguitticaon Jesús, cain nimé vayé na Pablo co Bernabé. Co coequinhi na na cainxin tti joinchehe Dios ngain na.

⁵ Pero canxion xifariseo que vaguitticaon Jesús vingattjen xa co vinttendačo xa:

—Chojni que jeha judío chonda que sayé na xöhe que dinhi circuncisión are sitticaon na Jesús, co chonda que sinchehe na cainxin tti ttetonha ley que vayé Moisés.

⁶ Cottimeja nirepresentanté Jesús co cain xí que vaquetonhe chojni que vaguitticaon Jesús, nimé niŕatte ixin cjoao na de ixin cosa mé.

⁷ Anto cjoao chó na. Cottimeja Pedro vingattjen co ndache na:

—Jaha ra noha ra ixin icha saho Dios coinchiehna janha de ngayaha ra para que rrondattjan chojni que jeha judío tti jian joajna que danjo iná vida naraoxin, jamé para que jehe na sitticaon na ngain Jesús.

⁸ Co Dios, tti chonxin cainxin ansén na, cjoago ixin jehe vayé chojni mé ixin jehe rroanha Espíritu Santo ngain jehe na inchin rroanha nganji ján na.

⁹ Dios ndačo ixin jehe na co ján na xajeho na ngattoxon con jehe ixin jehe joincheroa ansén na por ixin confianza que chonda na ngain Jesucristo inchin joinchehe nganji ján na.

¹⁰ Jai, ¿quedonda ditticaonha ra tti joinchehe Dios? Nindogoelitoa na xančhjen čoha joinchehe ndo cain tti ndačo ley que vayé Moisés. Mexinxin čoha tsetonhe ra chojni que ditticaon Jesús que jeha judío ixin sinchehe na tsje ley que ni ján na čoha jointtoho na co ni ndogoelitoa na xančhjen čoha joinchehe ndo.

¹¹ Ncheha ra jamé. Noa na ixin Dios vanjo iná vida nara co xonhi joinhecobra ixin Jesús, tti chonda cain joachaxin, rinao na ján na co cai jehe na.

¹² Cottimeja cainxin jehe na tencoa na co coinhi na are Bernabé co Pablo coequinhi na quecá señal co milagro joinchehe Dios ngagué chojni que jeha judío.

¹³ Are joexin nichja na, Jacobo ndačo:

—Hermano, ttinna ni ra:

¹⁴ Simón Pedro coequinna na quexén Dios cjoago ixin anto rinao chojni que jeha judío co coinchiehe chojni mé cai para soan chojni Dios.

¹⁵ Cainxin yá inchin tti ocjin profeté Dios ngain tti jitaxin Palabré Dios. Co Palabra mé ndačo:

¹⁶ Cottimeja janha rrocjan na sihi iná

co inchin ná tti ttette nchia que oxantte,

jañá janha sinttaha para ixin chojni sinchesayana na inchin joinchesayana na are tiempoe David;

janha sinttaha para ixin chojni sinchecoanxinna co sinchehe inchin janha rrondačhan,

¹⁷ jañá sinttaha para que chojni ngoixin mundo sinao sitticaon na,

co para ngain cainxin nación sintte chojnina.

¹⁸ Jañá čho Dios, tti chonda cain joachaxin, que joinchenona na cainxin jihi desde osé.

¹⁹ Mexinxin janha ndačhan ixin inttogetanha na tangui chojni que ditticaon Dios que jeha judío.

²⁰ Jeho rrocjinhi na na ixin isineha na tti joaquehe na ngain ídolo. Co ixin sinttejoacaoha na nčhi que jeha nčhičhihi na o xí que jeha xixihi na,

co ixin sineha na nntaohe coxigo diguisinguehe na ttosin ixin coxigo mé dinttjinguia va jni, co sineha na jní va cai.

²¹ Ixin ngain cada rajna co para tsje nano te chojni que nchecoenhe chojni ley que vayé Moisés, co ley mé tsjehe na ngain ningoe chojni judío cada nchanho que nchejogaha na.

²² Cottimeja nirepresentanté Jesús co tti xí que vaquetonhe chojni que vaguitticaon Jesús, conixin cainxin chojni que vaguitticaon Jesús nntiha Jerusalén, cain nimé cjoao chó na ixin coinciehe na canxion chojni de ngagué na para rroanha na na conixin Pablo co Bernabé ngain ciudad de Antioquía. Coinchiehe na Judas que cai vinhi Barsabás co iná xí vinhi Silas. Co chojni que vaguitticaon Jesús anto vechonda respeto ngain cayoi xí mé.

²³ Co chojni que coinciehe na joinchechjian ná carta, co Judas co Silas joicao carta mé para ngain ciudad de Antioquía. Co carta mé ndačo carta:

“Janha na xo representante na de Jesús co xo ttetonhe chojni que ditticaon Jesús conixin cain icha chojni que ditticaon Jesús nntihi chjaha ra joajna jaha ra xo jeha judío ra pero ditticaon ra Jesús, jaha ra xo te ra ngain Antioquía co ngain nonttehe Siria co ngain nonttehe Cilicia.

²⁴ Janha na coian na ixin canxion chojni cjoixin de nntihi co jointtaguetanha ra na tangui conixin tti ndačo na. Mexinxin jaha ra noaha ra quehe nchao sinchehe ra ixin jehe na ndattjo ra na ixin chonda que tsa ra xohe co sitticaon ra tti ttetonha ley que vayé Moisés. Pero xonhi tiempo janha na chjaha na na joachaxin para nichja na jañá.

²⁵ Mexinxin cjoao chian na co xaxanho na ixin anto nchao jí ixin coincíá na canxion chojni ngaguehna na ixin tsji na sitsjaha ra na conixin Bernabé co Pablo, tti ján na rinao na co tti ditticaon Jesús inchin cain na.

²⁶ Co jehe na coín vidé na en peligro de ixin causexin Jesucristo, tti chonda cain joachaxin para ixin ján na.

²⁷ Mexinxin rroanha na Judas co Silas nganji ra co jehe na rroundattjo ra na cainxin tti cjoao chian na.

²⁸ Espíritu Santo cjoenguijna na, mexinxin xaxanho na ixin nchao jí ixin itsetoanha ra na sitticaon ra tsje ley que anto tangui para ixin chojni sinchehe. Jeho ley tehi chonda que sitticaon ra:

²⁹ sintteha ra nntaohe coxigo que joaquehe na ngain ídolo, co cai sintteha ra jní va co ni sintteha ra nntaohe coxigo que diguisinguehe na ttosin, co sinttehcicoha ra nchí que jeha nchíchiha ra, ni xí que jeha xixiha ra. Co si sitticaon ra cain jili, sinchehe ra jian. Dios senda ra tti te ra.” Jañá jitaxin carta.

³⁰ Cottimeja orroanha na na co sacjoi na ngain ciudad de Antioquía. Co nntiha joatse na cainxin chojni que vaguitticaon Jesús co joanjo na carta que joicao na.

³¹ Co are chojni que vaguitticaon Jesús tsjehe na carta mé, anto ché na ixin tti jitaxin ngá xón vantsjehe na joachjaon chonda ansén na.

³² Co ixin Judas co Silas cai chonda joachaxin de ndache chojni joajna que vayé na de ngain Dios, mexinxin jehe na anto joincheconsolá na co joincheanimá na chojni nntiha conixin tti ndache na na.

³³ Co Judas co Silas vittohe canxion nchanho nntiha. Cottimeja are sacjan na ngain tti nirroanha na, chojni que vaguitticaon Jesús chjé na na joajna are sacjoi na.

³⁴ Pero Silas ndačo ixin sittohe nntiha nchion icha.

³⁵ Co cai Pablo co Bernabé vittohe nttiha ngain ciudad de Antioquía. Cayoi nimé co icha tsje chojni nichja na co joinchecoehne na na joajné Jesucristo, tti chonda cain joachaxin.

Are Pablo sacjoi nttiha yoxin para ixin nichja joajné Dios

³⁶ Are ovatto nchion tiempo, Pablo ndache Bernabé:

—Chjin na iná ngain cainxin rajna tti nichja na joajné Jesucristo, tti chonda cain joachaxin. Sitsjehe na cain nihermano para tsonoa na si xa tenchehe na sigue ditticaon na jian ngain Jesús o ani nahi.

³⁷ Bernabé joinao rrojicao Juan Marcos cai,

³⁸ pero Pablo joinaoha rrojicao na Juan Marcos iná ixin are saho coixinha joinchehe xa conixin jehe na, ixin are jehe na ngain regioen Panfilia, Juan Marcos cointtohe na co sacjoi Jerusalén.

³⁹ Anto joinchediscutí na hasta vachjendehe chó na. Bernabé sajoicao Marcos, co coá na barco co sacjoi na nontte ngosine ndachaon dinhi Chipre.

⁴⁰ Pero Pablo coinchiehe Silas. Co chojni que vaguitticaon Jesús joinchet-senhe na ñao Dios ixin jehe senda na. Cottimeja Pablo co Silas sacjoi na.

⁴¹ Co vatto na ngain nonttehe Siria co ngain nonttehe Cilicia. Nttiha joincheanimá na chojni que vaguitticaon Jesús.

16

Pablo co Silas joicao na Timoteo

¹ Pablo co Silas joiji na rajna Derbe co rajna Listra. Nttiha Listra jí ná xí tti vaguitticaon Jesús que vinhi Timoteo. Janné xa ná judía que vaguitticaon jan Jesús, co ndodé xa ná chojni griego.

² Chojni que vaguitticaon Jesús que te na ngain rajna Listra co ngain ciudad de Iconio nichja na jian de ixin jehe xa.

³ Co Pablo joinao joicao Timoteo, mexinxin chjé xohe que dinhi circun-cisión para que tsoñaoha chojni judío que vintte nttiha, ixin cain chojni mé nohe na ixin ndodé xa ná chojni griego co chojni griego ndacho ixin chondaha que tsa ni xohe mé.

⁴ Co ngain cainxin rajna vatto na ndache na chojni que vaguitticaon Jesús cainxin tti cjoao chó nirepresentanté Jesús conixin tti xí que vaquetonhe chojni que vaguitticaon Jesús ngain ciudad de Jerusalén.

⁵ Co jaña chojni anto jian vaguitticaon Jesús co cada nchanho icha tsje chojni coexinhi vitticaon Jesús.

Pablo vicononxinhi ná xí de nonttehe Macedonia

⁶ Espíritu Santo coanchjandaha na nichja na joajné Dios ngain nonttehe Asia. Mexinxin vangaria na nonttehe Frigia co nonttehe Galacia.

⁷ Co joiji na ngandehe nonttehe Misia. Cottimeja xaxaon na rrogatto na ngain nonttehe Bitinia. Pero Espiritu Santo que Jesús rroanha coanchjandaha na.

⁸ Mexinxin jehe na vatto na nonttehe Misia hasta joiji na ciudad de Troas jí ngandehe ndachaon.

⁹ Co nttiha are ttie, Pablo vicononxinhi ná xí que joixin xa de nonttehe Macedonia. Co xí mé tajingattjen xa co jinchetsenhe xa ñao Pablo co ndacho xa: “Datto sihi nttihi nonttehe Macedonia co ttjenguijna ni ra.”

¹⁰ Co ixin Pablo vicon cain yá, janha na jointtachjian na tti cjoinha na are sacjoi na nonttehe Macedonia. Co conona na ixin Dios rroanha na ixin nichja na tti jian joajna ngain chojni que te nttiha.

Pablo co Silas ngain Filipos

11 Ngain ciudad de Troas janha na coaxin na barco co sacjoi na nao ngain nonttehe Samotracia que jí ngosine ndachaon. Co nchanho yoxin sacjoixin na nonttehe Samotracia co joaso na ngain rajna Neápolis.

12 De nttiha cjoi na ngain ciudad de Filipos. Ciudad mé ná ciudé chojni romano. Co ciudad mé icha importante que vehe lado çhinxin nchanho ngain nonttehe Macedonia. Nttiha vinte ná janha na canxion nchanho.

13 Ná nchanho que nchejogaha chojni judío janha na vachjexin na de ngain ciudad mé co sacjoi na ngandehe ndario tti vaçatte chojni judío para vanchecoanxinha na Dios. Joaso na tavinte na nttiha co nichja na joajné Dios ngain ninché díçatte nttiha.

14 Ná de tti nché mé vinhi Lidia co nché mé joixin ncha de ngain ciudad de Tiatira. Co jehe ncha vanchecji ncha manta morado anto fino. Co nché mé anto vanchecoanxinha ncha Dios inchin chojni judío. Co are janha na nichja na, jehe ncha tajittinhi ncha, co Dios, tti chonda cain joachaxin, cjoenguijna ncha vitticaon ncha tti jindaçho Pablo.

15 Cottimeja joiguite ncha, jehe ncha conixin nindoha ncha. Cottimeja joinchetsenna na ncha ñaho na co ndaçho ncha:

—Si jaha ra ditticaon ra que janha ndoa ditticanho Jesús, tti chonda cain joachaxin, chjin na nchianía sintte ra.

Co jañá joinchetsenna na ncha ñaho na co sacjoinha na ncha.

16 Ná nchanho are janha na sacjoi na tti nchecoanxinxin na Dios, ngatja nttiha vetan na ná xannché que vechonda xan ná espíritu jianha. Co espíritu mé vanchenichja xan cosa de quehe tsonhe. Co jañá vagacha xan tsje tomi para ixin ninajní xan.

17 Xannché mé coexinhi xan rroehna na xan Pablo co janha na. Co jehe xan jitoyao xan, co ndaçho xan:

—Xí tehe xinchehe xé Dios tti ttjen ngajni. Co ndattjo ra xa queçén rrochonda ra iná vida naroa.

18 Jañá joinchehe xannché mé tsje nchanho. Mexinxin Pablo coñao co ngaría co ndache espíritu jianha ngaxinhi xan:

—Conixin nombré co joachaxín Jesucristo janha ttetonha daçhjexin de ngain xannché yá.

Co rato mé espíritu jianha vachjexin de ngain xan.

19 Pero are cain xinajní xan vicon xa que ichoha sachaxin xa xan icha tomi, tse xa Pablo co Silas co joicao xa ngain centroe ciudad tti jí xipolicía.

20 Cottimeja joinchechienhe xa ngain xijuez romano co ndaçho xa:

—Xí tehe judío, co ncheñao xa chojni ngain ciudád na.

21 Jehe xa nchecoehne xa chojni costumbré xa co ján na çhoha sinttoho na ní çhoha sotticaon na ixin ján na romano na.

22 Cottimeja chojni ngain ciudad ningaonhe na na. Co coetonha xijuez ixin vantsjehe na na lontto co goenxin na na nttá.

23 Co are joexin anto goen na na, çanxinha na na ngaxinhi cárcel co coetonhe na tti jinda cárcel ixin jian venda.

24 Co are tti jinda cárcel coinhi mé, çanxinha Pablo co Silas cuarto jí icha ngaxinhi cárcel mé co joaquehe rotté na ngagué yó nttá.

25 Co are inchin ngosine ttie, Pablo co Silas tenchecoanxinha na Dios co tetsje na himno ngain Dios, co icha chojni teaxinhi coinhi na mé.

²⁶ Co rato mé coingui nontte anto soji hasta contsjenga xo tenganguihi cárcel mé. Co rato mé xiré cainxin puerté cárcel co xindanguehe cainxin cadena teçhoaxin tti teaxinhi.

²⁷ Co are mé tti jinda cárcel xingamehe. Co are vicon ixin tajiçangué cainxin puerté cárcel, vantsje espadé para rrogoenxin cuerpoe ixin çaxaon que niteaxinhi osacoinga na.

²⁸ Pero Pablo coyaotte co ndache:

—Nahi, jañaha nchehe. Cain janha na te na nttihi.

²⁹ Cottimeja tti jinda cárcel joanchia ná çohi co coinga joixinhi co jiçanga ixin joaçaon co cjoï vettoxin nttajochjihi çhica rotté Pablo co Silas.

³⁰ Cottimeja joantsje na co joanchianguihi na co ndaço ngain na:

—Soixin ra, çquehe chonda que sinttaha para sayá iná vida naroa?

³¹ Co jehe na ndaço na:

—Ditticaon ngain Jesucristo, tti chonda cain joachaxin, co jamé jaha conixin cain nindoi rrochonda ra iná vida naroa.

³² Cottimeja Pablo co Silas ndaço na joajné Jesúcriso ngain jehe tti jinda cárcel co ngain cain nindoha.

³³ Co are ça ttie, jehe tti jinda cárcel joincheçoenhe tti conihi Pablo co Silas ixin vicaon na. Cottimeja jehe co cain nindoha joiguite na.

³⁴ Co tti jinda cárcel sajoicoa na nchiandoha co çhjé na joine na. Co jehe conixin nindoha anto ché na ixin vitticaon na Dios.

³⁵ Co are ndoexin xijuez rroanha xa xipolicía ngain tti jinda cárcel ixin rrogantsje Pablo co Silas.

³⁶ Cottimeja tti jinda cárcel ndache Pablo:

—Xijuez coetonna ixin santsje jaha ra. Mexinxin nchao satsji ra. Dio sitaonha ra nttiha.

³⁷ Pero Pablo ndache xipolicía:

—Janha na chojni romano na. Co cjoïha na ngain juzgado para chojni rrondaço ajian o jianha na. Pero masqui jamé, goen na na co tsje chojni tatetsjehe. Cottimeja coiaxinna na na ngaxinhi cárcel. Co jaxon rinao na santsje na na jimao. ¡Jañá nahi! Ndache ra jehe na ixin tsí na jehe na mismo para santsje na na.

³⁸ Xipolicía coequinhi xa cain yá xijuez romano, co xijuez çaon xa are conohe xa ixin Pablo co Silas chojni romano.

³⁹ Cottimeja sacjoi xa ngain Pablo co Silas co joinchetsenhe xa ñao na ixin sinchetjañe na xa. Cottimeja joantsje na xa de ngain cárcel co joinchetsenhe xa ñao na ixin satsjixin na de ngain ciudad mé.

⁴⁰ Are vachjexin na de ngain cárcel, sacjoi na nchiandoha Lidia. Cottimeja joitsjehe na chojni que vaguitticaon Jesús co joincheanimá na. Cottimeja sacjoi na.

17

Are chojni ngain Tesalónica coñao

¹ Co are sacjoi Pablo co Silas, vatto na ciudad de Anfípolis co ciudad de Apolonia. Cottimeja joiji na ciudad de Tesalónica. Co nttiha vehe ná ningoe chojni judío.

² Vittohe na nttiha Tesalónica ní semana, co cada nchanho que joinchejo-gaha na, Pablo cjoï ningoe chojni judío co nichjé nite nttiha, inchin costum-bre que chonda Pablo ngain cainxin rajna.

³ Jehe ndache na ixin ngain tti jitaxin Palabré Dios ndaĉho ixin Cristo chonda que vetan tangui co después que ndavenhe chonda que cjan xechon. Co ndache na:

—Tti Jesús que janha rrindattjo ra, jehe mé tti Cristo.

⁴ Cottimeja canxion chojni judío vitticaon ngain Jesús co vacao na Pablo co Silas. Co cai tsje chojni griego que vaguitticaon Dios inchin chojni judío coexinhi na vitticaon na Jesús. Co cai tsje nĉhí importante vitticaon nĉha Jesús.

⁵ Pero chojni judío que vitticaonha conchjoehe na co joatte na canxion xí que nchehe jianha rridinttecoa ngá nttiha. Co cain nimé joinchequinga na chojni ngain ciudad. Co afuerza joixinhi na nchianocho Jasón ixin tettje na Pablo co Silas ixin rrogantsjexin na de nttiha co rrojicao na ngain chojni.

⁶ Pero ixin vittjaha na Pablo co Silas nttiha, mexinxin coinganjincoo na Jasón co icanxin chojni que vaguitticaon Jesús, co joicao na ngain xinchíxin co xipolicía de ciudad mé. Co ndaĉho na sĉn:

—Xí tehe ngoixin mundo joinchexenga xa chojni co cai nttihi joí xa.

⁷ Co Jasón vayé xa nchianocho co cainxin jehe xa ningaconhe xa ley de rey romano ixin ndaĉho xa que jí iná rey que chonda icha tsje joachaxin que dinhi Jesús.

⁸ Are chojni co autoridad de ngain ciudad mé coinhi na cain yá, anto coñao na.

⁹ Pero Jasón co icha nihermano que tse autoridad joanjo na tomi co mexinxin coanĉhanda na na.

Are Pablo co Silas vinttecji rajna Berea

¹⁰ Co are naxin xehe ttie mé, chojni que vaguitticaon Jesús chjé na na joajna, co Pablo co Silas sacjoi na para rajna Berea. Co are joiji na nttiha, sacjoi na ningoe chojni judío.

¹¹ Chojni judío que te nttiha icha joinao na coinhi na joajné Dios que nite ciudad Tesalónica. Anto coinhi na joajna mé co cada nchanho vacjé na tti jitaxin Palabré Dios para sicon na andoa tti tendache na na ni nahi.

¹² Co jañá tsje chojni judío vitticaon ngain Jesús co cai ngagué chojni griego tsje nĉhí importante co tsje xí vitticaon na Jesús.

¹³ Cottimeja are chojni judío que te ciudad de Tesalónica conohe na ixin Pablo jinichja joajné Dios ngain rajna Berea cai, cjoí na nttiha para joincheñao na chojni ngain Pablo co Silas.

¹⁴ Pero chojni que vaguitticaon ngain Jesús toin rroanha na Pablo ngandehe ndachaon. Pero Silas co Timoteo vintteguittohe ngain rajna Berea.

¹⁵ Pablo sacjoi co cai canxion chojni sajoicao hasta tti ngain ciudad de Atenas. Co nttiha are sacjan na Berea, Pablo coetonhe na ixin ndache na Silas co Timoteo toin satsji na ngain Pablo.

Are Pablo cjoí Atenas

¹⁶ Are Pablo jichonhe Silas co Timoteo ngain ciudad de Atenas, jehe thjoinha conohe ixin vicon nttiha anto tsje retratoe ídolo.

¹⁷ Mexinxin cjoí ngain ningoe chojni judío para nichjé jehe na conixin icha nivaguitticaon Dios inchin chojni judío. Co cai cada nchanho nichja ngain nivaguetan ngain ndásin.

¹⁸ Cottimeja canxion chojni coexinhi na nichja na ngain Pablo. Canxion chojni mé vacangui na tti ģaxaon canxion xí vinhi epicúreos, co icanxin na

vacangui na tti xaxaon canxion xí vinhi estoicos. Canxion de jehe na ndacho na:

—¿Quehe jindacho xí yá que anto nichja xa?

Co icanxin na ndacho na:

—Jehe rinao sincheoenhe chojni de ixin icanxin dios.

Jañá ndacho na ixin Pablo jinichjé na tti jian joajna de ixin Jesús co ndache na ixin cain chojni nchao rroxechon.

¹⁹ Cottimeja savicao na Pablo ngain ná jna vinhi Areópago, tti važatte autoridad de ngain ciudad mé. Co nttiha jehe na ndacho na:

—Rinaho na tsonona na tti jaha rrincheoenhe chojni.

²⁰ Ixin tti rrinichja ojé para ixin janha na. Co rinaho na tsonona na quehe rocho cain yá.

²¹ Jañá ndacho na ixin cainxin chojni que te ngain Atenas co cai chojni que joixin cjin que te na nttiha, cain nimé anto vancheξoxinhi na vaquinhi na co vanichja ná de ixin quexeho joajna naroaxin.

²² Cottimeja Pablo vingattjen ngagué chojni mé nttiha Areópago co ndacho: —Janha vicon ixin jaha ra ξo te ra nttihi Atenas anto nchesayehe ra tsje dios.

²³ Ixin are janha ngaria ngagaha rajná ra tsjá quecá tti nchesayexin ra dios. Are mé vittja ná tti dinchetsonji ra co nttiha jitaxin: “Jihi para ixin dios que chonxinha na.” Co jaxon janha rrinichja nganji ra de ixin Dios mé que jaha ra nchecoanxinhi ra masqui chonxinha ra.

²⁴ Tti Dios que joinchexjian mundo co cainxin cosa que jí, jehe tti chonda cain joachaxin ngajni co nttihi ngataha nontte. Jehe dittoeha ngaxinhi nihngo que chojni nchexjian.

²⁵ Co jehe rrogondeha tti nchexjian chojni para ixin jehe ixin jehe mesmo tti chjá na vidá na co χhintto co cainxin tti dondá na cainxin na.

²⁶ Cainxin chojni que jí ngataha nontte joixin de tti nacoa chojni que joinchexjian Dios are saho. Co Dios coetonhe na ixin sintte na ngoixin ngataha nontte, co jehe coetonha quesa co quettinó sintte na.

²⁷ Jamé joinchehe Dios ixin rinao que chojni tsjé na jehe co sitticaon na jehe ixin jehe cjinha jí de nganji naná ján na.

²⁸ Ixin jí Dios, mexinxin techonxin na, tettingui na co nttoho na cain. Cai inchin coentaxin canxion tattita que dicjin ξón nttihi nontteha ra are osé, co dicjin na jañá: “Ján na chojni Dios na.”

²⁹ Mexinxin ixin ndoa que ján na chojni Dios na, xaxaonha na ixin Dios inchin ná cosa de oro ni de plata ni de ξo que chojni joinchexjian conixin rá inchin xaxaon na.

³⁰ Dios chjeha castigo ixin tti jianha que vanchehe chojni anto osé, ixin chojni mé vechonxinha jehe. Pero jai Dios ttetoan na cainxin na ngoixin mundo ixin tsentoxinhi na vidá na

³¹ Ixin Dios ocoinchiehe ná nchanho are jehe sinchejuzguehe cainxin chojni ngoixin mundo. Co Dios coinchiehe ná xí para juez. Co jehe Dios cjoago ixin jhi seguro are joinchexechon xí mé.

³² Are coinhi na ixin jí ná chojni que oxechon, canxion na cjoanoa na co icanxin na ndacho na:

—Otsian na icha are jaha rronichja iná.

³³ Cottimeja Pablo cointtohe na co sacjoi.

³⁴ Pero canxion chojni vitticaon na ngain Jesús co savicao na Pablo. Ngagué chojni mé vehe ná xí vinhi Dionisio. Co xí mé vehe xa ná juez nttiha

Areópago. Co cai ngagué chojni que vitticaon ngain Jesús vehe ná nanita vinhi Dámaris co icha chojni.

18

Are Pablo ngain Corinto

¹ Cottimeja Pablo vačhjexin de ciudad de Atenas co sacjoi ngain ciudad de Corinto.

² Co nttiha vetan ná judío que vinhi Aquila. Xí mé goanxin xa nonttehe Ponto. Nchion icha sahó Aquila co čhihi que vinhi Priscila joixin na nonttehe Italia ixin tiempo mé Claudio vehe emperador nttiha Roma, capitál de nonttehe Italia, co coetonha ixin cainxin chojni judío chonda que sachjexin na de Roma. Cottimeja Pablo cjoi joitsjehe na ngain ciudad de Corinto.

³ Pablo joinohe xajeho xa que jehe na, ixin canio na joinohe na vanchechjian na nchia de ixin manta. Mexinxin Pablo vittohe ngain na para ixin sinchehe na xa mé.

⁴ Co cada nchanho que nchejogaha chojni judío, Pablo sacjoi ngain ningoe na co nttiha nichja de ixin Dios co cjoao chojni judío conixin chojni que jeha judío para que vitticaon na ngain Jesucristo.

⁵ Co are Silas co Timoteo joixin na nonttehe Macedonia, Pablo jjoinchechjianha nchia de ixin manta, sino que nichja tti jian joajna nchanho co nchanho, co joinchecoene chojni judío ixin Jesús ndoa tti Cristo que jehe na techonhe na.

⁶ Pero chojni mé ningaconhe na co nichja na jianha de ixin jehe Pablo. Mexinxin Pablo contsenga lonttoe para ixin cain jinche cointtji nche ngataha nontte inchin ná señal que jehe satsji, co ndache na:

—Are ndasenne ra sinchetján ra co jaho ra setsingataha ra co janha idancataha ni ra. Jaxon satsji janha para ixin rronichja tti jian joajna ngain chojni que jeha judío.

⁷ Cottimeja vačhjexin ningoe chojni judío co sacjoi nchiandoha ná xí vinhi Justo. Xí mé jeha ná judío, pero vaguitticaon xa Dios inchin chojni judío. Co nchiandoha xí mé vehe nchia čhica ningoe chojni judío.

⁸ Co ná xí vinhi Crispo vaquetonha ngain nihngo mé. Co jehe xa conixin cainxin nindoha xa vaguitticaon na ngain Jesús, tti chonda cain joachaxin. Co cai anto tsje chojni nttiha ngain ciudad de Corinto coinhi na joajné Dios co vitticaon na ngain Jesús co joiguitte na.

⁹ Cottimeja ná ttie Pablo vicononxinhi Jesús. Co jehe ndache Pablo:

—Xaonha, sino que nchehe sigue ndache chojni joajnana, co tencoaha

¹⁰ ixin janha rrihi nganji para ixin ttjenguijna co xonhi chojni nchao sinttaniha jaha. Mexinxin xaonha ixin tsje chojni ngain ciudad jhi, mé chojnina janha.

¹¹ Mexinxin Pablo vittohe ná nano co rioho nttiha Corinto para cjoagoe na joajné Dios.

¹² Pero are Galión vehe xigobernador ngain nonttehe Acaya, chojni judío xatte na para ixin tse na Pablo. Co joicao na ngain juzgado,

¹³ co ndache na xigobernador:

—Xí jhi jittingaria jitjagoe chojni ixin ojé sinchecoanxinhi na Dios co jeha inchin jitaxin ley que janha na chonda na.

¹⁴ Co Pablo rrojinichja are Galión ndache chojni judío:

—Si xí jhi rrojinchehe xa jianha inchin rrocacoa xa cosé na o rrogoen xa chojni, janha rroquian tti tendačo ra, jaha ra xo judío ra.

¹⁵ Pero jeha jamé. Jaha ra toñao ra jeha ixin jehe xa ojé jitjagoe xa chojni quehe jitaxin ngain leya jaha ra. Janché jaho ra tjao chó ra de ixin cosa jihi ixin janha rinaoha rroʒanttexin rana.

¹⁶ Co jehe vantsjexin na de nttiha.

¹⁷ Cottimeja chojni Galión tse na Sóstenes, tti vaquetonha ngain ningoe chojni judío. Co vintja na jehe Sóstenes nttiha ngattoxon con xigobernador. Pero masqui Galión vicon cain yá, jehe ʒonhi joinchehe ixin cosa mé ndosenha jehe.

Are Pablo cjan Antioquía co coexinhi nttiha ninxin para joinichja joajné Dios icanxin rajna

¹⁸ Pablo ʒa vittohe tsje nchanho nttiha Corinto. Cottimeja jehe chjé joajna chojni que vaguitticaon Jesús ixin satsji jehe conixin Aquila co Priscila. Co are joiji na rajna Cencrea, Pablo cjinhi já inchin ná señal que jehe ojoinchecumplí ná promesa ngain Dios. Cottimeja canio na cjoí na coá na ná barco ixin satsji na ngain nonttehe Siria.

¹⁹ Are joiji na ciudad de Efeso, Pablo cointtohe Priscila co Aquila co sacjoi ngain ningoe chojni judío co cjoao chó chojni judío que vaʒatte nttiha.

²⁰ Co joinchetsenhe na ñao Pablo ixin rroguittohe icha sé nttiha, pero jehe ʒhoha.

²¹ Cottimeja chjé na joajna co ndačo:

—Chonda que sarihi ngain ciudad de Jerusalén are tsexinhi quiai que jitonchiaon. Pero si Dios rinao, rrocjan na janha sihi iná sitsjaha ra.

Cottimeja coá barco co sacjoixin de ngain Efeso.

²² Co are joiji ciudad de Cesarea Pablo vaniaxin de barco co sacjoi ngain ciudad de Jerusalén para ixin chjé joajna ngain chojni que vaguitticaon Jesús nttiha. Cottimeja sacjoi ngain ciudad de Antioquía.

²³ Co vittohe canxion nchanho nttiha Antioquía. Cottimeja sacjoi iná co ngaria cainxin rajna ngain nonttehe Galacia co nonttehe Frigia co nttiha joincheanimá cainxin chojni que vaguitticaon Jesús.

Are Apolos vanichja de ixin Dios ngain Efeso

²⁴ Co are mé joiji ná xí judío ngain ciudad de Efeso, co xí mé vinhi xa Apolos co jehe xa diquixin xa de ciudad de Alejandría. Jehe xa anto jian nichja xa de ixin Dios co anto nohe xa tti jitaxin Palabré Dios.

²⁵ Jehe xa ochonxin xa tsje de ixin queʒén Jesucristo, tti chonda cain joachaxin, rinao sinchehe chojni. Co jehe xa anto vaché xa ixin vanichja xa de ixin Jesús, co jian vanchecoenhe xa chojni de ixin Jesús. Pero jehe xa jeha vechonxin xa de tti vancheguitte Juan chojni.

²⁶ Co jehe Apolos ʒaonha co anto nichja ngain ningoe chojni judío. Co are coinhi Priscilá co Aquila tti ndačo Apolos, joicoa na ngain nchiandoha na co joinchecoenhe na icha jian de ixin queʒén Dios rinao sinchehe chojni.

²⁷ Cottimeja are Apolos ndačo ixin satto ngain nonttehe Acaya, chojni que vaguitticaon Jesús nttiha Efeso cjoenguijna jehe ixin rroanha na ná carta ngain chojni que vaguitticaon Jesús nttiha Acaya ixin sayé na jian. Co are Apolos joiji ngain nonttehe Acaya, anto cjoenguijna tsje chojni que Dios chjé joachaxin ixin vitticaon na Jesús.

²⁸ Apolos co chojni judío anto cjoao chó na co Apolos cjoagoe cainxin chojni ixin tti vaʒaxaon chojni judío nchaoha jí, co tti vandačo Apolos jehe na ʒhoha vandačo na ixin nchaoha jí cai porque jehe vacjagoe na conixin tti

jitaxin Palabré Dios ixin Jesús ndoa tti Cristo, tti Dios coinchiehe co tti jehe na techonhe na.

19

Are Pablo ngain Efeso

¹ Are Apolos xa vehe ngain ciudad de Corinto, Pablo vatto ngain cainxin rajna que vintte ngagaha jna. Co jañaxon hasta joiiji ngain ciudad de Efeso, tti vetan canxion chojni que vaguitticaon Jesús.

² Co joanchianguihi na co ndačo ngain na:

—¿Ajoí Espíritu Santo nganji ra conixin joachaxin are vitticaon ra?

Co jehe na joattehe na:

—Janha na xonhi tiempo ttian na ixin jí Espíritu Santo.

³ Cottimeja Pablo joanchianguihi na:

—Mexinxin ¿quexén joiguitte ra?

Jehe na joattehe na:

—Inchin Juan ndačo para joiguitte na.

⁴ Pablo ndache na:

—Ndoa, Juan joincheguitte chojni que coentoxinhi vidé. Pero cai jehe ndache chojni ixin chonda na que sitticaon na ná tti tsí después de jehe. Co jehe mé ojoí, co jehe mé Jesús tti Cristo.

⁵ Co are coinhi na jamé, cain na joiguitte na para goan na chojni Jesús, tti chonda cain joachaxin.

⁶ Co are Pablo joaquehe rá ngataha já na, Espíritu Santo jói ngain na conixin joachaxin co jehe na coexinhi na nichja na ojejé nguigoa co nichja na joajna que vayé na de ngain Dios.

⁷ Co cain nivitticaon inchin tteyó xí.

⁸ Pablo vittohe nttiha ciudad de Efeso ní conittjao co vacji ningoe chojni judío tsje nttiha. Nttiha vanichja ngain chojni conixin confianza, co cjoao na para cjoagoe na de ixin quexén Dios ttetonha.

⁹ Pero canxion chojni joinaoha na vitticaon na tti ndačo Pablo. Co nimé johoh nichja na jianha de ixin tti jian joajné Jesucristo ngatte con icha chojni. Cottimeja Pablo vačhjendehe jehe na co savicao chojni que vaguitticaon Jesús ngain ná escuelé ná ximaestro vinhi Tiranno. Co nttiha vanichja cainxin nchanho.

¹⁰ Co jañá vanchehe ngoixin yó nano. Mexinxin cainxin chojni que vintte ngain nonttehe Asia coinhi na joajné Jesús, tti chonda cain joachaxin. Chojni judío co cai chojni que jeha judío coinhi na mé.

¹¹ Co Dios joanjo joachaxin ngain Pablo para ixin jehe joinchehe tsje milagro.

¹² Anto tsje joachaxin joanjo Dios hasta chojni joiaho mantachjan co joiaho lonnto que joincheguindatte na cuerpoe Pablo. Co are vajicao na cosa mé ngain chojni tenihi, chojni mé vaxingamehe na co tti espíritu jianha vagachjexin de ngaxinhi na.

¹³ Pero vehe cai canxion chojni judío que vangaria co vagantsje espíritu jianha de ngain chojni. Co chojni mé joinao rrojinchegonda na nombré co joachaxin Jesús, tti chonda cain joachaxin, para ixin rrogantsjexin na espíritu jianha de ngain chojni. Co ndache na espíritu mé:

—Conixin nombré Jesús, tti nombre que Pablo nichja, janha na ttetonha ra ixin dachjexin ra de ngain chojni.

14 Jañá joinchehe tti yáto xenhe ná chojni judío vinhi Esceva. Co jehe xí mé vehe xa ná xidána que vaquetonha ngain icha xidána.

15 Pero are ndačho xan yá, tti espíritu jianha joattehe xan:

—Janha nona quensen Jesús co nona quensen Pablo, pero jaha ra, ¿quensen jaha ra?

16 Cottimeja tti xí que vechonda espíritu jianha čhinca žatja jehe nimé co anto cjoaya xa ngain na hasta que jehe na ttolocho na co conihí na sacingaxin na de nchia mé.

17 Cainxin chojni que vintte ngain ciudad de Efeso, chojni judío co cai chojni que jeha judío conohe na cain mé co anto žaon na, co ndačho na anto tsje cosa jian de ixin Jesús, tti chonda cain joachaxin.

18 Cai tsje chojni que vaguitticaon ngain Jesús žatte na co ndačho na ngattoxon con icha chojni cosa jianha que joinchehe na icha saho.

19 Co tsje chojni ttoso joiaho žón de ixin joattosohe co žón mé cjoaga na žon co tatetsjehe cainxin chojni. Co are coequin na quejanhi rroguitte cain žón mé, vittja inchin cincuenta mil tomi de plata.

20 Jañá icha co icha chojni vitticaon na joajné Jesucristo co vicon na ixin joajna mé chonda tsje joachaxin.

21 Cottimeja Pablo žaxaon satsji ngain tsje rajna nonttehe Macedonia co nonttehe Acaya. Cottimeja satsji ngain ciudad de Jerusalén. Co cai ndačho ixin are satsjixin de ngain Jerusalén cai chonda que satsji ngain ciudad de Roma.

22 Cottimeja Timoteo co Erasto, tti yó xí que vacjenguijna, rroanha na para ngain nonttehe Macedonia. Co jehe Pablo ža vittohe sexin ngain nonttehe Asia.

Are ngain ciudad de Efeso chojni coñao na

23 Are mé tsje chojni coñao ixin tti jian joajné Jesucristo que vanichja Pablo.

24 Ná xí vinhi Demetrio joincheñao cain chojni mé. Xí mé vanchechjian xa tsje figurachjenhe nihngo conixin plata, žá ningoe ná ídolo vinhi Diana. Co chojni que vanchehe žé xa vagacha na tsje tomi.

25 Co jehe xa vayé xa nivanchehe žé xa conixin icha chojni que vanchehe žajeho ža co ndache xa na:

—Jaha ra noha ra que conixin ža que nttoho na tedacha na tsje tomi, mexinxin chonda na jian vidá na.

26 Co jaha ra coinhi ra co vicon ra quežén Pablo ngaria co ndačho ixin cain dios que vanchechjian chojni jeha Dios ndoa. Co jañá joincheguitticaon tsje chojni, co jeha nntihi Efeso, cai merocoa ngoixin nonttehe Asia te chojni que dittaicon tti ndačho jehe.

27 Co nchaoha jí para ixin ján na ixin puede irrochondaha na ža. Co cai puede chojni irronichjaha na de ixin ningoe dios Diana co isinchesayeha na dios mé masqui jai cainxin chojni ngain nonttehe Asia co cainxin chojni ngoixin mundo anto nchesayeha na dios Diana.

28 Co are cain chojni coinhi mé, anto coñao na co ndačho na sén:

—¡Anto jian dios Diana ngain ciudad de Efeso!

29 Cottimeja ngain ciudad mé cain chojni anto coñao na. Co čhinca na žatja na Gayo co Aristarco, tti yó xí que Pablo joiaoxin de nonttehe Macedonia. Co coinganji na xa hasta tti jí nchia tjaoxin chó na.

30 Pablo joinao rrojixinhi nntiha para ixin rrojinichjé chojni mé pero chojni que vaguitticaon Jesús coanchjandaha na.

³¹ Cai canxion chojni que vaquetonha ngain nonttehe Asia niamigoe Pablo co nimé rroenhe na joajna ixin sixinttixinha nnttiha.

³² Nnttiha tti xatte na, jeje coyaotte chó na ixin cain na coñao na co merocoa cain chojni noeha na quedonda xatte na nnttiha.

³³ Cottimeja canxion tti tengagué nnttiha ndache ná xí vinhi Alejandro ixin quehe xattexin na nnttiha, co jehe mé tti chojni judío vantsjeyexin na de ngagué na co joaquehe na xa ngatto con icha chojni. Alejandro conixin rá joinchehe seña ixin chojni rrotencia na ixin rinao rronichja de ixin chojni judío para que icha chojni tsoñaoha ngain na.

³⁴ Pero are chojni conohe ixin jehe ná judío, cainxin na coyaotte na inchin yó hora co ndaço na:

—¡Viva Diana de ngain ciudad de Efeso!

³⁵ Cottimeja are xisecretarioe ciudad mé onchao joinchetencia xa chojni, jehe xa ndaço xa:

—Jaha ra de ciudad de Efeso, cainxin chojni ngoixin mundo nohe na ixin ján na nnttiha Efeso tenda na ningoe dios Diana que chonda tsje joachaxin co ixin tenda na retratoe que xincanjinxin de ngaini.

³⁶ Co xonhi chojni nchao ndaço ixin jiji ndoaha; mexinxin tencoa ra, co xaxaon ra jian saho que sinchehe ra ná cosa.

³⁷ Xijoicó ra tehe xonhi vantsje xa de ngain ningoa na co ni nichjaha xa jianha de ixin dioa na.

³⁸ Si Demetrio co ninchehe xé chonda na çhoan tti siçho na jie, jí xijuez; co cainxin nchanho te xa ngain juzgadoe xa. Mexinxin jehe na nchao satsji na ngain xijuez de ciudad jiji. Co nnttiha cada chojni nchao rronichja tti joinchehe có tti joincheha.

³⁹ Co si jaha ra ojé rinao ra, nchao satse ra chojni co tsjaoxin ra, pero jian inchin ley ttetonha.

⁴⁰ Ixin puede çhoan chojni sinttacaxin na arinao na tsetocoho na gobierno romano, co çquehe rrondaço na si çhoan chojni sanchiangua na ixin quedonda antó coñao na?

⁴¹ Co are joexin nichja xa cain yá, coetonhe xa chojni ixin satsji na.

20

Are Pablo cjoí Macedonia co Grecia

¹ Co are chojni que coñao ojoexin chjequé na, Pablo joatsetaonhe cain chojni que vaguitticaon Jesús co joincheanimá na. Cottimeja chjé chó na joajna co Pablo sacjoi nonttehe Macedonia.

² Ngain cain rajna que cjoí, joitsjehe cain chojni que vaguitticaon Jesús nnttiha co joincheanimá na conixin tti ndache na. Cottimeja joiiji nonttehe Grecia.

³ Nnttiha vittohe ní conittjao, co are jehe rroca barco ixin sarrocji ngain nonttehe Siria, conohe ixin chojni judío joinao na narrogoenxon na. Mexinxin cjoixinha nataon jinda sino sacjan vatto ngain nonttehe Macedonia iná.

⁴ Co tsje xí sacjoi xa conixin Pablo. Ná vinhi Sópater que joixin xa rajna Berea; iná vinhi Aristarco, co iná vinhi Segundo, cayoi xí mé joixin ciudad de Tesalónica; co iná vinhi Gayo que joixin xa rajna Derbe; co iná xí vinhi Timoteo; co iyó xí vinhi Tíquico co Trófimo, co mé joixin xa nonttehe Asia.

⁵ Cainxin xí mé vitaon xa nnttiha co chonhe xa ixin janha na saso na nnttiha ciudad de Troas.

⁶ Co are joexin quiai are jine ni niottja que chondaha levadura, cottimeja janha na coá na barco co vačhjexin na de ngain ciudad de Filipos. Co are nchanho naonxin joiguetanxin na cain xí mé ngain ciudad de Troas. Co nttiha vittona na yáto nchanho.

Are Pablo ngain Troas

⁷ Co saho nchanho de semana janha na žatte na para ixin joine na tti niottja que dinhi Santa Cena. Co Pablo joinchecoehne chojni que vaguitticaon Jesús. Co jehe Pablo nichja hasta ngosine ttie ixin jehe chonda que sarrocji nchanho yoxin.

⁸ Janha na otate na ngain ná cuarto piso ninxin. Co nttiha anto tsje žoi candil tedacaon.

⁹ Co nttiha ná xanxí vinhi Eutico tají xan ngain ventana. Pero ixin Pablo anto sé nichja, mexinxin xanxí mé anto chjé xan cottačhin co tavejoa xan; cottimeja ndaditse xan cottačhin co vetsinga xan de ngain ventana de ngain piso ninxin de nchia mé para ndoja. Co are jehe na joatsín na xan, ondadiguenhe xan.

¹⁰ Cottimeja Pablo vania co vettoxin nttajochjihi co cjóa xan co ndačho ngain chojni que vaguitticaon Jesús:

—Žaonha ra, ixin jichon xan.

¹¹ Cottimeja Pablo sacjan ngaxinhi cuarto noi iná co joine tti niottja que dinhi Santa Cena co joinecaho chojni nttiha. Cottimeja jehe nichja icha hasta vingasán, cottimeja sacjoi.

¹² Co xanxí mé cjan xan xingamehe xan de ndadiguenhe xan co savicao na xan nchiandoha xan co cain na anto ché na.

Are sacjoixin na de Troas co sacjoi na Mileto

¹³ Pablo ndačho ixin jehe rotteo satsjixin hasta tti ngain rajna Asón. Mexinxin janha na coá na ná barco co vitaon na nttiha hasta tti ngain rajna Asón. Nttiha sirroataonxin na Pablo inchin cjoao na.

¹⁴ Co are janha na vetan na Pablo nttiha Asón, coaninxin barco conixin janha na co sacjoi na ngain rajna Mítilene.

¹⁵ Janha na vačhjexin na de nttiha co nchanho yoxin joaso na ngain nontte ngosine ndachaon dinhi Quío. Co nchanho ninxin joaso na ngain iná nontte ngosine ndachaon dinhi Samos, co jointtajogaha na ngain rajna Trogilio. Co ndoexin joaso na ngain ciudad de Mileto.

¹⁶ Jañá conhe ixin Pablo jinaoha cončhjenhe sé ngain nonttehe Asia ni jinaoha cjoí ciudad de Efeso ixin jehe jinao toin rroguiji ciudad de Jerusalén ixin jinao vehe nttiha are nchanho quiai que dinhi Pentecostés, si nchao.

Tti nichja Pablo ngain nivaquetonhe chojni que vaguitticaon Jesús ngain Efeso

¹⁷ Are vehe Pablo ngain ciudad de Mileto, rroanha joajna ngain xí que vaquetonhe chojni que vaguitticaon Jesús ngain ciudad de Efeso para ixin tsonchienne na ngain.

¹⁸ Co are joí na ndache na:

—Jaha ra noha ra quežén vanttaha janha desde saho nchanho que joihi nttihi nonttehe Asia co hasta jai.

¹⁹ Cainxin nchanho janha joarihi nganji ra jointtaha tti coetonna Jesús, tti chonda cain joachaxin, co janha žonhi tiempo conona orgulloso. Co jí nttiha

tsjanga janha de ixin jaha ra. Co cai anto vetan tangui ixin tti joinchehe chojni judío nganji na janha.

²⁰ Pero janha cointtoaha de vanichja nganji jaha ra cain tti nchao cjoen-guijna jaha ra. Co jointtacoanha ra ngain lugar tti te tsje chojni co cai ngain nchiandoi ra.

²¹ Janha coetoan chojni judío co chojni que jaha judío ixin chonda que tsentoxinhi na vidé na inchin Dios rinao co sitticaon na ngain Jesucristo, tti chonda cain joachaxin para ixin ján na.

²² Co jaxon janha satsji ciudad de Jerusalén ixin Espíritu Santo coetonna, masqui nonaha quehe tsonna nttiha.

²³ Jehu nona que ngain cainxin tti janha cjoí Espíritu Santo ndachjenji na ixin anto tangui tsonna co cai ixin siaxinna ngain cárcel.

²⁴ Pero janha xañona na de ixin tti ndachjenji na Espíritu Santo co xañona na masqui ndasenne na. Jehu rinaho tsjexin xa que Jesús, tti chonda cain joachaxin, chjana. Xa mé xa de rronichja tti jian joajna que ndaño ixin Dios anto rinao cain chojni.

²⁵ 'Are osé janha vanichja nganji ra ixin quexén Dios ttetonha. Co jai nona ixin ni ná de jaha ra rrocjan sicon ni ra janha iná.

²⁶ Mexinxin jai rinaho rrondattjo ra que si çhonja chojni ditticaonha, jehu setsingataha co janha idancataha na jehe.

²⁷ Ixin janha ondattjo ra de ixin cainxin tti rinao Dios que sinchehe ra, co janha xonhi tjañana de ndattjo ra.

²⁸ Mexinxin ttijho ra cuidado jaha ra co cai dinttenda ra cainxin chojni que ditticaon Jesús ixin Espíritu Santo chjá ra xa jihu de dinttenda ra cain chojni que ditticaon Jesús, ixin Jesús, tti chonda cain joachaxin, ndavenhe para ixin cain ján na are joi jni jehe.

²⁹ Co janha nona ixin are janha satsji, tsí ojé chojni co jehe na sinao na sinttayahá ra na ixin isitticaonha ra Jesús co nimé inchin colobo çhintto are tse va coleco co jine va va.

³⁰ Co cai ngayaha ra jaha ra mismo saçhje tti nirronichja ndoaha, co jamé canxion chojni que ditticaon Jesús sitticaon na tti rrondaño jehe na.

³¹ Mexinxin ttijho ra cuidado co xaxaon ra que janha ngoixin ní nano nchanho co ttie jointtacoanha ra hasta tsjanga janha por ixin jaha ra.

³² Jaxon danchia Dios ixin jehe senda ra co ixin sitticaon ra tti joajna que ndaño ixin Dios anto rinao cain ra, co joajna mé chonda joachaxin de sinttaguitticaon ra jian que jaha ra cai tequininxin ra ngain Dios.

³³ Co janha xonhi tiempo joinaho ná cosé chojni ni lontto ni tomi.

³⁴ Jaha ra jian noha ra que janha vanttaha xa para ixin joarichonda cain tti vagondana co cai tti vagondehe nivacjinha.

³⁵ Co jañá janha cjoagoha ra ixin icha jian nchehe ni xa co ttjenguijna ni ninoa. Co xaxaon ra tti ndaño Jesús, tti chonda cain joachaxin, are ndaño: "Icha çhjoin tonohé ansén chojni que danjo que tti tonohé ansén chojni que dayé."

³⁶ Co are Pablo joexin nichja cain yá, vettoxin nttajochjihí jehe co cainxin chojni co joinchecoanxinhi Dios.

³⁷ Cainxin na tsjanga na are cjóa na co coetoxin na Pablo.

³⁸ Co anto vinttechín na ixin Pablo ndaño ngain na ixin irrocjanha na sicon na. Cottimeja joicanxin na hasta tti jí barco.

21

Are Pablo sacjoi Jerusalén

¹ Are janha na cointtoa na chojni que vaguitticaon Jesús, coá na ná barco co sacjoi na nao ngain nontte ngosine ndachaon dinhi Cos. Co nchanho yoxin joaso na ngain nontte ngosine ndachaon dinhi Rodas co de nttiha sacjoi na ngain rajna Pátara.

² Co nttiha rajna Pátara janha na vittja na ná barco sajittji ngain nonttehe Fenicia, mexinxin coá na barco mé co sacjoi na.

³ Co vicon na nontte ngosine ndachaon dinhi Chipre co nontte mé vittohe lado cjon na co jañá sacjoi na hasta nonttehe Siria. Co nttiha ciudad de Tiro barco chonda que cointtohe barco carga joiaho barco, co mexinxin nttiha janha na vania na.

⁴ Ngain ciudad mé janha na vetan na chojni que vaguitticaon Jesús co nttiha vittona na ngain na ná semana. Co jehe na ndache na Pablo ixin icha jian tsjiha ngain ciudad de Jerusalén. Jañá ndache na ixin Espíritu Santo joinchenohe na quehe tsonhe Pablo nttiha Jerusalén.

⁵ Pero are joexin semana mé, janha na sacjoi na. Cainxin nivaguitticaon Jesús, níxi co čihi na co xenhe na, cain nimé joicanxin na na hasta tti ngandehe ciudad mé, co nttiha nganda ndachaon janha na joarittoxin na nntajochjihna na co jointtacoanxian na Dios.

⁶ Cottimeja chjaha na na joajna co cjóa na na co coá na barco co jehe na sacjan na nchiandoha na.

⁷ Co jañá sacjoixin na ciudad de Tiro co joaso na ciudad de Tolemaida. Co nttiha vaniixin na barco. Co ngain ciudad mé janha na vetan na nivaguitticaon Jesús co vittona na ná nchanho ngain na.

⁸ Co nchanho yoxin cain na janha na sacjoixin na de ngain ciudad de Tolemaida co joaso na ngain ciudad de Cesarea. Nttiha cjoí na nchiandoha ná xí vinhi Felipe. Xí mé joindache tsje chojni tti jian joajné Jesucristo, co jehe xí mé vehe ná de tti yáto xí que vacjenguijna co vachjé tti sine chojni que vaguitticaon Jesús ngain ciudad de Jerusalén. Co janha na vittona na ngain xí mé.

⁹ Co Felipe vechonda nó xenhe xannčí que xa vinttecaoha xan xí. Co xannčí mé vanichja xan joajna que vagayé xan de ngain Dios.

¹⁰ Are janha na vintte na nttiha canxion nchanho, joiji ná xí que vanichja xa joajna que vagayé xa de ngain Dios. Xí mé joixin xa nonttehe Judea co vinhi xa Agabo.

¹¹ Co xí mé joí xa joitsjena na xa. Co are jehe xa nttiha nganji na, coá xa cinturoen Pablo co coiattexin xa rotté xa co rá xa conixin cinturón mé co ndačo xa ngain Pablo:

—Espíritu Santo ndačo ixin ngain ciudad de Jerusalén chojni judío tsiatte na jaha janhi inchin janha coiatte rana co rotnena co jañá sinttachianha na ngain chojni que jeha judío.

¹² Are coian na jiji, janha na co chojni de ngain ciudad de Cesarea jointtatsán na ñao Pablo ixin tsjiha Jerusalén.

¹³ Pero Pablo joattehe:

—¿Quedonda nchehe ra ixin janha sarichinhi? ¿Co quedonda tsjanga ra? Janha rrihi dispuesto de jeoha tsiatte na na sino que cai rrihi dispuesto de ndasenne na ngain Jerusalén para ixin causexin Jesús, tti chonda cain joachaxin.

¹⁴ Pero masqui janha na nichjá na sé, jehe ĉhoha vitticaon tti ndattjan na. Mexinxin iĉonhi ichta ndattjan na, jeha ndaĉhjan na:

—Que tsonhe inchin Jesús, tti chonda cain joachaxin, rinao.

¹⁵ Co are joexin cain jihi, janha na coengachjian na tti cjoinha na co sacjoi na ngain Jerusalén.

¹⁶ Canxion chojni que vaguitticaon Jesús que joixin na de ngain ciudad de Cesarea sacjoiha na na co ngayé cain chojni mé vehe ná xí vinhi Mnasón. Xí mé joixin xa nontte ngosine ndachaon dinhi Chipre, co osé jehe xa vaguitticaon xa Jesús. Co janha na vittona na ngain nchiandoha xí mé canxion nchanho.

Pablo joitsjehe Jacobo

¹⁷ Are joaso na ciudad de Jerusalén, chojni que vaguitticaon Jesús nttiha anto ché na co jian vayahna na na.

¹⁸ Nchanho yoxin Pablo co janha na sacjoi na joitsjá na Jacobo co nttiha cai vintte cainxin xí que vaquetonhe chojni que vaguitticaon Jesús.

¹⁹ Pablo chjé na joajna, cottimeja coequinhi na cainxin tti joinchehe jehe de ixin joachaxin Dios ngain chojni que jeha judío.

²⁰ Are jehe na coinhi na yá, joinchesayehe na Dios. Cottimeja ndache na Pablo:

—Nchao jí hermano; pero jaha noha ixin jí tsje mil chojni judío que oditticaon Jesús. Co cain nimé anto rinao sitticaon na cain tti coetonha ley que vayé Moisés.

²¹ Co jehe nimé coinhi na ixin jaha nchecoenhe cainxin chojni judío que te ngain rajné chojni que jeha judío ixin sitticaonha na tti coetonha Moisés. Co coinhi na cai ixin jaha nchecoenhe na ixin ichta jian rrochjeha na xenhe na xohe que dinhi circuncisión co sincheha na inchin ndaĉho costumbrea na.

²² ¿Quehe sinttaha na reme? Nona na ixin chojni judío que ditticaon Jesús rroĉatte na are tsinhi na ixin jaha ojoihi.

²³ Mexinxin ĉaxanho na ichta jian si jaha sinchehe inchin rroundattjo ra. Jí nó xí ngaguehna na que sinchecumplí ná promesa para ixin Dios.

²⁴ Tsjiho xí mé. Co sinchehe inchin jehe xa are sinchehe xa cain tti ndaĉho chojni judío ixin sintte xa jian para ixin Dios. Co chjehe xa tomi para ixin tsenanxin xa cain tti sanjo xa ngain Dios. Cottimeja jehe xa nchao rrocjinhi xa ĉajá xa. Jañá cainxin chojni rrochonxin que cain tti ndaĉho na de ixin jaha ndoaha. Co sicon na ixin cai jaha ditticaon cainxin ley que vayé Moisés.

²⁵ Pero de ixin chojni que jeha judío, ichta saho janha na rroanha na joajna ngain chojni mé co ndattjan na na ixin chonda que sineha na tti joaquehe na tti nchesayexin na ídolo, co sineha na jni, co sineha na nntaohé coxigo digusinguehe na ttosin. Co cai que sinttejoacaoha na nĉhí que jeha nĉhíĉihhi na o xí que jeha xixihi na.

Are tse na Pablo ngain nihngo ichta importante

²⁶ Cottimeja Pablo sajoicaon tti nó xí co nchanho yoxin joinchehe inchin joinchehe xa para ixin vintte xa jian para ixin Dios. Cottimeja Pablo joixinhi nihngo ichta importante para ndache na xidána quesa jehe co tti nó xí tsjehe na sinchehe na jamé, rroĉho quesa nchao soen na coxigo que sanjo na ngain Dios.

²⁷ Are merocoa vatto tti yáto nchanho are rrocojian tti nó xí, canxion chojni judío que joixin nonttehe Asia vicon na Pablo ngain nihngo ichta importante. Chojni mé joincheñao na cainxin chojni co tse na Pablo.

²⁸ Co ndaĉho na s n:

—Jaha ra  o x  Israel,  acoi ra co ttjenguijna ni ra. X  jiji ttingaria xa cainxin rajna co ndache xa cainxin chojni ixin sitticaonha na chojnia na co sitticaonha na ley que vay  Mois s co sitticaonha na xidan  ningoa na jiji. Cai joiaho xa canxion chojni griego ngaxinhi nihngo jiji co ja a jainchehe na menos ningoa na.

²⁹ Ja a ndaĉho na ixin jehe na vicon na Pablo ngain ciudad de Jerusal n conixin n  x  griego vinhi Tr fimo que joixin xa ciudad de Efeso. Co jehe na  axaon na ixin Pablo joicao x  m  ngaxinhi nihngo icha importante; pero Pablo jaincheha jam .

³⁰ Co cainxin chojni ngain Jerusal n anto co ao na co coinga na  atte na. Cottimeja tse na Pablo co coianganji na vantsjexin na de nihngo icha importante co coej  na puert  nihngo m .

³¹ Jehe na joinao na narrogoenxon na Pablo, pero jehe tti vaquetonhe xisoldado romano coinhi ixin cain chojni ngain Jerusal n anto co ao na.

³² Co rato m  jehe tti vaquetonhe xisoldado vay  xisoldadoe co icha x  que vaquetonhe icha xisoldado co cain x  m  coinga xa cjoixi na tti vinte cainxin chojni. Co are cain chojni vicon xisoldado co tti vaquetonhe xisoldado, jehe na igoenha na Pablo icha.

³³ Cottimeja jehe tti vaquetonhe xisoldado conchienne ngain Pablo co coetonhe xisoldadoe ixin tse xa Pablo co ixin coiatte xa Pablo conixin y  cadena. Cottimeja joanchiangui ixin quensen Pablo co quehe jainchehe.

³⁴ Pero cainxin chojni coyaotte na co nichja na ojej  cosa. Mexinxin tti vaquetonhe xisoldado  hoha chonxin quehe conhe ixin anto coyao chojni. Co coetonha ixin sajoicao xa Pablo ngain tti vinte xisoldado.

³⁵ Co are xisoldado joiixi xa conixin Pablo ngain escaloen tti vinte xa, jehe xa chonda que vats n xa Pablo noi ixin chojni joinao rrogoen Pablo in .

³⁶ Ixin cainxin chojni rro  na co ndaĉho na s n:

—Nadoenxon ra.

Tti ndaĉho Pablo ngattoxon con cainxin chojni

³⁷ Co are sajidicao xa Pablo tti vinte xisoldado, Pablo ndache xivaquetonhe xisoldado:

— Anchao rronichja nganji?

Co tti vaquetonhe xisoldado joattehe:

— Pero jaha nchao nichja nguigoa griego!

³⁸ Mexinxin jaha jaha x  que joixin Egipto que nchion s  coetocaho xa gobierno co sajoicao xa ngagaha jna n  mil xisoldado que anto  hinto.

³⁹ Cottimeja Pablo ndaĉho:

—Janha n  jud o que joixin ciudad de Tarso que m  n  ciudad importante ngain nonttehe Cilicia. Co nttatsanha  ao,  jana joachaxin ixin rronichja ngain cainxin chojni.

⁴⁰ Co tti vaquetonhe xisoldado  j  joachaxin co Pablo vingattjen ngataha escal n m , co jainch chian se a conixin r  para jainchetencoa cainxin chojni. Co are cainxin na tencoa na, Pablo nichj  na ixin nguigoa hebreo co ndaĉho:

22

¹—Jaha ra,  o chonda ra nchion tsje nano inchin janha co  o da hichjan ra, ttinhi ra quehe rronhattjo ra.

²Co are coinhi na ixin Pablo nichjexin na nguigoa hebreo, jehe na tencoa na icha co Pablo ndache na:

³—Janha ná judío na. Co goanxin na ngain ciudad de Tarso nonttehe Cilicia co vanguixin na nttihi ciudad de Jerusalén co Gamaliel cjoí ximaestróna. Jehe xa joincheoanna xa jian de ixin ley que vayé Moisés. Cainxin nchanho janha joinaho jointtaha inchin janha xaxanho que Dios rinao, inchin jaha ra nchehe ra jai.

⁴Icha saho janha rroá co tse chojni que ditticaon Jesús co coiaxian na ngain cárcel, xí co nchí, co coetonha ixin nagoenxon na na.

⁵Xidána icha importante co cainxin xittetonha ngain ningoa ra nchao rroundattjo ra na ixin jehe na chjana na carta para ixin chojni judío ngain ciudad de Damasco. Mexinxin janha cjoí nttiha ixin rrotse chojni que ditticaon Jesús para rrojiquian na nttihi Jerusalén co rrochjaha na castigo.

*Pablo ndache na quexén vitticaon ngain Jesús
(Hechos 9.1-19; 26.12-18)*

⁶Co janha sacjoi, pero are ngatja nttiha chiaon ciudad de Damasco inchin chonguíxin, rato mé vingasantte na ná xohi que joixin de ngajni ngá nttiha tti rrittji.

⁷Co janha joaritsinga ngataha nontte. Cottimeja coian inchin ná tté chojni que ndachjenji na: “Saulo, Saulo, ¿quedonda jaha ningaonna co feo nchena?”

⁸Cottimeja janha joanchiangua co ndachjan: “¿Quensen soixin?” Co ndachjenji na: “Janha Jesús tti joixin rajna Nazaret tti jaha ningaconhe co feo nchehe ngain.”

⁹Co chojni que cjoinha janha cai vicon na xohi mé. Pero anto xao na ixin coinha na tté Jesús que nichja nganji janha.

¹⁰Cottimeja janha ndattjan: “¿Soixin, quehe chonda que sinttaha janha?” Co jehe ndachjenji na: “Dingattjen co nchehe sigue sattji ciudad de Damasco. Nttiha jí chojni que rroundattjo cainxin tti chonda que sinchehe jaha.”

¹¹Co rato mé janha thoha vicon ixin xohi mé joinchenihi jmacon na janha. Co chojni que cjoinha janha tse na na rana co sacjoinha na hasta joaso na Damasco.

¹²Nttiha vehe ná xí vinhi Ananías. Co xí mé anto nchesayehe xa Dios co anto ditticaon xa ley que vayé Moisés. Co cainxin chojni judío que te ciudad de Damasco nichja na jian de ixin xí mé.

¹³Co Ananías joí joitsjena co ndachjenji na: “Hermano Saulo, jaxon jaha sicon iná.” Co rato mé janha onchao vicon, co nchao tsjá xa.

¹⁴Cottimeja Ananías ndachjenji na: “Dios de nindogolitoa na ocoinchiaha jaha de osé. Jehe coinchiaha jaha para satsoan tti rinao Dios, co para rrochonxin Jesucristo, tti xonhi tiempo joinchehe cosa jianha, co para tsinhi tti rroundacho jehe Jesús nganji jaha.

¹⁵Jañá joinchehe Dios para ixin jaha rronichja de ixin Jesús ngain cainxin chojni co jaha tsequinhi na tti vicon co tti coinhi.

¹⁶Choenha icha. Ditticaon ngain Jesucristo co dingattjen co diguitte para sinhi chojni Jesús. Co jañá sitjañehe cain tti jianha que joinchehe.”

Pablo coequin quedonda sacjoi ngain chojni que jeha judío

¹⁷Co Pablo ndacho cai:

—Co are janha sacjan na nttihi Jerusalén, sacjoi ngain nihngo icha importante para jointtacoanxian Dios. Co nttiha janha vicononxinna Jesús, tti chonda cain joachaxin,

¹⁸co ndachjenji na: “Jaca satsjixin de ciudad de Jerusalén ixin nttihi sitticaonha na tti jaha rroundacho de ixin janha.”

¹⁹ Cottimeja janha ndattjan Jesús: “Soixin, cainxin chojni mé nohe na ixin janha vangaria tsje rajna co joixinhi cainxin ningoe cain rajna mé para vatse chojni que ditticaon na soixin, co gonhe na co coiaxian na ngain cárcel.

²⁰ Co are chojni coaxin na xo Esteban ixin jehe nchehe xa de nichja de ixin soixin, janha joarihi nttiha co vicon. Are mé, janha joarihi de acuerdo conixin tti jehe na joinchehe na co janha joarinda lonttoe na que vinttetsá na are goen na Esteban.” Jañá ndattjan Jesús.

²¹ Pero Jesús, tti chonda cain joachaxin, ndachjenji na: “Sattji ixin janha rrorroanha cjin ngain chojni que jeha judío.”

Are Pablo ngá rá tti vaquetonhe xisoldado

²² Cain chojni nttiha coinhi na tti ndacho Pablo hasta jehe ndacho ixin jehe tsji ngain chojni que jeha judío. Co are mé coexinhi na ndacho na sén:

—Icha jian xí jihi ndasenne xa. Jiquininxinha sechon xa.

²³ Co ixin anto coñao na, coyaotte na co contsenga na lonttoe na que vinttetsá na co cjoa na jinche para noi.

²⁴ Co tti vaquetonhe xisoldado coetonha ixin sajoicao xa Pablo ngaxinhi tti vintte xisoldado. Co ndache xisoldadoe ixin rrogoen xa Pablo conixin ná cuarta de roa para rroquequin Pablo quedonda cainxin chojni coyaotte na.

²⁵ Co are joexin coenchoa xa rá có rotté Pablo ixin rrogoen xa, Pablo ndache xicapitán que vengattjen nttiha:

—¿Achonda ra joachaxin para sonhe ra ná chojni romano saho de sinchejuzguehe rá jehe?

²⁶ Are xicapitán coinhi xa yá, sacjoi xa co ndache xa tti vaquetonhe xisoldado co ndacho xa:

—Ttjiho cuidado tti sinchehe ngain xí yá ixin jehe xa ná chojni romano xa.

²⁷ Cottimeja tti vaquetonhe xisoldado conchienne ngain Pablo co joanchi-anguihi co ndacho:

—¿Andoa jaha ná chojni romano?

Co Pablo joattehe:

—Jan, ndoa.

²⁸ Cottimeja tti vaquetonhe xisoldado ndacho:

—Janha cjoenga hna tsje tomi ixin goan na chojni romano.

Co Pablo ndacho:

—Pero janha ná chojni romano ixin ndodana cjoi ndo ná chojni romano cai.

²⁹ Are xisoldado que rrogoen Pablo coinhi xa mé, joixintonxin xa de tti jí Pablo. Co tti vaquetonhe xisoldado xaon are conohe ixin Pablo ná chojni romano ixin jehe ocoetonhe xisoldadoe ixin coenchoa xa Pablo. Co jiquininxinha rrojinchehe xa jamé ngain ná chojni romano.

Are Pablo cjoi ngain juzgadoe nihngo

³⁰ Co ixin tti vaquetonhe xisoldado joinao chonxin quehe ndacho chojni judío ixin quehe cosa jianha joinchehe Pablo, mexinxin nchanho yoxin jehe joantsjehe cadena vechoaxin Pablo co coetonha ixin xatte cain xidána que vaquetonha ngain icha xidána co cain xidána que vechonda joachaxin de juez ngain juzgadoe na. Cottimeja jehe tti vaquetonhe xisoldado sajoicao Pablo ngain juzgado mé co coetonhe Pablo ixin vingattjen ngagué cain nimé.

23

¹ Pablo tsjehe ngain xite ngain juzgadoe nihngo co ndache xa:

—Soixin ra, janha tonona ċhjoin ngain ansenna ngattoxon con Dios de ixin cainxin tti janha jointtaha ngain vidana.

² Cottimeja Ananías que vehe xidána icha importante coetonhe chojni ttingaxintonxin de ċhiqué Pablo ixin rroquedoe na manaso rroha.

³ Co Pablo joattehe xa:

—Jaha tti ncheha inchin ndaċho, Dios cai soen jaha! Jaha nttihi rrihi ixin rrondachjenji na quehe jianha jointtaha janha inchin jitaxin ley. Pero ley ċhjaha joachaxin para coetonha chojni ixin rroquedoehna na manaso.

⁴ Co chojni que vengattjen nttiha ndaċho na:

—¿Quedonda jaha nichja feo de ixin xidané Dios? ixin jehe xa tti dána icha importante.

⁵ Pablo ndaċho:

—Soixin ra, nonaha ixin jehe xidána icha importante. Si janha rroconona yá, rronichjaha tti janha onichja ixin jitaxin ngain Palabré Dios: “Nichjaha jianha de ixin ná tti ttonhe chojnia.”

⁶ Cottimeja Pablo conohe ixin chojni ngain juzgadoe nihngo vechonda yó grupo. Ná grupo vehe chojni saduceo. Co iná grupo vehe chojni fariseo. Mexinxin Pablo ndaċho anto sén:

—Soixin ra, janha ná xifariseo na co ndodana cai cjoí ná xifariseo. Co soixin ra nttihi para rrondaċho ra si janha jian na ni jianha na ixin ditticanho que tti nindadiguenhe chonda que rroxechon na.

⁷ Are Pablo ndaċho yá, xifariseo co xisaduceo coexinhi xa joinchediscutí xa. Co cayoi grupoe xa ċaxaon xa ojejé.

⁸ Ixin xisaduceo vandaċho xa ixin tti nindadiguenhe irrocjanha rroxechon na co ixin ċonhi ángel jí co ni ċonhi espíritu jí. Co xifariseo vandaċho xa que ján jí cain mé.

⁹ Cainxin xa coyao xa icha co icha. Cottimeja vingattjen canxion ximaestroee ley que vaguitticaon xa inchin xifariseo co ndaċho xa:

—Xí jiji ċonhi cosa jianha joinchehe xa. Co puede ná espíritu jian o ná ángel de Dios onichja ngain xa, mexinxin ttjiho na cuidado que ixin rroningacoenha na Dios.

¹⁰ Co anto joinchediscutí xa hasta tti vaquetonhe xisoldado ċaon ixin puede nasoenxon xa Pablo. Mexinxin rroanha joajna ngain xisoldadoe ixin vantsjexin xa Pablo de nttiha co sajoicao xa Pablo tti vintte xa iná.

¹¹ Co are ttie Jesús, tti chonda cain joachaxin, ċago ngain Pablo co ndache:

—ċaonha Pablo, ixin jaha rronichja de ixin janha ngain ciudad de Roma inchin jaha onichja nttihi Jerusalén.

Are ċaxaon na queċén narrogoenxon na Pablo

¹² Co nchanho yoxin canxion chojni judío cjoao chó na ixin narrogoenxon na Pablo. Co joinchejurá na ixin rrojineha na ni rroguiha na hasta narrogoenxon na Pablo. Co ndaċho na ixin Dios nchao rrojinchehe feo ngain na si nasoenxonha na Pablo.

¹³ Co cain nicjoao chó mé icha que cuarenta xí.

¹⁴ Co sacjoí na ngain xidána que vaquetonha ngain cain icha xidána co ngain xivaquetonha ngain nihngo judío co ndache na xa:

—Janha na jointtajurá na co ndattjan na Dios ixin nchao sinchehe feo nganji na si nasoenxonha na Pablo. Co jointtajurá na ixin sineha na ni siha na hasta soenja na Pablo.

¹⁵ Mexinxin jaxon, soixin ra co icha chojni que chonda joachaxin ngain juzgadoe nihngo, ndache ra tti ttonhe xisoldado ixin ndoe tsiaho Pablo

nganji ra iná. Co ndache ra ixin rinao ra sanchianguihi ra icha. Pero Pablo tsiha ixin janha na rrochoan na ngatja nttiha para sonhe na.

¹⁶ Co xancoén Pablo, xenhe nchichó Pablo, conohe xan cain yá co sacjoi xan tti vintte xisoldado para ixin ndache xan Pablo cain yá.

¹⁷ Cottimeja Pablo vayé ná xicapitán co ndache xa:

—Nttatsanha ñao, ttjiho xan jihi ngain tti tettonhe xisoldado ixin chonda xan ná joajna para ixin jehe.

¹⁸ Xicapitán mé joicao xa xan ngain tti vaquetonhe xisoldado co ndache xa:

—Pablo tti jiaxinhi vayahna para ixin joiquian xan jihi nganji ixin jehe xan chonda xan ná joajna para ixin soixin.

¹⁹ Tti vaquetonhe xisoldado tse ná rá xan mé co joantsjenda xan nchion co joanchianguihi xan co ndaço:

—¿Quehe rinao rrondachjenji na?

²⁰ Cottimeja xan mé ndache xan:

—Canxion chojni judío ocjoao chó na ixin rrondattjo na soixin ixin ndoe tsjiho Pablo ngain juzgadoe nihngo. Jehe na rrondattjo na ixin rinao na sanchianguihi na Pablo icha.

²¹ Pero soixin ditticaonha na ixin ngatja nttiha sema icha que cuarenta xí de ngain ladoe na rrochonhe xa Pablo ixin nasoenxon xa. Co ojoinchejurá xa ixin Dios nchao sinchehe feo ngain xa isi soenha xa Pablo co cai sineha xa ni siha xa hasta soenja xa Pablo. Co jaxon techonhe xa quehe rrondaço soixin.

²² Cottimeja tti vaquetonhe xisoldado ndache xan ixin rrondacheha xan ni ná chojni tti ndache xan jehe. Cottimeja coançhanda xan sacjoi xan.

Are rroanha na Pablo ngain xigobernador Félix

²³ Cottimeja tti vaquetonhe xisoldado vayé yó xicapitén co ndache xa:

—Sico yó ciento xisoldado que tsjixin rotté co setenta xisoldado que sinttetaha conxin co yó ciento xisoldado que sicao lanzé. Co cainxin ra sattji ra tti e las nueve ngain ciudad de Cesarea.

²⁴ Co cai ttjiho ra canxion conxin para ixin Pablo setaha. Co dinttenda ra Pablo hasta saso ra ngain Félix xigobernador ixin xonhi tsonhe.

²⁵ Co tti vaquetonhe xisoldado rroanha ná carta conixin xisoldado mé, co carta mé ndaço carta:

²⁶ “Janha Claudio Lisias çhjahe joajna nganji soixin Félix xigobernador.

²⁷ Chojni judío coiaxinhi xí jihi co joinao na narrogoenxon na xa. Pero are janha conona ixin jehe xa ná chojni romano, janha cjoí conixin xisoldadona co vantsjexin xa de ngá rá chojni judío.

²⁸ Co janha cjoinha xa ngain juzgadoe ningoe chojni judío ixin joinaho conona quehe cosa jianha joinchehe xa.

²⁹ Co janha vicon ixin chojni judío anto coñao na ngain xa pero jehó ixin jehe xa ditticaonha xa ley de jehe na. Pero jiquininxinha senhe xa ni jiquininxinha seaxinhi xa cárcel.

³⁰ Cottimeja coian ixin canxion chojni judío ocjoao chó na ixin nasoenxon na xa. Mexinxin janha rroanha xí jihi nganji soixin. Co janha ondattjan chojni judío que chonda que rrondattjo na soixin quedonda anto coñao na ngain xa.” Janhi jitaxin carta mé.

³¹ Cottimeja cainxin xisoldado joinchehe xa inchin vitonhe xa. Tse xa Pablo co are naxin xehe sajoicao xa ngain rajna Antípatris.

³² Co nchanho yoxin xisoldado que vacjixin rotté sacjan xa ngain tti vintte xa. Co xisoldado que vicao conxin sajoicao xa Pablo hasta ciudad de Cesarea.

³³ Co are joiji na ngain Cesarea, joanjo xa carta ngain xigobernador co cai cointtohe xa Pablo nttiha.

³⁴ Co are xigobernador joexin tsjehe xa carta mé, joanchianguihi xa Pablo ttinó joixin. Co are coinhi xa ixin Pablo joixin nonttehe Cilicia,

³⁵ ndache xa:

—Janha tsian tti rrondaço jaha are tsí nijoiço jie de ixin jaha.

Cottimeja coetonhe xa xisoldado ixin venda xa Pablo ngaxinhi palacioe Herodes.

24

Tti nichja Pablo ngain Félix

¹ Are vatto naho nchanho, Ananías, tti xidána icha importante, joiji Cesarea conixin canxion xivaquetonha ngain nihngo judío. Co cai sajoicao ná xiabogado vinhi Tértulo. Cain nimé sacjoi na ngain xigobernador para joiço na jie de ixin Pablo.

² Co are Pablo conchienne ngain xigobernador, Tértulo coexinhi ço jie de ixin Pablo co ndache Félix xigobernador:

—Dio rrotsjenga hna soixin ixin cain na te na jian co ttetoha na. Co nonttehna na anto çhjoin jí ixin soixin xaxaon jian co nchehe tsje cosa jian para ixin janha na.

³ Janha na anto rinaho na chjaha ra soixin gracias ixin cain tti jian que dayá na de nganji soixin.

⁴ Co janha na rinaoha na santsjaha ra tsje tiempo. Pero nttatsanha ñao, ttinhi nchion tti janha na rrondaçhjan na.

⁵ Janha na onona na ixin xí jiji anto joincheñaço xa chojni. Co ngain cainxin nontte cjoi xa ngayé chojni judío co joinchechjian xa division. Jehe xa tti ttetonhe xa chojni que ditticaon Jesús, tti joixin rajna Nazaret.

⁶ Co jehe xa joinao xa rrojinchehe xa menos ningona na icha importante. Pero janha na tse na xa co joinaho na rrochjaha na xa castigo inchin jitaxin ley na na.

⁷ Pero Lisias, tti ttetonhe xisoldado, joí co afuerza vantsjeyenanxin na xa.

⁸ Co cai ndaço ixin chojni que joiço jie de ixin Pablo chonda que joí na nganji soixin. Co si soixin sanchianguihi xí jiji, soixin rrochonxin ixin ndoa tti joiçhjan na jie de ixin jehe xa.

⁹ Co chojni judío que te na nttiha ngain xigobernador cai ndaço na ixin ndoa cain tti ndaço Tértulo.

¹⁰ Cottimeja xigobernador joinchehe xa ná señal ngain Pablo ixin nchao rronichja. Co Pablo ndaço:

—Anto chahna ixin soixin tsinhi tti janha rronichja, ixin janha nona que tsje nano soixin rrittetonha ngain nontte jiji.

¹¹ Jai vittja tteyó nchanho que janha cjoi ngain Jerusalén para ixin jointtasayá na Dios. Soixin nchao tsonoha isi andoa ni nahi.

¹² Co janha xonhi chojni cjoao co xonhi chojni jointtañaço ngain nihngo icha importante, ni ngain icha nihngo, ni ngain iná parte de ciudad mé.

¹³ Chojni tehe chondaha na quehe rroço na jie de ixin janha ixin janha xonhi jianha jointtaha.

¹⁴ Pero tti ján ndoa es que janha nttasayá Dios inchin nindogoelitona na vanchesayehe na Dios ixin janha nttaha inchin Jesús ttetonha. Mexinxin chojni tehe tendaço na ixin janha rrinttasayá Dios ngain ná manera ojé, pero ndoaha. Ixin janha ditticanho cainxin tti jitaxin ley que vayé Moisés co ditticanho tti ndaço profeté Dios.

¹⁵ Janha chonda confianza ngain Dios inchin chojni tehe ixin ditticanho que tti nindadiguenhe rrocjan rroxechon na masqui cjoí na chojni jian o ni nahi.

¹⁶ Mexinxin cainxin tiempo janha rinaho nttaha jian ngattoxon con Dios co ngattoxon con chojni.

¹⁷ 'Co canxion nano janha ojoiningaria tsje rajna. Cottimeja janha sacjan na ngain Jerusalén ixin janha cjoinha tomi ngain ninoa, co tomi mé tomi vachjana chojni. Co cai sacjan na para ixin rroganjo coxigo para ngain Dios.

¹⁸ Co janha cjoí ngaxinhi nihngo icha importante para jointtaha jamé, co ojointtaha inchin jitaxin ley para varihi ná chojni jian ngain Dios. Co are mé canxion chojni judío que joixin nonttehe Asia vicon na ixin janha tarrihi ngaxinhi nihngo mé. Pero tsjeha chojni vehe nganji na co xonhi chojni jointtañao.

¹⁹ Icha jian si chojni que vicon na nttiha tsí na nttihi co rrotho na jie de ixin janha si rrondaño na ixin janha jointtaha jianha.

²⁰ O que chojni tehe que cai vintte na ngain juzgadoe nihngo rrondaño na quehe cosa jianha xijuez de ngain juzgado ndaño xa ixin janha jointtaha.

²¹ ¿Apoco janha nichja jianha are janha ndattjan na sên: "Jai soixin ra chonda ra que sinchejuzgana ra ixin ditticanho que tti nindadiguenhe chonda que rrocjan rroxechon na"?

²² Are Félix coinhi yá, jehe joinao rronichja na icha pero iná nchanho ixin jehe oconohe jian quexén nchehe chojni que vaguitticaon Jesús. Co jehe ndache na:

—Are tsí Lisias, tti tetonhe xisoldado, jehe rrondachjenji na icha de ixin jihi.

²³ Cottimeja Félix coetonhe xicapitán ixin sinchehe xa sigue senda xa Pablo pero coetonha cai ixin rrochjé xa Pablo nchion libertad co cai tsanchjanda xa niamigoe Pablo sitsjehe na co sicaohe na Pablo tti sondehe.

²⁴ Are vatto canxion nchanho cottimeja Félix cjoí ngain Pablo iná. Co joicao çhihi vinhi Drusila que mé ná nchí judía. Co Félix coetonha ixin vayé na Pablo ixin joinao rronichja de ixin quexén ná chojni sitticaon Jesucristo.

²⁵ Co Pablo ndache Félix ixin chonda que sinchehe ni jian inchin Dios rinao co ixin çhoha sinchehe ni inchin cuerpoe ni rinao co ixin tsí ná nchanho are Dios sinchejuzguehe cain chojni. Co are Félix coinhi cain mé, anto xaoon co ndache:

—Sattji jaxon. Co are janha rrochonda icha tiempo janha sayaha iná.

²⁶ Félix xaxaoon ixin puede Pablo rroganjo tomi ngain para ixin rrochjanda. Mexinxin jehe coetonha ixin vayé na Pablo tsje nttiha para ixin cjoao Pablo.

²⁷ Jañá vatto yó nano, cottimeja Félix cointtohe de vehe xigobernador. Co ná xí vinhi Porcio Festo coexinhi vehe gobernador. Co Félix joinaoha ixin chojni judío rrocoñao ngain, mexinxin cointtohe Pablo ngain cárcel.

25

Are Pablo nichja ngain Festo

¹ Cottimeja Festo joiji ngain ciudad de Cesarea para ixin coexinhi vehe gobernador. Co are vatto ní nchanho, sacjoixin de ngain Cesarea co cjoí ngain Jerusalén.

² Nttiha xidána que vaquetonha ngain icha xidána co chojni judío que vechonda joachaxin joicho na jie de ixin Pablo ngain Festo.

³ Co jehe na ocjoao chó na ixin rroanha na xí ixin rrogoen xa Pablo ngatja nttiha. Mexinxin anto joinchetsenhe na ñao Festo ixin rrogayé Pablo ngain Jerusalén.

⁴ Pero Festo çhoha co joattehe ixin Pablo veaxinhi nttiha Cesarea co jehe çaxaon ixin tsjeha nchanho rroconçjenhe co toin rrocjan nttiha.

⁵ Co ndache na:

—Nchao nittetoanha ra tsjinha na ngain ciudad de Cesarea co jehe na siçho na jie de ixin Pablo, si jehe joinchehe jianha.

⁶ Festo vittohe ngain Jerusalén jehoni o tte nchanho icha, cottimeja sacjan ngain ciudad de Cesarea. Nchanho yoxin jehe vetaha xintaon que gondehe are vehe gobernador co coetonhe xisoldado ixin vayé xa Pablo.

⁷ Co are Pablo joí, çatte tsje chojni judío que joixin de Jerusalén co chojni mé joiçho na jie de ixin Pablo co ndaço na ixin jehe joinchehe anto tsje cosa jianha, pero çhoha joincheguitticaon na Festo que ixin ján seguro Pablo joinchehe jamé.

⁸ Cottimeja Pablo ndaço de ixin jehe mismo:

—Janha çonhi jianha jointtaha ngain ley chojni judío, ni ngain nihngo icha importante, ni ngain emperador romano.

⁹ Festo joinaoha ixin chojni judío rrocoñao na ngain, mexinxin ndache Pablo:

—¿Arinao satsji Jerusalén? Co nttiha janha sinttajuzgaha jaha.

¹⁰ Co Pablo joattehe:

—Jaxon janha rrihi ngain juzgadoe emperador romano co nttihi tti janha jiquininxin soan na juzgado co nahi ngain Jerusalén. Soixin ochonxin que janha çonhi jianha jointtaha ngain chojni judío.

¹¹ Si janha jointtaha jianha co jiquininxin ndasenhe na, janha rronichjaha nahi. Pero si jehe na ndaço na ndoaha de ixin janha, çonhi chojni chonda joachaxin para sinchechienhe na janha ngain na. Janha rinaho que xiemperador ngain ciudad de Roma sinchejuzgana.

¹² Cottimeja Festo cjoao nivacjenguijna vaquetonha, cottimeja ndache Pablo:

—Jaha ndaço ixin jaha rinao que ixin xiemperador sinttajuzgá; mexinxin jaha satsji ngain xa.

Are Pablo nichja ngain xirey Agripa

¹³ Canxion nchanho después Agripa xirey co Berenice nçhichó xa cjoí Cesarea para ixin joitsjehe na Festo.

¹⁴ Co ixin vittohe na nttiha nchion nchanho, Festo coequin Agripa de ixin Pablo. Co ndache xa:

—Jí ná xí que tti Félix cointtohe ngain cárcel nttihi are janha coexian joarihi gobernador.

¹⁵ Are janha cjoí Jerusalén xidána que ttetonha ngain icha xidána co tti xí que ttetonha ngain ningoe chojni judío joiçho na jie de ixin jehe xí mé. Co jehe na rinao na ixin janha sinttacondená xa para ndasenhe xa.

¹⁶ Co janha ndattjan na ixin ley romano ndaço ixin çhoha sinchecondená ni ná chojni para ndasenhe antes que chojni mé tsinhi tti rrondaçho chojni que joiçho jie de ixin jehe. Co cai chonda que chojni mé rronichja de ixin quehe joinchehe jehe are chojni que tjanguihí tsinhi na tti rronichja jehe.

¹⁷ Mexinxin are chojni judío joí na nttihi, janha toin nchanho yoxin joaritaha xintaon xigobernador co vayá Pablo.

¹⁸ Janha xaxanho que jehe joinchehe ná cosa anto jianha, pero nijoitcho jie de ixin jehe nichjaha na inchin janha xaxanho.

¹⁹ Jeho ndacho na ixin jehe ditticaonha religioen na. Co nichja na de ixin ná xí vinhi Jesús que ndavenhe. Pero Pablo ndacho ixin xí mé jichon xa.

²⁰ Janha joinonaha quehe rrojintaha, mexinxin janha joanchianguia Pablo si jehe rinao tsji Jerusalén para soenxin juzgado nttiha.

²¹ Pero Pablo ndacho ixin jehe rinao Augusto tti emperador sinchejuzguehe. Mexinxin janha coetonha ixin jehe vittohe ngain cárcel hasta que janha nchao rroanha jehe ngain emperador mé.

²² Cottimeja Agripa ndache Festo:

—Cai janha rinaho tsian tti rrondacho xí mé.

Festo joattehe:

—Ndoe tsinhi tti rrondacho xa.

²³ Co nchanho yoxin Agripa co Berenice vinttengá lonttoe jian co chjoin te. Co are chojni anto joinchesayehe na, cayoi na sacjoi na ngaxinhi ná cuarto jie tti vinte tsje nivaquetonhe xisoldado co tsje nivechonda joachaxin ngain ciudad mé. Festo coetonhe xisoldadoe ixin vayé xa Pablo.

²⁴ Cottimeja Festo ndacho:

—Rey Agripa co cainxin soixin ra que joihi ra, nttihi jí tti xí. Tsje chojni judío ngain Jerusalén co nttihi Cesarea joiicho na jie de ixin jehe xa. Co cainxin nchanho ndachjenji na na ixin jehe xa jiquininxin ndasenhe xa.

²⁵ Pero janha xaxanho que jehe xa xonhi joinchehe xa para jiquininxin ndasenhe xa. Co ixin jehe xa joanchia xa que Augusto tti emperador sinchejuzguehe xa, mexinxin janha rrorroanha jehe xa ngain jehe emperador na.

²⁶ Pero janha nonaha tti cosa jianha que joinchehe xa para janha nchao rrocjin na joajna ngain emperador. Mexinxin janha vayá xa para soixin ra sicon ra co para rey Agripa sicon co sanchianguihi ra xa tti cosa jianha que joinchehe xa. Jamé puede janha nchao rrocjin na joajna para ngain emperador.

²⁷ Ixin xonhi xé si janha rrorroanha ná tti teaxinhi cárcel co choha rrondatjan tti cosa jianha que joinchehe.

26

Are Pablo nichja ngain rey Agripa

¹ Cottimeja Agripa ndache Pablo:

—Jaha nchao nichja de ixin tti jaha joinchehe jaxon.

Co Pablo vatsín rá para chjé joajna ngain Agripa co coexinhi nichja ngain co ndacho:

² —Soixin, anto chahna ixin chjana joachaxin de rronichja nganji soixin de ixin tti jianha que ndacho chojni judío de ixin janha.

³ Co cai anto chahna ixin soixin onoha jian cainxin costumbre de chojni judío co onoha quexehe cosa nchediscutí na. Mexinxin nttatsanha ñao soixin, ttinhi jian tti janha rrondattjo.

Quexén vanchehe Pablo icha saho, antes de que rroguitticaon ngain Jesús

⁴ Cainxin chojni judío chonxin quexén janha jointtaha ngayé na ngain rajnana co ngain ciudad de Jerusalén desde janha xa nchin na.

⁵ Co cai jehe na chonxin na co nchao rrondattjo na soixin, si jehe na rinao na, ixin de osé janha joarihi ná fariseo. Co xifariseo icha dicao cuidado de nchehe cainxin tti jitaxin ley que vayé Moisés que icha chojni judío.

⁶ Co jaxon janha nttihi rrihi para que soixin rrondaçho ixin janha, ajian na ni jianha na ixin ditticanho que Dios sinchexechon nindadiguenhe inchin ndaçho Dios ngain nindogoelitoa na.

⁷ Cainxin chojni ngain tti tteyo grupoe chojni Israel chonda na confianza ixin Dios sinchexechon nindadiguenhe ixin jañá ndaçho. Mexinxin nch-esayehe na Dios nchanho co ttie. Co jaxon, canxion chojni judío joiçho na jie de ixin janha ixin janha chonda confianza mé cai.

⁸ ¿Apoco soixin ra ðo judío ra ditticaonha ra ixin Dios sinchexechon nindadiguenhe?

Icha saho quexén Pablo vanchehe jianha ngain chojni que vaguitticaon Jesús

⁹ Icha saho janha vaçaxanho ixin janha vanttaha jian are vanttaha feo ngain chojni que ditticaon Jesús, tti joixin rajna Nazaret.

¹⁰ Co jañá janha vanttaha ngain ciudad de Jerusalén. Co xidána que ttetonha ngain icha xidána chjana xa joachaxin de coixian tsje chojni que ditticaon Jesús. Co are jehe xa ndaçho xa ixin navenxon na, janha cai ndaçhjan ixin nchao vanchehe xa.

¹¹ Anto tsje nttiha janha jointtaha feo ngain chojni que ditticaon Jesús ixin rinaho que chojni mé irroguitticaonha na Jesús icha. Co jañá vanttaha ngain cainxin nihngo. Co janha anto vacoñaõa na, mexinxin hasta vacjé chojni mé ngain tsje rajna de ojé nontte.

Pablo nichja iná de ixin quexén jehe coexinhi vitticaon Jesús (Hechos 9.1-19; 22.6-16)

¹² Co are janha vanttaha jamé, janha sacjoi ciudad de Damasco conixin joachaxin de xidána que ttetonha ngain icha xidána.

¹³ Pero are janha ngatja nttiha ngosine nchanho, janha vicon vingasante na ná ðohi que joixin ngajni ngá nttiha que rrittji janha conixin chojni que cjoinha. Co ðohi mé anto icha soji ðoi que nchanho.

¹⁴ Cottimeja cain na vinttji na ngataha nontte. Co janha coian tté Jesucristo nichjaxin nguigoahna hebreo co ndaçho: “Saulo, Saulo, ¿quedonda ninga-conna co feo nchena? Jaho rritonihá ixin jaha inchin coxinttá are ðantoe va con garrocha.”

¹⁵ Cottimeja janha ndaçhjan: “¿Quensen, soixin?” Co Jesús, tti chonda cain joachaxin, ndaçho: “Janha Jesús tti jaha ningaconhe co feo nchehe ngain.

¹⁶ Dingattjen, janha joihi nganji co nichjaha para sinchehe ðana. Janha coinchiaha jaha ixin jaha rrondate chojni quexén jaha vicon na janha jai co cai tti janha tsjagoha jaha are jaha sicon na janha icha.

¹⁷ Co janha rrorroanha jaha ngain chojni que jeha judío. Co janha tsjenguijna jaha are jaha ngayé chojni judío co chojni que jeha judío para ixin cain chojni mé nasoexonha na.

¹⁸ Janha rrorroanha jaha ngayé chojni que jeha judío para que jaha sinchecoehne na tti ndoa. Jamé jehe na tsinttohe na de nchehe na cosa jianha co tsexinhi na sinchehe na cosa jian. Co jehe na isitticaonha na tti ndaçho xijianha, sino que sitticaon na ngain Dios. Co jañá janha sinttatjañá na cain cosa jianha que nchehe na. Co jehe na sintte na conixin icha chojni que coinchiehe Dios.”

Pablo vitticaon tti ndaçho Jesús

¹⁹ Mexinxin, soixin, janha vitticanho cain tti ndaçho Jesús nganji na are janha vicononxinna.

²⁰ Janha saho nichja ngain chojni ngain ciudad de Damasco. Cottimeja nichja ngain chojni ngain ciudad de Jerusalén, cottimeja nichja ngain chojni ngoixin nonttehe Judea co ngain chojni que jeha judío. Janha ndattjan cain chojni mé ixin tsentoxinhi na vidé na co sincheha na cosa jianha, sino que sinchehe na cosa jian inchin Dios rinao para tsjagoe na icha chojni que ndoa jehé na coentoxinhi na vidé na.

²¹ Co canxion chojni judío tse na janha ngain nihngo ixin janha nichja jamé. Co chojni mé joinao rrogoen na janha.

²² Pero Dios cjoenguijna na, mexinxin janha xa rrinichja cain tti janha vicon ngain chojni noa co ngain chojni rico, co cainxin tti janha nichja jí de acuerdo conixin cain profeté Dios co Moisés dindačo ixin chonda que tsonhe.

²³ Co cain nimé dicjin na ixin Cristo chonda que anto tangui tsonhe co ixin Cristo ndasenhe co rroxechon icha saho de cainxin chojni que ndadiguenhe. Co jañá tti Cristo tsjagoe chojni judío co chojni que jeha judío ixin ndoa jehé nchao danjo ngain cain chojni iná vida naroxin.

Pablo joinao ixin rey Agripa rroguitticaon Jesús

²⁴ Are Pablo jinichja cain yá de ixin jehé, Festo ndačo sén:

—¡Pablo, jaha ndadixenga! Jaha dixante ttjelea ixin anto coangui xón.

²⁵ Pero Pablo joattehe:

—Nahi, soixin, janha dixengaha na. Cainxin tti janha ndačhjan ndoa.

²⁶ Co nntihi jí rey Agripa. Jehé chonxin cain yá. Janha nichja ngain jehé conixin confianza ixin nona que jehé ochonxin cain tti janha ndačhjan. Ixin cain tti ndačhjan janha ndoa conhe ngattoxon con tsje chojni.

²⁷ Cottimeja Pablo ndache rey Agripa:

—Soixin, ¿aditticaon tti dicjin profeté Dios? Janha nona que soixin ditti-caon.

²⁸ Cottimeja Agripa ndačo:

—Ngain nchion tiempo jihi ¿axaxaon ixin sincheguitticaon na Jesús?

²⁹ Cottimeja Pablo ndačo:

—Masqui nchion o tsje tiempo, anto jian si soixin co cain icha chojni nntihi que tettinhi tti janha rrinichja sitticaon ra co sintte ra inchin janha. ¡Pero nahi siatteha ra conixin cadena inchin janha!

³⁰ Are Pablo joexin nichja cain yá, xirey, xigobernador, Berenice co cain icha chojni que te nntiha vingattjen na,

³¹ co vachjexin na de cuarto co coexinhi na cjoao chó na co ndačo na:

—Xí jihi xonhi cosa jianha joinchehe xa, mexinxin jiquininxinha xa ndasenhe xa ni jiquininxinha xa siaxinhi xa cárcel.

³² Co Agripa ndache Festo:

—Si xí jihi rrondačhoha xa ixin rinao xa que xiemperador sinchejuzguehe jehé xa, ján na nchao rrogantsje na xa de cárcel.

27

Are rroanha na Pablo para Roma

¹ Cottimeja jehé na cjoao chó na co rroanha na na janha na para nonttehe Italia. Co are mé jehé na ndache na ná xicapitán que vinhi Julio ixin sajoicoa xa Pablo conixin icha nivintteaxinhi nntiha. Jehé Julio cjoí xicapitén ná grupoe xisoldado vinhi Augusto.

² Cai ná xí vinhi Aristarco que joixin xa de ngain ciudad de Tesalónica ngain nonttehe Macedonia cjoí xa conixin janha na. Coá na ná barco que joixin ciudad de Adramitio. Co barco mé vehe listo sajittji barco ngain canxion rajna ngain nonttehe Asia.

³ Co nchanho yoxin joaso na ciudad de Sidón. Julio joinchehe jian ngain Pablo co coančjanda Pablo vanianxin de barco co joitsjehe niamigoe nttiha co coančjanda niamigoe Pablo chjé na jehe tti gondehe.

⁴ Cottimeja janha na sacjoixin na de nttiha ngain barco. Anto soji jitja čhintto, mexinxin janha na vatto na nontte ngosine ndachaon dinhi Chipre ngain lado cjon ixin nttiha čhintto mé icha sojiha čhintto.

⁵ Cottimeja vattoo na ndachaon chian nonttehe Cilicia co nonttehe Panfilia. Co joaso na ciudad de Mira ngain nonttehe Licia.

⁶ Nttiha xicapitén xisoldado vittja xa ná barco que joixin ciudad de Alejandría co barco mé sajittji ngain nonttehe Italia. Jehe xa coetonha xa ixin janha na coá na barco mé para jointtaha sigue sacjoi na.

⁷ Co canxion nchanho sacjoi na anto yao co anto tangui joaso na chian rajna Gnido. Anto soji čhintto co čhoja sacjoi na nao icha, mexinxin vatto na chiaon rajna Salmón ngain nontte ngosine ndachaon dinhi Creta ixin nttiha čhintto icha sojiha.

⁸ Anto yao vatto na ngoixin nontte mé hasta joaso na ná lugar chian rajna Lasea. Co lugar mé anto nchao para cainxin barco dinttengattjen barco nttiha, mexinxin dinhi Buenos Puertos.

⁹ Are mé ovatto canxion semana hasta joaso na lugar mé, co anto chiaon tiempoe quin are anto soji čhintto. Mexinxin Pablo nichja tti řaxaon

¹⁰ co ndačho:

—Janha ndattjo ra ixin anto tangui tsoan na isi satsji na icha. Barco jiji rroxante ixin anto soji tseto jinda. Co barco co cargue sitján. Co anto peligro para cain na ján na cai.

¹¹ Pero xicapitén xisoldado icha joinchehe xa caso tti ndačho xí que vagueca barco mé co tti ndačho xí que coehna barco mé.

¹² Co masqui lugar tti vintte na anto nchao para cainxin barco vaguengattjen, nchaoha nttiha para barco vaguittohe ngoixin tiempoe quin are anto soji čhintto. Mexinxin merocoa cainxin chojni řaxaon ixin icha jian janha na sacjoixin na de nttiha. Jehe na joinao na rrogaso na ngain ciudad de Fenice ngain řajeho nontte mé para rrogatto na tiempoe quin are anto soji čhintto, ixin ngain ciudad mé veva čhinttoe norte ni čhinttoe sur.

Are coeto ndachaon soji

¹³ Cottimeja joí ná čhinttoe sur que sojiha čhintto danto, co jehe na řaxaon na ixin nchao satsji na icha. Mexinxin janha na sacjoixin na de lugar mé co sacjoi na anto chiaon ngandehe ndachaon čhiqué nontte ngosine ndachaon que dinhi Creta.

¹⁴ Pero nchion después joí ná čhintto anto soji que joixin nontte mé co vinhi čhintto Nordeste. čhintto mé anto soji joinchenguittjen čhintto barco mé.

¹⁵ Co čhintto mé coančjandaha barco para sacjoi nao, mexinxin tti veca barco ndajoinchengattonoa barco. Cottimeja coančjanda ixin čhintto veca barco mé.

¹⁶ Co vatto na ná nontte nčhín que jí ngosine ndachaon que dinhi nontte Claudia. Co nttiha čhintto mé joinchenguittjenha barco soji inčhin icha saho. Mexinxin masqui tangui, janha na nchao vantsje na ná lanchachjan de ngataon jinda tti jichoanito barco para xantteha lanchachjan mé.

¹⁷ Co joaqué na lanchachjan mé ngaxinhi barco. Cottimeja coiattede na barco conixin jino jieto. Co joaqué na jino mé chinguihi barco para ixin barco rroxantteha. Co anto xaon na ixin xaxaon na puede barco satsji ngain lugar vinhi Sirte, tti jí tsje nchise co ningaha jinda. Mexinxin jehe na joinchegania na manta jie que joinchegonda chintto para deca barco. Cottimeja barco mé sacjoi lado jitjaxin chintto.

¹⁸ Co nchanho yoxin xa anto soji chintto, mexinxin jehe na coexinhi na vancajinhi na barco cargué barco chingui ndachaon para ixin barco setsinganguiha jinda ixin anto soji coinguittjen jinda.

¹⁹ Co nchanho ninxin janha na conixin rana na vancanguixin na jinda tsje cosa tti nchexin na xa ngaxinhi barco.

²⁰ Tsje nchanho janha na viconha na ni nchanho ni conotse. Co janha na xaxanho na ixin ndarroguenhe na nttiha ixin xa anto soji coinguittjen ndachaon co chintto.

²¹ Co are vatto tsje nchanho que jehe na joinheha na, Pablo vingattjen ngagué na co ndacho:

—Icha jian isi jaha ra rroguitticaon ra tti janha ndattjo ra icha saho. Icha jian isi rrocjixinha na de Creta. Pero jai cainxin cosé barco ndavitján.

²² Co jaxon janha ndattjo ra ixin taha ra joachjaon, ixin masqui barco jiji sitján, pero xonhi chojni ndasenhe.

²³ Jamé nona, ixin are naxin xehe joí nganji na janha ná ángel Dios, tti tetonna co janha rrinttaha xé jehe Dios mé.

²⁴ Co ángel mé ndachjenji na: “xaonha, Pablo, ixin jaha chonda que satsji ngain emperador romano. Co ixin Dios anto rinao jaha, ni ná chojni conixin jaha ngaxinhi barco jiji ndasenhe.” Jañá cho ángel Dios.

²⁵ Mexinxin taha ra joachjaon ixin janha chonda confianza ngain Dios co ditticanho ixin cainxin cosa tsonhe inchin ndacho Dios.

²⁶ Pero seguro que masqui barco rroxantte, pero ján na saso na ngain ná nontte.

²⁷ Jañá vatto yó semana de chintto. Cottimeja ná ttie joaso na ngain parte de ndachaon que vinhi Adria. Co johó chintto veca barco mé. Co ngosine ttie mé, jehe nitenda na barco vicon na ixin barco mé ojoiji barco chiaon de ngain tti jí jinche.

²⁸ Jehe na vattechoha na jinda para chonxin na quexén ningaxin vehe jinda mé. Co jinda vechonda nda treinta y seis metros nttiha. Co are vatto na nchion icha, cjan na vattechoha na jinda iná co nttiha vechonda veintisiete metros.

²⁹ Co ixin jehe na xaon na ixin puede barco rroxantte ngataha xo, mexinxin vancahngui na jinda nó chia yeye conixin jino para ixin coengattjen na barco mé. Co jehe na anto joinao na jaca rrojingasán.

³⁰ Nivinttenda barco joinchexaxaon icha chojni ixin jehe na tedancahngui na icha chia jinda conixin jino nojaxin barco. Pero jehó joincheyehe na na ixin joinao na sarroquinga na de ngain barco ngaxinhi lanchachjan.

³¹ Cottimeja Pablo ndache xicapitán co xisoldadoe:

—Si xí que tericao barco jiji sittoeha xa ngaxinhi barco, jaha ra ndasenhe ra chingui jinda.

³² Mexinxin xisoldado conchinji xa jinoe lanchachjan icha saho que xí que tericao barco vengá lanchachjan mé. Co sajoicao jinda lanchachjan mé.

³³ Co are ojidingasán Pablo ndache cain na:

—Icha jian isi jaha ra sintte ra ixin vatto yó semana co xonhi jointte ra ni vinttechinha ra.

³⁴ Mexinxin jintte ra para ixin rrochonda ra fuerza. Co taha ra joachjaon ixin xonhi tsonha ra ni tsoniaha ra.

³⁵ Co are joexin nichja Pablo cain yá, jehe tse ná niottja co chjé gracias ngain Dios are cainxin chojni coinhi na. Cottimeja jehe cončhinji niottja mé co coexinhi joine nio.

³⁶ Cottimeja cain na goan na animado de ixin tti ndačo Pablo, co jehe na cai joine na.

³⁷ Co janha na vintte na doscientos setenta y seis chojni ngaxinhi barco mé.

³⁸ Co are joexin joine na niottja mé co ocojehe na, coexinhi na vancahngui na trigo ndachaon para ixin itsonontteha barco čingui jinda.

Are xantte barco

³⁹ Co are vingasán, jehe nitericao barco chonxinha na nontte ngosine ndachaon tti joaso na. Pero vicon na ná lugar ngandehe nontte mé ttinó jinda ijittinguittjenha nda co tti ojí nchise. Jehe na joinao na rroguca na barco nttiha, si nchao.

⁴⁰ Cottimeja jehe na cončhinji na jinoe chia yeye que coengattjenxin na barco co vittohe chia čingui jinda. Cottimeja coxindanguehe na direccioen barco čingui jinda que jehe na gondehe na para ixin veca na barco mé nao. Cottimeja jehe na vatsín na manta jie ngain já barco para ixin čhintto nchao veca čhintto barco mé. Cottimeja barco sacjoi ngain lugar tti ijittinguittjenha jinda.

⁴¹ Pero sacjoi na ngain lugar tti jinda vetanxin chó nda. Co jinda tse nda barco co sajoicao nda ngain ná jnanchjan de puro nchise čingui jinda. Co já barco mé čhoja vachjexin de nttiha. Co noton barco mé coexinhi xantte ixin anto soji goen jinda.

⁴² Rato mé xisoldado xaxaon xa ixin narrogoenxon xa tti vintteaxinhi ixin xaon xa que puede tti vintteaxinhi nchao sarroquina na are oviji na ngataha nontte xema.

⁴³ Pero xicapitán joinaoha xa ixin Pablo ndasenhe, mexinxin coančjandaha xa xisoldadoe xa goen xa tti vintteaxinhi; sino que coetonhe xa cain chojni que onohé nchenadá rročhinca na ngain jinda hasta siji na ngain nontte xema.

⁴⁴ Co cai coetonhe xa cain chojni que noeha nchenadá ixin quexén satto ngataonhe jinda ngataha nttatablé barco co ngataha icha cosé barco. Co jañá cain na joaso na tti xema nontte co xonhi conna na.

28

Are Pablo ngain nonttehe Malta

¹ Co are cain na joaso na nontte, coian na ixin nontte mé dinhi Malta.

² Co chojni nttiha coiaconoana na. Jehe na joinchechjian na ná xohi jie ixin anto quin co ixin jitti čhin. Cottimeja ndachjenji na na ixin rroxixona na ngandehe xohi mé.

³ Pablo tse ná manojó de nttaniho co joaquehe nta ngataha xohi. Co rato mé ná conché vachjexin va de ngacjan xohi mé ixin anto soa co joinehe va rá Pablo co taveriahnda va nganito rá Pablo.

⁴ Are chojni que joixin nontte mé vicon ixin conché mé taveriahnda va nganito rá Pablo, jehe na ndache chó na:

—Seguro xí jihí ná tti doen chojni. Co masqui ndavenha xa ngain ndachaon, pero chonda que ndasenhe xa ixin joinchehe xa jianha.

⁵ Pero Pablo contsenga rá co vanca va ngatto xohi. Co xonhi conhe Pablo.

⁶ Co chojni que joixin nontte mé chonhe na para ixin rroguicon na rrogatjoe rá Pablo o que rato mé ndarroguenhe Pablo. Pero chonhe na sé co Pablo xonhi conhe, mexinxin xaxaon na oje co coexinhi na ndačo na ixin Pablo ná dios.

⁷ Ná xí vinhi Publio vaquetonhe nonttehe Malta. Jehe xa chonda xa jnguihi xa chiaon tti janha na texixona na, co jian vayahna na xa ngaxinhi nchiandoha xa ngoixin tti ní nchanho que vintte na nttiha.

⁸ Tiempo mé ndodé Publio tavetsinga ndo ngataha saoen ndo ixin anto vechonda ndo soa co anto vechonda ndo diarrea. Pablo sacjoi joitsjehe ndo. Jehe tsín rá ngataha ndo co joinchecoanxinhi Dios. Co jehe ndo xingamehe ndo.

⁹ Cottimeja cainxin chojni nihi ngain nontte mé joí na ngain Pablo co cain jehe na xingamehe na.

¹⁰ Co anto tsje cosa joinchettohna na na. Co are janha na sacjoi na, jehe na cjoenguijna na na jointtaca na iná barco cain cosa mé.

Are Pablo joiji Roma

¹¹ Are vatto ní conittjao que janha na vintte na ngain nontte mé, coá na iná barco que nttiha vehe ngoixin tiempo quin are anto soji čhintto. Co barco mé joixin de ngain ciudad de Alejandría. Co ngain nojaxin barco mé vintte yó retratoe dios, ná vinhi Cástor co ná vinhi Pólux.

¹² Co ngain barco mé sacjoixin na de nonttehe Malta que jí ngosine ndachaon co joaso na ciudad de Siracusa. Vittona na nttiha ní nchanho.

¹³ Cottimeja sacjoixin na de nttiha co sacjoi na chiaon ngandehe ndachaon hasta joaso na ngain ciudad de Regio. Co nchanho yoxin coexinhi cjoa ná čhinttoe sur, mexinxin janha na sacjoi na norte co ndoexin joaso na ngain ciudad de Puteoli. Nttiha vanianxin na de barco.

¹⁴ Nttiha janha na vetan na canxion chojni que vaguitticaon na ngain Jesús, co jehe na vayahna na na ngain nchiandoha na para ngoixin ná semana. Cottimeja janha na sacjoi na para ciudad de Roma.

¹⁵ Co chojni que vaguitticaon Jesús ngain Roma coinhi na de ixin janha na. Mexinxin vačhjexin na de ciudad mé co vetan na na ngatja nttiha. Canxion na sacjoi na hasta ngain rajna Foro de Apio co icha na sacjoi na hasta ngain lugar que dinhi Tres Tabernas para vetan na na. Co are Pablo vicon na, jehe chjé gracias ngain Dios co goan animado.

¹⁶ Are joaso na ngain Roma, xicapitán joanjo xa tti vintteaxinhi ngain xivaquetonha cárcel de Roma. Pero jehe xa joanjo xa joachaxin que Pablo vittohe ngain ná nchia, jehe conixin nacoa xisoldado para venda xa.

Are Pablo joinchecoenhe chojni de ixin Dios ngain Roma

¹⁷ Are vatto ní nchanho de joaso na Roma, Pablo rroanha joajna cainxin nivaquetonhe chojni judío que vintte na nttiha Roma ixin xatte na ngain jehe Pablo. Cottimeja Pablo ndačo ngain na:

—Hermanos, masqui janha xonhi jianha jointtaha ngain chojni judío ni ngain costumbre que chonda na de ngain nindogoelitoa na xančhjen, pero masqui jamé coiaxinna na nttiha Jerusalén co joanjo na na ngá rá chojni romano.

¹⁸ Co chojni romano anto cjoao na co ndačo na ixin janha jiquininxinha ndasenhe na. Mexinxin jinao na rrocanchjanda na na rrogáčhjexin de cárcel.

19 Pero chojni judío čhoha na. Mexinxin janha chonda que joanchia ixin xiemperador sinchejuzgana janha masqui chondaha ni ná cosa jianha para rronichja de ixin chojni judío.

20 Mexinxin janha vayaha ra ixin janha rinaho sicon ra co rronichjaha ra ixin jaxon janha rričoaxin cadena jeho ixin janha ditticanho ngain jehe tti techonhe cain chojni judío.

21 Cottimeja jehe na ndache na Pablo:

—Janha na xonhi joajna vayá na de ngain nonttehe Judea de ixin soixin. Co xonhi chojni judío que joixin nttiha nichja jianha de ixin soixin.

22 Pero janha na nona na ixin ngain cainxin lugar te chojni que anto coñao ngain chojni que ditticaon Jesús. Mexinxin janha na anto rinaho na tsian na tti rrondachjenji ni ra soixin.

23 Cottimeja jehe na coín na ná nchanho para ixin jehe na xatte na iná. Co nchanho mé jehe na co anto tsje icha chojni xatte na ngain nchia tti vehe Pablo. De vingasán hasta tti Pablo ndache na de ixin quexén Dios ttetonha. Pablo joinao ixin cain chojni mé rrochonxin na quensen Jesús, mexinxin conixin ley que vayé Moisés co xón que dicjin profeté Dios Pablo cjoagoe chojni de ixin quensen Jesús.

24 Co canxion chojni vitticaon na tti ndačo Pablo co icanxin na čhoha vitticaon na.

25 Co ixin vintteha na de acuerdo, sacjoi na cada na nchiandoha na. Cottimeja Pablo ndačo:

—Anto ndoa tti ndačo Espiritu Santo ngain nindogoelitoa na are nichjé Isaías co ndačo:

26 Sattji ngain chojni tehe co ndache na:

Jaha ra ján tsinhi ra, pero tsinxinha ra.

Jaha ra ján sicon ra, pero rrochonxinha ra quehe rročo tti sicon ra;

27 ixin ansean ra anto concha

co rinaoha ra tsinhi ra

co coejehe ra jmacon ra

para que siconha ra conixin jmacon ra

ni tsinhi ra conixin ndatsjoan ra,

ni tsinxin ra ngain ansean ra

ni tsentoxinhi ra vidá ra para que janha sinttaxingamaha ra.

28 Co cai Pablo ndačo:

—Mexinxin chonxin ra ixin Dios de jai pa ndaha sanjo joachaxin ngain chojni que jeha judío ixin sitticaon na Jesús co jehe sinchetjañehe na cosa jianha que nchehe na. Co chojni mé sinoa na tsinhi na cain tti ndačo Dios.

29 Co are joexin nichja Pablo cain yá, sacjoi chojni judío co anto joinchediscutí na de ixin cain yá.

30 Co Pablo vittohe nttiha yó nano ngain nchia que joincherentá. Co vayé quexeho chojni vacji nchiandoha.

31 Co Pablo nichja de ixin quexén Dios ttetonha. Co joinchecoenhe chojni de ixin Jesucristo, tti chonda cain joachaxin. Co xonhi chojni cayacoen Pablo para nichja joajné Dios.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Roma

Pablo chjé joajna chojni ngain Roma

¹ Janha Pablo, ná ninchehe xé Jesucristo. Dios nichjahna janha co joantsjenda na para rrihi ná representanté jehe, para rrindattjan icha chojni joajné jehe que danjo iná vida naroaxin.

² Desde anto osé Dios ndačho joajna jihi ngain cain profeté, co jehe profeta cjin joajna jihi ngain tti libro que jitaxin Palabré Dios.

³ Jehe joajna jihi tti jinichja de ixin Jesucristo, Xenhe Dios. Co para nttihi ngataha nontte, Jesucristo mero razé rey David.

⁴ Pero para ixin ngajni, Espíritu Santo ndačho que Jesucristo Xenhe Dios, tti chonda cain joachaxin, ixin jehe xechon de tti ndavenhe.

⁵ De ixin Jesucristo, Dios chjana na joachaxin para que te na representanté jehe para que ngain cainxin nación, sintte chojni que sitticaon Dios co sinchehe na inchin jehe rinao.

⁶ Ngayé cain chojni jihi, te ra jaha ra cai, xo nichjaha ra Dios para goan ra chojni Jesucristo.

⁷ Mexinxin janha rricjinha ra jaha ra, xo te ra ngain ciudad de Roma, jaha ra xo Dios anto rinao ra, co nichjaha ra para sintte ra ngain ná vida jian para ixin Dios. Jehe Dios Ndadá na, conixin Jesucristo, tti chonda cain joachaxin para ixin ján na, cayoi nimé ni sinttanchaon ra co sanjo nganji ra tti chjoin que tsonohe ansean ra.

Pablo rinao sitsjehe chojni ngain Roma

⁸ Saho, de ixin Jesucristo, janha chjaha gracias ngain Dios para ixin cainxin jaha ra ixin cainxin parte de ngoixin mundo tenichja chojni de ixin tti jaha ra ditticaon ra ngain Jesucristo.

⁹ Co Dios, tti xé rrinttaha janha conixin ansenna ixin rrindattjan chojni tti jian joajné Xenhe Dios, jehe Dios nohe jian quexén janha xaxanho jaha ra cainxin nttiha que janha rrinttacoanxian Dios.

¹⁰ Janha cain tiempo rrinttatsán ñao Dios para que jehe rrochjana joachaxin para que jai janha nchao saso sasotsjaha ra.

¹¹ Ixin janha rinaho sicon ra co tsjengujna ra de ngain tti ditticaon ra de ixin Jesucristo para que sitticaon ra icha jian;

¹² rročho para que sonttoanimá chó na conixin jehe tti dotticaon na jihi de jaha ra conixin janha.

¹³ Hermanos, janha rinaho que jaha ra tsonoha ra que tsje nttiha janha joinaho rrogaso para rrogasotsjaha ra, pero hasta jai xa čhoha. Janha rinaho saso nttiha Roma para sinttaguitticaon chojni nttiha de ixin Jesucristo inchin jointtaha ngain icanxin parte de ngoixin mundo.

¹⁴ Ixin Dios coetonna janha ixin chonda que sinttanoa cainxin chojni, sea griego o jaha griego; o chojni que chonxin jian, o chojni que xonhi chonxin.

¹⁵ Mexinxin jańá janha anto rinaho rrondattjo ra cai tti joajna que danjo iná vida naroaxin, jaha ra xo te ra ngain ciudad de Roma.

Joachaxin que chonda tti joajna jian

¹⁶ Janha tsooanaha de rrondattjan chojni tti jian joajné Jesucristo ixin mé joachaxin Dios para sanjo iná vida naroaxin ngain cain tti chojni que

ditticaon joajna mé. Icha saho chojni nichja joajna jihi jeho ngain chojni judío, pero jai, cai nichja na ngain chojni que jeha judío.

¹⁷ Ixin joajna jihi tjagoa na que^{xén} Dios nttarao na ngattoxon con jehe. Co jehe nttajian na de ixin tti confianza que ján na chonda na ngain Jesucristo, co jeha ixin chonda na confianza mé. Jamé nda^{cho} ngain tti jitaxin Palabré Dios cai: “Tti chojni que dehe jian para ngain Dios conixin confianza que chonda ngain jehe, chojni mé rrochonda iná vida nroaxin.”

Tti teca chojni ngain Dios

¹⁸ Ján na docon na ixin tti anto soji castigoe Dios ttixin de ngajni para ngain chojni que jeha jian co nchehe na inchin jiquininxinha. Ixin tti jianha que chojni mé nchehe tan^{ch}handaha que rrochonxin na tti ján ndoa.

¹⁹ Cain chojni mé nohe na jian que^{xén} rrochonxin ni de ixin Dios, ixin jeha Dios mismo cjoagoe na.

²⁰ Ixin desde que Dios joinchechjian mundo, cain chojni nchao chonxin na cosa de Dios que ^{cho}ha dicon ni, ixin nchao chonxin ni ixin tti joachaxin que jehe chonda ^{xonhi} tiempo tsjexin, co ni jehe Dios ^{xonhi} tiempo tsjexin. Co jihi jehe ni nchao satsoan ni de ixin ngain cain tti dinchechjian Dios; mexinxin cain tti chojni que ditticaonha ngain Dios, jehe sinchetjañeha cain chojni mé, ixin ¿quedonda ditticaonha na?

²¹ Co cain chojni mé masqui chonxin na jihi de ixin Dios, nchesayeha na inchin jiquininxin jehe, ni danjoha na gracias ngain jehe. En lugar de sinchehe na mé, jehe na joxon ^{xaxaon} na cosa que ^{xonhi} ^{xé}, co jamé naxin xehe para joarrixaoen na.

²² Masqui nda^{cho} na que jehe na anto nohe na, pero jeha ndoa, ixin jehe na ^{xonhi} chonxin na.

²³ Ixin en lugar de rrojinchesayehe na Dios, tti ndoa jian, co tti ^{xonhi} tiempo ndasenhe, jehe na nchesayehe na retratoe chojni que ndadenhe, co hasta retratoe conttoa, conché co icha coxigo nchesayehe na.

²⁴ Mexinxin Dios ndacointtohe na para nchehe na cosa jianha inchin jehe na rinao na, co jamé jehe na nchehe na cosa de joasoaxin de ná na co iná na.

²⁵ Jehe na vitticaonha na tti ndoa de ixin Dios, sino que jehe na vitticaon na ngain cosa ndoaha, co jehe na nchesayehe na co nchecoanxinhi na tsje cosa que Dios joinchechjian, co nahi Dios mismo tti jiquininxin tsocoanxinhi para cainxin tiempo. Amén.

²⁶ Mexinxin Dios ndacointtohe cain chojni mé para nchehe na cosa de joasoaxin inchin rinao cuerpoe na, ixin hasta n^{chí} nchehe n^{cha} ngain iná n^{chí} tti jiquininxinha sinchehe n^{cha}, mé jiquininxin nchehe n^{cha} jeha ngain xixihi n^{cha}.

²⁷ Co ^{xajeh}o jamé nchehe ^{xí} cai, nchehe xa ngain iná ^{xí} cosa de joasoaxin que jiquininxinha; jeha jiquininxin sinchehe xa ngain ^{chih}i xa. Co hasta anto rinao cuerpoe xa sinchehe xa jamé. ^{Xí} mé nchehe xa cosa de joasoaxin ngain iná ^{xí}, co mexinxin Dios nchecastigá xa ngain cuerpoe xa de ixin tti jianha que jehe xa nchehe xa.

²⁸ Co ixin chojni mé irinaoha na datsoan na de ixin Dios, mexinxin jeha cointtohe na para ^{xaxaon} na cosa jianha, co para que sinchehe na sigue de sinchehe na tti tequininxinha na sinchehe na.

²⁹ Jehe na anto nchehe na cosa que jiquininxinha; ncheyehe na n^{chí} co ^{xí}, nchehe na tti jianha, anto rinao na cosa de ngataha nontte, co jianha na. Co jehe na anto ^{chjoe}he na, dantsjehe na vidé icha chojni, ttjé na ^{chijni}, ncheyehe na icha chojni, ^{xaxaon} na cosa jianha, co nche^{xonhi} na ttequin na cuentoe icha chojni que jiquininxinha tsequin na.

³⁰ Jehe na nichja na jianha de ixin icha chojni, ningaconhe na Dios, chondaha na respeto ngain icha chojni, co nichja na jian de ixin jeha na mismo, co orgulloso na. Co jehe na xaxaon na quexén nchehe na icha cosa jianha, co ditticaonha na ndodé na ni janné na.

³¹ Jehe na rinaoha na ttinxin na, co ncheyaxon na chonja tti ndacho na, rinaoha na icha chojni, noeha na nchetjañehe na na, co ttiaconoeha na ni ná chojni.

³² Cain chojni mé nohe na jian quehe coetonha Dios, co nohe na que cain chojni que nchehe cosa jiji, Dios ndacho que chojni mé tequininxin tsji ngain infierno; pero masqui jamé, jehe na nchehe na sigue de nchehe na cosa jianha co hasta ché na are dicen na iná chojni que jinchehe jamé cai.

2

Dios nchejuzguehe chojni inchin jiquininxin

¹ Mexinxin jaha ra nchejuzgueha ra iná chojni, masqui jaha ra chojni judío o quexeho chojni, sino que nchehe ra jeha inchin jiquininxin. Ixin are jaha ra tenchejuzguehe ra iná chojni, jaha ra mismo tedoan ra condenado, ixin jaha ra mismo cai tenchehe ra jehe tti jianha mé.

² Ján na noa na que Dios nchejuzguehe chojni inchin tequininxin are jehe ndacho ixin quehē tsonhe cain tti chojni que nchehe cain cosa jianha jiji.

³ Co jaha ra, xo nchejuzguehe ra icha chojni, cottimeja nchehe ra xajeho inchin jehe na, ¿Apoco xaxaon ra que jaha ra Dios sinttaccastigaha ra?

⁴ ¿Apoco xaxaon ra que xonhi rentte que ixin Dios anto jian nchehe ngain chojni, co chonda anto tsje paciencia ngain na, o atonoaha ra ixin jehe anto jian ngain na ixin rinao que jaha ra tsentoxinhi vidá ra?

⁵ Pero jaha ra anto cha ansean ra co xa rinaoha ra ttentoxinhi ra vidá ra. Mexinxin jaha ra anto tettjejo ra castigo para ixin jaha ra que sayehe ra ngain tti nchanho de castigo are Dios sinchejuzguehe cain chojni inchin tequininxin na.

⁶ Are mé jehe tsjenguehe hna cada chojni inchin jehe na joinchehe na.

⁷ Dios sanjo iná vida naroaxin ngain tti chojni que cain tiempo nchehe tti jian, ixin ttjé na Dios conixin glorié co ixin rinao na que Dios sinchenchaon na co rrochjé na iná vida naroaxin que xonhi tiempo tsjexin.

⁸ Pero Dios anto toñao co sinchecastigá cain tti chojni orgulloso, co rinaoha na ditticaon na tti ndoa, sino que ditticaon na ngain cosa jianha.

⁹ Anto tangui tsonhe co anto joachjaon tsí ngain cain tti chojni que nchehe cosa jianha; co mé saho tsonhe chojni judío, cottimeja tti chojni que jeha judío.

¹⁰ Pero cain chojni que nchehe tti jian, Dios rrochjé na gloria co sinchenchaon na, co sanjo ngain na tti chjoin que tsonohe ansén na; co mé saho sayé tti chojni judío, cottimeja cai tti chojni que jeha judío.

¹¹ Ixin para Dios xonhi chojni icha rentte; cainxin na xajeho na.

¹² Ixin cain chojni que jeha judío co chonxinha na tti ley que vayé Moisés, are jehe na nchehe na cosa jianha, jehe na ndasinchetján na almé na masqui chondaha na ley mé. Co chojni judío que chonxin na ley que vayé Moisés, are nchehe na cosa jianha, Dios sinchejuzguehe chojni mé inchin ndacho ley mé.

¹³ Ixin jeha jian ni para ngain Dios si jeha chonxin ni ley mé, sino que jian ni si nchehe ni cain tti ttetonha ley mé.

14 Pero tti chojni que jeha judío co ni chondaha na ley mé, pero are deporsín nchehe na inchin ttetonha ley mé, jamé rrocho ixin jehe na ochonda na ná ley de jehe na mismo,

15 ixin jamé jehe na tjago na de ngain tti jehe na nchehe na que ján chonda na ná ley ngain ansén na. Mexinxin chonxin na tti jian, co joarrixaoen na ndache na si jian tenchehe na o ani jianha tenchehe na.

16 Jamé tsonhe ngain tti nchanho are Dios sinchejuzguehe tti jimao que xaxaon cainxin chojni. Dios sinchejuzguehe na de ixin Jesucristo inchin ndacho tti joajna que danjo iná vida naroxin que janha ndattjan icha chojni.

Chojni judío co ley que vayé Moisés

17 Pero cada jaha ra ndacho ra que ixin judío ra, co chonda ra confianza ngain ley que vayé Moisés, co tonoha ra anto orgulloso ixin jaha ra tti chojni Dios.

18 Cada ra chonxin ra quehe rinao Dios, co ley que vayé Moisés tjagoha ra para ttinchiehe ra tti icha jian.

19 Co jaha ra tonoha ra orgulloso ixin toenao ra ixin nchao nchecoehne ra tti chojni chejo, rrocho tti chojni que xonhi chonxin de ixin Dios, co toenao ra ixin nchao nchengasenhe ra tti chojni que espiritue te ngain tti naxin xehe.

20 Co xaxaon ra que noha ra quexén nchecoehne ra tti chojni que xonhi nohe de Palabré Dios, co quexén nchenohe ra cain tti chojni que xa jianha ditticaon ngain Dios, ixin ngain tti ley que vayé Moisés nttiha chonda ra quexén para chonxin ra de ixin Dios co quexén para chonxin ra tti ndoa.

21 Co jaha ra xo jañá xaxaon ra ixin nchao nchecoehne ra icha chojni, ¿quedonda tanguiha ra jaho ra mismo? Si jaha ra mismo ndache ra chojni que jiquininxinha tsé ni cosé iná chojni, ¿quedonda jaha ra ttehe ra?

22 Si jaha ra mismo ndacho ra que jiquininxinha sincheyehe ni çihi iná xí, ¿quedonda jaha ra jamé nchehe ra? Si jaha ra mismo ndoa ningaonhe ra ídolo, ¿quedonda ttehe ra cosa que jí ngaxinhi ningoe?

23 Jaha ra tonoha ra anto orgulloso ixin chonda ra tti ley que vayé Moisés, pero jaha ra chondaha ra respeto ngain Dios ixin ncheha ra inchin jitaxin ngain ley mé.

24 Mexinxin jí razón jitaxin ngain Palabré Dios janhi: “Tti chojni que jeha judío nichja na jianha de ixin Dios, pero por ixin tti jaha ra nchehe ra.”

25 Jáñ, ndoa que tti xohe que dinhi circuncisión jian para ixin jaha ra si ditticaon ra tti ley que vayé Moisés. Pero si jaha ra ditticaonha ra ley mé, rrocho que inchin ni chondaha ra xohe mé.

26 Co si ná chojni que chondaha xohe mé, pero si jehe nchehe inchin ttetonha ley, Dios sayé chojni mé inchin si jehe rrochonda xohe, masqui chondaha xohe mé.

27 Tti chojni que chondaha xohe jihi ngain cuerpoe, pero tti ditticaon ley que vayé Moisés, chojni mé tti sinttajuzgá jaha ra, xo ditticaonha ra ley mé; masqui techonda ra ley nganito xón co techonda ra xohe ngain cuerpoa ra.

28 Ixin ná chojni judío çhoha rrondacho ixin jehe ndoa judío jeha ixin ndodé co janné cjoí chojni judío. Co tti xohe que jehe chonda xonhi rentte si jeha chonda xohe mé ndojaxin, ngama cuerpoe.

29 Sino que tti chojni que jeha ndoa judío pero de ngain ansén, co tti xohe que ndoa rentte, mé tti xohe de ngain ansén, co jihi ná cosa que ley çhoha sinchehe, sino que jeha Espíritu Santo tti nchao sinchehe. Co tti chojni jamé,

Dios mismo sinchesayehe chojni mé, co nahi chojni nttihí ngataha nontte tti sinchesayehe.

3

¹ Mexinxin ¿queñén icha jian para ná chojni judío? ¿o quehe rentte para ná chojni que chonda tti xohe que dinhi circuncisión?

² Ján, jí anto tsje razón ndoa. Co ná de razón mé ixin Dios joanjo joajné ngain chojni judío.

³ ¿Pero quehe tsonhe are çhonja de jehe na iditticaonha na joajna mé? ¿Apoco ixin jehe na jamé na, mexinxin Dios isincheha tti jehe ndaço?

⁴ ¡Seguro que Dios sincheha jamé! Sino que Dios nchehe inchin jiquininxin tti ndoa, masqui cainxin chojni ngoixin mundo mentiroso na, ixin ngain tti jitaxin Palabré Dios ndaço:

Chonda que çago ixin soixin nichja inchin jiquininxin, co soixin sacha are chojni sinttajuzgaha na.

⁵ Cosa roa icha roa are jí ngain cosa chimeco. Co canxion chojni ndaço na ixin jamé cai tti jianha que ján na nttoho na tjago anto jian que ixin Dios nchehe inchin jiquininxin. ¿Quehe rrondaço na remé? ¿Apoco Dios nchehe jianha ixin jehe nttacastigá na? (Jaxon janha rrinichja inchin tti icha chojni.)

⁶ ¡Seguro que nahi! Ixin si Dios rrocji jianha ¿queñén jehe nchao sinchejuzguehe chojni ngoixin mundo?

⁷ Pero si janha rronichja cosa ndoaha co si cosa mé rrogonda para que rrocjago ixin tti nchehe Dios anto jian; si jamé rrocji, mexinxin ¿quedonda Dios nchejuzgá na que janha ná chojni jianha na?

⁸ Si jamé, ¿a icha jian si ján na sonttoho na tti jianha para que jamé tsí tti jian? Jihi tti ndaço canxion chojni que janha na tjagoha ra, pero jehe na jianha çaxaon na, co cain chojni que nichja mé tequininxin na soan na condenado.

Cain na teca na cosa jianha ngain Dios

⁹ Mexinxin quehe rrondaço na? ¿Aján na ço judío na icha jian na que jehe na que jeha judío na? ¡Seguro que nahi! Ixin janha na ondattjo ra que ixin cosa jianha chonda joachaxin para ixin cain chojni judío co cai para ixin cain icha chojni que jeha judío.

¹⁰ Ngain tti jitaxin Palabré Dios ndaço: çonhi chojni jian, pero ni ná chojni;

¹¹ çonhi chojni rinao ttinxin, çonhi ni ná chojni ttjé Dios.

¹² Cainxin chojni ndavitján na de ngain Dios, cainxin na tenchehe na joxon tti nchaoha jí.

çonhi chojni que nchehe tti jian, çonhi pero ni ná na.

¹³ Ttosin na inchin ná sepulcro que jixangue; conixin neje na ncheyexin na icha chojni.

Co inchin ná venenoé conché jí ngaxinhi rroha na;

¹⁴ Jehe na jeha nichja na cosa jianha para icha chojni co cosa que chjé joachjaon iná chojni.

¹⁵ Jehe na daca ttji na para digoexon na chojni;

¹⁶ co de ixin tti jianha que jehe na nchehe na tsje chojni ndaditján co detan tanguí,

¹⁷ co jehe na chonxinha na tti çhjoin que tonhe ansén ni.

¹⁸ Co ni xonhi tiempo xaxaon na para xaon na ngain Dios.

¹⁹ Ján na noa na que cain tti ndačo ley que vayé Moisés are osé tiempo, cain mé ndačo para ixin cain chojni que vayé ley mé. Jamé para que xonhi chojni rrrondačo ixin jehe jiquininxinha castigoe Dios, co para que cainxin chojni, Dios tti sinchejuzguehe na.

²⁰ Ixin xonhi chojni nchao tsojian de ixin ley mé, ixin ley jeha donda para nttanoa na que ján na nttoto na cosa jianha.

Dios tsjengujna chojni si jehe na chonda na confianza ngain Jesucristo

²¹ Pero jai Dios ojinttanoa na que xén joinchehe jehe para que ján na sontte na chojni jian ngattoxon con jehe. Co mé jeha de ixin ley, pero tti libro que jitaxin ley jiji, co tti dicjin cain profeté Dios, mé nichja de ixin jiji.

²² Co mé rročo que ixin Dios nttajian na ngattoxon con jehe si ján na chonda na confianza ngain Jesucristo. Co jamé para ixin cainxin chojni que chonda confianza ngain Jesucristo, ixin para ixin Dios cainxin chojni xajeho rentte na.

²³ Ixin cainxin chojni joinchehe na jianha co tequininxinha na para sayé na iná vida naraoxin de ngain Dios.

²⁴ Pero Dios, ixin jehe anto jian ngain cainxin chojni, mexinxin jehe joinchejian na co xonhi nchecobrehe na; rročo ixin chjá na iná vida naraoxin de ixin tti joinchehe Jesucristo.

²⁵ Dios rroanha Jesucristo para joiguexin nntihi ngataha nontte co mexinxin de ixin jehe, Dios nchetjañehe chojni tti jianha que jehe na nchehe na. Co cain chojni vitjañehe cain cosa jianha que nchehe na si jehe na chonda na confianza ngain Jesucristo. Jiji conhe para xagoxin que Dios nchehe inchin jiquininxin, co de ixin tti paciencia que jehe chonda, jehe joincheha caso cain cosa jianha que joinchehe chojni are saho.

²⁶ Cai conhe cain jiji para xagoxin que Dios jehe nchehe inchin jiquininxin jai cai, rročo que Dios cain tiempo nchehe inchin jiquininxin ixin jehe ndačo que cain chojni que chonda confianza ngain Jesucristo, ixonhi cosa jianha teca na ngain Dios.

²⁷ Mexinxin ¿quehe cosa chonda na para sontte na orgulloso? Ixin orgulloso chojni ixonhi rentte. ¿Co quedonda? Ixin si chojni nchao rroguitticaon na ley co jamé rrocojian na ngattoxon con Dios, jamé nchao rroconohe na orgulloso; pero Dios dayá na inchin chojni jian jeha ixin chonda na confianza ngain Jesucristo co mexinxin ján na čoha tsonoa na orgulloso.

²⁸ Mexinxin janha na ocoagoha ra que Dios ndačo ixin cain chojni que chonda confianza ngain Jesucristo jian na ngattoxon con Dios masqui joinchehe na inchin ttetonha ley o ni nahi.

²⁹ ¿Apoco Dios jeha Dios de chojni judío? ¿Ajeha cai Dios para chojni que jeha judío? Claro que cai Dios para jehe na.

³⁰ Ixin xonhi iná Dios, jeha nacoaxinxon. Co jehe tti Dios mé tti nchejian cain chojni que chonda confianza ngain Jesucristo masqui chonda na tti xöhe que dinhi circuncisión o ni nahi.

³¹ Mexinxin, ¿axaxaon ra que jiji rročo que ley que vayé Moisés xonhi rentte ixin ján na odotticaon na ngain Jesucristo? ¡Seguro que jeha jamé! Sino que ján na ndačo na que ján ley jiji anto rentte.

¹ Mexinxin ján na, ¿quehe rrondaçho na de ixin quehe joacha Abraham tti cjoí ndoguelitoa na xançhjen?

² Ixin si jehe ndo vanchehe ndo cosa jian, mexinxin rrondaçhoxin Dios que Abraham jian ngattoxon con jehe; si jamé rrocji, Abraham jehe nchao rroconohe orgulloso, pero jeha ngattoxon con Dios.

³ Pero ndaçho ngain tti jitaxin Palabré Dios: “Abraham chonda confianza ngain Dios, co ixin jehe chonda confianza mé, Dios vayé jehe inchin ná chojni que xonhi jica.”

⁴ Nchao jí remé. Jí ná ejemplo: si ná chojni nchehe ná xa, tti tomi que xinajni danjo, mé jeha ná regalo, sino que tomi mé xinajni ojica xa ngain tti nchehe xa mé.

⁵ Pero si ná chojni masqui xonhi cosa jian joinchehe, pero si jehe chonda confianza ngain Dios, Dios dayé chojni mé inchin ná chojni jian jehó ixin chojni mé chonda confianza ngain Dios. Jamé Dios dayé chojni que nchehe cosa jianha como si rrocji jian.

⁶ Cai mé tti rroçho rey David are ndaçho ixin anto çhjoin para ixin tti chojni que Dios dayé inchin chojni jian sin que nchehe caso cain cosa jianha que chojni mé joinchehe.

⁷ Co David ndaçho:

Anto çhjoin para ixin cain tti chojni que Dios nchetjañehe na cain cosa jianha que nchehe na.

⁸ Anto çhjoin para ixin tti chojni que Dios ncheha caso cain tti jianha que chojni mé joinchehe.

⁹ ¿Aaxaxaon ra que tti çhjoin jiji jehó para ixin tti chojni que chonda xohe que dinhi circuncisión, o ni cai para ixin tti chojni que chondaha xohe mé? Janha na ondanchjan na que Dios vayé Abraham inchin ná chojni jian que xonhi cosa jianha veça ixin jehe vechonda confianza ngain Dios.

¹⁰ Pero, ¿aaxaxaon ra quesa Dios vayé Abraham? ¿Adespúes de que Abraham vayé xohe mé, o ani icha saho? Nahí, jeha despúes, sino que icha saho.

¹¹ Co despúes que Dios vayé Abraham inchin jian, cottimeja Abraham vayé tti xohe que dinhi circuncisión inchin ná señal o ná sello que ixin Dios ovayé Abraham inchin ná chojni jian ixin Abraham ovechonda confianza ngain Dios. Jañá conhe para que Abraham joiguehe inchin ndodé cain tti chojni que chonda confianza ngain Dios, masqui vayeha na xohe mé, pero ixin chonda na confianza ngain Dios, jehe Dios dayé na inchin chojni jian que xonhi jianha teca na.

¹² Ján seguro que Abraham inchin tti ndodé cain chojni judío que dayé xohe mé, pero jehó si chojni mé chonda confianza ngain Dios inchin ndodá na Abraham are xa vayeha ndo xohe mé.

Promesé Dios que tonhe are chojni chonda confianza ngain jehe

¹³ Dios ndaçho ngain Abraham conixin ngain cain chojni Abraham que sayé na ngoixin nontte inchin herencia. Co Dios çhjé na promesa jiji pero jeha ixin Abraham joinchehe cain tti ttetonha ley, sino que ixin jehe chonda confianza ngain Dios, co ixin Dios vayé jehe Abraham inchin ná chojni jian que xonhi jianha veça.

¹⁴ Ixin si jehó tti chojni que nchehe tti ttetonha ley tti dayé herencia, entonce rroçho que xonhi rentte tti confianza que chonda chojni ngain Dios, co xonhi rrocorentte promesé Dios.

¹⁵ Ley ndaicho ixin Dios tsiaho castigo para chojni que ditticaonha ley me; pero tti chojni que xonhi ley chonda, choha ni rrondaicho ni si ná ni nchehe ni tti ttetonha ley o ni nahi.

¹⁶ Mexinxin, para que promesé Dios ngain Abraham tonhe ngain cain chojni Abraham, mé chonda que vehe inchin ná regalo que dayé cainxin chojni que chonda confianza ngain Dios. Rrocho, que promesa mé jeoha para ixin cain tti chojni que nchehe tti ttetonha ley, sino cai para ixin chojni que chonda confianza ngain Dios inchin confianza vechonda Abraham. Mexinxin jehe Abraham cjoí inchin ndodá na cainxin na

¹⁷ Xo chonda na confianza ngain Dios inchin confianza vechonda jehe. Inchin ndaicho ngain tti jitaxin Palabré Dios: “Janha coín jaha inchin ndodé tsje chojni.” Ixin Dios tti danjo vida ngain tti chojni que ondadenhe, co jehe Dios tti nchechjian cain cosa que veha are saho.

¹⁸ Masqui ngain tiempo mé Abraham xonhi esperanza vechonda de rrochonda chjan; pero masqui jamé, jehe vechonda confianza ngain Dios co jamé jehe joiguehe “ndodé tsje chojni”, jamé inchin Dios ndaicho ngain jehe Abraham: “Jañá tsotsjexin chojni razá.”

¹⁹ Abraham joinchetjanha confianza jiji ngain promesé Dios, masqui jehe ovechonda inchin cien nano co ovenohe que jehe co Sara anto onttaxichjan para que rroguinttechonda chjan.

²⁰ Pero masqui jamé jehe Abraham cointtoeha de vitticaon ni goanha desconfiado de ixin tti ndaicho Dios, sino que jehe icha vitticaon co vechonda icha confianza de ixin tti ndaicho Dios. Co jehe Abraham joichecoanxinhí Dios,

²¹ ixin jehe Abraham anto vechonda seguro de que Dios chonda joachaxin para sinchehe cain tti jehe ndaicho.

²² Mexinxin Dios vayé jehe Abraham inchin ná chojni jian que xonhi jianha veca ixin Abraham vechonda confianza ngain Dios.

²³ Co jehe jiji de que ixin Dios vayé jehe Abraham inchin ná chojni jian que xonhi jianha veca ixin jehe vechonda confianza ngain Dios, mé vetaxinha de ixin jehó Abraham;

²⁴ sino que vetaxin cai de ixin ján na. Ixin ján na cai chonda na confianza ngain Dios tti dayá na ján na cai inchin chojni jian que xonhi jianha teca na, ján na xo dotticaon na ngain Dios tti joinchexechon Jesucristo, tti chonda cain joachaxin para ixin ján na.

²⁵ Jesucristo xanjo para ndavenhe para cjoenga hna cain cosa jianha que jointtoho na co cjan xechon, co jamé para que Dios nchao vayá na inchin chojni jian.

5

Tti tsonhe ni ixin Dios ovayé ni inchin chojni jian

¹ Jañá ixin Dios ovayá na ján na inchin chojni jian ixin chonda na confianza ngain jehe, mexinxin ján na dontte na amigoe Dios de ixin Jesucristo, tti chonda cain joachaxin para ixin ján na.

² Ixin de ixin Jesucristo Dios jointtanchaon na ján na ixin chonda na confianza ngain jehe. Co ixin jehe jointtanchaon na, mexinxin chonda na seguro, chá na co techonhe na ixin Dios rrochjá na parte ngain joachaxín jehe.

³ Co jeoha chá na de ixin jiji, sino que cai chá na masqui tti anto tangui toan na, ixin noa na que de ngain tti tangui que toan na, nttiha ttixin paciencia que ján na chonda na.

⁴ Co are ján na ttixian na ngain cosa tangui conixin paciencia, are mé Dios sayá na inchin chojni jian co mé chjá na esperanza de rrochonda na iná vida naraoxin.

⁵ Co ján na xonhi tiempo tsosoá na ixin chonda na esperanza jiji ixin mé cjoago que Dios anto rinao na ján na ixin rroanha Espíritu Santo nganji na.

⁶ Ixin are ján na xa čhoha vanttoho na inchin Dios nche xoxinhi, Cristo venhe para cjoenguijna chojni jianha ngain tiempo que Dios coinchiehe.

⁷ Xonhi chojni rinao denhe para tsjenguijna iná chojni, ni jehe rinaoha senhe para tsjenguijna ná chojni jian; pero para ixin ná chojni que anto jian, ján, puede sittoexin iná chojni senhe para tsjenguijna chojni jian mé.

⁸ Pero Dios tjagoa na que jehe anto rinao na, ixin jehe rroanha Jesucristo para venxin nttihi ngataha nontte para cjoenguijna na ján na masqui ján na xa vanttoho na cosa jianha.

⁹ Co jai, ján na ote na chojni jian para ngain Dios ixin Jesucristo ndavenhe para ixin ján na. Mexinxin jai nchao rrochonda na seguro ixin jehe Jesucristo tsančjandaha na para ngain tti castigo anto soji que tsí después.

¹⁰ Ixin si Dios mismo cointte na chojni jian para ixin jehe ixin ndavenhe Jesucristo, Xenhe jehe Dios, are ján na xa gontte na chojni jianha para ixin jehe, mexinxin jai icha seguro que ján na rrochonda na iná vida naraoxin ixin Cristo jichon co jí nganji na.

¹¹ Co jeoha jiji, sino que cai chá na ngain Dios de ixin Jesucristo, tti chonda cain joachaxin para ixin ján na, ixin de ixin Jesucristo ján na amigo na Dios.

Adán co Cristo

¹² Jañá de ixin tti jianha que joinchehe nacoaxinxon xí joí cosa jianha ngataha nontte nttihi, co cai joí tti denhe ni, co mexinxin cainxin chojni denhe na ixin cainxin na joinchehe na cosa jianha.

¹³ Icha saho que rroeguehe ley que vayé Moisés, cainxin chojni ngoixin mundo ovanchehe na cosa jianha; masqui Dios vancheha caso de ixin cosa jianha que vanchehe chojni are xa chondaha na ley mé.

¹⁴ Pero masqui jamé, desde ngain tiempoe Adán hasta ngain tiempoe Moisés cain chojni que joinchehe na jianha chonda que ndavenhe na, masqui jehe tti jianha que jehe na joinchehe na jeha inchin tti joinchehe Adán, tti vitticaonha tti coetonha Dios. Co Adán rroanha cain tti jianha que nchehe chojni, pero Jesucristo tti joí después dinttjian cain tti jianha mé.

¹⁵ Pero tti jianha que joinchehe Adán čhoha tsoyahi tti jian que Dios chjá na. Ixin de tti cosa jianha que joinchehe nacoa xí, anto tsje chojni ndavintteguenhe na. Pero de tti joinchehe iná xí co mé Jesucristo, de ixin mé Dios chjá na iná vida naraoxin, co xonhi nttacobra na. Co jiji tti joinchehe Dios, mé tti anto icha jian de tti joinchehe Adán, co jehe mé tti tjenguijna tsje chojni.

¹⁶ Tti jianha que joinchehe nacoaxinxon xí čhoha tsoyahi tti vida naraoxin que Dios chjá na; ixin de ngain tti nacoa cosa jianha que joinchehe Adán, Dios joinchecondená cainxin chojni. Pero jai Dios chjé chojni iná vida naraoxin co xonhi nchecobrehe na masqui anto tsje cosa jianha teca na.

¹⁷ Ixin si tti ndadenhe ni vechonda joachaxin ngain chojni jeha de ixin tti jianha que joinchehe nacoa xí, mexinxin anto icha seguro que cainxin chojni que Dios ndačo que ixin ixonhi cosa jianha teca na, cain chojni mé

rrochonda na joachaxín Dios para isincheha na cosa jianha ngain vidé na naroaxin de ixin tti joinchehe iná xí, co jehe xí mé Jesucristo.

¹⁸ De ixin tti jianha que joinchehe Adán, cainxin chojni ngataha nontte vintte na condenado, jamé cai de ixin tti jian que joinchehe Jesucristo, Dios dayé cainxin chojni que chonda confianza ngain Jesucristo inchin chojni que xonhi cosa jianha teca.

¹⁹ Rrocho que de ixin tti vitticaonha nacoaxinxon xí, que mé Adán, tsje chojni joinchehe na cosa jianha; pero cai de ixin tti vitticaon nacoaxinxon xí, que mé Jesucristo, Dios rrondaçho ixin tsje chojni jian na.

²⁰ Dios vanjo ley ngain Moisés para que chojni anto jian rrochonxin na que tenchehe na cosa jianha; pero masqui chojni joinchehe na tsje cosa jianha; Dios anto icha jian ngain na ixin nchetjañehe na cosa jianha que nchehe na.

²¹ Jañá, mexinxin inchin tti cosa jianha que joinchehe chojni joichonda joachaxin para joiaho tti diguenxin ni, jamé cai ixin Dios ndaçho que ixonhi cosa jianha teca na ján na, mexinxin tti jian que ttixin de ngain Dios, mé chonda joachaxin para chjá na iná vida naroaxin que xonhi tiempo tsjexin. Co cain tti sayé na jihi, mé por ixin Jesucristo, tti chonda cain joachaxin para ixin ján na.

6

Ján na inttoha na tti jianha, sino que nttoho na inchin ttetonha Jesucristo

¹ Mexinxin jai ¿quexén sonttoho na? ¿Axa sonttoho na sigue de sonttoho na cosa jianha para que Dios sinchehe sigue sinttatañá na?

² ¡Seguro que nahi! Ján na ocoentoxinhi na vidá na de ngain tti jianha que vanttoho na. Mexinxin ¿quexén ján na sonttoho na sigue de sonttoho na cosa jianha?

³ ¿Anoaha jaha ra que ixin ján na co Jesucristo te na inchin nacoa chojni ixin joiguite na para sontte na chojni jehe? Co mé rrocho que ixin ján na ndarroguenhe na conixin jehe.

⁴ Ixin are ján na joiguite na, mé rrocho que inchin ján na cai xavá na conixin jehe are jehe ndavenhe, para que inchin jehe xechon de ixin tti anto jie joachaxín Ndadá na, que ttjen ngajni, cai ján na xechon na para te na ngain iná vida naroaxin.

⁵ Ixin si ján na cjoí na ngain Cristo para ndavenhe na, jañá cai rroxechon na inchin jehe xechon.

⁶ Ixin ján na noa na que cainxin tti jianha que vanttoho na are saho, cain mé ondavenxin nganito cruz conixin Jesucristo, para que cuerpoa na tehe que rridinchehe cosa jianha ixonhi joachaxin rrochonda para que tsetoan na sonttoho na cosa jianha; co ján na isontteha na de esclavo ngain cosa jianha inchin ngain ná xinajni.

⁷ Ixin chojni que ondadenhe na de ngain cosa jianha, jehe na ichoha sinchehe na icha cosa jianha.

⁸ Si ján na ondavenhe na conixin Jesucristo, ján na rrochonda na confianza que sonttechon na conixin jehe.

⁹ Ixin ján na noa na que ixin Cristo oxechon de ngain tti jehe ndavenhe; ixonhi tiempo jehe rrocjan senhe iná ixin tti ndadenhe ni ixonhi joachaxin chonda para ngain Jesucristo.

¹⁰ Ixin are Cristo ndavenhe, jehe cjoenga hna cain cosa jianha que nchehe cainxin chojni; jehe ndavenhe nacoa nttiha co mé gonda para cainxin tiempo. Co jehe xechon, co jai jehe jichon para cainxin tiempo para Dios.

¹¹ Jañá jaha ra cai xaxaon ra que inchin ondavenhe ra de cain cosa jianha que joinchehe ra; pero jai jaha ra dintte ra para ixin Dios inchin nacoa chojni, jaha ra conixin Jesucristo, tti chonda cain joachaxin para ixin ján na.

¹² Mexinxin jai jaha ra dittoaxinha ra que cosa jianha sinchehe sigue de tsetonha ngain cuerpoa ra, tti cuerpo que ndadenhe. Dittoaxinha ra que cosa jianha que rinao cuerpoa ra tsetonha nganji ra.

¹³ Co dittoaxinha ra que cuerpoa ra sinchehe cosa jianha. Sino que danjo ra ansean ra para ixin Dios, inchin jiquininxin chojni que ondavenhe co cjan xechon. Dittoaxin ra que Dios tsetonha ngain cuerpoa ra para que sinchehe ra cosa jian.

¹⁴ Ixin cosa jianha ixonhi joachaxin chonda nganji ra, ixin ley que vayé Moisés ittetoanha nganji ra jai, ixin jai tti jian que ttixin de ngain Dios, mé tti tetonha nganji ra.

Ján na inchin ninchehe xa ngain ná xinajni

¹⁵ ¿Mexinxin, quehe sonttoho na? ¿Asonttoho na cosa jianha ixin ley ittetoanha nganji na, co ixin tti jian que ttixin de ngain Dios tti ttetoan na? ¡Seguro que nahí; sonttoha na cosa jianha!

¹⁶ Jaha ra noha ra jian que si rroxanjo ra inchin ná esclavo ngain ná xinajni para sitticaon ra xa cain tti tsetonha ra xa, jamé jaha ra oná esclavo ra ngain xa co chonda ra que sitticaon ra xa. Jañá, mexinxin si jaha ra sitticaon ra cosa jianha inchin ná xinajni, pero mé ndasinchetján almá ra. Co si sitticaon ra Dios, jaha ra sintte ra ngain ná vida nao co jian.

¹⁷ Pero janha chjaha gracias ngain Dios ixin masqui jaha ra are saho vintte ra inchin esclavo ngain cosa jianha, pero jai jaha ra conixin ansean ra vitticaon ra Palabré Dios inchin cocoanha ra.

¹⁸ Jai jaha ra iteha ra inchin esclavoe cosa jianha, ixin jai jaha ra ote ra inchin ninchehe xé cosa jian que rinao Dios.

¹⁹ (Janha rrinichja inchin cain chojni jaxon, ixin jaha ra xa thoha ttinxin ra jian cain cosa jihi.) Inchin are saho jaha ra xanjo ra joinchehe ra cosa ttjoaha co cosa jianha; jamé xanjo ra jai para nchehe ra cosa jian, para sintte ra ngain ná vida nao inchin chojni que tequininxin Dios.

²⁰ Are jaha ra xa vintte ra inchin esclavo de ngain cosa jianha, are mé jaha ra vintteha ra ngain ná vida nao.

²¹ Pero ¿quehe cosa joacha ra are mé de ngain cosa que jai tosoaha ra ixin vanchehe ra mé? Xonhi joacha ra ixin cosa mé jeha para nchetján almé ni.

²² Pero jai cosa jianha mé ixonhi joachaxin chonda para ixin jaha ra ixin jaha ra ojoanjo ra vidá ra para tenchehe ra xé Dios. Co jihi ná cosa jian para ixin jaha ra co de ixin mé jaha ra sinao ra sinchehe ra jeha cosa inchin Dios rinao. Co después rrochonda ra iná vida que xonhi tiempo tsjexin.

²³ Pero chojni que nchehe cosa jianha, jeha na chonda na que tsji na ngain infierno. Pero Dios danjo iná vida que xonhi tiempo tsjexin co tti vida mé rrochonda na ján na conixin Jesucristo, tti chonda joachaxin para ixin ján na.

7

Ejemploe ná nchiganha conixin ján na

¹ Hermanos, jaha ra xo chonxin ra ley que vayé Moisés onoha ra que ley mé chonda joachaxin ngain chojni, pero jeha are xa jichon chojni mé.

² Jihi ná ejemplo: Ná nchí que tottehe xixihi, ley ttetonhe ncha que chonda que secaho ncha xixihi ncha mé are jehe xa xa jichon xa; pero si xixihi ncha ndasenhe xa, ley mé ixonhi ttetonhe ncha de ixin jihi.

³ Rrotho que si jehe ncha decaho ncha iná xí co xixihi ncha xa jichon xa, jehe ncha jianha nchehe ncha ixin jicaho ncha yó xí ngain nacoa tiempo. Pero si xixihi ncha ndavenhe xa, jehe ncha chonda ncha joachaxin de secaho ncha iná xí co jamé jeha cosa jianha sinchehe ncha.

⁴ Jañá jaha ra cai, hermanos, xo tequininxin ra Cristo; are saho, ley que vayé Moisés vaquetonha nganji ra inchin ná xí ttetonha xa ngain nchíchihi xa. Pero jai jaha ra cai ondavenhe ra de ngain ley mé, para que jai ojé xí ttetonha ra, co mé Cristo, tti xechon de tti ndavenhe. Co jihi conhe para que vidá na nchao sonda ngattoxon con Dios.

⁵ Ixin are saho, are ján na xa vanttoho na cain tti vajinao cuerpoa na, are mé tti ley que vayé Moisés vanttanimá na para vanttoho na icha cosa jianha inchin vajinao cuerpoa na. Co cain cosa jihi jeha donda para nchetján almé ni.

⁶ Pero jai ján na ondavenhe na para ngain ley mé, tti ley que anto soji vaquetoan na, co jamé ján na nchao sonttoho na inchin rinao Dios de ngain vidá na naroaxin que chjá na Espiritu Santo, co inttoha na inchin vanttoho na are tti ley icha saho vaquetonha nganji na.

Tti jianha que jí nganji na janha

⁷ Mexinxin, ¿quehe rrondatho na? ¿Apoco rrondatho na ixin ley que vayé Moisés, mé jianha? ¡Seguro que nahi! Pero janha rrochonxinha quexehe cosa jianha si rrogeha ley mé. Jí ná ejemplo: Janha rrocononaha tti jianha de rinaho cosé iná chojni si ley rrondathoha que ixin mé jianha.

⁸ Si rrococoha ley jihi, janha antoha rrojinaho rrojinttaha cosa jianha, pero ixin ley jói, joarrixaonna icha xaxaon de jointtaha cosa jianha. Ixin tti coha ley, cai ntthi chojni chonxinha quexehe cosa jianha.

⁹ Vehe ná tiempo are janha xa venonaha quehe ttetonha ley jihi, are mé janha vaaxanho que xonhi cosa jianha rrica. Pero después, are janha oconona quehe ttetonha ley jihi, are mé janha joatsoan que rrica tsje cosa jianha, que hasta jiquininxin na tsji ngain infierno ixin anto tsje cosa jianha jointtaha.

¹⁰ Jañá rrotho que ley mé tti rroganjo ná vida que xonhi tiempo tsjexin ngain tti chojni que rroguitticaon ley mé, pero para ixin janha, ley mé jeha cjoago que jiquininxin na tsji ngain infierno ixin choha jointtaha cain tti ttetonha ley mé.

¹¹ Ixin tti jianha que cuerpona rinao, mé joincheyana, cottimeja joinchegonda ley para ndacho que ixin janha jiquininxin tsji ngain infierno.

¹² Mexinxin jehe ley mé que vayé Moisés, seguro jian ley, co cain tti ttetonha ley jian, co inchin jiquininxin, co nchao jí.

¹³ Pero ¿apoco rrotho que cain cosa jian jihi, tti ndacho ixin janha jiquininxin tsji para ngain infierno? ¡Seguro que nahi! Tti cain cosa jianha que janha jointtaha, mé tti ndacho ixin janha jiquininxin tsji para ngain infierno ixin ley jihi cjoago que tti janha jointtaha jianha jí. Co jañá ley jihi cjoago ixin tti jianha que nchehe ni anto nchaoha jí.

¹⁴ Ján na noa na que ley jian ixin joixin de ngain Espiritu Santo, pero janha inchin ná esclavo que dicochji na ngain cosa jianha.

¹⁵ Ixin janha ttianxinha quehe tonna, ixin janha rinaho sinttaha inchin jiquinixin, pero čhoha. Sino que tti jianha que janha rinaoha sinttaha, mé tti janha nttaha.

¹⁶ Jańá si tti janha rinaoha sinttaha, mé tti janha nttaha, jamé janha datsoan que jehe ley que vayé Moisés jian ley mé.

¹⁷ Mexinxin jańá rročo que jeha janha tti nttaha cosa jianha yá, sino que tti jianha que jí ngaxinhi cuerpona, mé tti nchehe cosa jianha yá.

¹⁸ Ixin janha nona que tti jí nganji janha, rročo ngain cuerpona, mé jeha jian. Ndoa janha rinaho sinttaha cosa jian, pero čhoha.

¹⁹ Janha čhoha nttaha cosa jian inchin janha rinaho, sino que janha nttaha sigue de nttaha cosa jianha que janha rinaoha.

²⁰ Mexinxin si janha nttaha tti janha rinaoha sinttaha, rročo que jeha janha tti rrinttaha, sino tti jianha que jí ngaxinhi cuerpona, mé tti jinchehe yá.

²¹ Jańá mexinxin janhi tti tonna: are janha rinaho sinttaha cosa jian, čhoha ixin jeho nchao nttaha cosa jianha.

²² Ngaxinhi ansenna janha anto rinaho sinttaha inchin ttetonha ley de Dios.

²³ Pero cuerpona rinaoha nchehe inchin rinao ansenna. Cosa jianha que jí ngaxinhi cuerpona, mé tti ttetonha ngain cuerpona co mé rročo que inchin jiaxinna ngain cosa jianha.

²⁴ ¡Anto feo tonona janha! ¿Quensen nchao tsonxindanguehe joachaxin jianha que jí ngain cuerpona jiji para que janha tsjiha ngain infierno?

²⁵ Jeho Dios tti nchao tsjenguijna na janha de ixin Jesucristo, tti chonda cain joachaxin para ixin ján na. ¡Chjaha gracias ngain Dios para ixin jiji! Mexinxin jai janha ttianxin que janha chonda que sitticanho ley de Dios pero si janha rroguitticaonha ngain Jesucristo, cain cosa jianha ǵa rroguinte ngain cuerpona co janha rrogarihi inchin esclavo de ngain cosa jianha mé.

8

Espíritu Santo de Dios tti tjenguijna na para nttoho na inchin jiquinixin

¹ Pero jai Dios ǵonhi castigo sanjo ngain cain tti chojni que te inchin nacoa chojni conixin Jesucristo; tti chojni que ncheha na inchin rinao cuerpoe na, sino que nchehe na inchin rinao Espíritu Santo.

² Ixin tti ttetonha Espíritu Santo, mé tti nttaha janha jai. Co Espíritu mé tti chjana janha vida naroaxin ixin janha ditticanho Jesucristo, co jamé cosa jianha ichondaha joachaxin nganji janha, co itsjiha ngain infierno.

³ Ixin Dios nchao joinchehe tti čhoha joinchehe ley que vayé Moisés, ixin ley mé coixinha joacha ngain cosa jianha que jí ngain cuerpoe ni. Pero Dios ján, coixinhi joacha ngain cosa jianha ixin jehe rroanha Xenhe, co joigayé Xan ná cuerpo inchin cuerpo que ján na chonda na para ndavenhe Xan para que cjoenga Xan hna cain cosa jianha que jointtoho na. Rročo que jamé Dios rroanha Xenhe para joantsjehe tti joachaxin que vechonda cosa jianha ngain cuerpoa na.

⁴ Cain jiji joinchehe Dios para que ján na nchao sonttoho na cain tti ttetonha ley, ixin jai ján na inttoha na inchin rinao cuerpoa na, sino inchin rinao Espíritu Santo.

⁵ Ixin cain tti chojni que nchehe inchin rinao cuerpoe, chojni mé jeho ǵaxaon na cain cosa que rinao cuerpoe na. Pero cain tti chojni que nchehe

inchin rinao Espíritu Santo, chojni mé xaxaon na de ixin cosa que Espíritu Santo rinao.

⁶ Co si rroaxaon ni jeha cain cosa que rinao cuerpoe ni, jehe ni seguro tsji ni ngain infierno are ndasenhe ni. Pero si rroaxaon ni cosa que Espíritu Santo rinao, jehe ni rrochonda ni vida ngain Dios que xonhi tiempo tsjexin, co tsonohe ni chjoin ngain ansén ni.

⁷ Cain tti chojni que xaxaon jeha tti rinao cuerpoe, chojni mé ningaconhe na Dios, ixin ni rinaoha na ni choha na para que jehe na sitticaon na ngain ley de Dios.

⁸ Mexinxin cain tti chojni que anto rinao nchehe jeha inchin rinao cuerpoe, chojni mé choha sinchehe inchin nchexoxinhi Dios.

⁹ Pero jaha ra itencheha ra inchin rinao cuerpoa ra, sino que jai jaha ra tenchehe ra inchin rinao Espíritu Santo, si ndoa Espíritu Santo de Dios jí nganji ra. Ixin tti chojni que chondaha ngain ansén tti Espíritu Santo que Cristo rroanha, chojni mé jeha chojni Cristo.

¹⁰ Pero si Cristo jí ngain ansean ra masqui cuerpoa ra chonda que ndasenhe ixin joinchehe ra cosa jianha, masqui jamé tsonhe cuerpoa ra, pero espiritua ra sinchehe sigue sechon ixin Dios ondacho que jaha ra ixonhi cosa jianha teca ra.

¹¹ Espíritu Santo de Dios joinchexechon Jesucristo, co cai si jí Espíritu Santo nganji ra, jehe Dios sinchexechon cuerpoa ra co rrochonda cuerpo iná vida nroaxin de ixin Espíritu Santo mé.

¹² Jañá hermanos, mexinxin jí ná cosa que ján na chonda que sonttoho na, pero jeha de sonttoho na tti rinao cuerpoa na.

¹³ Ixin si jaha ra tenchehe ra cain tti rinao cuerpoa ra, jaha ra chonda ra que tsji ra ngain infierno, pero si sinchehe ra inchin rinao Espíritu Santo, jamé jaha ra sinchexantte ra tti jianha que rinao cuerpoa ra, co jamé jaha ra rrochonda ra tti vida nroaxin.

¹⁴ Cainxin chojni que nchehe inchin rinao Espíritu Santo de Dios, cainxin chojni mé xenhe Dios.

¹⁵ Co Espíritu Santo que jaha ra vayehe ra, mé jeha ná espíritu que joindattjo ra que jaha ra sintte ra inchin ninchehe xa que anto chonda joaxaon ngain xinajni na. ¡Nahi, jeha jamé! Sino que Dios rroanha Espíritu mé nganji ra para que jaha ra nchao sintte ra xenhe Dios. Co jehe Espíritu jiji tti nttacoán na nichja na: “¡Dios, Ndodá na!”

¹⁶ Co jehe mismo Espíritu Santo jiji tti tti ngain espiritua na para dindacho nganji na que ján na seguro oxenhe Dios na.

¹⁷ Co ixin ján na xenhe Dios na, ján na chonda na derecho de sayé na cain tti jian que Dios ndacho rrochjá na ixin ján na conixin Jesucristo sayé na cain tti jian mé. Ixin si jai tonoa na tanguí inchin Cristo conohe, después ján na tsoyá na conixin jehe.

¹⁸ Nchao remé, janha xaxanho que tti tanguí jiji xonhi quehe para ngain tti chjoin que socon na después.

¹⁹ Cainxin tti joinchexhjian Dios techonhe co anto rinao tsí tti nchanho que Dios rrondacho quecá chojni tti xenhe Dios.

²⁰ Ixin cain cosa que joinchexhjian Dios goan condenado, pero jeha ixin cosa mé jamé rinao, sino que ixin Dios tti joinchecondená cain yá ixin chojni joinchehe na jianha. Pero mé jeha tsonchjenhe hasta que

²¹ cainxin cosa que jí, sehe naroaxin co xonhi tiempo rroxantte ni irror-rengaha, sino que sintte na chjoin inchin xenhe Dios co ixonhi tsonhe cain cosa mé.

²² Ján na noa na que hasta ngain tiempo jiji cainxin tti joinchechjian Dios tangui jitonhe co deha inchin ná nchí que jittin ixin sincheconcjihi chjan.

²³ Co jeoha cainxin cosa mé tti tangui jitonhe, sino que cai ján na mismo, masqui ján na ochonda na Espíritu Santo ngain ansean na, que mé saho de cain tti rrochjá na Dios. Ján na anto tá na joachjaon co techonhe na tti nchanho are ján na sontte na inchin mero xenhe Dios, ixin are mé Dios tsentoxinhi cuerpoa na que chonda na jai para rrochonda na iná cuerpo que xonhi tiempo ndasenhe.

²⁴ Ixin ján na dotticaon na ngain Jesucristo, mexinxin chondaxin na iná vida naroaxin; co ixin dotticaon na, rrocho ixin ján na techonhe na ná cosa que xa chondaha na. Ixin si ján na orrochonda na cosa mé, ichondaha na que rrochonhe na jehe mé.

²⁵ Pero si tti ján na techonhe na, mé ná cosa que ján na xa choha dayé na, ján na chonda na que rrochonhe na conixin paciencia.

²⁶ Co cai jamé Espíritu Santo jittjenguijna na are ján na techonda na ná problema. Ixin ján na noaha na nttotsenhe na ñao Dios inchin jiquininxin, pero Espíritu Santo, jehe mismo tti nchetsenhe ñao Dios para ixin ján na, co jehe nichja de iná manera que ján na chonxinha na.

²⁷ Co Dios, tti chonxin ansén cain chojni, nohe quehe rinao Espíritu Santo ixin jehe Espíritu Santo nchetsenhe ñao Dios para que Dios sinchehe ngain chojni inchin jehe Dios rinao.

Ján na osacha na cain tti jian de ixin Jesucristo

²⁸ Ján na noa na que cainxin tti tonhe chojni que rinao Dios, cain cosa mé Dios rroanha ngain na para ttjenguijnaxin na, ixin cain chojni mé tti Dios coinchiehe, co mé tonhe na inchin rinao Dios.

²⁹ Ixin desde are coexinhi vehe mundo, Dios onohé quecá chojni sitticaon na ngain jehe, co desde are maho jehe ondacho que cain chojni mé sintte na inchin xenhe jehe para que Jesucristo Xenhe Dios, mé tti Xansaho de ngayehe tsje xanchó Xan.

³⁰ Co cain tti chojni que desde are saho Dios ondacho que sintte na inchin xenhe jehe, cai jehe nichjé cain chojni mé para tsí ngain jehe, co cai jehe sayé cain chojni mé inchin chojni jian para ixin jehe, co cai jehe Dios vanjo tsje cosa jian ngain cain chojni mé.

³¹ ¿Mexinxin, jai quehe rrondacho na remé? Si Dios jañá ttjenguijna na, ¿quensen nchao tsja cha nganji na?

³² Xonhi cosa jí que Dios rinaoha chjá na, ixin hasta rroanha Xenhe para joiguenhe Xan para cjoenguijna na Xan ján na cainxin na. Mexinxin si jehe jamé rroanha Xenhe nganji na, seguro que jehe rrochjá na cain tti jian que jehe chonda.

³³ ¿Quensen nchao rrocho jie de ixin tti chojni que Dios coinchiehe? Ixin Dios tti ondacho que jehe na ixonhi cosa jianha teca na.

³⁴ Mexinxin ¿quensen nchao sinchecondená cain chojni mé? Ixin Cristo tti ndavenhe para ixin jehe na, co icha de mé, Cristo tti oxechon co jai jehe jí ngain lado jian de Dios, co jinchetsenhe ñao Dios para ixin ján na.

³⁵ Mexinxin, ¿quensen nchao rrocayacoen Cristo para que isinaoha na? Xonhi cosa sinchehe mé, ixin masqui tsonia na o tsonoa na tangui, o

masqui icha chojni feo sinchehe na nganji na, o masqui senhe na jintta o rrochondaha na lontto, o masqui rrochonda na peligro, o masqui hasta ndasenhe na; masqui cain problema mé rrochonda na, pero Cristo cainxin tiempo sinao na.

³⁶ Inchin ndačo ngain tti jitaxin Palabré Dios:

De ixin causá soixin janha na cain nchanho chonda na peligro de ndasenhe na;

icha chojni nchehe na nganji na inchin nchehe na ngain coleco que sadiguenhe.

³⁷ Pero masqui cain jiji toan na, ján na sacha na ngain cain cosa jiji, de ixin Jesucristo, tti anto rinao na.

³⁸ Jańá mexinxin janha rrichonda seguro que xonhi cosa rrocayacoen Dios para que isinaoha na. Ni masqui ndasenhe na, o ni sonttechon na, ni masqui tti sinchehe ángel de Dios, ni tti sinchehe espíritu jianha, ni masqui cain tti tetoan na jai, ni cain tti tsoan na después,

³⁹ ni masqui tti sinchehe cain cosa que jí noi, ni tti sinchehe cain cosa que jí anto nihnga, ni masqui tti sinchehe iná cosa que Dios joinchechjian, pero ni ná de cainxin cosa yá chonda joachaxin para que rrocayacoen Dios para que Dios isinaoha na, ixin jehe cjoagoa na que anto riano na ixin rroán na Jesucristo, tti chonda cain joachaxin para ixin ján na.

9

Dios tti coinchiehe chojni Israel

¹ Janha rrindachjan tti mero ndoa inchin jiquininxin chojni que ditticaon ngain Jesucristo, co xonhi cosa ndoaha rrindachjan. Ixin Espíritu Santo jittetonhe ansenna, co jinchenona que ján seguro tti janha rrindachjan.

² Co janha anto rrichinhi co ngain ansenna cainxin tiempo anto feo tonona, ixin chojni Israel ditticaonha na joajna ndoa.

³ Mexinxin janha mismo rrojinaho que Dios rrojinchecondená na co rrogachjenda de Cristo, si cain jiji rrocji jian para ixin chojnina, tti chojni que joixin de ngain xajejo razana.

⁴ Cain chojni jiji razé Israel, co are icha saho Dios vayé nindogelitoe jehe na inchin xenhe jehe. Dios vehe ngayeje jehe na co vicon na tti chíxo que jehe chonda are cononxin ngain na, co Dios joinchechjian trato ngain na, joanjo ngain na tti ley que vayé Moisés, cjoagoe na que xén vanchecoanxinhi na jehe ngain nihngo, co chjé na promesa.

⁵ Co cain chojni Israel de tiempo jiji joixin na de ngain razé nigoelitoa na xančhen. Co de ngain nimé cai joixin Cristo, co Cristo, jehe Dios de cainxin cosa, co jamé jiquininxin tocoanxinhi para cainxin tiempo. Amén.

⁶ Pero mé rročhoha que ixin promesé Dios coenha ngain chojni Israel; pero rročo que cainxinha chojni que joixin de ngain razé Israel cjoit tti ndoa chojni Israel.

⁷ Cai cainxinha chojni que joixin de ngain razé ndoAbraham cjoit ndoa chojni ndo, ixin Dios ondačo ngain tti jitaxin Palabré: “De ixin xanha Isaac rrochonda xanttia.”

⁸ Mexinxin noa na que ni xonhi chojni cjoit xenhe Dios jeho ixin joixin de ngain ná raza especial. Sino que jeho chojni que ditticaon ngain promesé Dios, mé tti xenhe Dios.

⁹ Ixin janhi promesé Dios para ixin Abraham: “Ngain tiempo que janha coinchiá, janha sihi co nčičiha Sara rrochonda nča ná chjan.”

¹⁰ Co cai jí icha. Cayoi xenhe Rebeca chonda xan nacoa ndodé xan, que mé ndogolitoa na Isaac.

¹¹⁻¹³ Pero icha saho que chjan mé concijhi xan, rrocho are xa xonhi joinchehe xan, ni cosa jian joincheha xan, ni cosa jianha joincheha xan, pero are mé Dios ndache Rebeca: “Esaú, tti sehe xansaho, sinchehe xé Jacob, tti xanyoxin.” Co mexinxin cai Dios ndacho ngain tti jitaxin Palabré: “Janha rinaho Jacob pero rinaoha Esaú.” Mexinxin jiji cjoago ixin Dios chonda joachaxin de tfinchiehe quexeho chojni que jehe rinao, masqui nchehe na jian o jianha.

¹⁴ Mexinxin ¿quehe rrondacho na? ¿Apoco rrondacho na ixin Dios ncheha inchin jiquininxin? ¡Segruo que nahi!

¹⁵ Ixin Dios ndacho ngain Moisés: “Janha tsiacoñoá chojni tti janha rinaho ttiaconoá, co sinchenina tti chojni que janha rinaho tsiacoñoá.”

¹⁶ Mexinxin rrocho que Dios tsiacoñoeha chojni ixin jehe na jamé rinao na o ixin jehe na joinchehe na tsje cosa jian, sino que Dios tsiacoñoeha chojni jehe ixin jehe jamé rinao.

¹⁷ Ixin ngain tti jitaxin Palabré Dios, nttiha Dios ndacho janhi ngain rey de Egipto: “Janha chjaha jaha joachaxin de rey jeha para cjoago tti joachaxin que janha chonda co para chojni ngoixin nontte rrochonxin nombrena.”

¹⁸ Mexinxin rrocho ixin Dios tsiacoñoeha tti chojni que jehe Dios rinao ttiaconoeha co jehe sincheha ansén tti chojni que jehe Dios rinao nchecha ansén na.

¹⁹ Pero puede ná ra rrondachjenji ni ra: “Si jamé, ¿quedonda Dios ndacho ixin chojni teca jianha ngain jehe? Ixin ¿quensen nchao sinchehe cosa oje que Dios rinao?”

²⁰ Pero, ¿quensen jaha para sinchediscuti ngain Dios? ¿Apoco ná chi nchao ndacho ngain jehe tti joinchekhjian chi mé: “¿Quedonda jaha jañá joinchekhjian na?”

²¹ Ixin jehe tti nchekhjian chi chonda joachaxin de nchekhjian quexeho cosa jehe rinao. Jehe nchao nchegonda xajeho tipo de jinche para nchekhjian ná chi anto chjoin co iná chi corriente.

²² ¿Co quexén jaha ndacho ixin nchao si Dios rinao sinchegonda chojni que tsji ngain infierno, co jehe coixinhi ngain na conixin anto paciencia masqui vequininxin na castigo, si jehe joinchegonda chojni mé para cjoago joachaxin que jehe chonda co ixin jehe nchecastigá chojni jianha?

²³ Ixin jehe Dios jamé joinchehe para que ján na rrochonxin na ixin jehe jiquininxin tsosayeha co ján na jehe coiaconoá na co jointtanoa na icha saho ixin rrochonda na ttoha joachaxin conixin Jesucristo.

²⁴ Ixin Dios ndattjo na ján na ixin sihi na ngain jehe, ján na xo judío na conixin jaha ra xo jeha judío ra.

²⁵ Jamé inchin ndacho ngain Palabré Dios ngain libroe Oseas: Chojni que jeha chojnina, jehe na sinttaguinhi na chojnina, co chojni que rinaoha, chojni mé tti janha sinaho.

²⁶ Co ngain xajeho lugar tti janha ndachjan: “Jaha ra jeha chojnina”, nttiha chojni mé sinhi na xenhe Dios que jichon.

²⁷ Co profeta Isaías ndacho janhi de ixin chojni Israel: “Masqui chojni de ngain razé Israel tsotsje na hasta inchin xochjenhe nchise ngandehe ndanchaon, masqui jamé sintte na, pero jeha nchion na rrochonda na iná vida nroaxin de ngain Dios,

²⁸ ixin Dios, tti chonda cain joachaxin, anto daca sinchecastigá cainxin chojni ngataha nontte.

²⁹ Co inchin Isaiás ndačo icha saho ngain Palabré Dios: Si Dios, que chonda cainxin joachaxin nttiha ngajni, si jehe rroquiaconoaha na ján na ján na rrochoha na jai, inchin chojni ngain ciudad de Sodoma co ciudad de Gomorra.

Chojni judío vitticaonha na tti jian joajna

³⁰ Mexinxin ¿quehe rrondačhan na? Rrindačhan na que ixin chojni que jeha judío cjoeha na quežén sintte na jian ngattoxon con Dios. Pero masqui jamé, Dios vayé na inchin chojni jian ixin chonda na confianza ngain Jesucristo.

³¹ Pero chojni Israel rinao ditticaon nchehe ná ley co jamé rroguintte na jian ngattoxon con Dios, pero jehe nimé čhoaha joinchehe na cain tti ttetonha ley mé.

³² ¿Quedonda čhoaha vintte na jian? Ixin jehe na joinao na rroguintte na jian ngattoxon con Dios jeho de ixin tti vanchehe na, co nahi de ixin tti confianza ngain Dios. Mexinxin jehe na vetsinga na inchin ngataha “tti žo que tonttenguixin chojni”,

³³ tti žo que Palabré Dios ndačo janhi: Janha tsín ngain ciudad de Sión inchin ná žo que tonttenguixin chojni, co jehe na žantjaxin na; co cain chojni que ditticaon ngain jehe tti žo mé, žonhi tiempo sinttechín na de ixin žo mé. Ixin žo mé Jesucristo.

10

¹ Hermanos, tti janha anto rinaho ngain ansenna co tti janha anto nttatsán ñao Dios, mé que ixin cainxin chojni Israel rrochonda na iná vida naroxin.

² Anto nchao para ixin jehe na ixin anto rinao na sinchecoanxinhi na Dios, pero chonxinha na nttié Dios.

³ Ixin jehe na chonxinha na quežén Dios nchejian chojni ngattoxon con jehe, sino que jeho na cjoé na quežén sinchehe na para tsojian na ngattoxon con Dios, co jamé ditticaonha na tti joinchehe Dios para ixin jehe na.

⁴ Ixin are Cristo jói, jehe joinchehe cain tti ttetonha ley que vayé Moisés. Co jai de ixin tti jehe joinchehe, cain chojni que chonda confianza ngain jehe tsojian na ngattoxon con Dios.

⁵ Moisés dicjin janhi de ixin quežén chojni tsojian na ngattoxon con Dios de ixin ley que jehe vayé: “Chojni que nchehe cain tti ndačo ley sinttechon na para cainxin tiempo.”

⁶ Pero ján na tsojianxin na ngattoxon con Dios de ixin tti confianza que chonda na ixin ngain Palabré Dios ndačo janhi: “Ndačhoaha ra ngain ansean ra: ¿Quensen sacojín para ngajni? —rročo para sinchexincanji ra Jesucristo—;

⁷ ni ndačhoaha ra: ¿Quensen rroxincanji ngain tti te nindadiguenhe?” —rročo para sinchecajín ra Cristo de ngayehe nindadiguenhe.

⁸ Cain mé ndačhoaha ra ixin jitaxin ngain Palabré Dios janhi: “Palabré Dios jí anto chiaon nganji ra, ixin ojí Palabra mé ngá rroha ra co ngaxinhi ansean ra.” Co Palabra jishi tti joajna que janha na ndačhan na.

⁹ Si jaha rrondasho conixin rroha que ixin Jesucristo, mé tti chonda joachaxin nganji jaha, co si jaha ditticaon ngain ansean ixin Dios joinchexechon jehe, si jamé nchehe, jaha rrochonda iná vida naroaxin.

¹⁰ Rrotho de ixin tti dotticaon na ngain ansean na, ján na nchao tsoroa na ngattoxon con Dios. Co de ixin rroha na nichjaxin na jian de ixin Jesucristo para jamé rrochonda na iná vida naroaxin.

¹¹ Ngain Palabré Dios ndaño: “Ni ná chojni que ditticaon ngain Jesucristo sechín de ixin jehe.”

¹² Jeha importante para ixin Dios si chojni judío o ni nahi, ixin Dios chonda joachaxin para ixin cain chojni, co anto nchenciaon cain chojni que nchecoanxinhi jehe.

¹³ Ixin janhi ndaño ngain tti jitaxin Palabré Dios: “Cainxin chojni que nchecoanxinhi Dios, tti chonda cain joachaxin, cain chojni mé rrochonda na iná vida naroaxin.”

¹⁴ Pero ¿quexén chojni nchao sinchecoanxinhi na Dios si xa ditticaonha na ngain? ¿Co quexén nchao sitticaon na ngain Dios si xa xonhi coinhi na de ixin jehe? ¿Co quexén tsinhi na si xonhi chojni cjoí joindache na joajna de ixin jehe?

¹⁵ ¿Co quexén chojni tsji sindache icha chojni joajna mé si xonhi quensen rroanha na? Inchin jitaxin ngain Palabré Dios: “¡Anto çhjoin are ttí chojni que dicao joajna que ncheconohe çhjoin ansén chojni, co mé tti jian joajné Jesucristo!”

¹⁶ Pero cainxinha chojni nchehe caso ngain joajna mé que danjo iná vida naroaxin. Jamé inchin ndaño profeta Isaías: “¿Quensen vitticaon joajna que joiquian na?”

¹⁷ Mexinxin chojni nchao sitticaon na o ani nahi ngain Jesucristo, pero jeha hasta tsinja na joajné jehe.

¹⁸ Pero janha danchiangui: ¿Andoa ixin chojni Israel coinha joajné Jesucristo? ¡Nahi, ndoaha; seguro que jehe na coinhi na! Ixin ngain Palabré Dios ndaño janhi:

Chojni de ngoixin mundo coinhi na tté chojni que vanichja Palabré Dios, co hasta chojni ngain lugar icha cjin de ngain nontte jihi cai coinhi na palabré jehe na.

¹⁹ Pero janha cjan danchiangui iná: ¿Apoco chojni Israel coinxinha na joajna mé? Saho Dios nichjaxin tté Moisés para ndaño ngain tti jitaxin Palabré Dios:

Janha sinttanchaon ná nación que jeha nación ndoa para que tsochjio chojnina,

co janha sinttanchaon chojni que xonhi chonxin para que tsoñao chojnina.

²⁰ Cottimeja Dios nichjaxin tté profeta Isaías para ndaño:

Chojni que cjoeha na na janha, pero nimé ni vittja na;

co janha xago na ngain chojni que joanchianguiha de ixin janha.

²¹ Co Dios nichja iná ixin tté Isaías; nichja de ixin chojni Israel are ndaño: “Ngoixin nchanho janha rrinichjá chojni que ditticaonha nganji na co tti ningaconna janha.”

11

Chojni Israel que chonda iná vida naroaxin

¹ Mexinxin jaxon janha danchiangui: ¿Apoco Dios vengui cain chojni jehe, tti chojni Israel co ixonhi tiempo rrocjan sayé na iná? ¡Seguro que nahi! Ixin

janha mismo ná chojni Israel. Janha joixin de razé Abraham co de ngain grupoe Benjamín.

² Desde are saho Dios ndačo ixin chojni Israel, chojni jehe. Co jehe senguiha cain na jai. ¿Achonxinha ra tti ndačo Palabré Dios ngain historié profeta Elías tti joinchecoanxinhí co cjoanguihí chojni Israel ngain Dios? Jehe Elías are mé ndačo:

³ “Chojni Israel nagoenxon na cain profeta co joinchexantte na cain altár soixin. Co jecho janha xehe na, co jehe na rinao na nasoenxon na na cai.”

⁴ Pero Dios ndačo: “Janha coenchjinha yáto mil xí que joinchesayeha xa ídolo Baal.”

⁵ Co tonhe xajeho jai cai. Dios coinchiehe nchion chojni Israel para joinchetjañehe na. Jamé joinchehe Dios ixin jehe anto jian.

⁶ Dios nchetjañehe chojni ixin jehe Dios jian. Si Dios jecho rrojinchetjañehe tti chojni que nchehe jian, mé rročo que ján na ivitjañaha na de ixin tti jian que Dios chonda.

⁷ Mexinxin jihi tti conhe: Chojni Israel vittjaha na tti cjoé na. Jecho tti chojni que Dios coinchiehe, mé nivittja tti jian que Dios chonda. Cain icha chojni cosoji ansén na.

⁸ Inchin ndačo ngain Palabré Dios: “Dios joinchecha ansén na; jehe chjé na jmacon na que čhoha dicon co ndatsjoen na que čhoha ttinhí. Co jamé tetonhe na hasta jai.”

⁹ Cai David ndačo:

Que vandangoe na rrocjamanguia inchin trampa co inchin nonchaha para que jecho mé rrotse chojni co soan na castigado.

¹⁰ Co que jmacon na isiconha jmacon co tsochejo na, co que lomoe na rroxadoho para cainxin tiempo.

Chojni que jeha judío nchao rrochonda na iná vida naroaxin

¹¹ Jai janha danchiangui: ¿Apoco chojni judío are vetsinga na ixonhi tiempo singattjen na iná? ¡Seguro que nahi! Sino que ixin chojni judío vitticaonha na, mexinxin chojni que jeha judío chonda na oportunidad de rrochonda na iná vida naroaxin. Jamé para tsochjio chojni Israel hasta que jehe na cai sinao na vida mé.

¹² Mexinxin tti nchaoha que joinchehe chojni judío cjoí jian para icha chojni ngataha nontte. Co ixin chojni judío concjin de ngain Dios, icha chojni nchao tsonchienhe ngain Dios. Mexinxin, si jihi tti conhe ixin chojni judío iditticaonha ngain Dios, ¡seguro anto icha jian tsonhe cain chojni are chojni judío rrocjan sitticaon ngain Dios iná!

¹³ Pero janha chonda tti rrondattjo ra xó jeha judío ra. Ixin Dios chjana xa de representanté Jesucristo ngain chojni que jeha judío, mexinxin janha ndačhan ixin xa jihi, anto importante xa.

¹⁴ Rinaho que de ixin xa jihi canxion chojni que cai judío na tsochjio na de ixin jaha ra, co sinao na rrochonda na iná vida naroaxin cai.

¹⁵ Ixin si chojni ngoixin mundo tsonohe čhjoin ngattoxon con Dios ixin jai jehe vengui chojni judío mexinxin ¿quehe tsonhe are Dios sayé na iná? Mé inchin vida naroaxin para tti nindadiguenhe.

¹⁶ Ixin si tti saho niottja que tonchjian de ngain nchoho, si niottja mé jiquininxin ngain Dios, rročo ixin ngoixin nchoho mé jiquininxin ngain Dios. Co si noehe ná nttá jiquininxin ngain Dios, rročo ixin cain ramé nttá mé jiquininxin ngain Dios cai.

¹⁷ Ná chojni nchao tončhinji ramé ná nntaolivo fino co ngain lugar mé nchetsexin ramé ná nntaolivo cimarrón. Jamé conhe chojni judío; Dios cončhinji canxion chojni judío co saquehe chojni que jeha judío ngain lugué na. Co mexinxin jai jaha ra xo jeha judío ra chonda ra xajeho parte ngain Dios inchin vechonda chojni Israel. Jamé inchin ramé ná nntaolivo cimarrón que ndatsexin nntaolivo fino, rama mé chonda parte ngain noehe co ngain vidé nntaolivo fino.

¹⁸ Pero xaxaonha ra ixin jaha ra icha jian ra que rama que vehe icha saho, rocho chojni judío. Co si xaxaon ra ixin icha jian ra, xaxaon ra ixin jaha ra vanjoha ra vidá ra ngain noehe nnta, sino que noehe nnta tti chjá ra vida.

¹⁹ Puede rrondačo ra: “Ján ndoa pero tti rama icha saho čhinji rama para janha tsexin na nntiha.”

²⁰ Ndoa, pero jehe na čhinji na ixin vitticaonha na ngain Jesucristo, co jaha ra chonda ra lugar nntiha jeha ixin ditticaon ra ngain Jesucristo. Mexinxin tonoa ra orgulloso, sino que ttijho ra cuidado.

²¹ Ixin si Dios joinchetjañeha chojni judío, tti cjoí inchin rama icha saho, cai jaha ra sinttatjañaha ra si chondaha ra confianza ngain Jesucristo.

²² Tsjexinxin ra, Dios anto jian, pero cai jehe toñao ngain chojni que ndaditján ngain tti jianha. Pero jehe anto jian nganji jaha ra. Pero jaha ra chonda que sinchehe ra sigue dayehe ra jian cain tti jian que danjo Dios. Si nahi, jaha ra cai tsončhinji ra inchin ramé nntá icha saho.

²³ Co cai si chojni judío xa rrocjan sitticaon iná, Dios sinchetsexin ngain nntá iná, ixin Dios chonda joachaxin mé.

²⁴ Ixin si jaha ra que jeha chojni judío, pero Dios cončhinji jaha ra de ngain ná nntaolivo cimarrón co joinchetsexin ngain nntaolivo fino; si Dios nchao nchehe jamé, įseguro que jehe nchao sinchetsexin rama saho ngain nntá iná; rocho ixin nchao sayé chojni judío iná!

Are chojni Israel rrochonda na vida naroaxin

²⁵ Hermanos, janha rinaho que jaha ra rrochonxin ra cosa jima que Dios sinchehe. Rinaho que jaha ra datsoan ra jihi para xaxaonha ra ixin anto noha ra. Co jihi tti xaxaon Dios: Masqui tsje chojni Israel ditticaonha ngain Jesucristo jai, pero mé jeha tsončjenhe hasta que ositticaon cainxin chojni que jeha judío que sinao sitticaon ngain Jesucristo.

²⁶ Are tsonhe jihi, cottimeja cainxin chojni Israel sayé na iná vida naroaxin, ixin ngain tti jitaxin Palabré Dios ndačo: Jehe tti danjo iná vida naroaxin tsixin de ngain Sión co jehe sinttjian cain tti jianha de ngain razé Jacob.

²⁷ Co janha sinttachjian trato jihi conixin jehe na are sinttjian cain tti jianha que chonda na.

²⁸ Ixin chojni judío ditticaonha tti jian joajné Jesucristo, mexinxin Dios ningaconhe na. Jamé para rrochjá jaha ra ná oportunidad para sitticaon ra ngain Jesucristo. Pero Dios xa rinao chojni judío ixin coinchiehe nindogoelitoe na xančjen.

²⁹ Co tti Dios danjo, jehe xonhi tiempo dinttjian iná co xonhi tiempo ndačo ixin chojni jehe ijeha chojni.

³⁰ Icha saho jaha ra vaguitticaonha ra Dios, pero jai Dios coiaconoaha ra ixin chojni judío incheha na inchin ttetonha jehe.

³¹ Co jai jehe na iditticaonha na, pero mé jeha para que Dios tsiaconoeha na, jamé inchin jai coiaconoaha ra jaha ra.

³² Ixin Dios chjé joachaxin cainxin chojni de sincheha na inchin jehe ttetonha para que jehe nchao tsiacoehe yahi cain na.

³³ ¡Anto tsje cosa rentte chonda Dios! ¡Co anto nohe co anto ttinxin jehe! Xonhi chojni nchao ndačo quedonda jehe nchehe tti jehe nchehe, ni xonhi chojni nchao ttinxin nttié jehe.

³⁴ Ixin jitaxin ngain Palabré Dios: “¿Quensen ttinxin tti Xaxaon Dios, tti chonda cain joachaxin? ¿O quensen joincheoenhe Dios?

³⁵ ¿Co quensen nchao rrochjé Dios ná cosa saho, para que después nchao sacha chonja cosa?”

³⁶ Ixin cainxin cosa joixin de ngain Dios co cainxin cosa conchjian de ixin jehe co para ixin jehe. ¡Dios tsosayehe para cainxin tiempo! Amén.

12

Quexén nchehe chojni que tequininxin ngain Dios

¹ Mexinxin hermanos, ixin Dios anto ttiaconoehe cain chojni, janha nttat-sanha ñao ra ixin Xanjo ra jaha ra mismo ngain Dios, inchin ná ofrenda que jichon, que jiquininxin ngain Dios, co ncheXoxinhi jehe. Jihi rročo ixin jaha ra ndoa nchecoanxinhi ra Dios, co jihi tti jiquininxin sinchehe ra.

² Ncheha ra inchin ndačo chojni que ditticaonha ngain Jesucristo; sino ttentoxinhi ra joarrixaoan ra para que jamé sintte ra chojni naroaxin. Co jamé rrochonxin ra tti rinao Dios, rročo cosa jian, cosa que ncheXoxinhi Dios co tti jian que jiquininxin sinchehe ra.

³ Ixin Dios anto jian, jehe chjana Xa de representanté Jesucristo. Co mexinxin janha rrondattjo ra cain ra, que Xaxaonha ra ixin jaha ra anto jian ra. Pero cada ra chonda ra que Xaxaon ra jian queXén tenchehe ra jai que Dios ojointtanchaon ra de ixin tti confianza que chonda ra ngain Jesucristo.

⁴ Ixin inchin cuerpoe chojni chonda tsje parte, co cainha parte mé nchehe Xajeho Xa,

⁵ jamé cai ján na masqui tsje na, pero ján na inchin nacoa cuerpo. Co ján na te na ngain Jesucristo inchin cain parte de cuerpoe ná chojni.

⁶ Dios ochjá na ojeje joachaxin. Co chjá na cada na tti clase de joachaxin que jehe rinao rrochonda na. Co ján na chonda na que nttogonda na jian tti clase de joachaxin que Dios chjá na. Rročo, si Dios chjá na joachaxin de ndache na chojni joajna que dayé na de ngain Dios, ján na chonda na que sotticaon na jian ixin Dios ndoa chjá na joajna, co rrondache na chojni joajna que dayé na.

⁷ O si Dios chjá na joachaxin de tsjenguijna na icha chojni, ján na chonda na que tsjenguijna na na jian. Co jehe tti chonda joachaxin para sincheoenhe chojni, chonda que sincheoenhe na conixin ngoi ansén.

⁸ Co jehe tti chonda joachaxin de sincheanimá chojni, chonda que sincheanimá na conixin jian ansén. Co jehe tti tsjenguijna icha chojni conixin tomi ixin Dios jamé rinao, jehe chonda que sanjo tomi conixin jian ansén. Co jehe tti chonda joachaxin para tsetonhe icha chojni, chonda que sicao cuidado de sinchehe jamé pero jian. Co jehe tti chonda joachaxin de tsiacoehe chojni noa, chonda que tsonhe chjoin are sinchehe jamé.

Tti chonda que sinchehe chojni que ditticaon ngain Jesucristo

⁹ Rinao chó ra conixin ansean ra roa. Ningaconhe ra cain tti jianha co nchehe ra tti jian.

¹⁰ Chonda ra que rinao chó ra inchin rinao ra xanchó ra; ttjenguijna chó ra co ncherespetá chó ra.

¹¹ Nchehe ra xá ra conixin ansean ra, co xonhi tiempo tosaha ra. Co nchehe ra xé Jesucristo conixin ngoixin ansean ra.

¹² Cainxin tiempo contento dintte ra ixin jaha ra chonda ra seguro ixin chonda ra iná vida naroaxin. Co chonda ra paciencia are tangui tsonha ra. Co xonhi tiempo tinttohe ra de nchecoanxinhi ra Dios.

¹³ Ttjenguijna ra icha chojni que ditticaon ngain Jesucristo are jehe na dondehe na chonja cosa. Co jian dayehe ra tti chojni que siji sitsjaha ra.

¹⁴ Nchetsenhe ra ñao Dios ixin jehe sinchenchaon chojni que nchehe feo nganji ra. Nchetsenhe ra ñao Dios ixin jehe sinchenchaon chojni mé, co danchiaha ra cosa jianha para ixin jehe na.

¹⁵ Contento dintte ra ngain chojni que te contento; co tsjanga ra conixin chojni que tetsjanga.

¹⁶ Rinao chó ra chjoin. Dintteha ra orgulloso, sino que dintte ra inchin chojni que jeha importante. Co xaxaonha ra ixin anto nóha ra.

¹⁷ Si ná chojni sinchehe feo nganji ra, jaha ra ncheha ra feo ngain chojni mé. Tsjehe ra quexén sinchehe ra para que sinchehe ra tti jian ngattoxon con cain chojni.

¹⁸ Nchehe ra cainxin tti jaha ra nchao nchehe ra para sinao ra chjoin cainxin chojni.

¹⁹ Hermanos que janha anto rinaho, xonhi tiempo nchehe ra feo ngain chojni que joinchehe feo nganji ra, sino que dittoaxin ra que Dios sinchecastigá chojni mé, ixin ngain tti jitaxin Palabré Dios ndacho: “Janha tti jiquininxin na sinttcastigá chojni; janha tti tsjengá hna, ndacho Dios, tti chonda cain joachaxin.”

²⁰ Cai ndacho ngain Palabré Dios: “Si ná chojni que jaha ningaconha jidenhe jintta, chjehe jehe tti sine; co si jidenhe jinda, chjehe jehe tti sihi, ixin si jaha jamé sinchehe, jehe anto tsosoé.”

²¹ Dittoaxinha ra que sinttatján ra cosa jianha. Sino que nchetján ra tti jianha de ixin tti jian.

13

¹ Cain chojni chonda que sitticaon na ngain nittetonha ngain gobierno. Ixin xonhi chojni chonda joachaxin para ttetonha si Dios chjeha joachaxin mé. Co cainxin nittetonha mé vayé na joachaxin na de ngain Dios.

² Mexinxin chojni que ttetocaho gobierno, chojni mé ttetocaho tti Dios joinchehjian. Co cain chojni que nchehe jamé sintteca tti jianha co soan castigado.

³ Ixin cainxin chojni que ttetonha ngain gobierno teha para sinchexaon chojni que nchehe jian, sino que para sinchexaon chojni que nchehe tti jianha. Mexinxin çarinao tasaríhi co rroxaonha ngain nittetonha? Nchehe tti jian co chojni que ttetonha anto sinao na jaha.

⁴ Ixin nittetonha, mé ninchehe xé Dios que nchehe xa para ttjenguijna jaha. Pero si jaha sinchehe tti jianha, rrochonda que rroçagoen nittetonha mé ixin jehe na ndoa chonda na joachaxin para sinchecastigá na chojni. Nittetonha mé ninchehe xé Dios para sinchecastigá chojni que nchehe jianha.

⁵ Mexinxin jaha ra chonda ra que ditticaon na ngain nittetonha nganji ra, co jeoha para sayeha ra castigo, sino que cai para que tsonoha ra de ngain ansean ra que chonda que sitticaon ra.

⁶ Co cai de ixin cain jihi jaha ra chonda ra que tsjenga ra hna impuesto ixin nittetonha mé nchehe na xé Dios co jehe na cainxin tiempo nchehe na xa jihi.

⁷ Chjehe ra cada chojni tti jiquininxin. Ngain chojni que jaha ra teca ra contribución, ttjenga ra hna contribución mé. Co ngain chojni que jaha ra teca ra impuesto, ttjenga ra hna impuesto mé. Co ngain chojni que jiquininxin respeto, chjehe ra respeto. Co ngain chojni que jiquininxin sintheadmirá ra, ntheadmirá ra chojni mé.

⁸ Dinttecaha ra ngain ni ná chojni. Jaha ra jehó chonda ra que rinao chó ra. Ixin chojni que rinao icha chojni, mé tti jinchehe cain tti tettonha ley de Dios.

⁹ Mandamientoe Dios ndačo: “Chondaha ra nchicoxe o xicoxe, co dantsjeha ra vidé iná chojni, ni tteha ra cosé iná chojni ni nichjaha ra cosa ndoaha de iná chojni, ni dinaoha ra rrochonda ra cosé iná chojni”; pero mandamiento jihi co cain icha mandamiento ji ngain jehó palabra que ndačo janhi: “Dinao ra icha chojni inchin rinao ra cuerpoa ra.”

¹⁰ Chojni que rinao icha chojni sincheha feo ngain na, co jamé de ixin tti rinao chó na, ditticaon na nchehe na ngoixin ley que ttetonha Dios.

¹¹ De ixin cain palabra jihi, xaxaon ra ngain quexehe tiempo techon na jai, co onoha ra ixin ojoí tiempo para que ján na rroxingamá na de ngain cottachin. Jamé ixin jai anto icha ochiaon jitonchienhe tiempo para rrochonda na iná vida naroaxin que are coexinhi na gotticaon na joajné Jesucristo.

¹² Tti naxin xehe omerocoa ndajoexin, co jitonchienhe nchanho. Mexinxin chonda na que isonttoha na cosa que nchehe ni ngain naxin xehe, rročo cosa jianha, co sonttengá na lonto de chia para sontte na inchin soldado que chji ngain joadingasán.

¹³ Rročo que sonttoho na tti jian, inchin jiquininxin nchehe ni ngain nchanho. Co sontteha na dicoan na, ni sacjiha na ngain vandango tti anto ruido jí, ni rrochondaha na nchicoxe ni xicoxe, ni rrochondaha na vicio, ni tsetocoha chó na, ni rrochondeha chó na joachjoehe.

¹⁴ Pero ján na jian sayé na joajné Jesucristo, que mé tsjenguijna na inchin lonto chia ttjenguijna xisoldado. Co rroxaxaonha na de sonttoho na inchin rinao cuerpoa na.

14

Nichjaha feo de ixin tti nchehe iná chojni que ditticaon ngain Jesucristo

¹ Si ná chojni xa jianha ditticaon ngain Jesucristo, pero dayehe ra chojni mé inchin hermanoa ra co nchediscutiha ra ngain chojni mé cosa que seguroha de ixin tti dotticaon na.

² Jí ná ejemplo: Te chojni que xaxaon ixin nchao jine na cain cosa, co te chojni que xa jianha ditticaon ngain Jesucristo, co chojni mé jineha nntao.

³ Tti chojni que jine cain cosa choha sinchehe meno jehe tti jineha cainxin cosa; co tti chojni que jineha cainxin cosa chondaha que rronichja feo de ixin jehe tti jine cain cosa, ixin Dios ovayé jehe chojni mé.

⁴ ¿Co quensen jaha ra para rronichja ra feo de ixin ninchehe xé iná chojni? Ixin si chojni mé sittohe jian o sittoeha jian, pero mé cosé ninajni jehe. Co seguro ixin jehe sittohe jian ixin Dios, tti chonda cain joachaxin, tsjenguijna jehe para sittohe jian.

⁵ Co jí iná ejemplo: Te chojni que chjé icha importancia ngain ná nchanho que ngain iná nchaon, co te icha chojni que xaxaon cain nchanho xajeho

nchaon. Naná chojni chonda que tsinchiehe tti jehe sitticaon, co sitticaon jian ngain mé.

⁶ Chojni que řaxaon ixin te nchanho que icha importante que icha nchaon, chojni mé jamé řaxaon para nchesayehe Jesucristo. Co tti chojni que řaxaon ixin cain nchanho řajeho, cai chojni mé jamé řaxaon para nchesayehe Jesucristo. Co chojni que jine cain cosa, jamé jine na para nchesayehe na Jesucristo, ixin chojni mé danjo na gracias ngain Dios para ixin tti jine na. Co chojni que jineha cain cosa, cai jamé nchehe na para nchesayehe na Jesucristo, co jehe na cai danjo na gracias ngain Dios.

⁷ Ixin ni ná de ján na techon na para ixin jaon na mismo, co are ndadenhe na, jeha para ixin jaon na mismo.

⁸ Ixin are techon na, mé para ixin Jesucristo, co are ndasenhe na, mé para ixin Jesucristo cai. Mexinxin are techon na co después de ndasenhe na, ján na chojni Cristo na.

⁹ Ixin Cristo ndavenhe co después jehe xechon iná, para rrochonda cain joachaxin para ixin tti nindadenhe co cai para tti ni řa techon.

¹⁰ Pero jaha ra, řquedonda nchejuzgá ra ngain icha chojni que ditticaon Jesucristo? řO quedonda nchehe ra meno jehe na? Ixin cain ján na rrochonda na que tsonchienhe na ngattoxon con Cristo para que jehe sinttajuzgá na.

¹¹ Ixin ndařho ngain Palabré Dios:

Inchin anto seguro que janha rrichon, cai anto seguro que cainxin chojni settoxin nttajochjihi na ngattoxon con na janha, ndařho Dios, tti chonda cain joachaxin, co cainxin chojni rrondařho na ngattoxon con icha chojni ixin janha Dios na.

¹² Mexinxin naná na chonda na que rrondache na Dios cainxin tti nttoho na ntili ngataha nontte.

Nchetjanjiha ra icha chojni que ditticaon ngain Jesucristo

¹³ Mexinxin ján na chondaha na que rronichja na feo de ixin tti nchehe icha chojni que ditticaon ngain Jesucristo. Co en lugar de mé tsjehe ra queřén sinchehe ra para que sinchetjanjiha ra chojni mé, rrořho que řonhi nchehe ra para sinchencheha ra na cosa jianha.

¹⁴ Janha nona que ni ná cosa que jine chojni ttjoaha, co janha chonda seguro de jiji ixin ditticanho Jesucristo, tti chonda cain joachaxin. Pero si řhonja chojni řaxaon ixin ná cosa ttjoaha para jine ni, mexinxin para ixin jehe, cosa mé ttjoaha.

¹⁵ Co si de ixin tti jintte jaha, iná chojni que ditticaon Jesucristo tonohé feo, mé rrořho ixin are jintte cosa mé jaha irinaoha chojni mé. Dittoaxinha que ndasitján ná chojni que Jesucristo ndavenhe para cjoenguijna, jeho ixin jaha rinao jintte řhonja cosa que chojni mé ndařho ixin ttjoaha.

¹⁶ řhjeha ra icha chojni oportunidad de rronichja na jianha de ixin cosa que jaha ra ndařho ra ixin ján.

¹⁷ Ixin ngain tti ttonha Dios jeha importante tti jine ni co tti dihi ni, sino que tti importante, mé ná vida jian, co tti řhjoin que tsonohe anséan ra co ixin contento sintte ra. Cain mé tti danjo Espíritu Santo.

¹⁸ Jehe tti nchehe řé Cristo inchin cain jiji, chojni mé nchehe tti ncheřoxinhi Dios co icha chojni rronichja jian de ixin jehe chojni mé cai.

¹⁹ Mexinxin ján na sonttoho na sigue tsjé na tsje cosa que tsonohe řhjoin ngain ansean na ixin conixin cain mé ján na nchao tsjenguijna chó na para icha jian sotticaon na.

²⁰ Xonhi cosa nchehe que sinchetján tti joinchehe Dios ngain vidé iná chojni de ixin tti jintte. Seguro ixin chojni nchao jine quexeho cosa, pero jianha para jine ni ná cosa que sinchetjanji iná chojni para sinchehe cosa jianha.

²¹ Anto jian si chojni sineha nntao, ni diha vino, ni xonhi iná cosa nchehe que sincheyehe iná chojni que ditticaon ngain Jesucristo, o que sinchenchehe jehe cosa jianha, o que sinchesojiha de ngain confianza que jehe chonda.

²² Tti jaha ditticaon de ixin cain cosa jihi ndache jeho Dios. ¡Anto çhjoin para ixin tti chojni que tonoeha feo are jehe nchehe ná cosa que jehe ndaço ixin jian!

²³ Pero tti chojni que jine ná cosa co chondaha seguro que mé jian, Dios sinchecondená chojni mé, ixin jehe mé chondaha seguro si Dios ndaço ixin jian cosa mé para sine. Ixin jianha nttoho na are nttoho na ná cosa co chondaha na seguro si Dios chjá na joachaxin para nttoho na jamé.

15

Nchehe tti ncheçoxinhi icha chojni co jeoha tti nntaçoxinhi jaha

¹ Ján na xo dotticaon na jian ngain Jesucristo çhoha sonttoho na jeho inchin jaon na rinao na, sino que chonda que tsjenguijna na tti chojni que çá jianha ditticaon ngain Jesucristo para que jehe na icha tsosoji na de ngain confianza para ngain Jesucristo.

² Naná ján na chonda na que sonttoho na tti ncheçoxinhi icha chojni para tsjenguijna na jehe na para que sinttotsje na confianzé na para ngain Jesucristo.

³ Ixin Cristo cai joincheha inchin jeho joincheçoxinhi; sino que conhe inchin ndaço ngain Palabré Dios: “Tti cosa feo que chojni ndaço de ixin soixin, vetsingataha na jianha.”

⁴ Ixin cain cosa que vetaxin icha saho ngain Palabré Dios, cain cosa mé chojni Dios dicjin na para tsjagoa na na de ixin Dios, para que ján na rrochonxin na jian que ixin Dios danjo ngain chojni iná vida naroaxin, co de ixin jihi rrochonda na paciencia co consuelo que danjo tti Palabré Dios.

⁵ Que Dios, tti danjo paciencia co consuelo, tsjenguijna ra para sintte ra çhjoin ngain icha chojni, inchin ndaço Jesucristo.

⁶ Jamé para que cain ra junto, çá nacoa tté chojni tsinhi ni, sinchecoanxinhi ra Dios, Ndodé Jesucristo, tti chonda cain joachaxin.

Tti jian joajné Jesucristo cai para ixin chojni que jeha judío

⁷ Mexinxin dayehe chó ra inchin Cristo vayá na ján na; jamé nchehe ra para nchesayehe ra Dios.

⁸ Ixin janha ndattjo ra que ixin Cristo joí ngataha nontte para tsjenguijna chojni judío co jañá joinchehe ngain na para joiconhe tti joincheprometé Dios are saho ngain nindogolitoa na, co jamé cjoago ixin Dios ndoa nchehe tti ncheprometé.

⁹ Cai jehe joí ngataha nontte para que chojni que jeha judío sinchecoanxinhi Dios ixin jehe anto ttiaconoehe chojni, inchin ndaço ngain Palabré Dios:

Mexinxin janha sinttacoanxinha soixin ngayé chojni que jeha judío co janha rrotsje na himno para sinttasayaha soixin.

¹⁰ Co ngain iná parte de Palabré Dios ndaço:

Chaha ra x̄o jeha judío ra conixin jaha ra x̄o chojni Dios.

¹¹ Co ngain iná parte de Palabré Dios ndačo:

Nhecoanxinhí ra Dios, tti chonda cain joachaxin, cainxin ra x̄o jeha judío ra co cain ra nichja ra de ixin tti joachaxin que jehe chonda.

¹² Co Isaías dicjin:

Tsoncijihi ná tti tsixin razé Isai

que mé Dios tsín para tsetonhe cain chojni que jeha judío;

co jehe nimé tsí na ngain jehe para rrochonda na iná vida naroaxin.

¹³ Que Dios, tti chjá na confianza de rrochonda na iná vida naroaxin, tsjenguijna ra para anto rrochaha ra co anto čhjoin tsonohe ansean ra ixin ditticaon ra ngain jehe, para que de ixin joachaxin Espiritu Santo jaha ra anto tsje confianza rrochonda ra de rrochonhe ra tti iná vida naroaxin que tsí.

¹⁴ Hermanos, janha chonda seguro ixin jaha ra anto jian ra ngain icha chojni co anto jian chonxin ra, co ixin anto noha ra que x̄én chjehe chó ra jian consejo.

¹⁵ Pero ngain carta jiji janha x̄aonha na para cjinha ra anto claro de ixin cain cosa jiji para que x̄onhi rrotjañaha ra. Janha jamé jointtaha ixin Dios, tti anto jian, chjana x̄a

¹⁶ de nttaha x̄é Jesucristo ngayé chojni que jeha judío. Janha ndačhjan na tti joajné Dios que danjo iná vida naroaxin ngain cainxin chojni para que janha nchao sanjo tti chojni mé ngain Dios, co jehe Dios sino sayé na ixin Espiritu Santo osincheroa na.

¹⁷ Ixin janha ditticanho Jesucristo, mexinxin janha tonona čhjoin de ixin x̄a que nttaha para ixin Dios,

¹⁸ ixin janha nichja jeho tti Jesucristo joinchehe de ixin janha para que jai chojni que jeha judío ditticaon na ngain Dios co nchehe na inchin ndačo jehe. Co jiji joiconhe conixin palabra que jehe joinchenichja na co de ixin tti jehe joinchehe conixin janha,

¹⁹ co de ixin señas co milagros co joachaxín Espiritu Santo. Co jamé janha joexin ndattjan chojni tti jian joajné Jesucristo desde ciudad de Jerusalén co cainxin lugar hasta regioen Ilírico.

²⁰ Mexinxin janha cainxin tiempo joinaho nichja tti jian joajna mé ngain lugar tti chojni x̄a coinha de ixin Cristo, para que janha x̄onhi tiempo sinttaha sigue sinttaha x̄a que iná chojni nchequexinhí.

²¹ Sino que icha jian tonhe inchin ndačo ngain Palabré Dios:

Chojni que x̄onhi tiempo coinhi joajné jehe, mé sicon na jehe,

co chojni que x̄onhi tiempo coinhi de ixin jehe, nimé ni tsinxin de ixin jehe.

Pablo x̄axaon tsji Roma

²² Co ixin janha varichonda tsje x̄a, mexinxin čhoaha joasotsjaha ra, masqui tsje nttiha janha joinao rrogasotsjaha ra.

²³ Pero jai janha ojoexin x̄ana ngain región jiji, co ixin chonda tsje nano que janha rinaho saso sasotsjaha ra,

²⁴ jai x̄axanho ixin satto nttiha para sasotsjaha ra are satsji España. Co después de osasotsjaha ra, x̄axanho que puede jaha ra tsjenguijna ni ra para sinttaviájá tti tsji.

²⁵ Pero jai janha tsji Jerusalén para tsinha tomi ngain chojni que ditticaon Jesucristo nttiha.

²⁶ Ixin chojni ngain nihngo ngain Macedonia co Acaya xaxaon na joatsetaonhe chó na tomi para rroanha na ngain chojni Jesucristo que anto noa ngain Jerusalén.

²⁷ Jehe na joinchehe na jamé ixin xaxaon na ixin mé jian, co ndoa jiji jian, ixin ndoa cai que chojni ngain Macedonia co Acaya teca na ngain tti ni ngain Jerusalén. Ixin de ixin chojni judío, tti chojni que jeha judío nchao rrochonda iná vida naroaxin. Mexinxin chojni que jeha judío co ditticaon ngain Jesucristo co chonda iná vida naroaxin chonda que tsjenguijna conixin tomí na tti chojni judío que ditticaon ngain Jesucristo.

²⁸ Mexinxin are janha tsjexin xana co sanjo tomi mé ngain chojni de Jerusalén, cottimeja satsji España co are mé satto sasotsjaha ra cai.

²⁹ Janha chonda seguro que are janha tsji nganji ra, Dios anto sinchenchaon tti jian joajné Jesucristo que janha rroundatto ra.

³⁰ Hermanos, janha nttatsanha ñao ra por ixin Jesucristo, tti chonda cain joachaxin para ixin ján na, co de ixin Espíritu Santo, tti ttjenguijna na para rinao chó na, nttatsanha ñao ra de ixin mé que sinchetsenhe ra ñao Dios para ixin janha.

³¹ Nchetsenhe ra ñao Dios que tsjenguijna na para que xonhi tsonna de ngain chojni que ditticaonha Jesucristo ngain Judea, co ixin chojni que ditticaon Jesús ngain Jerusalén jian sayena na janha conixin tomi que tsjinha.

³² Jamé para que si Dios rinao janha saso sasotsjaha ra co anto rrochahna co nchao sinttajogaha are sasotsjaha ra jaha ra.

³³ Que Dios, tti danjo tti chjoin que tonohé ansén ni, sehe nganji ra. Amén.

16

Joajna que cjoihí cada chojni

¹ Janha rrinttatsanha ñao ra que dayehe ra jian hermana Febe, nchí que joinchehe xé Dios ngain nihngo que jí ngain rajna Cencrea.

² Dayehe ra nchí jiji jian de ngain nombré Jesucristo, inchin jiquininxin nchehe cain chojni que ditticaon ngain Jesucristo, co ttjenguijna ra ncha de ngain quexeho cosa que sondehe ncha, ixin jehe ncha cjoenguijna ncha tsje chojni que ditticaon ngain Jesucristo, co cai cjoenguijna na ncha janha mismo.

³ Chjehe ra joajna cai ngain nchí que dinhi Priscila co xixihi que dinhi Aquila, tti compañerona ngain xé Jesucristo.

⁴ Cayoi chojni jiji coín na vidé na en peligro para cjoenguijna na na janha para venha na. Mexinxin janha chjaha cayoi na gracias, co jeha janha rrichjaha na gracias, sino que cai cain chojni que jeha judío pero ditticaon ngain Jesucristo.

⁵ Chjehe ra joajna cai cain tti chojni que ditticaon ngain Jesucristo, ni xatte ngain nchiandoha Priscila co Aquila. Chjehe ra joajna xiamigona Epeneto que janha anto rinaho, ixin xí jiji tti saho vitticaon ngain Jesucristo de cainxin chojni ngain regioen Acaya.

⁶ Chjehe ra joajna María, tti anto joinchehe xa ngayaha jaha ra.

⁷ Chjehe ra joajna Andrónico co Junias tti vinttequixin rajnana co tti vintteguiaxinhi ngain cárcel conixin janha. Cain nirepresentanté Jesucristo anto jian chonxin cayoi xí jiji, co jehe xa icha saho vitticaon xa ngain Jesucristo que janha.

⁸ Chjehe ra joajna Amplias, xiamigona que janha anto rinaho que ditticaon xa ngain Jesucristo.

⁹ Chjehe ra joajna Urbano, xicompañeroa na de ngain xé Jesucristo, cai chjehe ra joajna Estaquis, xiamigona que anto rinaho.

¹⁰ Chjehe ra joajna Apeles, tti ocjoagoa na tsje nttiha ixin jehe anto jian ditticaon ngain Jesucristo. Cai chjehe ra joajna cain nifamilié Aristóbulo.

¹¹ Chjehe ra joajna Herodión, tti joixin de rajnana. Co cai chjehe ra joajna cain nifamilié Narciso que cain nimé ditticaon na ngain Jesucristo.

¹² Chjehe ra joajna Trifena co Trifosa, nchí que dinttenchehe xé Jesucristo. Chjehe ra joajna na Pérsida, nchí que ján na anto rinao na; jehe anto joinchehe xé Jesucristo cai.

¹³ Cai chjehe ra joajna Rufo, tti anto jian ditticaon ngain Jesucristo, co cai janné tti cjoí inchin ná jannana janha.

¹⁴ Chjehe ra joajna Ansíncrito, co Flegonte, Hermas, Patrobas, Hermes, conixin cain chojni que ditticaon Jesucristo nttiha.

¹⁵ Chjehe ra joajna Filólogo, Julia, Nereo conixin nchichó Nereo, Olimpas conixin cain chojni que ditticaon ngain Jesucristo que te ngain nimé.

¹⁶ Naná ra chjehe chó ra joajna jian. Cain chojni nttihi que ditticaon ngain Jesucristo roanha na joajna para ixin jaha ra.

¹⁷ Hermanos, janha nttatsanha ñao ra que ttjiho ra cuidado de ngain tti chojni que nchechjian división co ttín na cosa que nchetjanji chojni. Cayoi cosa jihi ningaconhe tti jaha ra coanguí ra de ixin Jesucristo. Jaha ra dačhenda ra de ngain chojni mé.

¹⁸ Ixin cain chojni que nchehe mé nchesayeha na Jesucristo, tti chonda cain joachaxin para ixin ján na, sino que chojni mé nchehe na inchin rinao cuerpoe na, co ncheyehe na chojni que nandá ttexinhi ditticaon ngain Jesucristo, conixin tti anto čhjoin que jehe na nichja na.

¹⁹ Cainxin chojni ngoixin mundo nohe na quexén jaha ra vitticaon ra nchehe ra tti ndačo Jesucristo; mexinxin janha anto chahna jai, co janha rinaho que jaha ra sintte ra listo para sinchehe ra joxon cosa jian, pero que sincheha ra cosa jianha.

²⁰ Co Dios, tti danjo tti čhjoin que tonohé ansén chojni, mé tti toin sinchet-tegoa Satanás ngangui rottea na. Que Jesucristo, tti chonda cain joachaxin para ixin ján na, sinttančaon ra.

²¹ Nttihi Timoteo, tti xicompañerona de ngain xé Jesucristo, rroanha joajna para ixin jaha ra; cai Lucio, Jasón co Sosípater, tti nihoixin de ngain rajnana rroanha na joajna para ixin jaha ra cai.

²² Janha que dinhi na Tercio, que rricjin na carta jihi para ixin Pablo, cai rriroanha joajna para ixin jaha ra de ngain nombré Jesucristo.

²³ Cai Gayo rroanha joajna para ixin jaha ra. Janha nttihi rrihi ngain nchiandoha jehe Gayo, tti nchia que Gayo nhecjen cain chojni que ditticaon ngain Jesucristo para que jehe na nchegonda na para servicio. Cai Erasto, tti tesorero de ngain ciudad jihi rroanha joajna para ixin jaha ra co cai tattita que dinhi Cuarto, tti ditticaon ngain Jesucristo, rroanha joajna para ixin jaha ra.

²⁴ Que Jesucristo, tti chonda cain joachaxin para ixin ján na, que jehe sinchenčaon nganji ra cainxin ra. Amén.

Nttihi joexinxin joajna jihi

²⁵ Co jai nttocoanxinhi na Dios, tti nchao icha sinttajian na de ixin tti joajna que danjo iná vida naroxin que joajna mé tti janha ndačhjan co nttacoán chojni de ixin Jesucristo. Co cai joajna mé xajeho palabra que Dios xaxaon icha saho que nontte rroaguehe, pero desde mé joajna jihi vema joajna.

²⁶ Pero jai Dios, que jí para cainxin tiempo, jehe jinchenohe cain chojni joajna mé de ixin cain xón que dicjin profeté are saho. Jamé joinchehe Dios para que jai chojni de cain naci6n sitticaon na co sinchehe na tti nda'cho jehe.

²⁷ ¡Jeho nacoa Dios, mé tti nohe cainxin cosa, co jehe tti jiquininxin tsosayehe para cainxin tiempo de ixin tti joinchehe Jesucristo! Amén.

Saho Carta Que Dicjin Pablo Para Ixin Chojni Que Ditticaon Jesucristo Ngain Ciudad De Corinto

Pablo chjé joajna chojni Corinto

¹ Janha Pablo na, tti Dios vayahna janha para rrihi ná representanté Jesucristo. Janha co Sóstenes

² techjaha ra joajna ngain carta jiji para ixin cain jaha ra que ditticaon ra Dios, xo te ra ngain ciudad de Corinto; jaha ra xo tequininxin ra ngain Dios ixin jaha ra anto ditticaon ra Jesucristo. Dios vayaha jaha ra ngain ná vida jian, jaha ra conixin cain chojni de cain lugar tti nichja na jian de ixin nombré Jesucristo, tti chonda joachaxin para ixin ján na. Jehe tti chonda joachaxin para ixin jehe na, co para ixin ján na cai.

³ Dios Ndodá na, co Jesucristo, tti chonda joachaxin para ixin ján na, sinchenaon nganji ra co rrochjá ra tti chjoin que tsonohe ansean ra.

Quexén nchenaon Dios chojni por ixin Jesucristo

⁴ Janha siempre chjaha gracias ngain Dios de ixin jaha ra ixin Dios jointtanchaon jaha ra de ixin Jesucristo.

⁵ Ixin ditticaon ra Cristo, Dios chjá jaha ra cainxin joachaxin de ngain cain tti jaha ra nichja ra co ngain cain tti jaha ra noha ra.

⁶ Tti ndattjo ra de ixin Cristo jaha ra ndoa vayehe ra.

⁷ Co jamé sinchetjanha ra ni ná cosa que danjo Dios jaxon que xa techonhe jaha ra tti nchanho que Jesucristo, tti chonda joachaxin para ján na, rrocjan tsí iná.

⁸ Jehe tti sinchesoji ansean ra hasta are ndasenhe ra para que ni ná ra xonhi jianha sintteca ra are tsí Jesucristo, tti chonda joachaxin para ixin ján na.

⁹ Dios siempre nchehe tti jehe ndacho, co jehe tti vayaha jaha ra para que te ra jai, jaha ra conixin Jesucristo, Xenhe Dios co tti chonda joachaxin para ixin ján na.

Tti ndacho Pablo de ixin chojni Jesús que dachjendehe chó

¹⁰ Nttatsanha ñao ra de ixin nombré Jesucristo, tti chonda joachaxin para ixin ján na, que dintte ra de acuerdo co dachjendehe chó ra. Dintte ra nacoaxinxon grupo, co nacoaxinxon forma de xaxaon ra co de tsonohe ngain joarrixaon ra.

¹¹ Janha ndachjan jiji nganji jaha ra ixin nindoha Cloé ndachjenji na na janha ixin jaha ra toñahe chó ra.

¹² Ixin ndachjan que jaha ra toñahe chó ra ixin cada jaha ra nichja ra ojeje; canxion ra ndacho ra: “Janha chojni Pablo na”; co icanxin ra ndacho ra: “Janha chojni Apolo na”; co icanxin ra ndacho ra: “Janha chojni Pedro na”; co icanxin ra ndacho ra: “Janha chojni Cristo na.”

¹³ Pero, ¿apoco Cristo rinao que chojni sachjendehe chó na? ¿Apoco janha Pablo na goan na crucificado para ixin jaha ra? ¿O ani joiguite jaha ra para sintte ra jeh chojnina?

¹⁴ Janha chjaha gracias ngain Dios ixin janha jointtaguiteha ni ná jaha ra, jeh Crispo co Gayo tti jointtaguite janha.

¹⁵ Jañá ni ná chojni čhoha rrondačo na ixin joiguitte na para sintte na chojnina janha.

¹⁶ Ján, cai jointtaguitte cain nindoha Estéfanas, pero janha řaxanho que jiojnttaguitteha icha chojni.

¹⁷ Cristo coetonna para sinttaguitte chojni. Jehe coetonna para rrondatjan chojni queřén sinchehe na para sayeha na castigo de ixin tti jianha que nchehe na, pero janha nichjaha conixin joxon palabra čhoin inchin ncheřoxinhi chojni, ixin janha nichja jeho de ixin quedonda Cristo ndavexin nganito cruz, co jiji tti icha rentte para que chojni tsonohe.

Cristo chonda joachaxín Dios, co jehe chonxin quexeha cosa jian inchin Dios chonxin

¹⁸ Are chojni que ndaditján ngain vicio ttinhi na tti joajna de ixin quedonda ndavexin Cristo nganito cruz, jehe na řaxaon na ixin mé řonhi řé, pero para ján na que chonda na iná vida naroaxin que sehe para cainxin tiempo, joajna mé chonda joachaxín Dios.

¹⁹ Inchin ndačo ngain tti jitaxin Palabré Dios:

Janha tsjago ixin řonhi řé tti anto chonxin chojni que anto nohe cosa de ngataha nontte,

co janha tsín ndaha joarrixaoen tti chojni que chonda seguro ixin anto jian ttinxin de tti nohe jeho.

²⁰ Mexinxin řonhi rentte tti řaxaon chojni que anto chonda seguro ngain tti jehe na řaxaon na, co tti anto nohe, co tti anto tjao chó de ixin cosa de ngataha nontte ntthi. Dios cjoago ixin tti řaxaon chojni que ditticaonha Jesucristo, mé řonhi řé.

²¹ Dios jehe nohe nchehe cain cosa jian. Co jehe coančjanda cain chojni que jeho ncheřoxinhi na cosa de ngataha nontte para que rrochonxinha na quehe rinao jehe Dios, ixin tti jehe na nohe na řonhi řé mé para ixin Dios. Pero jehe Dios conixin joajné coančjandaha tsji ngain infierno tti chojni que chonda confianza ngain jehe Dios. Masqui tti chojni que ditticaonha řaxaon na que joajna jiji řonhi řé.

²² Ni chojni judío ni chojni griego rinaoha na sitticaon na tti jian joajné Jesucristo. Ixin chojni judío icha rinao na sicon na señal de milagro, co chojni griego icha rinao na ttjé na de queřén tsonohe na queřén rrochonxin na icha de ngataha nontte ntthi.

²³ Pero janha na ndattjan na cain chojni de ixin Cristo que goan crucificado. Co chojni judío are ttinhi na ixin Jesús goan crucificado, jehe na řaxaon na que mé řa jeha Cristo mero, mexinxin řa čhoha na ditticaon na. Co tti chojni que jeha judío, jehe na ndačo na ixin řonhi řé tti janha na ndačjan na.

²⁴ Pero para tti chojni que Dios coinchiehe, masqui chojni judío o chojni griego, pero ttinxin na que Cristo chonda joachaxín Dios co jehe ttinxin cainxin tti nchehe Dios.

²⁵ Ixin masqui jí chojni que ndačo ixin tti nchehe Dios řonhi řé, pero jehe mé icha jian que cain tti jian que nchehe chojni ngataha nontte. Co masqui jí chojni que ndačo ixin tti nchehe Dios sojiha joachaxin chonda, pero jehe mé icha soji joachaxin chonda que tti joachaxin que chonda chojni ngataha nontte.

²⁶ Jaha ra chonda que rrořaxaon ra queřén vayaha ra Dios. Jehe vayaha ra masqui tsjeha ra chonxin ra jian tti nohe chojni ngataha nontte, co masqui tsjeha ra chonda ra joachaxin ngain icha chojni ni nindoi ra importanteha na ngain autoridad.

²⁷ Jeha jamé ixin Dios coinchiehe de ngataha nontte tti chojni que icha xonhi chonxin para sinchecosoé na tti chojni que anto chonxin. Co Dios coinchiehe de ngataha nontte tti chojni que chondaha ni rioho joachaxin ngataha nontte para sinchecosoé na tti chojni que chonda anto tsje joachaxin.

²⁸ Dios coinchiehe chojni que xonhi importancia chonda ngataha nontte, tti chojni que icha chojni rinaoha na jehe, rrocho ixin Dios coinchiehe tti chojni que icha chojni xaxaon ixin xonhi rentte, para tjago que ngattoxon con Dios xonhi rentte tti chojni que chonda importancia nttihi ngataha nontte.

²⁹ Jamé joinchehe Dios para que xonhi chojni nchao tsonohe ixin jehe icha jian ngattoxon con Dios.

³⁰ Pero Dios mismo jointtauní jaha ra ngain Jesucristo. Co Dios ndaño cai que de ixin Cristo ján na rrochonxin na jian de ixin Dios, co de ixin tti joinchehe Cristo, Dios itoñaoha nganji ján na co joxon jian na para ngain Dios, co ixonhi tsonhe almá na.

³¹ Mexinxin inchin ndaño ngain tti jitaxin Palabré Dios: “Si çhonja ra rinao ra tsonoha ra orgulloso, tonoha ra orgulloso pero de ngain Dios.”

2

Joajné Cristo que goan crucificado

¹ Ttinhí jaha ra, are janha joasondattjo ra tti ndoa de ixin Dios, janha jointtagondaha palabra anto tangui co ni palabra que nchegonda chojni anto importante.

² Are janha joarihi ngayaha ra, janha joinaoha conona de icha cosa, jehó de ixin Jesucristo co de ixin quehe rrocho que Jesucristo goan crucificado.

³ Are janha joaso nganji ra janha xa sojiha na co xanga na de joaxaon.

⁴ Co are nichjaha ra co ndattjo ra jehe jian joajné Jesucristo, janha joinaoha jointtaguitticaon jaha ra conixin palabra tangui inchin palabré chojni que anto chonxin. Janha jeha jamé jointtaha, pero conixin Espíritu Santo co joachaxin Dios janha jointtaguitticaon jaha ra.

⁵ Mexinxin jaha ra ditticaon ra ngain Jesucristo ixin vicon ra joachaxín Dios co jeha ixin coinhi ra palabré ná chojni que anto chonxin cosa nttihi ngataha nontte.

Dios rroanha Espíritu Santo para rrochonxin ni jehe por ixin Espíritu Santo

⁶ Pero ixinha jamé, are janha ttji gayehe tti chojni que ditticaon jian ngain Jesucristo, janha na nichja na conixin palabra tangui. Pero palabra jihi jeha de ixin chojni nttihi ngataha nontte, ni de ixin cain tti ttetonha nttihi ngataha nontte ixin tti nohe chojni nttihi ngataha nontte, mé chonda que ndatsjexin.

⁷ Tti tangui que janha na nichja na joixin de ngain Dios, co mé rrocho tti xaxaon Dios para que jehe rrochjá na vida que xonhi tiempo tsjexin. Jihi tti xaxaon Dios icha saho que jehe rrojinchechjian nontte. Pero xagoha nganji na hasta ndavenja Jesucristo.

⁸ Ni ná xí que ttetonha ngataha nontte jihi ttinxinha xa jihi, ixin si rroguintequinxin xa, rrojinchecrucificaha xa Jesús que joixin de ngajni.

⁹ Pero conhe inchin jitaxin ngain Palabré Dios:

Cosa que xonhi chojni vicon ni coinha na,
ni xonhi chojni xaxaon,

pero mé tti xaxaon Dios para cain chojni que jehe na rinao na jehe.

¹⁰ Dios jointtagatsoan na cosa jihi de ixin tti Espiritu Santo que jehe rroanha, co Espiritu mé tti chonxin cain cosa co hasta cain cosa que jima ngain Dios.

¹¹ Ixin ¿quensen nchao rrochonxin quehe jixaxaon ansén iná chojni? Chonda que jehó espiritue chojni mé tti nohe. Jamé cai Espiritu Santo tti nohe quehe xaxaon Dios.

¹² Tti ján na coangui na jeha tti xaxaon chojni de ngataha nontte jihi; ján na vayé na Espiritu Santo que joixin de ngain Dios para que ján na tsinxin na cain lo que Dios chjá na.

¹³ Janha na nichja na de ixin cosa jihi conixin palabra que joinchecoanna na Espiritu Santo de Dios, co jeha de ixin palabra que janho na coangui na. Janhá ndachjan na cosa de Espiritu Santo ngain chojni que Espiritu mé jí ngain.

¹⁴ Tti chojni que coha Espiritu Santo ngain, jehe čhoha dayé cosa que ttixin de ngain Espiritu mé ixin para chojni mé xonhi xé cain cosa de Espiritu Santo. čhoha ttinxin chojni mé cosa de Dios ixin cain cosa mé čhoha chonxin na si jian o ni nahi ixin coha Espiritu Santo de Dios ngain na.

¹⁵ Pero tti chojni que jí Espiritu Santo de Dios ngain, jehe nchao rrochonxin quehe rročo cain cosa, co xonhi chojni nchao rrondačo de ixin quehe jinchehe jehe tti chojni que jí Espiritu mé ngain.

¹⁶ Tti jitaxin Palabré Dios ndačo: “xonhi chojni ttinxin tti jixaxaon jehe tti chonda cainxin joachaxin. Co xonhi chojni nchao sehe maestro ngain Dios.” Pero ixinha mé, ján na noa na tsje de tti jixaxaon Jesucristo.

3

Chojni que nchehe xé Dios

¹ Are janha joarihi nganji ra, hermanos, janha čhoha nichja nganji jaha ra inchin janha rronichja ngain tti chojni que tenchehe inchin rinao Espiritu Santo. Sino que janha nichja nganji ra inchin ngain tti chojni que coha Espiritu Santo ngain. Janha nichja nganji ra inchin are nichja ni ngain xannchinnchinchjan que xa chondaha tsje experiencia, jamé jaha ra cai xa chonxinha ra jian de ixin Cristo.

² Tti janha jointtacoanha ra tanguiha inchin ná xanletsjochjan que xa tai. Dayé xan tsjin en lugar de nio co ndaxa. Co inchin jamé vintte jaha ra cai. Inchin estomagoe ná xanletsjochjan čhoha dayé nio co ndaxa, jamé jaha ra cai čhoha coinxin ra tti tetonha Cristo. Co ni jai xa čhoha ttinxin ra

³ Ixin jaha ra xajeho inchin cain icha chojni. Ixin jaha ra xa chjoaha ra, xa ningaconhe chó ra, co xa chonda ra división. Mexinxin jaha ra jehó inchin cain icha chojni co tenchehe ra inchin nchehe cain chojni.

⁴ Ixin are ná ra ndačo ra: “Janha chojni Pablo na”, co iná ra ndačo ra: “Janha chojni Apolo na”; are jaha ra ndačo ra jańá, jaha ra tenchehe ra inchin nchehe cain icha chojni.

⁵ ¿Quensen janha Pablo? co ¿quensen jehe Apolos? Cayoi janha na xajeho ninchehe xé Dios co de ixin janha na jaha ra vitticaon ra Jesucristo, tti chonda cainxin joachaxin. Cada na janha na jointtaha na tti xa que Dios coetonna na.

⁶ Janha inchin tti ttenga noa ngataon jngui, jamé coín palabré Dios ngain ansean ra; co Apolos inchin tti chjé jino jinda, ixin jointtanimá ra. Pero Dios tti joinchegangui fe ngain ansean ra inchin are jehe nchegangui jino ngataon jngui.

⁷ Mexinxin xonhi rentte ni tti ttenga noa ni tti chjé jino jinda; jehó Dios tti rentte ixin jehe nchegangui cain cosa.

⁸ Mexinxin tti ttenga co tti chjé jinda xajeho nataonxin, pero Dios ttjenguehe na hna cada na inchin xa que jehe na nchehe na.

⁹ Cayoi janha na compañero na de ngain xé Dios co jaha ra inchin jngui que Dios jinchehe xa.

O cai, jaha ra inchin ná nchia jie que Dios jinchechjian.

¹⁰ Janha inchin ximaestro albañil co Dios chjana joachaxin para coín base. Co jé ni tettette nchia ngataha base. Pero cada na rrochonda na cuidado quexén tsette na nchia ngataha base

¹¹ ixin xonhi iná chojni nchao tsín iná base que jeha base que ojí, co jehe base mé jehe mero Jesucristo.

¹² Co cada maestro nchao tsette quexeho clase de nchia ngataha base jiji, nchia de oro, de plata, co xo que anto fino inchin marmol, o nchia de nttatabla, de nttanehe co cachji.

¹³ Co are Jesucristo tsí conixin xohi para rrondacho quehe tsonhe, cotimeja tsonohe cada maestro mé quehe clase de nchia dinchechjian. Ixin cada nchia mé chonda que rroche nchia.

¹⁴ Co si chonja maestro dinchechjian nchia que rrocheha, maestro mé rroxenguehe hna.

¹⁵ Pero tti maestro que dinchechjian nchia que ndarroche, maestro mé ndasinchetján cainxin, masqui jehe mismo xonhi tsonhe, co jehe inchin ná chojni que sattingaxin de ngain ná xohi.

¹⁶ ¿Apoco noaha ra que ixin jaha ra tti nihngo para ixin Dios co Espíritu Santo jí nganji ra?

¹⁷ Si chonja chojni sinchexantte ningoe Dios, Dios sinchexantte jehe chojni mé cai ixin ningoe Dios anto jian ningo ngattoxon con jehe, co jaha ra tti jehe nihngo mé.

¹⁸ Masqui anto noha ra pero xaxaonha ra ixin anto ttinxin ra jian. Si ttoha ra tonoha ra que ixin anto noha ra inchin xaxaon chojni nttihi ngataha nontte, chonda ra que rrocjan ra inchin tti chojni que xonhi nohe para que sintte ra tti chojni que ndoa nohe,

¹⁹ ixin tti nohe chojni ngataha nontte nttihi xonhi xé para ixin Dios. Tti jítaxin Palabré Dios ndacho: “Dios nchenchehe tti chojni que anto nohe para que tti jehe na nchehe na xonhi xé.”

²⁰ Cai ndacho ngain Palabré Dios: “Jehe tti chonda cain joachaxin nohe que xonhi rentte tti xaxaon cain chojni que anto nohe.”

²¹ Mexinxin ni ná jaha ra chondaha ra que tonoha ra orgulloso ixin tangui ra de ngain ná chojni maestro, ixin cainxin maestro co cainxin cosa jian Dios chjá ra para tsjenguijna ra ngain tti ditticaon ra.

²² Pablo, Apolos, Pedro, ngoixin mundo, vida, tti ndadenhe ni, tiempo jaxon, tiempo tsí, cainxin mé para tsjenguijna jaha ra.

²³ Co jaha ra chojni Jesucristo co Jesucristo joixin de ngain Dios.

4

Tti xa que joinchehe cain nirepresentanté Jesucristo

¹ Jañá chonda ra que rroxaxaon ra que janha na jeha ninchehe xé Jesucristo. Janha na tti vítonna na para rronichja na tti jima de ixin Dios.

² Nchao remé, ná tti ditonhe ná cosa chonda que sinchehe cosa mé jian para jamé chojni sicon na que jehe ná chojni de confianza.

³ Pero para ixin janha, antoha tá joachjaon de ixin tti nichja chojni de ixin janha, jaha ra o ngain ná juzgado tti ttonha chojni nntihi ngataha nontte. Ni janha mismo ndačhjanha ixin anto jian rrinttaha.

⁴ Masqui janha xaxanho que xonhi jianha rrinttaha, pero mé xa rročhoha ixin janha anto jian na. Jesucristo, tti chonda cain joachaxin, mé tti rrondačo ixin quexén na janha.

⁵ Mexinxin jaha ra ndačhoha ra icha saho ixin quehe tenchehe icha chojni; jaha ra chonhe ra hasta are tsí Jesucristo, tti chonda cain joachaxin, co jehe sinchenonxin cain tti jima ngain tti naxin xehe. Co jehe sinchenonxin cain tti texaxaon ansén cada chojni. Cottimeja Dios rrochjé cada chojni inchin tequininxin na.

⁶ Janha rrintdattjo ra cain cosa jiji para tsjenguijna jaha ra. Janha co Apolos ná ejemplo para ixin jaha ra para que icha jian tsinxin ra. Janha ndačhjan jañá para que de ixin ejemplona na jaha ra tsangui ra sitticaon ra jeho tti ttonha Dios, co para que ni ná ra tsonoaha ra orgulloso de ngain ná chojni co sincheha ra caso iná chojni.

⁷ ¿Quedonda xaxaon ra que jaho ra tti icha jian ra? ¿Quehe cosa chonda ra que jaha Dios chjá ra? Jehe Dios chjá ra cain cosa que jaha ra chonda ra, mexinxin ¿quedonda tonoha ra orgulloso ixin cain cosa que jaha ra chonda ra jeho conixin joachaxian ra chondaxin ra?

⁸ Jaha ra tonoha ra que anto tsje cosa que joixin ngain Dios chonda ra, co chonda ra cain tti jaha ra rinao ra. Tonoha ra inchin rey, co janha na ndacointtona ni ra iná lado. ¡Icha jian si ndoa jaha ra rroguinte ra rey para que janha na rroquetonha na cai ngain tti jaha ra ttonha ra!

⁹ Janha tonona que janha na xo representanté Jesucristo na Dios cointtona na hasta tti último lugar. Janha na inchin tti chojni que tequininxin ndadenhe, janha na inchin ná joaxoan que chojni ngoixin mundo dicon na na. Dicon na cain ángel cai.

¹⁰ Cain chojni ndačo na que ixin janha na chojni que xonhi chonxin ixin ditticanho na Jesucristo, co jaha ra tonoha ra que ixin anto ttinxin ra cain cosa de Jesucristo. Janha na xonhi importancia chonda na para ngain chojni co jaha ra tonoha ra anto importante ra. Cain chojni ncheha na na caso janha na, co jehe na chonda na respeto nganji ra.

¹¹ Hasta jai janha na denhe na jintta co jinda co xonhi xé lontto que chonda na, co tsje chojni feo nchehe na nganji na co chondaha na nchia tti sintte na,

¹² co tončhjen na ixin anto nttaha na xa conixin rana na. Nichja chojni feo nganji janha na, pero janha na nttatsán na ñao Dios que jehe sinchenchaon jehe na. Chojni feo nchehe na nganji na pero janha na ttixinna na.

¹³ Nichja na cosa ndoaha de ixin janha na, pero janha na chjaha na na consejo conixin paciencia. Nchehe na nganji na inchin nchehe na ngain caxineno ngataha nontte; hasta jai tonna na ngain na inchin tti ixonhi xé de ngain chojni.

¹⁴ Janha rricjianha ra cain cosa jiji para tsooaha ra, jeho para rrichjaha ra ná consejo ixin jaha ra inchin xanhna que anto rinaho ra.

¹⁵ Co masqui jaha ra rrochonda ra hasta dies mil maestro que sinttacoanha ra de ixin Jesucristo, pero cain mé xa sintteha inchin ndodá ra. Janha tti ndodá ra de ngain confianzé Jesucristo ixin janha tti joasondattjo ra de ixin tti jian joajna, co mexinxin Jesucristo chjá ra iná vida nroaxin are vitticaon ra joajna mé.

¹⁶ Mexinxin janha nttatsanha ñao ra que roehe ra ejemplona.

¹⁷ Janha rrorroanha Timoteo nganji ra co jehe inchin xanhna que anto rinaho ixin jehe ditticaon jian ngain Jesucristo. Jehe Timoteo tti sinttaɣaxaon ra queɣén janha nttaha ixin ditticanho Jesucristo co queɣén janha nttacoán cainxin chojni que ditticaon Jesucristo ngain cainxin rajna.

¹⁸ Canxion jaha ra atto tonoha ra orgulloso ixin ɣaxaon ra que janha ɣaon na para sasotsjaha ra iná.

¹⁹ Pero janha rinaho que toin saso para sasotsjaha ra, si Jesucristo rinao. Cottimeja janha sicon si jaha ra ɣo tonoha ra anto orgulloso, ndoa chonda ra joachaxín Dios o ni nahi.

²⁰ Ixin are Dios otte-tonha ngain ansén ná chojni, mé nichjacoaha ixin palabré cai chonda joachaxín Dios.

²¹ ¿Quehe rinao jaha ra remé are janha saso? ¿Asaso para sinttastigá ra o ni saso para rronichjaha ra ɥjoin?

5

Pablo ndaɥho ixin quehe tsonhe chojni que nchehe jianha

¹ Tenohe tsje chojni ixin ná de jaha ra techonda ra jeho jannajonha ra de ɥhiha ra. Co jehe yá ná cosa anto jianha que ni tti chojni que ditticaonha Dios ɣa ncheha na jañá.

² ¡Co jaha ra ɣa tonoha ra ixin anto jian ra en lugar de rroguinttechinhi ra co rrocosoaha ra! Tti chojni que jinchehe cosa jianha yá jaha ra chonda ra que dantsjeyexin ra de nganji ra.

³ Masqui janha mero rriha nganji ra, pero janha oɣaxanho de ixin quehe tsonhe tti xí que jinchehe jianha yá inchin janha mero rrojarihi nganji ra.

⁴ ɣatte cainxin ra de ixin nombré Jesucristo, tti chonda cainxin joachaxin para ixin ján na, co joarrixaonna sehe nganji ra, co joachaxín Jesucristo sehe nganji ra.

⁵ Cottimeja tti xí que jinchehe cosa jianha yá ncheha ra consiente ngain ningoa ra; tanɥjanda ra Satanás para sinchehe inchin jehe rinao ngain cuerpoe xí mé. Co puede jamé jehe xa saɥjenda xa de cosa jianha que nchehe xa para que ɣonhi tsonhe espiritue xa are tsí Jesucristo, tti chonda cainxin joachaxin.

⁶ Jaha ra chondaha ra que tonoha ra orgulloso. ¿Anoaha ra que si ná chojni jinchehe cosa jianha ngayaha ra, sicon icha chojni co jehe rroɣaxaon sinchehe jamé cai?

⁷ Denguixin ra de nganji ra tti chojni que jinchehe jianha yá para que cainxin ra sintte ra joxon chojni que ɣonhi jianha chonda. Jesucristo ondavenhe para ixin ján na inchin cain coleco que ndavaguenhe ngain quié pascua para que Dios vanchetjañehe na tti jianha que vanchehe na.

⁸ Mexinxin ján na rrochá na ngain jehe co sontte na jian ngain vidá na inchin rinao Jesucristo co ttinttohe na nondaha tti vida jianha que nchaoaha jí que ján na jointtoho na. Co jai nttosayehe na Jesucristo conixin vidá na jian que ɣonhi jianha tenttoho na inchin tti niottja que chondaha levadura para tosayexin Dios.

⁹ Ngain saho cartana que rroanha ra jointtatsanha ñao ra que tatoha ra tti chojni que ncheɣoxinhi dinttejoacaho icha nɥhí que jeha nɥhichihi.

¹⁰ Pero janha ndaɥjanha que ixin ndasaɥjendehe ra cain chojni de ngain mundo, rrocho tti chojni que ditticaonha Jesucristo. Ndoa, que chojni que ditticaonha Jesús ncheɣoxinhi na dinttejoacaho na icha nɥhí que jeha nɥhichihi na, co jehe na anto rinao na rrochonda na icha co icha cosa, co

jehe na chehe na, co jehe na nchesayehe na ídolo. Co para que jaha ra te ra ngataha nontte jihi, jaha ra chonda ra que sintte ra ngayé cain chojni yá.

¹¹ Pero janha ndačhjan que jaha ra chonda ra que sačhendehe ra cain chojni que ndačo ixin ditticaon na Jesucristo co xa nchehe na cosa jianha. Inchin puede ncheřoxinhi na dinttejoacaho na icha nčhi que jaha nčhičhihi na, o rinao na rrochonda na icha co icha cosa, o nchesayehe na ídolo, o ncheřoxinhi na nichja na feo de iná chojni, o ncheřoxinhi na coan na, o ttehe na cosé iná chojni. Tti chojni de jaha ra que nchehe jańá ni para sinttecoho ra chondaha ra que tsonchienne ra ngain.

¹² Janha řonhi joachaxin chonda para rrondačhjan de ixin quehe tenchehe tti chojni que ditticaonha Cristo. Pero jaha ra chonda ra que rrondačo ra de ixin tti jianha que tenchehe tti chojni que ditticaon Jesucristo inchin jaha ra.

¹³ Co tti chojni que ditticaonha Cristo, Dios tti rrondačo de ixin quehe tenchehe na, řajian o ni nahi? Pero jaha ra chonda ra que rrondačo ra de ixin quehe tenchehe tti chojni que ditticaon Jesucristo. Mexinxin jaha ra dantsjejehe ra de ngayaha ra tti xí que jinchehe cosa jianha yá.

6

Are chojni coeto na ngain xijuez que vaguitticaonha Jesucristo

¹ Are řhonja ra rrochonda ra ná cosa que tsjangui ra de ixin iná chojni que ditticaon Jesucristo, nchaoha jí si jaha ra sicjangui ra ngain xijuez que ditticaonha Jesucristo en lugar de rroguicjangui ra ngain řajeho chojni que ditticaon Jesucristo para que jehe chojni mé rrondačo quexehe ra řo chonda ra razón.

² řApoco noaha ra que ngain tiempo que tsí chojni que ditticaon Jesús sinchejuzguehe na chojni que ditticaonha Jesucristo? Mexinxin jai, řquedonda jaha jaho ra nchechjan ra cain asunto icha tanguiha que jaha ra chonda ra?

³ řApoco noaha ra que ján na nchao sonttojuzguehe na hasta ángel? řCo mé chojni que ditticaon Jesucristo ngain tiempo jihi řhoha xijonttonhe na ná jie!

⁴ Co are jaha ra chonda ra problema de ngain tiempo jihi, řquedonda dicjangui ra ngain xijuez que ditticaonha Jesucristo?

⁵ Janha ndačhjan yá para que rrochonda ra joasoaxin. řApoco coha ngayaha ra ni ná chojni que nohe jian para que jehe chojni mé tti rrojint-tajuzgaha ra cain jaha ra řo ditticaon ra Jesucristo?

⁶ řApoco jiquininxin que ná chojni que ditticaon Cristo sičo jie de ixin iná chojni Jesucristo ngain xijuez que ditticaonha Jesucristo?

⁷ Mexinxin atto nchaoha jí tto ra jaho ra. Icha jian si ttixinha ra are nicompañeroa ra feo sinchehe na nganji ra. Co icha jian si jaha ra tońaoha ra are tsaha ra na cosá ra.

⁸ Pero jaha ra en lugar de rrojinchehe ra jamé, jaha ra nchehe ra feo cai inchin jehe na, co cai hasta ttehe ra cosé řajeho chojni que ditticaon Jesús.

⁹⁻¹⁰ řApoco noaha jaha ra que tti chojni que ncheha jian seha ngain parte tti ttetonha Dios? Dittoaxinha ra sinttayaha ra na ixin ngain parte tti ttetonha Dios řhoha sintte tti chojni que puro ncheřoxinhi tsontaonxin nčhi co doanha ncha nčhičhihi, ni chojni que nchesayehe ídolo, ni chojni que ncheřoxinhi dinttejoacaho icha nčhi que jaha nčhičhihi, ni xí que chonda řajeho iná xí inchin rrocji nčhičhihi, ni tti chehe que tté cosé iná chojni, ni chojni que anto rinao rrochonda icha co icha cosa de ngataha nontte, ni

chojni que puro coan, ni chojni que nichja cosa ndoaha ngain iná chojni, ni tti chojni que nichja ná cosa seguro co jehe ncheha. Tonoha ra jian que cainxin chojni yá choha sintte ngain parte tti ttetonha Dios.

¹¹ Canxion jaha ra jañá vanchehe ra cai, pero Jesucristo, tti chonda cainxin joachaxin, co Espíritu Santo que Dios rroanha ojointtaroa ra de cain cosa jianha que joinchehe ra, co jointtajoxon ra chojni jian, co mexinxin Dios vayé jaha ra co ndačo que jaha ra joxon chojni jian que xonhi jianha chonda ra.

Tti jiquininxinha sinchehe ni ngain cuerpoe ni

¹² Jehe ni ndačo ni que nchao sinchehe ni cain tti sinao ni. Co ján ndoa, pero jeha cainxin mé jian para ixin jehe ni. Si ná ni sinchehe ni lo que sinao ni, pero sicao ni cuidado que ni ná cosa mé tsetoanha ngain cuerpoe ni.

¹³ Ján, ndoa que cain tti jine ni sattji para ngain tsejnoe ni co tsejnoe ni para tti jine ni, pero cayoi cosa mé ndatsjexin are ndasenne ni. Pero jeha ndoa que cuerpoe ni para ngain iná nčí que jeha nčíchihi ni; cuerpoe ni jeha para ixin Jesucristo, tti chonda cain joachaxin, co Jesucristo jí para ixin cuerpoe ni.

¹⁴ Co jañá inchin Dios joinchexechon Jesucristo, jamé sinttaxechon na ján na cai conixin joachaxin jehe.

¹⁵ ¿Apoco ttinxinha jaha ra que cada cuerpo que jaha ra chonda ra, mé ná parte de cuerpoe Jesucristo? ¿Apoco nchao tsá na ná de tti parte de jehe cuerpoe Jesucristo para sanjo na ngain cuerpoe ná nčí que dachaxin tomi cuerpoe? ¿choha sonttoho na jamé!

¹⁶ ¿Apoco noaha jaha ra que are ná xí deoacaho xa ná nčí que dachaxin cuerpoe tomi, cayoi na tonchjian na inchin nacoa cuerpo? Ngain tti jitaxin Palabré Dios ndačo: “Cayoixin chojni sintte na inchin nacoa chojni.”

¹⁷ Pero are ná chojni ditticaon ngain Jesucristo, chojni mé co Jesucristo dintte na inchin nacoa chojni ixin chonda jehe na xajeho Espíritu Santo.

¹⁸ Mexinxin janha rrindattjo ra que dinttechincoha ra nčí que jeha nčíchihi ra. Xonhi iná cosa icha jianha para ixin cuerpoe ni, jeha cosa mé ixin are ná chojni nchehe cosa jianha yá, jeha nchehe jianha ngain cuerpoe.

¹⁹ Jaha ra noha ra que cuerpoa ra mé ningoe tti Espíritu Santo que Dios chjá ra, co Espíritu Santo jí ngaxinhi cuerpoa ra. Jeha jaha ra tti ttetonha ra ngain cuerpoa ra,

²⁰ ixin Dios anto rentte cjoenga hna para ixin cuerpoa ra. Mexinxin chonda ra que nchesayehe ra Dios de ngain cuerpoa ra co de ngain espiritua ra ixin cayoi cosa mé cosé Dios.

7

Consejo para chojni que tecaó chó

¹ Jai rrondattjo ra tti jaha ra joanchianguina ra ngain cartá ra. Ján ndoa, jian para que xí secao ha xa nčí.

² Pero ixin anto tsje chojni puro rinao tsontaonxin chó, mexinxin icha jian si cada xí rrochonda xa nčíchihi xa co cada nčí rrochonda ncha xixihi ncha.

³ Co xixihi nčí chonda xa que sinchehe xa inchin jiquininxin ngain nčíchihi xa, co cai nčí chonda ncha que sinchehe ncha inchin jiquininxin ngain xixihi ncha.

⁴ Cuerpoe n̄hīchihi ná xí jeha jehe n̄cha tti cuerpoe n̄cha ixin cuerpo mé jiquininxin xixihi n̄cha. Co ðajeho ngain xixihi n̄hí cai, n̄hīchihi xa tti jiquininxin cuerpoe xa.

⁵ ðo n̄hí ra, are xixiha ra sinao xa cuerpoa ra ndāchoha ra que nahi, co cai jaha ra ðo xí ra, are n̄hīchihi ra sinao n̄cha cuerpoa ra, cai ndāchoha ra que nahi. Jeho si jaha ra sinao ra rochjeha chó ra cuerpoa ra ixin sinchecoanxini ra Dios. Cottimeja nchao rrochjehe chó ra cuerpoa ra ixin puede tsixianha ra sé tiempo, co puede Satanás rronhattjo ra co sinchehe ra cosa jianha.

⁶ Janha rrintattjo ra cain jiji, co rrocho que janha rridanjo joachaxin que nchao sinttecoho chó ra si jaha ra sinao ra, co cai nchao si jaha ra sinaoha ra sinttecoho chó ra.

⁷ Janha rrojinaho que cain jaha ra ðonhi n̄hí rroguinttecoho ra inchin janha, pero cada na Dios hjá na joachaxin de quēén sontte na; ttoha na sonttecoho na n̄hí co te na nahi.

⁸ Cain chojni que ða tecaoha chó co cain n̄higanha que ðonhi xí tecaoh, janha ndāchjan que icha jian para ixin jehe na si īonhi n̄hí o xí sinttecao na; janhi inchin janha.

⁹ Pero si jehe na tsixinha na, nchao tsjé na n̄hīchihi na o xixihi na ixin icha jian rrochonda na n̄hīchihi na o xixihi na que puro rrōaxaon na de ixin n̄hí o de ixin xí.

¹⁰ Pero cain ra ðo otecoho ra n̄hīchihi ra o xixiha ra, janha rritetonha ra que n̄hí tsinttoeha n̄cha xixihi n̄cha. Tti janha rritetonha jiji joixinha de ngain joarrixaonna, sino que joixin de ngain Jesucristo, tti chonda cain joachaxin.

¹¹ Pero si ná n̄hí sāhjendehe n̄cha xixihi n̄cha, jehe n̄cha ðoha secao n̄cha iná xí, pero ða nchao rrocjanttehe n̄cha ðajeho xixihi n̄cha. Co ðajeho ngain xixihi ná n̄hí cai, jehe xa ðoha sāhjendehe xa n̄hīchihi xa.

¹² Icanxin chojni ndattjan na inchin janha nona, ixin ðonhi coetonha Cristo de ixin jiji. Si ná xí que ditticaon Jesucristo co çhihi xí mé ditticaonha n̄cha, pero si jehe n̄cha jí n̄cha conforme para tasecao xí mé ngoixin vidé n̄cha, jehe xí mé chondaha xa que tsinttohe xa n̄hīchihi xa.

¹³ Si ná n̄hí ditticaon Jesucristo co xixihi n̄cha nahi, pero si jehe xa jí xa conforme para tasecao xa n̄hí mé ngoixin vidé xa, cai jehe n̄hí mé chondaha n̄cha que sāhjendehe n̄cha xixihi n̄cha mé.

¹⁴ Ixin tti xixihi ná n̄hí que ditticaonha xa Jesucristo co jehe n̄cha ditticaon n̄cha, Dios ojoinchenaon xí mé ixin jehe xa jicao xa n̄hí que ditticaon Jesucristo. Co n̄hīchihi ná xí que ditticaonha n̄cha Jesucristo co jehe xa ditticaon xa, cai n̄hí mé Dios ojoinchenaon n̄cha ixin jehe n̄cha jicao n̄cha xí que ditticaon Jesucristo. Si jeha jamé, xanha ra sintte xan inchin xenhe chojni que ditticaonha Jesucristo, pero ixin masqui jeha ná ra ndoa ditticaon ra Jesucristo, mexinxin cai xanha ra Dios ojoinchenaon xan.

¹⁵ Pero si xixihi ná n̄hí o n̄hīchihi ná xí que ditticaonha Jesucristo sinao sāhjendehe xixihi o n̄hīchihi, tan̄chjanda ra na sinchehe na. Cottimeja tti xí o tti n̄hí que ditticaon Jesucristo chonda libertad, ixin Dios rinao que tti chojni que ditticaon Jesucristo sintte na çhjoin ngain vidé na.

¹⁶ Co si jaha ná n̄hí, ¿quēén noanxin ixin anchao tsjenguijna xixiha para sitticaon xa Jesucristo? O si jaha ná xí, ¿quēén noanxin ixin anchao tsjenguijna n̄hīchihi para sitticaon n̄cha Jesucristo?

17 Mexinxin cada chojni chonda que sintte na ngain vidé na de acuerdo conixin tti joachaxin que joanjo Jesucristo co inchin jehe na vintte na are Dios vayé na. Jañá ttonha janha ngain cain chojni que ditticaon Jesucristo.

18 Si Dios vayé chojni que chonda xóhe que dinhi circuncisión ngain cuerpoe, chojni mé chonda que jamé sittohe conixin xóhe mé. Co si Dios vayé chojni que chondaha xóhe que dinhi circuncisión ngain cuerpoe, chojni mé chondaha que rrochonda xóhe.

19 Ixin jeha importante para que cain chojni rrochonda xóhe mé; tti importante que cain na sitticaon na cain tti ttonha Dios.

20 Cada chojni chonda que sintte na inchin vintte na are Dios vayé na.

21 Si jaha joarihi ná ninchehe xa que dicochji ngain xinajni are Dios vayaha, jaha taha joachjaon de ixin mé. Masqui jamé, si jaha chonda oportunidad de sarihi libre, nchao, ixin icha jian sarihi libre.

22 Tti chojni que vehe ninchehe xa que dicochji ngain xinajni are Dios vayé na para que jehe na vitticaon na ngain Jesucristo, jai jehe na te na libre para ngain xé Jesús. Co cai, tti nivintte libre are Dios vayé na, jai jehe na te na inchin tti nchehe xa que tochji pero de ngain Jesús.

23 Dios anto rentte coenanxin jaha ra, mexinxin dittoaxinha ra para que iná chojni tsetonha ra.

24 Jañá, cada ra dintte ra ngattoxon con Dios inchin jaha ra vintte ra are Dios vayaha ra.

25 Co cain chojni que xa tecaoha nchí o xí, janha xa xonhi tsetoan na ixin Jesucristo xonhi coetonha de ixin jehe na, pero janha rroundattjan na tti janha xaxanho ixin tti janha xaxanho jehe jian ixin Dios chjana tti janha xaxanho.

26 Cain chojni que ditticaon Jesucristo tiempo jai atto tsje peligro tetonchienhe ngain na, co tiempo inchin jiji, para ixin janha, puede icha jian para cain chojni que xa dinttecaoha nchí o xí, isinttecaoha chó na.

27 Pero tti chojni que otecao chihi o xixihi irroxaxaonha na para tsinttohe chó na. Pero tti chojni que xa dinttecaoha chó, icha jian irroxaxaonha na para sinttecao chó na.

28 Pero si sinttecao chó na cai nchao jí ixin mé jeha cosa jianha. Cai si ná xannchí secoa xan xixihi xan, cai mé jeha jianha sinchehe xan. Pero tti chojni que sinttecao chó rrochonda na problema ngain vida jiji, co janha rinaho que rrochondaha na problema mé.

29 Janha rinaho rroundattjo ra ixin atto tsjeha tiempo dittoá na jai pa ndaha. Mexinxin cain chojni que tecao chihi o xixihi chonda que sinchehe na xé Jesucristo como si rrochondaha na chihi na o xixihi na.

30 Co tti chojni que anto techín, chonda que sintte na como si xonhi joachjaon rroguinttechonda na. Co tti chojni que techonda quiai, chonda que sinchehe na como si xonhi quiai rroguinttechonda na. Co tti chojni que coehna na cosa, chonda que sintte na como si rrochondaha na cosa mé.

31 Co tti chojni que anto nchegonda na tti cosa que jí ngataha nontte, chonda que sintte na como si rrojnchegondaha na cosa mé, ixin mundo jiji que ján na docon na ondajittjexin.

32 Janha rinaho que jaha ra rrochondaha ra joachjaon. Are ná xí que xonhi nchí jicao, jehe xa icha xaxaon xa de ixin Dios co nchehe xa xé Dios ixin rinao xa que Dios ncheoxinhi tti jehe xa nchehe xa.

33 Pero are ojicao xa nchí, jehe xa icha xaxaon xa cain cosa de ngataha nontte jiji, co para que chihi xa ncheoxinhi ncha tti jehe xa nchehe xa.

³⁴ Cai jí diferencia de ngain n̄hí que tecaó xí conixin n̄hí que tecaoha xí. N̄hí que tecaoha xí icha ʒaxaon n̄cha cosa de Dios para que te n̄cha jian ngain Dios de ngain cuerpoe n̄cha co de ngain espiritue n̄cha. Pero tti n̄hí que tecaó xí icha ʒaxaon n̄cha cosa de ngataha nontte jihi co para que xixihi n̄cha sincheʒoxinhi xa tti jehe n̄cha tenchehe n̄cha.

³⁵ Janha rrindattjo ra cain jihi pero jeho para tsjenguijnaxin ra, jeha para que jaha ra isinttecoha chó ra ndoa. Janha rinaho que sinchehe ra cain cosa inchin jiquininxin co rinaho que cain tiempo sinchehe ra jian ʒé Jesucristo, tti chonda cain joachaxin.

³⁶ Pero si ná chojni ʒaxaon que icha jian para que xenhe secoa xan xí, ixin ojiddattohe xan de xann̄hí, co si para ixin jehe chojni mé jihi tti icha jian, nchao secoa xenhe chojni mé xí. Mé jeha cosa jianha para ixin Dios.

³⁷ Pero si ná chojni ʒaxaon que xenhe secoa xan xí co si ndoa jehe jamé rinao sehe xenhe, cai chojni mé nchao nchehe.

³⁸ Jañá, tti rinao que secoa xenhe xí nchao nchehe, co tti rinaoha que secoa xenhe xí icha nchao nchehe.

³⁹ Ley de Dios ndačho que tti n̄hí que tecaó xixihi, jehe n̄cha chonda que sitticaon n̄cha tti rrondačho xixihi n̄cha hasta ndasenne xa. Pero si xixihi n̄hí mé ndasenne xa, jehe n̄cha sittohe n̄cha libre para secoa n̄cha quexeho xí que jehe n̄cha sinao n̄cha, pero ná xí que ditticaon Jesucristo.

⁴⁰ Pero janha ndačhjan que jehe n̄cha icha feliz sehe n̄cha si iʒonhi xí secoa n̄cha, jihi tti ʒaxanho janha, co toenaho que tti janha rrindattjo ra jihi joixin de ngain Esp̄ritu Santo que Dios rroanha.

8

Tti danjo chojni ngain ídolo

¹ Janché rrondattjo ra quehe rročho tti danjo chojni ngain ídolo. Ján, ndoa que cain na ʒaxaon na que chonxin na co noa na jian de ixin cosa jihi, pero tti ján na noa na, mé ʒonhi ʒé ixin anto tonoa na orgulloso. Pero si sonao chó na, mé tti sinttasoji na ngain tti dotticaon na de ixin Jesucristo.

² Si chonja chojni tonohé que jehe anto nohe pero jehe ʒa ʒonhi nohe ixin ʒa ditján tti jiquininxin tsonohe.

³ Pero tti chojni que rinao Dios, Dios jí ngain chojni mé.

⁴ Mexinxin, ¿quehe chonda na que sonttoho na? ¿Asontte na tti nntao que ttinhi na ídolo? Ján, ndoa noa na jian que ná ídolo naʒoinxon joachaxin chonda ngain cain chojni, ixin jí jeho nacoaxinxon Dios.

⁵ Canxion chojni ndačho que ixin jí tsje dio que chonda joachaxin ngajni co nntihi ngataha nontte, co jehe na ncheguinhí na, señor.

⁶ Pero ján na noa na que jí nacoaxinxon Dios, tti Ndodá na. Ndo mé Ndo joinchechjan cainxin cosa, co ján na te na para ixin jehe Ndo. Cai jí nacoaxinxon tti dinhi Señor, co jehe mé Jesucristo. De ixin jehe jixin cainxin cosa, hasta ján na texin na cai.

⁷ Pero cainxinha chojni nohe jihi. Canxion niditticaon Jesucristo jai vintte na acostumbrado de vanchesayehe na ídolo. Co jai ʒa ttinxinha na jian de ixin Jesucristo. Mexinxin are jine na tti nntao que dehe na ngain ídolo, tonohé na feo ixin ʒa ʒagoen na ídolo mé.

⁸ Seguro que Dios ndosenha si ján na sontte na nttao mé o ni nahi. Jeha icha jianha na si sontte na nttao mé, ni jeha icha jian na si sontteha na nttao mé.

⁹ Pero ttjiho ra cuidado de ixin tti joachaxin que jaha ra coá ra de ixin sintte ra cain cosa, ixin puede de ixin tti sinchehe ra jaha ra icha chojni sinchehe na jianha ixin xa ttinxinha na jian de ixin Jesucristo.

¹⁰ Ntitihi jí ná ejemplo: si ná de jaha ra xo ojian ttinxin ra de ixin Jesucristo, co noha ra de ixin cain cosa jhi sintte ra sintte ra ngain lugar tti icha chojni nchesayexin ídolo co sicon ra iná chojni que xa ttinxinha jian de ixin Jesucristo, chojni mé nchao rroxxaon sine cai tti cain cosa que saquehe na ngain ídolo.

¹¹ Jañá jaha ra ixin ottinxin ra jian sinchetján ra iná chojni tti xa ttinxinha jian, co Jesucristo venhe cai para ixin chojni mé.

¹² Mexinxin are jaha ra sinchetján ra tti chojni que xa ttinxinha jian de ixin Jesucristo, jaha ra cai rrocho que sinchehe ra jianha ngain mero Jesucristo.

¹³ Mexinxin, si janha sinttatján tti chojni que xa ttinxinha jian de ixin Jesucristo are jeha chojni mé sicon na janha sine tti nttao que daquehe na ídolo, icha jian xonhi tiempo janha sine nttao mé para sinttatjanha chojni mé ngain cosa jianha.

9

Derecho que chonda ná representanté Jesucristo

¹ Ján, ndoa que janha chonda joachaxin co cain derechoe ná representanté Jesucristo. Janha vicon Jesucristo, tti chonda joachaxin para ixin ján na, co jaha ra tti xa que janha jointtaha para ixin jeha.

² Puede icaxin chojni xa chonxinha na na janha ixin janha ná representante na. Pero jaha ra chonda ra que chonxin ni ra janha ixin janha tti ndattjo ra para que jaha ra vitticao na ngain Jesucristo, co yá ná prueba que ndoa janha ná representante na de Jesucristo.

³ Co jihi tti rrondachjan ngain cain chojni que nchexxoxinha tti janha rrinttaha:

⁴ janha chonda derecho de sayá cain tti rrochjana na para sine co cain tti rrochjana na para sihi,

⁵ co cai para rrochonda ná chihna que ditticaon ncha Jesucristo sacjinha ncha ngain viajena tti chji, jañá inchin nchehe tti icaxin representanté Jesucristo inchin Pedro co xanchó Jesús.

⁶ ¿O apoco xaxaon ra que janho co Bernabé tti tequininxin na sinttaha na yó xa ngain nacoa tiempo? xa para sachaxin na tomi que sondana na, co xa de rronattjo ra tti jian joajna.

⁷ Xaxaon ra jian que xonhi xisoldado jí que jeha xa ttjenga xa hna cain gastoe xa. Co xonhi chojni que ttjenga nttauva que jeha jineha ttochjoín nttá. Co xonhi chojni que ttingaria coleco que jeha diha tsjinhi va.

⁸ Co xaxaonha ra ixin jeho xí ngataha nontte xaxaon jihi, ixin cai Dios coetonhe Moisés para coentaxin de ixin jihi ngain libro tti jitaxin ley de Dios.

⁹ Co ngain libro mé jitaxin: “Ttengueha ra coxinttaha nchisen are tondai va trigo.” Dios ndachoha jihi de ixin jeho coxinttá,

¹⁰ jeha ndacho jañá para ná ejemplo para ixin ján na. Ley jihi jian para ixin ján na ixin tti nchehe xa ngataon jngui co tti tondai trigo chonda na derecho de sayé na parte de cosecha.

11 Mexinxin, si janha na coenga na ngayaha ra palabré Dios, ¿apoco tonoha ra atto tsje si jaha ra rrochjana ra nchion tomi para sinenxin na?

12 Si icanxin chojni chonda na derecho jiji de chjehe ra na tomi, mé icha janha na.

Pero janha na nntagondaha na derecho que janha na chonda na. Janha na nttaha na icanxin xa para dachaxin na tomi que dondana na co para que jaha ra, xo rinao ra sitticaon ra tti jian joajné Jesucristo, tsonoaha ra molestia de ixin janha na.

13 Jaha ra noha ra que tti nchehe xa de ngain ningoe chojni judío de ngain nihngo sachaxin na tti sine na. Rrocho que tti chojni que nchehe xa ngain alté Dios, tti ttún na nntaohe coxigo para ixin Dios, chojni mé jine tti nntao que dehe nttiha.

14 Xajeho cai, Jesucristo ndacho que tti chojni que nichja tti jian joajna, chojni mé de ngain xa mé sachaxin na tti sine na.

15 Pero janha xonhi tiempo jointtagonda ni ná derecho jiji, ni cai jeha rricjinha ra jiji para que jaha ra rrochjana ra nchin tomi. ¡Para ixin janha icha jian si saho ndasenxin na jinta que ná chojni santsjena tti chjoin que tsonohe ansenna de ixin jiji!

16 Janha nichja tti jian joajna ngain chojni pero rinaoha que chojni sinch-esayana ixin Dios coetonna que rronichja joajna mé. Co anto tangui tsonna si janha rrondachjanha joajna jiji.

17 Si janho rroguinchiá xa jiji, Dios rrocjengana hna. Pero jeha jamé ixin xa jiji ná responsabilidad que Dios chjana, co choha rrondattjan que nahí.

18 Mexinxin tti anto chjoin tonona are ndattjan chojni tti jian joajna, jiji tti xenga na hna co xonhi chojni ndattjan ixin tsjengana hna tomi. Rrocho janha nntagondaha derechona para rrogacha tomi de ngain xana ixin janha nichja tti joajna mé.

19 Masqui janha jeha ninchehe xé de ni ná chojni, janha goan na ninchehe xa de cainxin chojni para dacha icha chojni para ixin Jesucristo.

20 Are janha rrihi ngayé chojni judío janha cjan na inchin chojni judío para dacha jehe na para ixin Jesucristo. Rrocho para tti anto ditticaon ley que vayé Moisés, janha cai ditticanho ley mé para que janha dacha jehe na, masqui janha chondaha que nttaha inchin ttetonha ley mé.

21 Co para que janha dacha para ixin Jesús tti chojni que ncheha inchin ttetonha ley que vayé Moisés, janha cjan na inchin jehe na cai. Masqui ján, janha nttaha inchin ttetonha ley de Dios ixin janha ján orrinttaha inchin ttetonha ley de Jesucristo.

22 Co are janha rrihi ngain chojni que xa ttinxinha jian de ixin Jesucristo, janha nttaha inchin costumbré jehe na para que janha chonda oportunidad de ndattjan na icha de ixin Jesucristo, jamé nttaha para que jehe na icha ttinxin na. Rrocho janha darihi inchin cada naná jehe na para que jamé nchao Jesucristo tsjengujina canxion na para xonhi castigo rrochonda na de cain cosa jianha que nchehe na.

23 Ján, nttaha cain jiji para que nttanoa chojni tti jian joajna co para que janha cai rrochonda tti jian que Dios danjo.

24 Jaha ra onoha ra que ngain ná juego de carrera cain ni ttinga ni pero jeha nacoaxinxon tti dacha. Jamé ttinga jaha ra cai para que jamé sachá ra.

25 Cain tti chojni que doan preparado cuerpoe para rrotsontaon ngain ná juego, chojni mé jineha cosa que sinchehe daño co ncheha cosa que sinchehe daño ngain cuerpoe. Co cain chojni mé nchehe na jamé jeha para dacha na ná premio jeha ná corona de qué nttalaurel que tonchjenha sé. Pero ján na

nttoho na lucha para que sacha na ná premio que tsonchjenhe para cainxin tiempo.

²⁶ Para ixin janha jeha jamaoncoa ttinga; janha jeha ttinga para sinttatján. Co cai janha inchin ná xiboxeador que tjacoaha tton ngataonhe chintto.

²⁷ Janha nttaguetan cuerpona tangui co ntaha para que cuerpona sitticaon na janha para que janha sinttatjanha tti janha ditticanho que janha jointtacoán icha chojni.

10

Pablo rinaoha que chojni sinchesayehe na ídolo

¹ Janha rinaho que jaha ra tsonoha ra tti conhe nindogoelitoa na xanchjen ngatja nttiha are anto osé. Para que jehe na sacjoi na, Dios rroanha ná ttjoi para vitaonhe na nttiha. Co Dios conxiré ndachaon para vehe ná nttiha tti jehe na vattoxin na ndachaon que dinhi Mar Rojo.

² Ttjoi jihi co tti conhe ndachaon, jihi ná señal que Dios coinchiehe Moisés para savicao jehe na co rrocho que por ixin milagro jihi que Dios chjé Moisés, jehe na joiguitte na ngain.

³ Co cai cain jehe na joine na tti joanjo Dios

⁴ co cain jehe na vihi na tti jinda que vachjedoxin xo co jinda mé Dios joanjo cai. Co tti xo mé inchin Cristo.

⁵ Co masqui jamé, anto tsje na vitticaonha na Dios, co mexinxin cain nimé ndavintteguenxin na nttiha ngagaha jna.

⁶ Cain jihi conhe inchin ná ejemplo para ixin ján na para que ján na sonaoha na cosa jianha inchin joinao na jehe na.

⁷ Mexinxin jaha ra nchesayehe ra ídolo inchin joinchehe canxion jehe na. Noa na que joinchesayehe na ídolo ixin ndacho tti jitaxin Palabré Dios: “Tti chojni nttiha vintte na joine na co vihi na. Cottimeja vinttengattjen na vinttette na són para joinchesayehe na tti coxinttachjan de oro.”

⁸ Co ján na chondaha na que rrotsontaonxin na nchí que jeha nchíchiha na inchin vinttenchehe canxion jehe na, co mexinxin vintteguenxin veintitrés mil na ngain nacoa nchanho.

⁹ Ni chondaha na que tsjá na paciencia que chonda Dios inchin joinchehe canxion jehe na, co mexinxin conché joinehe va jehe na co ndavintteguenhe tsje na.

¹⁰ Ni tsoñaoha na ngain Dios inchin joinchehe canxion jehe na, co mexinxin Dios rroanha ná ángel de jehe co ndagoen tsje na.

¹¹ Cain jihi conhe nindogoelitoa na xanchjen are saho co vetaxin ngain tti jitaxin Palabré Dios inchin ná ejemplo para ixin ján na para que ján na isonttoha na jamé inchin joinchehe jehe na ixin ján na techon na ngain tiempo que ochian ndatsjexin mundo.

¹² Mexinxin jaha ra xo tonoha ra que ojian ditticaon ra Jesucristo ttijho ra cuidado para que sincheha ra jianha.

¹³ Tti tangui que jaha ra tonha ra xajeho jamé tonhe cainxin chojni cai. Pero jaha ra nchao chonda ra confianza ngain Dios ixin jehe sanjoha icha tangui nganji ra, jeha tti jaha ra nchao tsixinha ra. Ixin are rrochonda ra tangui, Dios sinttanoha ra ngain ansean ra para queñen sinchehe ra para sachjexin ra de ngain tangui mé. Co jamé tsixinha ra ngain cain cosa tangui.

¹⁴ Mexinxin, cain jaha ra hermano, nchesayehe ra ídolo.

¹⁵ Janha ndattjo jaha ra jañá ixin jaha ra nchao ttinxin ra, co xaxaon ra jian si jeha ndoa tti janha ndattjo ra.

¹⁶ Are dayé na tti vaso de vino ngain Santa Cena co are ján na donho na vino mé, jamé nttoto na ixin rrocho que ján na dotticaon na ixin Jesucristo jehe cointtji jni para ixin ján na. Co are jontte na tti niottja que ján na tonchjea na, jamé nttoto na ixin rrocho que ján na dotticaon na ixin Jesucristo jehe joango cuerpoe para ixin ján na.

¹⁷ Masqui ján na anto tsje na, pero cain na jontte na xajeho niottja mé co jihi rrocho ixin cain na nacoaxinxon cuerpo na para ngain Jesucristo.

¹⁸ Xaxaon ra de ngain chojni Israel; are jehe na jine na nntao que dehe ngain mesé Dios, tjago na ixin cain jehe na nacoaxinxon cuerpo para ngain Dios.

¹⁹ Ndaçhjanha que ixin ídolo techon o chonda joachaxin, ni tti nntao que daquehe chojni ngain jeha icha jian nntao que cain icha nntao.

²⁰ Tti janha ndaçhjan rrocho que are tti chojni que chonxinha Dios daquehe nntao ngain ídolo, nntao mé para ixin espíritu jianha ixin nntao mé jeha para ixin Dios. Co janha rinaoha que jaha ra sinchesayehe ra espíritu mé.

²¹ Çhoha sixin ra ngain vasoe Jesucristo co sixin ra ngain vasoe espíritu jianha. Çhoha sinttexin ra ngain mesé Jesucristo co sinttexin ra ngain mesé espíritu jianha.

²² ¿Apoco sonao na sonttoña na Jesucristo? ¿Apoco icha soji ján na que jehe?

Tti nchao sinchehe ni co tti sinao chó ni ixin ditticaon ni Cristo

²³ Já, ndoa tti ndaço na que ná ni nchao sinchehe ni lo que sinao ni, pero cainxinha jian para ixin jehe ni. Já, ná ni nchao sinchehe ni lo que sinao ni, pero jeha cainxin tti sinchehe ni tsjenguijna ni para sitticaon ni Jesucristo icha.

²⁴ Chonda ni que tsjé ni tti jian para icanxin chojni co jeoha tsjé ni jian para ixin jeha ni.

²⁵ Jaha ra nchao jintte ra cainxin tipo de nntao que tochji ngain ndásin. Jaha ra chondaha ra joaxaon de sintte ra quexeho nntao mé co danchianguiha ra si vehe nntao mé ngain ídolo o ni nahi

²⁶ Ixin nontte co cain cosa que jí ngataha nontte Dios joinchechjian cain mé co cain mé cosé jehe.

²⁷ O si çhonja chojni que xa ditticaonha Jesucristo rrondattjo ra ixin sinttecoho ra, co si jaha ra sinao ra sinttecoho ra, nchao para jaha ra jintte ra cain tti rrochjá ra na co xaonha ra para jintte ra nntao mé. Co xonhi danchianguihi ra de ixin tinó joixin cain nntao mé.

²⁸ Pero si tti chojni que rrochjá ra nntao rrondaço ixin nntao mé vehe nntao ngain ídolo, jaha ra jintteha ra nntao mé para sincheha ra jianha ngain tti chojni que rrondattjo ra jamé, co para que chojni mé tsonoeha feo ngain ansén.

²⁹ Janha rrinichja de ixin quexén tonohé icha chojni, nahi de ixin quexén tonoha jaha ra.

Pero puede çhonja ra sanchianguiha ra: “¿Andosenna tti xaxaon icha chojni?”

³⁰ Ixin puede xaxaon ra que si danjo ra gracias ngain Dios de ixin tti jintte ra, icha chojni çhoha rronichja na feo de ixin jaha ra.

³¹ Nchao jí si jaha ra jintte ra o dihi ra o nchehe ra icanxin cosa, pero nchehe ra cain mé para nchesayexin ra Dios.

³² Ncheha ra cosa que iná chojni feo tsonoeha ngain ansén, ni para chojni judío, ni para chojni que jeha judío, ni para chojni que ditticaon Jesucristo.

³³ De partena janha ttjinha cuidado para que cainxin chojni sinao na tti janha rrinttaha, janha ttjeha jian jeho para ixin janha, janha ttjé para ixin icha chojni para que Jesucristo nchao tsjenguijna jehe na para que rochondaha na castigo de ixin tti jianha que nchehe na.

11

¹ Jaha ra rroehe ra ejemplona janha inchin janha rroá ejemploe Jesucristo.

Tti jiquininxin sinchehe nchí ngain servicio

² Janha atto chahna ixin jaha ra cainxin tiempo xaxaon ni ra janha co tenchehe ra sigue tti janha jointtacoanha ra.

³ Pero janha rinaho que tsinxin ra que Cristo, mé tti já de cada xí ixin jehe tti ttetonhe cada xí; co cada xí, mé tti já nchíchihi ixin jehe xa tti ttetonhe nchíchihi xa; jañá inchin Dios, mé tti já Jesucristo.

⁴ Si ná xí tsjanotaon já xa are jinchecoanxinhi xa Dios are ngain servicio o are jindache xa chojni ngain nihngo tti joajna que jehe xa vayé xa que joixin de ngain Dios, mé rrocho ná joasoaxin para ixin Cristo.

⁵ Pero si ná nchí tsjanotaonha já ncha are jinchecoanxinhi ncha Dios are ngain servicio ngain nihngo o are jindache ncha icha chojni tti joajna que jehe ncha vayé ncha que joixin de ngain Dios, rrocho ná joasoaxin para ixin xixihi ncha. xajeho inchin jehe ncha rrocjinhi ncha ngoixin já ncha.

⁶ Si ná nchí tsjanotaonha já ncha, mexinxin icha jian rrochinji cainxin xajá ncha. Pero si jaha ra tsonoha ra que atto soaxin para ná nchí rrochinji xajá ncha o rrocjin ncha hasta tti nganito já ncha, mexinxin icha jian chonda ncha que tsjanotaon já ncha.

⁷ Xí chondaha que tsjanotaon já xa ixin Dios joinchechjian jehe xa inchin jehe Dios. Co de ngain xí Dios tosayehe. Co nchí para sinchesayehe ncha xí.

⁸ Jañá ixin are Dios joinchechjian xí, jehe joinchechjianha xa de ngain ná nchí, sino que Dios joinchechjian nchí de ngain xí.

⁹ Nchí conchjian ncha para ixin xí, co jeha conchjian xí para ixin nchí.

¹⁰ Mexinxin de cain jiji, nchí chonda que tsjanotaon já ncha para ná señal que jehe ncha ditticaon ncha xixihi ncha, co para rroché cain ángel.

¹¹ Pero masqui jamé, para ixin ján na que dotticaon na Jesucristo, xí choha sehe xa si coha nchí, ni nchí choha sehe ncha si coha xí,

¹² ixin ján ndoa que saho nchí conchjian ncha de ngain ná xí, pero de are mé para ndahi, xí doanxin xa de ngain nchí, co cayoi mé ttixin de ngain Dios.

¹³ Jaha ra mismo ndacho ra si nchao jí que nchí are sincheoanxinhi ncha Dios tsjanotaonha já ncha.

¹⁴ ¿Apoco noeha cain chojni que ná joasoaxin para ixin xí rrochonda xa xajá xa yeye?

¹⁵ Pero para ixin nchí ná cosa jian para ixin jehe ncha rrochonda ncha xajá ncha yeye ixin vayé ncha xajá ncha yeye para rroxanotaon já ncha.

¹⁶ Pero si chonja chojni rinao tsoñao de ixin asunto jiji, pero chojni mé chonda que tsonhe que ni ján na co ni icha chojni que ditticaon na Dios chonxinha na iná costumbre.

Tti joinchehe chojni ngain Santa Cena

¹⁷ Janha xaxanho rrondattjo ra canxion cosa que janha ncheoxinnaha. Ndachjenji na chojni que are xatte ra para ngain servicio, parece que chojni ngain ningoa ra nchehe na jianha en vez de jian.

¹⁸ Ixin janha ndachjenji na na que are xatte ra para nchesayehe ra Dios ngain servico, are mé nichja ra ixin rrochjeya ra, co janha ditticanho nchion que puede ndoa jamé nchehe ra.

¹⁹ Pues, ¡puede jaha ra xaxaon ra que chonda que rrochjeya ra en grupos para que tsonohe ni quexehe ra xo ndoa ditticaon ra Jesucristo!

²⁰ Mexinxin tti cena que jaha ra jintte ra ngain nihngo, mé ijeha Cena de Jesucristo ixin jaha ra jañá xaxaon ra.

²¹ Co ixin are hora que jaha ra jintte ra cena mé, cada ra choenha chó ra; saditaon ra nttiha para ditse ra cená ra jaho ra. Mexinxin ttoha ra anto jintte ra co dihi ra hasta dinttecoan ra. Co ittoha ra denhe ra jintta.

²² Co jañá tenchexin ra jianha ngain chojní Jesucristo co nchecosoehe ra tti chojni noa que dicaoha tti jine. ¿Achondaha ra nchiandoi ra tti sinttexin ra co tti sixin ra? ¿Quexén rrochjan de ixin jaha ra? ¿Arronichja thjoin de ixin jaha ra? ¡Nahi de ixin tti tenchehe ra jiji!

Cena de Jesucristo

(Mt. 26.26-29; Mr. 14.22-25; Lc. 22.14-20)

²³ Janha de ngain Jesucristo mismo vayaxin tti janha jointtacoanha jaha ra: Jehe ngain tti ttie que Judas cjoago Jesús para ngain tti chojni que ningaconhe jehe, Jesús de rá tsexin niottja

²⁴ co are joexin joango gracias ngain Dios, jehe conchinji nio co ndacho: “Jintte ra. Jiji jehe cuerpona que janha sanjo para tsjenguijnanxin jaha ra. Janhi nchehe ra para rroxaxaonxin ni ra janha.”

²⁵ Jamé cai, are joexin cena, jehe de rá tsexin tti vaso que jiria vino co ndacho: “Vino jiji rrocho tti nuevo trato que nchese gurá conixin jnina. Cada nttiha que jaha ra sihi ra, nchehe ra para rroxaxaonxin ni ra janha.”

²⁶ Mexinxin cada nttiha que jaha ra sintte ra niottja co sihi ra vino para ngain Santa Cena, jaha ra nchehe ra jañá ixin Jesucristo ndavenhe para ixin jaha ra. Co nchehe ra jiji hasta que jehe tsí iná.

Quexén sine chojni tti Santa Cena

²⁷ Jañá, quexeho chojni que jine niottja co dihi de ngain vasoe Jesucristo co si jehe chojni mé ncheha inchin jiquininxin, jehe nchesayeha Dios, co chojni mé nchehe jianha ixin dicaoha respeto ngain cuerpoe Jesucristo co ngain jní Jesucristo.

²⁸ Mexinxin ante de sintte ra tti niottja co sihi ra de tti ngain vaso que Jesucristo coetonha, cada jaha ra xaxaon ra jian quexén sinchehe ra para sintte ra Cena mé inchin jiquininxin

²⁹ ixin si jintte ra co dihi ra co xaxaonha ra que ixin mé rrocho cuerpoe Jesucristo, pero jeho tettjé ra castigo para ixin jaha ra.

³⁰ Mexinxin anto tsje de jaha ra teniha ra co tsangaha ra, co icanxin chojni de jaha ra hasta ondavenhe na.

³¹ Pero si ján na rrocjinho na cuidado jian jaon na ante de rrojontte na Cena jiji, Jesucristo rrochondaha que rrochjá na castigo jiji.

³² Pero are Jesucristo jehe dicon que ján na nchaoha tenttoho na, jehe nttacastigá na nchion jai para que ján na ttentoxinhi na vidá na, co jamé ján na tsjinha na ngain infierno tti tsji cain chojni que ditticaonha Jesucristo.

³³ Jañá mexinxin are rroxatte ra para sintte ra Cena jiji, chonhe chó ra naná ra para nataonxin sintte ra cain ra.

³⁴ Si thonja chojni senhe jintta, icha jian si jehe sine ngain nchiandoha para que jehe sitaonha nttiha co sine icha que cainxin chojni are sine na

ngain Cena mé, co jamé Dios rrochjeha chojni mé castigo. Co tti icha asunto janha rrondattjo ra are saso para sasotsjaha ra.

12

Tti joachaxin que danjo Espiritu Santo ngain cada chojni

¹ Hermanos, jí icanxin cosa que janha rinaho tsonoha ra de ixin joachaxin que danjo Espiritu Santo ngain cada chojni.

² Jaha ra noha ra jian que are xa vaguitticaonha ra Jesucristo, jaha ra vaguittoaxin ra de vanchesayehe ra canxion idolo que čhoha nichja.

³ Mexinxin jai janha rinaho tsonoha ra que cain chojni que jí Espiritu Santo ngain thoha rrondačo: “Jesús jianha!” Co cain chojni que rrondačo: “Jesús tti chonda cain joachaxin!” pero ixin Espiritu Santo jí ngain chojni mé.

⁴ Dios chjá na tsje clase de joachaxin, pero jeha ngain Espiritu Santo ttxin cain joachaxin mé.

⁵ Jí tsje clase de xa que sonttoho na, pero cain xa mé xajeho xa para ixin Jesucristo.

⁶ Jí tsje manera que nttoho na xa mé, pero jeha nacoaxinxon Dios tti ttjengujna cain chojni para nchehe na xa mé.

⁷ Dios tjago ixin cada na chonda na Espiritu Santo nganji na ixin jehe mé tti chjá na joachaxin cada na. Co joachaxin mé tti ttjengujna na ján na para que ján na nchao tsjengujna na icha chojni que ditticaon Jesús.

⁸ De ixin Espiritu Santo Dios danjo joachaxin ngain canxion chojni para nichja na jian inchin anto ttinxin na. Co icanxin na xajeho Espiritu Santo tti danjo joachaxin para ndačo na ngain icha chojni tti Dios joinchenohe na.

⁹ Canxion na dayé na joachaxin de ixin jehe Espiritu mé para ditticaon na jian. Co icanxin na dayé na joachaxin para nchexingamehe na chojni nihi.

¹⁰ Icanxin na dayé na joachaxin de nchehe na milagro. Co icanxin na dayé na joachaxin para ndache na chojni joajné Dios que jehe na dayé na. Co icanxin na Espiritu Santo chjé na joachaxin para datsoan na tti chojni que jí espiritu jianha ngain co tti chojni que jí Espiritu ndoa ngain. Co icanxin na dayé na joachaxin de nchao nichja neje na palabra que ni jehe na ttinxinha na. Co icanxin na dayé na joachaxin para ndačo na ixin quehe rročo palabra mé.

¹¹ Pero cainxin cosa jiji nchehe jeha tti nacoaxinxon Espiritu Santo, mé tti tonchjea ojejé joachaxin ngain cada chojni inchin rinao jehe Espiritu Santo.

Cain na tequininxin na ngain nacoaxinxon cuerpo

¹² Inchin cuerpoe ni chonda tsje parte, pero masqui tsje parte rročo nacoa cuerpo, jamé ján na cai ngain Jesucristo; masqui tsje na, pero tonchjian na nacoa cuerpo para ixin jehe.

¹³ Cada na ján na ná parte de cuerpoe Cristo masqui judío na o griego na, o dicochji na ngain xa o ni nahi. Pero Espiritu Santo joinchechjian cain na nacoa cuerpo are joiguite na. Co mexinxin ján na parte de cuerpoe Cristo, co cain na vayé na Espiritu Santo.

¹⁴ Ná cuerpo tonchjianha nacoa parte, sino de tsje parte.

¹⁵ Si rotté ni rrondačo: “Janha jeha rá na, mexinxin janha jeha ná parte de cuerpo jiji”, ¿apoco por ixin jamé rotté ni ijeha ná parte de cuerpoe ni?

¹⁶ O si ndatsjoen ni rrondačo: “Janha jeha jmacon na, mexinxin janha jeha ná parte de cuerpo jiji”, cai ¿apoco por ixin jamé ndatsjoen ni ijeha ná parte de cuerpoe ni?

17 Si ngoixin cuerpoe ni rrocji joxon jmacon ni, ¿quexén nchao rroquinhí ni? O si ngoixin cuerpoe ni rrocji joxon ndatsjoen ni, ¿quexén nchao rrocoxajnihi ni ná cosa?

18 Pero Dios coín cada parte de cuerpoe ni ngain lugar tti jehe jinao.

19 Si cain rrocji nacoa parte, ¿quexén rrogeuhe cuerpoe ni?

20 Masqui jí tsje parte, tonchjian jehó nacoaxinxon cuerpo.

21 Jmacon ni çhoha rrondaçho ngain rá ni: “Jaha rrogondanaha”; ni cai já ni çhoha rrondaçho ngain rotté ni: “Jaha rrogondanaha.”

22 Jeha jamé ixin tti cain parte de ngain cuerpoe ni que jehe ni tonohé ni dondaha ngain cuerpo, pero cain parte mé tti icha donda ngain cuerpoe ni.

23 Co tti ngain parte de cuerpoe ni tti antoha rinao ni, cai çanotaon. Co tti ngain parte de cuerpoe ni que çhoha çago, co mé tti icha dicao ni cuidado para çanotaon jian,

24 co ncheha ni ngain parte que nchao çago. Jamé Dios joinchechjian cuerpoe ni para que cain parte que icha rinaoha ni, mé tti icha tosayehe,

25 para que çonhi parte tsoñaohé iná parte, sino que cada parte de cuerpo rroçaxaon de ixin icha parte de çajeho cuerpo.

26 Si ná parte de cuerpoe ni ttín, cai icha parte de cuerpoe ni tonohé feo. Co si ná parte de cuerpoe ni çhjoin tonohé, cai tti icha parte de cuerpoe ni çhjoin tonohé.

27 Tti janha rrindaçhjan rroçho que cain jaha ra tonchjian ra nacoa cuerpoe Cristo, co cada ra tonchjian ra naná parte de cuerpo mé.

28 Jamé Dios çhjé cargo jian canxion chojni que te ngain nihngo. Co saho parte para ixin tti chojni que te representanté Jesucristo, yoxin parte para ixin tti chojni que ndaçho tti joajna que jehe dayé de ngain Dios, ninxin parte para tti chojni que ncheoenhe icha chojni de ixin Dios, cottimeja para ixin tti chojni que nchehe milagro, para ixin tti chojni que nchexingamehe chojni nihi, para ixin tti chojni que nchao ttjenguijna icha chojni, co para ixin tti chojni que nchao tjagohe icha chojni para nchao nchehe na ça unido, co para ixin tti chojni que nichja neje palabra que ni jehe çhoha ttinxin.

29 ¿Apoco cain na joxon representanté Jesucristo na? O ¿apoco cain na dayé na joajné Dios? ¿Apoco cain na nttocoenhe na chojni de ixin Dios? O ¿apoco cain na nttoho na milagro?

30 O ¿apoco cain na chonda na joachaxin de nttoxingamehe na chojni nihi? ¿Apoco cain na nchao ndaçho neje na palabra que já n na ttinxinha na? ¿Apoco cain na nchao ndache na icha chojni quehe rroçho palabra mé? Claro que nahi.

31 Jaha ra nchehe ra de que sayehe ra de ngain Dios cain tti joachaxin icha jian. Pero janha tsjagoha ra iná cosa icha jian.

13

Quehe rroçho tti rinao chó chojni

1 Si janha nchao nichja cainxin nguigoehé chojni ngataha nontte co hasta nguigoehé cain ángel, pero si janha rinaoha cain chojni, janha çonhi rentte na masqui rrinichja, ixin mé inchin ná niroa que torancjan o inchin ná chia que nchechjian joxon ruido.

2 Si janha ndaçhjan tti joajna que janha dayá de ngain Dios, co si janha chonxin cainxin cosa que siconhe, co si janha nona canchesinxon cosa, co si janha anto jian ditticanho Cristo hasta nchao ttetoan jna para satsjixin jna de

ngain lugar que te jna, si janha nchao nttaha cain mé, pero si janha rinaoha cain chojni, janha xonhi rentte na.

³ Si janha tsonchjeyá chojni noa cainxin cosa que janha chonda nttihi ngataha nontte, co si janha sanjo hasta cuerpona para rroche ixin janha nichja joajné Jesucristo, pero si janha rinaoha cain chojni, xonhi xé cain tti janha jointtaha.

⁴ Tti chojni que rinao cain chojni chonda paciencia co nchehe cosa jian ngain icha chojni. Chojni mé jeha chjoehe, ni jeha puro nichja de ixin jeha mismo, ni jeha orgulloso.

⁵ Chojni mé jeha grosero ni ttjeha cosa jian para ixin jeho. Chojni mé toñaoha ni ttenchjianha coraje.

⁶ Chojni mé cheha de ixin tti jianha que nchehe icha chojni, jeha ché ngain tti ndoa.

⁷ Cainxin ttixinhi chojni mé de ngain icha chojni ixin jeha na cain tiempo xaxaon na jian de ixin cain chojni mé, co jeha na chonhe na para que chojni mé tsentoxinhi na vidé na ixin nchaoha tenchehe na, co chonda na paciencia para cain chojni mé.

⁸ Ján na chonda na que sonao na cain chojni para cainxin tiempo. Tsí tiempo que tti chojni que nichja joajné Dios que jeha dayé irrochondaha na que rronichja na, ni irronichjaha neje na tti palabra que ni jeha na ttinxinha na. Co ngain tiempo mé isondeha na que Dios sinchenohe na.

⁹ Jai ján na chonda na joachaxin para rrochonxin na, pero jeho nchion, co chojni jai tsjeha joajné Dios dayé.

¹⁰ Pero are tsí Jesucristo, cottimeja tti nchion que ján na chonxin na ndatsjexin ixin Dios sinttanoa na cain.

¹¹ Are janha xa nchín joarihi, janha vanichja co vaaxanho co vaquianxin inchin ná chjan. Pero are janha ocjoi ná xí, cointoa cain cosa que vaaxanho are nchín na.

¹² Xajeho jamé jai docon na cain cosé Dios inchin ngacjan ranontte, o inchin are choha doconxin na con na ngain ná espejo que xonhi xé. Pero cottimeja ján na socon na cain cosa claro. Jai janha chonxin jeho nchion, pero cottimeja janha rrochonxin cainxin inchin Dios chonxin na janha.

¹³ Jamé, jí ní cosa que ján na chonda na que sonttoho na para cain tiempo. Chonda na que sotticaon na Jesucristo, co chonda na que sotticaon na ixin seguro tsonhe cain tti ndacho Dios, co chonda na que sonao na cain chojni. Pero de canio cosa jiji jeho nacoa tti icha importante; jeho tti sonao na cain chojni.

14

Pablo ndacho ixin quehe rrocho tti nichja neje ni palabra que jeha ni ttinxinha ni

¹ Nchehe ra que rinao ra cain chojni, co xajeho tiempo danchia ra que Dios rrochjá ra cain clase de joachaxin, pero icha danchia ra tti joachaxin de rrodache ra chojni tti joajna que dayé ni que ttixin de ngain Dios.

² Tti chojni que nichja neje tti palabra que ni jeha ttinxinha, chojni mé nichja ngain Dios co jeha ngain chojni ixin xonhi chojni ttinxin tti jinichja chojni mé. Espíritu Santo tti nchenichja chojni mé, pero jeha nichja cosa jima que xonhi chojni ttinxin.

³ Co tti chojni que nichja tti joajna que jeha dayé que ttixin ngain Dios, jeha nichja ngain icha chojni para icha sitticaon na Jesucristo co para sinchianimá na co para que xonhi joachjaon tsa ansén na.

⁴ Tti chojni que nichja neje tti palabra que ni jehe ttinxinha, jamé jehe mismo icha ditticaon Jesucristo. Pero tti chojni que nichja tti joajna que jehe dayé que ttixin de ngain Dios, chojni mé icha ncheguitticaon cain chojni que ttinhi.

⁵ Janha rrojinaha que cain jaha ra rrochonda ra joachaxin de rronichja neje ra tti palabra que ni jaha ra ttinxinha ra. Pero are xatte ra ngain serviciao ra, janha icha rinaho que jaha ra rronichja ra tti joajna que dayehe ra que ttixin de ngain Dios. Ixin jamé icha tsjenguijna ra cain chojni, co rronichjaha ra tti palabra que xonhi chojni ttinxin. Pero si ná ra chonda ra joachaxin para rroundache ra chojni quehe rrocho palabra mé, nchao para rronichja ra palabra mé ixin cai mé tsjenguijna cain jaha ra.

⁶ Mexinxin si janha saso para sasotsjaha ra co rronichjaxin ra tti palabra que ni janha tsianxinha, xonhi xé para ixin jaha ra tti janha rronichja. Pero si janha rroundattjo ra claro tti ndachjenji na Dios, o sinttacoanha ra tti ndoa de ixin Dios, cottimeja ján, janha rrochjaha ra tti rrogondaha ra co tti ndoa sondaha ra.

⁷ Tsín na de ejemplo cosa que nchechjan són tti chondaha vida inchin ná flauta o ná arpa. Si chojni noeha danoa o dinga cosa mé, choha satsoan ni quehe són jinchechjan.

⁸ Co iná ejemplo de ngain guerra. Si clarín sanoaha xa claro ixin tseto xa, xonhi soldado rroxaxaon ixin tseto.

⁹ Xajeho jamé tonhe nganji jaha ra cai: si neje ra ndachoha palabra que nchao tsinxin ni, xonhi chojni tsinxin quehe tendacho ra.

¹⁰ Jáan, ndoa que jí tsje idioma ngoixin mundo, co palabré cada idioma mé chonda sentido.

¹¹ Pero si janha ttianxinha tti idioma que rronichjananxin icanxin chojni, janha inchin chojni de iná nación para ngain chojni mé, co cai jehe na inchin chojni de iná nación para nganji na janha.

¹² Mexinxin jaha ra que anto rinao ra sayehe ra joachaxin que ttixin de ngain Espiritu Santo, pero de cain yá, icha nchehe ra que dayehe ra tti joachaxin que tsjenguijna cain chojni que ditticaon Jesucristo.

¹³ Jamé cai, tti chojni que chonda joachaxin de nichja neje palabra que jehe ttinxinha, cai chonda que sanchia joachaxin ngain Dios para que Dios rrochjé jehe joachaxin de nchao tsinxin para rroundache icha chojni quehe rrocho palabra mé.

¹⁴ Si janha sinttacoanxian Dios conixin tti palabra que janha ttianxinha, jáan, ndoa que janha rrinichja conixin espirituna, pero ngain joarrixaonna rritianxinha quehe rrocho tti janha rrinichja.

¹⁵ ¿Quehe sinttaha janha remé? Chonda que jí tiempo que janha rronichja ngain Dios conixin espirituna pero cai chonda que jí tiempo que janha rronichja ngain Dios conixin joarrixaonna. Chonda que sinttacoanxin himno conixin espirituna, pero cai sinttacoanxin conixin joarrixaonna.

¹⁶ Ixin si ná chojni jinchecoanxinhi Dios jeho de ngain espiritue, masqui icha chojni tettinhi tti jehe jindacho, pero jehe na ttinxinha na tti jehe jindacho co mexinxin choha rronichja na ngain Dios junto conixin jehe ixin jehe na ttinxinha na palabra mé.

¹⁷ Masqui tti jehe ni nichja ni ngain Dios atto nchao jí, pero para icha chojni, nahi, ixin ttinxinha na tti jehe ni nichja ni.

¹⁸ Janha chjaha gracias ngain Dios ixin janha nichja neje palabra que janha ttianxinha icha tsje nttiha que cain jaha ra,

¹⁹ pero are ngain servicio, icha jian si janha nichja jeha naho palabra que chojni nchao tsinxin na, que rronichja dies mil palabra que xonhi chojni ttinxin.

²⁰ Hermanos, janha rinaho que rroaxaonha ra inchin chjan de cain cosa jiji. Jan, dintte ra inchin chjan que chonxinha cosa jianha, pero dintte ra inchin chojni yeye para xaxaon ra jian ngain cosa de Dios.

²¹ Ndacho ngain tti libro que jitaxin Palabr  Dios: "Janha rronichj  naci n m  ngain oj  nguigoa co de ixin tti chojni que tsixin de ngain oj  nontte, pero masqui jam , xa sincheha na na caso, ja n   ho Dios."

²² Jam  que tti joachaxin de rronichja neje ni palabra que ni jehe ni tsinxinha ni, m  sirve para n  seal para ixin tti chojni que ditticaonha Jesucristo, co jeha para ixin tti chojni que ditticaon Jesucristo. Pero tti joachaxin de rrondache ni chojni tti joajne Dios que jehe ni day  ni, m  sirve de seal para ixin tti chojni que ditticaon Jesucristo, co jeha para ixin tti chojni que ditticaonha Jesucristo.

²³ Mexinxin are n  chojni que ditticaonha Jesucristo o chonxinha quehe rro ho cain jiji siji ngain nihngo co tsinhi que jaha ra tenichja ra palabra que ni jaha ra ttinxinha ra, chojni m  daca rroaxaon que jaha ra ndadinttenga ra.

²⁴ Pero si ngain nihngo jaha ra tenda ho ra tti joajna que ttixin de ngain Dios que dayehe ra co rato m  sixinhi chojni que ditticaonha Jesucristo o tti chojni que xa ttinxinha jian de ixin Cristo, chojni m  sitticaon co satsoan ixin joinchehe jianha. Jehe jam  tsonohe are tsinhi tti jaha ra tenda ho ra.

²⁵ Jam  cain tti ji ngain ans n chojni m  tononxin, co jehe settoxin nttajochjiji para sinchesayehe Dios co rronda ho que ndoa ji Dios ngayaha ra.

Nchehe ra cain cosa inchin ditonha ra co inchin jiquininxin

²⁶ Mexinxin, hermanos, are rro atte ra para sinchecoanxinh  ra Dios, canxion ra rrotsje ra salmo, co icanxin ra sinchecoenhe ra chojni cosa de Dios, co icanxin ra rronda ho ra cosa que Dios jointtanoha ra, co icanxin ra rronichja neje ra palabra que ni jaha ra ttinxinha ra, co icanxin ra rronda ho ra ixin quehe rro ho tti palabra m . Pero janha rinaho que cain m  tsjenguijna chojni que ditticaon Jesucristo.

²⁷ Are rronichja neje ra palabra que ni jaha ra ttinxinha ra pero are m  rronichja jeha yoto ra, o hasta n  ra co rronichja ra nan  ra co nan  ra. Co ttoha de jaha ra chonda ra que rronda ho ra quehe rro ho tti nichja compa eroa ra.

²⁸ Pero si xonhi chojni nchao rronda ho ixin quehe rro ho tti palabra que rronichja ra, icha jian xonhi palabra m  rronichja ra ngain servicio, sino que cada ra rronichja ra jion ngain Dios para que xonhi chojni sinchetjanji ra.

²⁹ Jam  cai si para rronichja ra tti joajna que jaha ra dayehe ra que ttixin de ngain Dios, rronichja jeha y  o n  chojni, co icha ra tsinhi ra co rronda ho ra si ndoa joajna m  joixin de ngain Dios.

³⁰ Pero si rato m  Dios sinchenohe  honja cosa in  chojni que te nttiha, tti chojni que jinichja rato m  chonda que sattechoha tiempo para que rroxeha tiempo para ixin rronichja in  chojni.

³¹ Ja n  cain ra  o sayehe ra joajne Dios, saho rronichja n  ra cottimeja in  ra para que icha chojni tsanguu co soan na animado.

³² Tti chojni que nichja tti joajna que jehe day  que ttixin de ngain Dios chonda joachaxin para rrochonhe tsjexin rronichja n  na cottimeja jehe

³³ Ixin Dios jehe ncheꝑoxinha chojni que ttenchjianha respeto.

Jaha ra nchehe ra jian inchin nchehe chojni ngain icha nihngo.

³⁴ Ixin ngain ningoe Jesucristo, mé nchí chondaha ncha que rronichja ncha are ngain servicio ngain nihngo ixin jiquininxinha. Ixin chondaha nchí joachaxin para que jehe ncha tsetonha ncha ngain nihngo ixin jamé jitaxin ngain ley de Dios.

³⁵ Si jehe ncha rinao ncha tsonohe ncha ná cosa, chonda ncha que sanchianguilhi ncha xixihi ncha are ongain nchiandoha na ixin chjoinha dicen ni que ná nchí rronichja ncha are ngain servicio.

³⁶ Chonda que xaxaon ra que jeha jaha ra tti chojni que saho conohe palabré Dios, ni jeoha jaha ra tti chojni que vayé palabré Dios, mexinxin choha tti rrondaço jaha ra sinchehe icha chojni ngain nihngo.

³⁷ Si ttoha de jaha ra datsoan ra que chonda ra joachaxin para nichja ra joajna que dayehe ra que ttixin de ngain Dios o que chonda ra quexeho joachaxin de Espíritu Santo, pero chonda que satsoan ra que tti janha rricjinha ra Dios coettona.

³⁸ Pero si chojni que rronichja joajna mé ncheha caso jihi, cai jaha ra ncheha ra caso tti rrondaço chojni mé.

³⁹ Jañá, hermanos, nchehe ra de que Dios rrochjá ra joajné para nchao rrondache ra icha chojni, co cayacoenha ra tti chojni que rronichja neje palabra que ni jehe tsinxinha.

⁴⁰ Pero nchehe ra cain jihi inchin jiquininxin conixin respeto.

15

Pablo ndaço quehe rroço ixin Cristo xechon

¹ Janché, janha rinaho que rroxaxaon ra tti jian joajna que janha ndattjo ra. Joajna jihi tti jaha ra vitticaon ra, co tti jaha ra ditticaon ra hasta jai.

² Cai de ixin joajna jihi jaha ra chonda ra iná vida naroaxin que xonhi tiempo tsjexin si jaha ra sinchehe ra sigue tti jaha ra ditticaon ra, si vitticaon ra ndoa.

³ Saho, janha jointtacoanha ra tti janha vayá. Janha ndattjo ra que ixin Cristo venhe para cjoenga hna de ixin cain tti jianha que nttoho ná inchin ndaço ngain libro que jitaxin Palabré Dios.

⁴ Co janha ndattjo ra que cjoavá na Jesús co ninxin nchanho jehe xechon inchin jitaxin ngain Palabré Dios cai.

⁵ Co janha ndattjo ra que ixin jehe saho xago ngain Pedro, cottimeja ngain tti icha nirepresentanté jehe.

⁶ Co después ngain nacoa tiempo jehe xago ngain icha de naho ciento chojni que vitticaon jehe. Co tsje de chojni mé xa techon na jai, masqui ttoha na ondavenhe na.

⁷ Después, jehe xago ngain Jacobo, cottimeja ngain cain nirepresentanté jehe.

⁸ Co después de cainxin mé, xago nganji na janha cai masqui are mé janha joarihi inchin ná chjan que toncjihí xan are janné xan xaxaonha jan ixin tsoncjihí chjan mé.

⁹ Janha tti icha jeha importante na de cainxin nirepresentanté Jesucristo co ninchin jiquininxinha na para sinhi na representanté jehe ixin janha feo vanttaha ngain chojni que vitticaon jehe.

¹⁰ Pero jai janha ndoa representanté Jesucristo na ixin Dios jian nganji janha, co tti jehe joinchehe nganji janha jeha jamaoncoa ixin janha jointtaha

xa icha que cain icha nirepresentanté Jesucristo masqui jeha janha tti jointtaha, Dios tti joinchehe de ixin janha.

¹¹ Pero ndosennaha si janha tti icha jointtaha xa o jehe na, pero jiji tti joajna que janha na vayá na, co joajna jiji tti vitticaon ra jaha ra.

Quehe rrocho tti rroxechon chojni que ndadenhe

¹² Tti joajna que janha na ndattjo ra ndacho que Cristo xechon, mexinxin ¿quedonda ttohá de jaha ra ndacho ra que ixin tti chojni que ndadenhe irrocjanha na rroxechon na?

¹³ Si chojni que ndadenhe irroxechonha na, mexinxin ni Cristo xechonha.

¹⁴ Co si Cristo xechonha, rrocho xonhi xé tti joajna que janha na ndattjo ra remé. Co tti jaha ra ditticaon ra de ixin Jesucristo xonhi xé cai remé.

¹⁵ Si jamé, janha na rrocho chojni que nichja ndoaha de ixin Dios ixin ondachjan na que Dios joinchexechon Cristo are ndavenhe. Pero si jeha ndoa que ixin chojni que ndadenhe xechon na, mexinxin jeha ndoa que Dios joinchexechon Cristo are ndavenhe

¹⁶ ixin si nindadenhe ixechonha na, mexinxin cai Cristo xechonha are ndavenhe.

¹⁷ Co si Cristo xechonha are ndavenhe, tti jaha ra ditticaon ra de ixin jehe na xoinxon xé, co jaha ra xa teca ra cain cosa jianha que nchehe ra.

¹⁸ Co si jamé, cai cain chojni que vitticaon Cristo co ndavintteguenhe na ndavitján almé na.

¹⁹ Si ján na dotticaon na que Cristo jeho jian para ngain vida jiji, ján na tti chojni que icha feo tsonohe de cain chojni.

²⁰ Pero tti mero ndoa que ján, Cristo xechon are ndavenhe. Jehe tti saho xechon para que cain chojni que ndadenhe chonda que rroxechon na.

²¹ Ixin Adán vitticaonha Dios, cainxin chojni ngoixin mundo tequininxin ndasenhe na. Co ixin Jesucristo xechon are ndavenhe, jamé cai cain chojni jehe chonda que rroxechon na después de ndadenhe na.

²² Jamé inchin cain na ndadenhe na ixin ján na razé Adán na, cai cain na rroxechon na co rrochonda na iná vida naroaxin ixin ján na chojni Cristo na.

²³ Pero cada na inchin tequininxin na: Cristo tti saho xechon are ndavenhe. Cottimeja are Cristo tsí iná, cain chojni jehe rroxechon na.

²⁴ Cottimeja Cristo sinchexante cainxin joachaxin que jí nntihi ngataha nontte co ngajni co sinchegayé joachaxin mé ngain Dios Ndodá na

²⁵ ixin Cristo chonda que tsetonha hasta tsjeja cainxin chojni que ningaconhe jehe.

²⁶ Co tti última cosa que jehe ningaconhe, tti ndadenhe ni, cai mé chonda que rroxantte co ndasitján.

²⁷ Ixin Dios joanjo joachaxin ngain Cristo para que jehe ttetonhe cain cosa, pero are ndacho ngain Palabré Dios que Cristo ttetonhe cain cosa, mé rrochoha ixin ttetonha ngain Dios ixin Dios tti joanjo joachaxin ngain Cristo para que jehe ttetonha.

²⁸ Co are Cristo osacha de ngain cain tti ningaconhe, cottimeja jehe Cristo tti Xenhe Dios, rrocjan sanjo joachaxin que jehe vayé de ngain Dios para que jeha Dios tti tsetonha cain cosa. Ixin Dios tti joanjo joachaxin para que Cristo sacha.

²⁹ Si chojni que ndadenhe irroxechonha na ¿quedonda jí chojni que diguitte na en lugar de tti chojni que ndadenhe? ¿Quedonda nchehe na jañá si jehe na ditticaonha na que tsí nchanho que cain tti ndadenhe rroxechon?

³⁰ ¿Co quedonda cain tiempo ján na techonda na peligro?

³¹ Cain nchanho janha chonda peligro de ndasenhe na ixin nichja de ixin Jesucristo. Co jamé ndoa tti janha tonna, pero cai čhjoin tonona janha ixin jaha ra ditticaon ra Jesucristo, tti chonda cain joachaxin para ixin ján na.

³² Janha jointtadiscutí xí čhintto ngain ciudad de Efeso de ixin jehe palabré Dios, pero si rocji ndoa que chojni que ndadenhe irroxechonha na, janha irrochondaha que rrondačhjan palabra mé co rrochonda razón tti chojni que ndačo: “Sontte na co sonho na ixin ndoe o rejngui ondasenhe na.”

³³ Dittoaxinha ra sinttayaha ra na. Ndoa inchin ndačo dicho: “Chojni jianha nchetján chojni jian.”

³⁴ Jaha ra dintte ra ngain ná vida jian co nao; ncheha ra cosa jianha. Janha ndattjo ra jihí ixin nona que ttoha de jaha ra řa ditticaonha ra Dios. Janha ndattjo ra jańá para que rrochxonin ra joasoaxin.

Quexén rroxechon chojni que ndadenhe

³⁵ Pero puede čhonia chojni sanchiangui: “¿Quexén rroxechon chojni que ndadenhe? ¿Quehe clase de cuerpo rrochonda na?”

³⁶ Co mé ná pregunta que řonhi xé. Inchin are dinga ná semilla, semilla mé chonda que ndadenhe para que čhinhi ca.

³⁷ Tti dinga jeha ca ixin jeha ca tti čhintaon, jeha grano que dinga, mé tti čhintaon, sea trigo o iná semilla.

³⁸ Cottimeja Dios čhjé semilla mé forma que jehe rinao co cada semilla dayé cuerpoe inchin tequininxin.

³⁹ Jeha cainxin cuerpoe řaxeho. Cuerpoe chojni ojé clase, co cuerpoe coxigo ojé clase, cuerpoe conttoa iná clase, co cuerpoe copescado ojé clase.

⁴⁰ Jamé cai cuerpoe ángel ngajni ná clase co cuerpoe chojni ngataha nontte iná clase. Pero cuerpoe ángel chonda ná manera de čhjoin te co cuerpoe chojni chonda ojé manera de čhjoin te.

⁴¹ Tté nchanho icha je que tté conittjao, co cai icha jé tté conotse, co de cain conotse cai ojejé tté va.

⁴² Jamé tsonhe cai ngain tti rroxechon chojni que ndadenhe. Jehe řavá ná cuerpo que rrenga, co rroxechon iná cuerpo que isenha.

⁴³ Tti cuerpo que chonda na jai čhjoinha te ixin tonihi co ndadenhe, pero cuerpo que rroxechon anto čhjoin sehe ixin itsoniha co ni isenha. Cuerpo que chonda na jai tsangaha, pero cuerpo que rroxechon jehe soji.

⁴⁴ Are ndadenhe ni, řavá jeha cuerpo que jehe ni dayé ni de ngataha nontte, pero are rroxechon ni, sayé ni cuerpo de ngain Dios. Jí cuerpo de ngataha nontte, co cai jí cuerpo de ngajni.

⁴⁵ Ndačo ngain tti jitaxin Palabré Dios: “Tti saho xí cjoí Adán co jehe vehe tti saho chojni que vechonda vida”, pero ján na ndačo na ixin Cristo tti último Adán ixin jehe chonda espíritu que danjo vida.

⁴⁶ Pero jai ján na chondaha na cuerpo de ngajni; jai ján na chonda na cuerpo de ngataha nontte. Cottimeja rrochonda na cuerpo de ngajni.

⁴⁷ Tti saho xí conchjian xa de jinche, co jehe xa de ngataha nontte xa. Co Jesucristo inchin tti yoxin xí, pero jehe joixin de ngajni.

⁴⁸ Cada chojni chonda naná cuerpo inchin cuerpo que vechonda Adán que conchjian de jinche. Pero tti chojni que ditticaon ngain Jesucristo, chojni mé tsí nchanho que rrochonda na cuerpo inchin cuerpo que chonda Jesucristo ngajni.

⁴⁹ řaxeho jai ján na chonda na ná cuerpo inchin cuerpoe Adán, pero tsí nchanho que ján na rrochonda na cuerpo inchin cuerpoe Jesucristo.

⁵⁰ Janha rrindattjo ra que cuerpo de nntao co nntaloro tchoha sehe ngain lugar tti jittetonha Dios, ixin tti seha tonchjenhe tchoha sehe ngain tti tonchjenhe para cainxin tiempo.

⁵¹ Pero janha rinaho que jaha ra tsonoha ra ná cosa que xa noaha ra: Jeha cainxin na senhe na, pero ján, cainxin na sayé na ojé cuerpo.

⁵² Jihi tsonhe anto daca inchin are ttejé co danttjé con ni; tsonhe are tsinhi ni tti último tsoyao trompeta. Are mé cain chojni que vitticaon palabré Jesús co ondavenhe na, jehe na rroxechon na conixin iná cuerpo co ixonhi tiempo senhe na. Co xo xa sonttechon na are mé anto daca sitoxin cuerpoa na cai

⁵³ ixin cuerpoa na jai tonchjenha sé; co chonda que sitoxin para que nchao tonchjenhe conixin tti tonchjenhe para cainxin tiempo.

⁵⁴ Co are tsonhe jamé, cottimeja yá joiconhe tti ndačo ngain tti jitaxin Palabré Dios: “Tti ndadenhe ni ondaxantte ixin ojoacha tti danjo vida.”

⁵⁵ Co nntiha ndačo cai: “Muerte, ¿cja tti joachaxin que jaha joarichonda para vagoenxin cuerpona na? ¿cja tti jaha rrojacha?”

⁵⁶ Ixin tti jianha que nchehe ni, mé tti chjé joachaxin muerte para doen cuerpoe ni. Co ley que joanjo Dios ndačo que ixin jamé tsonhe.

⁵⁷ Pero chjé na gracias ngain Dios ixin jehe chjá na joachaxin para sacha na de ngain muerte ixin Jesucristo ojoacha.

⁵⁸ Mexinxin de cain jihi, cainxin tiempo dintte ra soji co nchehe ra icha co icha inchin coetonha Jesucristo ixin jaha ra onoha ra que tti xa que jaha ra tenchehe ra conixin Cristo jeha jamaoncoa.

16

QueXén joatsetaonhe chó na tomi

¹ Janhi sinchehe ra para satsetaonhe chó ra tomi para tsjenguijnanxin ra icha chojni que ditticaon Jesucristo, xajeho inchin tti ndattjan chojni ngain cainxin nihngo que te ngain nonttehe Galacia.

² Cain domingo cada jaha ra dantsjenda ra nchion tomi que dacha ra ngain cada semana co ttenchjinha ra tomi mé para que isatsetaonhe chó ra tomi are janha saso.

³ Co are janha saso, janha rrorroanha para Jerusalén tti chojni que jaha ra rrondačo ra, co janha rrochjaha na ná carta para que sicao na tomi que jaha ra joatse ra para ngain chojni que ditticaon Jesús nntiha.

⁴ Co si janha nchao tsji, cai tsji conixin jehe na.

Are xaxaon Pablo quecá lugar satsji

⁵ Ngain viajena chonda que satto nongain nonttehe Macedonia, cottimeja saso ngain ciudad de Corinto.

⁶ Puede nntiha tasarihi nganji ra nchion sé o puede hasta ngoixin tiempoe quin. Cottimeja jaha ra nchao tsjenguijna ni ra para ngain viajena tti janha chonda que satsji después.

⁷ Janha rinaoha jeha sattotaonxon nganji ra; janha rinaho sarihi ná tiempo nchion sé nganji ra si Dios rrochjana joachaxin.

⁸ Pero janha xa sarihi nntihi ngain ciudad de Efeso hasta ngain quiai de Pentecostés,

⁹ ixin janha chonda ná jian oportunidad ngain tiempo jihi para rrondatjan chojni co tsjagoa na de ixin Dios masqui te tsje chojni que jehe anto ningaconhe tti janha ndačhjan.

¹⁰ Si siji Timoteo nganji ra, nchehe ra que jehe sehe contento ngayaha ra ixin jehe nchehe xé Dios inchin janha.

¹¹ Mexinxin ni ná jaha ra nchedespreciaha ra are jehe siji nganji ra. Ttjenguijna ra para ngain viajé jehe para que jehe tsí contento sitsjena ixin janha rrichoan jehe conixin icanxin xicompañerona na.

¹² Co Apolos janha anto jointtatsán ñao para que rroguiji rroguitsjaha ra conixin icanxin chojni que ditticaon Jesucristo, pero jehe čhoja joiji jai. Jehe siji pero are jehe rrochondaja oportunidad.

Pablo joexin cjin carté co rroanha joajna

¹³ Dintte ra listo, co ditticaon ra jehó Cristo. Dintte ra inchin xí jian. Dintte ra soji.

¹⁴ Cain cosa que sinchehe ra, nchehe ra jian ixin jamé rročo que ján rinao ra cain chojni.

¹⁵ Co jai, hermanos, jaha ra noha ra que ixin Estéfanos conixin cain nindoha, jehe na tti nisaho vitticaon tti jian joajné Cristo ngain regioen Acaya. Co jehe na nitettjenguijna icha chojni que teditticaon palabré Cristo.

¹⁶ Janha rinaho que jaha ra ditticaon ra tti chojni que nchehe inchin jehe Estéfanos conixin nindoha co inchin tti chojni que nchehe xé Dios co inchin tti chojni que ttjenguijna icha chojni que ditticaon palabré Cristo.

¹⁷ Janha anto chahna ixin vicon joí Estéfanos, co Fortunato co Acaico. Jehe na nicjoenguijna na janha na ixin jaha ra čhoja cjoenguijna ni ra ixin vintteha ra nttihi.

¹⁸ Jehe na joincheanimá na na janha inchin joinchehe na nganji ra cai. Janha rinaho que cain chojni rronichja jian ngain chojni que nchehe inchin jehe na.

¹⁹ Cain chojni ngain nihngo de ngain regioen Asia rroanha na joajna para ixin jaha ra. Co Aquila, co Priscila, co cain chojni que xatte ngain nchiandoha na para servicio cai rroanha na tsje joajna para ixin jaha ra.

²⁰ Cai cain chojni que ditticaon Jesucristo nttihi ngain ciudad jiji rroanha na tsje joajna nganji jaha ra. Co cain jaha ra chjehe chó ra joajna jian are setan chó ra.

²¹ Janha, Pablo na, rrrroanha ra joajna jiji que cjinxin na conixin rana co letrana.

²² Si čhonja chojni rinaoha na Jesucristo, chojni mé te na condenado. Jesucristo, jaca sihi!

²³ Jesucristo sinchenchaon nganji ra.

²⁴ Janha rinaho de ngain ansenna cainxin jaha ra ixin cainxin na chojni Jesucristo na. Amén.

Yoxin Carta Que Dicjin Pablo Para Ixin Chojni Que Ditticaon Jesucristo Ngain Ciudad De Corinto

Pablo chjé joajna chojni ngain Corinto

¹ Janha Pablo na Dios joinao para que janha rrihi ná representanté Jesucristo. Janha conixin Tímoteo techjaha ra joajna jiji, jaha ra xo ditticaon ra Dios ngain ciudad de Corinto, co cai jaha ra xo ditticaon ra Dios que te ra ngoixin regioen Acaya.

² Dios Ndoá na co Jesucristo, tti chonda joachaxin para ixin ján na, sinchenchaon nganji ra co rrochjá ra tti çhjoin que tsonohe ansean ra.

Tti anto tangui que conhe Pablo

³ Ján na sonttocoanxinhí na Dios Ndoá Jesucristo ixin jehe Dios mé tti Ndoá na que ttiacoaná na co jehe Dios mé tti chjá na consuelo cainxin tiempo.

⁴ Dios chjana na janha na consuelo de cainxin tti tangui que tonna na para que janha na cai nchao sinttaconsolá na tti chojni que tangui tonhe conixin xajeho consuelo que chjana na Dios.

⁵ Jañá janha na anto tangui tonna na ixin ditticanho na Cristo, pero cai de ixin Cristo janha na dayé na anto tsje consuelo.

⁶ Mexinxin si janha na tangui tonna na o si Dios ncheconsolá na, mé para que jaha ra rrochonxin ra de ixin Dios co rrochondaha ra castigo de ixin tti jianha que joinchehe ra. Co jamé rrochonda ra paciencia para tsixinha ra are anto tangui tsonha ra inchin tetonna na janha na jai.

⁷ Co janha na chonda na seguro que xonhi jianha tsonha ra are setan ra tangui inchin janha na tedetan na jai ixin Dios tsjenguijna ra inchin jehe ttjenguijna cain chojni que ditticaon ngain.

⁸ Hermanos, janha na rinaho na que jaha ra tsonoha ra quejanhi problema joichonda na janha na ngain nonttehe Asia. Mé cjoí ná cosa anto tangui para ixin janha na, hasta que merocao rroquixinnaha na ngain problema mé. Co janha na oxaxanho na que ndarroguenxin na ntliha.

⁹ Janha na conona na que seguro narrogoenxon na na. Pero jiji conna na para que coangui na chonda na confianza jehó ngain Dios que nchexechon chojni, co chondaha na confianza ngain chojni ní nganji na janha na mismo sino que jehó ngain Dios.

¹⁰ Dios coanchjandaha janha na venhe na are mé, co xa jinda na jai; jehe tançhjandaha chojni que rinao nasoenxon na. Co chonda na cainxin confianza ngain jehe que jehe xa senda na de ngain chojni que ningaconna na,

¹¹ si jaha ra tsjenguijna ní ra ixin sinchetsenhe ra ñao Dios para ixin janha na. Co si tsje chojni sinchetsenhe na ñao Dios para ixin janha na, cai tsje chojni sanjo gracias ngain Dios de ixin tti jian que Dios sinchehe nganji na janha na.

Quedonda cjoiha Pablo ngain ciudad de Corinto

¹² Jí ná cosa que ansenna na çhjoin tonoho, co mé ixin janha na nona na que janha na jian tenttaha na ngataha nontte jiji, co cai nganji jaha ra. Dios

cjoenguijna na janha na para que tenttaha na jañá ixin jehe anto jian; jeha ixin janha na anto nona na.

¹³⁻¹⁴ Cain carta que janha na rroanha ra, xonhi icha cosa jitaxin nttiha jeho tti jaha ra nchao cjoao ra co coinxin ra. Jai te parte que jaha ra ocoinxin ra, pero janha rinaho que tsinxin ra jian cain parte para que ngain nchanho are tsí Jesucristo jaha ra nchao tsonohe ansean ra chjoin de ixin janha na, inchin janha na chjoin tsonohe ansenna na de ixin jaha ra.

¹⁵ Janha chonda confianza de ixin cain jihi, mexinxin janha joiŋaxanho saho rrogaso nganji ra para rrogasotsjaha ra para que jaha ra chjoin rroconoha ra ixin janha rrogasotsjaha ra yó nttiha.

¹⁶ Janha joiŋaxanho rrogatto noyá para rrogasotsjaha ra are janha sacjoi para regioen Macedonia, co después are janha rrocjanxin na de nttiha rrogaso para rrogasotsjaha ra iná. Co jamé jaha ra rrochonda ra oportunidad de rrocjenguijna ni ra de ixin tti rrogondana ngain viajena para regioen Judea.

¹⁷ Puede jaha ra xaxaon ra que janha jointtachjianha medidana jian are janha joiŋaxanho rrojinttaha jihi. O puede xaxaon ra que janha inchin tti chojni que ndacho de ngain rroha “ján” co de ngain ansén “nahi”.

¹⁸ Dios nohe jian que janha na jeha jamé na.

¹⁹ Silvano, co Timoteo co janha ndattjo ra de ixin Jesucristo tti Xenhe Dios. Co Jesucristo jeha inchin tti chojni que ndacho jamé; Jesucristo cainxin tiempo nchehe cain tti jian que jehe ndacho.

²⁰ Co de ngain jehe toexin cainxin tti jian que ndacho Dios. Mexinxin are nttocoanxinhí na Dios, ndacho na “Amén” que rrocho jamé tsonhe, co ndacho na jañá ngain Dios por ixin Jesucristo.

²¹ Co Dios, mé tti nchesoji na conixin jaha ra para que dontte na inchin nacoa chojni ngain Cristo, co jehe tti jointtaroa na ngattoxon con jehe.

²² Co jehe cjoago ixin ján na chojni jehe ixin jehe coín Espíritu Santo ngain ansean na co mé rrocho ixin anto seguro que jehe rrochjá na anto tsje icha cosa jian cai ngain tiempo que tsí.

²³ Pero xa dasoha Corinto ixin rinaoha sinttasattaha ra porque janha anto rinaho ra co janha tsín Dios de testigona co jehe nchao santsjena vidana si ndoaha tti janha rrindattjo ra.

²⁴ Jeha ixin janha na rinaho na tsetonha ra de ngain tti ditticaon ra. Nahi. Jeha mé ixin jaha ra oditticaon ra jian ngain Cristo. Janha na jeho rinaho na tsjenguijna ra para que rrochaha ra icha co xonhi joachjaon sehe ngain ansean ra.

2

¹ Mexinxin janha joiŋaxanho ijoasoha joasochjaha ra joachjaon.

² Ixin si janha rrochjaha ra joachjaon jaha ra, cottimeja xonhi ngain chojni tti rrochananxin janha ixin jaha ra irrochoha ra tsjenguijna ni ra para rrochahna ixin janha ochjaha ra joachjaon.

³ Mexinxin janha cjinha ra cartana icha saho para que jaha ra tsentoxinhí ra vidá ra ixin rinaoha saso sinttasattaha ra co rrochjaha ra joachjaon. Icha jian si are janha sasotsjaha ra janha rrochahna nganji ra. Janha chonda seguro que are chahna janha, cain jaha ra chaha ra cai.

⁴ Are janha cjinha ra carta mé, anto coá joachjaon que hasta tsjanga; co conona que ndavichjenga ansenna are janha cjinha ra carta mé. Pero jeha cjinha ra carta mé para que jaha ra sinttechinhi ra, jeho para que janha cjoagoha ra que anto rinaho ra.

Quexén sitjañehe tti chojni que joinchehe jianha

⁵ Pero si chonja chojni joinchehe jianha co jidanko joachjaon, chojni mé jeoha janha jichjana joachjaon, cai cain jaha ra jichjá ra nchion joachjaon. Janha ndachjan que jichjá ra nchion joachjaon para rrondachjanha icha soji nganji ra.

⁶ Tti castigo que jaha ra chjehe ra chojni mé, conixin jeho mé ichondaha ra que rrochjehe ra icha castigo.

⁷ Jai onchao, nchetjañehe ra chojni mé, co dantsjehe ra joachjaon ngain ansén ixin si nahi, puede jehe isitticaonha Jesucristo.

⁸ Mexinxin janha rrinttatsanha ñao ra que tjagohe ra chojni mé que jaha ra ján rinao ra jehe.

⁹ Janha rroanha carta mé nganji ra de ixin asunto jihi para rroconona aco ndoa teditticaon ni ra.

¹⁰ Co si jaha ra sinchetjañehe ra chojni mé, cai janha sinttatañaá jehe. Si ndoa jehe joinchehe jianha nganji na janha, janha jointtatjañaá jehe ixin janha anto rinaho jaha ra. Co janha jointtatjañaá chojni mé ngattoxon con Jesucristo,

¹¹ para que Satanás tsixinha sinttayá na, ixin ján na chonxin na jian quexén jehe rinao sincheyehe chojni.

Pablo veva contento ngain ciudad de Troas

¹² Are janha joaso ngain ciudad de Troas para joindattjan chojni joajné Jesucristo, are mé janha joarichonda anto jie oportunidad para ndattjan chojni joajna mé.

¹³ Pero ansenna veva contento ixin janha vittjaha Tito. Mexinxin janha sacjixin de nttiha co sacjoi para regioen Macedonia.

Pablo joinchenohe chojni quexén sacha ni are ditticaon ni ngain Jesucristo

¹⁴ Pero janha chjaha gracias ngain Dios ixin cain tiempo jehe ttjenguijna na para dacha na ngain cosa jianha. Co de ixin janha na, Dios ndache tsje chojni joajné Jesucristo. Co joajna mé inchin tsjoca que toncañajni cain lugar.

¹⁵ Ixin janha na inchin tti tsjoca que Cristo tjaga para ixin Dios. Co tti ñajni mé ttji para ngain tti chojni que ditticaon co para ngain chojni que sitján almé.

¹⁶ Para ixin tti chojni que sitján almé, tti chjoin ñajni jihi, anto feo ña para ixin jehe na inchin ná cosa que ndadoen chojni. Pero para ixin tti chojni que chonda vida naroaxin, para ixin jehe na, cosa que chjoin ñajni jihi inchin ná cosa que danjo vida ngain na. Co si Dios tsjenguijnaha chojni, jehe na choha rronichja na joajna jihi.

¹⁷ Janha na jaha rrintdattjan na chojni joajné Dios para sachaxin na tomi. Janha na ttentoxinha na joajné Dios inchin nchehe icha chojni. Janha na jaha jamé nttaha na. Janha na ngattoxon con Dios ndattjan na chojni joajna jihi ixin janha na ninchehe xé Jesucristo co chojni Dios que jehe rroanha.

3

Tti ndacho joajné trato naroaxin

¹ Are janha na ndachjan na jihi, ¿aaxaxaon ra que janha na cjan na tendačjan na iná ixin janha na anto jian na? ¿O apoco rinao ra que janha na tsjagoha ra ná carta de recomendación que ixin andoa ditticanho na Cristo? O ¿ani rrogondana na que jaha ra rrochjana ra ná carta de recomendación para sacjinha na?

² Nahi, janha na jeha jamé sinttaha na ixin jaha ra mismo inchin tti carta de recomendación que janha na rrogondana na, ixin cain chojni que dicen que jaha ra ocoentoxinhi ra vidá ra, chojni mé tti rrondaçho que ixin ján jian tti janha na tenttaha na nganji ra, co mé tti rroçho que jaha ra inchin ná carta de recomendación para ixin janha na.

³ Jaha ra tti inchin carté Cristo que janha na cjin na ixin janha na joittacoanha ra palabré jehe co jai ditticaon ra jehe. Jaha ra ná carta que conchjianha conixin ndajni, sino conixin Espíritu Santo de Dios que jichon. Jaha ra jeha ná carta que vetaxin nganito ná ðo inchin tti Diez Mandamiento, sino que vetaxin ngain ansén chojni.

⁴ Janha na chonda na seguro de cain tti nichja na jihi, porque chonda na confianza ngain Dios por ixin Jesucristo.

⁵ Jeha ixin janho na chonda na joachaxin para sinttaha na ná cosa jian. Nahi, jeha jamé ixin cain tti nchao que janha na nttaha na ttixin de ngain Dios.

⁶ Jehe chjana na joachaxin para que janha na nichja na joajné Jesucristo, co joajna mé tti trato naroaxin. Co jehe trato naroaxin mé chjá na vida naroaxin ixin Espíritu Santo jí ngain ansean na. Tti saho trato que Dios chjé Moisés, mé vaganjoha vida naroaxin ixin trato mé jeho tjagoa na ixin anto jianha na co tequininxin na ndasenne na.

⁷ Jehe ley de trato que Dios chjé Moisés jihi vetaxin nganito yó tabla de ðo. Co are Moisés vayé ley mé, joí ná chíxo anto soji ngá con Moisés que chojni Israel are mé çhoha tsjehe na ngá con jehe ixin anto jitonguixian ngá con. Pero masqui jamé, jehe chíxo mé yayao ndavanga. Pero si anto çhjoin joí ley mé, co jeho cjoago que jiquininxin ndasenne ni,

⁸ mexinxin joajné Jesucristo que ttiaoa na na Espíritu Santo anto icha çhjoin.

⁹ Si ley mé anto çhjoin joí co jeho joicjago que janha na tequininxin na ndasenne na, mexinxin joajna que ndaçho ixin ixonhi jianha teca na anto icha çhjoin joajna que ley mé.

¹⁰ Ixin tti ley are saho anto çhjoin joí ley mé, pero jai merocoa ixonhi rentte ley mé ixin jai anto icha çhjoin co icha rentte tti joajna que danjo vida naroaxin.

¹¹ Mexinxin si anto çhjoin joí tti ley que conçhjenha sé tiempo, seguro anto icha çhjoin co rentte tti joajna que çonhi tiempo tsjexin.

¹² Janha na chonda na seguro que joajna jihi çonhi tiempo tsjexin, mexinxin janha na ndattjan na icha chojni conixin anto tsje confianza.

¹³ Janha na çonhi tiempo nttaha na inchin joinchehe Moisés ixin jehe vacjanotaon ngá con conixin ná manta para que chojni Israel rroguiconha na queçén ndajoexin chíxo mé ixin chíxo mé deporsín seha rroconçhjenhe.

¹⁴ Pero jehe na vaquinxinha na queçén Dios rinao tsjenguijna na. Co hasta jai chojni Israel ça çhoha ttinxin na jihi ixin are jehe na tsjehe na ngain tti jitaxin ley que vayé Moisés çajeho inchin jicayaoen joarrixaoen na tti manta que cjoanotaon con Moisés. Co jehe manta mé tti tançhchandaha na para ttinxin na. Co çonhi chojni nchao sinttjian manta mé, jeho Jesucristo.

¹⁵ Hasta ngain tiempo jai, are jehe na tsjehe na libroe Moisés, çá ná manta cayaoen joarrixaoen na para ttinxinha na.

¹⁶ Pero are ná chojni ditticaon jehe, tti chonda cain joachaxin, are mé manta ndadaçhehe manta de ngain joarrixaoen chojni mé.

¹⁷ Co Dios, jehe tti Espíritu Santo. Co si Espíritu Santo que rroanha Dios jí ngain ansean na, joarrixaoan na chonda libertad para tsinxin na de ixin Dios.

¹⁸ Mexinxin cain ján na ixin teʒanotaonha con na conixin manta, ján na te na inchin ná espejo ixin icha chojni nchao sicon de ixin ján na ixin Dios anto jian. Co ján na sontte na icha co icha jian inchin Cristo ixin chonda na icha co icha joachaxín jehe. Cain jiji nchehe jehe tti Espíritu Santo de Dios.

4

¹ Mexinxin janha na ʒonhi tiempo soan na desanimado ixin Dios tti coiaconoana na, jehe chjana na ʒa jiji de rronichja na palabré jehe.

² Janha na ningacoan na cain cosa que nchehe ni jimao, co cain cosa de joasoaxin, janha na ʒonhi chojni nttayá na ni ttentoxinha na Palabré Dios. Sino que janha na ndačhjan na jecho tti ndoa, co jamé icha chojni nchao rrochxonin na que janha na tjagoa na na jehe tti ndoa co cain tti nttaha na, nttaha na ngattoxon con Dios.

³ Pero si te chojni que ttinxinha tti jian joajna que janha na ndačhjan na, jecho ixin chojni mé ndateditján almé na para cainxin tiempo.

⁴ Jehe na ditticaonha na ngain Cristo, mexinxin inchínji chonda joachaxin ngain na, co jehe tti jicayacoen joarrixaoen na. Mexinxin ttinxinha na tti anto jian joajné Jesucristo co jehe Jesús, mé tti jói ngataha nontte co jehe mero Dios.

⁵ Are janha na ndačhjan na de ixin joajna jiji, jecha ndačhjan na de ixin janho na, sino que janha na ndačhjan na de ixin Jesucristo que jehe tti chonda cain joachaxin, co nttanoha ra ixin janha na jecho inchin ninchehe ʒa nganji ra ixin janha na rinaho na Jesucristo.

⁶ Are Dios joinchekhjian mundo jiji, jehe tti coetonha para vehe ʒohi que joinchengasán ngain tti naxin xehe que vehe are saho. Co jamé Dios tti joinchengasán ngain ansean na para que de ixin joadingasán mé Cristo nttanao na ixin Dios anto jian.

Are chonda na confianza ngain Jesucristo, ján na chonda na vida naroaxin

⁷ Co tti jointtanao na Cristo, mé anto rentte inchin ná tesoro ngain cuerpoa na, masqui cuerpoa na tehe sojiha inchin chi de barro. Jamé para que rroʒago que joachaxin que jí ngain cuerpoa na, mé joachaxín Dios co jecha joachaxian na ján na.

⁸ Mexinxin masqui janha na chonda na anto tsje problema, pero ʒonhi tiempo sinttechinhi na ixin Dios tjenguijna na. Co masqui chonda na joachjaon, pero ʒonhi tiempo rinaho na ttinttoa na de tti ditticanho na.

⁹ Co masqui chojni feo nchehe na nganji na, pero ʒonhi tiempo te na janho na ixin Dios jí nganji na. Co masqui chojni doen na, pero nadoenxonha na na.

¹⁰ Cain lugar tti janha na čhji na, ʒaxanho na que puede icha chojni nasoenxon na na ixin janha na ndattjan na chojni tti jian joajné Jesucristo. Pero janha na rroʒaonha na ixin jamé jehe na nchao sicon na que janha na chonda na vida naroaxin que danjo Jesucristo.

¹¹ Cada nchanho que janha na ʒa techon na, chonda na peligro de senhe na ixin ndattjan na chojni joajné Jesucristo. Pero mé tjago ixin Jesucristo jí nganji na janha na cada nchanho.

¹² Mexinxin janha na cainxin tiempo jí en peligro vidana na ixin nichja na joajné Jesucristo, pero jaha ra ovayehe ra vida naroaxin ixin janha na ndattjo ra joajna mé.

¹³ Ngain tti jitaxin Palabré Dios ndačo: “Janha vitticanho co mexinxin nichjaxin.” Jamé janha na cai, ditticanho na, mexinxin nichjaxin na jai,

¹⁴ ixin nona na que Dios joinchexecheon Jesús are ndavenhe, co jehe Dios mé sinchexecheon na janha na para sinttechon na conixin Jesús. Co janha na conixin cain jaha ra cai, satsjiho na ngain lugar tti ttjen jehe.

¹⁵ Cain cosa tangui que tonna na jihi, mé jian para ixin jaha ra ixin are icha co icha chojni sayé tti jian de ngain Dios, jamé cai sintte icha tsje chojni que sanjo gracias ngain Dios para que jehe tsosayehe.

¹⁶ Mexinxin janha na xonhi tiempo doan na desanimado. Masqui cuerpona na ndatettjexin, pero espirituna na icha tetosoji cada nchanho.

¹⁷ Ixin cain tti tangui que tonhe ni ngain vida jihi, seha tončjenhe, toin datto co jamé tonhe ni para que Dios rrochjé ni ná vida que xonhi tiempo tsjexin co vida mé anto icha jian que iná vida.

¹⁸ Janha na tsjianha na cuidado de ngain cosa que nchao dicen ni; sino que janha na tsjinha na cuidado de ngain cosa que čhoaha dicen ni ixin cain cosa que nchao dicen ni, mé toin ndattjexin, pero cain cosa que čhoaha dicen ni, mé xonhi tiempo tsjexin.

5

¹ Ján na noa na que are ndasenhe na, cuerpoa na ndarroxante ixin cuerpoa na inchin ná nchia que tončjenha sé. Pero Dios rochjá na iná cuerpoa na que jehe jittenchjianha ngajni para ixin ján na, co cuerpo mé xonhi tiempo tsjexin. Co cuerpo mé inchin ná nchia que conchjianxinha de rá chojni.

² Ján ndoa jaxon que xa techon na ngain cuerpo tehe, techín na ixin orinao na rrochonda na tti cuerpo de ngajni,

³ ixin cuerpo mé sonttengá na inchin lonttoa na para que tsottolochoha na.

⁴ Jaxon que xa techon na ngain cuerpoa na tehe que inchin ná nchia ngataha nontte ntthi, ján na tonoa na feo co donttechín na. Pero jeha ixin ján na orinao na sačhjexin na de ngain cuerpoa na tehe. Tti ján na rinao na na que orrochonda na tti cuerpo de ngajni para que isenha na.

⁵ Co Dios tti ndačo ixin jańá tsoan na. Co jehe chjá na Espíritu Santo jai para ná seguridá que jehe rrochjá na anto tsje icha cosa jian.

⁶ Mexinxin janha na cainxin tiempo chonda na confianza co xaonha na de ndasenhe na. Nona na que jaxon que xa techon na ngain cuerpona na tehe janha na xa teha na ngajni tti jí Jesucristo.

⁷ Pero masqui jamé, janha na sinttaha na sigue ngain xa que chjana na Dios ixin chonda na confianza ngain, co jeha ixin nchao dicen na jaxon tti rrochjana na Dios.

⁸ Pero xaonha na de ndasenhe na ixin icha rinaho na ndasenhe na para sačhjexin na de ngain cuerpo que chonda na jai para nchao sasiguintte na ngain Jesucristo.

⁹ Mexinxin cain tiempo rinaho na nttaha na jeho tti ncheoxoxinhi Jesús, sea que te na ngain cuerpona na jai o masqui are sintte na ngajni.

¹⁰ Ixin cainxin na chonda na que tsonchienne na ngattoxon con Jesucristo para que cada na sayé na inchin jiquininxin si jointtoho na jian o si jointtoho

na jianha cain tti ján na tenttoho na jai que xa techon na ngataha nontte nttihi.

Quexén sintte chojni de acuerdo

¹¹ Ixin janha na nona na que Jesucristo sinchejuzguehe cain chojni, mexinxin ttingaria na ndattjan na chojni que sittoexin na sitticaon na tti jehe coetonha. Pero Dios onohe quexén janha na tonona na ngain ansenna na, co janha rinaho que jaha ra tsonoha ra jamé cai de ixin janha na.

¹² Janha na tecjanha na tenichja na jian de ixin janho na, sino que janha na techjaha na jaha ra ná oportunidad de çhjoin tsonoha ra nganji na para que nchao rrochonxin ra quehe rrondache ra tti chojni que anto orguloso de ixin tti nchehe na en lugar de tti jí ngain ansén.

¹³ Jí nttiha are chojni ndaço na ixin janha na ndadixenga na are ttinhi na nichja na de ixin Dios, pero Dios jamé rinao que janha na sinttaha na. Co are jehe na ndaço na que ixin janha na jian te joarrixaonna na, mé jian para ixin jaha ra.

¹⁴ Jesucristo jehe anto rinao na cainxin na, mexinxin janha na chonda na que ndattjan na chojni de ixin jehe. Co janha na chonda na seguro de que Jesucristo ndavenhe para que cjoenga hna tti jianha que joinchehe cainxin chojni, co mexinxin cainxin tti jianha que gontteca na, jai itecaha na.

¹⁵ Cristo ndavenhe para cjoenga hna tti jianha que joinchehe cainxin chojni para que jai chojni que xa techon isincheha na inchin rinao na jeha na, sino que sinchehe na inchin rinao Cristo ixin jehe ndavenhe co xechon para jittjengujna cain jehe na.

¹⁶ Tti chojni que ditticaonha Jesucristo xaxaon na ixin icha chojni çhjoin vidé chonda sí jehe importante o si jehe chonda tsje tomi. Janha na ixaxaonha na jamé. Ndoa vehe ná tiempo que janha na cai vaçaxanho na de ixin Cristo inchin xaxaon chojni nttihi ngataha nontte, pero jai janha na ixaxaonha na jamé de ixin jehe.

¹⁷ Jamé are ná chojni ditticaon Jesucristo, chojni mé oná chojni naroaxin ixin cain cosa jianha que jehe vanchehe incheha; jai cain cosa que jehe nchehe onaroaxin cainxin.

¹⁸ Cain jihi nchehe Dios. De ixin Jesucristo Dios joinchehe para que ján na sontte na chojni jian ngattoxon con jehe, co cai coetonna na que rrondattjan na icha chojni de ixin Cristo para que jehe na cai sintte na chojni jian ngattoxon con Dios.

¹⁹ Rroço que de ixin Jesucristo Dios joanjo oportunidad ngain chojni ndaxin mundo de que sintte na chojni jian ngattoxon con jehe. Dios ndajoinchetjañehe cain tti jianha que jehe na joinchehe na. Co jihi tti joajna que jehe coetonna na para rrondattjan na icha chojni.

²⁰ Mexinxin janha na tti joiquinha na joajné Jesucristo nganji ra. Dios jinchegonda na janha na para que de janha na jehe jinichja nganji ra. Mexinxin de ixin nombré Jesucristo, janha na nttatsanha ñao ra que ditticaon ra jehe para que jaha ra sintte ra chojni jian ngattoxon con Dios.

²¹ Jesucristo ni ná cosa jianha joincheha; pero por ixin ján na Dios rroanha jehe ngataha nontte para joiguenxin nttihi vetan tanguí inchin chojni que nchehe tsje cosa jianha, para que ján na are odotticaon na Cristo, Dios ndaço ixin ján na jian na inchin jehe jianxin.

6

¹ Mexinxin ixin janha na compañeroa ra de ngain xé Dios, nttatsanha ñao ra que nchegonda ra cain tti jian que Dios danjo nganji ra.

² Ixin jehe dindatho ngain tti libro que jitaxin Palabré jehe:

Ngain ná tiempo que jian para ixin jaha ra, janha coian tti jaha ra tedanchia ra;

janha tsjenguijna jaha ra ngain tti tiempo que janha sanjo iná vida naroaxin ngain chojni que ditticaon na.

Co jai jehe mero tti tiempo jian para ixin jaha ra co jai jehe mero tti tiempo que Díos danjo vida naroaxin.

³ Janha na rinaoha na sinttaha na ni ná cosa que chojni ndačo ixin jianha, para que xonhi chojni rronichja jianha de ixin xa que janha na tenttaha na.

⁴ Sino que janha na rinaho na sinttaha na joxon jian para que cain chojni sicon na que janha na ndoa ninchehe xé Díos ixin janha na anto chonda na paciencia are anto detan na tangui co are chondaha na tti dondana na co are icha chojni feo nchehe na nganji na,

⁵ ixin goen na na co coiaxinna na na. Co cai chonda na paciencia are chojni ningaonna na co vacoyaotte na na. Co janha na anto soji jointtaha na xa co vehe ttie que ni vaguintečinha na co vehe tiempo que vaguenhe na jinta.

⁶ Cain mé ttixinna na para que chojni dicon na que janha na ndoa ninchehe xa na de Díos. Mexinxin janha na jian chojni na ngain vidana na, chonxin na tti ndoa, chonda na paciencia, nttaha na jian ngain chojni, co Espíritu Santo jí nganji na, co janha na ján ndoa rinaho na cain chojni,

⁷ ndačhjan na tti joajna ndoa que joixin de ngain Díos co joachaxín Díos jí nganji na. Co janha na nttagonda na cosa jian que chjana na Díos, mé inchin ná morona para ttetoquianxin na tti jianha, co cosa jian mé cai inchin ná escudo que janha na čhjinha na para cayacoanxin na tti jianha.

⁸ Jí rato que chojni nchesayana na co jí rato que chojni feo nichja na nganji na. Jí rato que chojni nichja jian de ixin janha na, co jí rato que jehe na nichja na jianha de ixin janha na. Jí nchanho chojni ndačo na que ixin janha na jaha chojni que nichja tti ndoa, co jí nchanho ndačo na que ixin janha na tti chojni que nichja na tti ndoa.

⁹ Jí nchanho nchehe na nganji na inchin chojni que jehe na chonxinha na, co jí nchanho nchehe na nganji na inchin chojni que jehe na anto jian chonxin na. Co jí nchanho que janha na anto tangui tonna na que hasta merocoa nasenxon na, pero masqui jamé janha na xa techon na. Janha na tangui conna na ngain chojni pero nadoenixhao na na.

¹⁰ Masqui jí rato que janha na dinttečinhi na, pero cainxin nchanho janha na chahna na ngain xé Jesucristo. Co masqui janha na xonhi tomi chonda na, pero tti joajna que janha na ndattjan na icha chojni, mé tti icha rentte para ngain almé na. Co masqui xonhi cosa anto rentte chonda na ntłhi ngataha nontte, pero janha na chonda na tti icha rentte que joixin de ngain Díos.

¹¹ Jaha ra de ngain ciudad de Corinto, ndattjo ra cainxin tti janha na tonona na, ixin janha na anto rinaho na cainxin jaha ra.

¹² Janha na ixonhi cosa jichjian ngain ansenna na que rrondattjo ra; jaha ra tti xa techonda ra tsje tti rrondachjenji ni ra.

¹³ Janha rrinttatsanha ñao ra inchin ná ndodaha que nchetsenhe ndo ñao xenhe ndo, rinao ni ra conixin ansean ra inchin janha rinaho jaha ra.

Ján na tti ningoe Díos que jichon

¹⁴ Chondaha ra confianza ngain chojni que ditticaonha Jesucristo, ni nchechjianha ra nčičihiha ra o xixiha ra chojni mé ixin si jaha ra tsato ra chojni mé, jaha ra tsonha ra inchin ná yunta que dinttjianha ningue

nataonxin. Ixin cosa jian čhoha sehe ngain cosa jianha. Co joadingasán čhoha sehe compañeroe tti naxin xehe.

¹⁵ Ixin Satanás čhoha sinchehe inchin rinao Cristo, ni Cristo čhoha sinchehe inchin rinao Satanás. Co cai ná chojni que ditticaon Cristo čhoha sinchehe inchin rinao ná chojni que ditticaonha Cristo.

¹⁶ Cai, ningoe Dios conixin ídolo teha de acuerdo. Co jaha ra mero tti ningoe Dios que jichon, inchin ndačo Dios:

Janha sarihi ngaxinhí ansén na co tti sacji na, nttiha sacjinha na;
janha tti sarihi Dios de jehe na,
co jehe na nisoan chojnina.

¹⁷ Mexinxin cai ndačo Dios:

Dačhjeixin ra de ngayehe jehe na, co dačhjenda ra;
dintteha ra compañeroe jehe chojni jianha.
Para que janha nchao sayaha jaha ra

¹⁸ co janha sarihi ná Ndogaha para ixin jaha ra,
co jaha ra soan ra xanhna,
jańá čho Dios que chonda cainxin joachaxin.

7

¹ Jańá hermanos, cain yá tti ndačo Dios sinchehe nganji na. Mexinxin ján na cain tiempo tsjiho na cuidado de sonttoha na cosa que nchejianha cuerpoe ni co tti nchejianha espirítue ni. Co ixin ján na čxaon na ngain Dios, mexinxin ján na sonttoho na joxon jian para que sontte na chojni jian para ixin jehe.

Quečén coentoxinhí chojni Corinto vidé na

² Nttatsanha na ñao ra, rinao ni ra de ngain ansean ra ixin janha na čxonhi cosa jianha jointtaha na nganji ra ni ná ra, ni jointtagačhoeha na ni ná jaha ra, co ni jointtayaha ra ni ná ra.

³ Janha rrindačhjan cain jihi pero jeha para rrinttasattaha ra ixin janha ondattjo ra que janha anto rinaho cain jaha ra de ngain ansenna para que masqui ndasénhe na o čxa sonttechon na pero sontte na inchin nacóa chojni ngattoxon con Dios.

⁴ Janha anto chonda confianza nganji ra, co anto chahna nganji ra. Masqui tsje cosa tangui tonna na pero are janha čaxanho jaha ra, janha anto chahna co čxaonha na ngain tti tangui que tonna na.

⁵ Desde que joaso na ngain regioen Macedonia, janha na vintteha na contento ixin anto tsje cosa tangui conná na co tsje chojni coetoquinha na, co anto cóa na joachjaon de ixin quečén sinttaha na sigue čxa que janha na chonda na.

⁶ Pero Dios tti ncheanimá cain chojni que techín, jehe mé tti joincheanimá janha na are joiji Tito nganji na.

⁷ Co jeoha ixin Tito joiji nganji na, cai ixin jaha ra anto dincheanimá ra jehe. Co jehe ndachjenji na que jaha ra anto rinao ra sicon ni ra janha na, co coequinna na ixin jaha ra anto techinhí ra de ixin tti jaha ra vitticaonha ni ra janha na, co cai ixin jaha ra anto rinao ra tsjenguijna ni ra janha. Are janha coian cain jihi, janha anto icha chahna.

⁸ Masqui vinttechinhí ra are tsjehe ra tti cartana que janha orroanha ra, janha taha joachjaon de ixin tti janha cjin na ngain carta mé. Ndoa, janha cóa joachjaon are saho de ixin tti ndattjo ra ngain carta mé,

⁹ pero jai janha chahna. Pero jeha chahna ixin jaha ra vinttechinhí ra, sino que de ixin tti jaha ra vinttechinhí ra, mé tti coentoxinhí vidá ra. Jaha ra

coixinha ra ngain joachjaon mé inchin joinao Dios, mexinxin tti janha na cjin na nganji ra jehe jian co nahi jianha.

¹⁰ Ixin are Dios nchehe ná cosa para que ján na donttechín na, jehe jamé nchehe nganji na para que ján na ttentoxinhi na vidá na, co mé rrocho tsjenguijna na para que ján na rrochonda na iná vida naroaxin, mexinxin ján na chondaha na que tsá na joachjaon are donttechín na. Pero tti dinttechinxin tti chojni que ditticaonha Cristo, mé tti sadicao na ngain infierno.

¹¹ Jaha ra coixinha ra are vinttechinhi ra co mé joinchehe ra inchin Dios rinao, co jai cain mé jian para ixin jaha ra. Jehe mé tti jointtaaxaon ra jian de ixin quehe ndattjo ra ngain cartana, co jehe mé tti jointtaaxaon ra que jaha ra ján vaguittoaxin ra para vehe chojni jianha ngayaha ra. Co jehe mé tti jointtaaxaon ra para coao ra ngain tti joinchehe jianha ngayaha ra, co cai para aon ra que ixin Dios rrojinttacastigá ra. Cottimeja anto joinao ra sicon ni ra janha. Co jehe tti vinttechinhi ra, mé tti jointtaaxaon ra para joinchecastigá ra tti chojni que joinchehe jianha mé. Co ngain cain jiji jaha ra cjoago ra que jaha ra onhi culpa chonda ra de ngain cosa jianha mé.

¹² Mexinxin are janha cjinha ra saho carta, jeha ixin janha anto axanho de ixin tti chojni que joinchehe jianha ni de ngain tti chojni que conhe jianha mé. Janha axanho cjin na carta mé para que jaha ra conoha ra ngattoxon con Dios que jaha ra ndoa anto rinao ra tsjenguijna ni ra janha na.

¹³ Mexinxin janha na anto hjoin conohe ansenna na.

Co icha chahna na are janha na vicon na que Tito jehe anto jiché ixin jaha ra dicjenguijna ra para que jehe conohe hjoin ngain ansén.

¹⁴ Janha vittona jian de ixin tti ndattjan Tito icha saho que jehe joiji nganji ra. Janha ndattjan jehe ixin janha anto chahna de ixin jaha ra. Co inchin cain tti janha na ndattjo ra cjoí ndoa, jamé cjoí ndoa cain tti ndattjan na Tito, que ixin janha na anto chahna na de ixin jaha ra.

¹⁵ Co Tito jehe icha rinao jaha ra are jehe axaon que cain jaha ra joinchehe ra tti jehe coetonha ra, co ixin jaha ra vayehe ra jehe conixin respeto.

¹⁶ Co janha chahna ixin chonda cain confianza nganji ra.

8

Pablo rinao que chojni Corinto tsjenguijna na chojni noa que ditticaon Jesucristo

¹ Hermanos, jai rronattjo ra que Dios joinchenciaon cain chojni que ditticaon Jesucristo de ngain cain nihngo que te ngain regioen Macedonia.

² Masqui anto tsje cosa tangui conhe na para que Dios vicon aco ndoa ditticaon na Jesucristo, jehe na ché na. Co masqui jehe na anto noa na, pero jehe na vintteganjo na tsje tomi inchin chojni rico.

³ Janha ná testigo na de ixin mé, ixin vicon na ndoa joanjo na tsje tomi co hasta icha que tti nchao rroganjo na.

⁴ Jehe na anto joinchetsena na na ñaho na ixin rroganjo na joachaxin para que jehe na a rrocjenguijna na chojni noa que ditticaon Jesucristo.

⁵ Jehe na joinchehe na icha que tti janha na joiaxanho na ixin saho jehe na mismo anjo na ngá rá Jesús para joinchehe na inchin rinao jehe. Cottimeja jehe na anjo na para vitticaon na tti ndattjan na na. Jamé joinchehe na inchin rinao Dios.

⁶ Mexinxin janha na jointtatsán na ñao Tito que jehe jian sinchejexin tti xa que jehe coexinhi ngayaha ra de joatsetaonhe tti tomi que jaha ra joanjo ra, para ixin tti chojni noa que ditticaon Jesucristo.

⁷ Jaha ra nchehe ra jian cainxin cosa; jaha ra anto jian ditticaon ra Cristo, jaha ra anto nchao ncheoenehe ra icha chojni Palabré Dios, anto jian ttinxin ra de ixin Dios, anto rinao ra Jesucristo, co anto rinao ni ra janha na. Mexinxin jaha ra cai nchao sinchehe ra xa jiji jian de tsjenguijna ra icha chojni noa conixin tomi.

⁸ Janha rrindattjo ra jiji, pero jeha rritetonha ra que sinchehe ra afuerza, jehe ixin rinaho que jaha ra rrochonxin ra quexén xaxaon chojni ngain Macedonia ixin jehe na rinao na tsjenguijna na icha chojni. Mexinxin janha rrindattjo jaha ra cai para siconxin ni aco ndoa rinao ra tsjenguijna ra icha chojni cai.

⁹ Jaha ra ochonxin ra tti jian que joinchehe Jesucristo, tti chonda cain joachaxin para ixin ján na. Jehe anto rico de ngain joachaxin que jehe chonda, pero ixin jehe anto rinao na ján na, mexinxin jehe joinchegondaha joachaxin mé, inchin jehe rrocji anto noa de joachaxin. Mexinxin vittoexin jehe ndavenxin nganito cruz para que ján na nchao rrochonda na cain tti jian que ttixin de ngain Dios.

¹⁰ Janha rinaho jian para ixin jaha ra, mexinxin janha rrondattjo ra tti janha xaxanho de ixin cosa jiji. Jaha ra tti saho grupo que coexinhi ra joatsetaonhe chó ra tomi ngain nano vatto. Jaha ra joinchehe ra jamé pero jeha ixin coetonha ra iná chojni, sino que ixin jaha ra ján joinao ra joinchehe ra jamé.

¹¹ Co jai janha rinaho que nchehe ra sigue jañá, inchin çhjoin coexinhi ra, jamé hasta tsjexin para tsjenguijna ra chojni mé conixin tti jaha ra nchao sanjo ra.

¹² Ixin si ná chojni ndoa rinao sanjo, Dios ján sayé; Dios çhoha sanchia icha tsje de tti jehe ni chonda ni.

¹³ Rinaho que jaha ra tsjenguijna ra chojni noa, pero jeha sanjo ra cain tti jaha ra chonda ra.

¹⁴ Tti janha rinaho que cain ra rrochonda ra nataonxin. Jai jaha ra tsjenguijna ra jehe na ixin jehe na chondaha na co jaha ra chonda ra. Co después jehe na nchao tsjenguijna ra na jaha ra ixin puede jehe na orrochonda na co jaha ra irrochondaha ra. Co jañá cain ra rrochonda ra nataonxin.

¹⁵ Inchin jitaxin ngain Palabré Dios: “Tti vechonda anto tsje, xonhi xehe; co tti tsjeha vechonda xonhi vitjañehe.”

Tito co nicompañeroe

¹⁶ Pero janha çhjaha gracias ngain Dios ixin jehe joinche xaxaon Tito para tsjenguijna ra xajejo inchin janha xaxanho tsjenguijna ra.

¹⁷ Ixin jehe vittoexin tti janha coetoan que jehe siji sitsjaha ra, co jai jehe tti anto rinao para siji sitsjaha ra.

¹⁸ Jai siji Tito conixin iná nihermanoa na que janha na rrorroanha na. Nihermano mé anto jian ditticaon ngain Jesucristo, co chojni que ditticaon Jesucristo nichja na jian de ixin jehe ixin jehe jian nichja ngain na tti joajna que danjo iná vida naroaxin.

¹⁹ Co jeoha de ixin cayoi cosa mé, sino que chojni que ditticaon Jesucristo coinchiehe na jehe para tsjinha na de compañero ngain viajena na para tsjinha na tti tomi que janha na joatsetaon na para tsjenguijnaxin na

chojni noa. Co jiji sinttaha na para tsosayehe Jesucristo co para que tsjago na que jaha ra anto rinao ra chojni.

²⁰ Jañá sinttaha na ixin rinaoha na que chojni rronichja na feo de ixin janha na de ixin tti tomi que janha na tedatsetaon na jai.

²¹ Janha na tenttaha na jiji pero inchin jiquininxin, co jeoha de ngattoxon con Dios, sino que cai de ngattoxon con chojni.

²² Co ngain cayoixin jehe na janha na rrorroanha na iná nihermano. Co janha na vicon na tsje nttiha que ján ndoa jehe anto rinao Jesucristo, hasta jai jehe chonda anto tsje confianza nganji ra.

²³ Jaha ra xo ditticaon ra Jesucristo ngain Corinto, si ðhonja chojni sanchianguiha ra de quensen jehe Tito, jaha ra ndache ra na que mé xicompañerona janha, que janha co jehe tenttaha na xajejo xa para tettjenguijna na jaha ra. O si sanchianguiha ra na de ixin quensen tti yó compañeroe Tito, jaha ra ndache ra na que chojni que ditticaon Jesucristo nttihi rroanha na cayoi nihermano mé ixin cayoi jehe na nchesayehe na Jesucristo.

²⁴ Mexinxin, para que icha chojni que ditticaon Jesucristo rrochonxin na de ixin quehe chojni jaha ra, jaha ra rinao ra canio chojni mé. Jamé para que icha chojni que ditticaon Jesucristo tsonohe na que janha na chonda na razón para chonda na confianza nganji ra.

9

Tti tomi que joatsetaonhe na para tsjenguijnaxin na chojni noa

¹ Janha ichondaha que rronhattjo ra de ixin tti tomi que tedatsetaonhe chó ra para tsjenguijnaxin ra chojni noa que ditticaon Jesucristo,

² ixin janha ochonxin que jaha ra anto rinao ra sinchehe ra jamé. Janha chahna cainxin nttiha que janha ndachjan ngain cain chojni que te ngain regioen Macedonia de ixin jaha ra xo te ra ngain regioen Acaya. Ixin jaha ra anto rinao ra para tettjenguijna ra chojni noa desde ngain nano vatto. Co conohe chojni que ditticaon Jesucristo ngain regioen Macedonia ixin jaha ra jañá tettjenguijna ra chojni, mexinxin cai merocoa cain jehe na goan na animado de tettjenguijna na chojni noa.

³ Pero masqui jamé, janha rrorroanha ra nihermano tehe para que siconhe ndoa tti janha ndachjan de ixin jaha ra de ngain asunto jiji. Rrocho que ndoa jaha ra ochonda ra tti tomi que joatsetaonhe chó ra inchin janha ndachjan,

⁴ ixin nchaoha si ðhonja chojni de Macedonia sasoquinha janha co jehe sicon ixin jaha ra xa digatsetaonhe chó ra tomi. Co jamé janha na anto tsosoahna na después de que janha na anto chonda na confianza nganji ra ixin jaha ra ochonda ra tomi mé. Co si jamé tsonhe, seguro que jaha ra icha tsosoaha na que janha na.

⁵ Mexinxin janha xaxanxo que icha jian janha saho rrorroanha ra nihermano tehe para que jehe na siji na sitsjaha ra na saho. Co jehe na tsjenguijna ra na para satsetaonhe ra tomi mé para que jaicoa sinchexette ra tti tomi que jaha ra ondaço ra are icha saho. Co jamé tti tomi que jaha ra sanjo ra osehe listo. Jamé jaha ra tsjago ra que anto rinao ra para sanjo ra tomi mé, co jeha ixin janha na tenttapurado ra ixin sanjo ra tomi mé.

⁶ Xaxaon jaha ra palabra tehe: Tti tsjeha ttenga, cai tsjeha cosecha tsín; co tti ttenga tsje, cai tsje cosecha datsín.

⁷ Cada ra danjo ra inchin tti oxaxaon ra de ngain ansean ra ixin xonhi xé si jaha ra sanjo ra co hasta tenttaniha ra. O ni jeha afuerza para sanjo ra, ixin tti chojni que danjo co ncheniha, Dios rinao chojni mé.

⁸ Dios nchao rrochjá ra cainxin tti jian que ttixin ngain jehe para que jamé cainxin tiempo rrochonda ra cain cosa que icha donda de ngain vidá ra, co rrochonda ra para que sinchexin ra cain cosa jian.

⁹ Ngain tti jitaxin Palabrê ndaço janhi:

Dios joanjo anto tsje ngain chojni noa, co tti jian que jehe joinchehe, mé sittohe para cainxin tiempo.

¹⁰ Dios danjo semilla para que dinga ngataon jngui, co Dios chjá na tti jontte na. Co jehe tsjenguijna ra para sinchehe ra jian co jehe sinchenciaon tti jian mé para que jaha ra nchao sinchehe ra icha tsje jian.

¹¹ Jamé jaha ra rrochonda ra tsje cosa para que jaha ra nchao sanjo ra tsje. Co chojni nntiha que ditticaon Jesucristo sanjo na gracias ngain Dios de ixin tti tomí tsjinha na janha na que jaha ra rrorroanha ra.

¹² Ixin are janha na rrochjaha na chojni que ditticaon Jesucristo tomi jihi, jeoha rrochjaha na na tti jehe na rrogondehe na, sino que cai sinttaha na para que jehe na anto sanjo na gracias ngain Dios.

¹³ Jehe na sinchesayehe na Dios ixin tti tomí que jaha ra tsjenguijnaxin ra na jihi rroçaxaonxin jehe na que jaha ra anto ditticaon ra tti jian joajnê Jesucristo. Cai jehe na sinchesayehe na Dios de ixin tti tsje tomi que jaha ra sanjo ra para ixin jehe na co para ixin icha chojni que ditticaon Jesucristo.

¹⁴ Co jehe na sinchetsenhe na ñao Dios para ixin jaha ra, co jehe na icha sinao na jaha ra ixin Dios anto jian joinchehe ngain jehe na pero de ixin jaha ra.

¹⁵ Janha chjaha gracias ngain Dios ixin jehe rroanha Xenhe nntihi, co mé anto jian para ixin ján na que hasta ni çhoha rrondaço na queçén jehe mé anto jian!

10

Tti joachaxin que chonda Pablo de representaté Jesucristo

¹ Janha Pablo na, rrinttatsanha ñao jaha ra jian inchin Jesucristo rojinttatsanha ñao ra. Canxion jaha ra ndaço ra que are janha rrihi nganji ra sojiha palabrana, pero ngain cartana que janha rroanha ra canxion ra ndaço ra que ixin anto soji palabrana.

² Mexinxin are janha sasotsjaha ra, rrinttatsanha ñao ra que çonhi ra ndachjenji ni ra ixin janha rrinttaha inchin tenchehe chojni que ditticaonha Jesucristo, ixin janha rrocjan na sinttasattaha ra soji çhonja ra ço rrondaço ra jamé.

³ Já n doa que janha na chojni na, pero janha na ixonhi tiempo nttaluchá na inchin ncheluchá tti chojni que ditticaonha Jesucristo.

⁴ Ixin tti janha na tjayaxin na jeha inchin tti tjayaxin chojni nntihi ngataha nontte, ixin janha na nttagonda na joachaxin Dios para nttaxanttexin na cain joachaxín espíritu jianha que te ngain mundo jihi.

⁵ Jamé nttaxantte na cain tti jianha que nichja chojni de ixin Dios, co cain icha cosa jianha que cayacoen chojni para sitticaon na Dios. Co danjo na ngain Cristo cain tti çaxanho na para que Cristo tsetonha ngain cainxin tti janha na çaxanho na.

⁶ Co are ocainxin jaha ra de ngain Corinto ositticaon ra jian, cottimeja si te chojni ngayaha ra que ça rinaoha na sitticaon na, janha na seguro sinttacastigá na chojni mé conixin joachaxín Dios.

⁷ Jaha ra jeha çaxaon ra tti dicon ra de ngain chojni, co çaxaonha ra de quehe jí ngain ansên chojni mé. Si çhonja ra çaxaon ra que seguro ditticaon ra Jesucristo, chonda ra que çaxaon ra que janha na cai seguro ditticanho na Jesucristo.

⁸ Masqui janha nichja icha tsje de tti jiquininxin rronichja de ixin joachaxin que chonda na, pero janha chondaha que tsosoahna ixin Jesucristo chjana na joachaxin jihi para que janha na sinttasoji na jaha ra de ngain tti ditticaon ra co jeha para que janha na sinttaxantte na tti jaha ra ditticaon ra.

⁹ Janha rinaoha que çhonja ra rroçaxaon ra que janha jeho rinaho sintaxaon ra de ixin tti ndattjo ra ngain cartana.

¹⁰ Ttoha de jaha ra ndaço ra que ixin janha atto soji palabrana ngain cartana, pero are janha dasotsjaha ra co nichja janha mismo nganji ra, jaha ra ndaço ra que janha inchin tti chojni que çonhi nohe co çonhi xé tti janha ndaçhan.

¹¹ Pero tti chojni que ndaço cain jihi chonda que rroçaxaon cai que inchin janha na nichja na ngain cartana na, jamé sinttaha na cai are janha na saso na para sasotsjaha ra.

¹² Janha na çonhi tiempo nttaha na inchin nchehe tti chojni que nichja jian de ixin jeho. Chojni mé çonhi xé tti nchehe na ngattoxon con Dios ixin en lugar de sinchehe na inchin rinao Dios, jehe na nchehe na inchin nchehe icha chojni, cottimeja jehe na ndaço na ixin jehe na jian na jeho ixin nchehe na inchin nchehe icha chojni.

¹³ Janha na rinaoha na que chojni rrochondana na anto tsje respeto que ijiquininxinha na. Dios nohe quehe ça tenttaha na janha na, co jehe tti chjana na joachaxin para que janha na joaso na Corinto para joasondattjo ra jaha ra tti jian joajné Jesucristo.

¹⁴ Janha na tti saho chojni que joasondattjo ra tti jian joajné Jesucristo. Mexinxin janha na jeha ojé ça tenttaha na; janha na tenttaha na tti ça que vitonna na.

¹⁵ Tti ça que iná chojni jinchehe ngayaha ra o ngayé icha chojni de ixin Jesucristo, janha na ndaçhanja na que ça mé janha na jointtaha na. Janha na jeho rinaho na que jaha ra sitticaon ra icha co icha de ixin Jesucristo, co jamé janha na icha nchao sinttacoanha ra de ixin Jesucristo, pero cain tiempo janha na rrondattjo ra jeho inchin coetonna na Dios.

¹⁶ Cottimeja janha na nchao satsji na ngain icha tsje parte que te icha cjin de Corinto para rrondattjan na chojni nttiha tti jian joajné Jesucristo. Pero janha na tsji na jeho ngain tti rajna que ça çonhi chojni tenchehe ça de ixin Jesucristo, para que çonhi chojni rrondaço que ixin ça que odinchehe iná chojni, mé sittonanxin na jian janha na.

¹⁷ Jamé si çhonja chojni rinao tsonohe orgulloso, tonohé orgulloso pero de ngain Dios.

¹⁸ Ixin tti chojni que nichja jian de ixin jeho mismo, chojni mé daçhjeha jian ngattoxon con Dios, sino que tti chojni que Jesucristo nichja ixin ján jian.

11

Pablo nichja de ixin chojni que ndaço ixin jehe na representanté na Jesucristo, pero ndoaha

¹ Rinaho que jaha ra tsixinha ra are janha ndaçhan nchion cosa de ixin tti jian de janho mismo. Puede çonhi xé que janha ndaçhan jamé, pero nttatsanha ñao ra ttixinha ra rrondattjo ra tti janha tonona ngain ansenna.

² Ixin janha anto chjio na de ixin jaha ra, çajeho inchin Dios anto chjio de ixin jaha ra. Ixin janha ondaçhan que sanjo jaha ra ngain Jesucristo joxon jian ra co sinao ra jeha jehe, inchin ná xannçi que ttenchjinha cuerpo para hasta ngain xixihí xan que secoo xan.

³ Pero janha x̄aon na que puede chonja chojni jianha tsí nganji ra para sinttayaha ra sinchehe ra ojé co ndarrotjañaha ra de ixin Jesucristo, inchin joinchehe Eva are conché joincheyehe va jehe conixin palabra chjoin are jehe ngain huerta de Edén.

⁴ Ixin jaha ra anto daca ditticaonxin ra tti chojni que diji dindattjo ra anto ojé de ixin Jesucristo co jeha inchin tti janha na ndattjo ra. Co de ngain ansean ra anto rinao ra dayehe ra ojé espíritu que Espíritu Santo que jaha ra ovayehe ra, co anto daca ditticaonxin ra ojé joajna que tti jian joajné Jesucristo que janha na ondattjo ra.

⁵ Pero janha x̄axanho que tti chojni que tenttayaha ra chondaha icha tsje joachaxin que janha ngattoxon con Dios.

⁶ Masqui jaha ra x̄axaon ra que tti forma que janha nichja anto x̄aja, pero janha nona jian ngain Palabré Dios. Co jihi cjoago janha na nganji ra de ngain tti janha na jointtaha na cain tiempo.

⁷ ¿Oni x̄axaon ra que janha jointtaha jianha are joasondattjo ra tti jian joajné Jesucristo co x̄onhi cobro jointtaha ra? Janha jamé jointtaha para joarihi icha importanteha ngattoxon con jaha ra para que jaha ra ditticaon ra Jesucristo co jamé te ra icha importante ngattoxon con Dios.

⁸ Janha joanchiá icha chojni que ditticaon Jesucristo tomi co ján vittoexin na chjana na, co tomi mé gondana are janha joasondattjo ra de ixin Cristo.

⁹ Co are janha joarihi nganji ra co are ndavacjena tomi co vaguenhe na jinta, janha x̄onhi tiempo ndattjo ni ná jaha ra que rrochjana ra tomi o ni tti rrojine. Canxion chojni que ditticaon Jesucristo ngain nonttehe Macedonia joí na nganji na co nimé ni chjana na tomi para gondana. Co jamé janha cjoinha cuidado de x̄onhi molestia chjaha jaha ra. Co jamé x̄a sinttaha para que x̄onhi tiempo rrochjaha ra molestia.

¹⁰ Inchin jaxon janha chonda seguro que ndoa chonxin tti ndoa de ixin Jesucristo, jamé nona que x̄onhi chojni de ngoixin regioen Acaya santsjena tti chjoin que tonohé ansenna ixin x̄onhi tomia ra dayá janha.

¹¹ Janha ndächjan jañá nganji ra, pero x̄axaonha ra que ixin janha rinaoha ra; Dios nohe que janha anto rinaho jaha ra.

¹² Pero janha x̄a sinttaha sigue ngain tti rrinttaha para x̄onhi oportunidad rrochjaha tti chojni que tenttayaha ra, ixin chojni mé rinao na que jaha ra rrondaçho ra ixin chonda na x̄ajeho x̄a que janha na.

¹³ Ixin chojni mé ndoaha ixin jehe na representanté Jesucristo na. Jehe na nichja na ixin jehe na representanté Jesucristo na, pero para ncheguitticaon na tsje chojni tti jeha ndoa de ixin Jesucristo.

¹⁴ Co jihi jeha ná cosa que chojni soan na admirado ixin Satanás mismo cjamanga inchin ná ángel de Dios que tí conixin joadingasán.

¹⁵ Co mexinxin tanguilha para que tti chojni que nchehe tti rinao Satanás cjan na chojni que nchehe jian. Pero cain chojni mé Dios sinchecastigá na de ixin cain cosa jianha que nchehe na.

Tti anto tanguí que conhe Pablo ixin jehe ná representanté Jesucristo

¹⁶ Janha rrocjan na rronddattjo ra iná que x̄axaonha ra que ixin janha ndadinttatján joarrixaonna, pero si jaha ra x̄axaon ra jamé, tanchjanda ni ra que janha rronichja nganji ra masqui inchin tti chojni que ndadinchetján joarrixaoen para que janha cai tsonona nchion orgulloso inchin tonohé tti chojni que nichja ixin jehe ná representanté Jesucristo pero jeha ndoa.

17 Tti janha rrindačhjan jihi jeha Dios coetonna, sino que janha rrindačhjan inchin ná chojni que ndadinchetján joarrixaoen, jeho para que janha tsonona orgulloso.

18 Ixin jí anto tsje chojni que tonohé orgulloso jeho de ixin cain cosa que jí ngataha nontte, jamé janha cai tsonona orgulloso.

19 Jaha ra ndačho ra que ixin anto noha ra tsje cosa mexinxin jaha ra ttixinha ra ttinhi ra tti ndačho chojni que ndadinchetján joarrixaoen.

20 Co jaha ra ttixinha ra ngain tti chojni que nttayaha ra masqui jehé na ndattjo ra na co nttantaha ra na que sinchehe ra inchin jehé na rinao na, masqui jehé na dantsjacoa ra na cosá ra, masqui jehé na rinaoha na jaha ra, co masqui jehé na xanguí na canxion rá na ngá con ra.

21 Masqui janha na cai nchao sinttaha na inchin chojni mé pero janha na xonhi tiempo jointtaha na ni sinttaha na.

Pero si cain chojni mé cosoeha na de nichja na jian de ixin jehó na, mexinxin cai janha tsooanaha de rronichja jian de ixin janho, masqui ndačho ra que janha nichja inchin tti ndadinchetján joarrixaoen.

22 Chojni mé ndačho na ixin jehé na hebreo na, pero janha cai hebreo na. Co jehé na ndačho na ixin nacioen na Israel, pero janha cai nttiha nacionna. Co jehé na ndačho na ixin Abraham tti ndogelitoé jehé na xanchjen, pero janha cai mé tti ndogelitona xanchjen.

23 Co jehé na ndačho na ixin nchehe na xé Jesucristo, pero seguro que janha icha tsje xé Jesucristo rrinttaha que jehé na, masqui jaxon janha rrinichja inchin tti dinchetján joarrixaoen ixin janha rrinichja jian de ixin janho. Pero ján, ndoa que janha tti icha tsje xé Jesucristo rrinttaha que jehé na, co janha tti icha vicaon na que jehé na, co janha tti icha tsje nttiha viaxinna ngain cárcel, co tsje nttiha janha joarichonda peligro de narroguenxon na.

24 Co chojni judío naho nttiha chjana na tti castigo de vicaon na janha conixin tti treinta y nueve cuarta.

25 Co ní nttiha coaxin na na nttá, co ná nttiha coaxin na na xo. Co ní nttiha cononttengui barco jinda tti barco que janha cjoinha, co ná de tti ní nttiha mé vittona janha ngataonhe ndachaon ná ttié co ná nchanho.

26 Janha anto jointtavaijá, co tsje peligro vetan janha de ngain tsje río, de ngain tti chehe, peligro de ngacjén chojni de ngain nacionna janha, de ngacjén chojni que jeha nacionna. Vetan peligro ngain ciudad, ngagaha jna, ngataon ndachaon, co vetan peligro ngacjén tti chojni que ndačho ixin jehé na ditticaon na Jesucristo co ndoaha.

27 Janha soji xa jointtaha hasta anto cončhjen na, co tsje ttié janha joaričhinha, tsje nttiha janha vaguenhe na jintta co jinda, tsje nttiha janha cjaño vagarihi, co tsje nttiha janha tangui conna de ixin quin co de ixin lonto ixin ndajoexin vichje cain lonttona.

28 Masqui cain cosa jihi conna, pero cada nchanho janha icha xaxanho de ixin chojni que ditticaon Jesucristo ngain cain región.

29 Si čhonja de jehé na anto tangui tonohé na de ixin tti jian joajné Jesucristo, mé inchin rrocji janha mismo rroconona jamé, ixin janha ttiaconoá na jehé na. Co si ná chojni ncheyehe čhonja de jehé na para que jehé na isitticaonha na Jesucristo, janha anto feo tonohé ansenna co toñaho ngain chojni mé.

30 Si nchao tsonohe ni orgulloso, janha tsonona orgulloso de cain cosa tangui que tonna ixin de nttiha xago que janha chondaha joachaxin. Co jamé

tti rinao Dios para que jehe nchao nchegonda na janha.

³¹ Dios, Ndo dé Jesucristo tti jiquinixin sonttocoanxinhi na cainxin tiempo, mé tti nohe icha jian que janha ján nichja tti ndoa.

³² Are joarihi janha ngain ciudad de Damasco, xigobernador que vehe ngain tti nontte que vaquetonha rey Aretas, xigobernador mé coetonha xa que vinttenda xisoldado cain puerta de ciudad mé, ixin ngoixin ngandajin ciudad mé jindehe ttjarioho atto noi, mexinxin xisoldado vintte xa cada puerta mé para rrotse na xa janha co rroquixinna xa.

³³ Pero canxion chojni amigona que diquencia nchiandoha ngain ttjarioho mé de ngain ventané nchia mé joinchexincajinxin na na janha conixin jino ngá ná nttaxa para toenxin ttjarioho mé, co jamé janha nchao sacingá xigobernador mé.

12

Tti vicononxinhi Pablo co tti jehe coxinxin

¹ Xonhi dacha ni de nichja ni jian de ixin jeho ni mismo. Pero masqui jamé, janha chonda que rrondachjan tti coxinnanxin co tti vicononxinna que Jesucristo cjoagohna.

² Janha chonxin ná xí que ditticaon Jesucristo, que ochonda catorce nano que Dios savicao xí mé hasta tti ngain ninxin ngajni. Pero janha nonaha si xí mé sacjoi xa conixin cuerpoe xa o ani nahi; jeho Dios tti nohe.

³ Pero ján, nona que ixin xí mé sacjoi xa, jeho nonaha si sacjoi xa conixin cuerpoe xa, o ani nahi, jeho Dios tti nohe mé.

⁴ Dios sajoicao xí mé hasta tti ngain lugar de ngajni mé, co nttiha coinhi xa tsje palabra que xonhi chojni chonxin ni xonhi chojni chonda joachaxin para rronichja na palabra mé.

⁵ Janha nchao rroconona orgulloso de ixin tti joinchehe Dios ngain xí mé ixin xí mé janha mero, pero janha tononaha orgulloso de ixin janho mismo, sino que ixin janho mismo chondaha joachaxin.

⁶ Masqui, si janha rronichja jian de ixin janho mismo, cai mé jian ixin tti janha rronichja joxon cosa que ndoa, pero janha xonhi tiempo sinttaha jamé, para que xonhi chojni rronichja jian de ixin janha icha de tti janha ni ijiquininxinha na.

⁷ Cain tti janha coxinnanxin, mé anto thjoin. Co para que janha tsononaha anto orgulloso de ixin mé, janha vayá ná cosa que inchin ná nchaha joidoho cuerpona. Co mé joixin de ngain Satanás, para nchemolestá na janha co para que janha xonhi tiempo tsonona orgulloso de ixin tti janha coxinnanxin.

⁸ Ní nttiha janha joanchiá Jesucristo que jehe rroguinttjanxin de ngain cuerpona tti anto jittin.

⁹ Pero jehe ndachjenji na: “Jaha ixonhi icha dondaha, jeho tti janha anto rinaho jaha, ixin joachaxin que janha chonda xago icha jian ngain tti chojni que sojiha de ngain cuerpoe.” Mexinxin janha chahna que ixin sojiha cuerpona, para que joachaxin Jesucristo rroxago nganji janha.

¹⁰ Mexinxin janha chahna ixin sojiha na, co ixin chojni nichja na feo nganji janha, co de ixin are xonhi tomi chonda co denhe na jintta, co de tangui que tonna ixin janha ditticanho Jesucristo. De cainxin yá janha chahna ixin si janha tonona icha tsangaha na, pero are mé janha icha soji na de ixin joachaxin Jesucristo que jehe chjana.

Pablo anto cóa joachjaon por ixin chojni Corinto

11 Janha jointtaha inchin ná chojni que ndadinchetján joarrixaoen ixin nichja jian de ixin janho mismo, pero janha chonda que jamé jointtaha ixin jaha ra ttjioha ra respeto nganji. Jaha ra tti jiquininxin rronichja ra jian de ixin janha. Si janha xonhi rentte na nganji ra, icha xonhi rentte tti chojni que ndacho na que jehe na representanté Jesucristo na pero jeho nttayaha ra na. Janha ndattjo ra cain jihi masqui xonhi rentte na.

12 Ngain tti xa que janha jointtaha conixin anto paciencia ngayaha ra, nttiha vicon ra tsje señal co tsje milagro que janha jointtaha, co cain mé rrocho que janha ndoa ná representanté Jesucristo na.

13 Are janha joarihi ngayaha ra, cain tiempo jointtaha nganji ra xajeho inchin nttaha ngain icha chojni que ditticaon Jesucristo. Jeho nacoa cosa oje jointtaha nganji ra; janha xonhi tiempo joanchiaha ra tomia ra. ¡Si jihi ná cosa nchaoha para ixin jaha ra, nttatsanha ñao ra nchetjañana ra!

14 Co jai janha orrihi listo para sasotsjaha ra ninxin nttiha pero xonhi molestia sasochjaha ra de ixin tomi, ixin janha jeha tomi rinaho; janha rinaho jaha ra mismo. Inchin ná ndodaha, jehe ndo tti jiquininxin ttje ndo tomi para ixin xenhe ndo, co jeha chjan tti tsje tomi para ixin jehe ndo.

15 Co janha anto rinaho sinttaxian cain tomi que janha chonda co hasta janha mismo ndajittjexin na para que almá ra sintte jian. Jamé ixin janha cada nchanho icha co icha rinaho ra, masqui puede jaha ra cada nchanho icha rinaoha ni ra janha.

16 Co nona que canxion ra masqui xaxaon ra que janha xonhi tiempo ndattjo ra ixin rocjenguijna ni ra conixin tomi, pero ndacho ra que ixin janha jimao jointtayaha ra.

17 ¿Ani xaxaon ra que janha jointtayaha ra de ngain toha de tti chojni que janha rroanha nganji ra?

18 Janha jointtatsán ñao Tito para que jehe joiji joitsjaha ra, co janha rroanha iná xí que ditticaon Jesucristo para joijicaho jehe. ¿Ani Tito jointtayaha ra para joantsjaha ra tomia ra? ¿Anoaha ra que janha co jehe Tito nttaha na xajeho jian co cayoi na chonda na xajeho Espíritu Santo?

19 Puede jaha ra xaxaon ra que cain tti janha na tendattjo ra, mé para que rroxaxaon ra jian de ixin janha na. Pero jeha jamé ixin janha na tenichja na ngattoxon con Dios conixin joachaxín nombre Jesucristo. Co mé para tsjenguijnaxin ra de ngain espiritua ra para sinttasoji ra ngain tti ditticaon ra de ixin Jesucristo ixin janha na anto rinaho na jaha ra.

20 Ixin janha xaon na que are janha sasotsjaha ra puede itencheha ra inchin janha rinaho, co jaha ra isinttaxoxianha ra tti janha rrondattjo ra. Janha xaon na que sehe pleito ngayaha ra, joachjoehe, puro tetoñaohé chó ra, jaho ra tsonoha ra que icha importante ra que icha chojni, sinttaxoxinha ra tsequin ra cuentoe iná chojni que jiquininxinha, sinttaxoxianha ra xé iná chojni que jehe jinchehe, tsonoha ra jian de ixin jaho ra mismo, co xonhi respeto sehe ngayaha ra.

21 Janha xaon na que are janha sasotsjaha ra Dios sincheconohe ngain ansenna ná joasoaxin de ixin jaha ra, co hasta rrochonda que rrotsjanga janha de ixin cain jaha ra xo xa diquentoxinha ra vidá ra de tti jianha que tenchehe ra desde are saho, co de tti techonda ra oje nthí que jeha nthíchiha ra o xo nthí ra techonda ra oje xí que jeha xixiha ra, co icha vicio que jaha ra dicangu ra.

13

Tti coetonha Pablo co tti joexinxin joajné

¹ Jihí tti nínxín nttiha que janha sasotsjaha ra. Co are mé sayehe ra castigo cain ra xo tenchehe ra cosa janha, pero saho sintte yó o ní testigo tti rrondačo que ndoa jehe nimé vicon na que jaha ra tenchehe ra jianha.

² Ngain tti yoxin nttiha que janha joasotsjaha ra, are mé ndattjo ra que cain ra xo joinchehe ra cosa jianha que isincheha ra. Co jai que cjin rrihi de jaha ra, janha rritetonha ra cain ra xajeho iná. Co jai que sasotsjaha ra iná, si čhonja ra xa tenchehe ra jianha, janha itsiaconoaha ra.

³ Cottimeja sicon ra que ixin Cristo seguro nchegonda na janha para que jehe nichja nganji ra. Co jeha ixin Jesucristo xonhi joachaxin chonda para nganji ra, sino que jehe tjago nganji ra tti anto tsje joachaxin que jehe chonda.

⁴ Ján ndoa que jehe goan crucificado nganito cruz co ndavenhe inchin si jehe rrochondaha joachaxin, pero jai jehe jichon de ixin joachaxín Dios Ndoé jehe. Jamé janha na jai cai chondaha na joachaxin ngain cuerpona na, pero masqui jamé janha na te na inchin nacoa chojni conixin jehe co techon na de ixin joachaxín Dios para nchao tsjenguijna ra jaha ra.

⁵ Jaho ra mismo xaxaon ra jian tti joinchehe ra, para sicon ra aco ndoa jian ditticaon ra Jesucristo, co mé ná prueba para ixin jaha ra. Ixin čanoaha ra que Jesucristo jí ngain ansean ra si jaha ra ndoa ditticaon ra jehe mero?

⁶ Pero janha rinaho que jaha ra tsonoha ra que janha na ján ndoa ditticanho na jehe mero.

⁷ Co janha na nttatsán na ñao Dios para que jaha ra xonhi cosa jianha sinchehe ra ngain vidá ra, pero jeha para que icha chojni rrondačo na ixin janha na anto jian jointtacoanha ra, sino para que jaha ra sintte ra jian ngain vidá ra. Co jeha importante que chojni rronichja si janha na tenttaha na inchin rinao Cristo o ani nahi.

⁸ Ixin janha na čhoha rronichja na tti ndoaha, sino chonda na que rronichja na joxon tti ndoa.

⁹ Mexinxin janha na sintte na contento masqui xonhi joachaxin chonda na ixin janha na rinaho na que jaha ra tsojoji ra de ixin joachaxín Dios, co sinttaha na sigue de sinttacoanxian na Dios para que jaha ra sintte ra chojni jian.

¹⁰ Janha rricjinha ra carta jihí icha saho que janha sasotsjaha ra, para que jaha ra noha ra cain quehe sinchehe ra para que are janha saso, irrochondaha que sinttasattaha ra ní sinttastigá ra conixin joachaxin que janha chonda. Co tti joachaxin mé chjana Jesucristo para tsjenguijnanxin ra para que icha jian sitticaon ra Jesucristo co jeha para que janha sinttaxante tti jaha ra ditticaon ra.

¹¹ Co jai hermanos, rinaho que jaha ra sintte ra contento. Ttjé ra que xén nchehe ra para sintte ra chojni jian ngain vidá ra, co ditticaon ra tti consuelo que janha chjaha ra, co ditticaon chó ra cain ra co ttetocoha chó ra. Co Dios, tti danjo tti čhjoin que tonohé ansén ní, co jehe tti anto rinao ní, mé tti senda ra.

¹² Chjehe chó ra joajna jian naná ra.

¹³ Cain chojni que ditticaon Jesucristo nttihi, rroanha na joajna para ixin jaha ra.

¹⁴Dayehe ra tti jían que ttixin de ngain Jesucristo, tti chonda cain joachaxin nganji na. Co noha ra ixin Dios anto rinao ra co Espíritu Santo jí nganji ra. Amén.

Carta Que Dicjin Pablo Para Ixin Chojni Que Ditticaon Jesucristo Ngain Regioen Galacia

Pablo chjé joajna chojni ngain regioen Galacia

¹ Janha Pablo na, janha ná representanté Jesucristo. Janha jeha chojni de nttihi ngataha nontte rroanha na, ni jeha chojni joincheguinhí na representante, sino que Jesucristo mismo rroanha na janha co jehe tti joincheguinhí na jañá, conixin Dios Nnodá na, tti joinchexecheon Jesucristo are jehe ndavenhe.

² Janha rricjin na carta jiji conixin icha chojni que ditticaon Jesucristo, tti nite nttihi nganji na janha. Co carta jiji para nganji jaha ra xo ditticaon ra Jesucristo que te ra ngain regioen Galacia.

³ Dios Nnodá na, co Jesucristo, tti chonda cain joachaxin, sinttanchaon ra co rrochjá ra tti chjoin que tonohé ansean ra.

⁴ Jehé Jesucristo xanjo para ndavenhe para cjoenga hna cain tti jianha que ján na jointtoho na co jañá jehe vinttjianxin na de ngain cain cosa jianha que jí ngataha nontte jai, ixin jamé joinao Dios Nnodá na.

⁵ ¡Dios jehe tti jiquininxin tsosayehe para cainxin tiempo! Amén.

Ixonhi iná joajna que danjo iná vida naroa

⁶ Janha ttianxinha quedonda jaha ra anto daca ndatetjañaha ra Dios, tti nichjá na de ixin tti jian que joinchehe Cristo para ixin ján na ixin jehe Cristo anto rinao na, co jai jaha ra teditticaon ra ojé joajna que toenaó ra rrochjá ra iná vida naroa.

⁷ Jehá ixin jí iná joajna que sanjo iná vida naroa. Sino que tti jitonhe jiji que canxion chojni tenttayaha ra co rinao na que jaha ra sitticaon ra ojé joajna que jeha joajné Jesucristo, tti danjo iná vida naroa.

⁸ Pero si chonja chojni rrondattjo ra iná joajna ojé de tti joajna que janha na ondattjo ra, chojni mé chonda que soan condenado, quexeho chojni que rrondattjo ra ojé joajna mé, masqui janha o ná ángel que tsixin de ngajni.

⁹ Janha ondachjan co xa rrocjan na rrondachjan iná: Quexeho chojni que rrondattjo ra ojé joajna de tti joajna que janha ondattjo ra, chojni mé soan condenado.

¹⁰ Janha ndachjan cain jiji, pero jeha ixin rinaho para que chojni rronichja jian de ixin janha, sino que rinaho que Dios xaxaon jian de ixin janha. Si janha rinaho sittona jian ngain chojni, janha isariha ná jian xinchehe xé Jesucristo.

Quexén joiguehe Pablo representanté Jesucristo

¹¹ Pero janha rinaho que jaha ra tsonoha ra que tti joajna que danjo iná vida naroa que janha rrindattjan chojni, mé joixinha de ngain tti xaxaon chojni nttihi ngataha nontte.

¹² Janha vayaha joajna jiji ni de ngain ná xí, ni xonhi chojni joinchecoanna joajna jiji, sino que Jesucristo mismo tti joinchenona joajna jiji.

¹³ Jaha ra onoha ra quehe vanttaha janha are saho, are janha varroá religioen chojni judío. Jaha ra onoha ra que janha conixin anto coraje vanttaha feo ngain cain chojni que ditticaon Jesucristo, co vajinaho que narrogoenxon cainxin na.

¹⁴ De ngain religioen chojni judío, janha tti icha vaguitaon nttiha de tsje xicompañerona que chonda xajeho nano inchin janha, ixin janha tti icha vaguiticanho cain costumbré nindogoelitona xançhjen.

¹⁵ Pero Dios ocoinchiehe na janha icha saho que rroconcjina, co ixin jehe anto rinao na, mexinxin nichjanha. Co cai are jehe jañá joinao,

¹⁶ jehe joinchegatsoan na Xenhe para que janha joindattjan tti chojni que jeha judío tti jian joajné jehe. Are jihi joiconhe, janha cjoiha joiganchiangua ni ná chojni quexén sinttaha.

¹⁷ Ni cjoiha ngain ciudad de Jerusalén para joiganchiangua cain tti vintte representanté Jesucristo icha saho que janha. Sino que janha jaicoa sacjoi para ngain regioen Arabia, co después sacjan na para Damasco.

¹⁸ Co hasta vattoja ní nano janha cjoi ngain ciudad de Jerusalén. Nttiha joatsoanxin Pedro, co joarihi yó semana ngain jehe.

¹⁹ Pero viconha icha representanté Jesucristo, sino que jeha Jacobo, xanchó jehe Jesús.

²⁰ Janha nntaseguraha ra jihi ngattoxon con Dios, que tti rrindattjo ra jihi, ján ndoa.

²¹ Después de cain jihi janha sacjoi para ngain regioen Siria co regioen Cilicia.

²² Are mé cain chojni que ditticaon Jesucristo, tti nite ngain regioen Judea xa vechonxinha na na janha mismo.

²³ Jeha vaquinhi na vanichja chojni janhi: “Tti xí que feo vanchehe are saho ngain chojni Jesucristo, jai jehe xí mé tti rridendache chojni xajeho tti joajna que are saho joinao xa rrojinchexante xa.”

²⁴ Co chojni mé joinchesayehe na Dios ixin jehe coentoxinhi vidana janha.

2

Are icha representanté Jesucristo vitticaon que Pablo cai ná representanté Jesucristo

¹ Vatto catorce nano, cottimeja janha cjoi Jerusalén iná conixin Bernabé co cjoinha na Tito cai.

² Janha cjoi nttiha iná ixin Dios ndachjenji na que janha chonda que tsji nttiha iná. Nttiha ngain Jerusalén are xatte cain ninchecoehne cain chojni que ditticaon Jesucristo, janha ndattjan na de ixin tti joajna que danjo iná vida naroa que janha rrinttanoa icha chojni que jeha judío. Janha jointtaha jihi ixin rinaoha que cain xé Jesucristo que ojointtaha co rrinttaha, xonhi tsoarentte xa mé.

³ Nttiha vehe Tito nganji na janha, co masqui coaha xohe que dinhi circuncisión ixin jeha judío, ndacheha na que ixin jehe chonda que rroca xohe mé.

⁴ Já n ndoa que canxion chojni nttiha joinao na que Tito rroca xohe mé. Pero jehe chojni mé ndoaha ditticaon na Jesucristo, co jimao dijiyehna na na. Chojni mé joiji na para joitsayana na na para vicon na co nichja na feo de ixin janha na ixin iditticaonha na costumbré chojni judío. Co jehe na joinao na que janha na rroguinte na esclavo de ngain costumbre mé iná.

⁵ Pero janha na ni ná rato jointtaha na caso ngain na, ixin janha na joinaho na que jaha ra joinchehe ra sigue vitticaon ra cainxin tti ndoa que jí ngain tti joajna que danjo iná vida naroa.

⁶ Pero cain tti ninchecoenhe chojni que ditticaon Jesucristo nttiha, que chojni ndacho que ixin jehe na anto importante na, jehe na ndachoha na ixin nchaoha jí tti rrinttaoán chojni. Co janha ndosenaha si jehe na importante na o ani nahi, ixin Dios tsjeha tti nchehe chojni, sino que jehe tsjehe ngain ansén cada chojni.

⁷ En lugar de rroundachjenji na na ixin nchaoha jí tti rrinichja janha, jehe na vitticaon na que ján ndoa Dios tti chjana xa de rroundattjan chojni que jeha judío tti joajna que danjo iná vida nara, jañá inchin Dios chjé Pedro xa de ndacho xajeho joajna jihi ngain cain chojni judío.

⁸ Ixin Dios que rroanha Pedro inchin representanté para ngayé chojni judío, xajeho Dios mé rroanha na janha cai inchin representanté para ngayé chojni que jeha judío.

⁹ Mexinxin Jacobo, Pedro co Juan, canio nimé nivintte nttiha icha importante de vaquetonha na, joatsoan na que ján ndoa Dios chjana xa jihi. Mexinxin jehe na tsena na na rana na janha co Bernabé. Jihi joinchehe na para ná señal que janha na co jehe na compañero na, co nchao para que ixin janha na tsji na sindačhjan na joajna jihi ngayé chojni que jehe judío inchin jehe na rroundacho na ngayé chojni judío.

¹⁰ Pero jehe na joinchetsena na na ñaho na que rroaxanho na co tsjen-guijna na chojni noa, co jihi tti janha na anto tsjá na nttaha na conixin tsje cuidado.

Are Pablo joinchesattehe Pedro ngain ciudad de Antioquía

¹¹ Pero are Pedro cjoí ngain ciudad de Antioquía, janha jointtasattá ixin tti jehe joinchehe jianha jí.

¹² Ixin are saho jehe joinecaho chojni que jeha judío, hasta que joijija canxion chojni que dirroanha Jacobo, cottimeja jehe ttingavačhjenjehe chojni que jeha judío co cointtohe de joinecaho na, ixin jehe xaon ngain nijoiji ixin nimé ni ndacho que cain chojni Jesucristo chonda que sitticaon na ngain circuncisión co ngain icha costumbré chojni judío.

¹³ Cottimeja inchin Pedro joinchehe tti jianha, cai icha chojni judío que ditticaon Jesucristo joinchehe na xajeho inchin tti jianha que joinchehe Pedro, que hasta Bernabé joinchehe cai inchin joinchehe Pedro.

¹⁴ Pero are janha vicon que jehe na tencheha na inchin ttetonha tti ndoa que tjago tti joajna que danjo iná vida nara, janha ndattjan Pedro ngattoxon con cain chojni que ditticaon Jesucristo: “Jaha que ná chojni judío joinchehe inchin nchehe chojni que jeha judío, co incheha inchin jiquininxin nchehe chojni judío, ¿mexinxin que xén rinao jaha que chojni que jeha judío sinchehe na inchin chojni judío?”

Dios dayé cain chojni masqui jeha judío, jeha por ixin confianzé na ngain Jesucristo

¹⁵ Janha na chojni judío na desde are concjina na, co janha na jeha chojni que nchehe jianha inchin icha chojni.

¹⁶ Co ixinha mé, janha na nona na que xonhi chojni sehe jian ngain Dios jeha ixin nchehe na tti ttetonha ley que vayé Moisés, sino que chojni jian na ngain Dios si jehe na chonda na confianza ngain Jesucristo. Mexinxin cai janha na vitticanho na ngain Jesucristo para que janha na sintte na chojni jian ngain Dios de ixin confianza que janha na chonda na ngain jehe, co nahi ixin janha na jointtaha na tti ttetonha ley que vayé Moisés. Ixin xonhi chojni nchao sintte jian ngain Dios jeha ixin nchehe tti ttetonha ley mé.

¹⁷ Co jai si ján na rinao na sontte na chojni jian ngain Dios jeho por ixin Jesucristo; pero si jamé, rroçho que ján na idotticaonha na ley que vayé Moisés. ¿Apoco jihi rroçho que Cristo tti ndattjo na sonttoho na jianha? ¡Nahi, jeha jamé rroçho!

¹⁸ Pero ján, janha jianha rrojinttaha si janha rrojinttaxantte ná cosa cottimeja rrocjan na sinttachjian. Rroçho que janha jianha sinttaha si janha tsinttoa de sinttaha tti ndaçho ley, cottimeja rrocjan na sinttacoán chojni de ixin ley mé iná.

¹⁹ Ixin janha para ngain ley que vayé Moisés inchin ondavenhe na, ixin ley mismo ndaçho ixin janha jiquininxin ndasenhhe na, co jai janha rrinttaha inchin Dios rinao.

²⁰ Rroçho que janha inchin ondavenxin na nganito cruz conixin Jesucristo ixin janha isinttaha inchin joinaho icha saho. Mexinxin ijeha janha tti rrichon jai, sino que Jesucristo tti jichon ngaxinhi cuerpona. Co jai tti vida que janha rrichonda ngain cuerpona, janha rrichonda vida jihi ixin janha ditticanho Xenhe Dios. Ixin jehe Xan anto joinao na Xan janha co xanjo Xan para ndavenhe Xan por ixin janha.

²¹ Mexinxin janha ditticanho ngain Cristo ixin rinaoha sinttaha desprecio tti danjo Dios. Ixin si ná ni nchao sintte ni chojni jian ngain Dios jeho ixin sitticaon ni nchehe ni tti ttetonha ley que vayé Moisés, si rrocji jamé, rroçho que xonhi xé ixin Cristo venhe para ixin ján na.

3

¿Quexehhe cosa icha nchao: aley que vayé Moisés o confianza ngain Dios?

¹ ¡Atto cha ttinxin ra jaha ra chojni Gálatas! ¿Quensen joantonga ra para que jaha ra ditticaonha ra tti joajna ndoa? Janha na mismo jian cjoagoha ra de ixin Cristo. Co jaha ra ocoinxin ra jian quedonda ndavenxin Jesucristo nganito cruz.

² Jai ndachjenji ni ra jihi: ¿Avayehe ra jaha ra Espiritu Santo de Dios ixin joinchehe ra cain tti ttetonha ley que vayé Moisés, o ani ixin vitticaon ra tti coinhi ra de ixin Jesucristo?

³ ¿Quedonda jaha ra anto cha ttinxin ra? Are saho jaha ra anto tsje confianza chonda ra ngain Dios ixin Espiritu Santo cjoenguijna ra. ¿Apoco jai xaxaon ra ixin icha jian rroguitticaon ra si rrojinchehe ra tsje cosa inchin ttetonha ley?

⁴ Después de anto tanguí conha ra de ixin tti jian joajné Jesucristo, ¿andas-inchetján ra cain mé? Nahi, janha rinaho que sinchetjanha ra mé.

⁵ Ndachjenji ni ra: Are Dios rroanha Espiritu Santo nganji ra co are jehe nchehe tsje milagro ngayaha ra, ¿quedonda jehe nchehe jihi? Jehe nchehe jihi pero jeha ixin jaha ra nchehe ra cain tti ttetonha ley que vayé Moisés, sino que ixin jaha ra nchehe ra caso tti jian joajna que jaha ra coinhi ra.

⁶ Abraham jehe vitticaon ngain Dios, co ixin jehe vechonda confianza ngain, mexinxin Dios vayé Abraham inchin ná xí jian para ixin jehe.

⁷ Mexinxin jaha ra chonda ra que tsonoha ra que cain tti nichonda confianza ngain Dios, mé ni ndoa chojni Abraham.

⁸ Tti xón que jitaxin Palabré Dios, nttiha jitaxin que Dios sinchejian cain chojni que jeha judío si rrochonda na confianza ngain jehe. Mexinxin desde are icha saho Dios ndache Abraham tti jian joajna jihi: “Chojni de cainxin nación tsonchaon na por ixin jaha.”

⁹ Mexinxin Dios nchennaon cain chojni que chonda confianza ngain jehe xajeho inchin joinchennaon Abraham are jehe vechonda confianza cai.

¹⁰ Cain chojni que chonda confianza que jehó ley que vayé Moisés tsjengui-
jna, chojni mé soan na condenado. Ixin ndačho ngain tti jitaxin Palabré Dios:
“Cainxin chojni que sincheha jian masqui nacoa de cain tti jitaxin ngain ley
que vayé Moisés, cainxin chojni mé soan na condenado.”

¹¹ Jańá jí claro que ixin xonhi chojni jian ngattoxon con Dios jehó ixin
vitticaon na joinchehe na cain tti ttetonha ley que vayé Moisés, ixin ngain
tti jitaxin Palabré Dios ndačho: “Tti chojni que dehe jian para ngain Dios
conixin confianza que chonda ngain jehe, chojni mé rrochonda iná vida
naroa.”

¹² Pero ley que vayé Moisés jindačhoha de tti confianza que rrochonda ni,
sino que jindačho: “Tti chojni que nchao sinchehe cainxin tti jitaxin ley jiji,
rrochonda iná vida naroaxin ixin jehe tsixinhi sinchehe cain tti ndačho ley.”

¹³ Jesucristo cjoenga hna para que ján na irrochondaha na castigo inchin
ttetonha ley que vayé Moisés, jehe Jesucristo tti goan condenado de ixin
causaxin na ján na, ixin ndačho ngain tti jitaxin Palabré Dios: “Condenado
cain tti chojni que seriahnda nganito ná nttá.”

¹⁴ Cain jiji conhe para que de ixin Jesucristo, Dios nchao sinchenchaon
chojni que jeha judío xajeho inchin jehe Dios joinchenchaon Abraham.
Co para que cainxin ján na nchao sayé na Espíritu Santo ixin chonda na
confianza ngain Dios.

Ley que vayé Moisés co promesé Dios

¹⁵ Hermanos, janha rrindattjo ra ná ejemplo de ngain vida jiji: Are ná xi
nchechjian ná testamento co nchefirmá xa, ixonhi chojni nchao tsentoxinhi
testamento mé, ni ixonhi chojni tsentaxin icha palabra ngain testamento mé.

¹⁶ Nchao remé, Dios vanjo promesa ngain Abraham co ngain xanntí
Abraham. Pero Palabré Dios jitaxinha de ixin tsje xanntí. Sino que rročho
nacoa xanntí Abraham, co mé rročho que jehó Jesucristo.

¹⁷ Tti janha rrindačhjan rročho janhi: Dios joinchechjian ná promesa
ngain Abraham co Dios joinchesejurehe promesa mé. Mexinxin ley que
vayé Moisés cuatro cientos treinta nano después, čhoha sinchexantte jehe
promesa mé co sittohe sin que tsorentte tti ndačho Dios ngain Abraham.

¹⁸ Ixin si tti danjo Dios rroquixin jehó si rrogotticaon na rrojonttoho na
cainxin tti ttetonha ley que vayé Moisés, mexinxin mé rročho que ijeha
promesé Dios. Pero jeha jamé, ixin ján na noa na que Abraham vayé promesé
Dios jehó ixin vechonda confianza ngain jehe co nahi ixin vaguitticaon
vanchehe tti vaquetonhe Dios.

¹⁹ Mexinxin ¿quedonda jí ley que vayé Moisés? Ley mé joiguehe después de
Abraham para joicjago ley que ixin tti nchehe cain chojni nchaoha jí. Pero
ley jiji jehó cončhehe ley hasta tti ngain nchanho que jói jehe tti xanntí
Abraham que Dios joincheprometehe ixin rroquí. Dios roanha ángel para
joiaho ley jiji co joinchegonda Moisés para cjoago ley ngain cain chojni judío.

²⁰ Pero are Dios nichjé Abraham, mé cjoí para vanjo promesa ngain.
Inchin are ná chojni chjé promesa iná chojni, dondeha que iná chojni
rronichja por ixin jehe. Mexinxin jańá Dios gondeha iná chojni o ángel are
nichjé Abraham.

Quedonda vehe ley que vayé Moisés

²¹ ¿Apoco jiji rročho que ley que vayé Moisés jiha de acuerdo conixin tti
promesé Dios? Nahi, jeha jamé. Ixin si ná ley nchao rroganjo ley iná vida

naroa ngain chojni, si jamé rroçji, Dios rrondaço que chojni rroçojian na si ditticaon na nchehe na cain tti rroçetonha ley mé.

²² Pero inchin jitaxin ngain Palabré Dios cainxin na tteaxian na para sonttoho na cosa jianha. Co cain jiji jañá jí para que cain chojni que rrochonda confianza ngain Cristo sayé cain tti jian que Dios joincheprometé, jecho ixin chonda confianza mé.

²³ Icha saho de que chojni rrochonda oportunidad de rroçuiticaon ngain Jesucristo, janha na xo judío na vintte na inchin tti teaxinhi ngain cárcel, co ley que vayé Moisés, mé inchin tti cárcel viaxinna na hasta que joija tiempo que janha na nchao rrochonda na confianza ngain Jesucristo.

²⁴ Rroço ixin ley que vayé Moisés vaçettonna na inchin ná maestro ttetonha ngain chjanncheconhe. Co jamé vintte na hasta que joija Cristo are Dios ndaço que janha na chojni jian na para ngain jehe si chonda na confianza ngain Cristo.

²⁵ Co jai janha na ochonda na oportunidad de chonda na confianza ngain Jesucristo, co mexinxin ley que vayé Moisés ixonhi joachaxin chonda nganji na.

²⁶ Co cai cain jaha ra xenhe Dios ra ixin chonda ra confianza ngain Jesucristo.

²⁷ Co cain jaha ra joiguitte ra ixin ocjan ra chojni Jesucristo. Co mexinxin Cristo jí ngain ansean ra co nchehe ra inchin jehe rinao.

²⁸ Co para que xo chojni Jesucristo, jeha importante si judío o ani griego, o nchehe xa de ngain ná xinajni o ani nahi, o si ani nchí o xí, ixin cainxin na xajeho na inchin nacoa chojni ngattoxon con Jesucristo.

²⁹ Co si jaha ra chojni Jesucristo ra, mé rroço ixin jaha ra cai chojni Abraham co sayehe ra cainxin tti ndaço Dios que rroçhjé Abraham.

4

¹ Jiji ná ejemplo de tti janha ndaçhjan: Ná chjan are ndadenhe ndodé xan, sayé xan cainxin tti chonda ndodé xan. Pero are xa nchín xan, jehe xan jí xan inchin ná ninchehe xé ndodé xan ixin xa çhoaha tsetonha xan ngain cain cosa mé hasta que sanguija xan, masqui cain cosa mé ocosé xan.

² Dintte chojni que dicao cuidado de ixin jehe xan are xa nchín xan co nchechjian na cain asuntoe xan hasta que dinqé tiempo que coetonha ndodé xan para sayé xan joachaxin de cain cosé ndo.

³ Co jamé tonhe nganji janha na cai, ixin are saho janha na xa vaçuanxinha na de ixin Dios. Are mé janha na vintte na inchin xannchinnchinchjan ixin costumbré chojni ngataha nontte jiji, mé tti vaçettonha nganji na.

⁴ Pero are ovinqué tiempo que Dios ndaço, jehe rroanha Xenhe joiconcjihí Xan de ngain ná nchí, co jói Xan inchin chojni judío que vitticaon ley que vayé Moisés.

⁵ Jañá jói Xan para que joichjana na Xan libertad cain janha na xo vaçettonna na ley mé para que Dios vayehna na janha na inchin chojni jehe.

⁶ Co para que Dios çjoagoha jaha ra que jaha ra oxenhe jehe cai, jehe rroanha Espíritu Santo ngain ansean ra, co Espíritu mé joixin de ngain Cristo, co Espíritu tti ntanichja na are ndaço na: “¡Padre míol!”

⁷ Mexinxin jai jaha ra oxenhe Dios ra, ijeha inchin ninchehe xa. Co ixin jaha ra oxenhe Dios ra, jehe rroçhá ra por ixin Cristo cainxin inchin jehe ndaço.

Pablo ta joachjaon para ixin cain chojni que ditticaon Jesucristo

⁸ Are saho, are jaha ra xa vechonxinha ra de ixin Dios; jaha ra vintte ra inchin esclavo de ngain choan cosa que joincheguinhí ra dios, pero que jeha ndoa Dios.

⁹ Pero jai que ochonxin ra de ixin Dios, o icha jian rrocho que ixin Dios ochonxin ra jaha ra, mexinxin ¿quedonda jaha ra xa rrocjan ra sintte ra esclavo iná ngain costumbre que vechonda ra are saho? Onoha ra que mé xonhi rentte co xonhi joachaxin chonda.

¹⁰ Rrocho que jaha ra jai te nchanho co conittjao co tiempo co nano que icha chojni ndacho ixin importante, co jaha ra xa nchesayehe ra mé.

¹¹ Janha anto xaon na ixin puede tti xa que janha joasonttaha ngayaha ra tsoxonhi xé xa mé.

¹² Hermanos, nttatsanha ñao ra que nchehe ra inchin janha, ixin icha saho varichonda ley que vayé Moisés co jai sacjan na inchin jaha ra xo chondaha ra ley mé. Janha rrinichja jiji, pero jeha ixin jaha ra joinchena ra chonja cosa jianha.

¹³ Jaha ra onoha ra, are janha joaso nganji ra saho nttiha para joasondattjo ra tti jian joajna que danjo iná vida naroa, are mé janha anto venina, co mexinxin vechonda tiempo para ndattjo ra tti joajna mé.

¹⁴ Co tti chin que janha joarichonda, mé cjoí ná prueba para ixin janha, pero jaha ra cjoanoaha ni ra ni joinchesattenaha ni ra ixin jamé joarihi. Sino que jaha ra vayehna ni ra inchin rrogayehe ra ná ángel Dios o inchin rrogayehe ra Jesucristo mero.

¹⁵ Co ¿cja tti anto chaha ra que vinttechonda ra are mé? Are mé vicon janha que si rrocji posible, jaha ra hasta rrogantsjengui ra jmacon ra para rochjana ni ra janha ixin anto joinao ni ra janha.

¹⁶ Co jai, ¿aningaconna ni ra jeha ixin ndattjo ra tti ndoa?

¹⁷ Tti icha chojni que joí nganji ra ndacho na ixin anto rinao ra na, pero jeha ndoa. Jehé na jeha rinao na que santsjenda ra na de nganji na janha na, para que cottimeja jaha ra jeha sitticaon ra jehé na.

¹⁸ Ján, anto nchao jí para sinao ra chojni, pero de jian co que mé tsonchjenhe para cainxin tiempo, co jeha are janha rrihi nganji ra.

¹⁹ Jaha ra inchin xannchinnchinchjanhna co jai janha jittín na de ixin jaha ra inchin are ttín ná jannaha are ncheconcjihi jan xenhe jan; co sinchehe sigue tsín na hasta que jaha ra sitticaon ra jian ngain Cristo.

²⁰ Janha rrojinaho rrojarihi nganji ra jaxon, para que rronichjaha ra icha jian; ¡ixin janha anto tsje joachjaon tá de ixin jaha ra!

Ejemploe Agar co Sara

²¹ Jaha ra xo rinao ra sitticaon ra ley que vayé Moisés, ndachjenji ni ra jiji: ¿Acoinha ra tti jitaxin ley mé?

²² Nttiha jitaxin que Abraham joichonda yó xenhe xanxí. Ná xan concjihi xan de ngain ná nchinchehe xé, co iná xan concjihi xan de ngain nchichihí jehé, que nchí mé jeha nchehe xa ncha.

²³ Xenhe jehé nchinchehe xa mé concjihi xan xajeho inchin toncjihi cain chjan, pero chjan que concjihi de ngain chíhi mero, chjan mé concjihi xan para que conixin jiji joiconhe tti ndacho Dios ngain Abraham.

²⁴ Yá conhe para ná ejemplo. Tti yó nchí mé rrocho yó manera que Dios ttjenguijna chojni. Ná de tti yó manera jiji joiconhe ngataha jna Sinaí, tti vanjonxin Dios ley ngain Moisés. Co tti nchí vinhi Agar rrocho cain jiji.

Co cain chojni que ditticaon jeho jihi, jehe na inchin esclavo na ngain jihi, xajeho inchin Agar conixin xenhe vintte esclavo cai.

²⁵ Co Agar rrocho jna Siná que jí ngain nonttehe Arabia, co jna Siná rrocho ciudad de Jerusalén ixin chojni nttiha jai tiempoa na jihi te na inchin esclavo ngain ley que vayé Moisés.

²⁶ Pero ngajni jí iná Jerusalén. Co ján na xo tequininxin na nttiha, chonda na libertad ixin Dios jinda na, co mé rajná na.

²⁷ Ndacho janhi ngain Palabré Dios de ixin ciudad de Jerusalén nttiha ngajni:

Chaha jaha nchí que choha ncheconcjiji chjan, jaha que xonhi chjan chonda;

toyao ixin anto chaha, jaha que chonxinha tti ttín nchí de ncheconcjiji ncha chjan.

Ixin tti nchí que ndacointtohe xixihi, nchí mé rrochonda ncha icha tsje chjan que tti nchí que jicao xixihi.

²⁸ Hermanos, ján na te na inchin Isaac, ixin jehe goan ixin Dios ndache Sara, nchíchihí Abraham, ixin rrochjé ncha ná chjan. Co ján na xenhe Dios na, tti chjan que jehe joincheprometé.

²⁹ Pero ngain tiempo vatto, xenhe Agar, tti concjiji xan inchin cain chojni, chjan mé feo joinchehe xan ngain tti chjan que joincheconcjiji Sara de ixin tti joinchehe Espíritu Santo; co cai jamé tetoan na ján na jai ixin chojni que rinao nchehe na inchin ttetonha ley que vayé Moisés, chojni mé feo nchehe nganji na xo dotticaon na Cristo.

³⁰ Pero ¿quehe ndacho ngain Palabré Dios? Nttiha ndacho: “Dehngui nchinchehe xa conixin xenhe ncha ixin xenhe nchinchehe xa choha rrochonda xan parte ngain tti herencia que sayé xenhe tti nchí que jaha nchehe xa.”

³¹ Jañá, hermanos, ján na jaha inchin xenhe tti nchinchehe xa, sino que ján na inchin xenhe tti nchí que jaha nchehe xa.

5

xonhi tiempo ttinttohe ra tti libertad que chonda ra jai

¹ Cristo vantsje na de ngain joachaxín ley que vayé Moisés para que ján na sotte na libre. Xonhi tiempo jaha ra ttinttohe ra libertad jihi, co ícjanha ra dinte ra inchin esclavoe ley mé o icha costumbré chojni.

² Ttinhi ra tti rrondattjo ra. Janha Pablo rrindattjo ra que si jaha ra sittoaxin ra tsa ra tti xohe que dinhi circuncisión, ixin xaxaon ra ixin xohe mé tsjenguijna ra ngattoxon con Dios, si jamé sinchehe ra, Jesucristo ichoha tsjenguijna ra.

³ Janha rrindačhjan iná que cain xí que xaxaon que ixin icha jian si tsa xa xohe mé, jehe xa chonda xa que sinchehe xa cainxin tti ttetonhe ley que vayé Moisés.

⁴ Jaha ra xo xaxaon ra ixin Dios rrogayaha ra inchin chojni jian si jeho rroguitticaon ra rojinchehe ra cain tti ttetonha ley mé, pero mé rrocho ixin jaha ra ichondaha ra confianza ngain Jesucristo; jaha ra ondavačhjenda ra de ngain jehe co de ngain tti jian que ttixin de ngain Dios.

⁵ Pero ján na chonda na confianza ngain Jesucristo de ixin joachaxín Espíritu Santo, co mexinxin chonda na seguro que ixin Dios sayá na inchin chojni jian.

⁶ Ixin are ján na te na ngain Jesucristo, jeha rentte si ján na chonda na xóhe mé o ni nahi. Tti ján, rentte, mé tti ján na rrochonda na confianza ngain Cristo. Co confianza mé tti ttjenguijna na para sonao na cain chojni.

⁷ Jaha ra oanto jian vanchehe ra. ¿Quensen jointtayaha ra para que ndacointtohe ra de ditticaon ra tti mero ndoa mé?

⁸ Jeha Dios tti jointtayaha ra, sino que chojni que ditticaonha ngain jehe.

⁹ Xaxaon ra que “nchion levadura nchegangi cain nchoe niottja.” Co cai nchion chojni jianha nchejianha icha chojni.

¹⁰ Pero janha chonda confianza ngain Dios que jehe tsjenguijna jaha ra para rroxaxaonha ra iná cosa que jeha ndoa. Co Dios sinchecastigá tti chojni que tenttayaha ra; jehe ndosenha quexeho de jehe na.

¹¹ Co de ixin janha, hermanos, si janha xa rroquetoan chojni que chonda confianza ngain Jesucristo que ixin chonda na que tsa na xóhe que dinhi circuncisión, chojni judío ifeoha rrojinchehe na nganji na janha co irrocoñaoha na are rroquinhi na tti joajna que janha ndachjan de ixin quedonda Cristo ndavenxin nganito cruz.

¹² Pero tti chojni que nttayaha ra ixin chonda ra que tsa ra tti xóhe que dinhi circuncisión, incho jeha na rrojinchenihi cuerpoe na mismo!

¹³ Ixin jaha ra hermanos, Dios vayaha ra para que jaha ra sintte ra chojni libre. Pero jiji rrochoha ixin jaha ra nchao sinchehe ra jeha tti rinao ra, sino que por ixin rinao chó ra, ttjenguijna chó ra naná ra.

¹⁴ Ixin ngoixin ley de Dios rrocho jiji: “Rinao chó ra inchin rinao ra cuerpoe ra jaha ra mismo.”

¹⁵ Pero si jaha ra sintte ra inchin coxigo chintto que nehe chó va co jine chó va jeha va, si jamé nchehe ra, ttjiho ra cuidado ixin jamé jaho ra sinchetján chó ra.

Tti rinao cuerpoe ni co tti vida que danjo Espíritu Santo

¹⁶ Jiji tti janha rrindattjo ra: Nchehe ra inchin rinao Espíritu Santo, co jañá isincheha ra tti jianha que rinao cuerpoe ra.

¹⁷ Ixin tti jianha que rinao cuerpoe ni, mé rinaoha Espíritu Santo de Dios. Co tti rinao Espíritu Santo, mé rinaoha cuerpoe ni. Cayoi parte mé ningaconhe chó co mexinxin jaha ra choha sinchehe ra inchin jaho ra rinao ra.

¹⁸ Pero si jaha ra nchehe ra inchin rinao Espíritu Santo, tti ley que vayé Moisés ichondaha joachaxin nganji ra.

¹⁹ Tanguiha para datsoan ni quehe nchehe tti chojni que nchehe tti rinao cuerpoe: Jehe na deajoacaho na iná nchí que jeha chihi na, co nchehe na cosa anto jianha, joxon cosa que rinao cuerpoe na,

²⁰ co jehe na nchesayehe na ídolo co dantonga chó na, ningaconhe chó na, ditticaonha chó na, co chonda na joachjio. Nanao toñahe chó na. Si nchehe na choan cosa jian, pero jeha para que jehe na sittohe na jian ngain icha chojni. Co dachjendehe chó na co nchechjian na tsje grupo.

²¹ Jehe na chjoehe na, dantsjehe na vidé icha chojni, coan na, anto xengo na, co nchehe na icha cosa jianha inchin cain jiji. Janha rrindattjo ra iná inchin ondattjo ra are saho, que cain chojni que nchehe cosa jiji rrochondaha na parte ngain tti tettonha Dios.

²² Pero janhi tti nchehe Espíritu Santo: Jehe nchehe para que ján na rinao na cain chojni, para que anto chá na, para que tonoa na chjoin ngain ansean na, para que chonda na paciencia, para que sontte na amable na, para que

sinao ansean na ttjenguijna icha chojni, para que ján na sonttoho na sigue inchin Dios rinao,

²³ para que tsorentteha na ni sontteha na orgulloso, co para que sonttoha na tti rinao cuerpoe na. Co jamé ðonhi ley jí que ndaño ixin cosa tehe nchaoha te.

²⁴ Co tti chojni que ditticaon Cristo, chojni mé ncheha na cain tti rinao cuerpoe na ni cain tti jehe na ðaxaon na.

²⁵ Jáñá inchin Espíritu Santo chjá na iná vida naroa, ján na cai chonda que sittoaxin na que Espíritu mé tsetonha nganji na.

²⁶ Jáñ na chondaha na que sontte na orgulloso, ni sonttoñaoha chó na, ni tsonchjoeha chó na.

6

Ttjenguijna chó ra ná ra co iná ra

¹ Hermanos, si jaha ra tsinhi ra que ná chojni de jaha ra jinchehe jianha, jaha ra ðo ojian ditticaon ra nchehe ra tti ttetonha Espíritu Santo nganji ra, ðo mé chonda ra que rrondate ra chojni que jinchehe jianha que isincheha jamé. Pero mé chonda ra que sinchehe ra conixin ansean ra jian, co torentteha ra ixin tsjenguijna ra na. Co ttjiho ra cuidado cada ra cai para que jaha ra sincheha ra cosa jianha jamé cai.

² Ttjenguijna chó ra naná ra are tanguí tsonha ra, co jamé sinchehe ra tti ttetonha Cristo.

³ Ixin si ná chojni tsonohe ixin anto importante co jehe ni ðonhi quehe, mé rroño que jehó jincheyehe ansén.

⁴ Cada ni chonda ni que sinchejuzgá ni tti jehe ni tenchehe ni. Co si jian tti jehe ni joinchehe ni, jehe ni nchao tsonohe ni çhjoin, co ðonhi ðé para rroñaxaon ni si joinchehe ni icha tsje o icha tsjeha que iná chojni.

⁵ Ixin cada chojni chonda responsabilidad ngattoxon con Dios de tti jehe nchehe.

⁶ Co nitetanguí ngain tti jian joajné Jesucristo, chojni mé chonda que tsonchjeya na ngain ximaestroe na cain cosa jian que jehe na chonda na.

⁷ Dittoaxinha ra ðaxaon ra tti ndoaha: ðonhi chojni nchao tsjanao Dios, ixin tti jehe ni tenga ni, mé tti tsín ni.

⁸ Tti chojni que ttenga cosa jianha inchin tti rinao cuerpoe, jehe ndasinchetján vidé ngattoxon con Dios, co de tti jehe ndasenhe, mé rroño cosecha que jehe rrotsín. Pero tti chojni que ttenga tti rinao Espíritu Santo, chojni mé rronchonda iná vida naroa para cainxin tiempo, co mé tti coseché que jehe rrotsín.

⁹ Mexinxin jáñ na ðonhi tiempo tsinttohe na de sonttoho na tti jian, ixin si jáñ na soanha na desanimado de sonttoho na tti jian, jáñ na rrotsín na cosechá na mero ngain tti tiempo que Dios coinchiehe.

¹⁰ Mexinxin cada nntiha que nchao, jáñ na sonttoho na jian ngain cain chojni, nntofo na jamé co icha para ngain tti chojni que ditticaon ngain Jesucristo.

Pablo joexin çjin carté co rroanha joajna

¹¹ Tsjexin ra queñén yeyexin letra rricjianxin ra conixin rana ngain parte jihi.

¹² Tti chojni que ndattjo ra ixin chonda ra que tsa ra tti ðohe que dinhi circuncisión, chojni mé jamé nchehe na jehó para que sittoexin na jian ngain chojni judío, co jamé para que tsonoeha na tanguí ixin causexin Jesucristo

are rrondache na icha chojni ixin quedonda Jesucristo ndavenxin nganito cruz.

¹³ Ixin ni jehe tti chojni que ta xohe mé nchehe na cain tti jindačo ngain ley que vayé Moisés. Pero jehe na rinao na que jaha ra tsa ra xohe mé para que jehe na nchao tsonohe na orgulloso, ixin jaha ra vitticaon ra coá ra xohe inchin jehe na coetonha na nganji ra.

¹⁴ Pero para ixin janha, rinaoha tsonona orgulloso de ixin icha cosa, sino que janha tonona orgulloso de ixin quedonda Jesucristo ndavenxin nganito cruz. Ixin are jehe ndavenhe, rročo inchin cain cosa feo co jianha ngataha nontte jiji ndavitján co ndavenhe para ixin janha, co janha inchin ondavenhe na de cain cosa mé.

¹⁵ Ixin si ján na chojni Cristo na, jeha importante si ján na techonda na tti xohe que dinhi circuncisión o ni nahi; tti importante na, que ján na sontte na chojni naroaxin para ngain Dios.

¹⁶ Janha rinaho que Dios rrochjá ra tti çhjoin que tsonohe ansean ra, co jehe tsiaconoaha ra, cain jaha ra xo ditticaon ra jiji, co para cainxin tti chojni que ján ndoa chojni Dios.

¹⁷ De jai para ndaha rinaho que çonhi chojni rrochondana problema, ixin cain marca que rrichonda ngain cuerpona jai de ixin tti anto vicaon na, mé tjago que janha ndoa ná ninchehe xé Jesucristo.

¹⁸ Hermanos, janha danchia que Jesucristo, tti chonda cain joachaxin, sinttanhaon ra cainxin ra jaha ra. Amén.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Efeso

Pablo chjé joajna chojni ngain Efeso

¹ Janha Pablo na, Dios joinao que janha rrihi ná representanté Jesucristo. Janha rricjin na carta jihi para nganji jaha ra xó te ra ngain ciudad de Efeso, jaha ra xó chojni Dios ixin ditticaon ra Jesucristo.

² Dios Ndogá na co Jesucristo, tti chonda cain joachaxin para ixin ján na, sinchenaon nganji ra co rrochjá ra tti chjoin que tsonohe ansean ra.

Dios anto nttanchaon na de ixin Jesucristo

³ Nttocoanxinhí na Dios Ndogé Jesucristo, tti chonda joachaxin para ixin ján na, ixin jehe Dios anto jointtanchaon na de cainxin cosa jian que ttixin de ngajni. Jehe rroán na cain cosa mé ixin ján na te na inchin nacoa chojni, ján na conixin Jesucristo.

⁴ Icha saho que Dios joinchechjian nontte, jehe ocoinchíá na ján na para sontte na chojni jehe de ixin Jesucristo, para que ján na sontte na chojni jian ngattoxon con jehe xonhi cosa jianha rrochonda na.

⁵ Cai desde icha saho, Dios anto joinao na, mexinxin jehe ndaño que ján na sontte na xenhe jehe. Mexinxin jehe rroanha Jesucristo para joicjenga hna para ixin ján na, jamé joinchehe Dios ixin jehe jamé rinao.

⁶ Mexinxin ján na cainxin tiempo sonttocoanxinhí na Dios ixin jehe anto jian nganji na, ixin jehe chjá na joachaxin para que ján na te na inchin nacoa chojni conixin Xenhe que jehe anto rinao.

⁷ Dios jehe anto rinao na ján na, mexinxin rroanha Xenhe nttihi ngataha nontte para ndavenhe Xan; jamé para cjoenga Xan hna cain tti jianha que ján na nttoho na. Co mexinxin jai Dios ojointsatjañá na cain tti jianha mé.

⁸ Dios ocojogoa na que jehe anto rinao na ixin jehe tti nttaxaxaon na jian co nttaquianxin na jian de ixin jehe.

⁹ Co jehe jointtagatsoan na tti jehe rinao co tti jehe sinchehe ngain cain chojni, co cain mé nonxinha vehe desde ngain tiempo vatto.

¹⁰ Co jihi rrocho que tsonhe ngain tti mero nchanho que Dios tsinchiehe, jehe Dios sanjo joachaxin ngain Jesucristo para que Jesucristo tsetonhe cain cosa que jí ngajni co cain cosa que jí nttihi ngataha nontte.

¹¹ Co desde icha saho, Dios ocoinchíá na ján na para que sontte na inchin nacoa chojni conixin Jesucristo, jamé para que ján na nchao sayé na tti jehe Dios rrochjá na. Co cain jihi tsonhe inchin jehe rinao, co Dios nchehe cainxin cosa inchin tti jehe ndaño que jian jí.

¹² Jañá joinchehe Dios para que janha na xó saho vitticanho na Jesucristo sinttaoanxian na jehe Dios ixin jehe anto jian.

¹³ Co cai jaha ra vitticaon ra Jesucristo are coinhi ra tti joajna ndoa, co joajna mé tti chjá ra iná vida naroaxin. Co desde ngain rato mé jaha ra te ra inchin nacoa chojni conixin Jesucristo. Co Dios ndaño ixin jaha ra chojni jehe are chjá ra Espíritu Santo inchin jehe ndaño icha saho.

¹⁴ Espíritu Santo que jí nganji ján na, mé inchin ná seguridá de que ján na sayé na tti ndaño Dios que rrochjá na are jehe tsjexin sincheroa cain chojni

que jiquininxin para ixin jehe co cain jiji para que tsocoanxinxin jehe, ixin jehe anto jian.

Pablo nchetsenhe ñao Dios que Dios sinchequinxin cain chojni que ditticaon Jesucristo

¹⁵ Mexinxin desde ngain nchanho que janha coian ixin jaha ra oditticaon ra Jesucristo, co ixin anto rinao ra cain chojni Dios,

¹⁶ desde ngain nchanho mé co hasta jai, janha cainxin tiempo danjo gracias ngain Dios para ixin jaha ra, co cain tiempo xaxanho jaha ra are janha rrinttacoanxian Dios.

¹⁷ Janha nttatsán ñao Dios, Ndoé Jesucristo, tti chonda cain joachaxin, co Dios mé Ndoá na cai co tti jiquininxin tsosayehe. Janha nttatsán ñao jehe que sinttaquianxin ra conixin Espíritu Santo para que tsinxin ra jian tti jehe rroundattjo ra, co para que jian rrochonxin ra jehe.

¹⁸ Co janha nttatsán ñao Dios que jehe sinchengasán ngain joarrixaoan ra para que rrochonxin ra que ixin jaha ra oseguro chonda ra tti vida naroaxin que jehe ochjá ra. Co para que cai rrochonxin ra que anto jian co anto rentte cain cosa que danjo Dios ngain chojni jehe.

¹⁹ Co rinaho cai que jaha ra rrochonxin ra que Dios chonda anto tsje joachaxin co xonhi cosa que Dios çhoha sinchehe. Joachaxin jiji jí nganji ján na xo dotticaon na Jesucristo. Co xajeho joachaxin jiji joinchegonda Dios

²⁰ are jehe joinchexechon Jesús are ndavenhe co joaquehe ngain lado jian nttiha ngajni.

²¹ Co rato mé jehe Dios chjé Jesús joachaxin para que Jesús ttetonhe cain tti icha ttonha nttiha ngajni. Co Jesucristo jehe tti chonda icha joachaxin de cain cosa, masqui quexeho tiempo, sia tiempo jai o tiempo que tsí.

²² Dios chjé Jesucristo cain joachaxin para ngain cain cosa co Dios joanjo joachaxin cai para que Jesucristo jí inchin já cain chojni que ditticaon jehe.

²³ Co tti cain chojni que ditticaon Jesucristo, cain chojni mé inchin ngoixin cuerpoe Jesucristo ixin cain jehe na conixin Jesucristo te na inchin nacoa cuerpo. Co Jesús jí ngain cainxin lugar desde ngajni co nttihi ngataha nontte.

2

Dios chjá na vida naroaxin ixin jehe anto rinao na

¹ Dios chjá jaha ra vida naroaxin masqui icha saho jaha ra vintte ra inchin tti ndadiguenhe de ixin tti cainxin cosa jianha

² que jaha ra vanchehe ra. Are mé jaha ra vanchehe ra inchin nchehe cain chojni que ditticaonha Jesucristo, co jaha ra vaguitticaon ra tti ttonha ngain cain demonio que chonda joachaxin ngain cain tti chojni que ncheha tti ttonha Dios.

³ Co cai cain ján na jañá vanttoho na are saho. Ján na vanttoho na inchin vaaxaon na, co vanttoho na inchin vajinao cuerpoa na co joarrixaoan na. Mexinxin ján na vequininxin na tti anto soji castigoe Dios inchin icha chojni.

⁴ Pero Dios jehe anto coiaconoá na, co anto rinao na,

⁵ masqui ján na gontte na inchin chojni que ndadiguenhe para ixin Dios ixin anto tsje jianha vanttoho na. Pero jehe chjá na iná vida naroa, co mexinxin jai ján na co Jesucristo inchin nacoa chojni. Jañá jaha ra irrochondaha ra tti anto soji castigo ixin Dios anto coiaconoaha ra.

⁶ Co jamé rroçho que Dios jointtaxechon na de tti ndavenhe na, are jehe joinchexechon Jesucristo, co inchin jehe Dios ocoín na ján na ngajni ngain Jesucristo.

⁷ Jehé joinchehe jañá para que sicon cain chojni de ngain tiempo que tsí que ixin anto rinao na ján na, co jehe anto jian nchehe nganji na de ixin Jesucristo.

⁸ Mexinxin jaha ra ochonda ra iná vida naroa ixin Dios anto rinao ra co ixin jaha ra chonda ra confianza ngain Jesucristo. Co vida jiji jeha ixin jaha ra joinchehe ra ná cosa jian mexinxin chondaxin ra vida jiji, sino que Dios joinao chjá ra vida jiji.

⁹ Jeha de ixin tti jian que nchehe ná chojni mexinxin chondaxin vida jiji, nahi jeha jamé. Mexinxin xonhi chojni tsonohe orgulloso ixin chonda vida jiji.

¹⁰ Ixin Dios jehe jointtachjian na ján na; co de ixin Jesucristo Dios chjá na iná vida naroa para que ján na sonttoho na jian ngataha nontte jiji, inchin jehe oʔaxaon desde are saho.

Tti chjoin tonoa na ngain Dios por ixin Cristo

¹¹ Mexinxin xaxaon jaha ra de ixin quexén vintte ra are saho. Jaha ra jeha chojni judío ra, co chojni judío ndačo na que jeha na nichojní Dios ixin chjé chó na xöhe que dinhi circuncisión ngain cuerpo na, co jaha ra nahi ixin chondaha ra xöhe mé.

¹² Ngain tiempo mé jaha ra xa jeha chojni Jesucristo ra, co jaha ra ni jeha chojni judío ra, co ni xa vinttechonxinha ra tti trato que joinchechjian Dios conixin Abraham, co ni xa vinttenoaha ra de ixin tti jian que Dios ndačo sanjo ngain chojni. Are mé jaha ra vintte ra ngataha nontte jiji pero xonhi esperanza vinttechonda ra que ixin Dios tsjenguijna ra co ni vinttechonxinha ra de ixin Dios.

¹³ Pero masqui ngain tiempo mé jaha ra cjin vintte ra de Dios, jai jaha ra oconchienne ra ngain Dios ixin para mé venxin Jesucristo co jai te ra inchin naoa chojni conixin jehe.

¹⁴ Jesucristo mé tti chjá na tti chjoin que tonohé ansean na. Co jehe tti joinchehe para que chojni judío co chojni que jeha judío pero que cain na xo dotticaon na jehe te na inchin naoa grupo ixin Jesucristo conxante tti vaningaonhe chó na. Mexinxin jai cain chojni que ditticaon na jehe, cain na amigo na.

¹⁵ Are ndavenhe Jesús, are mé jehe conxante cain tti costumbre que vanchehe chojni judío ngain ley que vayé Moisés, ixin ley jiji tti chjeyaxin chojni. Pero jehe joinchechjian naoa grupo de chojni jehe, de tti chojni judío co de tti chojni que jeha judío, pero cain na te na naoa grupo jai. Co jamé cointte Jesucristo cain chojni jehe para que cain na rinao chó na.

¹⁶ Mexinxin are Jesucristo ndavenxin nganito cruz, jehe joinchexante tti vaningaonhe chó chojni de chojni judío co tti chojni que jeha judío. De cain chojni mé jehe cointte na inchin naoa chojni para que jai cain na sintte na jian ngattoxon con Dios.

¹⁷ Jesucristo jói ngataha nontte jiji para joindache cayoi grupo de chojni jiji tti jian joajna para que ansean na cain na chjoin tsonohe. Jehé ndattjo jaha ra joajna mé masqui cjin vintte ra para Dios, co jehe ndachjenji na janha na xo chojni judío na cai, co janha na icha chian vintte na para Dios.

¹⁸ Mexinxin de ixin Jesucristo, cainxin na masqui chojni judío na o nahi pero cainxin na nchao tsonchienne na ngain Dios Ndodá na ixin chonda na xajeho Espíritu Santo.

¹⁹ Mexinxin jai jaha ra ijeha chojni ojé ra, sino que jai jaha ra xajeho cain chojni que ditticaon Dios, ixin cain na ján na xajeho chojni Dios na.

²⁰ Co jaha ra inchin ná nchia jie que jingattjen soji. Ixin jai jaha ra te ra ngataha tti base que vinttequín cain nirepresentanté Jesucristo co cain profeté Dios, co Jesucristo mismo inchin tti xo esquina que icha importante ngain base mé.

²¹ Co ngataha base jiji, que mé Jesucristo, ján na sontte na cainxin na inchin xo que ditte ttjarioho hasta que tsonchjian na ná nihngo jian para ngain Dios co cainxin na sontte na inchin nacoa na para ixin Jesucristo.

²² Co jamé jaha ra cai dintte ra inchin nacoa chojni conixin Jesucristo, co doan ra inchin nacoa ra conixin icha chojni jehe para que cain ra tsonchjian ra ná nchia tti nchao sehe Espíritu Santo de Dios.

3

Dios chjé Pablo xa de rronichja joajné ngain chojni que jeha judío

¹ Mexinxin janha Pablo na nttatsán ñao Dios para ixin jaha ra, co janha rriaxinna ngain cárcel ixin ndattjo ra joajné Jesucristo, jaha ra xo jeha chojni judío ra.

² Seguro que onoha ra que ixin Dios anto jian jehe chjana xa jiji que janha rrinttaha nganji ra para que jaha ra sintte ra chojni jehe.

³ Rrocho que Dios cjoagohna tti nonxinha vehe que jehe xaxaon joinchehe ngain chojni. Jehe joinchenona mé, co janha ondattjo ra nchion de mé ngain cartana.

⁴ Are jaha ra rrotsjehe ra carta mé iná, nchao tsinxin ra que janha chonxin tti nonxinha mé de ixin Jesucristo.

⁵ Mé ná cosa que xonhi chojni venohe are icha saho, pero jai Dios cjoagoe cain nirepresentanté jehe co cain profeté jehe de ixin Espíritu Santo que jehe roanha.

⁶ Tti nonxinha vehe mé jiji: que de ixin tti jian joajné Jesucristo, Dios nchenchaon tti chojni que jeha judío inchin nchenchaon chojni judío, co cain na xajeho chojni Jesucristo na; rrocho inchin nacoa cuerpo cain na, co cain na yahi sayé na tti ndacho Dios que rrochjá na ixin dotticaon na Jesucristo.

⁷ Dios jehe anto jian para nganji janha ixin de joachaxin que jehe chonda, ixin jehe chjana xa de nichja joajna jiji.

⁸ Janha tonona que icha rentteha na de cain chojni Dios, pero masqui jamé, Dios chjana joachaxin jiji para ndattjan icha chojni que jeha judío tti jian joajné Jesucristo. Co joajna mé anto icha rentte que cainxin cosa nttihi ngataha nontte.

⁹ Dios tti joinchchjian cainxin cosa, coetonna para rrondattjan cain chojni tti jehe vacjagoha jian ngain cain chojni are icha saho.

¹⁰ Jamé conhe, para que jai de ixin cain chojni que ditticaon Jesús, cain ángel que chonda joachaxin nttiha ngajni tsonohe, tsinxin co satsoan icha tsje de tti danjo Dios, tti anto chonxin co nohe cain de cain tti jian.

¹¹ Dios joinchehe cain jiji inchin jehe xaxaon desde icha saho que jehe joinchchjian mundo jiji, co de ngain Jesucristo coenxin cain cosa jiji.

¹² Co de ixin tti joinchehe Jesucristo ján na jai ochonda na joachaxin para tsonchienne na ngain Dios. Jáan na chonda na confianza mé ixin dotticaon na ngain Jesucristo.

¹³ Mexinxin janha nttatsanha ñao ra que doanha ra desanimado ixin janha rriaxinna jai. Janha cain jiji jitonna ixin ndattjo ra tti jian joajné Jesucristo, co cain tti janha jitonna jiji rrocho chjoin para ixin jaha ra.

Pablo nchetsenhe ñao Dios para rrochonxin na quexén Cristo rinao jehe na

¹⁴ Mexinxin janha darittoxin nntajochjihna ngattoxon con Dios Ndodé Jesucristo.

¹⁵ Co jehe Dios jiji tti Ndodé cain chojni que te nntihi ngataha nontte, co de ángel que te nntiha ngajni; jecho Dios jiji tti Ndodaha desde nntiha ngajni co hasta nntihi ngataha nontte.

¹⁶ Janha nntatsán ñao Dios que de ngain cain tti jian que jehe chonda, rrochjá ra joachaxín co sinchesoji espiritua ra de ixin Espíritu Santo que jehe rrochjá ra,

¹⁷ para que Jesucristo mismo nchao sehe ngain ansean ra ixin jaha ra ditticaon ra jehe. Co janha nntatsán ñao Dios que jaha ra anto sinao ra cain chojni ixin jaha ra osoji tengattjen ra ngain Dios inchin ná nttá que jingattjen soji ixin noehe nnta nihnga teḡavá.

¹⁸ Co jamé para que jaha ra co icha chojni que ditticaon jehe nchao tsinxin ra jian queḡén Jesucristo anto rinao na ján na.

¹⁹ Janha danchiá Dios que jaha ra rrochonxin ra queḡén jehe anto rinao ra para que jamé ḡonhi sinchetján ra ixin Dios sehe nganji ra. Janha danchia jiji masqui ḡonhi chojni nchao tsinxin cainxin de queḡén Dios rinao chojni.

²⁰ Co jai de ixin joachaxín Dios que jí nganji na, sonttosayehe na jehe ixin jehe tti chonda joachaxin para sinchehe anto icha tsje que tti ján na danchiehe na, o icha que de tti ján na ḡaxaon na.

²¹ Que cain chojni que ditticaon Jesucristo, conixin jehe Jesucristo cai, cainxin na sinchesayehe na jehe Dios para cainxin tiempo. Amén.

4

Cain chojni que chonda Espíritu Santo te na inchin nacoa chojni

¹ Mexinxin janha que rriaxinna jai ngain cárcel ixin nntanoha ra tti jian joané Jesucristo nntatsanha ñao ra que nchehe ra jian inchin jiquininxin sinchehe chojni que Dios coinchiehe, ixin jehe coinchiaha jaha ra.

² Dintteha ra inchin chojni orgulloso, nchehe ra jian ngain icha chojni, co chondehe chó ra paciencia, co ttiacoehe chó ra ixin rinao chó ra cain ra.

³ Nchehe ra de que cainxin tiempo dintte ra inchin nacoa chojni ixin Espíritu Santo tsjenguijna ra para sinchehe ra jamé ixin jehe danjo tti ḡjoin que tsonohe ansean ra.

⁴ Ixin cainxin na, ḡo dotticaon na Jesucristo, te na inchin nacoaxinxon cuerpo para ixin jehe, co cain na chonda na ḡajeho nacoaxinxon Espíritu Santo, co Dios ndattjo na cain na ixin seguro rrochonda na iná vida naroaxin cainxin na.

⁵ Co jí jecho nacoaxinxon Jesucristo, tti chonda cain joachaxin para ixin ján na, co jecho jehe tti jiquininxin sotticaon na ján na, co cainxin na diguite na para ḡago ixin ján na chojni Jesucristo,

⁶ co jí jecho nacoaxinxon Dios, tti Ndodé cainxin chojni. Co jehe tti ttetonha cain cosa, co jehe nchegonda chojni para nchehe ḡé jehe nntihi ngataha nontte, co jehe jí nganji na cainxin na.

⁷ Pero cada na ján na Jesucristo ḡjá na naná clase de joachaxin inchin jehe joiñao.

⁸ Mexinxin ndaḡo ngain tti jitaxin Palabré Dios: Jehe saccoajín para ngajni, jamé joinchehe para cjoago que jehe ojoacha ngain cain tti ningaconhe jehe,

co ngain rato mé joanjo joachaxín jehe ngain tti chojni que ditticaon jehe.

⁹ ¿Co attinxin ra de ixin quehe rrocho jihi tti “jehe saccoajín”? Jihi rrocho que saho jehe xincanji hasta tti čhingui nontte.

¹⁰ Co xajeho jehe tti xincanji, mé tti saccoajín hasta tti ngain parte icha noi de ngaini para que jamé Jesús jí ngain cainxin lugar desde nntihi ngataha nontte co hasta ngaini.

¹¹ Co jehe chjá na cada na xo dotticaon na jehe ná clase de joachaxin. Canxion na chjá na joachaxin de nirepresentanté jehe, co icanxin na chjá na tti joachaxin de ndache na icha chojni tti joajné Dios que jehe mismo nttanoa na, co icanxin na chjá na joachaxin de ndache na icha chojni tti jian joajna que danjo iná vida naroaxin, co icanxin na chjá na joachaxin de tenda na chojni ngain icha nihngo, co icanxin na chjá na joachaxin de nttocoenhe na icha chojni ngain nihngo de ixin Dios.

¹² Co jañá cain joachaxin yá danjo Jesucristo ngain chojni para que jehe na nchao sinchehe na xé jehe co para que chojni jehe tosoji na ngain tti ditticaon na. Co cain chojni mé inchin cuerpoe Jesucristo.

¹³ Jamé hasta que cainxin na sontte na inchin nacoa chojni ngain tti dotticaon na co tsinxin na cainxin de ixin Xenhe Dios. Co jamé, sontte na chojni de jian joarrixaon para ngattoxon con Dios ixin sontte na inchin Jesucristo mismo.

¹⁴ Are mé ján na isontteha na inchin xannchinnchinchjan que anto daca ttentoxinhi xan tti xaxaon xan, ni isontteha na inchin ca dixema que anto daca sadicao čhintto, rrocho que are mé isotticaonha na tti ndačo canxion chojni que rinao sinttayá na ixin tjagoa na de ixin Cristo, pero jeha mero ndoa tti jehe na sinttacoán na na, jeha rinao na que ján na sonttoho na inchin jehe na tenchehe na.

¹⁵ Sino que ján na sonttoho na tti mero ndoa que rinao Dios ixin sonao chó na. Co chonda na que sonttosoji na espiritua na para que jamé nchao sontte na conixin Jesucristo, inchin nacoa chojni ixin cain chojni que ditticaon jehe tonchjian na inchin nacoa cuerpo co Jesucristo jehe tti já cuerpo jihi.

¹⁶ Inchin cada parte de cuerpo tetsexin chó, jamé ján na are čhjoin dotticaon chó na de ixin Jesucristo. Co inchin já na ttetonhe cuerpoa na para nchehe inchin jehe já na rinao, jamé cai Jesucristo ttetoan na ján na. Co mexinxin are ján na sonttoho na inchin rinao Jesucristo, co sonao chó na, cottimeja cain na junto nttosoji na espiritua na co ttjenguijna chó na.

Tti vida naroa que chonda na ixin dotticaon na Jesucristo

¹⁷ De ixin joachaxín nombré Jesucristo, jaxon janha rrindattoj ra, co rritetonha ra que ixonhi icha cosa jianha nchehe ra inchin tenchehe tti chojni que ditticaonha tti ttetonha Dios, co nchehe na inchin jehe na te xaxaon na. Co tti jehe na te xaxaon na, mé xonhi xé.

¹⁸ Co chojni mé joarrixaoen na te inchin ngain tti naxin xehe ixin ttinxinha na de ixin Dios. Chojni mé chondaha na tti vida naroa que danjo Dios ixin jehe na choxinha na quehe rinao Dios ixin ansén na anto cha para ngain Dios.

¹⁹ Chojni mé itosoeha na de cain tti jianha que nchehe na, co ndadi xanjo na para nchehe na tsje cosa jianha, co hasta ché na are nchehe na cain cosa jianha mé.

²⁰ Pero jaha ra jeha jañá coangui ra ngain Jesucristo,

²¹ si ndoa jaha ra coinhi ra de ixin jehe, co coangui ra de ngain jehe Jesús tti ndoa que jehe chonda.

²² Mexinxin jai jaha ra incheha ra cain cosa jianha que vanchehe ra are saho. Ixin vida mé anto feo ixin cosa jianha que vaᵗaxaon joarrixaoan ra mé tti jointtayaha ra para vanchehe ra jamé.

²³ Dittoaxin ra que Dios tsentoxinhi joarrixaoan ra co ansean ra,

²⁴ co ngain vidá ra naroa nchehe ra joxon cosa jian inchin rinao Dios, co jamé sicon chojni ixin jaha ra chonda ra ná vida jian para ixin Dios. Jaha ra chonda ra que nchehe ra joxon jian inchin jiquininxin ngain vidá ra.

²⁵ Mexinxin jaha ra ichondaha ra que nichja ra mentira, sino que cada ra ndache chó ra joxon tti ndoa, ixin cain na ján na rroᵗho parte de cuerpoe Jesucristo.

²⁶ Si tsoñao ra, pero ncheha ra jianha, co tanᵗhjandaha ra coraje mé sehe ngain ansean ra ngoixin nchanho.

²⁷ Chjeha ra inᵗhínji ni rioho oportunidad de sehe nganji ra.

²⁸ Si ᵗhonja ra vaquehe ra cosé iná chojni, jai incheha ra jamé, icha jian nchehe ra ná ᵗa jian conixin rá ra para que jamé nchao sachá ra tomia ra co jamé rrochonda ra nchion tomi para tsjenguijnaxin ra chojni noa.

²⁹ Nichjaha ra palabra jianha, sino que tangui ra nichja ra joxon palabra jian que tsjenguijna ngain espiritue cain chojni que tsinhi, co palabra mé sicao ná cosa jian ngain chojni mé.

³⁰ Co ᵗonhi cosa jianha nchehe ra para que sechina Espíritu Santo de Dios nganji ra, ixin Dios rroanha Espíritu jíhi nganji ra para ná señal que jaha ra ochojni jehe co jañá sintte ra hasta ngain tti nchanho que jehe tsjehe sincheróa ra de cainxin tti jianha que nchehe ra.

³¹ Ttenchjianha ra coraje co itoñaoeha chó ra co itoyaoᵗteha chó ra co ifeoha ᵗoache chó ra co incheha ra cosa jianha.

³² Ncheha ra cain mé, dintte ra chojni jian, co ttiaconoehe chó ra ná co ná ra co nchetjañehe chó ra ná ra co ná ra, jamé inchin Dios jointtatjañaha ra jaha ra ixin ditticaon ra Jesucristo.

5

Quexén jiquininxin sintte chojni Dios

¹ Jaha ra oxenhe Dios que jehe anto rinao, mexinxin chonda ra que sinchehe ra jian inchin jehe nchehe.

² Rinao chó ra ngain vidá ra, jamé inchin Jesucristo rinao na cainxin na. Co inchin chojni are saho vagoen na coleco para que Dios vanchetjañehe na tti jianha que vanchehe na, cai Jesucristo ᵗanjo venhe jamé para que ján na vitjañá na para cainxin tiempo tti jianha que nttoho na. Co Dios anto joincheᵗoxinhi tti joinchehe Jesús para cjoenguijna na cainxin na.

³ Co jai jaha ra que ochojni Dios ra, ni ichondaha ra que rroᵗaxaon ra de sintteᵗhincoho ra iná nᵗhí que jeha nᵗhíᵗhíha ra, ni de quexeho iná cosa jianha, ni de rrochonda ra anto tsje cosa.

⁴ Nichjaha ra palabra grosería, ni palabra que ᵗonhi xé, ixin jiquininxinha que chojni Dios rronichja jañá; icha jian danjo ra gracias ngain Dios.

⁵ Jaha ra onoha ra que ixin chojni jianha ᵗhoha rrochonda na parte ngain tti tettonha Jesucristo co Dios. Jíhi rroᵗho tti chojni que deᵗoacaho nᵗhí que jeha nᵗhíᵗhíhi, o nchehe iná cosa jianha, o que rinao rrochonda anto tsje cosa, ixin jehe tti icha rinao rrochonda tsje cosa de ntᵗihi ngataha nontte co ᵗaxaonha de ixin Dios, chojni mé ᵗajeho inchin jehe tti nchesayehe ídolo.

⁶ Dittoaxinha ra para sinttayaha ra icanxin chojni conixin palabra que xonhi xé ixin jamé ttixin castigoe Dios anto soji ngain tti chojni que ditticaonha tti ttetonha Dios.

⁷ Ni tatoha ra cain chojni que nchehe jamé.

⁸ Are saho jaha ra vintte ra inchin ngain tti naxin xehe, pero jai ote ra inchin ngain joadingasán ixin ditticaon ra Jesucristo co te ra inchin nacoa chojni conixin jehe. Mexinxin cain tiempo nchehe ra inchin nchehe chojni que te ngain joadingasán,

⁹ ixin joadingasán mé tti ttjenguijna na para nttoho na jian ngain chojni, co para nichja na tti ndoa, co para nttoho na inchin jiquininxin ngain vidá na.

¹⁰ Tangui ra nchehe ra jeho tti rinao Jesucristo.

¹¹ Ncheha ra cosa que xonhi xé que nchehe tti chojni que rridintte inchin ngain tti naxin xehe. Sino que nchenohe ra chojni mé que ixin tti jehe na tenchehe na, mé jianha.

¹² Co hasta soaxin rronichja ni tti jehe na nchehe na jimao.

¹³ Pero are cain mé rroxago ngain joadingasán, cainxin tsononxin, ixin joadingasán sinchenonxin cainxin.

¹⁴ Mexinxin ojitaxin:

Xingamaha, jaha que tarriçhin,
dingattjénxin de ngayehe nindadiguenhe,
co Jesucristo sinttangasanha jaha.

¹⁵ Mexinxin ttjiho ra cuidado jian tti jaha ra sinchehe ra. Ncheha ra inchin chojni que xonhi chonxin, sino que nchehe ra inchin chojni que chonxin jian.

¹⁶ Co nchegonda ra cada oportunidad que rrochjá ra Dios para nichja ra joajné jehe ngain icha chojni ixin ngain tiempo jihi anto tsje chojni tenchehe jianha.

¹⁷ Co dintteha ra chojni que ttinxinha de ixin Dios sino que tangui ra ttinxin ra jian quehe rinao Jesucristo.

¹⁸ Dinttecoanha ra ixin tti coan ni ndanchetján ni. Sino que cain nchanho dintte ra conixin joarrixaoan ra jian co dittoaxin ra que Espiritu Santo tsetonha ngain ansean ra.

¹⁹ Ndache chó ra naná ra conixin salmo, co tsje ra himno co coro, jamé jaha ra rrotsje ra co sinchecoanxinhí ra Jesucristo conixin ansean ra.

²⁰ De cainxin cosa jaha ra danjo ra gracias ngain Dios Ndodá na de ixin joachaxín Jesucristo, tti chonda cain joachaxin para ixin ján na.

Tti jiquininxin sinchehe ni conixin nindoha ni are oditticaon ni Jesucristo

²¹ Chondehe chó ra respeto cada ra ixin jamé rroxago que chonda ra respeto ngain Dios.

²² Jaha ra xo nchí ra ditticaon ra tti tsetonha ra xixiha ra, jañá inchin jaha ra ditticaon ra tti ttetonha Jesucristo.

²³ Ixin xí tti jiquininxin ttetonha ngain nchíçhihi, jamé inchin ttetonha Jesucristo ngain cain chojni que ditticaon jehe. Co cai jehe Jesucristo tti ttjenguijna ján na para rrochondaha na castigo de cain cosa jianha que nttoho na, co cain na xo dotticaon na jehe te na inchin cuerpoje jehe.

²⁴ Jañá inchin cain chojni Jesucristo ditticaon na tti ttetonha jehe, jamé cai cain nchí chonda ncha que sitticaon ncha cain tti tsetonha xixihi ncha.

²⁵ Jaha ra xo xí ra rinao ra çilha ra, jañá inchin Jesucristo jehe rinao chojni, hasta joanjo vidé para ixin jehe na.

²⁶ Jañá joinchehe jehe para joincheroa ansean na xo dotticaon na jehe para ixin Dios. Co jehe jointtaroa na ixin ján na joiguittixin na jinda co cai conixin palabré jehe.

²⁷ Jañá joinchehe jehe para que are ján na tsonchienne na ngattoxon con jehe, xonhi cosa jianha sehe ngain ansean na, sino que sontte na joxon chojni jian para ixin jehe que rrochondaha na ni ná mancha jianha ngain ansean na are mé.

²⁸ Jamé xí cai chonda que sinao xa nñiçhihi xa, inchin jehe xa rinao xa cuerpoe xa. Co xí que rinao nñiçhihi, jamé rinao xa cuerpoe xa cai.

²⁹ Seguro que xonhi chojni tti rinaoaha cuerpoe; cain ni rinao ni cuerpoe ni ixin chjé ni cuerpoe ni tti techonxin cuerpo, co dicao ni cuidado de ixin jehe cuerpo. Co jamé nchehe Jesucristo nganji na ján na xo dotticaon na jehe,

³⁰ ixin ján na cuerpoe Jesús, co ján na de ngain cuerpoe jehe inchin de nntaohe co nntaloro.

³¹ Mexinxin ndaço ngain tti jitaxin Palabré Dios: “Xí saçhjendehe xa ndodé xa co janné xa, para secoa xa jehó çhihi xa, co cayoxin na sintte na inchin nacoa chojni.”

³² Co jihí ná cosa jimao que anto importante, co janha ndaçhjan que rroçho de ixin Jesucristo conixin cain chojni que ditticaon jehe.

³³ Pero cai rroçho que cada ra chonda que rinao ra nñiçhiha ra, inchin rinao ra cuerpoe ra. Co jaha ra xo nñí ra chonda que rrochonda ra respeto ngain xixiha ra.

6

¹ Co jaha ra xo xannchinnchinchjan ra, chonda que sitticaon ra tti tsetonha ra ndodá ra co janná ra ixin jamé jiquininxin sinchehe chjan que ditticaon Jesucristo.

²⁻³ “Ttjiho ra respeto ngain ndodá ra co ngain janná ra para que rrochaha ra co para que sinttechon ra tsje nano ngataha nontte jihí.” Jihí tti saho mandamientoe Dios que ndaço jehe sinchenchaon cain chojni que sinchehe jamé.

⁴ Co jaha ra, xo ndodaha ra, ncheha ra feo ngain xanha ra para que jehe xan soanha xan desanimado, sino que nchecoenhe ra xan sitticaon xan cain tti tsetonha ra xan, co nchecoenhe ra xan que xén sitticaon xan Jesucristo, tti chonda cain joachaxin para ixin ján na.

⁵ Co jaha ra, xo ninchehe xa ra, ditticaon ra tti tsetonha ra ninajnia ra ntthi ngataha nontte, ditticaon ra na conixin respeto, co chonda ra joaxaon ngain na, co ditticaon ra na conixin ansean ra jian. Jañá inchin jaha ra rrojincehe ra xé Jesucristo.

⁶ Are sinchehe ra xé na, doan ra purado jeoha are tatetsjehe na para sittoaxin ra jian ngain na, sino que nchehe ra xa inchin ninchehe xé Jesucristo, co nchehe ra xa jian inchin rinao Dios.

⁷ Nchehe ra xa mé conixin jian ansean ra inchin ná xa que jaha ra rrojincehe ra ngain Jesucristo, co nahi ngain chojni.

⁸ Ixin jaha ra onoha ra que cada chojni masqui ninchehe xa de ngain iná chojni o tti chojni que jeha ninchehe xa, pero cada chojni Jesucristo tsjenguehe na hna inchin tti jian que jehe na joinchehe na.

⁹ Co jaha ra, xo najni ra, xajeho jamé nchehe ra jian ngain ninchehe xá ra, co xonhi tiempo nchexaon ra na. Xaxaon ra que jaha ra conixin jehe na xajeho chojni Jesucristo que ttjen ngajni, co para ixin jehe, jaha ra jeha icha jian ra que jehe na; para ixin jehe cain chojni xajeho na.

Tti tsetoxin chojni Dios ngain espíritu jianha

¹⁰ Co jai, hermanos, dintte ra soji ngain Jesucristo de ixin tti anto soji joachaxin que jehe chonda ixin jaha ra te ra inchin nacoa chojni conixin jehe.

¹¹ Co nchegonda ra cain joachaxin que Dios chjá ra, para que sintte ra soji are inchínji rinao sinttayaha ra.

¹² Ixin jaha tettetocoho na chojni de nttao co loro, sino que ján na tettecoko na espíritu jianha que choha dicon ni. Co espíritu mé chji ngataon chintto, co espíritu mé tti chonda joachaxin ngain tti chojni que ditticaonha Jesucristo.

¹³ Mexinxin jaha ra dayehe ra cain joachaxin que Dios chjá ra para que nchao tsixinha ra ngain tti nchanho que tsí are anto tanguí tsonha ra, co despúes de sinchehe ra jamé, nchehe ra sigue de dintte ra soji ngain Dios.

¹⁴ Jamé dintte ra soji ngain Dios. Dinttechiha ra jian conixin tti palabra ndoa que chjá ra Dios ixin palabra mé inchin cinturoen xisoldado. Co tti jian que nchehe ra, mé tti rrocayacoen cuerpoa ra are inchínji sinao sinttayaha ra inchin tti chia que dinttengá pechoe xisoldado para que didoha xa espada are tteto xa conixin espada.

¹⁵ Dintte ra listo para dindache ra chojni joajné Jesucristo inchin are xisoldado tjanga xa tteroe xa para dintte xa listo ngain guerra.

¹⁶ Co tti jaha ra ditticaon ra, mé inchin ná escudo para cayacoenxin ra cain cosa jianha que rrorroanha inchínji, inchin xisoldado cayacoenxin xa escudo cain fleché chijno que tja xicontrarioe xa.

¹⁷ Co tti vida naroaxin que chonda ra, mé inchin casco que sinttengá já ra inchin cascoe xisoldado. Co palabré Dios nchegonda ra inchin espada que Espíritu Santo chjá ra.

¹⁸ Nchecoanxinhí ra Dios para que nchao sinchehe ra cain cosa jihi; nchetsenhe ra ñao Dios co danchiehe ra cainxin tiempo conixin joachaxín Espíritu Santo. Co para que nchao sinchehe ra cain jihi, dintte ra listo co xonhi tiempo doan ra desanimado, co nchetsenhe ra ñao Dios para que jehe tsjenguijna cain chojni jehe.

¹⁹ Cai nchetsenhe ra ñao Dios para que jehe rochjana palabra que janha rronichja are rrondattjan icha chojni joajné jehe, co para que janha rroxaonha na rronichja are sinttanoa na quehe rrocho joajné Jesucristo que danjo iná vida naroaxin co joajna mé nonxinha vehe are saho.

²⁰ Dios chjana xa de rrihi representanté jehe para nichja joajna jihi. Co mexinxin rriaxinnanxin jai ngain cárcel. Nchetsenhe ra ñao Dios para que jehe tsjenguijna para rroxaonha na janha de rrondattjan icha chojni joajna jihi inchin jiquininxin.

Pablo joexin cjin carté co rroanha joajna

²¹ Tíquico, jehe cai anto jian ditticaon Jesucristo, co tti ján na anto rinao na, co tti cain tiempo ttjenguijna na janha ngain xé Jesucristo, jehe rrondattjo ra de cain tti janha jitonna, co de cain tti janha rrinttaha.

²² Mexinxin janha rroanha jehe nganji ra para que jehe rrondattjo ra de quexén te na janha na nttihi, co jamé jaha ra rochaha ra.

²³ Dios Ndodá na co Jesucristo, tti chonda cain joachaxin para ixin ján na, sanjo ngain chojni que ditticaon jehe tti chjoin que tsonohe ansén na, co tsjenguijna na para sinao chó na ixin ditticaon na jehe.

²⁴ Co Dios sinchenaon ngain cain chojni que anto rinao na Jesucristo, co que xonhi tiempo ttentoxinhi na de tti jehe na rinao na Jesucristo. Amén.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Filipos

De ngain cárcel rroanxin Pablo joajna para chojni ngain Filipos

¹ Janha Pablo na co Timoteo ninchehe xé Jesucristo techjaha ra joajna ngain carta jiji; jaha ra xo ditticaon ra Jesucristo ngain ciudad de Filipos. Co carta jiji cai para ixin cain chojni que chonda joachaxin ngayaha ra co cai para cain tti chojni que ttjenguijna nichonda joachaxin ngayaha ra, que cain chojni mé conixin jaha ra chojni Dios ixin ditticaon ra Jesucristo.

² Dios Nnodá na co Jesucristo, tti chonda cain joachaxin para ixin ján na, sinchenaon nganji ra co rrochjá ra tti čhjoin que tsonohe ansean ra.

Pablo vanchetsenhe ñao Dios para ixin chojni Jesucristo

³ Cada nttiha que janha xaxanho jaha ra, janha danjo gracias ngain Dios de ixin jaha ra.

⁴ Co janha anto chahna are nttatsán ñao Dios para cainxin jaha ra

⁵ ixin cainxin jaha ra cjoenguijna ni ra para que janha nchao ndattjan icha chojni tti jian joajné Jesucristo desde are nacoexinxon ra hasta jaxon.

⁶ Dios coexinhi joinchehe tti jian ngain vidá ra, co janha chonda seguro que jehe xa sinchehe tti jian mé hasta que jaha ra sintte ra joxon jian ngain nchanho que Jesucristo tsí.

⁷ Anto jiquininxin rroaxanho jañá de ixin cain jaha ra ixin anto rinaho jaha ra ixin Dios jointtanchaon jaha ra inchin joinchenaon na janha para toña na xajejo masqui janha diaxinna o masqui janha tonchián ngain xinčixin para nttadefendé tti jian joajné Jesucristo, co para janha ndačhjan que seguro ndoa co jian joajna mé.

⁸ Dios nohe que janha anto rinaho cain jaha ra, co mé tti joixin de ngain Jesucristo.

⁹ Janha are nttacoanxian Dios, janha danchia que jaha ra icha sinao chó ra co icha sinao ra Dios cai. Co danchia que tsonoha ra quexehe cosa jian para ixin Dios co jaha ra tsinxin ra cainxin cosa mé inchin Dios ttinxin,

¹⁰ para que cain tiempo tsonoha ra tsinchiehe ra tti jian. Jamé nchao rrochonda ra ná vida roa co ixonhi cosa jianha sehe nganji ra are Jesucristo tsí.

¹¹ Jañá para que vidá ra sehe inchin ná jian cosecha ixin tecaon ra de cosa jian que danjo Jesucristo, jamé jaha ra sinchesayehe ra Dios de ixin vidá ra co vidá ra tsjago que jaha ra anto jian ditticaon ra Dios.

Pablo ndačo que para ixin jehe, Jesucristo mé tti vida

¹² Janha rinaho que jaha ra tsonoha ra que cain cosa que janha conná, cain cosa mé cjoenguijna na para que janha nichja tti jian joajné Jesucristo.

¹³ Mexinxin jai cainxin xisoldadoe xiemperador co cain icha chojni nohe na que janha rriaxinna por ixin ndattjan chojni joajné Jesucristo.

¹⁴ Co jai que janha rriaxinna, icha tsje chojni que ditticaon Jesús coexinhi na nichja na jehe joajné Dios co xaonha na co icha tsje confianza chonda na ngain Jesucristo, tti chonda cainxin joachaxin.

15 Ján, ndoa que canxion chojni nichja na de ixin Jesucristo pero ixin tonchjoehe na nganji janha co toñaona na, pero ittoha chojni ndoa nchehe na de jian.

16 Co tti chojni que toña co tonchjoehe nichja na de ixin Jesucristo ixin rinao na sintte na icha importante co nahi ixin jehe na rinao na Jesucristo, ixin cain jehe na rinao na que janha icha tanguí tsonna jai que rriaxinna.

17 Pero ittoha na tenchehe na ixin rinao na Jesucristo co rinao na na janha ixin nohe na que ntthi rrihi janha ixin rrinttadefendé tti jian joajné Jesucristo.

18 Pero janha ndosennaha de quexeho de cayoi manera mé, ixin masqui jehe na nichja na de jian o ni nahi, pero jehe na xa nichja na de ixin Jesucristo. Mexinxin janha anto chahna.

Co janha xa rrochahna icha

19 ixin janha nona que cain tti janha tsonna, jiji atto jian para ixin janha ixin jaha ra nchetsenhe ra ñao Dios para ixin janha co ixin Espíritu Santo que rroanna Jesucristo ttjenguijna na janha.

20 Janha rinaho sinttaha cain cosa jian co jamé tsooanaha ngattoxon con Jesucristo. Janha rinaho rronichja conixin cainxin confianza inchin jaxon co para cainxin tiempo, para que icha chojni sicon na icha co icha que janha rrinttasayá Jesucristo, masqui janha rrichon o ndasenne na.

21 Janha rinaho sarichon para sinttaha jecho inchin rinao Cristo, pero are ndasenne na, mé tti sacha.

22 Pero si janha xa sarichon ngain cuerpo jiji, janha xa rroundattjan chojni tti jian joajné Jesucristo, tti chonda cain joachaxin. Mexinxin janha ni nonaha quexehhe tti tsinchiá.

23 Para ixin janha atto tanguí para tsinchiá cayoi cosa yá. Janha rrojinaho ndarroguenhe na para tsji sigarihi ngain Jesucristo, co jamé icha jian para ixin janha.

24 Pero para ixin jaha ra icha jian para janha sarichon ngain cuerpo jiji.

25 Co ixin janha rrihi seguro de cain jiji, janha nona que xa sittona nganji ra para que tsjenguijna ra para sitticaon ra icha co para que rrochaha ra icha ngain tti jaha ra ditticaon ra.

26 Co ná nchanho janha rrocjan na sasotsjaha ra iná co jamé rrochonda ra icha razón para rrochaha ra de ixin Jesucristo.

27 Janha rinaho que dintte ra jian ngain vidá ra inchin tettonha joajné Jesucristo. Jamé para que si janha saso sasotsjaha ra o cjin sarihi de jaha ra, janha sayá joajna ixin cainxin ra jaha ra xa ditticaon ra Jesucristo co te ra inchin nacoa chojni, co nichja ra tti jian joajné Jesucristo,

28 co ninchin dittoaxinha ra xaon ra ngain chojni que ningaonha ra. Cain jiji ná señal atto nonxin que jehe na teditján na de ixin cosa jianha que nchehe na, pero xago cai que jaha ra rrochonda ra iná vida naroaxin, co cain jiji ttixin de ngain Dios.

29 De ixin Jesucristo jaha ra chonda ra oportunidad jeoha de ditticaon ra jehe, ixin cai para tanguí tsonha ra de ixin jehe.

30 Jaha ra conixin janha tenttoho na xajeho xa de ixin joajné Jesucristo. Jaha ra ovicon ra icha saho quexén jointtaha xa mé, co jai noha ra quexén janha xa rrinttaha xa mé.

2

Tti nchehe Jesucristo para ixin ján na

¹ Jamé Cristo chjá ra ánimo, co chonda ra consuelo ixin jehe rinao ra, co chonda ra xajeho Espíritu Santo que jehe rroanha, co ttiaconoehe ra chojni.

² Si ndoa cain jihí chonda ra, rinao chó ra co ditticaon chó ra para que cain ra sintte ra inchin nacoa chojni, co jamé janha anto rrochahna.

³ Xonhi cosa sinchehe ra para que jaha ra sintte ra icha importante, ni ncheha ra que jaha ra icha noha ra, co xaxaonha ra que jaha ra icha jian ra que icha chojni; sino que naná ra xaxaon ra que icha chojni icha jian na que jaha ra.

⁴ Ttjeha ra tti jian jeha para ixin jaha ra; sino que ttjé ra tti jian para cain icha chojni cai.

⁵ Janha rinaho que cain jaha ra xaxaon ra inchin Jesucristo xaxaon

⁶ ixin masqui jehe cai Dios, pero joinaoha joinchegonda joachaxin que Dios chonda.

⁷ Jehe joinchegondaha joachaxin mé are jehe concijhi inchin ná xí co vehe inchin ná nchehe xa.

⁸ Co are jehe vehe ná xí, jehe vittoeixin co vitticaon cain tti ndačo Dios hasta jehe ndavenhe, masqui soaxin de que jehe ndavenxin nganito cruz.

⁹ Mexinxin Dios chjé cain joachaxin co Dios ndačo que icha importante nombré Jesús que de cainxin nombre.

¹⁰ Jamé joinchehe Dios para que cain na rrochonda na respeto are tsinhi na nombré Jesús. Co sinttettoxin nttajochjihí cainxin tti te ngajni co cainxin tti te ngataha nontte co cainxin tti te ngain infierno

¹¹ para que cain yá rrondačo que ixin Jesucristo, mé tti chonda cainxin joachaxin, co jamé tosayexin Dios Ndadá na.

Cain chojni que ditticaon Jesucristo inchin ná conotse que tetongúxin are naxin xehe

¹² Mexinxin hermanos, inchin jaha ra vitticaon ni ra janha cainxin tiempo are janha joarihi nganji ra, ditticaon ra icha jai que cjin rrihi de nganji ra. Dios ondačo que jaha ra ixonhi castigo rrochonda ra ixin ditticaon ra Jesucristo. Mexinxin cain nchanho nchehe ra jian. Co chonda ra cuidado que ncheha ra cosa jianha que Dios nchexoxinha

¹³ ixin jehe Dios tti chjá ra tti jian que xaxaon ra, co ttjenguijna ra para sinchehe ra jamé inchin jehe rinao.

¹⁴ Cain yá nchehe ra, pero toñaoha ra ni ttetocoha chó ra

¹⁵ para que ni ná chojni rrondačoaha que ixin jaha ra tenchehe ra cosa jianha co para que jaha ra sintte ra joxon chojni jian. Jaha ra xenhe Dios, mexinxin dintte ra jian ngayehe chojni que nchaoha nchehe. Jaha ra tongúxin ra ngayehe chojni mé inchin cain conotse ngain tti naxin xehe

¹⁶ are jaha ra tsjiohe ra na tti joajna que danjo iná vida naroaxin. Jañá, para que are tsí Jesucristo janha nchao tsonona chjoin de ixin jaha ra ixin are mé janha tsonona que tti xa que janha jointtaha jeha jamaoncoa ni coingaha jamaoncoa.

¹⁷ Co masqui janha senhe na para que cuerpona rroxettexin de tti jaha ra danjo ra ngain Dios ixin jaha ra ditticaon ra jehe, janha chahna co rinaho que cain jaha ra rrochaha ra cai.

¹⁸ Chaha jaha ra cai co chaha ra inchin janha chahna.

Tti joinchehe Timoteo co Epafrodito

¹⁹ Jesucristo, tti chonda joachaxin para ixin ján na, si jehe sinao que janha rrorroanha Timoteo, janha rrorroanha jehe toin para siji sitsjaha ra co are jehe rrocjan, janha rrochahna are janha tsonona de ixin jaha ra.

²⁰ Ixin nttihi ixonhi iná chojni que chonda janha que rroḡaxaon inchin janha, co ḡonhi iná chojni ḡaxaon de ixin queḡén sintte ra jian.

²¹ Cain chojni nttihi icha rinao na jeho ḡé na nchehe na co nahi ḡé Jesucristo.

²² Pero jaha ra onoha ra que Timoteo jehe anto jian co cjoenguijna na janha para nichja na joajné Jesucristo inchin ná chjan que ttjenguijna xan ndodé xan.

²³ Mexinxin, janha rinaho rrorroanha Timoteo para siji sitysaha ra are janha tsonona quehe ḡaxaon chojni sinchehe nganji na nttihi tti rrihi.

²⁴ Co cai janha chonda confianza que Jesucristo, tti chonda cainxin joachaxin para ixin ján na, sanjo joachaxin para que janha mismo sasotsjaha ra.

²⁵ Pero cai ḡaxanho que rrogonda rrorroanha ra Epafrodito, tti xicompañerona de ngain ḡa que janha rrinttaha, tti jaha ra rroanna ra para cjoenguijna na ixin jehe vachjana tti janha vagondana.

²⁶ Jehe anto rinao sicon cain jaha ra co anto jita joachjaon ixin jaha ra conoha ra que ixin jehe conihi.

²⁷ Ján, ndoa que jehe venihi hasta merocoa ndarroguenhe, pero Dios coiaconoehé jehe, co jeoha jehe coiaconoehé Dios, cai janha, para que janha icoaha icha joachjaon, jeho joachjaon que tti janha chonda jaxon.

²⁸ Mexinxin janha anto rinaho rrorroanha jehe Epafrodito nganji ra para que jaha ra anto rrochaha ra are sicon ra iná, co para que janha isarichinha icha.

²⁹ Dayehe ra jehe Epafrodito thjoin ngain ansean ra inchin xanchó ra ixin jehe co jaha ra ditticaon ra Jesucristo, tti chonda cainxin joachaxin. Co cainxin nchanho chjehe ra respeto cain chojni que nchehe inchin jehe Epafrodito,

³⁰ ixin merocoa ndarroguenhe por ixin jehe joinchehe ḡé Jesucristo. Jehe coín en peligro vidé are jehe cjoenguijna na janha ixin jaha ra mismo choha cjoenguijna ni ra.

3

Pablo nichja de ixin vida que ján jian jí

¹ Co jai janha rinaho que rrochaha ra ngain Jesucristo, tti chonda cain joachaxin. Para ixin janha, ḡonhi molestia si rrocjan na rrondattjo ra iná tti ocjin na ixin nona que sonda para ixin jaha ra.

² Mexinxin janha rrindattjo ra iná que ttjiho ra cuidado de cain chojni que nchehe jianha inchin tti conia ditsi; cain chojni mé ta ḡohe de circuncisión ngain cuerpoe para ndaḡho que ixin jehe mero chojni Dios.

³ Pero ján na tti chojni que ndoa techonda na ḡohe ngain ansean na ixin ján na tti nttosayehe na Dios ngain ansean na co chá na ixin ján na chojni Jesucristo na, co chondaha na confianza ngain costumbré chojni.

⁴ Si costumbré chojni rrocojian ngattoxon con Dios, janha cai rrochonda confianza ngain cain costumbre mé. Co ḡonhi chojni rrochonda icha razón que janha para rrochonda confianza ngain costumbre mé.

⁵ Janha coá ḡohe de circuncisión are janha joarichonda jni nchanho de concjina, co janha razé chojni Israel, co janha de ngain grupoe Benjamín, co janha chojni hebreo na de are concjina ixin jannana co ndodana cayoi na chojni hebreo na. Janha vaguitticanho ley de chojni judío inchin tjago xifariseo.

⁶ Co janha anto jainao que cainxin chojni rrojinchehe na inchin costumbré chojni judío, mexinxin feo vanttaha ngain chojni que vitticaon Jesús. Co ngain vidana que janha joarichonda xonhi chojni vanichja ixin janha vaguitticaonha ley mé.

⁷ Pero cain cosa jihi, are saho para ixin janha anto jian, pero jai ndačhjan que cain cosa mé xonhi xé ixin jai janha joatsoan tti mero ndoa que tettonha Jesucristo.

⁸ Co icha que yá, janha ndačhjan que cain cosa mé xonhi rentte ixin icha rentte joatsoan palabré Jesucristo, tti chonda joachaxin para ixin janha. De ixin Jesucristo janha jointttatján cainxin mé co ndačhjan que cain cosa mé inchin caxineno ixin icha rentte que janha cjan na chojni Jesucristo

⁹ co rrihi conixin jehe. Icha saho janha vařaxanho ixin jian na ixin vaguitticanho ley de chojni judío. Pero jai nona que jehó Dios nchao ndačho si janha jian na o ani nahi, co jehe ndoa ndačho ixin jian na pero jehó ixin ditticanho ngain Jesucristo.

¹⁰ Joxon rinaho rrochonxin icha co icha de ixin Jesucristo co tsonona tti joachaxin que xechonxin are ndavenhe, co tsonona tti tanguí que jehe conohe co tsonna inchin jehe conhe are ndavenhe,

¹¹ para que janha nchao rrochonda confianza que ján rroxechon na conixin niondadenhe.

Pablo ndačho tti jiquininxin sinchehe ni para rrochonda ni iná vida naroaxin

¹² Jeha rročho que ixin janha ojoacha cain yá, ni jeha rročho que ixin janha ojian na, nahi, rročhoja jamé ixin janha řa sinttaha sigue icha ixin rinaho saríhi inchin Jesucristo rinao.

¹³ Janha mismo rriendattjo jaha ra que janha řa chondaha cain jihi, tti janha rrinttaha que janha rrotjařana cain cosa que ojointtaha, co jai janha sinttaha lucha para sacha tti jichonhe para ixin janha

¹⁴ para que janha tsjena řana co sacha tti premio que Dios que ttjen ngajni danjo nganji ján na ixin dotticaon na Jesucristo.

¹⁵ Janha rinaho que cainxin ra, řo anto jian ttinxin ra tti dotticaon na, řaxaon ra řajehó inchin janha řaxanho. Pero si ná cosa rrořaxaon ra ojé, Dios tsjagoha ra tti ndoa.

¹⁶ Pero chonda na que rrořaxaon na co sonttoho na inchin tti ocoanguí na.

¹⁷ Rinaho janha que nchehe ra inchin janha rrinttaha, co cai nchehe ra caso tti chojni que tenchehe inchin janha na jointtacoanha ra.

¹⁸ Janha ondattjo ra tsje nttiha, co řa cjan na rriendattjo ra iná hasta conixin ndacon que jai řa jí tsje chojni que nchehe jianha ixin jehe na ndosenha na que Cristo ndavenxin nganito cruz para ixin jehe na.

¹⁹ Pero ngain nchanho que tsí, cain chojni mé tsji na ngain infierno para cainxin tiempo ixin dios de jehe na jehó tti rinao cuerpoe na, co tti jehe na tenchehe na tonohe na anto čhjoin co řaxaonha na tosoé na ixin tti jehe na tenchehe na jehó joasoaxin para ixin jehe na. Jehe na jehó řaxaon na ngain cosa de ngataha nontte.

²⁰ Pero ján na ngajni jí nontteha na co techonhe na que de nttiha tsixin Jesucristo, tti chonda joachaxin para ixin ján na, co jehe tti tsjenguijna na para rrochondaha na castigo de cain tti jianha que jointtoho na.

²¹ Jehe tsentoxinhi cuerpoa na tehe, tti cuerpo que ndadenhe, para sayé na cuerpo inchin cuerpo que jehe chonda ngajni. Co jehe sinchehe mé conixin joachaxin que jehe chonda para tettonhe cainxin cosa.

4

Cainxin tiempo chaha ra ngain Jesucristo

¹ Janha anto rinaho sicon jaha ra. Co janha anto chahna de ixin jaha ra co jaha ra inchin tti sacha janha de ixin xa que rrinttaha janha. Co rinaho que jaha ra cainxin tiempo jian sitticaon ra Jesús, tti chonda joachaxin para ixin ján na.

² Janha nttatsán ñao cayoi nchí que dinhi Evodia co Síntique que sitticaon chó ncha inchin rrocji chó ncha ixin cayoi ncha ditticaon ncha Jesús, tti chonda joachaxin para ixin ján na.

³ Co jaha, tti xicompañerona que anto vitticaon na de ngain xa que janha rrinttaha, janha rinaho que jaha tsjenguijna cayoi nchí mé ixin jehe ncha cjoenguijna na ncha janha para ndattjan chojni tti jian joajné Jesucristo, cayoi nchí mé conixin Clemente cai co icanxin chojni que cjoenguijna na janha. Nombé cain chojni mé otetaxin ngain libroe Dios tti tetaxin nombé cain chojni que rrochonda iná vida naroaxin.

⁴ Cainxin tiempo Jesucristo jí ngain ansean ra, mexinxin janha rinaho que cainxin tiempo chaha ra ngain jehe. Rrocjan na rrondattjo ra iná: ¡Chaha ra cainxin tiempo ngain jehe tti chonda joachaxin para ixin ján na!

⁵ Janha rinaho que cain chojni rrochonxin jaha ra ixin nda ansean ra para cain chojni ixin Jesucristo, tti chonda joachaxin para ixin ján na, otoiñ tsí.

⁶ Taha ra joachjaon de ni ná cosa; cainxin tiempo ndache ra Dios cainxin tti tsonohe ansean ra, co danchiehe ra cain tti sondaha ra, pero danjo ra gracias ngain jehe.

⁷ Cottimeja jehe Dios rrochjá ra tti anto chjoin tsonohe ansean ra que ni cain chojni choha tsinxin ixin mé anto tsje co anto jian. Co si jaha ra chonda ra tti chjoin que tonohé ansean ra, xonhi joachjaon rrochonda ansean ra ixin ditticaon ra Jesucristo.

xaxaon ra ngain cosa jian

⁸ Co jai saho que janha tsjena carta jihi, rinaho rrondattjo ra icha. Ttenchjinha ra ngain joarrixaoan ra cain cosa ndoa, co cain cosa que jiquininxin respeto, conixin cainxin cosa que chonda jian joarrixaoan, cain cosa que joxon jian, cain cosa que sinchexoxinhi ansén chojni jian, co cain cosa que chojni nichja jian de ixin cosa mé. Jaha ra xaxaon ra cainxin cosa que jian co que jiquininxin tsosayehe.

⁹ Nchehe ra tti janha jointtacoanha ra. Tangui ra tti coinhi ra que ndachjan janha co tti vicon ra jointtaha. Nchehe jaha ra cain yá co Dios, tti chjé tti chjoin ngain ansén chojni, sehe nganji ra.

Tti joanjo chojni filipense ngain Pablo

¹⁰ Janha anto chahna ngain Jesucristo, tti chonda joachaxin para ixin ján na, ixin jaha ra ocjan ra xaxaon ni ra janha. Janha ndachjanha ixin ndatjañaha ni ra jehó ixin joichondaha ra oportunidad para cjoenguijna ni ra.

¹¹ Pero jeha ndachjan ixin janha anto gondana ixin janha onona chahna si janha chonda tsje o tsjeha.

¹² Janha nona quexén vidé ni are noa ni, co nona quexén vidé ni are anto chonda ni. Janha tonona chjoin ngain ansenna de ngain quexeho cosa mé; janha tonona chjoin ngain ansenna si tsehe jicaon o jidenhe jintta, co cai are xehe cosa, co cai are nañoinxon chonda.

¹³ Janha nchao tsixinna ngain cain cosa ixin Jesucristo nchesoji na janha.

¹⁴ Masqui jamé, jaha ra joinchehe ra jian ixin cjoenguijna ni ra janha de ngain cain cosa tangui que dattoa.

¹⁵ Jaha ra xo Filipo ra noha ra cai are janha sacjoixin de ngain regioen Macedonia co coexian ndattjan chojni tti jian joajna, jehó jaha ra ngain nihngo nttiha Filipos cjoenguijna ni ra janha ixin rroanna ni ra tti janha gondana. Jaha ra joinchehe ra jamé ixin chaha ra ixin janha tti jointtacoanha ra quežén sitticaon ra Jesús.

¹⁶ Are janha ža joarihi ngain Tesalónica, jaha ra rroanna ni ra tomi icha que ná nttiha para que vagondana.

¹⁷ Pero janha žaxaonha jehó ngain tti janha dayá ixin icha rinaho que jaha ra rrochonda ra icha premio ngain Dios.

¹⁸ Janha ovayá cainxin hasta ovayá icha de tti dondana. Conixin tti jaha ra rroanna ni ra ngain Epafrodito janha chonda tsje. Tti tomi que jaha ra rroanna ni ra, mé inchin tti tsjoca que anto žjoin žajni que jaha ra danjo ra ngain Dios que jehé nchežoxinhi.

¹⁹ Dios que ttjen ngajni chonda cain cosa jian co rrochjá ra cain tti rrogondaha ra ixin jaha ra ditticaon ra Jesucristo.

²⁰ Co Dios Ndodá na que ttjen ngajni, ¡nchecoanxinhi ra Ndo cainxin tiempo! Amén.

Pablo joexin cjin carté co rroanha joajna

²¹ De ixin nombré Jesucristo chjehe ra joajnana cainxin chojni que dit-ticaon Dios. Chojni que ditticaon Dios que te nganji na nttihi rroanha na joajna para ixin jaha ra.

²² Cainxin chojni que te nttihi co ditticaon na Dios, co icha mero ninchehe žé xiemperador romano rroanha ra na joajna.

²³ Jesucristo, tti chonda joachaxin para ixin ján na, sinchenchaon cainxin jaha ra. Amén.

Carta Que Dicjin Pablo Para Ixin Chojni Que Ditticaon Jesucristo Ngain Ciudad De Colosas

Pablo rroanha joajna jihi ngain chojni de ciudad de Colosas

¹ Janha Pablo na, Dios joinao que janha rrihi ná representanté Jesucristo. Conixin Timoteo,

² Janha cjin na carta jihi para nganji jaha ra xo jian ditticaon ra Jesucristo ngain ciudad de Colosas, xo tequininxin ra ngain Dios. Dios, Ndogá na, co Jesucristo, tti chonda cain joachaxin para ixin ján na, sinchenchaon nganji ra, co rrochjá ra tti chjoin que tsonohe ansean ra.

Pablo nchetsenhe ñao Dios para ixin cain chojni que ditticaon Jesucristo

³ Are janha na danjo na gracias por ixin jaha ra ngain Dios, Ndogé Jesucristo, cai nttatsán na ñao jehe por ixin jaha ra.

⁴ Ixin janha na ndachjenji na na que ixin jaha ra ndoa jian ditticaon ra Jesucristo, co ixin anto rinao ra cain chojni Dios.

⁵ Jamé nchehe ra ixin jaha ra chonda ra seguro que Dios jittenchjinha iná vida naroaxin para ixin jaha ra nttiha ngajni. Jaha ra coexinhi ra joichonda ra seguro de ixin mé are coinhi ra tti joajna ndoa, que mé tti jian joajné Jesucristo.

⁶ Jehe joajna jihi, tti coinhi ra, co jai chojni nichja na joajna jihi ngoixin mundo, co cain lugar tsje chojni ditticaon na joajna jihi xajeho inchin are jaha ra vitticaon ra desde ngain tiempo que jaha ra coinhi ra que ixin Dios anto rinao chojni co conoha ra que jihi ndoa.

⁷ Cain jihi tti jointtacoanha ra Epafras, tti hermano que ján na anto rinao na, co joinchehe xa conixin janha na. Co jehe mé ná jian ninchehe xé Jesucristo para tsjenguijra ra.

⁸ Co jehe mé tti joindachjenji na que ixin jaha ra jian ditticaon ra Jesucristo, co ixin anto rinao chó ra.

⁹ Mexinxin janha na, desde ngain nchanho que conona na cain jihi, ttinttoaha na de nttatsán na ñao Dios para ixin jaha ra, co danchia na Dios que jehe sinttagatsoan ra jian tti jehe rinao, co sinttaquianxin ra cain cosa jian de ixin Espiritu Santo.

¹⁰ Jañá para que jaha ra nchao sinchehe ra inchin jiquininxin nchehe chojni Jesucristo. Rrocho que cain tiempo sinchehe ra tti rinao Jesús, co inchin jaha ra sanjo ra ná jian cosecha ngain Jesucristo de cain cosa que jaha ra sinchehe ra. Co cai jaha ra sinchehe ra sigue rrochonxin ra icha co icha de ixin Dios.

¹¹ Co janha na danchia na que Dios sinttasoji ra conixin tti anto joachaxin que jehe chonda para que nchao tsixinha ra conixin paciencia ngain cainxin cosa tanguí co masqui tanguí jí, jaha ra rroché ansean ra ixin tsixinha ra ngain cain mé.

¹² Co jaha ra danjo ra gracias ngain Dios ixin jehe tti jointtajian na para sayé na parte ngain tti rrochjé chojni jehe que chji ngain joadingasán, rrocho tti chojni que chonxin jian de ixin jehe.

¹³ Dios vinttjianxin na de ngain joachaxín tti naxin xehe, rrocho que vinttjianxin na de ngain tti jianha, co jehe chjá na jai parte ngain tti ttetonha Xenhe que jehe anto rinao.

14 Co Xenhe ndavenhe Xan de nganito cruz, jamé para cjoenga Xan hna cainxin tti jianha que jointtoho na, co jamé Dios jointtatjañá na cain tti jianha mé.

Ján na anto chjoin tona na ngattoxon con Dios ixin ovenhe Jesucristo para ixin ján na

15 Jehe ni thoha dicon ni Dios, pero jehe goan ná xí co jói ngataha nontte para que chojni nchao vatsoan na jehe Dios. Co jehe mé joiconhe are concjihi Cristo, tti Xenhe Dios, co jehe Cristo ovehe icha saho de que cain cosa que jí rroconchjian.

16 Co de ixin jehe Cristo, Dios joinchechjian cain cosa que jí ngajni co nntihi ngataha nontte. Cosa que thoha dicon ni conixin cosa que nchao dicon ni, Dios joinchechjian cain por ixin Cristo. Cai de ixin Cristo Dios joinchechjian cain tti ángel que ttetonha nntiha ngajni. Cain mé conchjian de ixin jehe co para ixin jehe.

17 Cristo ovehe icha saho que cainxin cosa, co jehe tti jinda cain cosa jihi para jian sintte cain cosa.

18 Co cai Cristo inchin já cain chojni que ditticaon jehe, co cain chojni mé inchin cuerpoe jehe. Co jehe tti danjo vida ngain cuerpo jihi. Jehe tti saho xechon de ngain tti ndavenhe, co mexinxin jehe tti icha importante de cain chojni.

19 Co Dios joinao que cain joachaxin que jehe chonda sehe ngain Cristo cai para que Cristo nchao tsetonhe cain cosa.

20 Co cai joinao Dios que de ixin Cristo, Dios ncherora cain cosa que jí ngataha nontte, co cain cosa que jí ngajni. Co jihi joinchehe are Cristo ndavenxin nganito cruz para ixin ján na.

21 Are saho jaha ra vechonxinha ra de ixin Dios, co vintte ra inchin ningaconhe Dios ixin vaXaxaon ra co vanchehe ra tsje cosa jianha ngattoxon con jehe. Pero jai Dios jointtaroa para que nchao tsonchienne ra ngain jehe.

22 Mexinxin Dios rroanha Jesucristo para ndavenhe de ngain cuerpoe que jehe vechonda are jehe vacji nntihi ngataha nontte. Jamé joinchehe Dios para que jaha ra nchao tsonchienne ra ngattoxon con jehe inchin chojni que jiquininxin para ixin jehe, que Xonhi mancha ni cosa jianha chonda ra ngain ansean ra.

23 Pero para que sintte ra jamé jaha ra chonda ra que sintte ra inchin ná nttá que jingattjen soji ixin nihnga jíXavá noehe nnta, rrocho ixin chonda ra que sinchehe ra sigue de jian sitticaon ra, co sinchehe ra sigue de sitticaon ra que ixin Dios seguro rrochjá ra iná vida naraixin inchin ndacho tti jian joajna que jaha ra coinhi ra. Co joajna jihi tti jinichja chojni cainxin parte de mundo, co janha Pablo na ttjenguijna chojni para dindačhjan na joajna jihi.

Pablo ná ninchehe xé Dios para ttjenguijna chojni que ditticaon Jesucristo

24 Co jai janha chahna de ngain tti tangui que tonna por ixin jaha ra, ixin mé rrocho ixin rroxette de ngain cuerpona tti Xa ditján de cain tti tangui inchin conhe Cristo para cjoenguijna na cain ján na, Xo inchin cuerpoe jehe Cristo.

25 Janha ttjenguijna cain chojni que ditticaon Cristo. Dios chjana Xa jihi para que janha ttjenguijna jaha ra ixin Xa mé Xa de sindattjo ra ngoixin tti jian joajné jehe.

26 Co joajna jihi, mé tti Dios vechonda jima sé tiempo are icha saho. Pero jai Dios cjoago joajna jihi ngain chojni jehe.

²⁷ Dios joinao joinchenohe chojni tti anto rentte co jian palabra que chonda jehe joajna que vema jiji. Co mé para ixin chojni inchin jaha ra que jeha judío ra. Co tti vema jiji, rrocho que Cristo jí nganji jaha ra co de ixin jehe, jaha ra seguro rrochonda ra gloria que jehe ndacho.

²⁸ Mexinxin janha na ndattjan na cain chojni de ixin Cristo. Janha na chjé na consejo cain chojni de ixin Jesucristo, co nttacoán na cain na de ixin jehe para que cainxin na tsinxin na jian de ixin jehe co para que rrochonxin na tsje de ixin Cristo.

²⁹ Mexinxin janha rrinttaha xa jiji conixin cainxin fuerza co cain joachaxin que chjana Cristo.

2

¹ Janha rinaho que jaha ra tsonoha ra que janha anto tsje nttiha nttatsán ñao Dios que jehe tsanchjandaha ra ngain tti jianha. Co cai nttatsán ñao Dios para cain nite ngain Laodicea co cai para ixin cainxin chojni que janha xa xonhi tiempo joitsjá.

² Janha danchiá Dios que cainxin ra soan ra animado ngain ansean ra, co ixin cain ra sinao chó ra, co anto rrochonda ra confianza ngain Dios ixin tsinxin ra icha jian. Jamé para que jaha ra jian satsoan ra Cristo, tti are saho vehe jimao, pero jai Dios tjago ngain cain chojni.

³ Co de ixin Cristo ján na nchao tsinxin na co tsonoa na cain cosa de ixin Dios. Co mé tti anto rentte que jí ngain Jesucristo.

⁴ Cain jiji rrindattjo ra jaha ra para que xonhi chojni sinttayaha ra conixin palabra chjoin que ndoaha.

⁵ Masqui janha coha na nganji ra, pero janha anto rriřaxanho de ixin jaha ra, co anto chahna ixin nona que anto chjoin ditticaon chó ra, co ixin anto jian ditticaon ra Jesucristo.

⁶ Mexinxin jańá inchin jaha ra icha saho coexinhi ra vitticaon ra Cristo, tti chonda cain joachaxin; jańá cai cain ra chonda ra que sinchehe ra sigue sinchehe ra inchin jehe rinao.

⁷ Jamé ditticaon ra jian ngain Cristo inchin ná nttá que nihnga jiřavá noehe nttá co soji jingattjen nttá. Co inchin cocoanha ra, cainxin tiempo danjo ra gracias ngain Dios.

Tti vida naroaxin de ngain Cristo

⁸ Ttjiho ra cuidado, co dittoaxinha ra nchehe ra inchin sinao tti chojni que rinao sinttayaha ra para sinchehe ra inchin jehe na teřaxaon na que mé jeha ndoa. Chojni mé chondaha na confianza ngain Cristo; jeha chonda na confianza ngain costumbré chojni nttihi ngataha nontte, co ngain tti řaxaon cain chojni de ixin cain cosa que jí nttihi.

⁹ Cain tti ndoa co cain joachaxin que chonda Dios, cain mé jí cai ngain cuerpoe Cristo.

¹⁰ Co cain mé jí nganji ra jaha ra cai ixin jaha ra conixin Cristo te ra inchin nacoa chojni. Co jehe tti ttetonhe cain espíritu que ttetonha nttiha ngajni co nttihi ngataha nontte.

¹¹ Cai ixin jaha ra te ra ngain Cristo, rrocho que Cristo ochjá ra tti řohe que dinhi circuncisión, pero mé jeha řohe de ngain cuerpoe ra inchin chonda nijudio. řohe que jaha ra chonda ra, mé de ngain ansean ra ixin Cristo tti cjoenguijra ra para que tti rinao cuerpoe ra řonhi joachaxin chonda nganji ra. Jiji rrocho tti řohe que ttixin de ngain Cristo.

¹² Are jaha ra joiguitte ra de ngain jinda, mé rrocho que jaha ra xavá ra conixin Jesucristo, co jamé cai xechon ra conixin jehe ixin vitticaon ra ngain joachaxín Dios que joinchexechon Jesucristo.

¹³ Are icha saho jaha ra espiritua ra inchin ondavenhe de ixin cain tti jianha que vanchehe ra co ixin chondaha ra tti xohe que dinhi circuncisión ngain cuerpoa ra. Pero jái Dios ojointtatjañaha ra cain tti jianha que vanchehe ra co ochjá ra vida naroaxin ngain Jesucristo.

¹⁴ Ley que vehe are saho ndacho ixin ján na tequininxin na tsji na infierno ixin jointtoha na inchin jitaxin ley mé. Pero cain tti teca na are mé Dios joinchetjañehe are Cristo ndavenhe nganito cruz.

¹⁵ Jesucristo are jehe ndavenxin nganito cruz, jehe joacha ngain inchínji co cain icha espíritu jianha que vechonda joachaxin. Cottimeja jehe savicao cain espiritue xijianha inchin tti deaxinhi para cjoago ngain cain chojni co ngain cain ángel de Dios ixin jehe joacha.

Tjé ra tti chjoin que ttixin de nganji

¹⁶ Mexinxin xonhi chojni chonda derecho de rronichja feo de ixin jaha ra de ixin tti jintte ra o de ixin tti dihi ra, o si nchesayehe ra quiai de chojni judío, masqui quiai que tti cada nano, o que tti cada conittjao, o tti nchanho que nchegogaha chojni cada semana. Icha saho que joí Cristo, chojni judío vitonhe de joinchehe cain mé.

¹⁷ Pero cain jihi jeho inchin ná sanho de tti ndoa que joija, co tti mero ndoa, mé Cristo.

¹⁸ Mexinxin jaha ra dittoaxinha ra que santsjaha ra na tti premio que jaha ra ochonda ra. Rrocho que ditticaonha ra chojni que nchehe na inchin chojni humilde co nchesayehe na ángel. Jehe na ndacho na ixin vicon na cosa que ni ndoaha vicon na, co dintteconohe na anto orgulloso de ixin tti jeho na xaxaon na.

¹⁹ Chojni mé iteha na ngain Jesucristo, tti ttonha ngain cain chojni que ditticaon jehe, co cain niditticaon mé ni inchin cuerpoe jehe, co jehe nchegangui cuerpo mé, co nchesoji cuerpo, co jehe tti jittinhi cuerpo mé cain parte inchin rinao Dios.

²⁰ Ixin jaha ra ditticaon ra Jesucristo, mé rrocho que jaha ra ndavenhe ra conixin jehe, rrocho que jaha ra isincheha ra cain tti xaxaon chojni nntihi ngataha nontte. Mexinxin, ¿quedonda jaha ra xa nchehe ra inchin nchehe cain chojni co xa ditticaon ra cain costumbré na?

²¹ Inchin ná ejemplo, jehe na ndacho na: “Catteha ra cosa jihi, ni jintteha ra cosa jiha, ni tseha ra cosa yá ngá rá ra.”

²² Cain costumbre jihi jeho para ngain cosa que atto daca ndattjexin, co cain costumbre jihi jeho tti ttefonha chojni, co tti jehe na tjago na.

²³ Ján ndoa que cainxin costumbre mé chojni tonhe na que anto importante ixin costumbre mé ttefonha ngain na ixin jañá jiquininxin sinch- esayehe ni Dios ixin ni sintteha ni orgulloso co ixin sinchecastigá ni cuerpoe ni, pero cain mé ttjenguijnaha ni para sacha ni ngain tti jianha que rinao cuerpoe ni.

3

¹ Jai jaha ra oxecon ra conixin Cristo, mexinxin xaxaon ra cosa que ttixin de ngajni tti ttjen Cristo lado jian de Dios.

² Xaxaon ra cosa de ngajni; xaxaonha ra cosa jianha de nntihi ngataha nontte.

³ Jai jaha ra ncheha ra inchin vanchehe ra are saho, co mé rroçho ixin ndavenhe ra conixin Cristo co jai Cristo jittenchjianha ra vidá ra ngain Dios.

⁴ Jehe Cristo mismo mé chjá na jai tti vida jian que chonda na, co are jehe rrocjan tsí iná, cottimeja jaha ra tsononxin ra conixin jehe co rrochonda ra parte ngain tti ttetonha jehe.

Tti vida que vechonda na icha saho co tti vida naroaxin que chonda na jai

⁵ Mexinxin jaha ra nchetján ra cain cosa jianha que jí nganji ra, rroçho cosa jianha de ngataha nontte jihi: rroçho que xonhi ra tsonaonxin ra iná nchí que jeha çhiha ra, ni ncheha ra cosa jianha, ni ncheha ra inchin rinao cuerpoa ra co inchin tti jianha que jaha ra xaxaon ra, co ni dintteha ra ambicioso ixin chojni ambicioso xajeho inchin tti nchesayehe ídolo.

⁶ Ixin chojni que tenchehe na cain cosa jihi rrochonda tti anto soji castigoe Dios ixin chojni mé tti ncheha inchin ttetonha Dios.

⁷ Co jaha ra cai vanchehe ra cain jihi are icha saho.

⁸ Pero jai ttinttohe ra de toñaohé chó ra, de ttetocoho chó ra, de nchehe ra cosa jianha, de ttjehe ra chijni iná chojni, co de nichja ra palabra feo.

⁹ Nchechjienha chó ra mentira ná ra co iná ra, ixin jaha ra ojoinchexante ra vidá ra que joichonda ra are saho de ngain cain cosa jianha que vanchehe ra.

¹⁰ Co jai chonda ra iná vida naroaxin, co Dios jinttajian ra icha co icha para que jaha ra sintte ra inchin jehe rinao co para que jaha ra rrochonxin ra jian cainxin de ixin jehe.

¹¹ Para ixin Dios, ijeha importante si ján na judío na o ni nahi, ni si chonda na tti xohe que dinhi circuncisión o ni nahi, ni si ján na joixin na de ngain ojé nontte o ni nahi, ni si chonxin na xón o ni nahi, o ni si esclavo na o ni nahi; para ixin Dios jeha importante cain mé, sino que Cristo jeho mé tti importante, co jehe tti jí ngain cainxin chojni jehe.

¹² Dios anto rinao jaha ra co jehe ocoinchiaha ra para que sintte ra chojni jehe. Mexinxin jaha ra dintte ra jian; rroçho ttiaconoehe chó ra, co ditticaon chó ra, co tonoaaha ra ixin jaha ra anto importante ra, co dintte ra amable, co chonda ra paciencia.

¹³ Chondehe chó ra paciencia ná ra co iná ra, co nchetjañehe chó ra naná ra are chonda ra problema. Jañá inchin Cristo jointtatjañaha ra, jañá nchehe ra jaha ra cai.

¹⁴ Pero tti icha importante de cainxin cosa yá, que jaha ra anto sinao chó ra, ixin jamé rroxetjjaxin cain tti jian que nchehe ra co sintte ra inchin nacoa chojni.

¹⁵ Co dittoaxin ra que tti çhjoin que Dios ttín ngain ansean ra, que mé tsetonha ra. Ixin mé tti coetonha Dios jiquininxin sinchehe ra jaha ra xo inchin nacoa cuerpo para ixin jehe. Co danjo ra gracia ngain ixin cain mé.

¹⁶ Que joajné Jesucristo rrocaon de ngain ansean ra. Co nchecoenehe chó ra joajna jihi co ncheanimá chó ra ná ra co iná ra conixin jian joarrixaon. Co tsje ra canxin Salmo, co himno, co coro; jamé danjo ra gracias ngain Dios de ngain ansean ra.

¹⁷ Quexeho cosa que sinchehe ra o rrondaçho ra, pero nchehe ra conixin nombré Jesucristo, tti chonda cain joachaxin, co are mé danjo ra gracias de ixin jehe ngain Dios Ndodá na, ixin Cristo cjoenguijna na.

Quexén jiquininxin sintte cain chojni que oditticaon Jesucristo

¹⁸ Jaha ra xo nchi ra que otecoho ra xixiha ra chonda ra que sitticaon ra tti tsetonha ra xixiha ra ixin jiji tti jiquininxin sinchehe jaha ra xo oditticaon ra Cristo.

¹⁹ Co jaha ra xo xi ra, que otecoho ra nchichiha ra, rinao ra nha co xonhi tiempo tetecoho ra nha.

²⁰ Co jaha ra xo xannchinnchinchjan ra ditticaon ra ndoda ra co janna ra cain tti tsetonha ra na ixin jiji tti nchexoxinhi Jesucristo.

²¹ Co jaha ra xo ondodaha ra de ngain chjan, ncheñaoha ra xanha ra para que jehe xan soanha xan desanimado.

²² Co jaha ra xo nchehe ra xa ngain ninajni, ditticaon ra nchehe ra cain tti tsetonha ra ninajnia ra nntihi ngataha nontte, co jeoha are jehe na tatetsjehe na nganji ra para que jaha ra sittoaxin ra jian ngain na, sino que jaha ra cain tiempo nchehe ra jian ngain xe na ixin jaha ra xagonhe ra Dios.

²³ Quexeho cosa que jaha ra sinchehe ra, pero que nchehe ra conixin jian ansean ra inchin rrojinchehe ra xe Cristo co nahi xe chojni.

²⁴ Jaha ra onoha ra que Jesucristo rrochja ra inchin na premio tti vida naroaxin que sayehe ra, ixin jaha ra tenchehe ra xe Cristo ixin jehe tti mero xinajnia ra.

²⁵ Pero xo sinchehe ra jianha, jamé rroxengaha ra hna de tti jianha que jaha ra sinchehe ra; co para ixin Dios xonhi chojni icha jian o icha rentte que ina; cain na xajeho na.

4

¹ Co jaha ra xo najni ra chonda ra que sintte ra jian co nchehe ra inchin jiquininxin ngain nichehe xa ra. xaxaon ra que cai jaha ra chonda ra na Xinajni que ttjen ngajni.

² Nchehe ra sigue nchecoanxinhi ra Dios co danjo ra gracias, pero xaxaon ra jian quehe rronichja ra.

³ Nchetsenhe ra ñao Dios cai por ixin janha na para que jehe rrochjana na jian oportunidad de rronichja na joajné jehe, co de rronattjan na icha chojni tti conhe Jesucristo para cjoenga hna cain tti jianha que jointtoho na, que mé inchin na cosa jima para ixin jehe na. Co jai janha rriaxinna ixin ndattjan chojni cain jiji.

⁴ Nchetsenhe ra ñao Dios para que janha jian sinttaquianxin chojni de ixin jiji inchin jiquininxin sinttaha.

⁵ Dintte ra chojni jian para ngain tti chojni que ditticaonha Jesucristo co nchegonda ra cain oportunidad para ndache ra na de ixin Jesucristo.

⁶ Are rronichja ra ngain chojni mé chonda que cain tiempo rronichja ra jian para que jehe na sinchexoxinhi na co chonda ra que tsonoha ra quehe rronache ra cada chojni que sanchianguiha ra de ixin Jesucristo.

Nntihi joexinxin carté Pablo

⁷ Tíquico, que mé hermano na que anto rinao na, jehe mé cain tiempo anto ttjenguijna icha chojni que ditticaon Jesucristo, co cai ttjenguijna na janha cai de tenttaha na xe Jesucristo. Jehe Tíquico tti rronattjo ra cain tti jitonna jianha, co cain tti rrinttaha.

⁸ Mexinxin janha rrorroanha jehe Tíquico nganji ra para rronattjo ra que xen te na janha na nntihi co para que sinttanimá ra de ngain Jesucristo.

⁹ Jehe Tíquico sijicaho Onésimo que jehe Onésimo cai na hermano que anto rinao na co tti anto ditticaon Jesucristo. Co jehe Onésimo mé joixin de ngain rajná ra. Cayoi jehe chojni jiji tti rronattjo ra cain tti jitonhe nntihi.

¹⁰ Aristarco, xicompañerona nttihi ngain cárcel rroanha xa joajna nganji ra cai, co cai Marcos, xiprimoe Bernabé rroanha xa joajna nganji ra. Jaha ra onoha ra de ixin jehe Marcos, co si jehe siji sitsjaha ra, dayehe ra jian.

¹¹ Cai Jesús, tti jehe cai dinhi Justo, rroanha joajna nganji ra cai. De cain chojni judío que ditticaon Jesucristo, jecho tti ní chojni yá tti tettjenguijna na janha de tenttaha na xa para ixin Dios. Co jehe na anto jie consuelo cjoí na para ixin janha.

¹² Epafras cai rroanha joajna para ixin jaha ra, jehe cai ná ninchehe xé Jesucristo, co jehe cai joixin de ngain rajná ra. Jehe Epafras cain tiempo que jehe nchecoanxinhí Dios, jehe anto nchetsenhe ñao Dios para ixin jaha ra, para que jaha ra cain tiempo jian sitticaon ra Dios, co de rroxanjo ra jian de sinchehe ra inchin rinao Dios.

¹³ Ixin janha nona quexén Epafras anto xaxaon de ixin jaha ra, co cai jehe anto xaxaon de ixin cain chojni que ditticaon Jesucristo que te ngain ciudad de Laodicea co ciudad de Hierápolis.

¹⁴ Lucas, tti xinchexoan que ján na anto rinao na, conixin Demas, cayoi chojni mé cai rroanha na joajna para ixin jaha ra.

¹⁵ Noyá chjehe ra joajna cain chojni que ditticaon Jesucristo, tti nite ngain ciudad de Laodicea. Cai chjehe ra joajna Ninfas conixin cain chojni que ditticaon Jesucristo, tti ni xatte nittiha ngain nchiandoha jehe Ninfas para servioe na.

¹⁶ Cain jaha ra are tsjexin tsinhi ra quehe ji cho carta jihi, cottimeja rroanha ra carta para ngain nihngo que jí ngain Laodicea para que nttiha cai cain chojni que ditticaon Jesucristo tsinhi na quehe jitaxin carta jihi, co cai jaha ra tsjehe ra quehe jitaxin cartana que sijixin de nihngo que jí ngain Laodicea.

¹⁷ Ndache ra Arquipo que ndachjan janha que tsinttoeha de sinchehe tti xa que Dios joanjo ngain jehe.

¹⁸ Janha Pablo na, rricjinha ra parte jihi conixin rana co letrana. xaxaon ra que janha jiaxinna jai ngain cárcel. Que Dios sinttanchaon ra. Amén.

Saho Carta Que Dicjin Pablo Para Ixin Chojni Ngain Ciudad De Tesalónica

Pablo co xicompañeroe chjé na joajna chojni ngain nihngo Tesalónica

¹ Janha, Pablo na, conixin Silvano co Timoteo rroanha carta jihi para ngain chojni que ditticaon Jesucristo ngain ciudad de Tesalónica, co chojni mé te ngain Dios Ndodá na co ngain Jesucristo, tti chonda cain joachaxin. Co Dios Ndodá na co Jesucristo, tti chonda joachaxin para ixin ján na, sinchenchaon nganji ra co rrochjá ra tti chjoin que tsonohe ansean ra.

Tti coinhi icha chojni de icha rajna de ixin confianzé chojni Tesalónica ngain Cristo

² Janha na cainxin nchanho chjaha na gracias ngain Dios de ixin cainxin jaha ra, co xaxanho na cain jaha ra are janha na nttacoanxian na Dios.

³ Co xaxanho na quexén jaha ra ditticaon ra Jesucristo, mexinxin tenchehe ra tsje cosa jian. Co xaxanho na quexén jaha ra anto rinao ra jehe Jesús, mexinxin anto tettjenguijna ra icha chojni. Co cai xaxanho na quexén jaha ra tenchehe ra sigue jian ditticaon ra que jehe Jesús tsí iná. Mexinxin janha na chjaha na gracias Dios para ixin cain yá.

⁴ Dios rinao cain jaha ra, co janha na nona na ixin jehe coinchiehe jaha ra

⁵ ixin are janha na joasondattjo ra tti jian joajna, jeha jamaoncoa ixin janha na ndattjo ra conixin joachaxin Espíritu Santo co janha na chonda na seguro ixin tti janha na ndachjan na seguro ndoa. Co jaha ra jian noha ra que janha na jian jointtaha na nganji ra ixin janha na rinaho na jian sintte ra.

⁶ Co jaha ra joinchehe ra inchin janha na nttaha na co tti joinchehe Jesucristo. Co de ixin Espíritu Santo ansean ra anto ché are vayehe ra tti jian joajna, masqui anto tangui conha ra.

⁷ Mexinxin jaha ra ná ejemplo para cain chojni que ditticaon Jesucristo ngain nonttehe Macedonia co Acaya.

⁸ Anto tsje chojni nohe ixin jaha ra ditticaon ra tti jian joajné Jesucristo, tti chonda cain joachaxin. Co jeoha chojni ngain Macedonia co Acaya tti ninohe, cai nohe chojni de cainxin nontte. Co ixin cain na nohe na ixin jaha ra ditticaon ra Jesucristo, mexinxin janha na ichondaha na que rronichja na jian de ixin jaha ra.

⁹ Sino que jeha na nittequin ixin joitsjaha ra, co ttequin na tti jian que joinchehe ra nganji janha na, co ttequin na quexén cointtohe ra de vitticaon ra ídolo co coexinhi ra vitticaon ra Dios que jichon.

¹⁰ Cai ttequin na ixin quexén jaha ra techonhe ra tiempo are Xenhe Dios rrocjan tsí Xan iná. Co jehe mé, Jesús tti Dios joinchexechon. Co jehe mé tti tsanchjandaha na para ngain tti anto soji castigo que tsí.

2

xa que joinchehe Pablo ngain Tesalónica

¹ Jaha ra jian noha ra que are joasotsjaha ra, jeha jamaoncoa.

² Co masqui icha saho janha na joinchesattena na na co anto tangui conna na ngain ciudad de Filipos inchin jaha ra onoha ra pero masqui jamé, Dios cjoenguijna na para joasondattjo ra tti jian joajné jehe que danjo iná vida

naroaxin, co jehe cjoenguijna na para xonhi xagoan na masqui tsje chojni joinaoha tti janha na nichja na.

³ Co cain tti janha na ndattjo ra ján ndoa, co tti nichja na jeha para jointtaxin na ná cosa jianha, co jeha jointtayaxin na chojni.

⁴ Pero Dios chonda confianza nganji janha na, co jehe chjana na tti jian joajna que danjo iná vida naroaxin. Co mexinxin janha na nichja na joajna mé. Janha na nichjaha na para sinchexoxinhi chojni, janha na nichja na para sinchexoxinhi Dios ixin jehe tti chonxin jian tti jí ngain ansenna na.

⁵ Jaha ra noha ra ixin janha na xonhi tiempo jointtayaxin ra conixin palabra chjoin ni ndattjo ra icha cosa para vachaxin na tomi. Cai Dios nohe cain jihi.

⁶ Janha na xonhi tiempo joinaho na para que chojni rrojinchesayana na, sia jaha ra o icanxin chojni, masqui janha na chonda na joachaxin para rrojintaha na jamé ixin janha na representante na de Jesucristo.

⁷ Pero janha na jeha jamé jointtaha na, janha na rinaho na cain jaha ra inchin ná jannaha rinao jan xenhe jan are jinchegangui jan xan.

⁸ Janha na anto rinaho na jaha ra hasta que rinaoha na rrochjaha ra jeho tti jian joajné Dios, sino que hasta rinaho na rrochjaha ra vidana na cai, jañá janha na anto rinaho na cain jaha ra.

⁹ Jaha ra xaxaon ra quexén janha na jointtaha na xa co tangui jointtaha na para joacha na tti joine na. Ngoixin tiempo are janha na ndattjo ra tti jian joajna que joixin de ngain Dios, janha na jointtaha na xa nchanho co ttie para que ni ná jaha ra vechondaha ra que chjana ra tti joine na.

¹⁰ Cain jaha ra jian noha ra co Dios cai nohe ixin janha na jointtaha na joxon tti jian nganji ra co xonhi chojni nchao sinchecaxin janha na ni ná cosa jianha.

¹¹ Cai cjoenguijna ra cada ra para ixonhi joachjaon coá ansean ra, co para ivinttechinha ra cada ra, jamé jointtaha na inchin nchehe ná ndodaha ngain xenhe ndo.

¹² Co jointtatsanha na ñao ra que sinchehe ra inchin jiquininxin nchehe chojni Dios, tti chojni que Dios vayé para rrochonda na parte ngain lugar que Dios ttetonha co ngain glorié Dios.

¹³ Co cai janha na cainxin tiempo chjaha na gracias ngain Dios ixin are jaha ra coinhi ra tti jian joajné Dios que janha na ndattjo ra, jaha ra vayehe ra inchin joajné Dios, co jeha inchin joajné chojni. Co, ján, ndoa joajné Dios, mexinxin jaha ra xo ditticaon ra, coentoxinhi ra vidá ra.

¹⁴ Hermanos, are tangui conha ra de ixin chojni ngain rajná ra, conha ra inchin conhe chojni que vitticaon Dios conixin Jesucristo ngain regioen Judea. Cai jehe na tangui conhe na ngain chojni rajné na, tti chojni judío.

¹⁵ Jehe chojni judío tehe tti nagoenxon Jesús, tti chonda cain joachaxin. Co cai ngain tiempo vatto chojni judío nagoenxon na profeté Dios, co jai chojni judío vengui na na janha na cai. Dios nchexoxinha tti nchehe jehe na co jehe na ningaconhe na cain chojni.

¹⁶ Ixin are joinaho na nichjá na chojni que jeha judío para que jehe na cai rrochonda na iná vida naroaxin, jehe chojni judío joinaoha rrocanchjanda na. Mexinxin jañá merocoa jicaontja tti jidingachjian cainxin tti jianha que nchehe na cainxin tiempo. Co jai, nchoe joí ngain na tti anto tangui castigo que Dios rroanha para ixin jehe na.

¹⁷ Hermanos, are janha na sajoixin na de nganji ra para nchion tiempo, co vaguiconha ra, pero anto xaxanho na de ixin jaha ra co janha na anto joinaho na rrogasotsjaha ra iná.

¹⁸ Joitaha na de rrogaso na. Cai janha Pablo tsje nttiha joinaho rrogaso tti te ra, pero cada nttiha mé Satanás rroanna problema para cayaconhna.

¹⁹ Joinaho na rrogasotsjaha ra ixin chonda na confianza nganji ra ngat-toxon con Dios co anto rrochahna co anto chjoin tsonohe ansenna na de ixin jaha ra are tsí Jesucristo, tti chonda cain joachaxin para ixin ján na.

²⁰ Ndoa, jaha ra tti razón para anto chjoin tsonona na co anto rrochahna na.

3

¹ Mexinxin ixin coixinnaha na choan na icha para conona quexén te ra ngain tti ditticaon ra, xaxanho na vittona na janho na ngain ciudad de Atenas,

² co rroanha na Timoteo para joiji joitsjaha ra. Jehe ná nchehe xé Dios co nchehe xa conixin janha na are janha na ndachjan na tti jian joajné Jesucristo. Jehe Timoteo nchao joinchesoji tti jaha ra ditticaon ra co jointtanimá ra,

³ para que ni ná ra tsingaxintonha ra ixin ningaconha ra na. Jaha ra onoha que ján na chonda que anto tangui toan na ixin icha chojni ningacoan na na.

⁴ Are xa vintte na nganji ra, ndattjo ra que tangui toan na, co jamé conhe, inchin jaha ra onoha ra.

⁵ Co ixin icoixinnaha choan icha, janha rroanha Timoteo para joanchi-anguiha ra si xa ditticaon ra jian ngain Jesucristo, ixin xaon na que puede Satanás rrondache ansean ra co rrojinchehe ra jianha co tti janha na ndattjo ra irrocoxonhi xé.

⁶ Pero jai Timoteo ojoixin de Tesalónica co ndachjenji na ixin jaha ra anto jian ditticaon ra Jesucristo co anto rinao ra icha chojni. Cai ndachjenji na que jaha ra cainxin tiempo xaxaon ra de ixin janha na co anto rinao ra sicon ni ra janha na, jañá inchin janha na rinaho na sicon na jaha ra.

⁷ Mexinxin hermanos, masqui anto tsje cosa tangui tonna na, pero janha na anto chahna na ixin conona na que cain jaha ra xa jian ditticaon ra ngain Jesucristo.

⁸ Inchin ná vida naroaxin para ixin janha na are conona na que jaha ra jian ditticaon ra ngain Jesucristo.

⁹ Jaxon janha na danjo na anto tsje gracias ngain Dios ixin janha na anto chahna na ngattoxon con jehe Dios de ixin jaha ra.

¹⁰ Nchanho co ttie jointtatsán na ñao Dios ixin rrochjana na joachaxin para saso na nttiha co para tsjagoha ra cain tti xa ditján ngain tti ditticaon ra.

¹¹ Janha na rinaho na que jehe Dios Ndodá na cainxin na co Jesucristo, tti chonda joachaxin para ixin ján na, tsjenguijna na janha na para nchao saso na sasotsjaha ra.

¹² Co janha na nttatsán na ñao Jesús, tti chonda cain joachaxin, ixin tsjenguijna ra para que sinao chó ra icha co icha, co para sinao ra icha chojni cai inchin janha na rinaho na jaha ra.

¹³ Co nttatsán na ñao Dios ixin rroquehe ansean ra co santsjexin ra de ngain tti jianha, co santsjexin de ngain ansean ra cain cosa jianha para sintte ra jian ngattoxon con Dios Ndodá na are tsí Jesucristo, tti chonda cain joachaxin, conixin cainxin chojni jehe.

4

Vida que ncheᵋoxinhi Dios

¹ Jai nttatsanha na ñao ra co rronhattjo ra jiji conixin joachaxín co nombré Jesús, tti chonda cain joachaxin: inchin janha na jointtacoanha ra quexehe tipo de vida Dios ncheᵋonhi, jañá nchehe ra icha co icha.

² Jaha ra chonxin ra tti janha na jointtacoanha ra, inchin coetonna na Jesús, tti chonda cain joachaxin.

³ Dios rinao que jaha ra daᵋhjeyexin ra de ngain tti jianha co dintte ra jian ngain jehe Dios. Mexinxin ᵋonhi ra ncheyehe ra ᵋihi iná tattita, ni nᵋhi sincheyeha xixihi iná nanita.

⁴ Cada ra rrochonda ra nanacoa nᵋhiᵋiha ra inchin Dios rinao, co rrochonda respeto ngain nᵋha.

⁵ Co ncheha ra tti jianha que rinao cuerpoa ra inchin nchehe chojni que chonxinha de ixin Dios.

⁶ Co jañá ᵋonhi ra sincheyeha ra icha chojni ixin Dios anto soji castigo rrorroenhe cain chojni que sinchehe cosa jianha mé inchin ondattjo ra.

⁷ Dios ndaᵋhoja que ján na sontte na chojni jianha, Dios rinao que ján na saᵋhjeyexin na de ngain tti jianha para que sontte na jian ngain Dios.

⁸ Jañá, si ná chojni ditticaonha jiji, jeha palabré inacoa chojni tti ditticaonha, sino que chojni mé ditticaonha Dios, tti ᵋjá na Espíritu Santo.

⁹ Janha ichondaha que rrocjinha ra ixin chonda ra que sinao chó ra, ixin Dios ojointtacoanha ra para que sinao chó ra naná ra.

¹⁰ Co jamé tenchehe jaha ra ngain cainxin chojni que ditticaon Dios que te ngoixin nonttehe Macedonia. Pero nttatsanha na ñao ra que sinao chó ra icha.

¹¹ Tsjehe ra queᵋén sinchehe ra para nchehe ra ᵋá ra jian, co dixintteha ra ngá ᵋé iná chojni tti jaha ra chondaha ra que sicon ra. Sino que nchehe ra ᵋá ra inchin janha na coetonha ra jaha ra,

¹² para que icha chojni que ditticaonha Jesucristo sicao na respeto nganji ra co jañá ᵋonhi cosa sinttaha ra falta.

Quehe tsonhe are tsí Jesucristo

¹³ Rinaho janha na que jaha ra tsonoha ra quehe tonhe ngain chojni que ndadenhe para que jaha ra sinttechinha ra inchin icanxin chojni que ditticaonha, ixin chojni que ndadenhe rrocjan rroxingamehe.

¹⁴ Jañá inchin ján na dotticaon na que Jesús venhe co xechon, jañá dotticaon na que Dios sinchexechon cainxin chojni que vitticaon Jesús co ndavenhe na. Co jehe Dios tsiaho cain chojni mé conixin Jesús.

¹⁵ Mexinxin janha na ndattjo ra inchin cjoago Jesús, tti chonda cain joachaxin, que ján na ᵋo ᵋa sonttechon na are jehe Jesucristo tsí, ján na ᵋhoja sotaon na nttiha que niondavenhe.

¹⁶ Ixin jehe Jesucristo rroxincanjinxin de ngajni co rronichja soji ixin chonda joachaxin. Co tti ángel que chonda tsje joachaxin rronichja soji co tsoyao trompeté Dios. Cottimeja chojni que ondavenhe co vitticaon na Cristo, chojni mé rroxingamehe na de ngayeha tti nindadiguenhe;

¹⁷ cottimeja ján na ᵋo ᵋa sonttechon na satsjiho na na ngacjan ttjoi para sigotaxin na ngataonhe ᵋhintto jehe Jesucristo, tti chonda cain joachaxin. Cottimeja sontte na conixin jehe para cainxin tiempo.

¹⁸ Mexinxin ndache chó ra jiji naná ra para sincheanimá chó ra.

5

¹ Pero chondaha que rrocjinha jaha ra de ixin nchanho co tiempo que tsonhe jiji.

² Jaha ra atto jian noha ra que nchaoen Jesucristo tsí nchaon are ján na ni rroḡaxaonha na inchin are tti ná tti chehe are ttie.

³ Are chojni tendaḡo na: “Cainxin nchaó jí co seguro”, cottimeja anto daca tsí castigo ngataha chojni mé inchin tti dolor que ditaha ná nanita are osincheconcjihí chjan; co jehe na ḡhoḡa satsinguehe na castigo mé.

⁴ Pero jaha ra que ditticaon ra Dios iteha ra ngain naxin xehe para que jehe nchanho mé sinttaḡaon jaha ra inchin are ḡagoen ni ná tti chehe.

⁵ Ixin cainxin jaha ra chojni que ḡhji tti jinchengasán nchanho ixin jaha ra ditticaon ra tti ndaḡo Jesucristo. Ján na jeha chojni que ḡhji ttie ni jeha chojni que ḡhji tti naxin xehe ixin chojni que nchehe jianha, mé tti ḡhji jamé.

⁶ Mexinxin ján na sontteḡhíncoaha na inchin icha chojni. Ján na chonda na que tasonttetsjehe na conixin jian joarrixaoan na.

⁷ Chojni que dinttejoa, dinttejoa na are ttie; co chojni que coan, coan na are ttie;

⁸ pero ján na, ḡo chojni de joadingasán na, chonda na que sontte na cain tiempo conixin joarrixaoan na jian. Are dotticaon na Jesús co are rinao na icha chojni cayoi mé tti ttjengujina na para ḡonhi tsoan na inchin xisoldado are tteto xa ḡonhi tonhe xa ixin jingá pechoe xa ná chia que dinhi armadura. Co ján na chonda na seguro ixin rrochonda na iná vida naraa; co jiji anto ttjengujina na inchin tti jocho que ttjinga xisoldado para ḡonhi tonhe já xa.

⁹ Ixin Dios coinchiaha ján na para sayé na castigo, sino que Dios coinchiá ján na para sayé na iná vida naraa.

¹⁰ Jesucristo ndavenhe para ixin ján na para que sonttechon na ján na conixin jehe masqui xa techon na o ondavenhe na are jehe rrocjan tsí.

¹¹ Mexinxin ncheanimá chó ra co nchesoji chó ra ansean ra inchin jaha ra otenchehe ra.

Pablo ḡhé consejo chojni que ditticaon Jesucristo

¹² Nttatsanha na ñao ra hermanos que chonda ra respeto ngain chojni que nchehe ḡa ngayaha ra, tti chojni que Jesucristo coinchiehe para que rronddattjo ra de ixin queḡén sinchehe ra co para sinttaoanha ra.

¹³ Chonda ra que rroḡaxaon ra jian de ixin jehe na co anto sinao ra na de ixin tti ḡa que jehe na nchehe na. Dintte ra ḡhjoin naná ra.

¹⁴ Janha na ttetonha ra que ḡjehe ra consejo chojni que ḡhoḡa nchehe ḡa, co ncheanimá ra chojni que chonda joachjaon para que iḡonhi joachjaon rronchonda ansén na, co ttjengujina ra chojni que antoha jian ditticaon co chonda ra paciencia ngain cain chojni.

¹⁵ Ttjijo ra cuidado que ḡonhi chojni tsjengaxin hna jianha ngain chojni que joinchehe jianha ngain jehe. Ncheha ra jamé, sino que cain nchanho nchehe chó ra jian naná ra co hasta cainxin chojni ngoixin nontte.

¹⁶ Cainxin nchanho dintte ra contento.

¹⁷ Nchecoanxinhi ra Dios cainxin tiempo.

¹⁸ De cainxin tti tsonhe danjo ra gracias ngain Dios ixin jamé Dios rinao de nganji ra ḡo ditticaon ra Jesucristo.

¹⁹ Cayaoenha ra tti nchehe Espíritu Santo.

²⁰ Are chojni rronddattjo ra ná joajna que vayé de ngain Dios, ttinhi ra jian co ncheha ra menos joajna mé.

²¹ Cain joajna que tsinhi ra, xaxaon ra si joixin de ngain Dios ani nahi co ttenchjinha ra jeho tti jian que joixin de ngain Dios.

²² Dachjenda ra de ngain cainxin cosa jianha.

²³ Jehe Dios tti ncheconohe ansean na chjoin santsjenda ra de ngain cain tti jianha co tsenchjinha espiritua ra, alma ra, co cuerpoa ra para xonhi tti feo xehe rrochonda ra are tsí Jesucristo, tti chonda cain joachaxin para ixin ján na.

²⁴ Dios tti vayaha ra, nchehe cain tti ndacho co jehe sinchehe cain jihi.

Pablo joexin cjin carté co rroanha joajna

²⁵ Jaha ra nchetsenhe ra ñao Dios de ixin janha na.

²⁶ Chjehe ra cain chojni que ditticaon Jesucristo jian joajna.

²⁷ Janha rritetonha ra conixin joachaxín Jesucristo que tsjehe ra carta jihi ngain cain chojni que ditticaon Jesucristo nttiha.

²⁸ Que Jesucristo, tti chonda cain joachaxin para ixin ján na, sinchençaon nganji ra. Amén.

Yoxin Carta Que Dicjin Pablo Para Ixin Chojni Ngain Ciudad De Tesalónica

Pablo co xicompañeroe chjé na joajna chojni ngain nihngo Tesalónica

¹ Janha, Pablo na, conixin Silvano co Timoteo rroanha carta jiji para ngain chojni que ditticaon Jesucristo ngain ciudad de Tesalónica, co chojni mé te ngain Dios Ndogá na co ngain Jesucristo, tti chonda cain joachaxin.

² Dios Ndogá na co Jesucristo, tti chonda cain joachaxin, sinchenchaon nganji ra co rrochjá ra tti chjoin que tsonohe ansean ra.

Are Jesucristo tsí, Dios sinchejuzgá cain chojni

³ Janha na chonda na que sanjo na gracias ngain Dios para ixin jaha ra cainxin nchanho. Jamé jiquininxin sinttaha na ixin jaha ra icha co icha ditticaon ra Jesucristo co cai ixin jaha ra icha co icha rinao chó ra naná ra.

⁴ Mexinxin janha na chahna na nichja na ngain icha ningoe Dios de ixin tti paciencia que jaha ra chonda ra co ixin jaha ra nacoa ditticaon ra ngain Dios, masqui anto tsje tangui conha ra.

⁵ Cain jiji tjago ixin Dios ná juez jian ixin jehe nchegonda cain cosa tangui mé para que jaha ra siquininxin ra sintte ra tti lugar que Dios tsetonha.

⁶ Cai jehe Dios sinchehe inchin jiquininxin ixin rrorroanha cosa tangui ngain tti chojni que tenchehe na cosa tangui nganji jaha ra.

⁷ Co ján na que anto tangui toan na, Dios sanjo joachaxin para tasehe tti anto tangui mé are Jesús, tti chonda cain joachaxin, tsixin de ngajni ngacjan neje xohi conixin ángel de jehe que chonda tsje joachaxin.

⁸ Tsí para rrochjé castigo tti chojni que chonxinha de ixin Dios co ni ditticaonha na tti jian joajna de ixin Jesucristo, tti chonda cain joachaxin para ixin ján na.

⁹ Chojni jiji ndasitján ansén na para cainxin tiempo co satsjixin na de ngattoxon con jehe tti chonda cain joachaxin co de glorié jehe co de ngain joachaxín jehe

¹⁰ are jehe tsí ngain nchanho mé para tsosayehe co soan admirado de ixin chojni que vitticaon jehe. Cainxin jaha ra sintte ra nttiha nchanho mé cai ixin ovitticaon ra tti janha na ndattjo ra.

¹¹ Mexinxin janha na nttatsán na ñao Dios para ixin jaha ra cainxin tiempo. Danchiá na Dios para tsentoxinhi vidá ra para sintte ra inchin jiquininxin chojni que jehe ovayé. Co cai nttatsán na ñao Dios ixin jehe sinchegonda joachaxin para sinchejian ra inchin jaha ra rinao ra co para tsjenguijna jaha ra sinchehe ra cain cosa que jaha ra nchehe ra para ixin Jesucristo.

¹² Jañá nombré Jesucristo, tti chonda cain joachaxin para ixin ján na, tsosayehe nombre nganji ra, co jehe sinttasayaha jaha ra cai. Jiji tti tsonhe ixin anto jian Dios conixin Jesucristo, tti chonda cain joachaxin.

2

Xí anto jianha que tsí antes que tsí Jesús

¹ Janché janha rrondachjan de ixin are tsí Jesucristo, tti chonda cain joachaxin para ixin ján na, co are sigatse na co sontte na ngain jehe. Nttatsanha na ñao ra,

² ttentoxinha ra tti jian xaxaon ra co ni xaonha ra are ná chojni rrondattjo ra ixin nchaoen Jesucristo ojoí nchaon. Co puede ná chojni rrondačo ixin Dios coetonhe mé, o puede ná chojni que tsinhi ra jinichja ngain anto tsje chojni ixin quexén nchehe na, o puede jaha ra sayehe ra ná carta co chojni ndačo ixin janha na cjin na carta mé, co ndoaha.

³ De cain yá dittoaxinha ra sintayaxin ra na ni ná. Ixin saho que tsí nchanho yá chonda que tsonhe yó cosa: saho tsje chojni rroningaconhe na Dios, cottimeja rrořago ná xí anto jianha, co xí mé chonda que tsji ngain infierno.

⁴ Xí jhi rroningaconhe xa cainxin tti ditticaon Dios co cain cosa que jiquinixin tsosayehe. Co xí jhi hasta siguehe xa ngain ningoe Dios icha importante como si jehe xa rrocji xa Dios, co jehe xa rrondačo xa ixin jehe xa Dios xa.

⁵ ¿Axaxaonha ra are janha xa joarihi nganji ra, janha vandattjo ra cain jhi?

⁶ Co jai jaha ra onoha ra quehe tančhjandaha xí mé para tsí xa. Jehe xa čoha tsí xa icha saho que mero nchaoen xa.

⁷ Tsje cosa jianha que sinchehe xí mé, ojí. Pero cain tti tsonhe xa čoha tsonhe hasta tsajandaja tti jicayacoen jai.

⁸ Cottimeja tsononxin xí anto jianha jiha, co Jesús, tti chonda cain joachaxin, nasoenxon xí mé jeho sanotte Jesús xa conixin rroha Jesús co ndarroxante xí mé conixin chíxo que singasán are tsí Jesús.

⁹ Jehe xí mé tsí pero Satanás tti rrorroanha xa co tsí xa conixin tsje joachaxin co sinchehe xa tsje milagro co señal pero cain mé ndoaha ixin tsixin joachaxin Satanás.

¹⁰ Co sinchegonda xa cainxin cosa jianha para sincheyexin xa chojni que sitján ansén. Co cain chojni mé sitján ansén na ixin xonhi tiempo sitticaon na Jesús, co rrochondaha na iná vida naraa.

¹¹ Mexinxin Dios tsančhjanda chojni mé para sitticaon na tti ndoaha.

¹² Co Dios sinchecondená cainxin chojni mé ixin rrochoha na sitticaon na tti ndoa, sino que sincheřoxinhi na cosa jianha.

Quexén sinchehe chojni que Dios coinchiehe

¹³ Pero janha na cainxin tiempo chonda na que rrochjaha na gracias ngain Dios de ixin jaha ra que Dios rinao ra ixin Dios coinchiaha ra desde are saho para sayehe ra iná vida naraoxin. Cain yá conhe ixin Espíritu Santo joinchechjian jaha ra chojni jian co ixin vitticaon ra tti ndoa.

¹⁴ Dios vayaha jaha ra para ixin cain jhi de ixin tti jian joajna que janha na ndačjan na para que jaha ra tsosayaha ra conixin Jesucristo, tti chonda cain joachaxin para ixin ján na.

¹⁵ Mexinxin cain jaha ra dintte ra soji co tjañaha ra tti janha na jointtaconha ra are joaso na nganji ra co ngain carta que janha na rroanha ra.

¹⁶ Jesucristo, tti chonda cain joachaxin para ixin ján na, co Dios Ndodá na tti rinao na co chjá na Ndo consuelo para cainxin tiempo co ttjengujna na ján na para rrochonda na confianza ixin cain cosa tsonhe inchin jehe Ndo ndačo Ndo.

¹⁷ Que Dios co Jesucristo sincheanimá ansean ra co sinttasoji ra para que cain tti rronichja ra co cain tti sinchehe ra sehe jian.

3

Pablo rinao que chojni sinchetsenhe na ñao Dios para ixin jehe co xicompañeroe

¹ Hermanos, nchetsenhe ra ñao Dios para ixin janha na para que tti jian joajné Jesucristo, tti chonda cain joachaxin, jaca siji ngain chojni ngoixin nontte co para que jehe na jian sayé na tti jian joajna mé. Jañá inchin jaha ra vayehe ra.

² Cai nchetsenhe ra ñao Dios para que janha na xonhi sinchena na cain xí feo que nchehe tsje cosa jianha, ixin cainxinha chojni ditticaon na Dios.

³ Pero Jesucristo, tti chonda cain joachaxin, ndoa nchehe cain tti ndaño co jehe sinttasoji ra co senda ra para que tti jianha xonhi sinchehe nganji ra.

⁴ Co janha na chonda na confianza ngain Jesucristo que ixin jaha ra sinchehe ra sigue sinchehe ra cain tti janha na ttetonha ra.

⁵ Que Jesucristo tsjenguijra ra para que tsonoha ra quexén Dios rinao ra co para rrochonda ra paciencia inchin Cristo chonda.

Chojni chonda que nchehe xa

⁶ Hermanos, janha na ttetonha ra conixin joachaxin co nombré Jesucristo, tti chonda cain joachaxin para ixin ján na, que dañjendehe ra quexeho nirinaoha sinchehe xa co nisincheha tti janha na cjoagoha ra.

⁷ Jaha ra jian noha ra quexén sinchehe ra para sinchehe ra inchin janha na ntaha na. Ixin are janha na vintte na ngayaha ra, xonhi tiempo vintte na sin que jointtaha na xa,

⁸ co ni joinecoaha na niotsanho ni ná chojni co cjoengaha na hna. Janha na xonhi tiempo jointtaha na mé, sino que jointtaha na xa nchanho co ttie masqui anto conchjen na, para que ni ná jaha ra conoaha ra tangui de ixin janha na.

⁹ Masqui janha na joichonda na derecho para que rronddatto ra ixin rrocjenguijra ni ra, pero janha na joinaoha na jamé. Janha na jointtaha na xa soji para que jaha ra vicon ra co para sinchehe ra inchin janha na.

¹⁰ Ixin are janha na vintte na nganji ra, ndatto ra regla jihi: tti rinaoha sinchehe xa, sineha cai.

¹¹ Janha na ndachjenji na na ixin ttoha de jaha ra ncheha ra xa co atto rinao ra que xonhi sinchehe ra.

¹² Ngain chojni mé tettetonha na conixin joachaxin co nombré Jesucristo, tti chonda cain joachaxin para ixin ján na, que sinchehe chojni mé xa ðhjoin para que sacha na tti sine na.

¹³ Hermanos, dintteconchjenha ra de nchehe ra tti jian.

¹⁴ Si ðhonja chojni ðhoha sitticaon tti janha na ndaÑhjan na ngain carta jihi, ttjiho ra cuidado quensen mé co tatoha ra para que tsosoé chojni mé.

¹⁵ Pero ningacoenha ra chojni mé, sino que chjehe ra chojni mé consuelo como si rroçji ná xanchó ra.

Pablo joexin cjin carté

¹⁶ Co Jesucristo, tti danjo tti ðhjoin que tonohé ansén ni, sanjo tti ðhjoin mé nganji ra para cainxin tiempo co ngain cainxin tti sinchehe ra. Que jehe Jesús sehe nganji ra cain ra.

¹⁷ Janha Pablo na cjin na letra conixin rana ngain tti joexinxin carta jihi para ixin jaha ra. Janhi ntafirmá cain cartana, co janha cjin na.

¹⁸ Que Jesucristo, tti chonda cain joachaxin para ixin ján na, sinchenchaon nganji cain ra. Amén.

Saho Carta Que Dicjin Pablo Para Ngain Timoteo

Pablo chjé joajna Timoteo

¹ Janha Pablo na, ná representanté Jesucristo. Dios co Jesucristo coetonna janha mé. Dios tti chjá na vida naroaxin para cainxin tiempo co Jesucristo tti ján na techonhe na hasta jehe tsí iná.

² Janha rricjin na carta jihi para ixin jaha, Timoteo, jaha tti cjoí inchin xanhna ixin jaha ndoa vitticaon ngain Jesucristo are janha jointtacoanha jaha. Dios Ndoá na co Jesucristo, tti chonda cain joachaxin para ixin ján na, sinttanchaon jaha, tsiaconoaha, co rrochjá tti chjoin que tsonohe ansean.

Tti ndacho Pablo de ixin chojni que tjago tti ndoaha

³ Inchin ojonttatsanha ñao are janha sacjoi para nonttehe Macedonia, janha rrinttatsanha ñao jai que jaha dittoha ngain ciudad de Efeso para que tsetonhe canxion chojni que te nttiha que itsjagoeha na icha chojni tti jeha ndoa,

⁴ ní sincheha na caso cuento que xonhi xé, co ni tti jitaxin de ixin nigoelito xançhjen. Cain cosa jihi joxon tti xonhi xé que ttequinacho chó na co ttjenguijnaha na na para sinttoho na tti coetona na Dios. Chonda que sotticaon na Dios para sinttoho na tti coetona na.

⁵ Janha rritetonha jihi para que chojni nttiha conixin ján na sonao chó na naná na conixin ansean na roa que xonhi jianha chonda na, co sinttoha na cosa jianha que nchenihi ansean na, co sotticaon na tti ndoa.

⁶ Canxion chojni vaguitticaon na canio cosa jihi pero vaçhenda na co ndavitján na.

⁷ Chojni mé rinao sintte na ximaestroey ley que vayé Moisés, pero ni ttinxinha na tti jehe na nichja na co ni tti jehe ná tjago na chojni conixin anto confianza.

⁸ Noa na ixin ley que vayé Moisés jian, pero chonda que sonttogonda na inchin jiquininxin.

⁹ Chonda na que tsonoa na que ni ná ley dehe para ixin tti chojni que nchehe jian. Ley dehe ley para jeha chojni que ncheha tti ndacho ley co nchehe tsje cosa jianha. Ley dehe para ixin chojni que ningaconhe Dios, co ditticaonha ngain Dios, para ixin chojni que dicaoha respeto ngain Dios, para ixin chojni que nadoenxon ndodé o janné, co para ixin cain chojni que nadoenxon chó.

¹⁰ Co ley cai para ixin chojni que ncheyehe chó para dinttejoacaho chó que jeha xixihi o nchichihi, para ixin chojni que dinttejoacaho chó xí co xí, para ixin chojni que tté chojni, para ixin chojni que nichja cosa ndoaha co chojni que nchejurá de ixin cosa que jeha ndoa. Co ley cai para ixin cain tti chojni que ningaconhe tti joajné Jesús que nttocoenhe na chojni.

¹¹ Co cain jihi que nttocoenhe na chojni jihi jí de acuerdo conixin tti joajna mé que jiquininxin tsosayehe. Co Dios, tti anto jian, tti coetonna janha para ixin nichja joajna mé.

Pablo joanjo gracias ngain Dios

¹² Janha chjaha gracias Jesucristo, tti chonda cain joachaxin para ixin ján na, ixin jehe tti chjana fuerza para nichja cain cosa jihi ixin jehe tti ndacho

ixin janha jiquininxin na xa jihi, co jehe tti joinchegonda na janha para ngain xé.

¹³ Jehe joinchehe cain jiji nganji na janha masqui feo vanichja de ixin jehe, co varroá chojni que vaguitticaon jehe co vanttaha feo ngain na. Pero Dios coiaconoana janha ixin janha xa vaguitticaonha Jesús co venonaha quehe vanttaha.

¹⁴ Mexinxin jehe Jesucristo anto joinchenciaon na janha co cjoenguijna na janha para ditticanho co para rinaho chojni inchin jehe tjenguijna cain chojni que te na conixin jehe.

¹⁵ Palabra janhi anto ndoa co cain chojni chonda na que sitticaon na: Jesucristo jói ngataha nontte para chjé cain chojni que nchehe cosa jianha iná vida naroaxin. Co de cain chojni mé, janha tti saho na.

¹⁶ Pero de cain tti jianha que janha jointtaha, Dios coiaconoana janha para que de ixin janha Jesucristo cjoago cainxin paciencia que jehe chonda. Co jañá joigarihi janha ná ejemplo para icha chojni que sitticaon Jesús co rrochonda na iná vida naroaxin que xonhi tiempo tsjexin.

¹⁷ Mexinxin janha cain tiempo sinttasayá co rrondañjan ixin Dios anto jian. Jehe Rey para cainxin tiempo co xonhi tiempo senhe co ni ðhoha dicon ni. Dios nacoaxinxon co chonxin cainxin cosa. Amén.

¹⁸ Timoteo, jaha que inchin xanhna; janha rritetonha jiji para que nchao sincheluchá jian para ixin Jesucristo inchin ndattjo chojni are nichja na joajna que joixin de ngain Dios para ixin jaha. Mexinxin sinchehe jamé. Co jian ditticaon Jesucristo conixin ansean roa.

¹⁹ Canxion na joincheha na caso tti nchenihi ansén na para nchehe na jianha co jehe nimé joinchetján na tti jehe na vitticaon na.

²⁰ Jañá conhe ngain Himeneo co ngain Alejandro, tti ni janha coanñjanda ngain Satanás para que tsangui na rronichjaha na feo de ixin Dios.

2

QueXén sinchecoanxinhí ni Dios

¹ Saho rritetonha jaha que chojni que ditticaon Jesucristo chonda que sinchetsenhe na ñao Dios, sinchecoanxinhí na Dios, sanchia na Dios co sanjo na gracias ngain Dios para cainxin chojni.

² Jañá nchetsenhe ñao Dios para ixin cain chojni que chonda joachaxin para ttetonha ngain gobierno co chojni que ttetonha ngain cain rajna para que ján na nchao sontte na ðjjoin co xonhi tseto na co sontte na inchin Dios rinao co para icha chojni rrochonda na respeto nganji na.

³ Cain jiji jian co tti nchexoxinhí Dios tti chjá na iná vida naraa.

⁴ Jehe rinao que cainxin chojni sayé iná vida naraa co satsoan na tti ndoa.

⁵ Jí nacoaxinxon Dios, co jí nchao tsintte chojni para ngain Dios, co tti xí mé, jehe Jesucristo.

⁶ Jesucristo joanjo cuerpoe para ndavenhe para que cjoenga hna tti jianha que nttoho na cainxin na. Co jiji joiconhe ngain tiempo que Dios ondacho icha antes que rrojiconhe.

⁷ Mexinxin Dios coinchiehe na janha para ná representanté Jesucristo co para tjagoa tti chojni que jaha judío de ixin tti ndoa que dotticaon na. Janha ditticanho Cristo, mexinxin janha nichja tti ndoa co nichjaha tti ndoaha.

⁸ Mexinxin janha rinaho que ngain ngoixin nontte xí sinchecoanxinhí xa Dios. Co are rrotsin rá xa para sinchecoanxinhí xa Dios, pero joxon rá tti

chojni que xonhi jianha joinchehe para que Dios sicon rá naroa. Co tsoñaoha xa ni tsetocaoha chó xa de ixin chijni.

⁹ Co janha rinaho que nchí sinttengá ncha lonttoe ncha inchin jiquininxin conixin jian joarrixaon co rroñanotaon cuerpoe ncha tti jiquininxinha sicon chojni. Are rrojini ncha co tsette lazoe ncha pero inchin jiquininxin co xonhi cosa anto rentte tsentaha já ncha, ni cosa anto rentte que settea ncha, ni lontto que anto rentte para sengá ncha.

¹⁰ Nchí sehe ncha chjoin, pero de ixin tti jian que sinchehe ncha inchin nchí que dachjeyexin ngain cosa jianha co dintte ncha jian ngain Dios.

¹¹ Nchí chondaha ncha que rronichja ncha are tsinhi ncha ngaxinhi nihngo para jamé tsangui ncha inchin chojni que ditticaon tti ditonhe.

¹² Janha danjoha joachaxin para que nchí sincheoenhe ncha chojni are icha chojni sintte na ngaxinhi nihngo, co ni tsetoanha ncha ngain xí; chonda ncha que rrotencoá ncha.

¹³ Ixin Dios saho joinchechjian Adán, cottimeja Eva.

¹⁴ Co jeha Adán tti joincheyehe Satanás, sino que Eva tti joincheyehe Satanás. Co ixin Satanás nchao joincheyehe Eva, mexinxin después Eva joinchehe cosa jianha.

¹⁵ Pero masqui Dios ndacho que anto tangui para ná nchí are ncheconcijhi ncha chjan, pero xonhi tsonhe ncha si jehé ncha ditticaon ncha Dios, co si rinao ncha cain chojni, co si sehe ncha jian inchin rinao Dios conixin jian joarrixaoen ncha.

3

Quexén sinchehe chojni que ttetonha ngain nihngo

¹ Palabra jiji atto ndoa: si chonja chojni rinao rrochonda joachaxin ngain nihngo, atto jian ná xa que jehé rinao sinchehe.

² Mexinxin, tti rinao sehe tti ttetonha ngain nihngo chonda que sehe jian para que ni ná chojni choha sinchesatthe. Choha secoa iná nchí si jehé jicao nchichihí, co sicao ná vida jian para que icha chojni rrochonda na respeto ngain jehé, co tsjanoha de ixin cosé Dios co sehe jian ngain joarrixaoen. Co chonda que sehe jian cainxin nchanho para sayé chojni que tsji ngain nchiandoha. Co chonda que rrochonxin quexén nchao tsjagoe icha chojni.

³ Seha dicoan, co xonhi chijni tsjé ngain iná chojni, co sinaoha tomí que sachaxin de cosa jianha. Seha jamé, sino que jehé chonda que sinchehe cain cosa jian co tsetocaoha chojni co tantoha sinao tomí.

⁴ Chonda que tsonhe tsetonha jian ngain nchiandoha para que xenhe sitticaon xan co rrochonda xan respeto,

⁵ ixin si ná chojni, ni ngain nchiandoha noeha ttetonha, ¿quexén nchao tsetonha ngain ningoe Dios?

⁶ Mexinxin tti tsetonha ngain ningoe Dios jeha ná tti nandá vitticaon ngain Jesucristo, ixin puede jehé rroñaxaon ixin anto nohe co jamé jianha sinchehe mexinxin sayé castigoe Dios inchin conhe Satanás.

⁷ Cai chojni que xa ditticaonha ngain Jesucristo chonda que rrochonda respeto ngain tti tsetonha ngain ningoe Dios. Jañá chojni choha rronichja jianha de ixin jehé co Satanás xonhi rrocayaoen jehé.

Quexén sinchehe tti chojni diáconos

⁸ Jañá cai diáconos, tti chojni que ttjenguijna jehé que ttetonha ngain ningoe Dios, chojni diaconos mé chonda que sintte na jian chojni cai. Co icha

chojni chonda que rrochonda na respeto ngain chojni mé. Co chojni diáconos čhoja rronichja tti ndoaha, ni rrocoanha na, ni čhoja anto sino na tomi que sachaxin de cosa jianha.

⁹ Chonda na que sintte na ngain tti ndoa que joixin de ngain Dios tti ján na dotticaon na, co sincheha na cosa jianha que sinchenihi ansén na.

¹⁰ Co jaha chonda que tsonoha saho si cain tattita mé seguro ditticaon co si seguro nchehe jian, cottimeja jehe na nchao sinchehe na xa de tsjenguijna na jehe tti ttonha ngain nihngo.

¹¹ Cai nčhičhihi xa chonda que rrochonda chojni respeto ngain nča, co rronichjaha nča cosa que jiquininxinha de iná chojni, co tsjanoha nča de ixin jošé Dios, co sehe nča jian ngain cainxin tti nchehe nča.

¹² Ná chojni diácono čhoja rrochonda yó nčhi nacoa tiempo co chonda que tsonohe jian quexén tsetonha ngain xenhe co ngain nchiandoha.

¹³ Ixin chojni diácono que nchehe xé jian, jehe na dacha na icha tsje respeto co icha rroxaonha na para rronichja na de ixin tti ditticaon na de ixin Jesucristo.

Tti dotticaon na

¹⁴ Janha rinaho sasotsjaha toin, pero janha rricjinha cain jiji

¹⁵ para que si janha tsončjenna, jaha onoha quexén sinchehe chojni Dios, co chojni mé rročo ningoe Dios que jichon. Co chojni mé tti ttixinhi co ttjenguijna tti ndoa.

¹⁶ xonhi chojni rrondačo que tti dotticaon na jieha, ixin janhi ndačo ngain tti jitaxin Palabré Dios:

Dios jói ngataha nontte inchin ná xí;
co Espíritu Santo cjoago ixin jehe jian,
co tsje ángel vicon jehe

co chojni nichja na de ixin jehe ngain cainxin nación.
Co ngoixin mundo jí chojni que vitticaon na ngain jehe
co jehe sacojín ngajni.

4

Chojni que sachjenda de ngain tti dotticaon na

¹ Pero Espíritu Santo ndačo claro are ndačo que icha saho que tsjexin mundo ttoha chojni sachjenda na de tti ditticaon na de ixin Dios, co sitticaon na oje espíritu que nchehe chojni co sitticaon na tti sincheoenhe na ninchehe xé xijianha.

² Co jehe na tsinhi na co sitticaon na tti rronichja chojni que ncheha inchin ndačo na co sincheyaxon na, co itsonoeha na feo are sinchehe na cosa jianha ixin tti sinchenihi ansén na, mé inchin ná cosa que ndache ngain xohi.

³ Chojni jiji rrondačo na ixin jianha para tsottehe na, co cai rrondačo na ixin čhoja sine na canxion cosa que jine ni. Pero Dios joinchechjian cainxin tti jine ni para ixin tti chojni que ditticaon jehe, nichonxin tti ndoa. Mexinxin nimé nchao sanjo na gracias ngain Dios co sine jiji.

⁴ Ixin cainxin tti joinchechjian Dios, mé jian, co ján na čhoja rrondačo na ixin jehe jianha; sino que ján na sayé na co sanjo na gracias ngain Dios

⁵ ixin tti ndačo Dios, co tti gracias que danjo na ngain Dios, mé nchejian cain cosa mé.

Quexén sinchehe ná tti jian ninchehe xé Jesucristo

⁶ Si jaha sincheoenhe chojni que ditticaon Dios cain jiji, jaha sarihi ná jian xinchehe xé Jesucristo. Co jaha sarichonxin tti palabra que ján na ditticaon na co tti jian que rrincheoenhe chojni de ixin Jesucristo.

⁷ Pero jaha ncheha caso tti cuento que jehó chojni xaxaon ixin cuento mé xonhi xé. Nchehe jehó tti rinao Dios.

⁸ Masqui tti nchetsontaon ni cuerpoe ni donda nchin, pero are sinchehe ni inchin rinao Dios, mé tti donda para cainxin ixin mé ttjenguijna ni ngain vidé ni jiji co cai ngain vida que tsí.

⁹ Palabra jiji atto ndoa, co cain chojni chonda na que sitticaon na.

¹⁰ De ixin cain jiji, ján na nttoho na xa masqui tangui toan na ixin noa na que Dios jichon co sinchehe jian nganji ná co jehé rinao tsjenguijna cainxin chojni para rrochonda na iná vida naroaxin, co icha para chojni que ditticaon jehé.

¹¹ Cain cosa jiji chonda que tsetonhe chojni co tsjagohe na.

¹² Jaha chjeha oportunidad chojni para que jehé na sinttaha na menos jaha ixin xa tsjeha nano chonda jaha, sino que darihi ná ejemplo para ixin chojni que ditticaon Dios. Mexinxin ttjiho cuidado que xén rronichja co que xén sinchehe; sinao cain chojni, jian ditticaon Jesucristo, co nchehe jehó cosa jian inchin Dios rinao.

¹³ Ngoixin tiempo hasta que janha saso, jaha nchehe de que tsjehé ngain nihngo tti jitaxin Palabré Dios, co ncheanimá chojni que ditticaon Jesucristo, co ncheoenhe cain chojni tti ndoa.

¹⁴ Jaha tjañaha tti joachaxin que Dios chjá are canxion chojni que chonda joachaxin ngain nihngo cóin rá ngataha jaha co nichja joajna que joixin de ngain Dios para ixin jaha.

¹⁵ Ttin cuidado cainxin tiempo ngain cosa tehe para que sicon cainxin chojni que xén jaha tsojian.

¹⁶ Ttjiho cuidado de jaho co de tti ncheoenhe chojni, co darihi soji de cain. Si sinchehe jiji, jaha rrochonda iná vida naroaxin co cai jaha tsjenguijna tti chojni que ditticaon tti jaha ndaño para que rrochonda na iná vida naroaxin.

5

Que xén sinchehe ni ngain icha chojni que ditticaon Jesucristo

¹ Nchesatteha ná dañhichjan, sino que jion dañhiejecoxin de ngayehé chojni para ndache dañhichjan mé inchin rrocji ndodá, co nchehe jian ngain xanxi inchin rrocji xanchó.

² Nchehe jian ngain nañhichjan inchin rrocji janná, co xannchí nchehe jian ngain xan inchin rrocji xanchó, co ni ná cosa jianha xaxaonha de ixin jehé xan.

³ Ttjenguijna nchiganha si jehé ncha chondaha ncha nindoha ncha.

⁴ Pero si ná nchiganha chonda ncha xenhe ncha o xanntí ncha, jehé xan mé xan chonda que tsjenguijna ncha. Co jamé jiquininxin xan para que tsjenga xan hna tti jica xan ngain nindoha xan ixin are nchinnchin xan anto joinao nindoha xan. Co jiji tti anto nche xoxinhi Dios.

⁵ Tti nchí que ndoa chondaha nindoha co vittohe jeoxinxon, jehé ncha chonhe ncha quehe sinchehe Dios co ttinttoeha ncha de ncheoanxinhi ncha Dios nchanho co ttie.

⁶ Pero nchiganha que icha nche xoxinhi cain cosa que jí ngataha nontte, nchí mé ondavenhe espirítue ncha masqui xa jichon ncha.

⁷ Ttetonha na cai cain cosa jiji para que ni ná chojni rrochondaha na de quehe tsosattexin na.

⁸ Co si tchoan chojni sincheha caso chojni jehe co icha ngain nindoha, xajeho inchin chojni mé ndacho ixin jehe iditticaonha Jesucristo, co chojni mé icha nchaoha nchehe que tti chojni que xonhi tiempo ditticaon Jesucristo.

⁹ Are tsentaxin ra nombré nchiganha que tsjenguijna ra, pero jehó nchiganha que chonda icha de sesenta nano, co jehó nchiganha que vecaoha yó xí nacao tiempo.

¹⁰ Co chonda que rrochonxin chojni tti jian que jehe ncha joinchehe ncha. Inchin si joichonda ncha chjan co jian joinchegangui ncha xan, o si joinchehe ncha jian ngain cain chojni que ttji ndoha ncha, o si joinchehe ncha ndacoa ngain xé chojni que ditticaon Jesús co ndachoha ncha ixin jehe ncha nchi anto jian, o si cjoenguijna ncha chojni que anto tangui conhe, o quexeho iná cosa jian que joinchehe ncha.

¹¹ Co ttentaxinha ra nombré nchiganha que xa tsjeha nano chonda ixin puede rroxaxaon ncha de ixin jehó ncha co secoa ncha xí iná.

¹² Co jañá isincheha ncha xa que jehe ncha ndacho ncha que seguro sinchehe ncha para ixin Cristo.

¹³ Co cai puede jehe ncha chji ncha nchia co nchia co ndanchetján ncha tiempoe ncha, co jeoha tiempoe ncha nchetján ncha, cai nchexoxinhi ncha nichja ncha cosa que jiquininxinha de iná chojni.

¹⁴ Mexinxin janha rinaho que nchiganha que xa chondaha tsje nano secoa ncha xixihi ncha co rrochonda ncha chjan co sicao ncha cuidado ngain nchiandoha ncha, co sanjoha ncha oportunidad ngain tti ningaconhe ncha para que rronichjaha na feo de ixin jehe ncha.

¹⁵ Ixin canxion nchiganha ovaçhenda ncha de Cristo, co nchehe ncha inchin rinao Satanás.

¹⁶ Si ná de chojni que ditticaon Jesús, chonja familié vittoeganha, jehe chonda que tsjenguijna co tsanchjandaha jehó nihngo sinchexinhi tomi para ixin jehe ncha. Jañá cai nihngo nchao tsjenguijna nchiganha que ndoa rrogondehe.

¹⁷ Cain xí que ttetonha jian ngain nihngo jiquininxin icha tsje respeto, co jiji icha ndoa de ixin nimé que nichja cain tiempo ngayehe chojni co ncheoenhe na na.

¹⁸ Ixin ndacho ngain tti jitaxin Palabré Dios: “Ttengueha ra coxintá nchisen are jitonndai va trigo.” Co cai ndacho: “Tti xinchehe xa chonda que rroxenguehe xa hna tomí xa.”

¹⁹ Jaha ncheha caso tti icha chojni tsjanguihi na ná xí que ttetonha ngain nihngo si seha yó o ní chojni que vícon tti joinchehe xí mé.

²⁰ Pero tti chojni que sinchehe cosa jianha, jaha chonda que rrochjehe na consejo ngattoxon con cainxin chojni, para que icha na tsosoé na co isincheha na cosa jianha.

²¹ Ngattoxon con Dios co Jesucristo, tti chonda cain joachaxin, co ngattoxon con cain ángel que jehe coinchiehe, janha rritetonha que jaha nchehe cain jiji jian, co nchehe xajeho para cainxin chojni masqui amígoa o chojni que ningaconha.

²² Saho tsjehe jian para saqué ná chojni que tsetonha ngaxinhi nihngo ixin si sanjo joachaxin ngain ná chojni que jinchehe jianha, icha chojni rroxaxaon que cai jaha nntaxoxinha cosa jianha. Ttjiho cuidado para que tti jianha seha nganji.

²³ Co diha jehó jinda, sino que dihi nchion vino cai ixin nchion tsje nchanho jaha ttín tsé.

²⁴ Tti jianha que nchehe canxion chojni nchao dicon ni icha saho que Dios sinchejuzguehe na, pero tti jianha que nchehe icanxin na diconha ni hasta nchanho mé.

²⁵ Cai dicon ni tti jian que nchehe chojni, co masqui diconha ni daca cain tti jian que jehe na nchehe na, pero choha sema cainxin para cainxin tiempo.

6

¹ Tti chojni que nchehe xa chonda que rrochonda tsje respeto ngain xinajní, para que xonhi chojni rronichja feo de ixin nombre Dios co ni de ixin tti ján na tjagoe na chojni.

² Si xinchehe xa chonda xa xinajni que ditticaon Jesús, xinchehe xa mé choha rrochonda xa icha tsjehe respeto jehó ixin cayoixin na ditticaon na ngain Jesucristo. Pero xinchehe xa mé chonda xa que sinchehe xa icha xa ixin tti sayé xa mé ditticaon Jesús co jehe xa rinao xa inchin ná xanchó xa. Jaha, Timoteo, ndache na co nchecoenhe na de ixin jihi.

¿Quexehé tti icha nchao; sinao ni Dios o sinao ni tomi?

³ Si chonja chojni tsjagoe icha chojni tti jeha ndoa, co cosa mé jeha de acuerdo ngain tti jindačo tti jian que cjoagoa na Jesucristo, tti chonda cain joachaxin para ixin ján na, ni jeha de acuerdo ngain tti dotticaon na,

⁴ chojni mé anto orgulloso, pero xonhi nohe. Jehe joxon rinao chojni tsetocaho na ngain hijni, mexinxin chojni tsonchjoehe, rroningaconhe chó na, rrondache chó na feo, co xaxaon chó na jianha,

⁵ co chojni que chonda joarrixaon jianha xonhi tiempo ttjexin toñaohé chó co chonxinha na tti ndoa. Jehe na chojni mé xaxaon na que tti jehe na nchecoenhe na chojni de ixin Dios, mé para sachaxin na anto tsje tomi. Jaha dačhjenda de ngain chojni que nchehe jañá.

⁶ Ján ndoa que tti ján na nttocoenhe na chojni de ixin Dios anto rentte, pero jehó si ján na te na contento conixin tti ján na ochonda na.

⁷ Ján na joihi na ngataha nontte pero xonhi joicoho na, ni are satsji na xonhi tsjinho na;

⁸ pero si chonda na tti jontte na co chonda na lonttoa na, conixin jehó yá otsje para que ján na sontte na contento.

⁹ Pero tti chojni que rinao rrochonda anto tsje tomi, ttixinha na ngain prueba ixin toin sinchehe na cosa jianha para rrochondaxin na icha tomi, co toin dinttji na ngain trampé joarrixaon que xonhi xé, co mé tti ndanchenihnga na co ndanchetján na.

¹⁰ Ixin tti anto rinao ni tomi, mé tti ttexinxin cainxin cosa jianha; co te canxion chojni ixin anto joinao na tomi mexinxin ndatjañehé na tti jehe na vitticaon na, co anto tangui conhe na ngain vidé na.

Pablo ndache Timoteo quexén sinchehe para rrotjañeha Dios

¹¹ Pero jaha xí que ditticaon Dios, mexinxin sattinguehe cain jihi. Co nchehe inchin Dios rinao, co rinao jehó Dios, chonda confianza ngain Dios, rinao cain chojni, chonda paciencia conixin jehe na, co dariha orgulloso.

¹² Jaha ncheluchá jian para tti jaha ditticaon, tsjehe jian para que jaha rrochonda iná vida naraoxin para cainxin tiempo. Ixin Dios vayaha jaha para cain jihi co jaha ondačo claro ngattoxon con tsje chojni ixin jaha jian ditticaon Dios ngattoxon con tsje chojni.

¹³ Co jai ngattoxon con Dios, tti chjé vida cainxin cosa que jí, co ngattoxon con Jesucristo, tti cai ndačo jian are ndačo cain tti ndoa ngattoxon con Poncio Pilato; ngattoxon con cayoi na janha rritetonha

¹⁴ que ditticaon tti vitonha, co ttentoxinha, para que rrochondaha de quehe tsosattaxin, jaha nchehe mé hasta are tsí Jesucristo, tti chonda cain joachaxin para ixin ján na.

¹⁵ Co jehe tsí ngain tiempo que ondačo. Dios sinchehe jian cain jiji ixin jehe tti nacoaxinxon Dios co ngain jehe jí cainxin tti jian, jehe Rey de cainxin tti rey, co jehe tti Ttetonha de cainxin tti ttetonha.

¹⁶ Co jeha jehe Dios tti xonhi tiempo senhe, co jehe jí ngain joadingasán tti xonhi chojni nchao tonchienhe. Ni ná chojni viconha jehe, co ni čhoha sicon na. ¡Jehe tti jiquininxin tsosayehe co jiquininxin cainxin joachaxin para cainxin tiempo! Amén.

¹⁷ Ttetonhe tti chojni que chonda tsje tomi ngataha nontte jiji que sintteha na orgulloso, ni rroxaxaonha na que ixin tomi na tti icha tsjenguijna na, ixin mé xonhi xé. Icha jian rroxaxaon na ngain Dios que jichon, co tti chjá na cainxin cosa para que ján na nttogonda na.

¹⁸ Jaha ttetonhe na que sinchehe na tti jian para que rrochonda na tsje pero de ixin tti jian que jehe na sinchehe na, co ixin sintte na listo para tsonchjeyehe na icha chojni tti jehe na ochonda na.

¹⁹ Co jañá sintte na rico ngain Dios, co jamé jehe na nchao rrochonda na seguro ixin jehe na rrochonda na iná vida naroaxin que xonhi tiempo tsjexin.

Ntiti joexin tti coetonha Pablo ngain Timoteo

²⁰ Jaha Timoteo, tjañaha de nchehe cain tti coetonha Dios. Jaha ncheha caso tti chijni que tjao chojni, ixin chijni mé xonhi xé. Co ncheha caso tti nichja chojni que ndačo na ixin anto nohe na pero ndoaha,

²¹ ixin chojni que xaxaon jehe tti anto nohe, nimé ndatjañehe na tti jehe na vitticaon na.

Que Dios sinchenaon nganji. Amén.

Yoxin Carta Que Dicjin Pablo Para Ngain Timoteo

Pablo chjé joajna Timoteo

¹ Janha Pablo na, ná representanté Jesucristo. Janha tti rroanha na Dios ixin jehe joinao, para ndattjan chojni de ixin iná vida naroaxin que danjo Jesucristo.

² Janha rricjin na carta jihi para ixin jaha Timoteo que inchin xanhna que anto rinaho. Dios Ndodá na co Jesucristo, tti chonda cain joachaxin para ixin ján na, sinttanhaon nganji jaha co tsiacnoaha jaha co rrochjá tti çhjoin que tsonohe ansean.

Tti ndaço Pablo de ixin Jesucristo

³ Cainxin tiempo que janha nttacoaxian Dios, janha çaxanho jaha; nchanho co ttie janha chjaha gracias ngain Dios tti janha nttaha ça ngain conixin ansenna roa inchin joinchehe nindogoelitona icha çanhçjen.

⁴ Janha anto çaxanho de ixin ndacon que jaha cointtji are janha sacjoixin de nganji jaha, co janha rinaho sicon jaha para anto rrochahna janha.

⁵ Janha çaxanho ixin jaha ndoa jian ditticaon. Jangoelítá Loida co janná Eunice anto vitticaon na, co janha chonda seguro que jaha cai ditticaon jamé.

⁶ Mexinxin janha rritetonha jaha que nchegonda tti joachaxin que chjá Dios are janha coín rana ngataha jaha.

⁷ Ixin Dios rinaoha que ján na rroçaon na, mexinxin Dios chjá na Espíritu Santo co Espíritu mé chjá na joachaxin co ttjenguijna na para rinao na chojni, co chjá na jian joarrixoon.

⁸ Jaha chondaha joasoaxin para rronichja tti ndoa que jaha noha de ixin Jesucristo, tti chonda cain joachaxin para ixin ján na, co ni chondaha jaha joasoaxin de ixin janha cai tti rriaxinna de ixin causexin jehe. Sino que jaha dittoaxin tsonha tti anto tangui que tsí de ixin causexin tti jian joajna co Dios sinttasoji jaha.

⁹ Dios tti chjá na iná vida naroaxin, co jehe coinchía na para que ján na sontte na jian ngain jehe, pero jeha de ixin tti jian que jointtoho na, sino que ixin jehe oçaxoon jañá, co ixin jehe rinao na ján na ixin dotticaon na Jesucristo. Dios joinao cain ján na icha saho que nontte rroguéhe,

¹⁰ Co jai jehe cjoagoa na que ján rinao na ixin rroanha Jesucristo, tti chjá na iná vida nara. Co jehe Jesús joinchexante joachaxin de tti ndadenhe ni, co joinchegonda tti jian joajna para cjoago iná vida naroaxin que içhoha tsjexin.

¹¹ Dios tti coinchiehe na janha para rronichja tti jian joajna mé, co rroanha na janha para sarihi ná representanté Jesucristo para sinttacoán chojni que jeha judío.

¹² Mexinxin jí razón que janha anto tangui jitonna de ixin cain cosa jihi. Pero janha chonda confianza ixin janha nona quensen ngain vitticanho co chonda seguro que jehe mé chonda joachaxin para sinchehe sigue tsjenguijna na ngain ça que jehe chjana hasta are tsí nchaon jehe.

¹³ Jaha rroehé tti ejemplo jian que janha jointtacoanha co darihi ngain tti jian que ján na dotticaon na co rinao cain chojni. Jamé nchao sinchehe ixin Jesucristo ttjenguijna cain chojni jehe para nchehe na jamé.

¹⁴ Espíritu Santo que jí nganji na tsjenguijna jaha para tsjiho cuidado ngain tti chjá Dios.

¹⁵ Inchin jaha onoha, cainxin chojni nonttehe Asia ndacointtona na jaonx-inxon. Cai Figelo co Hermógenes ndacointtona na.

¹⁶ Que Jesucristo, tti chonda cain joachaxin, tsiaconoehe nindoha Onesíforo ixin jehe tsje nttiha cjoenguijna na, co jehe cosoeha que janha rriaxinna.

¹⁷ Co are jehe jói nttihi ciudad de Roma jehe cointtoeha de cjoé na janha hasta que vittja na.

¹⁸ Mexinxin janha nttatsán ñao Jesucristo que tsiaconoehe jehe ngain nchaoen jehe Jesús. Jaha jian xaxaon cai que jehe anto cjoenguijna na janha na ngain ciudad de Efeso.

2

Quexén sinchehe ni inchin ná jian xisoldadoe Jesucristo

¹ Timoteo, jaha inchin xanhna, tosoji jaha de ixin tti jian que chonda na ixin te na ján na ngain Jesucristo.

² Tti jaha coinhi que janha nichja de ixin Jesús ngattoxon con tsje chojni, mé tti ncheoenhe icha xí que chonda jaha confianza ngain; xí que nchao sincheoenhe icha chojni tti jaha noha.

³ Jaha ttixinha ngain tti anto tangui que tsonha inchin ná jian xisoldadoe Jesucristo.

⁴ Ni ná xisoldado que jí ngain xé čhoha sinchehe xa caso vidé iná chojni que jaha soldado ixin chonda xa que sinchehe xa jeho inchin tsetonha xittetonhe xa.

⁵ Co cai ná tti tsontaon čhoha sayé ni ná premio si jehe rrotsontaonha inchin jiquininxin ná juego.

⁶ Tti nchehe xa ngataon jngui chonda derecho que jehe tti saho rrotsín tti soanxin ngataon jngui mé.

⁷ xaxaon tti janha ndačhjan, co Jesucristo, tti chonda cain joachaxin, tsjenguijna jaha para tsinxin cain.

⁸ xaxaon Jesucristo, tti xechonxin de ngacjén nindadiguenhe co tti cjoixantti icha xančhjen de rey David. Co jihi tti ndačo tti jian joajna que janha ndattjan tsje chojni.

⁹ Causexin tti jian joajna jihi janha tangui jitonna hasta janha rriaxinna co rričoaxin conixin cadena inchin ná chojni que joinchehe tsje cosa jianha. Pero tti jian joajna de ixin Dios, čhoha sechoa joajna.

¹⁰ Mexinxin janha ttixinna cain tti anto tangui jihi para ixin cain chojni que Dios coinchiehe sayé na iná vida naroaxin que anto jian co que xonhi tiempo tsjexin. Co mé ján na nchao rrochonda na ixin te na ngain Jesucristo.

¹¹ Palabra jihi ndoa:

Si ján na ndavenhe na conixin jehe, cai sonttechon na conixin jehe.

¹² Si ján na tsixian na are anto tangui tsoan na, cai ján na rrochonda na parte ngain tti tsetonha jehe.

Pero si rrondačo na nahi de ixin jehe, cai jehe rrondačo nahi de ixin ján na.

¹³ Si ján na cainxinha tiempo dotticaon na, pero jehe ján cainxin tiempo rinao na ján na

ixin Dios čhoha rrondačo nahi de ixin jeho mismo.

Ná xinchehe xa jian

14 Ncheɣaxaon chojni jaha jihi co ttetonhe na ngattoxon con Dios, tti chonda cain joachaxin, que tsetocaoha na chojni de ixin chijni. Ixin chijni jihi xonhi xé, jeha nchehe jianha ngain chojni que ttinhi.

15 Jaha tsjehe quexén nchehe para que tonchienne ngattoxon con Dios inchin ná xinchehe ɣa jian que rrochondaha xa que tsooé xa. Co jian ncheoenhe icha chojni quehe ndaɣho tti jitaxin Palabré Dios.

16 Jaha ncheha caso tti chijni xonhi xé que nichja chojni, ixin tti chojni que nichja jamé icha co icha ndaditján na ngain cosa jianha.

17 Co jehe tti chijni que nichja na, mé tsinga inchin tti chin que anto daca ncherrenga nntao. Jehe jihi tti jitonhe Himeneo co Fileto.

18 Chojni jihi ndavaɣjenda na de ngain tti ndoa ixin ndaɣho na que Dios ojinchexechon chojni, co jañá tencheyehe na canxion chojni que icha saho vitticaon ngain Jesús.

19 Pero Dios vaquehe ná base anto soji co jehe mé chonda ná joajna que ndaɣho: “Dios, tti chonda cain joachaxin, chonxin chojni jehe”, co “Cain chojni que ndaɣho ixin jehe ditticaon Cristo chonda que sachjenda de ngain cosa jianha.”

20 Ngain ná nchia jie jí jeoha traste de oro co plata, cai jí traste de nntá co nchechin. Ttoha traste mé para dondehe na ngain chonja quiai, co ittoha traste para dondehe na cain nchanho.

21 Si sachjexin ni de ngain cain cosa jianha, jehe ni sintte ni inchin tti traste de joxon oro, co Jesucristo, tti chonda cain joachaxin, nchao sinchegonda ni ngain quexeho ɣa jian.

22 Satinguehe cain tti nchaoha que ɣaxaon ni are ɣa tsjehe nano chonda ni, co rroehe ná vida nao, co ditticaon Jesús, rinao cain chojni co ttetocoha icha chojni. Jañá nchehe jaha conixin cain chojni que chonda ansén na roa que nchetsenhe na ñao Jesucristo, tti chonda cain joachaxin, para jehe tsjenguijna na.

23 Jaha ncheha caso tti chijni xonhi xé que nichja chojni, jaha onoha que chijni mé nchequeto chojni.

24 Ixin nchaoha para ná tti nchehe xé Jesucristo tsetocaho iná chojni. Sino que jehe chonda que sehe jian ngain cain chojni. Chonda que sehe jian co rrochonda paciencia ngain chojni.

25 Co are rrondache tti chojni que ditticaonha ixin tsentoxinhi na vidé na, pero rroxaxaonha ixin jaha icha jian, sino que chonhe co nchetsenhe ñao Dios ixin sinchequentoxinhi vidé na co tsjenguijna na rrochonxin na cain tti ndoa.

26 Jamé para que jehe na rroxingamehe na co satsingaxin na de ngain tti trampé inchínji tti jehe na teaxinhi na para sinchehe na inchin jehe inchínji rinao.

3

Quexén sintte chojni are ochiaon tsjexin mundo

1 Cai chonda jaha que tsonoha jihi: que ngain tiempo que ochiaon mundo sitján, tsí tsje nchanho tangui para ixin chojni.

2 Anto rroxaxaon na de ixin jeha na, anto sinao na tomi, tsonohe na ixin jeha na ni icha jian, co tsonohe na que jeha na ni icha chjoin te. Co rronichja na nchaoha de ixin Dios, sitticaonha na ndodé na co janné na, xonhi tiempo sanjo na gracias ngain tti chojni que sinchehe jian ngain na, co sinchesayeha na Dios.

³ Co sinaoha na iná chojni ni tsiacoeha na chojni, rronichja na tti ndoaha de iná chojni, tsinttoeha na de sinchehe na cosa jianha que jehe na rroḡaxaon na, jehe na rroché na are sinchehe na feo ngain iná chojni, co rroningaonhe na cain tti jian.

⁴ Co sintte chojni traicionero, sitticaon na jeha na, co rrondačo na ixin jehe na icha chonxin na. Co jehe na sinchehe na inchin jehe na rroḡaxaon na, co irroḡaxaonha na Dios.

⁵ Jehe na tsji na ngain nihngo, pero rrondačo na que Dios chondaha joachaxin.

Jaha diyeha cain chojni jiji.

⁶ Ixin chojni jiji dixinhi nchiandoha nčí que ḡaxaonha jian co tonohe ncha feo de ixin tsje cosa jianha que nchehe ncha. Co chojni mé dixinhi na nchiandoha nčí mé co ncheoenhe na ncha tti ndoaha. Nčí jiji, ḡaxaon ncha jeha de ixin tti jehe ncha rinao ncha,

⁷ co cainxin tiempo tetangui ncha pero ḡonhi tiempo ttinxin ncha tti ndoa.

⁸ Inchin tti xi Janes co Jambres coñaon ngain tti ndačo Moisés, jañá cain chojni mé toñaohé na tti ndoa. Xi que nchehe jamé ngain nčí, jianha jí ngain joarrixaon xa co ndoaha ixin ditticaon xa Jesús.

⁹ Pero cosaha tsje sinchehe xi mé ixin cainxin chojni tsonohe na ixin xi mé ḡonhi xé tti ḡaxaon xa, jañá inchin conhe Janes co Jambres tti xi que coñaohé Moisés.

Ultima cosa que Pablo coetonha ngain Timoteo

¹⁰ Pero jaha ojoinchehe caso tti janha jointtaconha, queḡén jointtaha, co queḡén rinaho icha chojni. Jaha jian chonxin tti janha ditticanho, co ixin chonda paciencia, co ixin janha coixinna

¹¹ are anto tsje chojni coñaon nganji na co are anto tangui conna. Jaha noha cain tti janha conna ngain ciudad de Antioquía, co ngain ciudad de Iconio, co ngain rajna Listra. Co jaha noha cain tti anto tangui que conna ixin anto tsje chojni coñaona, pero Jesucristo, tti chonda cain joachaxin, cjoenguijna na para vattoa cain yá.

¹² Co ndoa que anto tangui tsonhe cain chojni que rinao sintte jian para ixin Jesucristo.

¹³ Pero cain tti chojni jianha co tti chojni que ncheyehe icha chojni, jehe na cada nchanho icha jianha sintte na. Jehe na sincheyehe na icha co icha chojni, co chojni sincheya ngain na cai.

¹⁴ Pero jaha darihi soji ngain tti jaha coangui, co tti jaha ovitticaon. Jaha noha quensen jointtaconha,

¹⁵ ixin de ḡa nchín jaha ojoatsoan quehe jitaxin Palabré Dios, co mé tti sinttanoha icha jian ixin nchao sayé ni iná vida naroa si ditticaon ni ngain Jesucristo.

¹⁶ Cain tti ḡon que jitaxin Palabré Dios, jehe Dios tti chjé chojni joajna para que conohe na quehe palabra cjin na ngain ḡon mé. Co ḡon mé para que ján na tsonoa na tti ndoa, co para nttanoa na ixin nttoho na jianha, co queḡén tsentoxinhi na vidá na, co ḡon mé tsjenguijna na sontte na ngain ná vida nao.

¹⁷ Mexinxin tti xi que nchehe xé Dios nchao tsangui xa tti rinao Dios para que jehe xa nchao sinchehe xa cainxin jian.

4

¹ Janha anto rritetonha ngattoxon con Dios co ngattoxon con Jesucristo, tti chonda cain joachaxin, co tti tsí inchin rey para sinchejuzguehe cain chojni, masqui ondavenhe na o xa techon na.

² Janha rritetonha que rroundache chojni joajné Dios. Jaha chonda que rroundache chojni joajna mé, masqui rinao na tsinhi na o rinaoha na tsinhi na. Ncheguitticaon na joajna mé, chjehe na consejo, ttjenguijna na para sitticaon na, co chonda paciencia are sinchecoenhe na joajna mé.

³ Ixin tsí tiempo que chojni isinaoha na tsinhi na tti jian que ján na nttocoenhe na na co sinchehe na inchin jehe na sinao na. Jehe na tsjé na anto tsje ximaestro para sinchecoenhe xa na inchin jehe na sinao na tsinhi na.

⁴ Sinaoha na tsinhi na tti ndoa, co sinchehe na caso cain cuento que xonhi xé.

⁵ Pero jaha cainxin tiempo darihi conixin joarrixaon jian co ttixinha ngain tti anto tanguí, co nchanho co nchanho ndache chojni tti jian joajna co nchehe jian cain xa.

⁶ Janha ochian jói nchanho que chojni nasoenxon na na co ojitonchiaon hora que janha tsinttoa vida jiji.

⁷ Janha atto jointaluchá para ixin Jesús, co janha atto coinga ngoixin nttié Jesucristo hasta que joexin vidana, co cainxin tiempo janha vitticanho.

⁸ Co jai jichonna premio para ixin tti vida nao. Co Jesucristo, tti chonda cain joachaxin, rrochjana premio mé ngain nchanho que tsí, co jehe mé ná juez jian ngain nchanho que tsí. Co jeoha janha rrochjana, cai rrochjé cain chojni que anto rinao tti nchanho que tsí jehe Jesucristo.

Joajna que cjin Pablo para jeho Timoteo

⁹ Jaha tsjehe que xén sinchehe para que sitsjena toin,

¹⁰ ixin Demas ndacointtona janho ixin icha joinao cosa ngataha nontte, co sacjoi para ngain ciudad de Tesalónica. Co Crescente sacjoi para nonttehe Galacia, co Tito sacjoi para nonttehe Dalmacia.

¹¹ Jeho Lucas jí nganji janha. Ttjé Marcos co sicohna ixin jehe mé tti nchao tsjenguijna na ngain xa que janha chonda.

¹² Tíquico janha rroanha para ngain ciudad de Efeso.

¹³ Are jaha sihi, sicohna no xana no xa bocamanga que janha cointtoa ngain nchiandoha Carpo ngain ciudad de Troas, cai sicohna librona co icha rinaho sicohna xonna.

¹⁴ Alejandro, tti nchechjian cosa de chia, joinchehe atto tsje cosa jianha nganji janha. Jesucristo, tti chonda cain joachaxin, tsjenguehe hna cain tti jehe joinchehe.

¹⁵ Jaha ttjiho cuidado de ixin jehe, ixin jehe anto ningaconhe tti ján na ndaño na.

¹⁶ Are saho nttiha que janha ndachjan ngain xijuez cain tti ndoa que janha nttaha, ni ná chojni cjoenguijnaha na janha; cainxin na ndacointtona na janho. Janha rinaho que Dios irroxaxaonha quehe joinchehe jehe na.

¹⁷ Pero Jesucristo, tti chonda cain joachaxin, cjoenguijna na janha co joinchesoji na para que janha nchao joena ndattjan chojni que jeha judío tti jian joajna. Jañá jehe Jesús coanchjandaha na janha para ndarroguenhe na,

¹⁸ co tsanchjandaha na janha de cainxin cosa jianha co jehe tsenchjinha na janha para ngain tti lugar que jehe ttetonha ngajni. ¡Jehe jiquininxin tsoyayehe para cainxin tiempo! Amén.

Pablo joexin cjin carté co rroanha joajna

¹⁹ Janha rroanha joajna para ixin Prisca co Aquila, co ngain nindoha Onesíforo.

²⁰ Erasto vittohe ngain ciudad de Corinto, co Trófimo nihi cointtoa ngain rajna Mileto.

²¹ Jaha tsjehe quexén sinchehe pero sihi icha saho que ngain tiempo quin, si nchao. Cai Eubulo, Pudente, Lino, Claudia co cain icha chojni que ditticaon Dios nttihi rroanha joajna para ixin jaha.

²² Jesucristo, tti chonda cain joachaxin, sehe nganji, co Dios sinchenchaon nganji cainxin jaha ra nttiha. Amén.

Carta Que Dicjin Pablo Para Ngain Tito

Pablo chjé joajna Tito

¹ Janha Pablo na, ná xinchehe xé Dios co ná representanté Jesucristo. Janha tti jehe rroanha na para que janha ttjenguijna chojni que Dios co- inchiehe para jehe na ditticaon na, co para que jehe na satsoan na tti mero ndoa de ixin tti dotticaon na,

² co para jehe na rrochonxin na que seguro rrochonda na iná vida naroa que xonhi tiempo tsjexin. Dios čhoħa sincheyaxon, co icha saho que nontte rroguehe, jehe seguro ndačho ixin ján na rrochonda na vida mé.

³ Co jai, mero ngain tiempo que jehe coinciehe, jointtagatsoan na joajné, co joajna mé tti janha rrinichja. Dios tti ttjenguijna na coetonna jamé.

⁴ Janha rricjinha carta jihi, Tito; jaha inchin xanhna ixin vitticaon Jesucristo are janha jointtacoanha jaha. Dios Ndođá na co Jesucristo, tti chonda cain joachaxin para ixin ján na co tti danjo iná vida naroa, sinttanchaon jaha, co sinttaniha jaha ngain ansean, co rrochjá tti čhjoin que tsonohe ansean.

Quexehē xa jinchehe Tito ngain Creta

⁵ Are cointtoha ngain tti nontte que dinhi Creta que jí ngosine ndachaon, jamé para que jaha rrocjaha tti ěa que ěa vitján conhe, co para jaha cjoé xí que tsetonha ngain nihngo cada rajna inchin janha coetonna jaha.

⁶ Co ěaxaon jaha ixin xí mé chonda que sehe xa jian ngain vidé xa para que ni ná chojni chondaha na de quehe sinchesattexinha xí mé. Co čhoħa chonda xa yó nčhí nacoa tiempo, co cain xenhe xa chonda xan que ditticaon xan Dios co xonhi cosa jianha joinchehe xan ni tsoñaoħa xan de ixin tti sitonhe xan.

⁷ Tti ttetonha ngain ningoe Dios chonda que nchehe jamé ixin jehe nchehe ěa para ixin Dios, mexinxin chonda que jehe dicaon ná vida jian. Seha terco co ndacoa sinchehe ngain cain chojni, rrocoanha ni čhinttoha sehe, ni sinoaha tomi que sachaxin de ngain cosa jianha.

⁸ Jehe chonda que sayé chojni que tsji ngain nchiandoha, co jehe chonda que sehe na xí que nchehe jian, co sehe jian de ngain joarrixaon, co sinchehe inchin jiquininxin, co sačhjejeyxin de ngain tti jianha. Jehe chonda que sinchesayehe Dios, co sincheha jehō inchin rinao cuerpoe.

⁹ Chonda que rrorroé tti joajna ndoa que jehe cocoenhe para que jehe cai nchao sincheanimá icha chojni are sinchecoenhe na co para que sincheguitticaon tti chojni que ditticaonha joajné Cristo.

¹⁰ Ixin jí atto tsje chojni que toñao nganji na co de cainxin na, chojni judío tti icha xonhi xé tti nichja na co nchejehe na icha chojni.

¹¹ Cain chojni mé chonda que tsejehe ni rroħa na ixin ncheguitticaon na tsje familia ixin tjagoe na na tti jiquininxinha jehō para dachaxin na tomi, co jianha jí tti tenchehe na.

¹² Ná profeta que vehe ntliha ngain mero nonttehe Creta, ndačho janhi de ixin chojni ngain Creta: “Chojni ngain Creta cainxin tiempo nichja na cosa que ndoaha, co te na inchin coxigo čhintto ngagaha jna, co atto xengo na, co atto sehe na.”

¹³ Co ndoa tti jehe ndačho. Mexinxin jaha nchesattehe na soji para sintte na jian ngain tti ditticaon na,

¹⁴ co para que sincheha na caso tti cuento que dixaxaon chojni judío, ni sincheha na caso tti ttetonha tti chojni que rinaoħa ditticaon tti ndoa.

¹⁵ Para ixin tti chojni que chonda joarrixaoen jian, para ixin jehe nimé cainxin cosa jian co roa cosa; pero para ixin tti chojni que ditticaonha co ni joarrixaoen na jianha, xonhi cosa jian para ixin jehe na ixin hasta joarrixaoen na co tti nchenihi ansén na para sinchehe na jianha, hasta cayoi mé jianha cai.

¹⁶ Jehe na ndačo na ixin chonxin na Dios, pero tti nchehe na tjago que ndoaha tti ndačo na, ixin icha chojni ningaconhe jehe na, co jehe na ningaconhe na cain tti ttonhe na co xonhi xé ttjelé na para sinchehe na ni ná cosa jian.

2

Pablo ndache Tito ixin ndacoa sincheoenhe chojni

¹ Are jaha ncheoenhe chojni chonda que ncheoenhe na inchin ndačo palabra que nichja tti ndoa.

² Ncheoenhe dathichjan ixin rrocoanha, co ixin sinchehe jian para que chojni rroaxaon na jian de ixin jehe, co ixin rrochonda ná vida nao. Co cai ncheoenhe dathichjan ixin jian sitticaon, ixin sinao chojni, co ixin tsoncha are chojni feo sinchehe na ngain.

³ Xajeho ngain načhichjan cai, ncheoenhe ixin sinchehe inchin jiquinixin ngattoxon con Dios co ixin rronichjaha cosa que jiquininxinha de ixin iná chojni, co ni rrocoanha. Jehe načhichjan mé chonda que sanjo ná jian ejemplo

⁴ para que jamé tsjagoe cain nčí que icha tsjeha nano chonda para sinao ncha xixihi ncha conixin xenhe ncha,

⁵ co para rrochonda ncha jian joarrixaoen ncha, para xonhi jianha sinchehe ncha, para sicao ncha cuidado ngain nchiandoha ncha, para sincheniha ncha tti sanjo ncha ngain icha chojni, co para sitticaon ncha tti rrondačo xixihi ncha. Cain jihi sinchehe ncha para que xonhi chojni rronichja mal de ixin joajné Dios.

⁶ Cai ncheanimá xanxi que xa tsjeha nano chonda para sintte jian joarrixaoen xan,

⁷ co jaha mismo chonda que chjehe xan ná jian ejemplo de cainxin cosa. Co are sincheoenhe chojni, ncheoenhe na nao conixin respeto.

⁸ Jaha nichja palabra jian para que xonhi chojni nchao rronichja jianha de ixin palabra mé. Jañá tsoosé quexeho chojni que tsoñao nganji jaha ra co čhoha rronichja jianha de ixin jaha ra.

⁹ Ndache ninchehe xa que sitticaon na cain tti ttonha xinajni na; sintte ansén na čhjoin para ixin jehe xa, co rronichjanguiha na xa.

¹⁰ Co tseha na cosé xa, sino que sintte na jian chojni para que cainxin icha chojni sicon na quexen vidé na co jamé rrochonxin na ixin anto čhjoin čho Palabré Dios, tti chjá cain na iná vida naroa.

¹¹ Ixin Dios cjoagoa na tti jian que jehe nchehe nganji na para ttjenguijna cain chojni para sayé iná vida naroa que jehe danjo.

¹² Co tti jian mé que ttixin de ngain Dios tjagoa na ixin chonda na que tsintohe na cosa jianha co tti nchaoha que jan na xaxaon na ngataha nontte jihi, co sonttoho na cosa ngataha nontte jihi inchin nchehe chojni de jian joarrixaoen, co chonda na que rrochonda na ná vida nao inchin Dios rinao.

¹³ Para que jamé rrochonhe na tti nchanho que jehe ndačo are socon na rrořago tti chíxo que tsiaho Dios, que chonda anto tsje joachaxin, conixin Jesucristo, tti danjo iná vida naroa.

¹⁴ Jehe joanjo cuerpoe para ndavenhe para ixin ján na para que danjo iná vida naroa co para que joincheroa almá na para que ján na sontte na chojni jehe; chojni que anto sinao sinchehe tti jian.

¹⁵ Cain jiji tti jaha chonda que tsjagohe chojni, co ncheanimá na, co chjehe na consejo conixin cainxin joachaxin que jaha chonda de ngain Dios. Jaha danjoha oportunidad para que rroꝥaxaonha chojni ixin jaha ꝥonhi ꝥá.

3

Tti jiquininxin sinchehe chojni que ditticaon Jesucristo

¹ Ncheꝥaxaon chojni que sitticaon na cain gobernación co cain tti ttonha, co sittoexin na sinchehe na quexeho cosa jian.

² Ndache na que rronichjaha na jianha de ni ná chojni, ni tsetocaoha na chojni, co sinchehe na cain cosa jian ngain icha chojni co sintteha na orguloso ngain icha chojni.

³ Ixin cai ján na are saho vechonxinha na co vagotticaonha na ngain Dios, co vacjin na inchin chojni que ndadiguitján. Co ján na gontte na inchin ninchehe ꝥa de ngain cain tti jianha que cuerpoa na joinao, co de ngain cain tti jianha que vanttaꝥoxian na vanttoho na. Vanttoho na cosa jianha co vaconchjoá na ngain chojni co vacoñao na ngain na co jaon na vacoñaohe chó na.

⁴ Pero are Dios, tti chjá na iná vida naroa, cjoagoo na ixin jehe jian nchehe co ixin jehe rinao cain chojni,

⁵ are mé jehe cjoenguijna na para que chonda na iná vida naroa. Pero jeha ixin ján na jointtoho na ná cosa jian, sino que ixin jehe coiaconoá na. Jehe joinchehe jamé are Espíritu Santo cjoén almá na, co mexinxin coentoxinhi vidá na co chjá na iná vida naroaxin.

⁶ De ixin Jesucristo, tti danjo iná vida naroa, Dios anto chjá na joachaxin de ngain Espíritu Santo

⁷ para que conixin tti jian que joixin de ngain jehe, ján na jamé tsojian na co sayé na tti iná vida naroaxin que ꝥonhi tiempo tsjexin que ján na techonhe na.

⁸ Palabra jiji atto ndoa. Co rinaho que jaha anto tsje nttiha rrondache chojni cain cosa jiji para que tti chojni que ditticaon Dios sinchehe na tti jian. Cain cosa jiji jian co ttjenguijna cain chojni.

⁹ Pero jaha ncheha caso tti chijni que ꝥonhi ꝥé, ni tti jitaxin de ixin queꝥén joinchehe nigoelito icha ꝥanꝥhen are saho, ni ncheha caso tti ningaconhe chó chojni, ni tti ttetocaho chó na de ixin queꝥén ttonha ley que vayé Moisés. Cain cosa mé ꝥonhi ꝥé co ttjenguijnaha chojni.

¹⁰ Si ꝥhonja chojni santsjenda chojni de ngain nihngo, jaha nichjehe chojni mé co ndache ná o yó nttiha que isincheha jañá, co si rroꝥoha sinttaha caso, jaha denguixin chojni mé de ngayehe chojni que ditticaon Jesucristo.

¹¹ Ixin jaha onoha que chojni mé ocjamangui joarrixaoen, co tti jianha que nchehe chojni, mé tjago ixin jianha jehe.

Tti ndaꝥho Pablo para jeha Tito

¹² Are janha rrorroanha Artemas o Tíquico, jaha tsjehe queꝥén sinchehe pero jaha sihi sitsjena ngain rajna Nicópolis ixin janha oꝥaxanho que nttiha sattoxin tiempo quin.

¹³ Conixin cainxin tti nchao sinchehe jaha, ttjenguijna xiabogado Zenas co cai Apolos, co chjehe na tti rrogondehe na para ngain tti satsji na para que ꝥonhi sitjañehe na.

¹⁴ Co ttjenguijna cain chojni que ditticaon inchin ján na para que tsangui na sinchehe na jian co ttjenguijna na chojni are jehe na rrogondehe na para que vidé na sonda para ixin Dios.

Pablo joexin cjin carté co rroanha joajna

¹⁵ Cainxin chojni que te nganji janha rroanha na joajna para ixin jaha. Chjehe joajna cain amigoa na que ditticaon na Jesucristo nttiha. Que Dios sinchençaon nganji ra. Amén.

Carta Que Dicjin Pablo Para Ngain Filemón

Pablo chjé joajna Filemón

¹ Janha Pablo na que rriaxinna jai ngain cárcel ixin causexin Jesucristo, rricjinha carta jiji janha conixin Timoteo para nganji jaha Filemón. Jaha xicompañerona na de ngain xa que nttaha na co anto rinaho na jaha.

² Co cai carta jiji para ngain chojni que ditticaon Jesucristo que xatte ngain nchiandoi para serviciao ra, co cai para ngain nchí que dinhi Apia que cai ditticaon ncha Jesucristo, co xí que dinhi Arquipo tti tjenguijna na ngain xé Dios.

³ Dios Ndodá na co Jesucristo, tti chonda cain joachaxin, sinchenchaon nganji ra co rrochjá ra tti chjoin que tsonohe ansean ra.

Pablo ché ixin Filemón anto rinao co ditticaon Dios

⁴ Janha cainxin tiempo chjaha gracias ngain Dios de ixin jaha, Filemón, co xaxanho jaha are janha nttacoanxian Dios

⁵ ixin janha coian que jaha rinao co jian ditticaon Jesucristo co ixin cai rinao cain chojni que ditticaon jehe.

⁶ Janha danchiá Dios que tti chojni que ovitticaon Jesucristo ixin jaha ndache na, chojni mé icha tsinxin na tti jian que Jesucristo rroán na.

⁷ Janha atto chahna co darihi animado ixin jaha rinao cain chojni hasta que anto jian nchehe ngain cain chojni que ditticaon Jesucristo.

Pablo danchia ná joatotsenhe ñao para ixin tti nchehe xa Onésimo

⁸ Mexinxin masqui chonda derecho janha para tsetonha quehe chonda que sinchehe jaha,

⁹ pero jehó rinaho sinttatsanha ñao ixin janha anto rinaho jaha. Janha Pablo na, ojonchjan na co jai rriaxinna ngain cárcel ixin causexin Jesucristo,

¹⁰ co janha danchiaha jaha ná joatotsenhe ñao na para ixin Onésimo, tti joigoan inchin xanhna nttihi ngain cárcel tti vitticaon Jesús are janha jointtacoán.

¹¹ Are icha saho Onésimo cjoí ná tti nchehe xa que xonhi xé para ixin jaha, pero jai jehe rrogondá na para ixin jaha co para ixin janha cai.

¹² Janha rrorroanha Onésimo iná. Dayehe inchin rrocji ansenna janha.

¹³ Janha rrojinaho que jehe rroguittohe nttihi nganji na para que tti rrojinchehe jaha nganji na janha, jehe tti rrojinchehe mé cain nchanho que janha rriaxinna ixin causexin tti jian joajna.

¹⁴ Pero xonhi rinaho sinttaha si jaha sariha de acuerdo para que tti joatotsenhe ñao na que jaha sinchehe nganji janha jeha afuerza, sino que jehó si jaha ján sinao.

¹⁵ Puede Onésimo vachjenda de nganji jaha ná tiempo, para que jai jehe sehe nganji jaha para cainxin tiempo.

¹⁶ Co jai ijeha inchin ná tti nchehe xa ixin sehe icha jian que ná tti nchehe xa, rrocho, inchin ná xanchó na ngain Cristo que anto rinao na. Janha atto rinaho Onésimo, pero jaha chonda que icha sinao ixin jeha jehó inchin xinchehe xá, nahi, sino que inchin ná xanchó para ngain Jesucristo, tti chonda cain joachaxin.

¹⁷ Jañá remé, ixin janha xicompañeroa na, dayehe Onésimo inchin rroyena janha.

¹⁸ Si choan nchaoha joinchehe nganji jaha, o si choan jica nganji jaha, nchena cobro janha.

¹⁹ Janha, Pablo na, cjin na conixin rana co letrana janhi: janha tsjengaha hna, masqui janha nchao rrojinttaŋaxaon que jaha rricana janha ngoixin vidá jaha.

²⁰ Ján, nchehe tti joatotsenhe ñao jihi nganji janha para ixin Jesucristo, tti chonda cain joachaxin, co nchehe jamé para que rrochjana consuelo inchin ná xanchian de ngain Cristo.

²¹ Rricjin na nganji jaha ixin janha chonda seguro que jaha sitticaon tti janha danchiaha co nona que jaha sinchehe ichá que tti janha danchiaha jaha.

²² Co cai janha danchiaha jaha ná cuarto tti janha sarihi, ixin janha chonda seguro que Dios rrochjá ra tti joachaxin que jaha ra danchiehe ra para que janha sasotsjaha ra.

Pablo joexin cjin carté co rroanha joajna

²³ Canxion chojni rroanha na joajna para ixin jaha, saho Epafras, xicompañerona ngain cárcel de ixin causexin Jesucristo.

²⁴ Co cai Marcos, Aristarco, Demas, co Lucas cain tti nittjenguijna na ngain xé Dios rroanha na joajna para ixin jaha.

²⁵ Que Jesucristo, tti chonda cain joachaxin para ixin ján na, sinchenchaon nganji cainxin ra. Amén.

Carta Para Ixin Chojni Judío Que Nichja Nguigoa Hebreo

Dios joinchegonda Xenhe para que jehe nichjé chojni

¹ Ngain tiempo are saho, Dios joinchegonda profeta para que Dios nichja tsje nttiha co de tsje manera ngain nindogelitoa na xančhjen.

² Pero jai, ngain nchanho tehe, Dios joinchegonda Xenhe para que jehe nichjá na ján na. Dios joinchechjian cainxin cosa que jí ngain mundo jihi pero de ixin jehe Xenhe, co jehe cointtoehe Xan cainxin cosa jihi para que jehe Xan tsetonha Xan.

³ Jehe Xenhe Dios mé tti Xan tjago glorié Nnodé Xan, co jehe Xan jí Xan mero xajeho inchin Dios jí, co jehe Xan, Xan jiquehe cainxin cosa de ixin palabré Xan, ixin palabré Xan chonda anto tsje joachaxin. Co are joexin jointtaroa na Xan ján na de cain tti jianha que teca na, jehe Xan sajoiguehe Xan ngain lado jian de tti lugar que retaha Dios nttiha ngajni.

Xenhe Dios chonda Xan icha joachaxin que cain ángel de Dios

⁴ Mexinxin Xenhe Dios joiguehe Xan icha importante que cain ángel de Dios, ixin Dios chjé jehe Xan de herencia ná cargo icha importante que cargoe cain ángel.

⁵ Ixin Dios xonhi tiempo ndačo ngain ni ná ángel janhi:

Jaha tti Xanhna;

janha chjaha vida jai.

Ni ndačhoha Dios de ixin ni ná ángel:

Janha sarihi Nnodé jehe,

co jehe sehe Xanhna janha.

⁶ Pero are Dios rroanha tti nacoa Xenhe, xansaho co icha jian ngataha nontte jihi, jehe ndačo:

Cainxin ángel de Dios chonda que sinchesayehe jehe Xan.

⁷ Co de ixin cain ángel de Dios, jehe Dios ndačo:

Janha nchao nttacjamanga cain ángel inchin čhintto que jitja,

co cain ángel que nchehe xana janha nchao nttacjamanga inchin neje xohi.

⁸ Pero de ixin Xenhe Dios, jehe ndačo janhi:

Tti joachaxin que jaha chonda, oh Dios, xonhi tiempo tsjexin;

co tti jaha ttetonha, ján rritetonha inchin jiquininxin.

⁹ Jaha cain tiempo rinao cain cosa jian, co ningaconhe cain cosa jianha;

mexinxin janha, tti Dios de jaha, coinchiá jaha

co ndačhan que jaha icha rrochaha

que cain nicompañeroa.

¹⁰ Co cai ndačo Dios ngain Xenhe:

Jaha, tti chonda cain joachaxin, desde are saho jaha tti joinchechjian nontte,

co jaha joinchechjian ngajni conixin rá.

¹¹ Nontte co ngajni ndatsjexin, pero jaha sarihi para cainxin tiempo.

Nontte co ngajni ndatsonttaxí inchin lontto.

¹² Co jaha tsjadoho nontte co ngajni jian inchin rocji ná vestido,

co jaha tsentoxinhi cayoi cosa jihi inchin chojni ttentoxinhi lonttoe na.

Pero jaha cainxin tiempo sarihi xajeho,

co vidá xonhi tiempo tsjexin.

13 Co Dios xonhi tiempo ndaço ngain ni ná ángel:

Jaha darihi lado jian na

hasta que janha sinttagacha jaha de ngain cain tti ningaçonha.

14 Cain ángel jehe espíritu para ngain xé Dios, co Dios rroanha ángel mé para tsjenguijna cain tti chojni que sayé iná vida naroaxin.

2

Chonda ni que sicao ni cuidado para que sayé ni iná vida naroaxin

1 Mexinxin ján na chonda na que icha tsjinho na cuidado de ngain tti ocoinni na para que saçhjendaha na de ngain tti nttiha ndoa.

2 Tti joajna que Dios coetonhe ángel para joindaço ngain nindogoelitoa na xançhjen are saho, joajna mé Dios cjoago que ján ndoa. Co tti chojni que joincheha inchin coetonha joajna mé, Dios joinchecastigá na inchin jiquininxin na.

3 Mexinxin ján na ¿quexén satsinguehe na castigoe Dios si sonttoha na caso jehe tti vida naroaxin que danjo jehe Dios? Ixin Jesús mismo tti saho joindaço de ixin jehe vida naroaxin jihi, co después tti chojni que coinhi de ngain Jesús de ixin jehe vida naroaxin jihi cjoago na que ján ndoa, co jehe na ndattjo na na ján na de ixin vida naroaxin jihi.

4 Co Dios mismo joinchegurá joajna de ixin vida naroaxin jihi ixin jehe cjoago tsje señal co milagro co icha cosa que jointheadmirá chojni. Co cai jehe Dios rroán na Espíritu Santo, tti chjá na cada na jeje tipo de joachaxin inchin jehe rinao.

Jesucristo vayá na para sontte na inchin xanchó jehe

5 Dios chjeha jochaxin cain ángel para que jehe tsetonha ngain mundo que tsí, de jehe tti mundo que janha na tenichja na.

6 Sino que ngain ná parte de tti jitaxin Palabrê Dios, nttiha ndaço:

Oh Dios, ¿quedonda soixin xaxaon de ixin chojni?

O ¿quedonda soixin anto ta joachjaon de ixin chojni ngataha nontte nttihi?

7 Para nchion tiempo, soixin chjehe chojni icha tsjeha joachaxin que cain ángel,

pero cottimeja soixin chjehe na xajeho gloria que soixin chonda, co joinch-esayehe na,

co chjehe na joachaxin para que jehe na ttetonhe na cain cosa que soixin joinchechjian.

8 Co soixin chjé chojni joachaxin ngain cain cosa mé.

Jañá are Dios joanjo cain joachaxin ngain chojni para cainxin cosa, Dios cointtoeha ni ná cosa que sitticaonha ngain chojni. Pero masqui jamé, xa doconha na que cain cosa ditticaon ngain na.

9 Pero ján na chonxin na de ixin Jesús, que Dios chjé icha tsjeha joachaxin que cain ángel para nchion tiempo. Ixin Dios anto rinao cainxin chojni, mexinxin jehe joanjo Jesús para que ndavenhe para ixin cainxin na ján na. Co jai Dios chjé jehe gloria co nchesayehe ixin jehe ndavenhe masqui anto tanguí.

10 Cainxin cosa que te ngain mundo jihi, te para ixin Dios co cain cosa mé te ixin Dios joinchechjian; co Dios rinao que cainxin chojni que ocjan na chojni jehe rrochonda na parte ngain glorié jehe. Mexinxin Dios joinao que Xenhe Jesucristo anto tanguí conhe Xan para que jehe Jesucristo vaçhje ná chojni jian, jamé jehe nchao ttjenguijna chojni para rrochonda na iná vida naroaxin.

¹¹ Ixin cain ján na xo ocoroa na, conixin jehe tti jointtaroa na xajeho nacoa Ndodá na chonda na. Mexinxin Xenhe Dios, Jesucristo, tosoeha de ncheguinhí ján na xanchó jehe.

¹² Inchin jehe ndaĉho ngain tti jitaxin Palabré Dios:

Janha rronichja de ixin soixin ngain xanchian, co rrotsje na himno para ixin soixin, janha conixin icha chojni ngain nihngo.

¹³ Cai ndaĉho ngain tti jitaxin Palabré Dios:

Janha rrochonda confianza ngain Dios.

Co ndaĉho ngain iná parte:

Janha nttihi rrihi, conixin cain chjan que Dios chjana.

¹⁴ Cain chjan mé chojni que chonda nttao co jni. Mexinxin Jesús cjoí chojni cai que chonda nttao co jni para que jehe nchao ndavenhe co jamé joinchexantte tti vechonda joachaxin para navagoenxon chojni, co mé rroĉho inchínji.

¹⁵ Co jamé Jesús joanjo libertad ngain cain tti chojni que anto xaon na ixin ndasene na ixin chojni mé te na inchin esclavo ngain joaxaon mé ngoixin vidé na.

¹⁶ Ixin seguro que Jesús joiha para joicjenguijna cain ángel, sino que Jesús joí para joicjenguijna cain chojni Abraham.

¹⁷ Co para que jehe joinchehe jamé, jehe chonda que cjoí chojni inchin cain xanchó jehe, para que jehe nchao ttiacnoehe cain ján na co para ixin ján na joiguehe ná jian dána ngattoxon con Dios. Co jamé jehe nchao joincheroa cain chojni de tti jianha que nchehe na de ixin tti anto tanguí conhe jehe.

¹⁸ Co ixin jehe mismo tanguí conhe co vitaha de rrojinchehe cosa jianha are ngataha nontte jihi, mexinxin jai jehe nchao ttjenguijna cain chojni que ditaha de sinchehe cosa jianha.

3

Jesús icha importante que Moisés

¹ Mexinxin, hermanos, jaha ra xo ocoroa ra ixin Dios jointtaguinhi ra chojni jehe, tsjehe ra jian ngain Jesucristo ixin jehe tti representaté Dios para ixin ján na, co jehe tti dána icha importante de ngain tti dotticaon na.

² Ixin Jesús jehe vanchehe jian cain tti rinao Dios, mexinxin Dios chjé xa jihi. Inchin Moisés cai vanchehe jian cain xa que jehe vechonda para ixin chojni Dios.

³ Pero Jesús jiquinixin icha tsosayehe que Moisés, jañá inchin tti nchekhjian ná nchia icha jiquinixin tosayehe jehe que nchia mismo.

⁴ Cada nchia chonda que tonchjian nchia de ná chojni, pero Dios jehe tti joinchekhjian cain cosa que jí.

⁵ Jamé, Moisés cjoí jian ninchehe xé Dios ngayé chojni Dios. Co jehe chonda xa de vandache chojni de ixin quehe rrojinchehe Dios después ngain na.

⁶ Pero Cristo, ixin jehe Xenhe Dios, jehe chonda joachaxin de ttonche chojni Dios, co mé ján na mismo, si ján na ndoa sonttoho na sigue jian sotticaon na co si rrochonda na confianza ngain jehe cainxin tiempo hasta ndasene na co si sonttoho na sigue ĉjoin tsonoa na ixin techonhe na tti jian que sayé na de ngain Dios.

Dios rinao que chojni jehe sinchejogaha

⁷ Mexinxin ndaĉho Espíritu Santo ngain tti jitaxin Palabré Dios: Jai, si jaha ra ttihi ra tti ndaĉho Dios,

⁸ dintteha ra cha de ngain ansean ra, inchin vintte tti chojni judío que vitticaonha na tti ttetonha Dios.

co jehe na joinao na viconxin na paciencié Dios are vacji na ngagaha jna tti xonhi chojni jí.

⁹ Mexinxin ndačo Dios ngain Palabré:

Nttiha nigoelitoa ra xančhjen vaquenaxin na prueba masqui vicon na cain cosa que janha jointtaha ngoixin tti cuarenta nano que jehe na sacjoi na nttiha.

¹⁰ Mexinxin janha coñaho ngain chojni mé,

co ndačhan: “Cain tiempo ndadiguitján na de ngain ansén na, co rinaoha na datsoan na tti nttiha que janha tjagoa na.”

¹¹ Mexinxin, janha coñaho ngain na co ndattjan na conixin ná juramento, que ixin jehe na čoha rroguiji na tti rrojinchejogaha na conixin janha.

¹² Hermanos, ttjiho ra cuidado que ni ná de jaha ra rrochondaha ra ansean ra jianha que sachjendehe Dios que jichon, co isitticaonha ra ngain jehe.

¹³ Sino que cada nchanho ncheanimá chó ra, ná ra co ná ra are xa jí tiempo, para que ni ná de jaha ra sitticaonxinha ra ngain cosa jianha, co ansean ra tsochaha para ngain Dios.

¹⁴ Ixin si ján na sonttoho na sigue hasta ndasenhe na, de rrochonda na tti confianza que ján na techonda na desde are nacoexinxon na gotticaon na, cottimeja ján na rrochonda na parte ngain Cristo.

¹⁵ Jañá ndačo ngain tti jitaxin Palabré Dios:

Jai, si jaha ra ttinhi ra tti ndačo Dios, dintteha ra cha de ngain ansean ra inchin vintte tti chojni que vitticaonha na tti ttetonha Dios.

¹⁶ Co, ¿quexehe tti chojni que coinhi na tti ndačo Dios co después vitticaonha na? Mé cjoí cain tti chojni judío que Moisés joantsjexin de ngain nonttehe Egipto.

¹⁷ Co ¿quensen Dios coñao ngain ngoixin tti cuarenta nano? Mé ngain tti xajeho chojni judío que joinchehe jianha, tti chojni que ndavenxin ngagaha jna tti xonhi chojni jí.

¹⁸ ¿Co quensen ngain tti ndačo Dios conixin ná juramento que čoha tsji na tti rrojinchejogaha na ngain Dios? Mé ngain xajeho chojni judío que vitticaonha tti ttetonha Dios.

¹⁹ Mexinxin ján na ttinxin na que jehe na čoha joiji na nttiha ixin jehe na vitticaonha na Dios.

4

¹ Mexinxin jai que ján na xa chonda na oportunidad de tsjin na sinttojo-gaha na ngain Dios, chonda que rrochonda na cuidado, no sea que čonja de jaha ra čoha tsji ra sinchejogaha ra ngain Dios.

² Ixin ján na cai coinhi na tti joajna ndoa que danjo iná vida naroa, inchin jehe na cai coinhi na. Pero para ixin jehe na xonhi xé que jehe na coinhi na mé, ixin masqui coinhi na, jehe na vitticaonha na.

³ Pero ján na xo ogotticaon na, ján na tti tsjin na sinttojojogaha na ngain Dios. Pero para ixin tti chojni que vitticaonha Dios, para ixin jehe na conhe inchin ndačo Dios ngain tti jitaxin Palabré:

Mexinxin janha coñaho ngain na co ndattjan na conixin ná juramento, que ixin jehe na čoha rroguiji na rrojinchejogaha na nganji na janha. Pero ixinha jamé, jí lugar tti chojni nchao sinchejogaha ngain Dios ixin jehe ojinchejogaha desde are jehe joehe xé de joinchechjian mundo.

4 Ixin ngain ná parte de tti jitaxin Palabré Dios ndaĉho janhi de ixin tti yatoxin nchanho:

Dios joinchejogaha ngain nchanho yatoxin de cain ʒa que jehe joinchehe.

5 Co ngain iná parte jitaxin janhi:

Sijiha na sinchejogaha na nganji na janha.

6 Co chojni mé que saho coinhi na tti joajna ndoa que danjo iná vida naraa, joiijha na joinchejogaha na ngain Dios, ixin jehe na vitticaonha na joajna mé. Pero te icha chojni que ján siji sinchejogaha ngain Dios.

7 Ixin tsje nano después de tti tiempo mé Dios cjan coín iná nchanho, co nchanho mé, jai. Co Dios joinchenichja David janhi de ixin nchanho jai inchin jitaxin ngain Palabré Dios:

Jai si jaha ra ttinhi ra tti ndaĉho Dios,

dintteha ra cha de ngain ansean ra.

8 Si Josué rroganjo ngain chojni Israel oportunidad jhi de rojinchejogaha na ngain Dios are joiji na nonttehe Canaan, Dios irrocjanha rroganjo iná nchanho después.

9 Mexinxin jhi rroĉho ixin ʒa dittohe oportunidad para que chojni Dios sinchejogaha na jian ngain jehe.

10 Ixin tti chojni que nchejogaha ngain Dios, chojni mé nchejogaha de cain ʒé que jehe joinchehe, jańá inchin joinchejogaha Dios are joexin joinchehe ʒé.

11 Mexinxin, ján na chonda na que rrotsjehe na queʒén sinttoho na para que tsjin na sinttohogaha na ngain Dios, co tsjiho na cuidado que ni ná na sonttoha na inchin joinchehe cain tti chojni que vitticaonha tti ttetonha Dios.

12 Ixin palabré Dios jichon co chonda joachaxin. Palabra mé icha yao que cain espada que chonda filo de yoixin lado. Co inchin espada nchao dattodoho hasta quexeho parte de cuerpoe ni, jamé palabré Dios dattodoho ngain almé co ngain espiritue ni. Co palabra mé tti jian nchenohe ni tti ʒaxaon ni co tti rinao ansén ni sinchehe.

13 ʒonhi cosa jí que Dios joinchechjian que nchao sema de ngain jehe. Para ngattoxon con Dios cain cosa jíʒago, co ján na rrochonda na que rrondaĉho na ngain jehe cain tti jointtoho na.

Jesús jehe tti dána icha importante

14 Jesús, tti Xenhe Dios, mé tti dána icha importante para ixin ján na, co jehe tti cjoí joiguehe tti ttjen Dios. Mexinxin, ján na chonda na que sonttoho na sive sotticaon na inchin ttetonha Dios.

15 Co jehe tti dána icha importante para ixin ján na, mé tti nchao tsiaconoá na ján na are jianha dotticaon na ixin jehe cai anto joitaha de rojinchehe cain tipo de cosa jianha, pero jehe ʒonhi tiempo joinchehe ni ná cosa jianha.

16 Mexinxin, ján na tsonchienhe na ngain tti ttjen Dios co rroʒaonha na ixin jehe Dios anto rinao na, co jehe tsiaconoá na ján na co tsjenguijna na are ján na tangui tsoan na.

5

1 Cada dána icha importante para ngain chojni judío joixin de ngayé chojni judío, co Dios ttinchiehe jehe para que jehe sehe representanté Dios para ixin chojni mé, co para que dána mé saquehe cosa de ofrenda ngain alté Dios para que Dios sinchetjañehe chojni tti jianha que jehe na joinchehe na.

² Co ixin jehe dána mé nchehe cosa jianha inchin cain chojni, mexinxin jehe nchao rrochonda paciencia ngain tti chojni que tsjeha chonxin de ixin Dios co ngain tti chojni que ncheha jian.

³ Co ixin dána mé cai nchehe cosa jianha, mexinxin jehe chonda que danjo cosa para ngain Dios para que Dios sinchetjañehe tti jianha que jehe joinchehe cai, xajeho inchin nchehe para que Dios sinchetjañehe tti jianha que nchehe cain chojni.

⁴ Xonhi chojni siguehe dána icha importante de ixin jeho mismo, sino que Dios tti nchegayé chojni mé joachaxin jihi, inchin conhe ngain Aarón tti cjoí saho dána.

⁵ Co jañá conhe ngain Cristo cai; jehe vinha dána icha importante ixin jeho joinao, sino que Dios joinchegayé joachaxin mé; inchin Dios ndačo ngain Cristo:

Jaha tti Xanhna;
janha tti chjaha vida jai.

⁶ Cai ndačo Dios ngain Cristo ngain iná parte de tti jitaxin Palabré Dios:

Jaha ná dána para cainxin tiempo,
co jaha xajeho clase de dána inchin Melquisedec.

⁷ Are Cristo vehe nntihi ngataha nontte, jehe anto joinchecoanxinhi Dios co anto joinchetsenhe ñao Dios, co are joinchehe jamé, jehe nichja soji co hasta joinchequnga ndacon para ngain Dios tti chonda joachaxin para que rrocanchjandaha Jesucristo para ndarroguenhe. Co Dios coinhi cain tti ndačo Cristo ixin jehe Cristo anto vanchesayehe Dios.

⁸ Mexinxin Cristo masqui jehe Xenhe Dios, jehe coangui vitticaon joinchehe cain tti tteonha Dios de ngain tti anto tangui que conhe.

⁹ Co después que Cristo jañá vachje anto jian, are mé jehe nchao danjo iná vida naroa que xonhi tiempo tsjexin ngain cain chojni que ditticaon ngain jehe.

¹⁰ Ixin Dios tti joincheguinhí Jesucristo tti dána icha importante, co ndačo ixin jehe xajeho clase de dána inchin Melquisedec.

Tti anto tangui que jí si tsinttohe ni tti confianza que chonda ni ngain Cristo

¹¹ Janha na xa chonda na tsje que rronhattjo ra de ixin asunto jihi, pero atto tangui para rronhattjo ra ixin jaha ra rinaoha ra ttinxin ra.

¹² Ovatto tsje tiempo que jaha ra ditticaon ra Jesucristo, co jai jaha ra onchao rrojinchecoenhe ra icha chojni de ixin Cristo. Pero jai jaha ra xa dondaha ra iná chojni que rronhattjo ra iná cain cosa icha tanguiha de ixin Dios. Cjan ra anto sojiha ra de ngain tti ditticaon ra inchin ná xanletsjochjan que chonda que sihi xan tsjin en lugar de sine xan comida soji.

¹³ Co tti chojni jamé, jehe na inchin tti xanletsjochjan que tetai, rročo ixin jehe na xa ttinxinha na jian quehe rročo tti vida nao.

¹⁴ Co tti comida soji, mé para ixin chojni yeye, que onhe dinchiehe quexehe tti jian co quexehe tti jianha.

6

¹ Mexinxin nttoho na sigue de tangui na icha de ixin Dios para que rrocjan na inchin chojni yeye de ngain tti dotticaon na. Co tsinttohe na ná lado tti coangui na are nacoexinxon na coangui na de ixin Jesucristo, inchin quexén tentoxinhí ni vidé ni para isincheha ni cosa jianha que dicao ni para ngain infierno, co de quexén sitticaon ni ngain Dios,

² co de ixin quedonda chonda ni que diguitte ni, co de ixin quedonda ttín rá ni ngataha já iná chojni que ditticaon Jesucristo co nchetsenhe ñao Dios

ixin jehe sinchenaon chojni mé, co que xén rroxechon cain chojni que ndadenhe co ixin Dios sinchejuzguehe cain chojni co rrondache na quehe tsonhe cada na para cainxin tiempo.

³ Ján na onoa na cain yá, mexinxin sonttoho na sigue tsangui na icha si Dios sanjo joachaxin.

⁴ Ixin chojni que ovayé joadingasán co ochonxin na de ixin tti jian que danjo Dios, co ojí Espíritu Santo ngain na,

⁵ co oconohe na tti jian joajné Dios co ochonda na tti joachaxin Espíritu Santo que icha rroxago ngain mundo que tsí;

⁶ tti cain chojni que ochonxin na cain yá, co si rrocjan na isitticaonha na ngain Jesucristo, ni ná chojni nchao sincheanimá chojni mé para tsentoxinhi vidé na iná ixin xajeho inchin jehe na mismo tecjan na tettenganito na Xenhe Dios nganito cruz iná co tetjanoa na Xenhe Dios ngattoxon con cain chojni.

⁷ Co cain chojni ngataha nontte inchin ná jngui que ndadihi cain chin que dinttji ngataon jngui. Co Dios nchenaon jngui mé si danjo ná cosecha jian para ixin tti chojni que nchehe xa ngataon jngui mé.

⁸ Pero si jngui mé danjo jeha canchaha co icha ca que xonhi xé, nontte mé xonhi rentte nontte. Co Dios rrondaço que nontte mé jiquinxin roche nontte.

Confianzá na ngain Cristo nttasoji na para techonhe na tti jian que sanjo Dios

⁹ Pero masqui janha na ndachjan jañá nganji ra tti janha na anto rinaho na, pero janha na chonda na seguro ixin jaha ra jeha inchin tti chojni que ttinttohe na de ditticaon na ngain Cristo, sino que ixin jaha ra sayehe ra cainxin tti jian que tti de ngain Dios ixin ditticaon ra ngain.

¹⁰ Ixin Dios jehe nchehe inchin jiquinxin, co jehe rrotjañeha tti jian que jaha ra joinchehe ra ni rrotjañeha que jaha ra ján ndoa rinao ra jehe Dios co mexinxin cjoenguijna ra icha chojni que ditticaon Jesucristo co ixin cain mé tenchehe ra jai cai.

¹¹ Pero janha na rinaho na que cada ra jaha ra sinchehe ra sigue xajeho inchin tenchehe ra jai para que jamé Dios nchao rrochjá ra tti jaha ra techonhe ra.

¹² Janha na rinaoha na que jaha ra tsosaha ra, sino que roehe ra ejemplio cain tti chojni que jian ditticaon ngain Cristo co que chonda paciencia. Ixin chojni mé tedayé na tti herencia que Dios ndaço sanjo.

¹³ Ixin are Dios chjé promesa Abraham de ixin tti sanjo Dios, jehe joinchejurá conixin nombré jehe ixin xonhi iná nombre icha importante para rrojinchejuraxin que jeha nombré jehe.

¹⁴ Co Dios ndaço ngain Abraham: “Ján ndoa que janha anto sinttanchaon jaha co tsotsje xanttia xanchjen.”

¹⁵ Abraham chonhe mé conixin paciencia, co jamé jehe vayé tti ndaço Dios ngain.

¹⁶ Are chojni nchejurá na, jehe na nchejurá na conixin iná nombre icha importante que jehe na; co are jamé nchegurá na, ichondaha na que tjao na icha.

¹⁷ Mexinxin Dios joinchegurá tti promesé jehe conixin ná juramento ixin jehe jinoao cjoago claro ngain tti chojni que sayé promesé ixin jehe ján sanjo tti jehe ndaço, co xonhi cosa tsentoxinhi.

¹⁸ Jañá tti promesé Dios co tti juramentoe Dios yó cosa que choha sitoxinhi. Dios choha sincheyaxon de ixin cayoi cosa jilhi. Co mexinxin Dios chjá na

consuelo jian ján na xo conchienne na ngain jehe para que jehe tsjenguijna na, co chonda na confianza ngain promesé jehe.

¹⁹ Co jehe mé tti nchesoji co nchese gurá almá na inchin ancla que deçhoa nganguí jinda para nchese gurá barco. Co tti confianza que ján na chonda na ngain promesé Dios, mé tti ttençhoa na ngain Dios tti ttjen toenxin cortiné nihngo nttiha ngajni.

²⁰ Nttiha tti joixinhi Jesús icha saho para joanttjé nttiha para que ján na nchao tsjin na tti ttjen Dios. Co jañá mexinxin Jesús joiguehe para cainxin tiempo tti dána que icha importante, co jehe çajeho clase de dána inchin Melquisedec.

7

Jesús çajeho clase de dána inchin Melquisedec

¹ Jehe Melquisedec cjoí rey de ngain ciudad de Salem co cjoí dána para ixin Dios que ttjen ngajni. Co are Abraham çjanxin de ngain tti guerra que Abraham cjoa cha ngain cainxin rey que jehe coetocaho, are mé jehe Melquisedec viguetañ ngatja nttiha, co nttiha Melquisedec, conixin joachaxín Dios, joinchençaon Abraham.

² Co Abraham joanjo ngain Melquisedec ná ttexin parte de cainxin tti jehe joacha ngain guerra mé. Tti nombre Melquisedec, mé rroçho saho “rey que nchehe tti jian”; co ixin jehe tti rey de ngain ciudad de Salem, co ixin nombré ciudad mé rroçho “paz”, mexinxin rroçho nombré rey mé “rey que çonhi guerra ttjé.”

³ Co çonhi lugar jitaxin de ixin quensen cjoí ndodé ni quensen cjoí janné jehe Melquisedec, ni de ixin quensen cjoí nindogoelitoe çançhjen. Cai çonhi lugar jitaxin quesa concijhi ni quesa ndavenhe; mexinxin jehe Melquisedec nchao sonttocaninxin na Xenhe Dios ixin cai jehe Melquisedec cjoí ná dána para cainxin tiempo.

⁴ Nchao jí remé, jai çaxaon ra de ixin Melquisedec. Jehe anto importante vehe, ixin hasta Abraham, tti cjoí ndogoelitoe çançhjen cain chojni Israel, jehe ndo mismo joanjo ndo ngain Melquisedec ná ttexin parte de cain que jehe ndo joantsjehe ndo cain rey que coetocaho ndo ngain guerra.

⁵ Ján ndoa que tsje nano después, ley que vayé Moisés ndaçho que jeha xannti çançhjen de Leví nchao doan dána. Co ley mé cai çhjé dána mé joachaxin de sinhecobrá ngain chojni Israel ná tti ttexin parte de cain cosa que jehe na chonda na, masqui cain jehe na co xidána mé çajeho razé co chojni Abraham.

⁶ Pero Melquisedec masqui jehe jeha razé Leví, pero jehe vayé tti ttexin parte de tti joacha Abraham. Co jañá Melquisedec joinchençaon Abraham, tti vayé promesé Dios.

⁷ Co cain chojni nohe na que ná tti nchençaon ná cosa o ná chojni, mé tti icha importante que tti tonchaon.

⁸ Co nttihi ngayá na ján na, dána que dayé ttexin parte, chojni mé jai ça denhe na. Pero tti jitaxin Palabré Dios nichja de ixin Melquisedec inchin ná chojni que ça jichon.

⁹ Co cai nchao rrondaçho ni que Leví co cain dána razé Leví, que jai nchecobrá tti ttexin parte de cain cosa que chonda chojni Israel, cain nimé cai cjoenga na hna tti ttexin parte ngain Melquisedec ngain rato are Abraham cjoenga hna tti ttexin parte ngain Melquisedec.

¹⁰ Ixin are mé rrotho que Abraham ojoicao cain razé mé ngain cuerpoe, masqui are mé jehe na xa toncjiha na are Melquisedec joiguetanxin Abraham ngatja nttiha.

¹¹ Cain chojni Israel vayé na ley pero de ngain dána razé Leví, co cain dána mé xanntí xan'chjen Aarón, tti saho dána. Pero ley que dána ndache chojni, ley mé xonhi joachaxin chonda para nchejian chojni ngattoxon con Dios. Mexinxin chonda que jói iná dána; nahi dána que chonda joachaxin inchin Aarón, sino que ná dána que chonda joachaxin inchin Melquisedec.

¹² Ixin si ditoxin clase de dána, cai ley chonda que ditoxin.

¹³ Co tti iná clase de dána, mé Jesucristo, tti chonda cain joachaxin para ixin ján na. Co jehe Jesús jeha razé Leví, sino que jehe joixin razé Judá. Co xonhi tiempo ná tti razé Judá cjoí dána.

¹⁴ Ixin anto jian nohe ni que Jesucristo joixin razé Judá, co Moisés xonhi ndacho de ixin jehe raza jihí are jehe nichja de ixin cain dána.

¹⁵ Co jihí icha claro para tsinxin na are noa na ixin tti dána naroaxin que joicononxin, mé inchin Melquisedec.

¹⁶ Ixin Jesús cjoí dána mé pero jeha inchin coetonha ley, ixin ley ndacho jeha chojni razé Leví nchao soan na dána. Rrotho que Jesús cjoí dána pero ixin jehe chonda joachaxin para sechon cainxin tiempo.

¹⁷ Ixin Dios ndacho janhi de ixin jehe:

Jaha ná dána para cainxin tiempo,
co jaha xajeho clase de dána inchin Melquisedec.

¹⁸ Jañá, mexinxin tti ley que vayé chojni are saho, icoha jai ixin choha cjoenguijna chojni co xonhi rentte ley mé.

¹⁹ Rrotho que tti ley que vayé Moisés choha nchejian ni ná chojni. Co jai en lugar de ley mé, chonda na confianza ngain Jesucristo; co de ixin confianza mé, ján na nchao tonchienhe na ngain Dios.

²⁰ Co Dios ndacho conixin ná juramento que ixin Jesucristo, mé tti dána jai.

²¹ Tti icha dána vintteguinhi dána pero sin ni ná juramento de Dios. Pero are Jesucristo vinhi dána, Dios joinchejurá, ixin ngain tti jitaxin Palabré Dios ndacho:

Dios joinchejurá, co tsentoxinha tti jehe ndacho:
“Jaha ná dána para cainxin tiempo,
co jaha xajeho clase de dána inchin Melquisedec.”

²² Mexinxin Jesús jehe tti joinchese gurá nganji na tti trato naroaxin jihí que mé icha jian que tti trato saho.

²³ Tsje chojni vintte na de dána, ixin are ná dána ndadenhe, iná xí dehe xa de dána, co jañá ni ná xidána mé nchao nchehe sigue xé para cainxin tiempo.

²⁴ Pero ixin Jesús jehe xonhi tiempo senhe, mexinxin jehe xonhi tiempo sanjo xé de dána que jehe chonda ngain iná chojni.

²⁵ Mexinxin Jesús jehe nchao danjo iná vida naroaxin que xonhi tiempo tsjexin ngain cain tti chojni que tonchienhe ngain Dios por ixin jehe Jesucristo, ixin jehe jichon para cainxin tiempo para que nchetsenhe ñao Dios para ixin jehe na.

²⁶ Mexinxin Jesucristo, jehe tti mero dána icha importante que ján na rrogondá na. Ixin Jesús jehe joxon jian ngattoxon con Dios, jehe xonhi cosa nchaoa ni jianha joinchehe. Jehe va'chjendehe chojni que nchehe jianha, co saccoajinhi icha noi que ngajni.

²⁷ Icha dána chonda que doen coxigo para daquehe jni va ngain alté Dios cada nchanho. Saho nchehe mé para ditjañehe cain tti jianha que jehe

joinchehe; cottimeja para ditjañhe cain tti jianha que joinchehe icha chojni. Pero Jesús chondaha que nchehe jamé ixin jehe xanjo venhe nacoa nttiha para vitjañexin cainxin tti jianha que nchehe cain chojni co mé donda para cain tiempo.

²⁸ Ley que vayé Moisés ncheguinhí dána icha importante xí que teca tsje cosa jianha que joinchehe. Pero tti juramento que Dios ndaço después de ley mé, juramento mé tti ncheguinhí Xenhe Díos dána icha importante, co jehe Xan ni ná cosa jianha joincheha Xan.

8

Jesús jehe tti abogado de ngain tti trato naroaxin

¹ Tti cosa icha importante que janha na tendaçhjan na, mé janhi: tti dána que icha importante para ixin ján na, jehe joxon jian, co sajoiguehe ngain lado jian de tti retaha Díos nttiha ngajni.

² Co nttiha ngajni jehe jinchehe xa de dána ngain tti mero ningoe Díos nttiha; co Díos, tti chonda cain joachaxin, mé tti joinchechjian nihngo mé, co jeha chojni tti joinchechjian.

³ Co cain icha dána que icha importante vinchiehe na para que jehe dána mé saquehe cosa co nntaohé coxigo ngain altar para ixin Díos. Co mexinxin rrogonda que Jesucristo cai vanjo cosa para ixin Díos.

⁴ Si jehe Jesucristo xa rrogehe nttihi ngataha nontte, jehe ni rrogeha de dána ixin jai xa te dána que daquehe cosa para ixin Díos inchin ttetonha ley que vayé Moisés.

⁵ Pero tti nchehe cain dána nttihi ngataha nontte, jehó inchin ná copia o inchin sanho de cain cosa que jí ngajni. Ján na noa na que ixin mé jehó inchin ná copia de lo que tti jí ngajni ixin icha saho que Moisés joinchechjian ningoe Díos, jehe Díos ndaço ngain Moisés: “Ttjiho cuidado co nchechjian nihngo ngataha nontte xajehó inchin janha cjoagoha are ngagaha jna.”

⁶ Pero Jesucristo, tti dána icha importante para ixin ján na, co jehe mé chonda icha jian xa de dána que cain dána nttihi ngataha nontte ixin Jesucristo jehe tti abogado de ngain ná trato icha jian que trato saho. Co promesé Díos para nganji na ngain trato naroaxin jiji, mé anto icha jian promesa que promesa vehe ngain trato saho.

⁷ Ixin sí tti saho trato nchao rrojinchejian chojni ngattoxon con Díos, irrogondaha rroconchjian tti trato yoxin.

⁸ Pero Díos vicon que chojni jehe vintteha na jian, mexinxin Díos ndaço janhi de ixin jehe na ngain tti jitaxin Palabré:

Díos ndaço: Tsí nchanho que janha sinttachjian iná trato naroaxin ngain chojni de Israel, co ngain chojni de Judá.

⁹ Ijeha inchin trato que janha jointtachjian ngain nigoelitoé na xançhjen, are janha tsá rá na para joantsjexin na de ngain nonttehe Egipto, pero jehe na joincheha na inchin ndaço trato mé, co mexinxin janha ijointtaha na caso, jañá çho Díos.

¹⁰ Tti trato que janha sinttachjian ngain chojni Israel ngain nchanho que tsí, janhi rroçho trato mé, çho Díos:

Janha tsín tti janha ttetonha ngain joarrixaoen na, co tti janha ttetonha ndasittohe ngain ansén na.

Cottimeja janha saríhi Díos de jehe na, co jehe na sintte na chojnina janha.

¹¹ Co irrochondaha que iná chojni sinchecoene iná chojni; irrochondaha que ná chojni sinchecoene compañeroe, o ni xanchó para que rrochonxin na de ixin janha, tti Dios de jehe na, ixin cainxin na rrochonxin na de ixin janha, desde xannhinchinchan hasta ni icha ojonchjan.

¹² Co janha sinttatjañá na cain tti jianha que nchehe na, co ixonhi tiempo janha rroaxanho de cain cosa jianha que jehe na joinchehe na.

¹³ Are Dios nichja de ixin iná trato naroaxin, rrocho ixin jehe ondacho que tti saho trato ondaconttaxí. Co cosa que ondaconttaxí iseha donda, co otoi ndasitján.

9

Tti nihngo nttihi ngataha nontte co tti nihngo nttiha ngajni

¹ Tti saho trato vaquetonha ngain chojni quexén vanchecoanxinhi na Dios, pero de ngaxinhi ná nihngo nttihi ngataha nontte.

² Co nihngo jihi janhi conchjian: tti saho cuarto vinhi Lugar Santo, co nttiha vehe tti candeléro de yáto rá, co ná mesa tti vetaha niottja que vaganjo na para ngain Dios.

³ Co toenixin tti manta ngain yoxin puerta, vehe iná cuarto que vinhi Lugar Santísimo.

⁴ Nttiha vehe ná altar de oro tti vachetaxin tsjoca para ixin Dios, co nttiha cai vehe ná caja co ngama caja mé veyá joxon oro. Co ngaxinhi caja mé vehe ná chichjan de oro que veringa nchion maná, co nttiha cai vengá nttacottohe Aarón, tti nttá que chima retoño, co nttiha cai vengá tti tabla de xo que vetaxin tti saho trato.

⁵ Co ngataha caja mé vintte dibujoe yó ángel que dinhi querubines, co mé rrocho lugar tti ttjen Dios. Co jehe dibujoe ángel mé conixin nenechán vacjanotaon ngataha caja mé tti vanchetjañenxin Dios chojni tti jianha que vanchehe na. Pero janha na jai irrondattjoha ra icha de ixin cain cosa jihi.

⁶ Jañá vintte cain cosa ngain nihngo mé, co dána vaguintteguixinhi cada nchanho tti saho cuartoe nihngo mé para que nttiha vanchecoanxinxin Dios.

⁷ Pero ngain tti yoxin cuartoe nihngo mé, nttiha vaguixinhi jehó tti dána icha importante, co jehó nacoa nttiha cada nano. Co are dána mé vaguixinhi nttiha, jehe chonda que vaguicao jni coxigo para vaganjo ngain Dios para que Dios vanchetjañehe tti jianha que joinchehe dána mé, co tti jianha que joinchehe icha chojni.

⁸ Conixin cain jihi Espíritu Santo nntaquiainxin na, que masqui icha dána co chojni nchao nchegonda cuarto saho para vanchecoanxinxin na Dios, jehe na vechondaha na joachaxin para vaguixinhi na tti yoxin cuarto que vinhi Lugar Santísimo.

⁹ Cain jihi inchin ná ejemplo para ixin ján na jai ixin tti cosa co nntaohé coxigo que nttiha vaganjonxin na ngain Dios, cain mé choha sinchejian ansén cain chojni que nchesayexin Dios jañá.

¹⁰ Ixin cain mé jehó inchin canxion regla que vinttechonda na de ixin quexehe cosa nchao jine na co quexehe cosa nchao dihi na, co quexén jiquininxin ncheróa cuerpoe na. Co cain cosa mé jehó chonda joachaxin hasta que Dios joinchechjian iná trato naroaxin.

¹¹ Pero ojoí Cristo, co jai jehe tti dána icha importante que ttjenguijna na para sayé na cain cosa jian que Dios rroanha ngain chojni jehe. Ngain nihngo

titi jehe jinchehe xa de dána, nihngo mé tti icha importante co icha jian. Co nihngo mé jeha chojni joinchechjian, rrocho que nihngo mé jiha ningo ngataha nontte jiji.

¹² Cristo jehe tti ndoa joixinhi ngain tti Lugar Santísimo nntiha ngajni pero jeha para joiganjo jni cochivatochjan co jni coxinttachjan, sino jehe joanjo jni jehe mismo. Co jañá jehe joixinhi nntiha nacoa nntiha co mé gonda para cainxin tiempo, co jamé jehe nchao chjá na iná vida naroaxin que xonhi tiempo tsjexin.

¹³ Ján ndoa que jni coxintá co jni cochivatochjan co nchonhi nntahe coxinttachjan que chexin ngataha altar, vintjtite ngataha tti chojni que joincheha inchin ttetonha ley que vayé Moisés. Co janá cain mé chonda joachaxin de joincheroa cuerpoe chojni, pero ansén nahi.

¹⁴ Si cain mé jañá chonda joachaxin, ¡mexinxin jni Jesucristo chonda icha joachaxin! Co de ixin Espíritu Santo tti xonhi tiempo ndasenhe, Cristo mismo joanjo cuerpoe ngain Dios co Cristo joxon jian; xonhi jianha chonda jehe, co jni Jesucristo ncheroa ansean na de cain cosa jianha que nchetján chojni. Jamé para que ján na nchao sonttoho na inchin rinao Dios que jichon.

¹⁵ Mexinxin Jesucristo jehe tti abogadoo na de ngain tti trato o testamento naroaxin. Jesucristo ndavenhe para que vitjañehe cain cosa jianha que joinchehe chojni ngain trato que vechonda joachaxin icha saho, co para que tti chojni que Dios coinchiehe nchao sayé na tti iná vida naroaxin para cainxin tiempo, que jehe Dios ndacho sanjo.

¹⁶ Ixin nntihi ngataha nontte are dittohe ná testamento, mé tti ndacho quehe tsonhe cain cosé chojni que ndavenhe. Co para que chojni familié sinchehe na inchin jindacho ngain testamento mé, chonda na que tsjago na ná Xón, que chojni mé ndoa ndavenhe.

¹⁷ Ixin ná testamento xonhi rentte si xa jichon tti joinchechjian testamento mé, sino que are ndadenja tti nchechjian testamento.

¹⁸ Mexinxin Dios are vaquehe tti saho trato chonda que vinttji jni coxigo.

¹⁹ Jihi tti conhe: Moisés ndache cain chojni cain tti ttetonha ley que jehe vayé. Cottimeja jehe coá ná ramé nntahisopo co coencjin nnta chjon jatse, co xanguí ngain jni coxinttachjan co cochivatochjan co tettecjan jni jinda, co cointjtite ngataha tti libro que jitaxin ley que jehe vayé co cai cointjtite jni mé cain chojni.

²⁰ Cottimeja ndacho ngain na: “Jihi tti jni que nchese gurá trato que Dios coetonha para ixin jaha ra.”

²¹ Co Moisés cai cointjtite jni nganito nihngo, co cain cosa que vagonda ngaxinhi nntiha para vacocoanxin Dios.

²² Co inchin jitaxin ley mé, merocoa cain cosa chonda que toroa conixin jni; co Dios choha sinchetjañehe ná cosa jianha si diguintjtiteha jni.

Tti tangui que Cristo vetan, mé jointtatjañanxin na Dios cain tti jianha que jointtoho na

²³ Jañá que cain cosa yá vagondehe jni coxigo para vacoroaxin, co cain cosa mé jeho ná copia de cain cosa que jí ngajni. Pero cain cosa que tequininxin ngajni, mé gondehe icha jian jni que jni coxigo para coroaxin, co mé jni Jesucristo.

²⁴ Ixin Cristo jehe joixinha ngaxinhi nihngo que chojni joinchechjian, que lugar mé jeho ná copia de nihngo mero ndoa, sino que Cristo joixinhi mero ngain nihngo que jí ngajni tti jai jehe jinchetsenhe ñao Dios para ixin ján na.

²⁵ Tti dána judío icha importante vixinhi ngaxinhi nihngo ngain Lugar Santísimo nacoa nttiha cada nano para joiganjo jni que jeha jní jehe. Pero Cristo xanjoa tsje nttiha para ndadenhe.

²⁶ Ixin si jamé rroconhe, jehe Cristo rrochonda que rroguenhe anto tsje nttiha desde que nontte conchjian. Pero tti conhe que jai are ochian ndajittjexin mundo, Cristo xago co joanjo cuerpoe mismo ngain Dios para cjoenga hna cain tti jianha que nchehe chojni. Co mé conhe nacoa nttiha co donda para cainxin tiempo.

²⁷ Jañá inchin cain chojni chonda que senhe na para nacoa nttiha, cottimeja Dios sinchejuzgá ngain na,

²⁸ Jañá cai Cristo xanjo venhe para nacoa nttihi para que cjoenga hna cain tti jianha que nchehe chojni ngataha nontte jihi. Después jehe rroxago nttia yoxin, pero ijeha para sicjenga hna tti jianha que nchehe chojni, sino que para sichjé iná vida naroaxin cain chojni que otechonhe jehe.

10

¹ Tti ley que vayé Moisés cjoí jeha inchin ná sanho de cain cosa jian que tsí co tjagoha claro quexén sintte cain cosa mé. Co masqui chojni que vanchienen ngain Dios vaganjo na tsje cosa ngain jehe, pero ley jihi xonhi tiempo joinchejian ansén chojni mé ixin nano co nano vaganjo na xajeho cosa.

² Ixin si ley mé nchao rrojinchejian ansén jehe na, cain cosa que vaganjo na para ixin Dios, irroganjoa na nanao. Ixin cain tti chojni que vaganjo cain cosa mé, are jehe na orrocoroa na para cainxin tiempo de cain tti jianha que joinchehe na, jehe na irroconoeha na feo de ixin tti jianha que joinchehe na.

³ Jañá rrocho que cain cosa que vaganjo na, cosa mé jeha para vancheaxaon na cain tti jianha que jehe na nchehe na cada nano,

⁴ ixin jní coxintá co jní cochivatochjan xonhi tiempo nchao rroxengaxin hna cain tti jianha que nchehe chojni.

⁵ Mexinxin are Jesucristo joí ngataha nontte jihi, jehe ndacho ngain Dios: Soixin irinaoha tti nntaohé coxigo ni icha cosa que chojni chjá, mexinxin soixin joinchechjian ná cuerpo para ixin janha.

⁶ Soixin nntaxoxianha nntaohé coxigo que che ngataha xohi ni icha cosa que chojni nchehe na para nchetjañenxin na tti jianha que jehe na nchehe na.

⁷ Mexinxin janha ndachjan: “Nttihi joihi janha para sinttaha inchin soixin rinao, oh Dios,

jañá inchin jitaxin de ixin janha ngain libroe Moisés.”

⁸ Cristo saho ndacho que Dios joinaoha ni joincheoxinha cain cosa que vaganjo chojni, ni coxigo que vaganjo chojni, ni nntaohé coxigo que vacjaga chojni para ixin Dios, para vitjañenxin na tti jianha que nchehe na. Jamé ndacho Cristo masqui cain cosa mé ley que vayé Moisés coetonha para que vanjo na.

⁹ Cottimeja Cristo ndacho: “Nttihi joihi janha para sinttaha inchin soixin rinao, oh Dios.” Rrocho que jehe joí para vinttjian cain cosa que vaganjo chojni, co jehe vanjo iná cosa que icha jian.

¹⁰ Dios ojointtajian na ixin Jesucristo joinchehe inchin rinao Dios are Jesucristo joanjo cuerpoe jehe mismo para ngain Dios. Co jehe joinchehe jihi nacoa nttiha, co mé donda para cainxin tiempo.

11 Cain xidána judío vanchehe xa xé xa cada nchanho, co vaganjo xa tsje nttiha xajeho cosa ngain Dios masqui cain cosa mé xonhi tiempo nchao cjoenga hna cain tti jianha que vintteca chojni.

12 Pero Jesucristo joanjo jehó nacoa cosa ngain Dios para cainxin tiempo, co mé cuerpoe para cjoenga hna cain tti jianha que nchehe chojni. Cottimeja Jesucristo sajoiguhe ngain lado jian de Dios.

13 Nttiha jichonhe Jesucristo hasta tti nchanho que Dios sinchegacha jehé de ngain cain tti ningaconhe.

14 Ixin de tti nacoaxinxon nttiha que jehé xanjo ndavenhe para Dios jehé joinchejian para cainxin tiempo cainxin chojni que tequininxin para ngain Dios.

15 Co Espiritu Santo nttasegurá na cain jili ixin saho ndačo:

16 Janhi sehe tti trato que janha sinttachjian ngain chojni ngain tti nchanho que tsí, čo Dios que chonda cain joachaxin.

Tsín tti ttetonha janha ngain ansén na,
co tti janha ttetonha ndasittohe ngain joarrixaoen na.

17 Cottimeja ndačo:

Ixonhi tiempo janha rroaxanho de cain cosa jianha que jehé na nchehe na.

18 Jańá mexinxin are cain tti jianha que vintteca chojni ovitjañehe na, ichondaha na que sanjo na icha cosa ngain Dios para sitjañenxin na cain cosa jianha mé.

Ján na chonda na que tsonchián na ngain Dios

19 Mexinxin hermanos, jai ján na nchao soxinhí na conixin confianza ngaxinhí tti Lugar Santísimo nttiha ngajni ixin Jesucristo ocointtji jni para ixin ján na.

20 Are Jesucristo vanjo cuerpoe para ndavenhe, are mé rročo ixin cortina para ngain Lugar Santísimo xiré cortina para que ján na nchao satto na cortina mé co tsjia na ngain ná nttiha naroaxin que danjo iná vida que xonhi tiempo tsjexin.

21 Jhe Jesús, tti dána que icha importante, mé tti ttjenguijna ján na nttiha tti ttjen Dios.

22 Mexinxin ján na chonda na que tsonchián na ngain Dios conixin ansean na jian conixin ná confianza seguro ngain Dios. Jamé ixin Jesucristo ojoincheroa ansean na para que ján na tsonoa na seguro que ixonhi teca na de cain tti jianha que jointtoho na, co cai inchin Dios ojoinchetsinda cuerpoe na para que ján na nchao tsonchián na ngain.

23 Ján na sonttoho na sigue cainxin tiempo de sotticaon na ngain Dios co xonhi tiempo stentoxinhí na tti ján na dotticaon na ixin Dios rrochjá na tti jehé ndačo.

24 Co chonda na que rrotsjehe na de quexén sonttoho na para tsjenguijna chó na para sonao chó na co para sonttoho na jian.

25 Rrochondaha na que sonttoho na inchin nchehe tti chojni que ixatteha para nchesayehe Dios, sino que ján na chonda na que sonttoanimá chó na para que tsji na ngain tti xatte na mé, co icha jai que ojitonchian tti nchanho que Jesucristo tsí iná.

26 Ixin si ján na sonttoho na sigue de sinao na sonttoho na jianha después de que ján na ojoatsoan na tti ndoa, ixonhi cosa jí para que ján na sanjo na ngain Dios para que jehé sinttatjańá na cosa jianha que sonttoho na.

²⁷ Si jamé sonttoho na, ján na jeho nchao rrochonhe na tti anto soji castigo ngain xohi que jiche para rrochexin cain tti ningaconhe Dios, are Dios sinchejuzgá cain cosa.

²⁸ Are ðhonja chonji que xa vitticaon ngain ley que vayé Moisés joincheha inchin coetonha ley mé co si vintte yó o ní chojni de testigo que ndácho ixin ndoa vicon que tti iná chojni joincheha inchin coetonha ley mé, chojni mé vayé castigo de navenxon co xonhi chojni coaxin joachjaon.

²⁹ Mexinxin janto icha soji castigo tequininxin tti chojni que ningaconhe Xenhe Dios, co xaxaon na ixin xonhi rentte jní Xan que coingo Xan, co nichja na feo de ixin Espíritu Santo de Dios, tti anto rinao jehe na! Co jehe jní Cristo, mé tti nchese gurá tti trato naroaxin, co trato mé tti joinchejian chojni mé.

³⁰ Já n na noa na que Dios, tti chonda cain joachaxin, ndácho: “Janha tti sinttacastigá chojni jianha; janha tti tsjengá na hna inchin tequininxin na.” Co cai ndácho: “Dios, tti chonda cain joachaxin, sinchejuzguehe chojni jehe.”

³¹ ¡Ixin anto tangui tsonhe chojni que teca jianha ngattoxon con Dios que jichon!

³² Pero xaxaon ra jaha ra ngain tiempo vatto are jaha ra nandá vayehe ra joadingasán, rrocho que coexinhi ra vitticaon ra Jesucristo, are mé jaha ra coixinha ra conixin paciencia tti anto tangui que conha ra are jaha ra joincheluchá ra para ditticaon ra Jesucristo.

³³ Are mé canxion de jaha ra feo xanttjo ra na co joinchehe na feo nganji ra ngattoxon con icha chojni. Co icanxin ra conoha ra tangui are vicon ra ixin nicoañeroa ra vetan na tangui.

³⁴ Jaha ra coiaconoeha ra chojni Jesucristo que teaxinhi ngain cárcel, co masqui joantsjaha ra na cosá ra pero chaha ra ixin onoha ra que nganji chonda ra cosa icha jian que cosa nntihi ngataha nontte, co cosa mé tsonchjenhe para cainxin tiempo.

³⁵ Mexinxin nchetjanha ra confianza que jaha ra chonda ra ixin confianza yá tti tsiaho para ixin jaha ra ná jian premio.

³⁶ Jaha ra rrogondaha ra rrochonda ra paciencia para sinchehe ra inchin rinao Dios co para sayehe ra tti jehe ndácho sanjo.

³⁷ Ixin ngain tti jitaxin Palabré Dios nntiha ndácho:

Daca, chonda que anto daca,

tsí jehe tti chonda que tsí, co jehe tsonchjenha.

³⁸ Pero tti chojni que janha rrondaçhjan já n ixin jehe jian chojni, mé sinttechon na ixin ditticaon na na janha,

pero si jehe na isitticaonha na na janha, janha isariha contento ngain jehe na.

³⁹ Pero já n na jaha tti chojni que isitticaonha co sitján, sino que já n na tti chojni que ditticaon cain tiempo co jamé tettenchjinha na almá na.

11

Tti confianza ngain Dios

¹ Are já n na chonda na confianza ngain Dios, mé rrocho ixin chonda na seguro que já n saye na tti já n na techonhe na, co tedotticaon na mé, masqui já n na xa doconha na.

² Canxion nigoelitoa na xançhjen are saho, cjo i na jian ngattoxon con Dios ixin vechonda na confianza ngain Dios.

³ Por ixin confianzá na ngain Dios, noa na que jehe coetonha para conchjian cain mundo. Mexinxin cain cosa que jaí docon na conchjianxin de ngain ná tti ðhoha docon na.

⁴ Co Abel ixin jehe vechonda confianza ngain Dios, mexinxin jehe joanjo ná cosa icha jian ngain Dios que tti joanjo xanchó Caín, co mexinxin Dios ndaño que ján Abel jehe jian, co Dios vayé tti joanjo Abel. Jañá mexinxin masqui Abel ondavenhe, pero ján na ða tetanguí na de ixin Dios de ixin tti confianza que vechonda Abel.

⁵ Cai Enoc ixin jehe vechonda confianza ngain Dios, jehe ndavenha; Dios sajoicoa para ngajni, co icha chojni iviconha na Enoc ixin Dios sajoicoa para ngajni. Co cai ngain tti jitaxin Palabré Dios, nttiha ndaño que icha saho que Dios sajoicoa Enoc para ngajni, Dios joincheðoxinhi cain tti joinchehe Enoc.

⁶ Pero Dios jehe ðhoha rroché ngain ná chojni si chojni mé chondaha confianza ngain Dios, ixin para tsonchian ni ngain Dios, jehe ni chonda ni que sitticaon ni que ixin Dios ján jí co ixin sinchenchaon cain chojni que ttjé na jehe Dios.

⁷ Cai Noé vechonda confianza ngain Dios. Mexinxin are Dios joinchenohe Noé ixin siconhe cosa que Noé ða ðonhi tiempo vicon, Noé vitticaon tti ndaño Dios co Noé joinchechjian arca para que nifamilié ndavenxinha na de ixin jinda. Co de ixin confianzé Noé ngain Dios, Noé cjoago que ixin cain chojni que vaguitticaonha Dios ngain tiempo mé jianha na ngattoxon con Dios. Pero Dios ndaño que Noé jehe jian ixin vechonda confianza ngain Dios.

⁸ Cai Abraham vechonda confianza ngain Dios, mexinxin are Dios nichjé jehe, jehe vitticaon co vañhe sacjoi para ngain tti nontte que después Dios joanjo de herencia ngain jehe. Jehe Abraham vañjexin de ngain nonttehe co sacjoi pero venoeha para ttinó sajittji.

⁹ Co ixin Abraham vechonda confianza ngain Dios, mexinxin jehe vehe ngain tti nontte que Dios ndaño joanjo, masqui inchin chojni que joixin de cjin. Mexinxin jehe vexinhi nchia de carpa, co cai jamé joinchehe xenhe Isaac co Jacob, que cai vayé na tti ndaño Dios que rroganjo.

¹⁰ Jamé vanchehe Abraham ixin jehe chonhe cjoi ngain tti ciudad que tonñjenhe para cainxin tiempo, que Dios joinchechjian, co mé rroño chojni tti ttjen Dios.

¹¹ Cai Sara, nñiñhihi jehe Abraham, ixin jehe nña misma vechonda nña confianza ngain Dios, masqui jehe nña anto onañhichjan para rro-jincheconcjihí chjan, pero vayé nña joachaxin de joincheconcjihí nña ná chjan, co jamé jehe nña cjoi nña janné chjan mé ixin vechonda nña confianza que Dios ján rrojinchehe tti jehe ndaño.

¹² Jañá conhe Abraham masqui anto odañhichjan, pero ða joichonda ná xenhe, co de xan mé después anto cotsje chojni Abraham hasta que chojni mé inchin cain conotse ngajni co inchin cain ðochjenhe nñise que jí ngandehe ndachaon, que ðhoha ttequin ni.

¹³ Cain chojni mé ndavintteguenhe na co vayeha na cain cosa que Dios ndaño ixin rroganjo ngain na. Pero ixin jehe na vechonda na confianza co vitticaon na ixin Dios ndoa rroganjo cain inchin jehe ndaño, mexinxin jehe na anto vaché na ixin vechonxin na ixin cain mé rroguiconhe después. Co mexinxin jehe na ndaño na que jehó joigatto na ngain mundo jihí ixin jehe na jeha de nttihi na, ðho na.

14 Mexinxin cain chojni que nichja jañá, jehe na tendaçho na claro que xa tettjé na iná nontte que soan nonttehe na.

15 Si jehe na xa rroçaxaon na de ngain tti nontte que joixin na, jehe na nchao rrocjan na nttiha iná.

16 Pero jehe na joinao na iná nontte icha jian, rroçho que jehe na rinao na ná lugar nttiha ngajni. Mexinxin Dios tosoeha de dinhi Dios de jehe na, ixin jehe ojoinchehjian ná ciudad nttiha ngajni para ixin jehe na.

17 Abraham, ixin vechonda confianza ngain Dios, mexinxin are Dios vaquehe prueba ngain Abraham, are mé Abraham joiaho Isaac, xenhe jehe para narrogoenxon xan co rroganjo xan ngain Dios. Abraham vehe dispuesto de rroganjo tti nacoaxinxon xenhe que jehe vechonda masqui Dios ondaçho ngain Abraham:

18 “De ngain xanha Isaac tsotsjexin anto tsje chojnia jaha.”

19 Abraham jamé joinchehe ixin jehe vechonxin que Dios chonda joachaxin hasta para sinchexechon chojni que ndadenhe. Co ján na nchao rrondaçho na cai que Abraham cjan vayé xenhe iná de ngayé nindadiguenhe ixin Abraham ovehe dispuesto para narrogoenxon jehe xan.

20 Cai Isaac ixin jehe vechonda confianza ngain Dios, mexinxin jehe ndaçho ngain Jacob co ngain Esaú, xenhe jehe Isaac, que ixin Dios seguro sinchenchaon xan.

21 Cai Jacob ixin jehe vechonda confianza ngain Dios, mexinxin are ochiaon ndajoiguenhe, jehe ndaçho ngain cayoi xenhe José que ixin Dios sinchenchaon cayoi xan. Co Jacob vingattjenxin conixin nftacottohe co joinchecoanxinhi Dios.

22 Cai José vechonda confianza ngain Dios, mexinxin are ochiaon ndavenhe, jehe ndaçho que después cain chojni Israel saçhjexin na de nttiha ngain nonttehe Egipto. Co jehe José coetonha que are satsji na chonda na que sasicao na nttaloroé jehe.

23 Cai nindoha Moisés vechonda na confianza ngain Dios, mexinxin are concjiji Moisés, jehe na coema na Moisés ngoixin ní conittjao ixin vicon na que Moisés ná xanxichjan anto çhjoin jí, co xaonha na masqui coetonha rey que ixin cain xanxichjan de chojni Israel chonda que narrogoenxon na xan.

24 Cai Moisés vechonda confianza ngain Dios, mexinxin are jehe ojoiçi ná xí, jehe çhoha para que vinhi xenhe nçhichjehe rey de Egipto.

25 Sino que jehe icha joinao vetan tangui cai inchin icha chojni Dios en lugar de que jehe çhjoin rroconohe de rrojinchehe cosa jianha inchin joinao cuerpoe, ixin jehe venohe que mé jecho para nchion tiempo.

26 Moisés, jehe conohe icha rentte para jehe vetan tangui de ixin causexin Cristo que jehe rrogechonda cain cosa que jí ngain nonttehe Egipto, ixin jehe venohe jian quehe sacha nttiha ngajni.

27 Cai ixin Moisés vechonda confianza ngain Dios, mexinxin jehe sacjoixin de ngain nonttehe Egipto, co jehe xaonha ixin rroçoñao rey de nttiha, sino que Moisés jehe joinchehe sigue jian vaguitticaon ngain Dios inchin orroguicon Dios que ni ná chojni diconha.

28 Cai ixin Moisés vechonda confianza ngain Dios, mexinxin jehe coetonhe cain chojni Israel que sinchehjian na tti quiai pascua. Co coetonhe na ixin tsinga na jní coleco ngaré puerté nchia para que are jói ángel de Dios para nagoenxon cain xanxi xenhe chojni Egipto, xansaho ángel mé çonhi joinchehe ngain xenhe chojni Israel.

²⁹ Cai ixin cain chojni Israel vechonda confianza ngain Dios, mexinxin jehe na vatto na ndachaon que dinhi Mar Rojo inchin si rrocji ngataha jinche xema. Co are xisoldado de Egipto joinao xa rrogatto xa jamé cai, pero nttiha ndacionhe xa jinda.

³⁰ Cai ixin chojni Israel vechonda confianza ngain Dios, mexinxin are jehe na ngariandangi na yáto nchanho ngain ciudad Jericó ttjarioho jie que vechonda ciudé na para vaguinttemanxin na are vaquetocaho na icha chojni, ttjarioho mé vetsinga ttjario.

³¹ Cai Rahab, tti nchí que vanchecji cuerpoe ngain tsje xí, pero por ixin confianza que jehe ncha coexinhi ncha vechonda ncha ngain Dios, mexinxin jehe nchí mé venha ncha are ndavintteguenhe cain icha chojni ngain ciudad mé ixin nchí mé jian vayé ncha tti chojni Israel que joitsaya ciudad mé.

³² ¿Co quehe icha rrondačhjan janha? Janha ichondaha tiempo para rronhattjo ra de ixin Gedeón, de Barac, de Sansón, de Jefte, de David, de Samuel co de ixin cain profeté Dios.

³³ Cain nimé cai ixin confianzé na ngain Dios, mexinxin canxion na joacha na tsje nontte, co icanxin na coetonha na jian ngain chojni, co Dios cjoengujna na inchin jehe ndačo ngain na. Co icanxin na are vetan na coleón, Dios cjoengujna na para que joineha na va.

³⁴ Co icanxin na are vintttjin na ngacjan xohi que anto soji, pero xonhi conhe na. Co icanxin na, masqui chojni joinao narrogoenxon na conixin espada, pero nahi. Co tti chojni que tsangaha, jehe na contsanga na, co anto soji coeto na are ngain guerra co coixinhi na joacha na ngain cain soldadoe xivaningaconhe na.

³⁵ Co vintte nchí que masqui ndavenhe xenhe ncha, pero Dios joinchexecon xan mé iná para ixin jehe ncha.

Co icanxin chojni večhoa co anto soji vicaon na. Co tti cjoaya ndache na ixin ixonhi cosa feo rroconhe na si irroguitticaonha na ngain Dios. Pero jehe na čhoha na, ixin jehe na icha rinao na que Dios sinchexecon jehe na para rrochonda na ná vida icha jian.

³⁶ Co icanxin chojni vetan na tangui are icha chojni cjoanoa na na co vicaon na conixin nttá, co hasta cadena vinttečhiaxin na co viaxinhi na ngain cárcel.

³⁷ Co icanxin na nagoenxon na na conixin xo, icanxin na hasta cončhinjidonga na na, icanxin na icha chojni joinao que jehe na rrogáčhenda na de ngain Dios, icanxin na venxin na conixin espada; co icanxin na vangaria na cain parte co vinttengá na jeho roé coleco co contentso, co anto noa na, cóa na joachjaon, co feo conhe na ngain icha chojni.

³⁸ Cain chojni mé anto icha jian na que icha chojni. Vacjicoa na ngagaha nttá, co ngagaha jna, co vintte na ngaxinhi cueva, co ngain lugar que tečhjadoho nontte.

³⁹ Cain chojni mé masqui Dios ovicon que ixin ján ndoa jian vaguitticaon na ngain Dios, pero vayeha na tti ndačo Dios rroganjo ngain na,

⁴⁰ ixin Dios jehe xaxaon iná cosa icha jian para ixin ján na, ixin jehe ndačo que cain chojni mé tsojian ngattoxon con Dios pero hasta conixin ján na cai.

12

Ján na rrotsjehe na ejemploe Jesucristo

¹ Mexinxin ixin cainxin chojni mé que vitticaon na are saho cointtoá na na ejemplo mé, jai ján na tsín na ná lado cain cosa que xonhi xé co cain

cosa jianha que ditaha na de sonttoho na, para que nchao conixin paciencia sonttoho na xé Jesucristo que ján na chonda na.

² Ján na rrotsjehe na ejemploe Jesucristo ixin jehe tti joiaoa na confianza que chonda na ngain Dios. Co jehe tti tsjenguijna na para sotticaon na mé para cain tiempo. Jesús jehe vetan tangui nganito cruz, co jehe joincheha caso tti joasoaxin que ixin jehe ndavenxin nttiha, ixin jehe ovenohe que después de setan tangui, jehe çhjoin tsonohe co rroché. Co sajoiguehe ngain lado jian de tti ttjen Dios.

³ Mexinxin jaha ra chonda ra que xaxaon ra ejemploe Jesús, que jehe anto tangui conhe de ngá rá chojni jianha; mexinxin jaha ra tonçhjenha ra ni doanha ra desanimado de ngain xé Jesús.

⁴ Ixin masqui jaha ra tencheluchá ra ngain cosa jianha, pero ni ná ra xa ndadenha ra ixin tenchehe ra jamé.

⁵ ¿Aondatjañaha ra tti Dios ndattjo ra ixin jaha ra inchin xenhe jehe? Jehe ndaço janhi ngain tti jitaxin Palabrè:

Hijo mio, ndaçoaha ixin xonhi xé tti castigo que chjá Dios, para que jaha tsangui sinchehe cosa jian, ni doanha desanimado are sinttasattaha jehe.

⁶ Ixin Dios nchejian cain chojni que jehe anto riano, co nchecastigá cain tti chojni que jehe dayé inchin xenhe.

⁷ Tonsoji ra ngain castigo mé ixin Dios jehe jamé sinchehe nganji ra ixin jaha ra xenhe jehe. ¿Apoco jí ná chjan que ndodé xan nchecastigaha ndo xan?

⁸ Pero si Dios sinttastigaha jaha ra inchin jehe nchecastigá cain xenhe jehe, mexinxin rroço que jaha ra jaha mero xenhe jehe.

⁹ Cai ján na are nchinnchin gontte na, ndodá na de nttihi ngataha nontte vanttastigá na ndo, co ján vanttorespetá na ndo. Mexinxin ¿quedonda ján na sotticaonha na Ndadá na que ttjen ngajni para que jamé ján na rrochonda na iná vida naroaxin?

¹⁰ Cain ndodá na nttihi ngataha nontte vanttastigá na ndo nttihi ngain vida jihi que seha sonttechon na, inchin jehe ndo vaconohe ndo que nchao jí. Pero Dios jehe nttastigá na para tsjenguijna na para que jehe nttajian na inchin jianxin jehe.

¹¹ Ján ndoa que ni ná castigo nntaxoxianha na ngain rato que ján na tedayé na castigo, sino que anto ttin na are mé: pero tti chojni que tangui de ngain castigo mé, después chojni mé chonda na vida jian co çhjoin tonohe na de ngain ansén na.

Tti tsonhe chojni que rinaoha ditticaon tti ndaço Dios

¹² Jañá ixin castigoe Dios anto rentte, mexinxin doan ra animado de nchehe ra tti jehe ndaço, co dinttechinha ra.

¹³ Co ttjé ra tti nttiha nao, co sattji ra ngatja nttiha mé para que chojni que jai ditticaonha jian, sicon na ejemploa ra co sitticaon na icha en lugar de isitticaonha na.

¹⁴ Nchehe ra de que cain ra dintte ra çhjoin conixin icha chojni ngain vida jihi, co dachjendehe ra cain cosa jianha, ixin chojni que dachjendehe na de ngain cosa jianha çhoaha rrochonxin na Dios.

¹⁵ Ttjiho ra cuidado para que ni ná ra tsinttoeha ra de sayehe ra ayuda que ttixin de ngain Dios, co para que ni ná ra sintteha ra inchin ná ca que anto tsja que nchejianha icha ca.

¹⁶ Co ttjiho ra cuidado cai que ni ná jaha ra dintteçhicoha ra iná nçhi que jeha nçhiçhiha ra, ni ndaçoaha ra ixin cosé Dios xonhi rentte inchin

joinchehe Esaú, co mexinxin jehe joinchecji derecho que jehe vechonda de chjan saho ngain xanchó xanJacob. Cain mé joinchecji por ixin nacoa comida.

¹⁷ Co jaha ra noha ra que después, are Esaú joinao que ndodé rrojinchetsenhe ndo ñao Dios para que Dios rrojinchençaon jehe Esaú, ndodé Esaú ithoha ndo. Co masqui jehe Esaú anto tsjanga pero jehe çhoha vittja quexén rrojinchete para rroquentoixinhi tti jehe joinchehe.

¹⁸ Jaha ra conchienha ra ngain ná jna que nchao catte ni inchin joinchehe chojni Israel que conchienhe na ngain jna Sinaí tti jiche xohi, co tti vehe anto naxin xehe co tti anto soji cjoa çhintto.

¹⁹ Ni jaha ra coinha ra are coyao trompeta ntthiha ni are nichja Dios ngain jehe na. Co cain chojni que coinhi mé, jehe na joinchetsenhe na ñao Moisés que ixin irronichjaha Dios icha jañá ngain jehe na.

²⁰ Jehe na ndaço na jañá ixin coixinha na de joaxaon, de ixin tti coetonha Dios are ndaço: “Quexeho chojni o coxigo que tsingachje ngagaha jna jhi, jaha ra chonda ra que nasoexon ra chojni mé o coxigo mé conixin xo o conixin ná lanza.”

²¹ Cain na anto xaon na de ixin tti vicon na ngain jna mé, que hasta Moisés mismo ndaço: “Janha rriçanga na de joaxaon.”

²² Pero en lugar de jhi, jaha ra conchienhe ra ngain jna de Sión co ngain tti ciudad de Dios, cayoi mé rroçho ngain Jerusalén de ngajni, co ngain tsje miles de ángel.

²³ Co conchienhe ra ngain icha chojni xenhe Dios que tequininxin ngajni; co jaha ra conixin jehe na co cain ángel mé tenchecoanxinhi ra Dios. Co jaha ra oconchienhe ra ngain Dios tti Juez de cainxin chojni co de ngain cain espiritue chojni jian que Dios joinchejian.

²⁴ Co jaha ra conchienhe ra ngain Jesús, tti abogado na ngain Dios para tti trato naroaxin, co chonda ra confianza ngain jní Jesús que jehe cointtji para nttaian na ján na; co jni jehe danjo icha jian cosa que jni Abel.

²⁵ Mexinxin jaha ra ttjiho ra cuidado de nchehe ra caso Dios, tti jinichjá na. Ixin Dios anto soji joinchecastigá chojni Israel are jehe na joincheha na caso tti Dios ndache na de ngain Moisés are ngain jna Sinaí que jí ngataha nontte jhi. Mexinxin ján na seguro soan na castigado si sonttoha na caso tti jindattjoxin na Dios desde ngajni.

²⁶ Are Dios nichjexin chojni Israel de ngagaha jna Sinaí, are mé tté jehe joinchequingui nontte, pero jai jehe ndaço: “Iná ntthiha janha sinttaquingui jeoha nontte, sino que cai ngajni.”

²⁷ Are jehe ndaço “iná ntthiha”, ján na ttinxin na que are mé rroxantte cain cosa que nchao ttingui que Dios joinchechjian, co jeha siguehe tti çhoha tsingui.

²⁸ Tti lugar que Dios chjá na, tti jehe ttetonha, mé çhoha tsingui. Mexinxin ján na chonda na que rroçhé na gracias ngain Dios de ixin cain jhi, co sonttocoanxinhi na jehe Dios inchin jiquininxin, conixin respeto inchin jehe rinao,

²⁹ ixin Dios jehe inchin ná xohi que tjaga cain cosa jianha.

13

Quexén sinchehe ni para sincheçoxinhi Dios

¹ Ttinttoeha ra de rinao chó ra inchin rrocji ra ichó ra cainxin ra.

² Co xonhi tiempo tjañaha ra de dayehe ra chojni que diji nchiandoi ra ixin jamé canxion chojni vayé na ángel de Dios ngain nchiandoha na, masqui jehe na ni vanjoha na cuenta que tti vayé na jehe ángel de Dios.

³ Co xaxaon ra cain chojni que teaxinhi ngain cárcel, inchin rrocji que jaha ra rroguintteaxinha ra nntihã cai conixin jehe na. Co xaxaon ra de ixin tti chojni que vicaon por ixin nichja de ixin Jesús, ixin jaha ra cai chonda ra ná cuerpo que tonohe ttn.

⁴ Cain ra xo tottaha ra, nchehe ra inchin tequininxin chojni que otottehe, co danjoha ra cuerpoa ra ngain iná chojni ixin Dios sinchejuzguehe cain tti chojni que danjo cuerpoe ngain ojé chojni que jeha xixihi ni jeha nchichihi, co ngain tti chojni que chonda xicoxehe o nchicoxehe.

⁵ xaxaonha ra de rrochonda ra icha tomi, sino que dintte ra contento conixin jeha tti ochonda ra ixin Dios ndaço: “Janha xonhi tiempo tsinttoha jaho, co xonhi tiempo satsjixin de nganji.”

⁶ Mexinxin jai ján na nchao rrondaço na conixin confianza: Dios jehe tti ttjenguijna na janha; co xagoanha ni ná cosa que sinchena çhonja chojni.

⁷ xaxaon ra de ixin tti chojni que coetonha ngain ningoa ra, co de ixin tti chojni que ndattjo ra joajné Dios. xaxaon ra que xén joinchehe na ngain vidé na, co ditticaon ra ngain Dios inchin jehe na vitticaon na.

⁸ Jesucristo xonhi tiempo ojé; jehe xajeho jna, jai, co para cainxin tiempo.

⁹ Jaha ra dittoaxinha ra que icha chojni sinttacoanha ra na ojé cosa que ndoaha de ixin Dios. Icha jian tsosoji ansean na de ixin tti jian que ttixin de ngain Dios, co sotticaonha na tti regla de ixin quehe sine ni, ixin regla mé ttjenguijnaha pero ni tti chojni que ditticaon regla.

¹⁰ Co Jesucristo tti joanjo vidé para ixin ján na, pero tti dána que nchehe inchin ttetonha ley que vayé Moisés chondaha derecho de sayé ayuda ngain Cristo.

¹¹ Ixin dána judío icha importante xanxinhi jní coxigo ngaxinhi Lugar Santísimo de ngain ningoe na. Jní mé tti danjo dána ngain Dios para ditjañehe tti jianha que nchehe cain chojni judío. Pero cuerpoe cain coxigo mé che ngain xohi, ndoja de rajné na.

¹² Jamé cai Jesús vetan tangui are ndavenhe, pero ndoja de ciudad para joinchejian cain chojni conixin jní jehe.

¹³ Mexinxin chjin na ngain jehe masqui chojni ndaço ixin anto soaxin ixin dotticaon na ngain jehe.

¹⁴ Ixin ngataha nontte ntihã ján na chondaha na ni ná ciudad que tsonhjenhe para cainxin tiempo, sino que ján na tettjé na tti ciudad que tsí después.

¹⁵ Mexinxin cainxin tiempo ján na chonda na que sonttocoanxinhi na Dios por ixin ngain nombré Jesucristo co mé tti jiquininxin sonttoho na. ¡Mexinxin cain na sonttocoanxinhi na Dios conixin rroha na!

¹⁶ Co xonhi tiempo tjañaha ra de nchehe ra jian co ttjenguijna ra icha chojni conixin tti chonda ra, ixin mé tti nche xoxinhi Dios dayé de nganji na.

¹⁷ Ditticaon ra tti chojni que ttetonha ngain ningoa ra, co nchehe ra tti jehe na rrondaço na ixin jehe na nitidicao cuidado de ixin almá ra ixin nohe na que jehe na nisanjo cuenta ngain Dios. Mexinxin nchehe ra de que jehe na rroché na nganji ra co jeha de que sinttechín na nganji ra, ixin si jaha ra nchehe ra para que jehe na sinttechín na, jaha ra setan ra tangui.

¹⁸ Nchetsenhe ra ñao Dios para ixin janha na ixin janha na chonda na seguro ixin nttaha na inchin jiquininxin, co rinaho na que cainxin tti sinttaha na, mé jian.

¹⁹ Janha anto danchiaha ra que jaha ra nchetsenhe ra ñao Dios para que Dios rrochjana joachaxin rrocjan na toin para sasotsjaha ra iná.

Tti joexinxin joajna jihi

²⁰ Dios, tti rroanha tti çhjoin que tonohe ansén ni, mé tti joinchexechon Jesucristo, tti chonda cain joachaxin para ixin ján na, co tti chonda cuidado para ixin ján na inchin ná tti jian ttingaria coleco dicao cuidado ixin colecoe, co jehe joinchese gurá tti trato naroaxin que xonhi tiempo tsjexin, conixin jní jehe.

²¹ Que Dios mé sinttajian ra para que nchao sinchehe ra inchin jehe rinao, co de ixin Jesucristo jehe sinchehe de nganji cain ján na inchin jehe sinao. ¡Gloria ngain Cristo para cainxin tiempo! Amén.

²² Hermanos, janha nttatsanha ñao ra que chonda ra paciencia para ttinxin ra cain palabra de consejo jihi, ixin janha cjinha ra carta jihi, pero atto nchín carta.

²³ Janha rrinttanoha jaha ra que hermano Timoteo ovaçhjexin de ngain cárcel tti jehe vehe. Si jehe tsí nttihi toin, janha sasochuan are janha saso para sasotsjaha ra iná.

²⁴ Chjehe ra joajna cain chojni que ttetonha ngain ningoa ra, co cain chojni que ditticaon ngain Jesucristo. Cain chojni que ditticaon ngain Jesús nttihi nonttehe Italia rroanha na joajna para ixin cain jaha ra.

²⁵ Que Dios sinttanchaon ra cain ra jaha ra. Amén.

Carta Que Dicjin Santiago

Santiago rroanha joajna ngain cain chojni Israel

¹ Janha Santiago na, janha ná ninchehe xé Dios co Jesucristo, tti chonda cain joachaxin. Janha rrichjaha joajna jihi tti tteyó grupoe chojni Israel que dichjequé ngoixin mundo.

Dios nchenohe chojni jehe

² Hermanos, jaha ra chonda ra que tsonoha ra çhjoin are rrochonda ra quexeho clase de problema, ixin mé Dios sacaha ra prueba.

³ Ixin jaha ra onoha ra que are Dios dacaha ra prueba ixin andoa ditticaon ra jehe, are mé jaha ra tangui ra de chonda ra icha paciencia.

⁴ Pero nchehe ra que paciencia yá sehe nao, para que jaha ra sintte ra chojni que jian ditticaon Dios co de cainxin sintte ra chojni jian, co jamé cainxin ra xonhi tiempo sitjanha ra tti jian que ttixin de ngain Dios.

⁵ Si çhonia de jaha ra noaha ra quehe rinao Dios, ndache ra jehe co jehe sinttanoaha ra, ixin Dios cainxin tiempo jehe anto rinao nchenohe cain chojni co jehe xonhi tiempo ttjengueyexin de tti jehe danjo.

⁶ Pero are sanchiehe ra Dios, chonda ra seguro que ján sinttanoaha ra. xaxaonha ra que ixin puede sinttanoaha ra, ixin tti xaxaon jamé jehe inchin olé ndachaon que sadicao çhinto de ná lado a iná lado.

⁷ Tti chojni que xaxaon jamé, xonhi sayé de ngain Dios,

⁸ ixin tti chojni que jai rinao ná cosa co ndoexin jehe rinao ojé cosa, chojni mé chondaha seguro de ngain tti jehe xaxaon.

⁹ Co tti chojni que ditticaon Jesucristo co noa na de ntthi ngataha nontte, chojni mé chonda que tsonohe çhjoin ixin jehe na rico na para ngain Dios.

¹⁰ Co tti chojni que ditticaon Jesucristo co jehe na rico na de ntthi ngataha nontte, chojni mé chonda que tsonohe na çhjoin para ngain Dios are tsonoa na ixin para Dios xonhi xé cain cosa que chonda na ntthi ngataha nontte. Ixin chojni rico inchin tsjohe ná ca que seha tonçhenje.

¹¹ Are çhinhi nchanho co anto tosoa, ca mé ndaxema ca co tsjohe ca ndadinttjin tsjo co ndattjexin tti anto çhjoin que te tsjo mé. Jamé cai chojni rico ndadenhe co ndadittohe cain negocio que jehe na chonda na.

Are Dios daquehe ni prueba, co ditaha ni de sinchehe ni cosa jianha

¹² Anto çhjoin para ixin tti chojni que ttixinhi conixin paciencia are Dios daquehe prueba. Ixin are jehe ottixinhi ngain prueba mé, Dios rrochjé chojni mé de premio inchin ná corona, ixin chojni mé sayé tti vida naroaxin que Dios ndaço sanjo ngain cain chojni que rinao na jehe.

¹³ Are çhonia de jaha ra ditaha ra de sinchehe ra ná cosa jianha, xaxaonha ra que ixin Dios rroanha joarrixaon mé nganji ra, ixin Dios xonhi tiempo ditaha de sinchehe ná cosa jianha, ni jehe nche xaxaonha iná chojni para sinchehe na jianha mé.

¹⁴ Sino que are ná chojni anto rinao sinchehe cosa jianha ixin jehe deporsín jamé xaxaon, jamé ditaxin daca de sinchehe cosa jianha.

¹⁵ Co de ngain tti jianha que jehe xaxaon jihi, mé nchexin cosa jianha, co are cosa jianha jihi ttixinhi ngain chojni mé, Dios çhjé na castigo de ttji na ngain infierno.

¹⁶ Hermanos, janha anto rinaho jaha ra. Dintte ra listo de ditticaonha ra cosa que jeha ndoa.

¹⁷ Ixin cain tti jian que ján na dayé na ttixin de ngajni ngain Dios, tti joinchechjian cain xohi que jí ngajni. Dios jehe xajeho, co ngain jehe xonhi ditoxin que tsiaho jeho sanho.

¹⁸ Dios chjá na vida naroaxin ixin dotticaon na tti joajna ndoa que jehe rroán na para que ján na sontte na chojni icha jian para ixin jehe, ixin jehe jamé rinao.

Tti palabra que ján ndoa

¹⁹ Mexinxin cada ra jaha ra chonda ra que dintte ra listo para ttinhi ra, pero saho de rronichja ra xaxaon ra jian co dacaha toñao ra.

²⁰ Ixin tti chojni que toñao, mé ncheha inchin rinao Dios.

²¹ Jañá mexinxin ncheha ra cain cosa jianha, co cain cosa nchaoha que anto nchehe chojni ngain tiempo jihi, co ditticaon ra jian tti joajna ndoa que vittohe ngain ansean ra ixin joajna mé chonda joachaxin de tsjenguijna almá ra para tsjiha ngain infierno.

²² Pero nchehe ra inchin jittetonha joajna jihi, co jeoha ttinhi ra joajna jihi, ixin si jeho ttinhi ra co ncheha ra inchin jittetonha joajna, jamé jaho ra tencheyehé ra ansean ra.

²³ Tti chojni que jeho ttinhi joajna jihi co ncheha inchin jittetonha joajna, chojni mé inchin tti nchexoan ngá con ngá ná espejo.

²⁴ Jehe tsjehe quexén jitsehe, pero are jehe sattji ndatjañehe quexén jitsjehe.

²⁵ Pero tti chojni que tjañeha tti jehe ttinhi, sino que jehe tsjehe jian ngain tti jitaxin cain tti ttetonha Dios, co nchehe cain tti jittetonha Dios, ixin mé joxon cosa jian co mé tti chjá na libertad; Dios sinchenciaon cain tti nchehe chojni mé.

²⁶ Si chonja chojni xaxaon na que ixin jehe na anto ditticaon na Jesucristo, pero si jehe na nichjacoa na palabra que jiquininxinha, jeho na noeha na quehe tenchehe na co tti jehe na ditticaon na xonhi xé.

²⁷ Tti chojni que ndoa ditticaon ngain Jesucristo co chondaha ni ná cosa jianha ngattoxon con Dios Ndodá na, mé tti chojni que ttjenguijna chjan noa que chondaha ndodé ni janné, co nchiganha que tangui tonhe, co cai chojni mé ncheha cosa jianha que jí ngataha nontte nntihi.

2

choha tsinchiexon ni chojni que sinao ni

¹ Hermanos, jaha ra que ditticaon ra Jesucristo, tti anto jian co tti chonda cain joachaxin para ixin ján na, jaha ra choha tsinchiexon ra chojni que icha sinao ra.

² Ixin ná ejemplo: Si ná chojni sixinhi ningoa ra que anto jian lontto jingá conixin cochianingo que anto rentte, co ngain rato mé cai sixinhi ná chojni noa que jingá lontto que xonhi xé,

³ co si icha jian sinchesayehe ra tti jingá lontto icha fino co rrondaço ra ngain: “Jaha nntihi darihi ngain ná lugar icha jian”, co tti chojni noa rrondaço ra ngain: “Jaha yá daringattjencoa, o nntihi darihi ngatacoa nontte”,

⁴ are jañá tenchehe ra, jaha ra otettinchiexon ra chojni que icha rinao ra, co jamé jaha ra tenchejuzguehe ra chojni mé inchin xaxaon chojni que ditticaonha ngain Jesucristo.

⁵ Hermanos, janha anto rinaho jaha ra. Ttinhí ra jihil. Dios coinchiehe chojni noa de ngataha nontte jihí para que jehe na sintte na rico de ngain tti jehe na ditticaon na Jesucristo, co para que jehe na sayé na de herencia parte ngain tti ttetonha Dios, que jehé ndačo sanjo ngain cain chojni que rinao na jehe.

⁶ Co jaha ra xaxaonha ra jamé, sino que jaha ra tjanoa ra chojni noa. ¿Anoaha ra que chojni rico, mé tti anto nttantaha ra xa, cottimeja ttianganji ra na para ngain juzgado?

⁷ Co chojni rico, mé tti nichja jianha de ixin tti nombre jian que jaha ra chonda ra ixin dinhi ra cristiano ixin ditticaon ra Jesucristo.

⁸ Tti icha importante que ttetonha Dios tti jitaxin: “Rinao ra icha chojni jañá inchin rinao ra cuerpoa ra.” Si jaha ra ndoa tenchehe ra jihí, ján tenchehe ra jian.

⁹ Pero si jaha ra ttinchiexon ra chojni que icha rinao ra, mé tenchehe ra jianha ixin tencheha ra inchin ttetonha Dios.

¹⁰ Ixin si ná chojni nchehe cainxin tti ttetonha Dios, pero si chojni mé ncheha nacoa cosa de cain tti ttetonha Dios, chojni mé xa jica de cain tti ttetonha Dios.

¹¹ Ixin Dios mismo ndačo: “Ncheyeha čihí iná chojni”, cai ndačo: “Dantsjeha vidé iná chojni.” Mexinxin si ná chojni chondaha nčhicoexehe, pero jehe joantsjehe vidé iná chojni, chojni mé ivitticaonha cain tti ttetonha Dios.

¹² Mexinxin nichja ra jian co nchehe ra jian inchin jiquininxin sinchehe chojni que Dios sinchejuzguehe conixin ley de Cristo que danjo libertad.

¹³ Ixin tti chojni que coiaconoeha iná chojni, Dios cai tsiaconoeha chojni mé; pero tti chojni que coiaconoeha iná chojni, chojni mé tti sachá are Dios sinchejuzguehe cainxin chojni.

Chojní Jesucristo chonda que sinchehe jian

¹⁴ Hermanos, xonhi xé si ná chojni ndačo que jehe chonda confianza ngain Jesucristo co ncheha cosa jian. ¿Anchao jehe tti confianza mé tsjenguijna para que tsjaha ngain infierno?

¹⁵ Jihí ná ejemplo: Si ná chojni que ditticaon Jesucristo chondaha lonto ni tti jine

¹⁶ co si ná de jaha ra rrondache ra: “Jian gracia ndoe. Jintte co dihi, co darítsi jian para tsonquianha”, pero rrochjeha ra lonto ni tti sine, xonhi xé tti jaha ra rrondache ra.

¹⁷ Jañá tonhe ngain confianza que chonda na ngain Jesucristo cai. Jeho mé xonhi xé. Chonda na que sonttoho na cosa jian para tsjago na que ján chonda na confianza ngain Jesucristo.

¹⁸ Pero puede čhonja chojni rrondattjo: “Jaha chonda confianza ngain Jesucristo, co janha nttaha cosa jian.” Mexinxin janha ndačhan: “Jaha tjağohna quexén jaha chonda confianza ngain Jesucristo si sincheha cosa jian, co janha tsjagoha jaha ixin chonda confianza ngain Jesucristo de ixin tti jian que janha rrinttaha.”

¹⁹ Jaha anto chonda confianza que jí nacoaxinxon Dios, co de mé jaha jian nchehe, pero cainxin demonio chonda confianza mé cai, co xanga de joaxaon ixin nohe que Dios sinchecastigá.

²⁰ Jaha que xaxaonha nao, zarinaoha tsonoha que tti confianza que jehe ni chonda ni ngain Jesucristo chonda que rrořago de ngain tti jian que jehe ni nchehe ni, co jamé nchoe ján jian confianza mé?

²¹ xaxaon ra ngain Abraham, tti ndogoelitoa na xančhen. Dios ndatho ixin jehe jian are Abraham narrogoenxon xenhe, xan vinhi Isaac ixin Dios jamé coetonha ngain Abraham.

²² Jaha onoha que Abraham anto vechonda confianza ngain Dios ixin jehe vehe dispuesto de joinchehe quexeho cosa que Dios rrondačo. Tti confianza que jehe vechonda xettexin de ngain tti jehe joinchehe.

²³ Mexinxin ndačoxin ngain tti jitaxin Palabré Dios que Abraham vechonda confianza ngain Dios, co Dios ndačo que Abraham jian de ngain ansén ixin chonda confianza mé. Co hasta Dios joincheguinho Abraham amigo Dios.

²⁴ Jańá jaha ra onoha ra que Dios dayé chojni de ixin tti jian que jehe na nchehe na, co jeoha de ixin tti confianza que jehe na chonda na.

²⁵ Cai jamé conhe ngain Rahab, tti nčhí que vanchecji cuerpoe ngain icha xí. Dios vayé nčhí mé de jian nča ngattoxon con Dios de ixin tti jehe nča joinchehe nča ixin jehe nča joanjo nča nchia tti vinte tti ní xí que rroanha Josué, co cjoenguijna nča canio xí mé para sacjoixin xa ngain oje ntthi.

²⁶ Jańá inchin cuerpoea na are icoha espiritua na jehe ndadiguenhe, jamé cai tti confianza que ján na chonda na inchin ndadiguenhe si nttoha na tti jian.

3

Tti nchehe neje ni

¹ Hermanos, icha jian sintteha ngayaha ra tsje tti sinttacoanha ra ixin jaha ra onoha ra que janha na, řo nttacoanha ra, icha soji soanna na juzgado.

² Cainxin na atto tsje cosa nchaoha nttoho na co nchaoha nichja na. Si čhonja chojni cainxin tti jehe nichja jian, chojni mé joxon jian que cai nchao tetonhe ngoixin cuerpoe.

³ Are ján na ttinhi na freno ngain rroha ná conxin, jehe va ditticaon na va ttjinho na va tti ján na rinao na.

⁴ xaxaon ra cai ngain barco; masqui anto yeye barco, co čhintto que tonxina barco cai anto soji, pero tti deca barco nchegonda ná nttá anto nčhín que dinhi timón. Conixin nttá mé dicaoxin barco tti jehe rinao.

⁵ Jańá tonhe cai ngain neje ni. Neje ni ná parte anto nčhín de ngain cuerpoe ni, pero jehe tonhe que nchao sinchekhjian tsje problema tangui. Neje ni inchin ná jachjenhe cerillo que anto nčhín pero tsixinhi tsjaga ngoixin ná jna.

⁶ Co neje ni, jehe inchin ná řohi. Neje ni ná cosa anto jianha que jí ngain cuerpoe ni, mé ná cosa jianha que nchejianha ngoixin cuerpoe ni. Neje ni jidacaon conixin mero řoi infierno, co řohi mé jitjaga ngoixin cuerpoe ni cain tiempo que techon ni.

⁷ Chojni nchao nchesancho cain tipo de coxigo čhintto co tsanga, co conttoa co conché co cain coxigo que jí ngangui ndachaon. Chojni ttixinhi nchesancho cain coxigo mé.

⁸ Pero řonhi chojni ttixinhi ngain neje. Neje ni ná cosa jianha que řonhi chojni ttixinhi ngain, co neje ni chonda inchin veneno que nadoenxon chojni.

⁹ Conixin neje na, nttocoanxinxin na Dios Ndodá na, co xajeho neje na jiji danchiáxin na cosa jianha para ixin chojni que Dios joinchechjian inchin jehe mismo.

¹⁰ De rroha na nttocoanxinxin na Dios co de rroha na danchiáxin na cosa jianha para ixin chojni. Nttatsanha ñao ra, jiji jiquininxinha sonttoho na.

¹¹ Ixin ¿apoco nchao tti rrochinxin jinda que anto çhjoin jni, nttiha nchao rrochinxin jinda que anto tsja?

¹² ¿O apoco ná nttahigo nchao sinchechjian ntta aceituna, o ná nttauva nchao sinchechjian ntta ttohigo? Jañá cai tti jichinxin jinda que anto xijntta, nttiha çhoha rrochinxin jinda que anto çhjoin jni.

Quexén Dios nchenohe chojni tti anto jian

¹³ Si jí ngayaha ra ná chojni que nohe jian de ixin Dios co ttinxin jian, chojni mé chonda que tsjago de ngain tti jian que jehe nchehe, co jehe tsjago conixin paciencia que ttixin de ngain tti jehe nohe.

¹⁴ Pero sí jaha ra anto choaha ra, co ttenchjinha ra coraje ngain ansean ra, co de cain cosa rinao ra que jaho ra tti sintte ra icha importante, de cain yá jaha ra chondaha ra que tsonoha ra orgulloso de ixin noha ra de ixin Dios, ixin si jaha ra tonoha ra orgulloso, mé rroçho que jeha ndoa tti jaha ra tenchehe ra.

¹⁵ Ixin cain yá ttixinha de ngain Dios, yá jeho tti nchehe chojni ngataha nontte co yá tti rinao inchínji.

¹⁶ Ixin tti jí joachjoehe co tti rinao na que jeha na nisintte icha importante, nttiha çonhi respeto jí, co nttiha jí cain clase de cosa jianha.

¹⁷ Pero tti chojni que Dios nchequinxin na, chojni mé chonda na ná vida jian; jehe na çhinttoha na, sino que amable na, co jehe na ndaçho ansén na para ttjenguijna icha chojni, co ttiaconoehe na chojni, co nchehe na cosa jian. Cai jehe na cainxin tiempo chonda na confianza ngain Jesucristo, co jehe na jeha ncheyaxon na.

¹⁸ Co tti chojni que ncheconohe çhjoin ngain ansén icha chojni, chojni mé nchehe na jian para que icha chojni rrochonda cainxin inchin jiquininxin.

4

Chojni que anto ncheçoxinhi cosa ngataha nontte rinaoha Dios

¹ ¿De ttinó ttixin tti ningaconhe chó ra co tti ttetocoho chó ra? Mé ttixin de ngain tti jianha que jaha ra çaxaon ra ixin jehe mé cainxin tiempo jincheçaxaon ansean ra de sinchehe ra jianha.

² Jiji tti tonhe: Jaha ra rinao ra ná cosa, co ixin çhoha chonda ra, jaha ra hasta nadoenxon ra chojni para nchao chonda ra tti jaha ra rinao ra. Co jí tiempo que tonchjoaha ra de quexeho cosa que chonda iná chojni, co ixin jaha ra çhoha chonda ra cosa mé, mexinxin jaha ra ttetocoho ra chojni. Jaha ra çhoha chonda ra tti jaha ra rinao ra ixin danchieha ra Dios.

³ Ndoa que jaha ra danchia ra, pero jeha jian tti jaha ra danchia ra, mexinxin Dios çhjaha ra tti jaha ra danchia ra ixin tti jaha ra rinao ra jeha para sonda inchin rinao cuerpoa ra.

⁴ ¡Jaha ra chojni jianha! ¿Anoaha ra que si jehe ni anto sinao ni cosa jianha que jí ngataha nontte, jehe ni isinaoha ni Dios? Quexeho chojni que anto sinao cosa jianha que jí ngataha nontte, chojni mé çjan ningaconhe Dios.

⁵ Mexinxin jí razón ndaçho ngain tti jitaxin Palabré Dios: “Espíritu Santo que Dios cointtohe nganji na, Espíritu mé anto rinao na pero cai anto çhjo para ixin ján na.”

⁶ Pero Dios, jehe anto ttjenguijna na ján na ixin jehe anto jian, ixin ndaño ngain tti jitaxin Palabré: “Dios toñao ngain chojni orgulloso, pero jehe ttjenguijna tti chojni que jeha orgulloso ixin Dios anto jian.”

⁷ Mexinxin nchehe ra inchin tti ttetonha Dios. Ttixinha ra para ncheha ra inchin rinao inchínji, co jamé jehe satsjixin de nganji ra.

⁸ Tonchian ra ngain Dios, co jehe tsonchian nganji ra. Jaha ra que tenchehe ra jianha, ttentoxinhi ra vidá ra. Co jaha ra xo xaxaon ra ixin nchao sinao ra Dios co sinao ra cosa jianha que jí ngataha nontte ngain nacoa tiempo, ttín ra ansean ra para ixin jeha Dios.

⁹ Dinttechinhi ra, tsjanga ra, co ta ra joachjaon de ixin tti jianha que joinchehe ra. En lugar de tsjano ra, tsjanga ra; co en lugar de rrochaha ra, dinttechinhi ra.

¹⁰ Tonoaha ra importante para ngain Dios, co jamé jehe sinttachjian ra chojni importante ngattoxon con jehe.

Jehe ni chondaha ni que sinchejuzguehe ni iná chojni

¹¹ Hermanos, nttatsanha ñao ra nichjaha ra jianha de ixin iná chojni que ditticaon Jesucristo. Tti nichja jianha de ixin ná chojni que ditticaon Jesucristo o jinchejuzgá ngain na, chojni mé jinichja jianha de ixin ley que coetonha Dios co jinchejuzguehe ley mé. Co si jaha ra sinchejuzguehe ra ley mé, rrocho que jaha ra tti juez ra de ngain ley mé en lugar de sitticaon ra cain tti ttetonha ley mé.

¹² Ixin jeha nacoa tti joanjo ley mé, co jehe mé tti Juez, co jehe mé tti nchao tsjenguijna na o sinttatján na. Pero jaha ra, ¿quehe joachaxin chonda ra para sinchejuzguehe ra iná chojni?

Noeha ni quehe tsonhe ndoe o rejngui

¹³ Jai ttinhi ra jihi jaha ra xo ndaño ra: “Jai o ndoe satsjin na ngain quexeho ná ciudad, co nttiha sontte na ná nano para sonttó na negocio co sacha na tsje tomi.”

¹⁴ Jaha ra ni noaha ra quehe siconhe ngain nchanho ndoe. ¿Quejanhi nano tonchjenhe vidé jehe ni? Vidé jehe ni inchin ná ranontte que xago ná rato, cottimeja jaicoa ndaditján.

¹⁵ Janhi tti jiquininxin rrondaño jaha ra: “Si Dios rinao, ján na sonttechon na co sonttoho na jihi co jiha.”

¹⁶ Pero jaha ra ni ndañoaha ra jañá, sino que jaha ra nichja ra conixin orgullo de jaho ra, co cain orgullo yá jianha.

¹⁷ Tti chojni que nohe quexeha tti jian co ncheha, chojni mé jianha jinchehe.

5

Tti vitonhe chojni rico

¹ Jaha ra chojni rico, ttinhi ra jihi! Tsjanga ra co toyao ra ixin tti anto tangui jichonha ra.

² Cain cosa rentte que jaha ra chonda ra jai ixonhi xé, co lonttoa ra anto fino que chonda ra ndadijine cochí.

³ Cain oro co plata que chonda ra ndadiguihi chjín, co chjín mé tjago ixin jaha ra joincheha ra inchin jiquininxin conixin tomia ra. Co mé tsjaga nntaoha ra inchin rrocji xohi. ¿Quedonda anto joatse ra tomi co cosa anto rentte ngain tiempo jihi que ochian ndatsjexin mundo?

⁴ Jaha ra cjoengueha ra hna tti chojni que joinchehe xá ra ngataon jnguiha ra co tomí chojni mé tti techo jie jai para ixin jaha ra. Co Dios, tti chonda cain joachaxin, jinohe cain jiji.

⁵ Ntitihi ngataha nontte jaha ra techonda ra ná vida anto thjoin ixin nchehe ra cain tti rinao ra co jintte ra cain tti ntaxoxinha ra, tetjonttao ra xá coleco para ngain nchanho de matanza.

⁶ Jaha ra joicho ra jie para ixin chojni que xonhi teca co nagoenxon ra na. Co jehe na tsinha rá na nganji ra.

Quexén rrochonda ni paciencia co quexén sinchecoanxinhí ni Dios

⁷ Mexinxin hermanos, chonda ra paciencia hasta que Jesús tsí iná. Inchin tti ttenga ngataon jngui si jehe rinao rrotsín jian cosecha, jehe chonda que rrochonhe conixin paciencia hasta tsija chin.

⁸ Jamé jaha ra cai chonda ra paciencia co doanha ra desanimado ixin ochiaon joí nchanho que Jesucristo tsí iná.

⁹ Hermanos, toñaoeha chó ra para que Dios sinchejuzgaha nganji ra ixin Dios tti Juez co jehe ochian joí.

¹⁰ Hermanos, tse ra de ejemplo tti tangui que conhe cain profeta que nichja conixin joachaxín nombré Dios co tti paciencia que jehe na vechonda na.

¹¹ Ixin ján na xaxaon na feliz tti chojni que ttixinhi are jehe tangui tonhe. Jaha ra ocoihí ra tti paciencia que vechonda Job. Co jaha ra onoha ra que xén joinchehe Dios ngain Job después ixin Dios jehe anto ttiaconoehé ni.

¹² Pero de cainxin cosa nttatsanha ñao ra hermanos que ncheha ra jurado ni de ixin ngajni, ni de ngataha nontte, ni de iná cosa chondaha ra que sinchehe ra jurado. Are rrondaço ra: “Ján”, que ján jamé tsonhe. Co are rrondaço ra: “Nahi”, que jamé nahi, para que Dios rrochjaha ra castigo.

¹³ Si chonja de jaha ra tedetan ra tangui, chonda ra que nchetsenhe ra ñao Dios para que jehe sinttjian tangui mé. Si chonja ra anto chaha ra, chonda ra que tsje ra alabanza para ixin Dios.

¹⁴ Si chonja de jaha ra niha ra, chonda ra que dayehe ra chojni que chonda joachaxin ngain nihngo para que chojni mé sinchetsenhe na ñao Dios para ixin jehe tti nihi mé. Co conixin joachaxin nombré Dios tsinga na aceite já tti nihi mé.

¹⁵ Co are sinchetsenhe ra ñao Dios co rrochonda ra seguro que Dios sinchexingamehe jehe tti nihi mé, tti nihi mé rroxingamehe co Dios sinchetjañehe tti jianha que joinchehe jehe tti nihi mé.

¹⁶ Mexinxin ndache chó ra naná ra tti jianha que joinchehe ra co nchetsenhe ra ñao Dios para ixin icha nicompañeroa ra para que cain ra rroxingamaha ra. Are ná chojni jian ngattoxon con Dios sinchetsenhe ñao Dios conixin ansén, palabré chojni mé chonda tsje joachaxin.

¹⁷ Profeta Elías cjoí ná chojni janhi inchin ján na, co are jehe joinchetsenhe ñao Dios ixin itsiha chin, jamé conhe; ijoiha chin ngataha nontte jiji ní nano co rioho.

¹⁸ Co después, are jehe joinchetsenhe ñao Dios iná ixin tsí chin, jamé conhe; cjan joí chin iná co nontte joanjo nontte cosecha.

¹⁹ Hermanos, si chonja de jaha ra isitticaonha ra Dios co sinchehe ra ojé cosa, co si iná chojni tsjenguijna ra para que jaha ra rocjan ra sitticaon ra Dios iná,

²⁰ ttettexin ñao ra que chojni que sinchequentoxinhí vidé iná chojni para que jehe isincheha jianha, chojni mé tsanchjandaha almé chojni para que

tsji ngain inferno, co tti chojni que rrondačo jamé, jehe sinchehe que tti iná chojni sitjañehe tsje jianha que jehe joinchehe.

Saho Carta Que Dicjin Pedro

Pedro rroanha joajna ngain chojni judío que ditticaon Jesucristo co teha ngain nacioen

¹ Janha Pedro na, janha ná representanté Jesucristo. Cjin na carta jihi para ixin jaha ra xo judío ra que teha ra ngain nontteha ra co ditticaon ra Jesucristo; jaha ra xo te ra ngain nonttehe Ponto, nonttehe Galacia, nonttehe Capadocia, nonttehe Asia, co nonttehe Bitinia.

² Jaha ra tti Dios Ndodá na coinciaha ra desde osé tiempo vatto para que sinte ra chojni jehe Ndo. Co Espíritu Santo joincheroa ansean ra para que sitticaon ra tti coetonha Dios, co para que cain tti jianha que joinchehe ra oxenga hna conixin jni Jesucristo. Dios rrochjá ra tsje tti jian co tti çhjoin que tsonohe ansean ra.

Tti vida naroaxin que xonhi tiempo tsjexin

³ Ján na sonttocoanxinhi na Dios Ndodé Jesucristo, tti chonda cain joachaxin para ixin ján na, ixin Dios mé tti coiaconoá na, mexinxin chjá na vida naroaxin ixin jehe joinchexechon Jesús. Co jehe joinchehe jañá para que ján na rrochonda na seguro ixin sonttechon na ngain vida naroaxin para cainxin tiempo.

⁴ Co jehe Dios rrochjá ra tti herencia que jehe jittenchjinha nttiha ngajni, co cosa mé çhoha rroxantte ni çhoha rrochonda mancha, ni rroxentteha inchin tsjo.

⁵ Co ixin jaha ra ditticaon ra Dios, jehe jinda ra conixin joachaxin jehe para que sayeha almá ra castigo. Co cosa jihi jaha ra sicon ra ngain último tiempo are ochiaon ndatsjexin mundo.

⁶ Mexinxin jai jaha ra anto chaha ra, masqui puede chonda que nchion tiempo jaha ra atto tangui tetonha ra.

⁷ Ixin chonda que jamé tetonha ra para que nchao çago ixin jaha ra ndoa ditticaon ra Jesucristo. Co cai oro, masqui chonda que ndatsjexin, pero tangui tonhe are çotte ngacjan çohi para que chojni dicon si ndoa jian oro. Pero tti jaha ra ditticaon ra, mé icha rentte que oro que ndattjexin. Mexinxin chonda que anto tangui tonha ra para que çago si jaha ra ditticaon ra jian ngain Jesucristo. Co si jaha ra tsixinha ra cain cosa tangui yá, jiquininxin que Jesucristo rronichja jian de ixin jaha ra, co anto sinttasayaha ra are jehe tsí iná.

⁸ Jaha ra rinao ra Jesucristo masqui çonhi tiempo vicon ra, co chonda ra confianza ngain jehe jai masqui diconha ra. Mexinxin jai jaha ra anto chaha ra que hasta ni çhoha rronichja ra de ixin queçén çhjoin tonoha ra,

⁹ Ixin jaha ra ochonda ra vida naroaxin ixin ditticaon ra Jesucristo.

¹⁰ Ngain tiempo are saho, profeté Dios anto cjoé ngain tti jitaxin Palabré Dios, co coangui jian para rroquinxin de ixin tti jaha ra ditticaon ra jai, co vanichja de ixin queçén Dios sinchenchaon nganji jaha ra.

¹¹ Espíritu Santo, que rroanha Cristo, vanchenohe profeta desde are saho de ixin quexehe cosa tangui tsonhe jehe Cristo co de ixin después cain chojni sinchesayehe na jehe. Co jehe profeté Dios anto joinao rroconohe ixin quensen jehe tti Cristo co qesa rroquí.

¹² Pero Dios joinchenohe cain profeta que tti ça que jehe vanchehe jaha para ixin jehe, sino para ixin ján na. Co cain tti jehe vanichja, mé çajeho

titi jian joajné Jesucristo que jaha ra conoha ra después. Co tti chojni que jointtano ha ra joajna mé, jehe na vinttechonda na joachaxín Espíritu Santo que joixin de ngajni. Co cain cosa jiji hasta cain ángel orrojinao rroguintteguicon.

Dios rinao que ján na sontte na ngain ná vida jian

¹³ Mexinxin, xaxaon ra jian tti jaha ra sinchehe ra co nchegonda ra joarrixaoan ra. Co chonda ra seguro ngain Dios que jehe sinttanchaon ra ngain nchanho are Jesucristo tsí iná.

¹⁴ Ditticaon ra tti ndačo Dios inchin chjan jian que ditticaon xan ndodé xan, co ncheha ra cosa jianha inchin jaha ra vajinao ra vanchehe ra are icha saho que jaha ra rroguitticaon ra Dios.

¹⁵ Incheha ra jamé, sino que dintte ra ngain ná vida jian ixin Dios que coinchiaha ra jehe jian,

¹⁶ ixin ndačo ngain tti jitaxin Palabré Dios: “Jaha ra dintte ra ngain ná vida jian ixin janha jian na.”

¹⁷ Dios tti nchejuzgá tti nchehe cada chojni, co nchejuzgá inchin tequininxin cada chojni. Co si jaha ra ndačo ra ixin Dios mé tti Ndadá ra, jaha ra chonda ra que rroxagonhe ra jehe Dios ngoixin tiempo que jaha ra sinttechon ra ngataha nontte jiji.

¹⁸ Dios icoančjandaha jaha ra para xa rroguintte ra ngain tti vida que xonhi xé para ixin Dios, inchin tti vida que jointtacoanha ra nindogoelitoa ra. Co jaha ra noha ra jian que tti vitte vida que chjá ra Dios; xengaxinha hna conixin cosa que nchao ndatsjexin inchin oro o plata,

¹⁹ sino que xengaxin hna conixin jni Jesucristo. Jesucristo ni ná cosa jianha joinchehe. Mexinxin jehe ndavenhe para cjoenga hna cain cosa jianha que jointtoho na, inchin are saho chojni vágoen na coleco para vaganjo na ngain Dios para vaxenga hna tti jianha que vanchehe na.

²⁰ Jesucristo ovequininxin jañá desde icha saho que nontte rroconchjian. Pero jehe xa coenha mé, jehe joiconhe hasta ngain tti último nchanho tehe que ondajittjexin mundo. Jehe joixágo co conhe jañá para que cjoenguinja jaha ra.

²¹ De ixin Jesucristo jaha ra ditticaon ra Dios. Co Dios joinchexechon co joinchesayehe Jesucristo. Mexinxin ansean ra ndačo para que ditticaon ra Dios co chonhe ra que Dios jian sinchehe nganji ra.

²² De ixin joachaxín Espíritu Santo jaha ra ditticaon ra tti joajna ndoa que joixin de ngain Dios, mexinxin jai jaha ra ocoroa ra. Co mexinxin jaha ra nchao rinao ra cain chojni que ditticaon Jesucristo. Jañá chonda ra que anto sinao chó ra naná ra conixin ansean ra.

²³ Jaha ra cjan ra goan ra iná, pero ijeha de ngain chojni de nntihi ngataha nontte ixin chojni mé ndadenhe. Jaha ra cjan ra goan ra iná pero de ngain palabré Dios, co palabra mé tti danjo iná vida naroaxin co tsončjenhe para cainxin tiempo.

²⁴ Ixin tti jitaxin Palabré Dios ndačo:

Cainxin chojni jeha inchin ná ca,

co cainxin cosa jian que jehe na chonda na, mé inchin tsjohe ca.

Ca ndaxema ca, co tsjohe ca ndadingo tsjo;

²⁵ pero palabré Dios tončjenhe para cainxin tiempo.

Co palabra jiji tti jian joajna que jaha ra vayehe ra.

2

¹ Mexinxin, ttinttohe ra cainxin cosa jianha, inchin de tti ncheyehe ra chojni, co tti jaha ra nchehe ra para chojni xaxaon na ixin jaha ra anto jian ra, co ndoaha, ixin ngain ansean ra oje te xaxaon ra, co ttinttoehe ra tti joachjoehe para ngain chojni, co tti cain clase de chijni que jeha ndoa.

² Nchehe ra inchin chjan que nandá toncjihi; ttjé ra palabré Dios inchin jehe xan ttjé xan tsjin, para que icha sitticaon ra Jesucristo co para rrochonda ra iná vida naroaxin.

³ Nchehe ra jamé si jaha ra ndoa ditticaon ra que Dios ján jian.

Jesucristo inchin ná xo que jichon

⁴ Ditticaon ra Jesucristo icha co icha ixin jehe inchin ná xo que chonda vida. Janha ndattjo ra jañá ixin jehe inchin tti xo icha importante ngain esquiné nchia, co nchia mé rrocho ningoe Dios. Chojni are saho ndaço na que xo jihi xonhi xé xo, pero para ixin Dios xo jihi anto jian xo co anto rentte xo.

⁵ Jaha ra cai inchin xo que chonda vida. Mexinxin dittoaxin ra que Dios sintagonda ra para que de jaha ra Dios sinchexjian ná ningoe. Co cain jaha ra ná grupo de xidána jian para ixin Dios que de ixin Jesucristo jaha ra nchesayehe ra Dios ixin nchehe ra jian, co jehe Dios nchao sayé tti jaha ra nchehe ra.

⁶ Janha ndačhjan jañá ixin ndaço ngain tti jitaxin Palabré Dios: Janha tsín ngain ciudad de Sión ná chojni que sehe inchin tti xo que nchegonda chojni para nchexjian na esquiné ningona, pero xo mé ná xo que janha coinchiá co anto rentte xo mé. Co cain chojni que ditticaon ngain xo mé, xonhi tiempo sinttechín na de ixin jehe xo mé.

⁷ Jaha ra que ditticaon ra, noha ra que xo mé atto rentte xo; pero para ixin tti chojni que ditticaonha, diconhe inchin ndaço ngain tti jitaxin Palabré Dios are ndaço:

Tti xo que xialbanil ndaço que xonhi xé, pero xo mé xo icha importante de cain xo.

⁸ Co cai tonhe inchin ndaço ngain tti jitaxin Palabré Dios are ndaço: xo jihi tti tonttenguixin chojni, co tti jehe na xantjaxin na.

Ndoa jehe na tonttenguixin na ixin ditticaonha na tti jian joajna, ixin ojamé viquininxin na.

Tti chojni Dios

⁹ Pero jaha ra joxon chojni que Dios coinchiehe, jaha ra ná grupo de dana que nchesayehe Dios ixin mé tti rey; jaha ra ná nación jian, co jaha ra chojni Dios. Co jañá para que jaha ra rroundache ra icha chojni tti jian que nchehe Dios, tti vayaha jaha ra para sajoixin ra de ngain tti naxin xehe que vintte ra, para que jai te ra ngain tti anto chjoin jí joadingasán que jehe chonda.

¹⁰ Are icha saho jaha ra ni jeha chojni Dios vintte ra, pero jai jaha ra ochojni Dios ra; are icha saho jaha ra xonhi quensen vaquiaconoaha ra, pero jai Dios ttiaconoaha jaha ra.

Dintte ra ninchehe xé Dios

¹¹ Hermanos, jaha ra que teha ra ngain nacioan ra, nttatsanha ñao ra que xonhi tiempo dittoaxin ra nchehe ra tti jianha que xaxaon ni, ixin jehe mé tti ttetocaho almé ni.

¹² Jaha ra nchehe ra jian ngayé cain chojni que xa ditticaonha Dios. Jamé jehe na, masqui nichja na jianha de ixin jaha ra jai, inchin rrocji ra chojni que

joinchehe tsje cosa jianha, pero jehe na sicon na tti jian que jaha ra tenchehe ra, co are tsí nchanho que Dios sinchejuzgá ngain chojni, cottimeja nchoe jehe na rronichja na jian de ixin Dios.

¹³ Ixin jaha ra rinao ra sinchesayehe ra Jesucristo, mexinxin ditticaon ra cai cain chojni que chonda joachaxin para ttetonha nttihi ngataha nontte, inchin tti ttetonha xiemperador que chonda icha jie joachaxin.

¹⁴ Co ditticaon ra cain tti rrondačo cain xigobernador que jehe xiemperador rroanha para sinchecastigá xa tti chojni que nchehe jianha co para sinchesayehe xa tti chojni que nchehe jian.

¹⁵ Ixin Dios rinao que jaha ra sinchehe ra jian, para que cain chojni que xonhi chonxin de ixin Dios co cain chojni que xonhi xé tti jehe xaxaon čhoha rronichja na jianha de ixin jaha ra.

¹⁶ Janha rrindattjo ra ixin ditticaon ra cain chojni que chonda joachaxin para ttetonha nttihi ngataha nontte, pero masqui jamé, xaxaon ra ixin chonda ra libertad. Pero mé rročhoaha que ixin jaha ra nchao sinchehe ra cosa jianha ixin chonda ra que sitticaon ra Dios ixin jaha ra chojni jehe.

¹⁷ Jaha ra chonda ra respeto ngain cain chojni. Rinao ra cain chojni que ditticaon Dios, chonda ra que rroxagonhe ra Dios, co chonda ra respeto ngain xiemperador.

Tti anto tangui que conhe Jesucristo, mé ná ejemplo para ixin ján na

¹⁸ Jaha ra, xo nchehe ra xa ngain ná xinajni, chonda ra que sitticaon ra tti tsetonha ra xinajnia ra, co jamé sinchehe ra jeoha ngain xinajni que anto jian para ixin jaha ra, cai ngain xinajni que jaha jian.

¹⁹ Ixin mé ná cosa jian si jehe ni tsixinhi ni tti tangui que tsonhe ni masqui xonhi razón pero jehi ixin jehe ni rinao ni Dios.

²⁰ Ixin si jaha ra nchehe ra canxion cosa jianha co mexinxin nttacastigaxin ra na, mé masqui tsixinha ra conixin paciencia pero jaha ra cjoé ra para tsonha ra jamé. Pero si jaha ra tenchehe ra jian co xa tenttastigá ra na co jaha ra tettixinha ra conixin paciencia, jamé nchoe ján jian tenchehe ra ngattoxon con Dios.

²¹ Mexinxin para ixin jamé Dios coinchiaha jaha ra. Co cai Jesucristo anto tangui conhe para ixin jaha ra, para chjá ra ná ejemplo, para que jaha ra jamé sinchehe ra cai.

²² Jesucristo ni ná cosa jianha joincheha, co jehe xonhi tiempo joincheyehe ni ná chojni.

²³ Co are icha chojni vanichja na jianha ngain jehe, jehe xonhi jianha vanichja ngain jehe na. Co are vancheguetan na Jesús tangui jehe vanchexaonha na, sino que jehe chonhe para tti sinchehe Dios ixin Dios tti Juez que nchehe inchin jiquininxin ngain cainxin chojni.

²⁴ Cainxin tti jianha que ján na nttoho na, Jesucristo ocjoenga hna are jehe venganito cruz; jehe conhe jamé para ján na vačhexin na de ngain cosa jianha, para que jai te na ngain cosa jian. Co jehe vicaon hasta conihí cuerpoe para que jointtaxingamaha jaha ra cai.

²⁵ Are icha saho jaha ra vacji ra inchin tti coleco que diguithoe, pero jai ocjan ra ngain Jesucristo co jehe dicao cuidado de ixin jaha ra inchin ná tti tingaria coleco co jehe dicao cuidado de ixin almá ra.

3

¹ Jamé cai jaha ra xo nchí ra are osinttecoho ra xixiha ra ditticaon ra tti tsetonha ra xa, para que si ttoha de xixiha ra xa ditticaonha xa joajné Jesucristo, jehe xa nchao sitticaon xa jehó conixin sicon xa tti jian que jaha ra sinchehe ra, co irrogondaha que jaha ra rrondache ra xa.

² Ixin jehe xa osicon xa que chíhi xa chonda ncha respeto co nchehe ncha joxon jian.

³ Jaha ra xo onchíchihi ná xí xaxaonha ra de ixin quexén sinchehe ra para icha chjoin sintte ngama cuerpoa ra, inchin tti sinchejinji já ra anto najni, o are tsín ra ngama cuerpoa ra cosa de joxon oro, o are sinttengaha ra vestido que anto chjoin te.

⁴ Jaha ra dintte ra chjoin pero de ngain ansean ra, co tti chjoin de ngain ansean ra, mé xonhi tiempo tsjexin, co mé rrotho que ansean ra anto nda co chjoin tonohé, co jehe jihí anto rentte ngattoxon con Dios.

⁵ Ixin cai ngain tiempo vatto osé, cain nchí que vechonda confianza ngain Dios vanchehe ncha jamé, co cai vaguitticaon ncha tti vaquetonhe xixihi ncha.

⁶ Jamé joinchehe Sara cai; jehe vitticaon cain tti ndacho Abraham xixihi jehe Sara. Co Sara joincheguini jehe Abraham, "soixin." Jaha ra cai nchao sintte ra ngain vidá ra inchin jehe vehe ngain vidé si sinchehe ra jian co xonhi cosa rroxagonhe ra.

⁷ Cai jaha ra, xo oxixihi ná nchí, chonda ra que rroxaxaon ra jian de ixin nchíchiha ra. Co ttijho ra respeto ngain ncha inchin jehe ncha jiquininxin ncha, jeoha ixin nchí icha sojiha ncha, sino cai ixin Dios chjé ncha iná vida naroxin que xonhi tiempo tsjexin inchin chjá jaha ra. Nchehe ra cain jihí para que xonhi quehe rrocayacoen oracioan ra ngain Dios.

Chojni que anto tangui tonhe por ixin nchehe tti jian

⁸ Jañá dintte jaha ra cain ra, ditticaon chó ra co ttiaconoehe chó ra naná ra, co rinao chó ra inchin rrocji ichó ra. chjoin nichjehe ra cain chojni co xaxaonha ra ixin jaha ra anto jian ra.

⁹ Ncheha ra jianha ngain chojni que sinchehe jianha nganji ra, co nichjaha ra feo de ixin tti chojni que rronichja feo de ixin jaha ra, icha jian nchetsenhe ra ñao Dios para que Dios sinchenchaon ngain chojni mé, ixin Dios coinciaha jaha ra para sinttanchaon ra.

¹⁰ Ixin ndacho ngain tti jitaxin Palabré Dios:

Tti anto rinao vidé co rinao sehe chjoin cain nchanho de ngain vidé, chonda que sicao cuidado que rronichjaha cosa jianha, ni rronichjaha mentira.

¹¹ Chojni mé chonda que sachjenda de isincheha cain cosa jianha, co sinchehe jehó cosa jian;

jehe tsjé quexén sinchehe para chjoin sehe ngain cain chojni, co cain tiempo jamé sinchehe.

¹² Ixin Dios jinda tti chojni que nchehe jian co jehe ttinhi cain tti ndacho na ngain jehe, pero cain tti chojni que nchehe jianha jehe toñao ngain na.

¹³ xonhi chojni sinchehe jianha nganji ra si jaha ra cainxin tiempo sinchehe ra jian,

¹⁴ co masqui tangui tsonha ra ixin nchehe ra jian, pero jaha ra chjoin tsonohe ansean ra. xagoenha ra ni ná chojni ni xonhi tiempo chonda ra joaxaon,

¹⁵ sino que jaha ra nchesayehe ra Cristo ngain ansean ra ixin jehe tti chonda joachaxin para ixin ján na. Jaha ra cainxin tiempo dintte ra listo para sinchenohe ra quexeho chojni que sanchianguiha ra de ixin quedonda jaha ra anto chonda ra seguro que ixin jaha ra chonda ra iná vida naroaxin. Ndache ra na, pero jion conixin respeto.

¹⁶ Jañá nchehe ra joxon cosa jian para que cain tiempo tsonohe chjoin ansean ra. Jamé cain chojni que nichja jianha de ixin tti jaha ra nchehe ra ixin ditticaon ra Cristo, jeho na tsosoé na de ixin tti jehe na nichja na.

¹⁷ Icha jian tsonoha ra tanguí ixin sinchehe ra jian, si Dios jamé rinao, co naha ixin sinchehe ra jianha.

¹⁸ Ixin Cristo mismo tanguí conhe ndavenhe para cjoenga hna nacoa nttiha de ixin tti jianha que ján na nttoho na. Cristo jehe jian, pero jehe tanguí conhe para ixin ján na xo jianha na, para satsjinho na ngain Dios. Cuerpoe jehe ndavenhe cuerpo pero espiritue venha espíritu.

¹⁹ Co de ngain espiritue cjoí ngain infierno para joinichja ngain espiritue cain nindadiguenhe que te nttiha.

²⁰ Cain espíritu jihí espiritue tti chojni que vaguitticaonha Dios ngain tiempoe Noé. Ngoixin tiempo que Noé joinchechjian arca, Dios chonhe para que icha chojni rroguitticaon na, pero jeho jni chojni tti xonhi conhe de ngain jinda ixin joixinhi na arca.

²¹ Co jinda mé rrocho tti jinda que ján na diguittexin na jai; de ixin jinda mé ján na ditjañá na cain tti jianha que jointtoho na. Are diguittexin na, jinda jaha tsinda cuerpoa na, sino que are mé ján na danchiehe na Dios que irrocjanha na sinttoho na jianha co jehe rrochjá na ná conciencia jian. Co Dios tsančhjangaha almá na tsji ngain infierno ixin Jesucristo xechonxin,

²² co jehe Jesucristo sacojín para ngajni co nttiha jí ngain lado jian de Dios co jehe tti chonda joachaxin para jitettonhe cain ángel co icha cosa que chonda joachaxin nttiha.

4

Sonttoho na inchin tti joachaxin que chjá na Dios

¹ Mexinxin, inchin anto tanguí conhe Jesucristo ngain cuerpoe, cai jaha ra chonda ra que dittoaxin ra para setan ra tanguí. Ixin tti chojni que vetan tanguí ngain cuerpoe ixin ditticaon Jesucristo, chojni mé incheha cosa jianha,

² para que cain nchanho que sinttechon chojni mé jehe na sinchehe na inchin rinao Dios, co isincheha na tti jianha que jehe na xaxaon na.

³ Oatto tsje joinchehe ra ngain tiempo vatto, jaha ra vanchehe ra tti ncheXoxinhi cain chojni que ditticaonha Dios. Ngain tiempo mé jaha ra vinttechonda ra tsje vicio, vanchehe ra tti jianha que vaXaxaon ra, co anto vacoan ra, co vaqún ra vandango para vacoanxin ra conixin icha chojni, co anto vaguihi ra cosa que coanxin chojni, co vanchesayehe ra ídolo que Dios ndačo jianha sinchesayehe ni cosa mé.

⁴ Co jai cain chojni mé ttinxinha na quedonda jaha ra icoancoha ra co ichjioha ra na ngain vida nchaoha mé, mexinxin nichja na jianha de ixin jaha ra.

⁵ Pero chojni mé chonda na que sanjo na cuenté na ngain Dios tti sinchejuzguehe cain chojni que xa techon conixin cain chojni que ondavenhe.

⁶ Ixin tti chojni que ondavenhe are xa vinttechon na, cjoí chojni joindačo joajné Dios ngain jehe na para que espirítue na nchao rroguinttechon jai inchin jichon Dios, masquí jehe na ndávintteguenhe na de ngataha nontte inchin cain chojni chonda que ndasenhe.

⁷ Ochian joí tiempo que ndatsjexin cainxin cosa. Mexinxin jaha ra xaxaon ra jian co cainxin tiempo nichja ra ngain Dios.

⁸ Co tti icha rinaho janha, que jaha ra anto sinao chó ra cada ra ixin tti chojni que rinao icha chojni jehe nchao sinchetjañehe chojni que nchehe cosa jianha.

⁹ Dayehe ra jian tti chojni que siji nchiandoi ra co ndačhohe ra ixin mé ná molestia para ixin jaha ra.

¹⁰ Cada ra Dios chjá ra naná clase de joachaxin para tsjenguijna chó ra. Co inchin ná tti nchehe jian ngain ná xa, jamé nchehe ra cai; nchegonda ra cain tti jian que ttixin de ngain Dios para ttjenguijna ra icha chojni.

¹¹ Tti chojni que chonda joachaxin para nichja quehe rročo Palabré Dios ngain icha chojni, chonda que rronichja inchin jiquininxin. Co tti chojni que chonda joachaxin para tsjenguijna icha chojni, que sinchehe jian de ngain ansén inchin joachaxin que Dios joanjo ngain jehe. Cain cosa jian que sinchehe ra, nchehe ra para tsosayexin Dios de ixin tti joinchehe Jesucristo. Co Jesucristo jiquininxin que cain chojni sinchesayehe jehe co jiquininxin cain joachaxin para cainxin tiempo. Amén.

Tti tangui que tonhe chojni Jesucristo

¹² Hermanos, dinttechinha ra are anto tangui tsonha ra ixin jamé tonhe cain chojni que ditticaon Jesucristo, para que Dios datsoan ngain ansén ni si seguro ditticaon ni Jesucristo ani nahi.

¹³ Jaha ra icha jian chaha ra are tsonha ra tti anto tangui ixin chonda ra oportunidá de tsonha ra inchin conhe Jesucristo, para que cai anto rrochaha ra are sicon ra tsí Jesucristo iná inchin ngacjan tsje chíxoe nchanho.

¹⁴ Si chojni nichja na feo nganji ra ixin ditticaon ra Jesucristo, jaha ra anto chjoin vidá ra ixin Espíritu Santo, que anto jian, jí nganji ra. Jehe na tenichja na jianha de ixin jehe Espíritu Santo jiji, pero jaha ra tenchesayehe ra.

¹⁵ Si choan de jaha ra tangui tetonha ra, pero que jeha ixin jaha ra nagoenxon ra iná chojni, o ni jeha ixin coehe ra cosé iná chojni, o ni jeha ixin joinchehe ra cosa jianha, o ni jeha ixin jaha ra joixintte ra problema de iná chojni, ixin cain mé anto joasoaxin para ixin jaha ra.

¹⁶ Pero si choan ra tangui tonha ra ixin dinhi ra cristiano, rrotho ixin jaha ra ditticaon ra Jesucristo, jaha ra chondaha ra que tsosoaha ra, sino que danjo ra gracias ngain Dios de ixin jehe tti tangui que tsonha ra.

¹⁷ Ojoí tiempo que Dios tsixinhi sinchejuzgá ngain chojni jehe. Co si nganji ján na jittexinxin Dios jinchejuzgá, ¿mé quexén tsonhe are sinchejuzgá Dios ngain tti chojni que ditticaonha joajné Dios?

¹⁸ Si para chojni jian tangui sacha na iná vida naraoxin, ¿mé quexén tsonhe chojni jianha?

¹⁹ Mexinxin tti chojni que tonhe tangui ixin jamé rinao Dios, chojni mé chonda na que sinchehe na sigue de sinchehe na tti jian, co rrochonda na cainxin confianza ngain Dios que joinchechjian na ixin jehe Dios cainxin tiempo nchehe inchin ndačo.

5

Consejo para cain chojni que ditticaon Jesucristo

¹ Jai janha rrochjaha consejo nittetonha nganji ra ngain ningoa ra. Ixin cai janha chonda joachaxin inchin jehe na, co janha vicon cain tti anto tangui que conhe Jesucristo, co janha cai tsosayana inchin jehe na are Jesucristo tsí iná.

² Nttatsanha ñao ra que inchin cuidado que dicao tti ttingaria coleco, jamé ttjiho ra cuidado de ixin chojni Dios, tti chojni que jaha ra chonda ra responsable de sincheoenhe ra na de ixin Dios. Ncheoenhe ra na conixin ansean ra jian, inchin rinao Dios co jeha ixin afuerza chonda ra que sincheoenhe ra na, ni jeha ixin rinao ra sacha ra tomi. Nchehe ra xa jiji pero conixin ansean ra jian,

³ jeha inchin xinajni sintte ra para ngain chojni que sincheoenhe ra, sino nchehe ra jian cain nchanho para jamé sicon jehe na ná ejemplo.

⁴ Jamé sinchehe ra para que are tsí Jesucristo, jaha ra sayehe ra ná premio anto jian, que xonhi tiempo ndatsjexin.

⁵ Jamé jaha ra cai, xo xa tsjeha nano chonda ra, ditticaon ra tti ttonha dachichjan que chonda tsje nano. Cainxin ra chonda ra que sitticaon chó ra naná ra conixin jian ansean ra. Ixin ndacho ngain tti jitaxin Palabré Dios: Dios toñao ngain chojni orgulloso, pero jehe ttjenguijna tti chojni que xaxaonha ixin jehe chojni anto jian.

⁶ Mexinxin dintteha ra orgulloso ngattoxon con Dios para que jehe sinttasayaha ra are jehe sinchejuzguehe ngoi mundo jiji.

⁷ Ndache ra Dios cainxin joachjaon que jaha ra chonda ra ixin jehe cain tiempo jinda ra.

⁸ Xaxaon ra jian cainxin tiempo co dintte ra listo ixin inchínji tti ningaonha ra rridehe xá ná coleón que anto jitoñao co rrittjé va chojni para nasoexon va.

⁹ Jaha ra sinttaxaonha ra inchínji, sino que dintte ra jian ngain tti jaha ra ditticaon ra ixin noa na que cainxin chojni que ditticaon Jesucristo ngoixin mundo tedetan na tangui inchin jaha ra.

¹⁰ Pero después que jaha ra setan ra tangui nchion tiempo, Dios sinttachjian jaha ra chojni jian que rrochondaha ni ná cosa jianha, co jehe sinttachjian jaha ra chojni soji co seguro de ngain tti ditticaon ra. Co xajeho Dios mé tti anto nttanchaon na jai, vayá na para que ján na sontte na tti jí glorié jehe para cainxin tiempo; ján na conixin Jesucristo.

¹¹ Co jehe Dios tti jiquininxin para cainxin chojni sinchesayehe na jehe co jehe tti rrochonda cainxin joachaxin para cainxin tiempo. Amén.

Ntitihi joexinxin joajné Pedro

¹² Silvano, tti janha datsoan que jehe cainxin tiempo ditticaon Jesucristo, jehe tti cjin palabrana ngain carta jiji. Co ngain carta jiji janha rrichjaha ra consejo co rrindattjo ra seguro que cain tti jian que jaha ra vayehe ra, mé tjagoa na ndoa que Dios rinao na ján na. Nchehe ra sigue ditticaon ra jiji cainxin tiempo.

¹³ Cain chojni que ditticaon Jesucristo, nite ngain ciudad de Babilonia, tti ni Dios coinchiehe inchin coinchiaha jaha ra, cain chojni mé rroanha na joajna nganji ra. Co cai Marcos, tti rinaho inchin xanhna, jehe rroanha joajna nganji ra cai.

¹⁴ Chjehe chó ra joajna jian inchin nchehe ra ngain xanchó ra.

Cainxin jaha ra xo ditticaon ra Jesucristo, Dios rochjá ra tti çhjoin que tsonohe ansean ra. Amén.

Yoxin Carta Que Dicjin Pedro

Pedro rroanha joajna para ngain chojni que ditticaon Jesucristo

¹ Janha Pedro na, janha ná ninchehe xé Jesucristo. Co cai janha ná representanté jehe. Janha rricjin na carta jihi para ixin nganji jaha ra xo chonda ra ná fe anto çhjoin inchin janha na. Jamé ixin Dios co Jesucristo, tti chonda cain joachaxin, nchehe inchin jiquininxin.

² Dayehe ra tsje tti jian que tixin de ngain Dios co tti çhjoin que tsonohe ansean ra, ixin jaha ra chonxin ra tti rinao Dios co Jesucristo, tti chonda joachaxin para ixin ján na.

Quexén sinchehe chojni que ditticaon Jesucristo

³ Dios çhjá na de ixin joachaxín jehe cain tti rrogondá na ngain vidá na, co cai para sonttosayehe na jehe ixin dotticaon na Jesucristo, tti vayá na ján na de ixin joachaxín jehe co de ixin tti tsje cosa jian que jehe joinchehe.

⁴ De ixin cayoxin cosa jihi jehe çhjá na tsje cosa jian co rentte para que de ixin jehe cosa jian jihi, jaha ra nchao sintte ra inchin Dios cointtoexin sehe chojni desde are joinchehjian saho xí nttihi ngataha nontte co satsinguehe ra cain cosa jianha que xaxaon chojni jai.

⁵ Mexinxin jeoha sitticaon ra Jesucristo, cai chonda ra que sinchehe ra jian; co de jian, cai chonda ra que jian tsinxin ra tti coetonha Jesucristo;

⁶ co are otsinxin ra jian tti coetonha Jesucristo, chonda ra que tsetonhe ra cuerpoa ra, co de yá cai chonda ra que rrochonda ra paciencia; co de paciencia, cai chonda ra que sinchesayehe ra Dios,

⁷ co de ya, cai chonda ra que rrottjoehe co sinao chó ra jaha ra xo ditticaon ra Jesucristo.

⁸ Si jaha ra nchehe ra cain cosa jihi icha co icha, vidá ra anto jian sehe, co jeha jamaoncoa vitticaon ra Jesucristo, tti chonda joachaxin para ixin ján na.

⁹ Pero tti chojni que ncheha cain cosa jihi, chojni mé te inchin tti chojni que diconha, o inchin tti chojni que diconha jian. Chojni mé ndatjañehe ixin oxenga hna cain cosa jianha que jehe joinchehe are saho.

¹⁰ Mexinxin hermanos, onchao que Dios ovayaha ra co ocoinchiaha ra, ttjiho ra cuidado para que sincheha ra cosa jianha, co si jaha ra tsjiho ra cuidado jihi xonhi tiempo rrotjañaha ra tti ditticaon ra.

¹¹ Co solo jamé nchao sayehe ra jie joachaxin para sixinhi ra co sintte ra para cainxin tiempo ngain lugar tti ttonha Jesucristo, tti chonda cain joachaxin para ixin ján na, co tti cjoenguijna na para xonhi castigo rrochonda na de ixin cain cosa jianha que jointtoho na.

¹² Mexinxin janha sinttaha sigue de sinttaxaxaon ra cain cosa jihi, masqui jaha ra onoha ra co te ra jian de ngain tti ndoa que jaha ra chonxin ra.

¹³ Janha tonona que jian ixin jaxon que xa rrichon janha rronichjaha ra para rronhattjo ra cain consejo jihi.

¹⁴ Jesucristo, tti chonda joachaxin para ixin ján na, ojoinchenona que atto toin janha chonda que tsinttoa vida jihi.

¹⁵ Pero janha sinttaha lucha de sinttacoanha ra cain cosa jihi para que después de janha ndasenne na jaha ra xa rroxaxaon ra cain cosa jihi.

Canxion chojni que vicon ixin Jesús anto tsje joachaxin chonda

¹⁶ Tti janha na jointtacoanha ra de ixin que xén joí Jesucristo co de ixin tti joachaxin que jehe chonda, mé jeha ná cuento que jeha chojni joinchechjian, ixin mé janha na conixin jmacon na viconxin na tti anto tsje joachaxin que jehe chonda.

¹⁷ Janha na vicon na are Dios Ndo dá na joinchesayehe Ndo jehe co chjé Ndo chíxo de jehe Ndo. Co de ngajni ndačoxin ndo: “Jihi tti Xanhna que janha anto rinaho co de ixin jehe Xan janha anto chahna.”

¹⁸ Janha na mismo coian na palabra yá que joixin de ngajni are janha na tatequinha na Jesucristo ngagaha tti jna santo.

¹⁹ Cai chonda na iná cosa icha seguro, co mé tti joajné Dios que dicjin cain profeta. Jaha ra jian nchehe ra ixin nchehe ra caso joajna mé ixin joajna mé inchin ná lámpara que nchengasán are naxin xehe hasta que nchanho rročhinhi, co Jesucristo tti inchin conotse jie que činhi are ndoyo para nchengasán ngain ansean ra.

²⁰ Pero saho xaxaon ra cain cosa jihí que janha rrondačjan: que ni ná profeta que dicjin ngain tti jitaxin Palabré Dios rrocjinha si Dios rrocjenguijnaha.

²¹ Ixin xonhi tiempo ná profeta dicjin inchin jeha xaxaon; sino que Espíritu Santo tti vanchenohe na quehe vacjin na ixin Dios coinchiehe chojni mé para nichja na de ixin jehe.

2

Tti chojni que nhecoenhe icha chojni cosa que jeha ndoa (Judas 4-13)

¹ Pero cai ngayé chojni Israel vintte profeta que vanichja cosa que jeha ndoa. Co jamé cai ngayaha ra te chojni que ndačo ixin nttacoanha ra cosa de Dios, pero jeha ndoa tti jehe na ndačo na. Ixin de ngacjan palabra mé jehe na jimao nttacoanha ra na cosa jianha ixin jehe na mé isitticaonha na Jesucristo tti cjoenga hna para cain cosa jianha que nchehe na. Co mexinxin anto daca ndasinchetján almé na.

² Co tsje chojni sitticaon na tti ndoaha que ndačo chojni mé, co de ixin causexin jehe na icha chojni rronichja feo de ixin tti jian joajné Jesucristo.

³ Co chojni mé anto rinao na tomi, mexinxin sinttacoanha ra na cosa ndoaha para sachaxin na tomi nganji ra. Pero Dios osé ndačo ixin jehe na sayé na ná castigo soji, co otsí nchanho que jehe na seguro sayé na castigo mé.

⁴ Dios joinchetjañeha tti cain ángel que joinchehe jianha ngain Dios, sino que Dios rroanha cain ángel mé para ngain infierno co nttiha tečoaxin cain ángel mé conixin cadena ngain tti naxin xehe. Co Dios coenchjinha cain ángel mé nttiha hasta are tsí tti nchanho que Dios sinchejuzgá cain.

⁵ Ni cai joinchetjañeha Dios tti chojni que vinttechon are osé, rročo tiempo are vechon Noé. Dios rroanha jinda ngoixin nontte para joinchetján cain chojni jianha co Dios joinchexehe jeha Noé conixin yáto chojni Noé. Noé venha are mé ixin jehe joinchehe jian co vandache tsje chojni ixin rrojinchehe na jian cai, pero jehe na vitticaonha na.

⁶ Co cai Dios cjoaga ciudad de Sodoma co Gomorra. Che cayoi ciudad mé hasta que cjan ciudad joxon nttéso. Jamé conhe para que cain chojni hasta tiempo jihí rrochonxin na quehe tonhe tti chojni que nchehe jianha.

⁷ Pero Dios joinchexehe Lot de ngain ciudad Sodoma ixin jehe cjoí xian para ixin Dios, co feo vaconohe are vaguicon cain cosa jianha que vanchehe tti icha chojni de ngain ciudad mé.

⁸ Cainxin nchanho que jehe xí xian mé vehe ngayé na, anto feo vaconohe ansén xa are vaguicon xa co are vaquinhi xa cain cosa jianha que vanchehe cain chojni mé.

⁹ Jañá noa na que Dios nchao sinchexehe de ngain castigo cain chojni que ditticaon palabré jehe. Pero cain chojni jianha jehe sinchegayé na castigo ngain tti nchanho que jehe sinchejuzgá.

¹⁰ Dios icha sinchecastigá tti chojni que cainxin tiempo puro xaxaon sinchehe cosa jianha co ncheha na caso tti coetonha Jesucristo, tti chonda cain joachaxin. Jehe na terco na co chintto na, co xaaonha na para nichja na feo ngain tti chonda icha joachaxin para ixin jehe na.

¹¹ Ni cain ángel de Dios, masqui jehe chonda anto tsje fuerza co joachaxin, pero jehe xaaon para tsjanguihi chojni jianha conixin palabra feo ngain Dios, masqui chojni mé xonhi joachaxin chonda inchin ángel.

¹² Pero chojni jianha mé inchin coxígo que xonhi joarrixaon chonda va co nchehe va jehó inchin rinao cuerpoe va. Co doan va para que iná chojni tse va co nadoenxon va. Jamé tonhe cain chojni mé. Jehe na nichja na jianha de ixin cosa que jehe na ttinxinha na. Mexinxin jehe na sintteguenhe na inchin denhe cain coxígo mé.

¹³ Jehe na jamé soan na sufrido ixin jehe na jamé joinchesufrí na icha chojni. Jehe na tonohe na anto chjoin are nchehe na cosa jianha que jehe na rinao na. Co cain mé ná joasoaxin co ná cosa feo para ixin jaha ra are jinttecoho ra na ixin nchehe na cosa feo para ncheyexin na icha chojni.

¹⁴ Cain nchí que jehe na dicen na puro xaxaon na de rrotsontaonxin na ncha. Tonchjenha na de nchehe na cosa jianha. Co ncheyehe na chojni que xa antoha xian ditticaon Jesucristo, co anto chonxin na quexén sincheyehe na icha chojni para sachaxin na tomi. Chojni mé chonda que sayé na castigoe Dios.

¹⁵ Jehe na noeha na ttinó rridintte na ixin vachjenda na de ngain nttiha nao. Jehe na rroé na ejempleo tti profeta que vinhi Balaam, xitsihi ná tti vinhi Beor. Jehe profeta mé joinao rrogachaxin tomi conixin cosa jianha.

¹⁶ Co jehó colochoe nichja va inchin chojni para joinchesattehe va jehe ixin vanchehe cosa jianha. Co jehe tti nichja colochó mé icoanchjandaha profeta mé para joinchehe cosa jianha que jehe xaxaon rrojinchehe ngain nchanho mé.

¹⁷ Cain chojni mé inchin tti pozo que xonhi jinda teria, co inchin ttjoi que roganjo chin pero chintto sadicao ttjoi. Dios ondacho ixin cain chojni mé para cainxin tiempo sintte na ngain infierno tti anto naxin xehe.

¹⁸ Jamé ixin nichja na palabra orgulloso que xonhi xé, co de ixin tti jianha que nchehe na, co de ixin tti jianha que xaxaon na, jehe na ncheyehe na icha chojni que nandá vachjeyexin de ngayé cain chojni jianha mé.

¹⁹ Chojni jianha mé ndache na icha chojni que si xonhi sitticaon na, ni ley de Dios, ni iná regla jamé jehe na sintte na ngain ná vida libre. Pero jehó na mismo te na inchin esclavo de ngain vida jianha. Ixin cada chojni te inchin esclavo de ngain quexehó cosa jianha que ttetonha ngain vidé.

²⁰ Co cain chojni que oditticaon Jesucristo, tti chonda cain joachaxin tti cjoengujna na para rrochondaha na castigo de ixin tti jianha que nchehe na, chojni mé ovachjeyexin de cain cosa jianha que jí ngain mundo jiji. Co

si después, jehe na xa rrocjan na sinchehe na cosa jianha mé iná, jehe na rrocjan sintte na chojni icha jianha que are saho.

²¹ Ixin si después de vatsoan na joajné Jesucristo, jehe na cjan na joincheha na caso tti ttetonha Jesucristo ngain na, icha jian para ixin jehe na si rrogatsoanha na joajna mé.

²² Pero jañá nchehe na para que de jehe na doan cumple tti dicho ndoa que ndačo: “Conia cjan va jine va tti toncjan va. Co cocochi que ttjexin tsinda va, cjan va ttingariacjan va ndanchetjaho.”

3

Are tsí Jesucristo iná

¹ Hermanos, jiji tti yoxin carta que janha cjin na nganji ra. Co ngain cayoi carta jiji janha rinaho que jaha ra rrořaxaon ra jian de ixin consejo que janha rrindattjo ra.

² Xaxaon ra tti ndačo cain profeté Dios are saho, co tti coetonha Jesucristo ngain representanté jehe, para que representante mé jointtacoanha ra jaha ra tti coetonha Jesucristo, tti chonda cain joachaxin co tti danjo iná vida naroaxin ngain chojni.

³ Janha rinaho que anto jian tsonoha ra cosa jiji: que are ochian tsí nchanho que Jesucristo tsí iná, sintte chojni que tsjanao cosa de Dios, co sinchehe na cainxin cosa jianha que jehe na rrořaxaon na.

⁴ Co are mé jehe na sanchiangui na co rrondačo na: “¿Cja tti ndačo Cristo ixin jehe rroquí iná? Pues de tiempo que ndavenhe cain nigoelitoa na xančhjen co hasta jai cain nchanho xajeho inchin desde are nacoexinxon vehe mundo.”

⁵ Chojni mé jamé rrondačo ixin rinaoha na tsonohe na que ngain tiempo icha sé Dios joinchechjan ngajni co nontte, co de ngangui jinda čhinxin nontte, co de ixin jinda cain cosa jichon.

⁶ Cai de ixin jinda joinchetjanxin Dios mundo are saho.

⁷ Pero ngajni co nontte que jí jai, Dios jittenchjinha para que rroche conixin xohi, ixin Dios jamé ttetonha. Co jehe xohi mé tti tsjaga ngajni co nontte ngain tti nchanho are Dios sinchejuzguehe cainxin chojni, co are mé Dios sinchetján cainxin chojni jianha.

⁸ Co tjañaha ra, hermanos, que para ixin Jesucristo, tti chonda cain joachaxin, para ixin jehe, ná nchanho inchin mil nano, co tti mil nano inchin nacoa nchanho para ixin jehe.

⁹ Jaha ixin jehe jitončhjenhe para sinchexin tti jehe ndačo, inchin xaxaon canxion chojni, jaha jamé, sino que jehe chonda paciencia para ixin ján na. Co jehe rinaoha sitján almé ni ná chojni, sino que jehe rinao que cain na sačhenda na de ngain cosa jianha.

¹⁰ Pero nchanho are Jesucristo tsí iná, nchanho mé ni ná chojni rrořaxaonha ixin quesa tsí nchanho mé, inchin are tti ná tti chehe are ttie. Cottimeja ngajni rroxantte de ixin ná ruido anto soji que tsinhi ni, que cainxin chojni rrořaon na. Co cain cosa que docon na ngajni rroche conixin xohi, co nontte rroche nontte conixin cainxin cosa que ji ngataha nontte.

¹¹ Jañá sitjanxin cainxin cosa, mexinxin jaha ra chonda ra que sintte ra chojni jian que Dios rinao, co sinchesayehe ra jehe.

¹² Chonhe ra tti nchanho que tsí Dios co tsjehe ra queřen nchehe ra para que nchanho mé icha daca tsí nchanho. Ngain nchanho mé ngajni rroche conixin xohi co cain cosa que docon na nttiha satanga conixin neje xohi.

¹³ Pero ján na rrochonhe na tti ngajni naroaxin co tti nontte naroaxin tti ndačo Dios que rrochjá na, co ngain nontte mé sehe cainxin inchin jiquinixin, co jian.

¹⁴ Mexinxin, hermanos, jai que xa techonhe ra cain cosa jiji, ttjiho ra cuidado que xonhi cosa jianha nchehe ra para que are tsí Dios, xonhi cosa jianha techonda ra ngain vidá ra co para que ansean ra čhjoin tsonhe cai.

¹⁵ xaxaon ra jian que ixin tti paciencia que jichonda Jesucristo jai para ixin ján na, mé para que ján na tsentoxinhi na vidá na para que jehe nchao tsjengujna na para que xonhi castigo rrochonda na de ixin tti jianha que jointtoho na. Jańá dicjin Pablo nganji jaha ra cai. Jehe cjin palabra que joanjo Dios ngain jehe.

¹⁶ Cainxin carta que jehe dicjin, jehe dindattjo ra de ixin cain cosa jiji, masqui te parte nchion tangui para tsinxin ra. Co tti chojni que rinaoha tsinxin cosa jiji, co tti chojni que xa antoha jian ditticaon Cristo, jehe na daca ttentoxinhi na sentido de ixin quehe rročo jiji co nchehe na inchin jehe na xaxaon na, jańá inchin jehe na ttentoxinhi na canxion parte de ngain tti jitaxin Palabré Dios. Jamé jeha na ttjé na tti sitjanxin almé na.

¹⁷ Mexinxin, hermanos, jaha ra que onoha ra cain cosa jiji, ttjiho ra cuidado que xonhi chojni jianha sinttayaha ra. Si nahi, puede sinchehe ra inchin jehe na nchehe na co ndarroťjańaha ra tti ditticaon ra Cristo.

¹⁸ Pero jaha ra ditticaon ra icha jian ngain Jesucristo, tti chonda cain joachaxin para ixin ján na co jehe tti danjo iná vida naroaxin nganji na ján na, co xago ra ngain Jesús co jehe tsjagoha ra quexén jehe anto rinao ra jaha ra. ¡Co jehe tti jiquinixin que cain chojni sinchesayehe na jehe jai co para cainxin tiempo! Amén.

Saho Carta que Dicjin Juan

Jesucristo dinhi: Palabra que chjé chojni vida

¹ Janha rricjinha jaha ra de ixin jehe tti ovehe are cainxin coexinhi. Janha na coian na tti ndačo jehe co vicon na jehe conixin jmacon na, co janha na tsjá na co catte na conixin rana na. Co jehe mé tti dinhi Palabra que chjé chojni vida.

² Palabra jihi cononxin para joatsoan ni co mé tti chjé ni vida. Co janha na vicon na co ndačhjan na que ján ndoa que jehe Palabra mé cononxin. Co janha na nttanoha ra jaha ra de ixin jehe tti danjo iná vida naroaxin que xonhi tiempo tsjexin. Co jehe vehe ngain Ndođa na ngajni co después cononxinna na.

³ Janha na ndattjo ra jaha ra tti janha na vicon na co tti janha na coian na para que jaha ra rroché ansean ra inchin janha na ché ansenna na ixin ján na ndoa te na ngain Dios tti Ndođa na co ngain Xenhe Ndo que mé Jesucristo.

⁴ Jańá remé, rricjinha ra cain cosa jihi para que ansean ra anto rroché.

Dios jehe joadingasán

⁵ Tti joajna ndoa que Jesucristo cjoagohna na, mé tti janha na rrindattjo ra jaha ra jaxon. Co joajna mé ndačo ixin Dios jehe tti joadingasán, co ngain jehe xonhi naxin xehe jí.

⁶ Si ndačo na ixin te na ngain jehe co xajeho tiempo ján na te na ngain tti naxin xehe, ján na ndoaha tti ndačo na co cai xonhi xé tti nttoho na.

⁷ Pero si ján na te na ngain joadingasán, jańá inchin Dios jí ngain joadingasán, jańá sotticaon chó na cain na co jni Jesucristo Xenhe Dios, jni mé jni nttaroa ján na de cainxin tti jianha que jointtoho na.

⁸ Si ndačo na ixin xonhi jianha jointtoho na, ján na nttoyaxon na co jeha ndoa que ján na dotticaon na tti jian joajné Jesucristo.

⁹ Pero si ttendoenhe na ñao na tti jianha que nttoho na, nchao rrochonda na confianza ngain Dios que jehe sinchehe inchin jiquininxin; rročo que jehe sinttatjańa na tti jianha que ján na jointtoho na co sinttaroa na de cainxin cosa nchaoha.

¹⁰ Pero si ndačo na ixin xonhi jianha jointtoho na, jańá inchin rrondačo na que Dios jehe ncheyaxon co ndoaha que dotticaon na tti jian joajné jehe.

2

Jesucristo tti abogadoa na

¹ Jaha ra inchin xannchinnchinchjanhna que anto rinaho ra, co rricjin na cain cosa jihi para ixin jaha ra para que xonhi jianha sinchehe ra. Pero si čhonja ra sinchehe jianha, chonda na ná xiabogado ngattoxon con Ndođa na, co xiabogado mé jehe Jesucristo, co xonhi tiempo jehe joinchehe jianha.

² Co de ixin jehe Jesucristo cain cosa jianha que jointtoho na vitjańá na, co jeoha tti jianha que ján na nttoho na, cai cainxin tti jianha que nchehe cainxin chojni ngoixin mundo vitjańehe na cai.

³ Si dotticaon na tti ttetonha Dios, jamé conoa na que joatsoan na jehe.

⁴ Pero si čhonja chojni ndačo: “Janha chonxin jehe”, co ditticaonha tti ttetonha Dios, chojni mé ncheyaxon co ndoaha tti jehe ndačo.

⁵ Co tti chojni que nchehe inchin ttetonha Dios, chojni mé ndoa anto rinao Dios. Mexinxin jamé noa na que te na conixin jehe si ján na anto rinao na Dios.

⁶ Co chojni que ndačo ixin jehe jí conixin Dios, chojni mé chonda que sinchehe jian inchin Jesucristo.

Juan ncheᵑaxaon chojni de ixin cosa naroaxin que Jesucristo cjoago

⁷ Hermanos, janha ᵑonhi cosa naroaxin rritetonha ra ngain carta jihi, ixin mé ᵑajeho tti vitonha ra are nacoexinxon ra vitticaon ra. Co mé tti coinhi ra desde are mé.

⁸ Pero masqui jamé, tti janha rricjinha ra jehe inchin ná cosa naroaxin que ditonha, ixin Jesucristo tti saho cjoago cosa jihi co jai jaha ra tjago ra cosa jihi cai ngain vidá ra. Rročo que inchin iᵑonhi naxin xehe jí nganji ra ixin Jesucristo joinchengasán ngain ansean ra.

⁹ Si ᵑonja chojni ndačo que jehe jí ngain joadingasán, pero si jehe ningaconhe icha chojni que ditticaon Jesucristo, jehe ᵑa jí ngain tti naxin xehe.

¹⁰ Pero tti chojni que rinao icha chojni que ditticaon Jesucristo, jehe jí ngain tti joadingasán co chondaha ni ná cosa para que jehe sinchehe jianha.

¹¹ Pero tti ningaconhe ná de tti chojni mé, jehe jí co rridehe ngain tti naxin xehe, co noeha ttinó rridehe ixin jehe que ningaconhe iná chojni ᵑoha dicon nttié Dios.

¹² Jaha ra ᵑo nandá vitticaon ra ngain Jesús, janha rricjin nganji jaha ra que por ixin Jesucristo Dios jointtatjañaha jaha ra tti jianha que joinchehe ra.

¹³ Cain jaha ra que osé vitticaon ra Jesús, janha rricjinha nganji ra ixin ojoatsoan ra jehe tti ovehe are cainxin coexinhi vehe. Co jaha ra ᵑo ᵑa seha vitticaon ra, janha rricjin ngajni ra ixin jaha ra nchao coixinha ra ngain inchínji.

Janha cjinha jaha ra ᵑo nandá vitticaon ra ixin ojoatsoan ra Dios Ndoá na.

¹⁴ Co janha cjinha jaha ra que osé vitticaon ra Jesús ixin ojoatsoan ra jehe tti ovehe are cainxin coexinhi vehe. Cai cjin na para ixin jaha ra que ᵑa seha vitticaon ra ixin jian ditticaon ra ngain Jesucristo co vayé ra palabré Dios ngain ansean ra, co ixin coixinha ra ngain inchínji.

¹⁵ Janha rritetonha ra que sinaoha ra joxon cosa de ngain mundo jihi. Si ᵑonja chojni rinao joxon cosa de ngain mundo jihi, chojni mé rinaoha na Dios Ndoá na,

¹⁶ ixin ᵑonhi cosa que mundo danjo ttixin de ngain Dios Ndoá na. Cosa mé ttixin jehó de ngain mundo. Rročo que tti jianha que rinao cuerpoé chojni, tti ncheᵑoxinhi jmacon ni para rrochonda ni, co tti anto orgullo que tonohe ni ixin chonda ni tsje cosa, cain jihi tti danjo mundo.

¹⁷ Co mundo ndajittjexin conixin cainxin que rinao ni que jí ngain mundo jihi, pero chojni que nchehe inchin rinao Dios, sechon para cainxin tiempo.

Chojni que nichja ndoa co chojni que nichja ndoaaha

¹⁸ Jaha ra inchin xannchinnchinchjanhna co rrindattjo ra que ochiaon ndatsjexin tiempo. Jaha ra ocoinhi ra que tsí ná chojni que anto rroningaconhe Cristo. Co jai cononxin atto tsje chojni que ningaconhe na Cristo, mexinxin ján na noa na que ochian tsí nchanho que ndatsjexin tiempo.

¹⁹ Cain chojni mé vačhjejexin de ngayá na, pero jehe na jeha ndoa chojnia na na ixin si rrocji na chojnia na rroguittohe na nganji na. Pero jañá conhe para que vicon ni que ndoa chojni mé jeha chojnia na.

²⁰ Pero jaha ra Cristo chjá ra Espíritu Santo, mexinxin cain ra chonxin ra tti ndoa.

²¹ Mexinxin janha rricjin nganji ra ixin chonxin ra tti joajna ndoa que joixin de ngain Dios co nahi ixin chonxinha ra. Co jaha ra noha ra que ní ná cosa ndoaha nchao tsixin de ngain joajna mé.

²² ¿Achonxinha ra quensen jehe tti nichja ndoaha? Jehe mé tti mero ndačho ixin Jesús jeha tti Cristo, tti Dios rroanha ngataha nontte. Chojni mé tti ngingaconhe Cristo ixin ditticaonha na ni Jesucristo ni Dios Ndojá na.

²³ Cainxin chojni que ndačho ixin Jesucristo jeha Xenhe Dios Ndojá na, cai jehe Ndo jiha Ndo ngain na. Pero tti chojni que ndačho ixin Jesucristo Xenhe jehe Ndo, cai chojni mé Ndojá na jí Ndo ngain chojni mé.

²⁴ Mexinxin, ttenchjinha jaha ra ngain ansean ra tti jian joajna que coinhi ra de are nacoexinxon ra vitticaon ra. Co si tti coinhi ra are icha saho sittohe ngain ansean ra, jaha ra cai cainxin tiempo sintte ra ngain Ndojá na co ngain Xenhe Ndo.

²⁵ Co Jesucristo ndačho que jehe rrochjá na iná vida naroaxin que xonhi tiempo tsjexin.

²⁶ Janha cjinha ra cain jiji de ixin tti chojni que rinao nttayaha ra.

²⁷ Pero jaha ra chonda ra Espíritu Santo que Jesucristo chjá ra, mexinxin ixonhi chojni rrogondaha ra para sinttacoanha ra, ixin jeha Espíritu Santo tti sinttacoanha ra cain cosa co tti jehe sinttacoanha ra, mé ndoa co jeha ixin ndoaha. Mexinxin jañá nchehe ra para dintte ra cain ra ngain Cristo inchin nttacoanha ra jehe Espíritu Santo.

²⁸ Mexinxin jaha ra xo xannchinnchinchjanhna, dintte ra cain ra ngain Cristo para que rrochonda na confianza are jehe rroxoago co rrochondaha na joasoaxin ngattoxon con jehe are jehe tsí.

²⁹ Jai que onoha ra que Jesucristo nchehe jian, chonda ra que tsonoha ra cai que cain chojni que nchehe jian, cain chojni mé xenhe Dios.

3

Quexén sinchehe tti chojni que xenhe Dios

¹ Tsjexinxin ra, Dios Ndojá na anto rinao na hasta que ján na nchao dinhi na xenhe Dios, co ján ndoa ján na xenhe Dios na. Mexinxin tti chojni que ditticaonha Jesucristo ttinxinha ti ján na xaxaon na ixin jehe na xa datsoanha na Dios.

² Ján na oxenhe Dios na, co xa xagoaha na quexén sontte na después. Pero noa na que are Jesucristo tsí, ján na sontte na inchin jehe ixin socon na jehe mero inchin jehe jí.

³ Co cain chojni que ditticaon jiji tojian na inchin Jesucristo jehe jian.

⁴ Pero cain chojni que nchehe jianha ditticaonha na tti coetonha Dios, ixin are nchehe ni jianha rročo ixin jehe ni ncheha ni tti coetonha Dios.

⁵ Jaha ra onoha ra que Jesucristo joi ngataha nontte para que cjoenga hna cain tti jianha que ján na jointtoho na co noha ra cai que jehe xonhi jianha joinchehe.

⁶ Mexinxin jañá cain chojni que te ngain Cristo sincheha sigue sinchehe cosa jianha. Pero cain chojni que tenchehe sigue nchehe cosa jianha, chojni mé xa datsoanha na ni ditticaonha na Jesucristo.

⁷ Jaha ra inchin xannchinnchinchjanhna co janha rrindattjo ra que dittoaxinha ra que xonhi chojni sinttayaha ra. Chojni que nchehe jian, chojni mé Dios ndačo ixin jehe na jian na inchin Jesucristo jian.

⁸ Pero tti chojni que tenchehe jianha, chojni mé chojni inchínji ixin inchínji jianha jinchehe desde are nacoexinxon vehe nontte. Co Jesucristo, tti Xenhe Dios jói Xan para joinchexantte Xan tti joinchehe inchínji.

⁹ Ni ná chojni que jehe na xenhe Dios na nchehe na sigue nchehe cosa jianha ixin chonda na iná vida que Dios joanjo ngain na, mexinxin choha sinchehe na sigue sinchehe na cosa jianha ixin jehe na xenhe Dios na.

¹⁰ Nohe ni quexehe chojni xenhe Dios co quexehe chojni tti xenhe inchínji ixin quexeho chojni que ncheha jian, o rinaoha chojni que ditticaon Jesucristo, chojni mé jeha chojni Dios.

Xo dotticaon na Jesucristo chonda que sinao chó na

¹¹ Tti joajna ndoa que jaha ra coinhi ra are nacoexinxon ra vitticaon ra ročo jiji: que chonda na que sonao chó na naná na.

¹² Chondaha na que sontte na inchin Caín que mé chojni inchínji co nagoexinxon xanchó. ¿Co quedonda nagoexinxon xan? Ixin tti vanchehe Caín, mé jianha, co tti vanchehe xanchó mé jian.

¹³ Hermanos, xaonha ra si rroningaconha ra chojni que ditticaonha Jesucristo.

¹⁴ Ján na donao na cain chojni que ditticaon Jesucristo inchin xanchó na, co jiji tjago ixin ovattohe na tti ndadenhe ni co jai chonda na iná vida naroaxin. Pero tti chojni que rinaoha icha chojni que ditticaon Jesucristo, chojni mé xa ndadiguenhe de ngain espirítue na.

¹⁵ Cainxin chojni que ningaconhe icha chojni, chojni mé Dios ndačo ixin xajeho inchin tti chojni que nadoexinxon chojni. Co jaha ra noha ra que ni ná tti nadoexinxon chojni chonda iná vida naroaxin que xonhi tiempo tsjexin.

¹⁶ Ján na chonxin na quexén Jesucristo rinao na ján na ixin jehe joanjo vidé para ixin ján na. Co jaña cai ján na chonda na que sonao chó na naná na co si nchao hasta sanjo na vidá na para ixin chojni que ditticaon Jesucristo.

¹⁷ Si ná ni chonda ni tti rrondehe ni para sinttechonxin ni co sicon ni ná chojni que ditticaon Jesucristo rrondehe na, co si jehe ni tsiaconoeha ni na ¿quexén nchao jehe ni rinao ni Dios ngain ansén ni?

¹⁸ Jaha ra inchin xannchinnchinchjanhna co janha rritetonha ra que chondaha na que jeha rrondačo na conixin rroha na ixin sonao na chojni, sino que rrochonda na que tsjenguijna na para jamé seguro ndoa donao na chojni.

Quexén chojni nchao rrochonda confianza ngattoxon con Dios

¹⁹ Jaña, para que nchao tsonoa na que ján na tti nichja na tti ndoa, co jamé sontte na seguro ngattoxon con Dios.

²⁰ Co masqui puede ansean na tsjanguia na ná cosa, pero Dios icha jie joachaxin chonda que ansean na co jehe nohe cainxin.

²¹ Co si ansean na xonhi tsjanguia na, ján na rrochonda na confianza ngattoxon con Dios,

²² co jehe rrochjá na cainxin tti sanchiehe na ixin dotticaon na tti jehe tettonha co nttoho na tti nchexoxinhi Dios.

²³ Co janhi tti jehe tettonha: que sotticaon na ngain Jesucristo Xenhe jehe Dios co ixin sonao chó na naná na inchin jehe Jesucristo ocoetoan na.

²⁴ Tti chojni que ditticaon tti coetonha Dios, chojni mé te na ngain jehe co jehe jí ngain jehe na. Noa na que jehe jí nganji na ixin chonda na Espíritu Santo que jehe chjá na.

4

Espíritu Santo co tti espíritu que ningaconhe Jesucristo

¹ Hermanos, dacaha ditticaon ra cain tti chojni que ndačo ixin tti jehe na ndačo na mé joajna que joixin de ngain Dios, sino que saho ttjiho ra cuidado para sicon ra si chojni mé chonda Espíritu Santo que ttixin de ngain Dios o ni nahi. Ixin ngoixin nontte ndajicaon de chojni jianha que ndačo ixin jehe na nichja na de ixin Dios pero ndoaha.

² Pero janhi sinchehe cain chojni que chonda Espíritu Santo que ttixin de ngain Dios para que jaha ra nchao rrochonxin ra: cain chojni que datsoan na co ndačo na ixin Jesucristo are jehe jói jehe joigoan ná xí, chojni mé chonda na Espíritu Santo que ttixin de ngain Dios.

³ Pero tti chojni que datsoanha que Jesús cjoí ná xí, chojni mé chondaha na Espíritu Santo que ttixin de ngain Dios, sino que chojni mé chonda tti espíritu que ningaconhe Cristo. Jaha ra ocoinhí ra que espíritu mé chonda que tsí, co jai espíritu mé ojí ngataha nontte.

⁴ Jaha ra inchin xannchinnchinchjanhna, co jaha ra chojni Dios co coixinha ra ngain cain chojni mé ixin Espíritu Santo que jí nganji ra chonda icha joachaxin que tti espíritu que jí ngain chojni que ditticaonha Jesucristo.

⁵ Chojni mé jecho chojni de ngataha nontte, co mexinxin tjago na cosa que joxon chojni xaxaon, co icha chojni que ditticaonha Jesucristo nchexoxinhí na ttinhi na cosa mé.

⁶ Pero ján na chojni Dios, co tti chojni que chonxin Dios ttinhi na tti ndačo ján na. Pero tti jeha chojni Dios, nimé ttinha na tti ndačo ján na. Co jañá, nchao satsoan na quexehe chojni chonda tti Espíritu Santo que nichja tti ndoa co quexehe chojni chonda tti espíritu que ncheyexon chojni.

Dios anto rinao na ján na

⁷ Hermanos, cain ján na chonda na que sonao chó na naná na ixin tti rinao chó ni ttixin de ngain Dios. Cain chojni que rinao icha chojni, chojni mé xenhe Dios co chonxin na Dios.

⁸ Co tti chojni que rinaoha icha chojni, chojni mé xa chonxinha Dios ixin Dios rinao cain chojni.

⁹ Dios cjoagoa na que jehe rinao na are jehe rroanha tti nacoaxinxon Xenhe ngataha nontte para que ján na rrochonda na iná vida naroaxin de ixin jehe Xan.

¹⁰ Ttinxin na que jeha ján na joinao na Dios, sino que jehe tti joinao na ján na, co mé rroanxin Xenhe para que de ixin jehe Xan cainxin tti jianha que jointtoho na oxenga hna.

¹¹ Hermanos, si Dios joinao na jañá, ján na cai chonda na que sonao chó na naná na.

¹² Xonhi tiempo ná chojni vicon na Dios, pero si rinao chó na naná na, Dios jí nganji na co jamé icha sonao chó na inchin Dios rinao na.

¹³ Dios chjá na Espíritu Santo, mexinxin ján na chonxin na que Dios jí nganji na co ján na te na ngain jehe.

¹⁴ Co janha na vicon na, co ndachjan na que Dios Ndodá na rroanha Ndo Xenhe Ndo para que danjo Xan iná vida naroaxin ngain cainxin chojni ngoixin nontte.

¹⁵ Quexeho chojni que datsoan co ndačo ixin Jesús ján Xenhe Dios, chojni mé jí ngain Dios co Dios jí ngain jehe cai.

¹⁶ Co jañá ján na noa na co dotticaon na que Dios rinao na. Co Dios mé tti rinaonxin chó na co tti chojni que cainxin tiempo rinao icha chojni, chojni mé jí ngain Dios co Dios jí ngain chojni mé.

¹⁷ Jañá ján na rinao na icha chojni inchin Jesucristo rinao na ján na para que ján na rrochonda na confianza are tsí tti nchanho que Dios sinchejuzguehe cain chojni. Ixin ján na te na ngataha nontte jihi co donao na icha chojni inchin joinchehe Jesucristo are jehe nttihi ngataha nontte.

¹⁸ Dios anto rinao na ján na co si ján na rinao na Dios, xonhi joaxaon rrochonda na. Ixin si ndoa rinao na Dios choha rrochonda na joaxaon ixin Dios joantsje cain joaxaon que vonttechonda na. Si chonja chojni chonda joaxaon rročo que ixin jehe joinchehe cosa jianha co xagoen castigoe Dios, ixin si xagoen ni Dios, mé ixin xa antoha jian rinao ni Dios.

¹⁹ Ján na rinao na Dios ixin jehe tti joinao na ján na saho.

²⁰ Pero si chonja chojni ndačo: “Janha rinaho Dios”, co xajeho tiempo ningaconhe na iná chojni que ditticaon Jesucristo, chojni mé ncheyaxon. Ixin si ná ni rinaoha ni iná chojni que ditticaon Jesucristo que ovicon ni, mexinxin ¿quexén sinao ni Dios tti xonhi tiempo vicon ni?

²¹ Jehe Ndo coetoan na Ndo jihi: que tti chojni que rinao Dios cai chonda que sinao icha chojni que ditticaon Jesucristo.

5

Quexén ján na nchao tsixian na ngain cosa jianha

¹ Cain chojni que ditticaon que ixin Jesús tti Cristo que Dios rroanha ngataha nontte, chojni mé xenhe Dios. Co si sinao ni ná ndodaha, cai rinao ni xenhe ndodaha mé.

² Mexinxin si rinao na Dios co nttoho na tti jehe ttetonha, noa na que cai rinao na cain xenhe Dios, rročo cain chojni que ditticaon ngain Jesucristo.

³ Ixin si rinao ni Dios, chonda que sitticaon ni tti jehe ttetonha, co tti jehe tettonha tanguiha,

⁴ Ixin cainxin chojni que xenhe Dios nchao tsixinhi na ngain cosa jianha ngataha nontte. Co tti confianza que ján na chonda na ngain Jesucristo, mé tti jointtagacha na de cain cosa jianha que jí ngataha nontte.

⁵ Co jeho chojni que ditticaon ixin Jesús Xenhe Dios nchao tsixinhi ngain cain cosa jianha mé.

Tti ndačo Juan de ixin Jesucristo Xenhe Dios

⁶ Jesucristo joiguite ngain jinda co vinttji jní are ndavenhe, jañá para cjoagoe chojni ixin Dios tti rroanha jehe. Jeoha cjoago mé are joiguite, ixin cai cjoago mé are vinttji jní co ndavenhe. Co Espíritu Santo tti ndačo ján que ixin Dios rroanha Jesucristo, co Espíritu mé tti ndoa.

⁷ Ngajni jí ní tti ndačo ján de ixin cain jihi: Ndodá na, co Jesucristo tti dinhi Palabra, co Espíritu Santo, co canio jihi inchin jeho naoa.

⁸ Co cai jí ní ngataha nontte que ndačo ján de ixin cain jihi: Espíritu Santo, jinda, co jni, co canio jihi ndačo xajeho.

⁹ Ján na dotticaon na tti ndačo chojni, pero tti ndačo Dios icha rentte, mexinxin chonda na que sotticaon na tti ndačo Dios de ixin Xenhe.

¹⁰ Co tti chojni que ditticaon ngain Xenhe Dios, chojni mé ditticaon ngain ansén tti ndačo Dios de ixin Jesús, pero tti ditticaonha jamé, jehe ncheguini Dios inchin ná tti nichja ndoaha ixin chojni mé ditticaonha tti ndačo Dios de ixin Xenhe Ndo.

¹¹ Janhi tti ndačo Dios: que de ixin Xenhe, jehe Dios chjá na iná vida naraoxin que xonhi tiempo tsjexin.

¹² Chojni que ditticaon Xenhe Dios cai chonda na jehe vida naraoxin jiji, pero tti chojni que ditticaonha Xenhe Dios, chojni mé chondaha vida naraoxin.

Juan ttjexin carté co danjo icha consejo

¹³ Janha rricjin nganji jaha ra xo ditticaon ra ngain Jesucristo, para que noha ra jian que ixin chonda ra iná vida naraoxin que xonhi tiempo tsjexin.

¹⁴ Ján na chonda na confianza ngain Dios ixin noa na que si sanchiehe na quexeho cosa inchin jehe rinao, jehe tsinhi quehe sanchiehe na.

¹⁵ Co jańá inchin noa na que Dios ttian na tti ján na danchiehe na jehe, cai noa na que orrochonda na tti joanchiehe na.

¹⁶ Si čhonja chojni sicon que ná chojní Cristo jinchehe ná cosa jianha, pero cosa mé jiquininxinha para que Dios rrorroanha castigo de ndasitján almé chojni mé, chojni que sicon jamé chonda que sinchetsenhe ñao Dios para ixin chojni que jinchehe cosa jianha mé, co Dios sanjo iná vida naraoxin para ngain chojni que jinchehe cosa jianha mé, si jeha ná cosa jianha que jiquininxin castigo de ndasitján almé chojni. Jí cosa jianha que jiquininxin para Dios rrorroanha castigo de sitján almé chojni que nchehe cosa mé, co ndačjhanha que sinchetsenhe ni ñao Dios para chojní que nchehe cosa jianha mé.

¹⁷ Cainxin cosa jianha ncheřoxinha Dios, pero te cosa jianha que řa jiquininxinha castigo de sitján almé ni.

¹⁸ Noa na que tti chojni que chonda Dios inchin Ndođé, chojni mé ncheha na sigue nchehe na cosa jianha ixin Xenhe Dios jinda chojni mé co inchínji catteha na.

¹⁹ Noa na que ján na chojní Dios na, pero tti icha chojni que ditticaonha Jesucristo, chojni mé inchínji ttetonhe.

²⁰ Noa na cai que Xenhe Dios joí Xan ngataha nontte para ttjenguijna na Xan para datsoan na Dios tti ján ndoa. Co ján na te na ngain tti mero ndoa, rročo, ngain Jesucristo, Xenhe Dios. Jehe Xan tti mero Dios ndoa co jehe Xan tti chjá na iná vida naraoxin que xonhi tiempo tsjexin.

²¹ Jaha ra xo inchin xannchinnchinchjanhna, ncheha ra caso cain cosa que chojni nchesayehe inchin Dios pero que jeha Dios ndoa. Amén.

Yoxin Carta que Dicjin Juan

Chojni que ditticaon Jesucristo chonda que sinao chó na naná na

¹ Janha tti representante de Jesucristo tti ditticaon jehe de osé tiempo, co cjin na carta jiji para n'chí que ditticaon Jesucristo. Dios coinchiehe n'chí mé conixin xenhe n'cha tti ni janha rinaho ndoa, co jeoha janha, cai cain chojni que joatsoan tti ndoa.

² Rinaho jaha ra de ixin jehe tti ndoa que chonda na ngain ansean na co que sehe nganji na para cainxin tiempo.

³ Dios tti Nnodá na conixin Xenhe, tti chonda cain joachaxin, sinchenchaon nganji ra co tsiaconoaha ra co sanjo ra tti čhjoin que tsonohe ansean ra. Cain jiji sehe nganji ján na que joatsoan tti ndoa co tti rinao chó na.

⁴ Atto chahna janha ixin coian que canxion xanha te xan conforme ngain tti ndoa, jañá inchin Dios Nnodá na coetoan na.

⁵ Co jai, nttatsanha ñao jaha que ján na sonao chó na naná na. Tti rricjinha jiji jeha ná cosa naroaxin que ján na vitoan na, xajeho tti ján na chonda na de are nacoexinxon na gotticaon na.

⁶ Tti rinaonxin chó ni rročo ixin chonda ni que sintte ni inchin coetonha Dios. Inchin ocoini jaha ra de are nacoexinxon na gotticaon na, ján na vitoan na para sonao chó na co sonao na Dios.

Tti chojni que ncheyehe icha chojni

⁷ Ngoixin ngataha nontte čhji chojni que ncheyehe icha chojni co chojni mé datsoanha na ixin Jesucristo tti Dios rroanha ngataha nontte inchin ná xí ndoa co jian. Chojni mé tti niningaconhe Jesucristo, co ncheyehe na icha chojni.

⁸ Jaha ra chonda ra cuidado para que sinchetjanha ra tti joacha ra co jamé jaha ra sayehe ra cain tti jaha ra ojoacha ra.

⁹ Quexeho chojni que ndasitján de ngain tti cjoago Jesucristo, chojni mé ditticaonha Dios, pero tti chojni que sitticaon tti cjoago Jesucristo, chojni mé jí ngain Nnodá na co Xenhe Ndo cai.

¹⁰ Si čhonja chojni sitsjaha jaha ra co ditticaonha jiji, chjeha ra na joachaxin para rronichja na ngain nihngo ni nichjeha ra na inchin nichjehe ra chojni Jesús

¹¹ Ixin tti chojni que rronichjé chojni mé inchin chojni Jesús, jehe tsjenguijna chojni mé para sincheyehe na icha chojni.

Joexin joajné Juan

¹² Chonda atto tsje que rrondattjo jaha ra pero irinaoha sinttaha conixin xón co ndajni ixin janha rrochoan para saso sasotsjaha ra co rronichja na janha co jaha ra para que jamé icha jian rrochá na.

¹³ Ntthi cain chojni que ditticaon Jesucristo, tti chojni que Dios coinchiehe rroanha joajna para ixin jaha. Amén.

Ninxin Carta que Dicjin Juan

Juan nichja jian de ixin ná xí vlnhi Gayo

¹ Janha tti representante de Jesucristo tti ditticaon jehe de osé tiempo, cjin na carta jihi para ixin xiamigona Gayo, tti janha ndoa rinaho.

² Janha danchia Dios que jehe jian sinchenchaon nganji, co ixin xonhi tti tsoniher cuerpoa, jañá para sarihi jian ngain cuerpoa inchin jianxin ansean.

³ Janha atto chahna are joí canxion chojni que ditticaon Jesucristo co coequinna na ixin jaha jian ditticaon Jesús co quexén rridarihi jaha ngain tti ndoa.

⁴ xonhi cosa jí que janha icha rrochananxin jehó tsonona que chojnina te na inchin ndačo tti ndoa.

⁵ Jaha rrihi soji ngain tti jaha rrinchehe ngain quexeho chojni que ditticaon Jesucristo co icha jian ixin jaha ttjenguijna chojni que joixin na de iná nontte.

⁶ Co nimé ni ndačo ngattoxon con cain chojni que xatte para servicio nttihi quexén jaha rinao chojni mé. Nttatsanha ñao, ttjenguijna chojni mé de ixin tti rrogondehe na para que sinchehe na sigue ngain viajé na para ixin Dios.

⁷ Co jehe na sacjoi na viaje de ixin Jesucristo, co xonhi vanchia na ngain chojni que chonxinha Dios.

⁸ Mexinxin ján na chonda na que tsjinho na cuidado de ixin jehe na para tsjenguijna na na, co jañá ján na tsjenguijna na na de ngain xa de rrondate na chojni tti joajna ndoa.

Cosa nchaoha que Diótfefes nchehe

⁹ Janha cjin na ná carta para cain chojni que xatte para servicio nttiha, pero Diótfefes čhoha nchehe caso tti janha ttetonha ixin jehe nchexoxinhi dehe tti icha nohe de ngayé cain na.

¹⁰ Mexinxin are janha saso, janha rronichjá para rrondate tti jehe nchehe, ixin nichja feo co nichja ndoaha de ixin janha. Co xa jiha contento conixin cain yá, jehe ttjenguijnaha tti chojni que čhji viaje de ixin Jesucristo, co tti chojni que ttjenguijna chojni mé, jehe Diótfefes ndačo ngain na que sincheha na jamé, co denguxin na de ngain cain chojni que xatte para servicio nttiha.

¹¹ Janha rritetonha que rroeha tti ejemplo jianha inchin ejemplo Diótfefes, jaha rroeha joxon tti ejemplo jian. Tti chojni que nchehe jian, mé chojni Dios, pero tti chojni que nchehe jianha, chojni mé xa chonxinha na Dios.

Tti jian ejemplo que joinchehe Demetrio

¹² Cainxin chojni nichja na jian de ixin Demetrio, co tti jehe nchehe xago que jehe Demetrio seguro ditticaon Jesucristo. Janha na cai chonxin na ixin quexén nchehe jehe Demetrio, co jaha ra noha ra que janha na nichja na tti ndoa.

Joexin joajné Juan

¹³ Janha rrichonda atto tsje tti rrondate, pero rinaoha sinttaha conixin ndajni co lapi

¹⁴ ixin janha rinaho sicon jaha daca, cottimeja tsjoan na janha co jaha.

¹⁵ Que tsonoha chjoin ngain ansean. Cain xiamigoa na nttihi rroanha na joajna para ixin jaha. Nttatsanha ñao, jaha mismo chjehe joajna naná xiamigoa na.

Carta Que Dicjin Judas

Judas rroanha joajna ngain tti chojni que ditticaon Dios

¹ Janha Judas na, janha ná ninchehe xé Jesucristo na, co janha xanchó Jacobo na. Cjin na carta jihi para cain jaha ra xó Dios Ndodá na vayaha ra para te ra chojni Ndo. Jaha ra tti chojni que jehe Ndo cjoenchjinha Ndo ixin jaha ra ditticaon ra Jesucristo.

² Dios anto tsiaconoaha jaha ra, co rrochjá ra tti çhjoin que tsonohe ansean ra cain ra, co sinao ra icha co icha.

Tti chojni que tjago cosa que jeha ndoa (2 Pedro 2.1-17)

³ Hermanos, janha anto joiçaxanho de rrocjinha ra are saho de ixin quehe rroçho tti vida naraoxin que ján na chonda na. Pero hasta tti jai nchoe janha chonda que rricjinha ra carta jihi, para rrinttatsanha ñao ra que çonhi chojni sinttacoanha ra ojé cosa de ixin tti jian joajné Jesucristo. Dios rroanha joajna mé nacoa nttiha para ngain cain chojni que ditticaon jehe co mé donda para cainxin tiempo.

⁴ Jamé rrindattjo ra ixin tsje chojni jianha otenchecoehne na icha chojni cosa que jeha ndoa. Jehe na ndaço na ixin Dios anto jian nganji ján na, mexinxin nchao sinchehe ni inchin rinao ni co çonhi castigo rrochonda ni, co ndaço na ixin ndoaha jí Dios, tti nacoaxinxon que ttetonha ján na, co ndaço na que jeha ndoa de ixin Jesucristo, tti chonda cain joachaxin para ixin ján na. Pero ngain tti jitaxin Palabré Dios, nttiha ndaço desde osé tiempo de ixin quehe castigo tequininxin cain chojni jianha mé.

⁵ Masqui jaha ra onoha ra cain jihi, pero janha rinaho sinttaxaxaon ra que ixin Dios, masqui jehe joantsjexin cain chojni Israel de nonttehe Egipto, pero después, jehe joinchetján tti chojni que vitticaonha jehe.

⁶ Co tti cain ángel que joinaoha vitticaon Dios, cain ángel mé Dios coiaxinhí ngain infierno, tti lugar anto naxin xehe, co nttiha teçhoaxin cadena para cainxin tiempo hasta tsija tti nchanho que Dios sinchejuzgá.

⁷ Cai ciudad de Sodoma co ciudad de Gomorra co cain ciudad chian de nttiha cain chojni mé vitticaonha na Dios inchin vinttenchehe cain ángel que teaxinhí jai. Co jehe na icha jé cosa jianha joinchehe na. Jehe na joiatte na çihi iná na co jeha na xó xí na joiattea chó na para joinchehe na cosa jianha que tequininxinha ngain cuerpoe na. Cain chojni mé che na conixin çohi de are maho, co mé ná ejemplo para cainxin chojni que nchehe jianha rrochonxin na ixin çonhi tiempo tsjexin rroche na ngain çohi.

⁸ Pero masqui jamé, jai ça te chojni jianha co jehe nimé ni nttacoanha ra tti jeha ndoa, co chojni jihi tonoeha na ixin tenchehe na cosa jianha. Mexinxin conixin cuerpoe na nchexin na cosa jianha, co ditticaonha na joachaxin que chonda Cristo, co nichja na feo de ixin tti chonda icha joachaxin que jehe na.

⁹ Ni tti arcángel Miguel, are jehe co inchínji coetoxin na cuerpoe Moisés de ixin quexehé tti chonda joachaxin ngain cuerpo mé, ni are mé jehe arcángel mé ndaçhoha feo de ixin quehe tsonhe inchínji, sino que jeha ndaço ngain inchínji: “Dios tti sinttasattaha jaha.”

¹⁰ Pero cain chojni jianha tehe, jehe na nichja na feo de ixin cosa que jehe na chonxinha na. Co cain cosa que chonxin na ttinxinha na jian tti chonxin

na, mé inchin chonxin coxigo que chondaha joarrixaon. Co jehe na nchehe na jamé para ndanchetjanxin na almé na jeha na.

¹¹ ¡Atto tanguí tsonhe chojni mé! ixin jehe na nchehe na jianha inchin joinchehe Cain. Co ixin jehe na rinao na sachá na tomi, mexinxin vathjenda na de tti nttiha nao inchin conhe Balaam. Co inchin Dios joinchetján Coré tti joihao vittaicaon ngain Dios, cai Dios sinchetján chojni mé.

¹² Cain tti nchehe chojni jianha jiji ná joasoaxin para ixin jaha ra are jinttecoho ra na ngaxinhi nihngo. Nttiha jehe na jine na co dihi na hasta tti íchoha co tjanogaxin na co xonhi respeto chonda na ngaxinhi nttiha. Co jehe na inchin tti ttungaria coleco pero que dicao cuidado jeha de ixin jehe. Co jehe na inchin tti ttoi que chondaha chin, jeha chintto sadicaa ttoi mé. Jeha na inchin tti nttá que danjoha ttochjoin. Co nttá mé rrocho que ndadixema nttá jian co digachjengui nttá conixin cainxin noehe nttá.

¹³ Chojni jiji inchin tti olé ndachaon que ttiaho caxineno ngandehe nda, mé tti joasoaxin que jehe na nchehe na. Co jehe na inchin tti conotse que ndadinchetján direccioen. Chojni jiji tti ndacho Dios, que jehe na tsji na ngain infierno tti anto naxin xehe co xonhi tiempo sachjexin na de nttiha.

¹⁴ Cai Enoc, na tti ctoi xannti icha xanchjen de ngain Adán, jeha nichja de ixin jiji cai ixin Dios chjé joachaxin are jehe ndacho: “Janha vicon jehe tti chonda cainxin joachaxin jói conixin anto tsje miles de ángel

¹⁵ co sinchejuzguehe cain chojni co sinchecondená cain chojni jianha de ixin cainxin cosa jianha que nchehe na, co de ixin cainxin palabra jianha que jehe na nichja na de ixin Dios.”

¹⁶ Jeha na ncheoxinhi na tjanguihi na iná chojni, co jehe na ncheoxinhi na ttequin na cuentoe iná chojni, co jeha ttjé na tti ncheoxinhi cuerpoe na. Jeha na nichja na palabra orgulloso, co nichja na jian de ixin canxion chojni pero jeha para que chojni mé sinchehe jian ngain jehe na.

Tti vitonhe chojni que ditticaon Jesucristo

¹⁷ Pero jaha ra, hermanos, xaxaon ra que desde are saho ondattjo ra cain representanté Jesucristo:

¹⁸ “Ngain tiempo que ochian tsí Jesucristo iná, sintte chojni que tsjanao na cosa de Dios co sinchehe na cosa jianha inchin jehe na rroxxaxaon na.”

¹⁹ Co cain chojni jiji tti ttjé pleito co ncheoxinhi na nchehe na cain cosa jianha que jí ngain mundo jiji, co chojni jiji coha Espíritu Santo de Dios ngain na.

²⁰ Pero jaha ra, hermanos, dintte ra soji ngain tti jian que jaha ra ditticaon ra. Nchecoanxinhi ra Dios conixin joachaxin Espíritu Santo.

²¹ Dintte ra chjoin ngain vidá ra inchin rinao Dios co chonhe ra tti nchanho que Jesucristo rrochjá na tti iná vida naroaxin que xonhi tiempo tsjexin. Co jehe rrochjá na vida mé ixin jehe anto ttiaconoa na.

²² Ncheguitticaon ra tti chojni que chondaha seguro ixin Cristo rrochjá na vida jiji.

²³ Ttjenguijna ra cain chojni mé para que jehe na rrocheha na ngain xohi. Co ttiaconohe ra icha chojni cai, pero ttjiho ra cuidado de ncheha ra tti jianha que jehe na tenchehe na ngain vidé na.

Nttihi joexinxin joajné Judas

²⁴⁻²⁵ Tti nacoaxinxon Dios chonxin cainxin cosa, co jehe tti ttjenguijna na ján na para xonhi castigo rrochonda na de cain cosa jianha que jointtoho na. Co jehe mé tti chonda joachaxin para senda jaha ra para que xonhi

cosa jianha sinchehe ra, co para que are tsonchienne ra ngattoxon con jehe xonhi jianha rrochonda ra co anto rrochaha ra. Co de ngain nombré Jesucristo rrondačo na ixin Dios jiquininxin tsosayehe co jehe jiquininxin cain joachaxin desde are saho co jai co para cainxin tiempo. Amén.

Tti Vicononxinhi Juan

Tti joinchenohe Jesucristo Juan

¹ Jihi tti Dios joinchenohe Jesucristo, para que Jesucristo joinchenohe cain chojni que tenchehe xé cain tti chonda que siconhe otoi. Co Jesucristo rroanha ná ángel de jehe para joinchenohe Juan, xinchehe xé jehe, cain jihi.

² Co janha Juan na ndächjan nao cainxin tti vicononxinna, co janha tti ndächjan ixin joajné Dios que Jesucristo joinchegurá, joajna mé ján ndoa joajna.

³ Anto çhjoin para ixin tti chojni que tsjehe xón jihi; co anto çhjoin para ixin cain tti chojni que ttinhi joajna jihi que joixin de ngain Dios, co nchehe na caso cain tti jitaxin ngain xón jihi, ixin ochiaon joí tiempo are cainxin tti jitaxin nntihi siconhe.

Juan rroanha joajna ngain yáto nihngo

⁴ Janha Juan rricjin na joajna jihi para nganji ra xó ditticaon ra Jesucristo ngain nonttehe Asia. Dayehe ra tti jian co tti çhjoin que tonohé ansean ra, ixin cayoi mé ttixin de ngain Dios, tti ttjen jai, tti vehe are saho, co tti tsí iná; co cai de tti yáto espíritu que te nntiha ngaca lugar tti ttjen Dios dayehe ra cayoi joajna jihi;

⁵ co cayoi joajna jihi cai ttixin de ngain Jesucristo, tti testigoe Dios que nichja nao, co jehe tti saho xechon, co jai jehe tti chonda joachaxin para ngain cain xí que ttetonha ngataha nontte jihi. Co jehe Cristo anto rinao na ján na co ojointtaroa na conixin jní que jehe cointtji para ixin cain cosa jianha que ján na jointtoho na.

⁶ Co jehe ochjá na joachaxin de tsetonha na conixin jehe co de sontte na dané Dios, Ndodé jehe. ¡Jehe Jesucristo jiquininxin tosayehe co cainxin joachaxin para cainxin tiempo! Amén.

⁷ ¡Tsjaxin ra, Cristo tsí ngacjan ttjoi! Cainxin chojni sicon na mé hasta cai tti cjoaya ngain jehe Cristo. Co chojni de cain rajna de ngoixin mundo rrotsjanga na are sicon na mé. Já, jañá siconhe.

⁸ Cristo, tti chonda cain joachaxin, tti jí jai, tti vehe desde are saho, co tti tsí iná, mé jehe ndächho: “Janha tti icha saho varichon de cainxin cosa co janha sarihi are cainxin cosa ndatsjaxin, jañá inchin tti letra A saho de cain letra co inchin Z tti último de cain letra.”

Are Cristo xago ngain Juan

⁹ Janha Juan, ná hermano de jaha ra de ngain Cristo, co janha rridetan tangui cai inchin jaha ra; co janha chonda parte ngain tti ttetonha Dios inchin jaha ra; co janha cai tonona çhjoin de ixin tti paciencia que Cristo chjá na. Janha viaxinna ngain isla que dinhi Patmos ixin ndattjan chojni joajné Dios que Jesucristo joinchegurá.

¹⁰ Co ná nchanho domingo joí joachaxin Espíritu Santo nganji na janha, co coian anto sén noton na inchin ná tté chojni, que mé inchin are toyao ná trompeta.

¹¹ Co chojni mé ndachjenji na:

—Janha tti icha saho varichon de cainxin cosa, co janha sarihi are cainxin cosa ndatsjaxin, jañá inchin tti letra A saho de cain letra co inchin Z tti último de cain letra. Jaha cjin ngain ná libro tti rridicon jaxon, co rroanha cain mé

ngain tti chojni que ditticaon na na janha ngain tti yáto nihngo que te ngain regioen Asia; jihi rrocho tti ngain nihngo Efeso, Esmirna, Pérgamo, Tiatira, Sardis, Filadelfia, co ngain Laodicea.

¹² Janha ngaria tsjá para vicon quensen jinichjahna. Co are janha jointtaha mé, janha vicon yáto candelero de oro.

¹³ Co ngayé tti yáto candelero mé janha vicon ná tti inchin xenhe ná xí. Co jehe jingá ná lonnto jini que jicaxin hasta ngataha nontte, co jittedonga ná cinturón de oro ngain pechoe.

¹⁴ Co xajá anto roa xa, inchin chjon roa, o sea inchin chintta ngataha jnanchaha. Co jmacon xá xohi teche.

¹⁵ Rotté conguixima inchin chia que dinhi bronce que xottexin ngain xohi, co digoan chia pulido. Co tté anto soji inchin ruido que nchexjian jinda de tsje río.

¹⁶ Ngá rá lado jian jichonda yáto conotse, co de ngain rroha vačhjexin ná espada anto yao que chonda filo de yoixin lado. Co ngá con jitonguixin inchin nchanho are anto soa.

¹⁷ Are janha vicon mé, joaritsinga ngaca rotté xá ndavenhe na. Pero jehe coín rá lado jian ngataha na, co ndachjenji na:

—Xaonha jaha, ixin janha tti icha saho varichon de cainxin cosa, co janha tti sarihi are cainxin cosa ndatsjexin.

¹⁸ Janha tti rrichon jai. Masqui venhe na, pero jai rrichon para cainxin tiempo. Janha chonda joachaxin ngain tti ndadenhe ni co ngain lugar tti tti cain chojni que ndadenhe.

¹⁹ Mexinxin cjin tti jaha vicon, tti jitonhe jai co tti siconhe después.

²⁰ Janhi rrocho tti yáto conotse que jaha vicon ngain rana lado jian na, co tti yáto candelero de oro: tti yáto conotse rrocho tti dicao joajna ngain tti yáto nihngo. Co tti yáto candelero rrocho tti yáto nihngo.

2

Ntthi tsexinxin joajna para tti yáto nihngo: Joajna para ngain nihngo Efeso

¹ Cjin joajna jihi ngain jehe tti dicao joajné Dios ngain nihngo que jí ngain ciudad de Efeso: “Janhi ndačo jehe tti chonda tti yáto conotse ngá rá jian co tti rridehe ngayé tti yáto candelero de oro:

² Janha nona cain tti jaha ra nchehe ra co janha chonxin ixin anto soji nchehe ra xá ra, co ixin chonda ra paciencia, co ixin dittoaxinha ra que sintte chojni jianha ngayaha ra. Co janha nona ixin vaquehe ra prueba tti chojni que ndačo ixin jehe na representantena na janha, pero ndoaha, co jaha ra vatsoan ra ixin jehe na ncheyaxon na.

³ Anto chonda ra paciencia, vetan ra tangui co anto joinchehe ra xa para ixin janha, co masqui jamé, xonhi tiempo goan ra desanimado.

⁴ Pero janha chonda ná cosa nchaoha que tenchehe ra jaha ra: que ixin irinaoha ni ra jai inchin are nacoexinxon ra vitticaon ni ra.

⁵ Mexinxin xaxaon ra quexén vintte ra are nacoexinxon ra vitticaon ni ra co ttentoxinhi ra vidá ra co nchehe ra inchin vanchehe ra are mé. Si nahi, janha toin saso nganji ra co sinttjianxin ningoa ra de tti jí ningo, pero si tsentoxinhi ra vidá ra isinttjianha ningo.

⁶ Pero masqui jamé, anto nchao ixin jaha ra ningaconhe ra tti nchehe chojni nicolaitas, ixin janha cai ningacoan tti nchehe chojni mé.

7 Jaha ra que ttinxin ra jian, ttinhi ra tti ndaĉho Esp ritu Santo ngain nihngo tehe: Tti chojni que tsixinhi de sincheha cosa jianha, janha rrochjaha joachaxin para sine na tti ttochjoin de ngain nttattochjoin que danjo vida, que ntt  m  j  ntta ngain huert  Dios.”

Joajna para ngain nihngo Esmirna

8  Co cjin joajna jihi ngain jehe tti dicao joajne Dios ngain nihngo que j  ngain ciudad de Esmirna: “Janhi ndaĉho jehe tti icha saho vehe de cainxin cosa, tti sehe are cainxin cosa ndatsjexin, co jehe tti ndavenhe co cjan jichon jai:

9 Janha nona cain tti nchehe ra, co chonxin cain tti tangui que tedetan ra co nona ixin anto noa ra de ngain cosa de ngataha nontte jihi, pero masqui jam , anto rico ra de ngain Dios. Co janha nona ixin chojni jud o que ditticaonha nganji na janha, chojni m  nichja jianha de ixin jaha ra, pero chojni m  chojni Satan s.

10 Jaha ra  aonha ra de cain cosa tangui que sattohe ra, ixin inchinji tsiaxinhi canxion de jaha ra ngain c rcel para que cainxin ra satto ra prueba. Co chonda que tangui tsonha ra inchin tt  nchanho. Pero jaha ra nchehe ra sigue ditticaon ra Dios hasta que ndasenhe ra co janha rrochjaha ra in  vida naroaxin inchin n  premio para ixin jaha ra.

11 Jaha ra que ttinxin ra jian, ttinhi ra tti ndaĉho Esp ritu Santo ngain nihngo tehe: Tti chojni que tsixinhi de sincheha cosa jianha,  onhi tsonhe chojni m  are icha chojni ndasenhe yoxin nttiha.”

Joajna para ngain nihngo P rgamo

12  Co cjin joajna jihi ngain jehe tti dicao joajne Dios ngain nihngo que j  ngain ciudad de P rgamo: “Janhi ndaĉho jehe tti jichonda espada anto yao que chonda filo de yoixin lado:

13 Janha nona cain tti tenchehe ra co nona que ixin jaha ra te ra ngain lugar tti ttetonha Satan s. Pero masqui jam , jaha ra cain tiempo jian ditticaon ni ra. Co hasta cointtoeha ra de vitticaon ni ra ni ngain tti tiempo que Antipas, tt  testigona que vitticaon na janha cainxin tiempo, nagoenxon na ngayaha ra nttiha ngain lugar tti j  Satan s.

14 Pero janha chonda canxion cosa nchaoha que tenchehe ra jaha ra: que ixin nttiha ngain ciudad de P rgamo chonda ra canxion chojni que nchehe na inchin joinchehe Balaam, tti joinchecoeha Balac quex n para joinchejianha chojni Israel ngattoxon con Dios ixin joine na cosa que tosayexin  dolo co ixin vanchehehe na in  nch  que jeha n chihhi na.

15 Co cai nchaoha ixin nttiha ngayaha ra te canxion chojni que nchehe inchin chojni nicola tas, co tti nchehe na, m  tti janha ningacoan.

16 Mexinxin ttentoxinhi ra tti tenchehe ra, ixin si nahi, janha saso daca nganji ra co tsetoquinha chojni m  conixin tti espada que jidachjexin de roha na janha.

17 Jaha ra que ttinxin ra jian, ttinhi ra tti ndaĉho Esp ritu Santo ngain nihngo tehe: Tti chojni que tsixinhi de sincheha cosa jianha, janha rrochjaha chojni m  joachaxin para sine tti man  que jima jai. Co rrochjaha chojni m  n   o roa, co nganito  o m  setaxin n  nombre naroaxin para ixin chojni m  que  onhi chojni chonxin nombre m  sino que jeho tti chojni que say   o m .”

Joajna para ngain nihngo Tiatura

18 'Co cjin joajna jilhi ngain jehe tti dicao joajné Dios ngain nihngo que jí ngain ciudad de Tiatira: "Janhi ndačo jehe tti Xenhe Dios, tti jiche inchin xohi ngain jmacon, co rotté inchin chia que dinhi bronce que digoan pulido:

19 Janha nona cain tti nchehe ra co chonxin ixin anto rinao ni ra janha, co ixin anto ditticaon ni ra janha, co ixin anto tenchehe ra xa para ixin janha, co ixin chonda ra paciencia. Co janha nona que jai jaha ra icha tsje tenchehe ra que are nacoexinxon ra vitticaon ni ra.

20 Pero janha chonda ná cosa nchaoha que tenchehe ra jaha ra: que ixin dittoaxin ra que dehe ngayaha ra ná nčí que nchehe ncha inchin vanchehe nčí que vinhi Jezabel. Janhi nchehe nčí jilhi; ndačo ncha ixin nichja ncha joajna que dayé ncha de ngain Dios, pero jehe ncha jeha nchehe ncha chojni que nchehe xana janha para que jehe na tsontaonxin na iná nčí que jeha nčíchihhi na co jine na cosa que tosayexin ídolo.

21 Janha ochjaha ncha tiempo para que jehe ncha tsentoxinhi ncha tti jinchehe ncha, pero jehe ncha xa choha ncha. Co xa tinttoeha ncha de danjo ncha cuerpoe ncha ngain tsje xí.

22 Co jai janha sinttaha que jehe ncha tsonihi ncha co setsingataha ncha nontte, co cai cainxin chojni que nchehe inchin jehe ncha setan na tangui si jehe na tsinttoeha na de tti tenchehe na.

23 Co janha nasoexon cain chojni que ocoangui na ditticaon na cain tti ndačo ncha. Jamé cainxin chojni ngain cainxin nihngo tsonohe na ixin janha chonxin hasta tti ngain joarrixaoen cada chojni co ngain ansén na. Co janha rrochjaha ra cada ra inchin tti jaha ra joinchehe ra.

24 Pero icha ra que te ra nttiha ngain ciudad de Tiatira, jaha ra xo ncheha ra tti nchehe nčí mé, ni xonhi tiempo joatsoan ra tti jehe na nchequinhi na tti secreto anto jima de Satanás, janha rrindattjo ra que irrochjaha ra iná cosa tangui hasta que jeha tti ochonda ra.

25 Pero ttenchjinha ra tti jian que jaha ra ochonda ra jai hasta que janha sihi iná.

26 Cain tti chojni que tsixinhi de sincheha cosa jianha co tti nisinchehe sigue sinchehe na inchin janha rinaho hasta que tsjexin mundo, janha rrochjaha cain chojni mé joachaxin de tsetonhe na cain nación,

27 jañá inchin Nnodana chjana Ndo joachaxin janha. Co jehe na tsetonhe na cain nación conixin ná nttacotto de chia. Co chojni nación que sitticaonha sicaonxin nttacotto mé hasta rrochjeca cuerpoe como si rocji ná chi.

28 Co cai janha rrochjaha chojni mé tti conotse que nchengasán are ndoyo.

29 Jaha ra que ttinxin ra jian, ttinhi ra tti ndačo Espíritu Santo ngain nihngo tehe."

3

Joajna para ngain nihngo Sardis

1 'Co cjin joajna jilhi ngain jehe tti dicao joajné Dios ngain nihngo que jí ngain ciudad de Sardis: "Janhi ndačo jehe tti chonda tti yáto espiritue Dios co tti yáto conotse: Janha nona cain tti nchehe ra co nona ixin jai jaha ra ondadiguenhe ra de ngain espiritua ra masqui chojni ndačo na ixin xa techon ra.

2 Mexinxin, xingamaha ra, co chjehe ra fuerza cain cosa que xa jí masqui cosa mé ondajidenhe, ixin janha vicon que tti nchehe ra xa jeha jian ngattoxon con Dios de janha.

³ Mexinxin xaxaon ra tti coangui ra, co nchehe ra sigue mé jai, co ttentox-inhi ra tti tenchehe ra jai. Si sincheha ra jamé, janha saso contra nganji ra xá ná tti chehe sin que tsonoaha ra quesu o quehe hora.

⁴ Masqui nchaoha tenchehe ra canxion ra, pero cai nttiha ngayaha ra ngain ciudad de Sardis te canxion chojni que xonhi quittja dichjé na lonttoe na; mé rrocho xonhi cosa jianha rridinchehe na. Co jehe nimé ni sacji nganji na janha conixin lonttoe na roa, ixin jamé tequininxin na.

⁵ Cain tti chojni que tsixinhi de sincheha cosa jianha, chojni mé tti sintengá lontto roa, co janha tsonxantteha nombré na de ngain xón tti tetaxin cain chojni que chonda iná vida naraixin. Co janha rrondaçhjan ixin chonxin chojni mé ngattoxon con Nnodana co ngattoxon con cain ángel que te nttiha.

⁶ Jaha ra que ttinxin ra jian, ttinhi ra tti ndaço Espíritu Santo ngain nihngo tehe.”

Joajna para ngain nihngo Filadelfia

⁷ Co cjin joajna jiji ngain jehe tti dicao joajné Dios ngain nihngo que jí ngain ciudad de Filadelfia: “Janhi ndaço jehe tti anto jian co tti nichja tti ndoa, co tti chonda joachaxin de rey David que are jehe danttjé ná puerta, ni ná chojni çhoha ttejé puerta, co are jehe ttejé ná puerta ni ná chojni çhoha danttjé puerta.

⁸ Janha nona cain tti nchehe ra. Janha coín nganji ra ná puerta jixangué co ni ná chojni çhoha tsejé puerta, ixin masqui jaha ra chondaha ra tsje fuerza, jaha ra joinchehe ra caso ngain joajnana janha co xonhi tiempo ndache ra icha chojni ixin chonxinha ni ra.

⁹ Mexinxin janha rrorroanha nganji ra tti chojni que nchehe inchin rinao Satanás, chojni mé judío na pero ditticaonha na nganji na janha inchin jiquininxin chojni judío de ngain ansén na. Janha rrorroanha chojni mé nganji ra co tsetoan na que sinttettoxin nntajochjihhi na ngaca rottea ra para que tsonohe na que janha ján rinaho ra.

¹⁰ Jaha ra chonda ra paciencia inchin janha coetonha ra, co mexinxin janha tsjengujna ra para que xonhi tsonha ra are tsí tiempo are Dios saquehe prueba ngain cain chojni ngoixin mundo jihhi.

¹¹ Janha sihi toin. Jaha ra nchehe ra sigue tti jian que jaha ra tenchehe ra para que xonhi chojni santsjaha ra premioa ra que sayehe ra.

¹² Cain tti chojni que tsixinhi de sincheha cosa jianha, janha rrondaçhjan que chojni mé sintte na inchin columna que jiquehe ningoe Dios de janha, co jehe nimé xonhi tiempo sachjexin na de nttiha. Co nganito jehe na janha tsentaxin nombré Dios, co nombré tti ciudé Dios, rrocho tti Jerusalén naraixin que tsixin de ngajni tti ttjen Dios. Co janha tsentaxin nganito jehe na tti nombrena naraixin.

¹³ Jaha ra que ttinxin ra jian, ttinhi ra tti ndaço Espíritu Santo ngain nihngo tehe.”

Joajna para ngain nihngo Laodicea

¹⁴ Co cjin joajna jiji ngain jehe tti dicao joajné Dios ngain nihngo que jí ngain ciudad de Laodicea: “Janhi ndaço jehe tti mero ndoa, tti jian testigoe Dios que nichja ndoa, co tti vehe icha saho de cain tti joinchechjan Dios:

¹⁵ Janha nona cain tti nchehe ra. Co nona ixin jaha ra inchin jinda que jeha quin ni jeha soa. Mé rrocho que rinaoha ra rocjan ra inchin chojni que ditticaonha nganji na janha ni inchin chojni que jian ditticaon nganji na janha. ¡Icha nchao si ditticaon ni ra o ditticaonha ni ra!

¹⁶ Pero ixin jaha ra jeha inchin jinda yáso co jeha quin ra ni soa ra, janha tsoncjan jaha ra de ngain rroha na janha.

¹⁷ Ixin jaha ra ndačo ra ixin anto rico ra co ixin de cain cosa, anto jian te ra co xonhi nchetján ra. Pero jaha ra tonoha ra que techinhi ra co tangui tonoha ra ngain espirítua ra, cai noa ra, chejo ra co ttocho ra de ngain espirítua ra.

¹⁸ Mexinxin janha rrindattjo ra que ttehna ra de nganji na janha oro jian que diçotte ngain xohi co que ixonhi jinche jiyá oro; jamé para jaha ra ndoa sintte ra rico. Co ttehna ra lontto roa de nganji na janha para sinttengaha ra co rroñanotaon tti joasoaxin que chonda ra jai. Co ttehna ra x oan de nganji na janha para sinttjngui jmacon ra para que nchao sicon ra.

¹⁹ Janha nttasattá co nttacastigá cain chojni que janha rinaho. Mexinxin chonda ra que ttentoxinhi ra vidá ra hasta que anto sinao ra sinchehe ra tti janha rritettonha ra.

²⁰ Tsjexinxin ra, janha rrindanguia puerté nchia para rrinichjá chojni. Si çhonja chojni tsinhi ttana co santtjé na nchianoha na, janha sixinhi co sinequinha chojni mé, co jehe sine nganji na janha.

²¹ Cain tti chojni que tsixinhi de sincheha cosa jianha, chojni mé nttiha sariquinha tti janha rrihi rritettonha, inchin janha coixinna co joacha tti rritettonha çhica Ndodana.

²² Jaha ra que ttinxin ra jian, ttinhi ra tti ndačo Espíritu Santo ngain nihngo tehe.”

4

Janhi tocoanxin ngajni tti ttjen Dios

¹ Después de cain jihi, janha tsjá iná co vicon ná puerta jiçangué ngajni co tti tté Jesucristo que nichjahna icha saho que inchin tté ná trompeta are toyao, mé ndachjenji na janha:

—Tani nttihi co tsjagoha cain cosa que chonda que siconhe después de cain jihi.

² Ngain rato mé jói Espíritu Santo nganji na janha conixin anto tsje joachaxin, co janha vicon ná nttaxintaon importante jí nttiha ngajni, co ngataha nttaxintaon mé tajitaha xá figuré ná tti xí.

³ Co tti jitaha nttaxintaon mé ngá con jehe anto jitonguixin inchin ná xo fino que dinhi jaspe o xo que dinhi cornalina. Co ngandanji nttaxintaon mé jí ná conchecha que jitonguixin inchin tti xo que dinhi esmeralda.

⁴ Co ngandanji nttaxintaon mé janha vicon iveinticuatro nttaxintaon, co nttiha tetaha veinticuatro nittettonha que tengá na lontto roa co techjinga na corona de oro.

⁵ Co de ngain tti nttaxintaon saho que janha vicon, de nttiha tedaçhjexin xoí rayo co icha ruido co jidatte. Co nttiha ngain nttaxintaon mé teche yáto candil de xohi, que mé tti yáto espirítue Dios.

⁶ Co nttiha ngaca nttaxintaon mé jí ná cosa inchin ndachaon que nchao dicondoxin ni inchin xoçao.

Co ngandanji nttaxintaon mé jí nó cosa que jichon. Co cosa mé ngoixin ngama chonda jmacon de ngajinxin co notonxin.

⁷ Tti saho de tti canoi cosa jihi jí inchin ná coleón. Co tti yoxin jí inchin ná coxinttá. Co tti ninxin jichonda con inchin ngá con ná xí. Co tti nonxin jí inchin ná coaguila que jitjaganga.

⁸ Canoi cosa que techon mé techonda incjaon nenechán cada. Co ngoixin ngama co ngaxinhi techonda jmacon; de ttié co de nchanho joxon tendačo: Santo, santo, santo,

Dios, soixin que chonda cainxin joachaxin,

soixin tti Dios que varihi desde are saho, co rrihi jai, co soixin tti sihi iná.

⁹ Co cada nttiha que jehe tti canoi cosa que techon nchesayehe co danjo gracias ngain jehe tti jitaha nttaxintaon icha importante, tti jichon para cainxin tiempo,

¹⁰ cada nttiha mé tti veinticuatro nittetonha dinttettoxin nttajochjihi na ngain jehe tti jichon para cainxin tiempo, co ttín na coroné na nttiha ngaca nttaxintaon mé, co ndačo na:

¹¹ Soixin tti Dios na na janha na, soixin tti jiquininxin cainxin gloria, co jiquininxin tosayaha co cainxin joachaxin; ixin soixin tti joinchechjian cainxin cosa, co ixin soixin jamé joinao, mé texin co conchjianxin cainxin cosa.

5

Xón co Colecoe Dios

¹ Cottimeja janha vicon ixin jehe tti jitaha nttaxintaon mé jiyá Xón ngá rá lado jian. Xón mé jixea inchin ná rollo, co jitaxin de ngaxinhi Xón mé co de ndojaxin, co jijexin Xón conixin yáto sello.

² Co vicon janha ná ángel que chonda tsje joachaxin que jidanchiangui anto sén co jindačo:

—¿Quensen chonda joachaxin de santtjé Xón jihi co tsinchje cain sello que jiyá Xón?

³ Pero ni de nttiha ngajni, ni nttihi ngataha nontte, ni de ngangui nontte coha ná chojni que nchao rroganttjé Xón mé, ni para rrotsjehe na ngain Xón.

⁴ Co janha anto tsjanga ixin xa Xonhi quensen tsoxiré Xón co tsjao Xón, ni para rrotsjehe Xón.

⁵ Cottimeja ná de tti veinticuatro nittetonha ndachjenji na janha:

—Jaha itsjangaha icha, ixin Coleón que joixin de ngain grupoe Judá de chojni Israel, tti mé cjoí razé rey David, mé ojoacha para que jehe nchao santtjé Xón jihi co tsinchje tti yáto sello que jiyá Xón.

⁶ Cottimeja ngaca tti nttaxintaon icha importante co ngayé jehe tti nó cosa que techon, co ngayé tti veinticuatro nittetonha, janha vicon ná Coleco tajingattjen va nttiha masqui dicon ni ixin digoén na va. Co jichonda va yáto ntehe va co yáto jmacon va. Co tti yáto jmacon va mé rročo tti yáto espíritu que Dios rroanha ngoixin ngataha nontte.

⁷ Jehe Coleco mé cjoí va co coá va Xón que jiyá ngá rá lado jian de jehe tti jitaha nttaxintaon icha importante nttiha.

⁸ Are jehe Coleco coá va Xón mé, tti canoi cosa que techon co tti veinticuatro nittetonha vinttettoxin nttajochjihi na ngattoxon con Coleco mé. Cada nittetonha mé techonda na naná arpa co teyá na naná vaso de oro tecaon tsjoca, co mé rročo cain tti nchecoanxin cain chojni Dios.

⁹ Co tetsje na ná himno naroaxin que ndačo janhi:

Soixin jiquininxin de sayehe Xón yá co tsinchje cain sello que jiyá Xón; ixin soixin onagexon na ngataha nontte, co jnia cjoengaxin hna cain tti jianha que nchehe chojni de cain raza, chojni de cain nguigoa, chojni de cain rajna, co chojni de cain nación.

¹⁰ Soixin ochjana ni ra joachaxin de tsetonha na conixin soixin co de sintte na dané Dios de ján na.

Co ochjana ni ra joachaxin de tsetonha na ngataha nontte.

¹¹ Cottimeja tsjá iná co coian tté de anto tsje ángel que tate ngandanji nttaxintaon icha importante nttiha co ngandanji tti canio cosa que techon co ngandanji tti veinticuatro nittetonha que te nttiha. Nttiha té anto tsje millones de ángel.

¹² Co tendačo sén:

Tti Coleco que nagoenxon na ngataha nontte, co mé co jiquininxin sayé va cain joachaxin co cain cosa que jí, co jehe va jiquininxin sayé va cain tti nohe Dios, co cain fuerza, co jehe va jiquininxin tsosayehe va co tsocoanxinhí va.

¹³ Co cai cain cosa que Dios joinchechjian que te nttiha ngajni co nttihi ngataha nontte, co tti te ngangui nontte, co tti te ngain ndachaon, co cain cosa que jí coian tendačo janhi:

Tti jitaha nttaxintaon co tti Coleco, cayoi mé tequininxin tsocoanxinhí co tsosayehe, co joachaxín jehe sehe para cainxin tiempo.

¹⁴ Co tti canoi cosa que techon nttiha tendačo:

—ján, jamé tsonhe!

Co tti veinticuatro nittetonha vinttettoxin na nttajochjihu na co joinch-
esayehe na jehe tti jichon para cainxin tiempo.

6

Tti yáto sello que jiyá xón

¹ Cottimeja janha vicon que Colecoe Dios coinchje va saho sello que jiyá xón mé, co ngain rato mé coian nichja ná de tti nó cosa que techon nttiha. Tté jehe anto soji inchin are datte, co jehe cosa mé ndačo:

—jǎcoi co tsjehe!

² Janha tsjá co vicon ná conxin roa. Co tti jitaha va jiyá ná chijno. Co digayé ná corona ixin ojoacha, co sacjoi para joinchehe sigue joigacha icha.

³ Are Colecoe Dios coinchje va tti yoxin sello, janha coian nichja tti yoxin cosa que techon nttiha. Co jehe cosa mé ndačo:

—jǎcoi co tsjehe!

⁴ Co vačhe ná conxin jatse. Co tti jitaha va vayé joachaxin de saqueha contento ansén chojni ngataha nontte para que jehe na tsexinhí na tseto na co nasoenxon chó na. Co jehe tti jitaha conxin mé vayé ná espada anto jie.

⁵ Are Colecoe Dios coinchje va tti ninxin sello, janha coian nichja tti ninxin cosa que techon nttiha. Co jehe cosa mé ndačo:

—jǎcoi co tsjehe!

Janha tsjá co vicon ná conxin ttie. Co tti jitaha va jiyá ná balanza ngá rá.

⁶ Co ngayé tti canoi cosa que techon, nttiha janha coian tté Dios que ndačo:

—Jeho nacoa kilo de trigo rentte tti dacha ni ngain ná nchanho. Co jamé rentte ní kilo de cebada cai. Pero nchexincoaha ra aceite ni vino.

⁷ Are Colecoe Dios coinchje va tti nonxin sello, janha coian nichja tti nonxin cosa que techon nttiha. Co jehe cosa mé ndačo:

—jǎcoi co tsjehe!

⁸ Janha tsjá co vicon ná conxin sine. Co tti jitaha va dinhi Muerte. Co noton mé joi tti representanté lugar tti ttji chojni ndadiguenhe. Co cayoi jehe na

vayé na joachaxin para nadoenxon na ná cuarta parte de cain chojni ngoixin mundo conixin guerra, jintta, chin, co coxigo čhintto de ngataha nontte.

⁹ Are Colecoe Dios coinche va tti naonxin sello, janha vicon ngangui altar que jí nttiha, cain almé cain chojni que vintteguenhe ixin vandache na icha chojni tti jian joajné Dios co ixin cjoí na jian testigo de joajna mé.

¹⁰ Cain almé chojni jiji tendačo sén:

—Dios, soixin tti jian co cain tiempo nchehe tti soixin ndačo, ¿quejanhi tiempo ʒa tsončjanha para sinchejuzguehe co sinchecastigá tti chojni que nagoenxon na na janha na que te ngataha nontte?

¹¹ Cottimeja cain almé chojni mé vayé na lontto roa co vitonhe na que ʒa sinchejogaha na vé nchin, hasta rroxetteja senhe cainxin chojni que chonda que ndasenhe inchin cain tti chojni que te nttiha, ixin jehe na ʒa tenchehe na ʒé Jesucristo.

¹² Are Colecoe Dios coinche va tti incjaonxin sello, janha tsjá co vicon que anto soji coingui nontte. Co nchanho ndaconaxin xehe inchin lontto ttie, co conittjao ngoixin va ndacjan va inchin jni.

¹³ Co conotse que te ngajni vinttji va para ngataha nontte inchin are nttahigo dingongui nnta ttchojón nnta are anto soji tja čhintto.

¹⁴ Co ngajni ndavitján inchin ná ʒón are xea ʒon. Co cain jna co cain isla coinguxin de tti te.

¹⁵ Cottimeja cain rey de ngataha nontte, conixin icha chojni importante co chojni rico, co xittetonha ngain xisoldado, co icha chojni que chonda joachaxin, co cainxin chojni que te esclavo co cainxin chojni libre; cainxin chojni mé tavinttema na ngaxinhi cueva co ngayé ttjao ngain jna.

¹⁶ Co vinttendačo na ngain jna co ngain ttjao:

—Dinttji ra ngataha na janha na, co ttema ni ra de ngattoxon con tti jítaha nttaxintaon icha importante, co de ngain tti anto soji castigo que sanjo Colecoe Dios.

¹⁷ Ixin ojoí nchanho para castigo icha soji de cainxin castigo, ¿co quensen tsixinhi ngain castigo jiji?

7

Chojni Israel que Dios coinchiehe para vayé selloe

¹ Después de cain jiji, janha vicon nó ángel tatengattjen ngataha tti nó lado de ngataha nontte tti ttixin čhintto. Co tatequehe tti nó čhintto para que ʒonhi čhintto tsja ngataha nontte, ni ngataonhe ndachaon, ni ngataon ni ná nttá.

² Cai vicon iná ángel que joixin de tti čhinxin nchanho co jichonda selloe Dios que jichon. Jehe ángel jiji coyaotte soji tti nó ángel que vayé joachaxin para sinchenihi ngataha nontte co ngain ndachaon co ndačo:

³ —ʒa ncheniha ra nontte ni ndachaon ni cain nttá, hasta que janha na tsjexin tsín na selloe Dios ngain nttattjen cain ninchehe ʒé Dios de ján na.

⁴ Co janha coian ixin cain tti chojni que vayé selloe Dios ngain nttattjen cjoí ciento cuarenta y cuatro mil chojni de ngayé cain tti tteyó grupoe chojni Israel.

⁵ Tteyó mil de tti chojni que vayé sello cjoí de ngain grupoe Judá, tteyó mil na de ngain grupoe Rubén, tteyó mil na de ngain grupoe Gad,

⁶ tteyó mil na de ngain grupoe Aser, tteyó mil na de ngain grupoe Neftalí, tteyó mil na de ngain grupoe Manasés,

⁷ tteyó mil na de ngain grupoe Simeón, tteyó mil na de ngain grupoe Leví, tteyó mil na de ngain grupoe Isacar,

⁸ tteyó mil na de ngain grupoe Zabulón, tteyó mil na de ngain grupoe José, co itteyó mil na de ngain grupoe Benjamín.

Tti anto tsje chojni que tengá lontto roa

⁹ Después de cain jihi, janha tsjá co vicon anto tsje chojni de cainxin nación, co de cain raza, co de cain nguigoa co de cain rajna que jí ngataha nontte nttihi. Co cain nimé tatengattjen na nttiha ngaca nttaxintaon icha importante, co ngaca Colecoe Dios. Vinte anto tsje chojni mé que hasta ni ná chojni coixinha coequin na, co tengá na joxon lontto roa, co cain na teyá na cajne ngá rá na.

¹⁰ Cain na tetoyao na co tendačo na:

Ján na chonda na iná vida naroaxin de ixin Dios
tti ttjen ngataha nttaxintaon importante
co de ixin Colecoe Dios.

¹¹ Co cainxin ángel de nttiha tatengattjen nttiha ngandanji tti veinticuatro nittetonha, co ngandanji tti nó cosa que techon cai. Co cain ángel mé vinttecjañantaha nontte ngaca nttaxintaon mé co joinchesayehe Dios.

¹² Cain ángel mé ndačo:

¡Amén! Para cainxin tiempo Dios de ján na jiquininxin
tsocoanxinhi, jiquininxin nohe cainxin, co jiquininxin que chojni sanjo na
gracias ngain,
co jehe jiquininxin tsosayehe, co jiquininxin cain joachaxin co fuerza. Amén.

¹³ Cottimeja ná de tti venticuatro nittetonha mé joanchianguina janha co ndačo:

—¿Quensen cain chojni jihi que tengá lontto roa co de ttinó joixin na?

¹⁴ Janha ndattjan:

—Soixin noha.

Co jehe ndachjenji na:

—Cain chojni jihi tti ni anto tangui conhe na co jehe cain niyá ni-joincheroaxin lonttoe conixin jní tti Colecoe Dios.

¹⁵ Mexinxin jai jehe na te na ngandaxinhi Dios co nchesayehe na Dios de nchanho co de ttie ngain nchiandoha Dios. Co jehe Dios, tti retaha nttaxintaon yá, senda cain chojni yá.

¹⁶ Cain chojni yá isenha na jintta ni jinda, ni irrochjanha na ni tanguiha tsonohe na ngandaohé soa,

¹⁷ ixin tti Colecoe Dios que jí ngaca nttaxintaon mé tti senda jehe na, inchin tti ttingaria coleco dicao cuidado de ixin coe, co jehe sicao va ngain tti jíchinxin jinda que danjo iná vida naroaxin. Co Dios tti sinchexema ndacon cain jehe na.

8

Tti yatoxin sello conixin tti oro que chexin tsjoca

¹ Are Colecoe Dios coinchje va tti yatoxin sello que jiyá xón mé, nttiha ngajni xonhi ruido vehe inchin rioho hora.

² Cottimeja janha vicon tti yáto ángel que tengattjen nttiha ngattoxon con Dios, co cain ángel mé vayé naná trompeta.

³ Cottimeja janha vicon iná ángel conixin ná chi de oro que chexin tsjoca, co joiguengattjen ángel nttiha ngaca altar. Co vayé ángel mé anto tsje tsjoca, para

sanjo cain tsjoca mé conixin cain joatotsenhe ñaoe cain chojní Dios nttiha ngataha altar de oro que jí nttiha ngaca nttaxintaoen Dios.

⁴ Nchin de tsjoca mé conixin cain tti joatotsenhe ñaoe chojní Dios cjoinhi de ngá rá ángel mé para ngattoxon con Dios.

⁵ Cottimeja jehe ángel mé coá jehe chia que chexin tsjoca mé, co joincheaon de xoittja que jí nttiha ngain altar mé co cjoa para ngataha nontte. Cottimeja coexinhi anto joatte, co anto vehe ruido, anto cjoa rayo, co soji coingui nontte.

Tti joiconhe are coyao trompeta

⁶ Cottimeja tti yáto ángel que teyá tti yáto trompeta ovintte listo para sanao trompeta.

⁷ Tti saho ángel vanoa trompeta, co vania ttoni co xohi que jittecjan jni. Cain mé vinttji para ngataha nontte co che ná tti ninxin parte de ngataha nontte, conixin ná tti ninxin parte de cain nttá, conixin ná tti ninxin parte de cain ca yoa.

⁸ Tti yoxin ángel vanoa trompeté, co joiguetsiangui ngangui ndachaon ná cosa inchin ná jna jie que jiche conixin xohi. Co ná tti ninxin parte de ndachaon ndacjan nda jni.

⁹ Co ná tti ninxin parte de cain cosa que techon ngangui nda ndavenhe, co ná tti ninxin parte de cain barco que jí ngain nda ndaxante.

¹⁰ Tti ninxin ángel vanoa trompeté, co ná conotse anto jie vetsingaxin va de ngajni, co jiche va conixin xohi. Co vetsinga va ngain ná tti ninxin parte de cain río co cain tti teçhinxin jinda.

¹¹ Co conotse mé vinhi va Tsja co ná tti ninxin parte de cain jinda mé ndacontsja nda. Co anto tsje chojní ndavintteguenhe na ixin vihi na jinda mé, que anto ndacontsja.

¹² Tti nonxin ángel vanoa trompeté, co conihí ná tti ninxin parte de nchanho, co cai ná tti ninxin parte de conittjao, co cai ná tti ninxin parte de conotse. Mexinxin ná tti ninxin parte de cain cosa mé ndaconaxin xehe, co cain mé vanjoha xoi ngoixin ná tti ninxin parte de nchanho ni de ttie.

¹³ Cottimeja janha tsjá co coian jindaço ná ángel que jitjaganga hasta ngosine ngajni co nichja sén, co ndaço:

—¡Anto tangui tsonhe cain chojni que te ngataha nontte are sanao tti iní ángel trompeté!

9

¹ Are tti naonxin ángel vanoa trompeté, janha vicon ná conotse que xincanjinxin va de ngajni para ngataha nontte. Co conotse mé vayé va llavé tsaga anto nihnga.

² Cottimeja conotse mé vanttjé va jehe lugar mé co nttiha cjoinxin ná nchin anto jie inchin nchin que ttixin de ngain ná horno anto jie. Co nchin mé ndajoinchenaxin xehe nchanho co çhintto.

³ Co de ngain nchin mé vaçhjexin anto tsje coxoali que cjoaganga va ngataon nontte. Co cain coxoali mé vayé va joachaxin inchin joachaxin que chonda contanchia nttihi ngataha nontte.

⁴ Co vitonhe va que xonhi sinchehe va ngain cain ca que te ngataha nontte, ni ná cosa yoa, ni ngain ná nttá yoa, sino que jehó sinchenihi va cain tti chojni que chondaha marca de selloe Dios ngain nttattjen.

⁵ Pero coaha va joachaxin de nasoenxon va chojni mé, sino que jehó sincheguetan va chojni mé tanguí cuerpoe ngoixin naho conittjao. Co tti anto tsín na mé inchin ttinxin ná chojni are nehe ná conttanchia.

⁶ Ngain cain nchanho mé chojni sinao na ndasenhe na, pero çhoha senhe na. Masqui jehé na anto sinao na ndasenhe na, pero çhoha ixin la muerte satsjixin de ngain na.

⁷ Jehé coxoali mé te va inchin conxin que te listo para guerra. Ngataha já va tetaha ná cosa que te inchin ná corona de oro, co ngá con va te inchin ngá con chojni.

⁸ Co çajá va inchin çajá nçhí, co neno va te çá neno coleón.

⁹ Co ngoí cuerpoe va tengá ná cosa inchin chia, co ruido que nchechjian nenehe va are tjaganga va inchin ruido que nchechjian tsje carroe conxin are ttinga carro para ngain guerra.

¹⁰ Chonda va nttané va çá nttané conttanchia que chonda nchaha. Co nttiha ngain nttané va chondaxin va joachaxin para ncheninxin va chojni ngoixin naho conittjao.

¹¹ Cain coxoali mé chonda va ná tti tetonha ngain va co jehé mé tti ángel de ngain tti tsaga anto nihnga; co jehé ángel jihu dinhi de ngain nguigoa hebreo Abadón, co ngain nguigoa griego dinhi ángel jihu Apolión, co cayoi nombre mé rroçho: tti nchexantte cain cosa.

¹² Ojoexin tti saho cosa anto tanguí, pero ça ditján iyó cosa tanguí.

¹³ Are tti ángel incjaonxin vanoa trompeté, janha coian ná tté ángel que vaçhjexin de ngayé tti nó ntehe altar de oro que jí nttiha ngattoxon con Dios.

¹⁴ Co jehé tté ángel mé ndaçho ngain jehé tti incjaonxin ángel que jiyá trompeta:

—Tonxindanguehe tti nó ángel que tethia te ngaca río Eufrates que anto jie.

¹⁵ Jamé xindanguehe jehé tti canoi ángel mé, para nagoenxon ná tti ninxin parte de cain chojni, ixin ángel mé ote listo para sinchehe jamé ngain hora mé, ngain nchanho mé, ngain conittjao mé, co ngain nano mé.

¹⁶ Janha coian quejanhi tsjexin xisoldadoe canoi ángel mé, co de tti xitetaha conxin, yó ciento de millón tsjexin xa.

¹⁷ Co jañá viconxin con janha cain conxin yá. Co xitetaha va, ngain pechoe xa tedicaoxin xa chia de ní color; jatse inchin çohi, co azul inchin ngajni, co sine inchin azufre. Co cain conxin mé techonda já va inchin já coleón, co de ngain rroha va tedaçhjexin çohi, co nchin, co azufre.

¹⁸ Tti ninxin parte de cain chojni ndavintteguenhe na de ixin jehé tti ní tipo de castigo que tedaçhjexin ngain rroha conxin, co castigo mé: çohi, co nchin, co azufre.

¹⁹ Ixin tti cjoayaxin cain conxin mé techonda va ngain rroha va co ngain nttané va. Nttané va chonda já çá conché, co, conixin nttané va mé goenxin va chojni.

²⁰ Pero tti ittoha chojni que xehe, tti nindavenha de ixin jehé chin jihu, nimé cointtoeha na de nchehe na cosa jianha que jehé na tenchehe na, ni cointtoeha na de nchesayehe na espíritu jianha, co cain ídolo de oro, de plata, de bronce, de ço, co de nttá. Co cain ídolo mé çhoha dicon, ni tinha, ni çhijha.

²¹ Ni cai cain chojni mé cointtoeha na de nadoenxon na chojni, ni de dantonga na chojni, ni de ncheyehe na iná nçhí o iná xí, ni de ttehe na cosé iná chojni.

10

Angel conixin ná librochjan

¹ Cottimeja janha vicon iná ángel que chonda tsje joachaxin que jixincan-jinxin de ngajni ngacjan ttjoi conixin ná conchecha ngataha já. Co ngá con ángel mé jitonguixian xá nchanho, co rotté inchin columna de xohi.

² Co ángel mé jiyá ná librochjan que jixangué. Co coín rotté lado jian ngataonhe ndachaon, co rotté lado cjon coín ngataha nontte.

³ Cottimeja ángel mé coyao sén inchin are soji tojiede ná coleón. Co are jehe coyao, yáto tti dattehe nichja conixin tté jehe mismo.

⁴ Co después de que yáto tti dattehe mé nichja, janha rroquentaxin cain palabra mé, pero coian tté Dios desde ngajni que ndachjenji na:

—Ttenchjinha cain jiji, co ndačhoha tti ndačo tti yáto dattehe yá, co tentaxinha palabra yá.

⁵ Cottimeja jehe tti ángel que janha vicon tajingattjen de ngataonhe ndachaon co ngataha nontte, tsín rá lado jian para ngajni,

⁶ co joinchejurá de ixin tti jichon para cainxin tiempo, tti joinchechjian ngajni, nontte, ndachaon co cainxin cosa que jí ngain cain parte yá, co ángel mé ndačo:

—Itsončjenha icha tiempo,

⁷ ixin are tsí tti nchanho que tti yatoxin ángel tsexinhi sanoa trompeté, are mé otsonhe tti anto jimao que xaxaon Dios desde are saho, inchin jehe ndačo ngain ninchehe xé, rročo ngain cain profeta.

⁸ Tti tté Dios que janha coian joixin de ngajni, cjan nichja nganji na janha iná co ndačo:

—Jaha ttji co ta tti librochjan que jixangué que jiyá ángel jiha tti jingattjen desde ngataonhe ndachaon co ngataha nontte.

⁹ Cottimeja janha cjoí ngain ángel mé para joiganchiá librochjan mé co jehe ndachjenji na:

—Jenhe, dayehe librochjan co jintte librochjan. De ngain rroha tsonoha anto dulce inchin tsjen, pero de ngaxinhi tsé anto ndatsontsja.

¹⁰ Cottimeja janha coá librochjan mé de ngá rá ángel mé co joine. Co de ngagaha rroha na, janha conona que anto dulce inchin tsjen, pero después que janha joine ndacontsja ngaxinhi na.

¹¹ Cottimeja ndachjenji na na:

—Jaha chonda que rrocjan rrondache chojni iná tti ndačo Dios de ixin tsje rajna, de ixin tsje nación, de ixin tsje nguigoa co de ixin tsje rey.

11

Tti yó testigo

¹ Cottimeja janha vayá ná nttá que jí inchin ná nttá que xattechoaxin, co vitonna:

—Dingattjen co dattechoha nchiandoha Dios conixin altar cai, co ttequin quejanhi chojni nchesayexin Dios nttiha.

² Pero dattechoaha tti patio que jí ndoja de nchiandoha Dios, ixin mé ovayé chojni de icha nación, co nimé ni feo sinchehe ngain tti ciudad santa ngoixin cuarenta y dos cottitjao.

³ Co janha rrorroanha yó testigona que rronichja ngain chojni de ixin janha ngoixin tti mil doscientos sesenta nchanho mé, co cayoi testigo mé

sinttengá lonto tte inchin lonto dinttengá chojni que ta joachjaon are ndadenhe ná nifamié.

⁴Jehe tti yó testigo mé tti yó nntaolivo, co tti yó candelero que te ngattoxon con Dios que tteonha ngataha nontte.

⁵Co si çhonja chojni sinao sinchenihi jehe testigo tehe, jehe de rroha sinttecjixin çohi que ndatsjaga cain tti chojni que rroningaconhe. Co jaña chonda que senhe quexeho chojni que sinao sinchenihi testigo mé.

⁶Jehe cayoi testigo jiji chonda joachaxin de tsejé ngajni para que ir-rochjeha çhin ngataha nontte ngoixin tiempo que jehe rronichja de ixin Dios. Co cai chonda joachaxin para que jinda tsoncjan nda jni, co para sincheguetan tangui cain chojni ngataha nontte conixin cain tipo de chin cainxin nntiha que jehe sinao.

⁷Pero are jehe tseje xé, tti coxigo jianha tsajinxin va de ngain tti tsaga anto nihnga, co tsetocaho va jehe cayoi testigo mé, co jehe tsixinha ngain va. Jehe va tsjaya va co nasoexon va jehe cayoi testigo jiji.

⁸Co cuerpoe sinttji cuerpo ngá nntiha de tti ciudad que anto jie, tti cjoixin crucificado Cristo. Co ciudad mé ogoan inchin ciudad de Sodoma co nonttehe Egipto tti vehe joxon cosa jianha.

⁹Co para ní nchanho co rioho, chojni de cain rajna, chojni de cain raza, chojni de cain nguigoa, co chojni de cain nación sicon na cuerpoe jehe cayoi testigo jiji, co tsanchjandaha na cayoi cuerpo jiji para que rroçavá.

¹⁰Cain chojni que te ngataha nontte rroché na ixin ndasenne cayoi testigo jiji, co anto rroché na que hasta rrorroenne chó na regalo ná na co ná na ixin tti cayoi xí mé que vanichja de ixin Dios, ná cosa anto tangui para ixin jehe na.

¹¹Pero después de tti ní nchanho co rioho mé, Dios joinchexechon cayoi xí mé, co vintteguingattjen xa iná, co cain chojni que vicon mé anto vintteçhaon na.

¹²Cottimeja jehe cayoi testigo mé vinttequinhi tté Jesucristo que joixin de ngajni co ndaço anto sén:

—Tani ra nntihi noi.

Cayoi testigo mé savinttecajín para ngajni ngacjan ná ttjoi co cain chojni que ningaconhe vicon na.

¹³Co ngain rato mé anto soji coingui nontte, co ná tti tteixin parte de ciudad mé ndaxante co yáto mil chojni ndavintteguenne na ixin coingui nontte. Co ittoha chojni que ça xehe, joinchecoanxinhi na Dios que ttjen ngajni ixin anto vintteçhaon na.

¹⁴Ojoexin tti yoxin cosa anto tangui yá, pero toin tsí tti ninxin.

Tti yatoxin trompeta

¹⁵Tti yatoxin ángel vanoa trompeté co anto sén coinhi ni tté de tsje chojni que joixin de ngajni que ndaço:

Tti joachaxin para tteonha ngataha nontte ojoiguehe para Dios conixin Cristo;

co jehe Dios tti tsetonha para cainxin tiempo.

¹⁶Cottimeja tti veinticuatro nittetonha que tatetaha na nntaxintaoen na nntiha ngattoxon con Dios, cainxin nimé vinttecjañantaha na nontte co joinchecoanxinhi na Dios.

¹⁷Co ndaço cain nimé:

Chjaha ra gracias soixin

Dios que chonda cainxin joachaxin,

soixin tti ttjen jai, tti joarihi desde are saho, co soixin tti rrocjan sihi iná,

chjaha ra gracias ixin soixin vayehe tti anto soji joachaxian co soixin ocoexinhi coetonha.

¹⁸ Chojni de cain nación ndavinttecoñao na, pero ojoí nchanho que soixin sinchecastigá na, co cai ojoí rato que soixin sinchejuzguehe cain chojni que ondavenhe, co rrochjehe ninchehe xá que nichja na de ixin soixin tti tequininxin na sayé na, co cai tti chojni que coequininxin para ixin soixin, co tti chojni que nch-esayehe nombrea, masqui jehe na yeye na o nchinnchin na; co joí tti rato que soixin sinchetján cain chojni que ncheyehe co nchetján icha chojni nttihi ngataha nontte.

¹⁹ Cottimeja ningoe Dios que jí nttiha ngajni xiré, co vicon ni tti cajón que jingá tti tratoe Dios que jí nttiha ngaxinhi nihngo. Co anto conguíxin, co goan ruido, co vattehe, co coingui nontte, co anto vinttji ttoni.

12

Tti nchí conixin tti colantta jie de yáto já

¹ Cottimeja ngain ngajni cononxin señal anto jie jiji: ná nchí jisiamá ncha nchanho inchin ná vestido jingá ncha, conixin conittjao ngangui rotté ncha, co ngataha já ncha jitaha ná corona de tteyó conotse.

² Jehe nchí jiji jiyá ncha chjan, co jitoyacaho ncha dolor co jidetán ncha tangui ixin sincheconcjijhi ncha chjan.

³ Cottimeja nttiha ngajni cononxin iná señal jiji: ná colantta jie co jatse va que jichonda va yáto já va co tte ntehe va co cada já va tetaha naná corona.

⁴ Conixin nttané va coingajinxin va ná tti ninxin parte de cain conotse que jí ngajni co cjoa va cain conotse mé para ngataha nontte. Co jehe colantta jiji tavengattjen va ngattoxon con jehe tti nchí que osincheconcjijhi chjan, para rrojine va xenhe ncha nttihi rroconcjijhi xan.

⁵ Co nchí mé joincheconcjijhi ncha ná xanxí, co xanxí mé xan tsetonhe cain nación inchin rroceji conixin ná nttacotto de chia. Cottimeja xenhe ncha mé vachjehe ncha xan para sacjoi xan para ngain Dios co ngain lugar tti jí nttaxintaoen Dios.

⁶ Co jehe nchí jiji sacoinga ncha para ngagaha jna. Nttiha Dios joinchechjienhe ncha ná lugar para que nttiha rrochjé na ncha sine ncha ngoixin mil doscientos sesenta nchanho.

⁷ Después vehe ná guerra nttiha ngajni, co arcángel Miguel conixin cain ángel de jehe coetocaho na colantta jiji conixin cain ángel de jehe va.

⁸ Pero colantta conixin cain ángel de jehe va coixinha joacha ngain guerra mé, co iveha lugar nttiha ngajni para ixin jehe colantta jiji conixin cain ángel de jehe va.

⁹ Co jañá sacjoixin de nttiha jehe tti colantta que anto jie, jehe tti jí desde anto tsje nano que dinhi inchínji co Satanás, tti ncheyehe chojni de ngoixin mundo. Jehe colantta mé conixin cain ángel de jehe va saxincanji para ngataha nontte.

¹⁰ Cottimeja janha coian tté ná ángel anto sén de ngajni que ndačho: —Ojoí tiempo que Dios tsjenguijna chojni, co Dios ocjoago joachaxin que jehe chonda co osiquetonha Dios de ján na, co ocjoago joachaxin Cristoe Dios; ixin osacjoixin inchínji de nttihi, jehe mé tti tjanguilhi cain chojni que

ditticaon ngain Cristo, jehe tti vacjanguihi na de ttie co nchanho ngattoxon con Dios de ján na.

¹¹ Jehe cain nimé ocjoa na cha ngain coxigo yá de ixin jní Jesucristo, tti Colecoe Dios, conixin joajné Dios que jehe na ndache na icha chojni nttihi ngataha nontte, ixin jehe na xañha na de ndavenhe na, sino que jehe na vintte na dispuesto de vintteguenhe na.

¹² Mexinxin jí razón que chaha jaha ngajni, co cain jaha ra que te ra nttiha. Pero anto tangui para ixin cain tti te ngataha nontte co cain tti te ngain ndachaon, ixin inchni oxincanji ngayaha ra. Co jehe anto jitoñao ixin nohe que tsjeha tiempo dittoehe.

¹³ Co are coxigo mé vicon va que osaxincanji va ngataha nontte, jehe va coexinhi va joinchehe va feo ngain tti nchí que joincheconcjihi xanxichjan.

¹⁴ Pero jehe nchí mé vayé ncha yó nenechán coaguila yeye, para que nchao cjoaganga ncha para ngain tti lugar que vayé ncha ngagaha jna. Lugar mé cjin de ngain coxigo mé co nttiha sayé ncha tti sine ncha ngoixin ní nano co rioho.

¹⁵ Pero jehe coxigo mé cjoaxin va jinda de ngain rroha va para conchjian ná rio para que rroguetsiangui jehe tti nchí mé.

¹⁶ Pero nontte cjoenguija jehe tti nchí mé ixin nontte xiré co nttiha saxincanji jehe tti río que coxigo mé cjoaxin va rroha va.

¹⁷ Mexinxin jehe va anto coñao va ngain tti nchí co sacjoi va joiquetocaho va tti icha chojni ncha que xa xehe, tti chojni que ditticaon cain tti tettonha Dios co cain tiempo nchehe na sigue de nchehe na tti ndoa que ndacho Jesucristo.

13

Tti yó coxigo yeye co jianha

¹ Janha joaringattjen ngandehe ndachaon, co vicon cjoinxin de ngain ndachaon ná coxigo jie co jianha va que jichonda va yáto já va co tte ntehe va. Co cada ntehe va techonda naná corona co ngain cada já va techonda ná nombre que ncheofendé Dios.

² Jehe coxigo jianha que janha vicon, jí va inchin ná cotigre, co rotté va inchin rotté co-oso, co rroha va inchin rroha coleón. Co tti colantta jie joanjo va joachaxin ngain coxigo jiji para sinchehe va tsje cosa, co cai joanjo va nttaxintaon va que tjago ixin chonda va joachaxin mé.

³ Ná de cain já jehe coxigo mé anto jie diconihi co chonda que ndaroguenhe va. Pero jehe herida mé ndacoxoehne co chojni de ngoixin mundo anto xañ na co vitticaon na ngain jehe coxigo mé.

⁴ Co joinchesayehe na jehe colantta mé ixin joanjo va joachaxin ngain tti coxigo jianha, co cai joinchesayehe na tti coxigo jianha, co ndacho na:

—¡Xonhi chojni chonda joachaxin inchin coxigo jie jiji, co xonhi chojni tsixinhi tsetocaho va!

⁵ Cai vayé coxigo mé joachaxin de nichja va inchin chojni orgulloso co para ndacho va cosa jianha de ixin Dios. Co vayé va joachaxin de coetonha va ngoixin cuarenta y dos conittjao.

⁶ Co janhi joinchehe coxigo mé: nichja va jianha de ixin Dios, de ixin nombré Dios, de ixin ningoe que jí ngajni, co de ixin cain cosa que jí nttiha ngajni.

⁷ Cai coá va joachaxin de coetocaho va chojní Dios, hasta que cjoa va cha. Co cai vayé va joachaxin para ngain cain chojni de cain raza, de cain rajna, de cain nguigoa, co de cain nación.

⁸ Jehe coxigo jianha mé joinchesayehe cainxin chojni que te ngataha nontte; jehó tti chojni que tetaxin nombré na ngain tti libro que desde are conchjian nontte jitaxin nombré cain chojni que chonda iná vida naroxin, jehó chojni mé nioinchesayehe na coxigo mé. Co jehe libro jihi jichonda Cristo, tti Colecoe Dios que ndavenxin ngataha nontte.

⁹ Si çhónja chojni ttinxin jian, tsinhi tti ndaço jihi.

¹⁰ Tti chojni que ttiaxinhi icha chojni ngain cárcel, cain chojni mé chonda que siaxinhi na cai. Co tti chojni que nadoenxon iná chojni conixin espada, cain jehe na chonda que nasenxon na conixin espada cai. Mexinxin chojní Dios chonda que rrochonda na paciencia co sitticaon na jian.

¹¹ Después, janha vicon iná coxigo jianha que coajinxin va de ngadoho nontte. Jehe coxigo jihi jichonda va yó nttehe va inchin nttehe coleco, pero nichja va inchin colantta que chonda tsje já.

¹² Co jichonda va çajehó joachaxin que jichonda tti coxigo jianha que cjoinxin de ngain ndachaon, co de ngattoxon con jehe coxigo jihi vanchegonda va joachaxin jihi co joinchehe va para que nontte co cain chojni que te ngataha nontte sinchesayehe tti saho coxigo jianha que cjoinxin de ngain ndachaon co coçoenhe tti herida anto jie que vechonda.

¹³ Cai jehe tti coxigo que cjoinxin de ngadoho nontte joinchehe va jie milagro, co hasta vechonda va joachaxin de vanchexincanji va çohi de ngajni para ngataha nontte ngattoxon con cain chojni.

¹⁴ Co de ixin cain milagro jihi que jehe va coá va joachaxin de vanchehe va ngattoxon con tti coxigo que saho cononxin de ngain ndachaon, joincheyehe va cain chojni que te ngataha nontte, co coetonha va ngain na que sinchekhjian na ná retratoe tti coxigo coninxin já de ixin espada co masqui jamé, jehe va nchao vechon va.

¹⁵ Co tti coxigo que cononxinxin de ngadoho nontte vayé va joachaxin de chjé va vida jehe retratoe tti coxigo que cononxin de ngain ndachaon, para que retratoe co mé nchao nichja co coetonha va navenxon cain chojni que joinchesayehe retrato mé.

¹⁶ Co retrato jihi joinchehe icha, ixin coetonhe cain chojni desde yeye na co nchinchin na, nirico co ninoá, o chojni libre o esclavo, cainxin na afuerza rrochonda na ná marca ngain rá na lado jian o nganito nttattjen na.

¹⁷ Co çonhi chojni nchao tsehna cosa ni sinhecji cosa si chondaha na marca mé o nombré coxigo mé, o quejanhi tsjexin nombré va.

¹⁸ Cain jihi rrondehe joarrixaon; mexinxin tti chojni que ttinxin, nchao tsonohe quejanhi tsjexin coxigo jihi, ixin número mé rroço numeroe ná xí. Co número mé seiscento sesenta y seis.

14

Quexén tsje tti ciento cuarenta y cuatro mil chojni

¹ Después janha tsjá, co vicon jehe tti Colecoe Dios tajingattjen va ngataha tti jna que dinhi Sión. Co ngain jehe va te ciento cuarenta y cuatro mil chojni que tetaxin nganito nttattjen na nombré jehe va conixin Ndoaté va.

² Cottimeja janha coian ná ruido que joixin de ngajni, que ruido mé inchin tti ruido que nchekhjian tsje río co inchin are dattehe ngayé jna, co mé coinhi ni inchin are tsje chojni tedinga arpa.

³ Co tetsje na ná són naroaxin nttiha ngaca lugar tti jí nttaxintaoen Dios co nttiha ngattoxon con tti canoi cosa que techon, co ngattoxon con tti veinticuatro nittetonha que te nttiha cai. Ni ná chojni čhoha coangui són mé, sino que jehó tti ciento cuarenta y cuatro mil chojni que vayé iná vida nroaxin de ngayé cain chojni que te ngataha nontte.

⁴ Cain chojni jiji tti xonhi nčhí ni xí joincheyehe, mexinxin vittohe joxon chojni jian co ditticaon na cainxin tti ttetonha jehe tti Colecoe Dios. Jehe na vayé na iná vida naroaxin co mexinxin vačhjejeyexin na de ngayé cain chojni ngataha nontte para te na inchin ná regalo anto jian para ixin Dios co para ixin jehe Colecoe Dios.

⁵ Vinchoeha ni ná mentira ngain rroha na; cain chojni mé joxon chojni jian ngattoxon con Dios.

Tti joajna que joiaho tti ní ángel

⁶ Cottimeja janha vicon iná ángel que jitjaganga ngosine ngajni co jichonda tti jian joajné Dios que ndoa para cainxin tiempo co que danjo iná vida nroaxin. Co ángel mé cjoí joindache chojni que te ngataha nontte; chojni de cainxin nación, de cain raza, de cain nguigoa, co de cain rajna.

⁷ Co ángel mé jindačo sén:

—Ķagonhe ra jehó Dios co jehó jehe tti nchecoanxinhi ra ixin ojoj hora que jehe sinchejuzguehe cain chojni. Nchesayehe ra tti joinchechjian ngajni, nontte, ndachaon, co cain parte tti tečhinxin jinda.

⁸ Cottimeja rroé iná ángel, que ndačo:

—Ondaxante tti ciudad jie que vinhi Babilonia, ixin jehe tti joinchecoan chojni de cainxin nación conixin tti vino que jehe joinchechjian, co jiji rročo ixin joinchecoenhe chojni para vechonda na icha nčhí que jeha nčhíchihí na.

⁹ Cottimeja rroé tti ninxin ángel, que jindačo sén:

—Si čhonja chojni nchesayehe tti coxigo jianha conixin retratoe va co sittoexin na senganito marqué va nganito nttattjen na o nganito rá na,

¹⁰ chojni mé chonda que sayé tti anto soji castigo que ttixin de ngain Dios ixin Dios tsoňao. Co castigo jiji rročo ixin chojni mé roche na ngain xohi conixin azufre ngattoxon con cain ángel Dios conixin Cristo.

¹¹ Co nchin que tsjinxin de ngain cuerpoe chojni mé tsajinhi nchin mé para cainxin tiempo, co xonhi tiempo sinchejogaha cuerpoe cain chojni mé ixin roche na de nchanho co de ttie. Jamé tsonhe cain tti chojni que nchesayehe tti coxigo jianha conixin retratoe va, o dayé na marca de nombré va.

¹² Mexinxin cain tti chojni que tequininxin para ixin Dios co ditticaon na nchehe na tti ttetonha Dios co tti ttetonha Jesús, chojni mé rrogondehe na paciencia.

¹³ Cottimeja janha coian tté ná ángel que joixin de ngajni co ndachjenji na:

—Janhi cjin: “De nttihi pa ndaha anto čhjoin tsonohe cain tti chojni que xa ditticaon Jesucristo are ndasenhe na.” “Ján”, ndačo Espíritu Santo, “ixin sinchejogaha na de ngain xé na, co cain tti jian que jehe na joinchehe na, mé tti tsonchiencaho na ngain Dios.”

Tti cosecha que ttjinxin de ngataha nontte

¹⁴ Cottimeja janha tsjá co vicon ná ttjoi roa, co ngataha ttjoi mé tajitaha ná tti jí inchin ná chojni. Jíchjinga ná corona de oro co jiyá ná joso anto yao.

¹⁵ Co vačhjexin de ngaxinhi nihngo ngajni iná ángel, que jindačo sén ngain jehe tti jitaha ttjoi mé:

—Ānguihi josoa co ttjejo cosecha ixin ojoí hora co cosecha ngataha nontte joexin cha cosecha.

¹⁶ Cottimeja jehe tti jitaha ttjoi mé joinchegatto josoe ngataha nontte, co joatse tti cosecha que jí ngataha nontte.

¹⁷ Cottimeja iná ángel vačhjexin de ngaxinhi nihngo que jí ngajni; cai ángel mé jidicao ná joso anto yao.

¹⁸ Co vačhjexin de ngain altar nttiha iná ángel, que chonda joachaxin para ngain xohi, co ángel jihi vayé jehe tti ángel que jichonda tti joso anto yao co ndačho:

—Ānguihi josoa co ttjejo cosecha de uva que jí ngataha nontte, ixin ojoexin dichje uva.

¹⁹ Co jehe ángel mé joinchegatto josoe ngataha nontte, co joatse cosecha de uva que jí ngataha nontte. Co coenga cain uva mé ngá ná tanque jie tti nchao seninxin na ttouva, co jihi rročho tti castigo anto soji que rrorroanha Dios.

²⁰ Cain ttouva jihi ndoja de ngain ciudad veninxin na tto, co de ngain tanque que veninxin na tto, nttiha vačhjexin jni, co jni jihi cjoinxin jni de ngataha nontte hasta tti noinxin dicaoxin conxin frenoe va, co trescientos kilómetro cjinxin vingo jni jihi.

15

Tti yáto ángel co tti yáto último cosa tangui para ixin chojni

¹ Cottimeja janha vicon ngajni iná señal jie co hasta joinchexaon na. Janha vicon yáto ángel conixin tti yáto último cosa tangui, co cosa mé tsjexinxin corajé Dios.

² Cai vicon xá ná ndachaon que nchao dicondoxin ni que jittectjan nda mé xohi. Co tti cain chojni que coixinhi cjoa cha ngain tti coxigo jianha conixin retratoe va, conixin tti quejanhi tsjexin nombré va cain chojni mé tatengattjen na ngandehe ndachaon mé conixin arpa que Dios joanjo ngain na.

³ Co tetsje na ná són inchin soen Moisés tti cjoí ninchehe xé Dios, co inchin soen Colecoe Dios; co són mé ndačho son:

Anto importante co čhjoin cainxin cosa que soixin joinchehe, oh Dios, soixin tti chonda cain joachaxin;

nao co anto ndoa cain nttiá soixin, co soixin tti Rey para cainxin nación.

⁴ ¿Quensen rroxagoanha soixin?

¿O quensen sinttacoanxianha soixin?

Ixin jeho soixin tti anto santo,

co tsí chojni de cainxin nación para sinttacoanxinha na, ixin jehe na ovicon na tti jian que soixin nchehe.

⁵ Después de cain jihi, janha tsjá, co vicon tti nihngo que jí ngajni xiré, tti vechjianxin tti yó tabla que vetaxin tti tte mandamiento que coetonha Dios.

⁶ Co de ngain lugar mé vačhjexin jehe tti yáto ángel que sasicao tti yáto cosa tangui ngataha nontte. Co ángel mé tengá lontto anto fino co hasta tetonguixima lontto mé; xonhi jinche dica lontto mé. Co tettedonga cinturón de oro ngain pechoe.

⁷ Cottimeja ná tti nó cosa que techon joanjo ngain cada tti yáto ángel mé naná vaso de oro, tecaon de tti castigo que anto soji que ttixin de ngain Dios, tti jichon para cainxin tiempo.

⁸ Co jehe lugar mé ndacaon de nchin ixin Dios anto jian co chonda cain joachaxin. Co xonhi quensen nchao joixinhi nttiha hasta joexinja tti yáto cosa tangui que joicao tti yáto ángel.

16

Tti vaso de castigo

¹ Cottimeja janha coian tté Dios anto sén que vaçhjexin de ngaxinhi que jí nihngo nttiha que ndaço ngain tti yáto ángel:

—Ttji ra co ttintjtjite ra tti anto soji castigoe Dios que jí ngain tti yáto vasoa ra.

² Tti saho ángel cjoí co cointtjtjite tti jiria vasoe ngataha nontte, co cainxin chojni que techonda marqué tti coxigo jianha, co nchesayehe na retratoe va, cain chojni mé vaçhjema na tton anto feo co anto coín na.

³ Tti yoxin ángel cointtjtjite tti jiria vasoe ngataonhe ndachaon, co jinda mé cjan nda inchin jní chojni que ndadenhe, co ndavenhe cain cosa que techon ngangui jinda mé.

⁴ Tti ninxin ángel cointtjtjite tti jiria vasoe ngataonhe cain río co cain tti techinxin jinda co cain jinda mé ndacjan nda jni.

⁵ Cottimeja janha coian ndaço tti ángel de jinda:

—Soixin joinchehe inchin jiquininxin ixin joinchejuzgá jañá, oh Dios santo, soixin que rrihi jai co joarihi are saho.

⁶ Ixin chojni jianha coingo na jní tti chojnia soixin, tti cain chojni que jian nichja de ixin soixin, co jai chojni jianha soixin joincheguihi na jni, ixin jamé tequininxin na.

⁷ Co cai coian nichja ná ángel desde ngain altar co ndaço:

—Ján, oh Dios, soixin que chonda cain joachaxin, joinchejuzguehe cain chojni yá ndoa inchin tequininxin na, co nao joinchejuzguehe na.

⁸ Tti nonxin ángel cointtjtjite tti jiria vasoe ngataha nchanho, co nchanho vayé joachaxin de cjoaga chojni conixin xoi nchaon.

⁹ Co cainxin chojni anto feo che na. Pero jehe na coentoxinha na de tti jianha que jehe na tenchehe na, ní joincheoanxinha na Dios, sino que ndaço na palabra jianha para ixin Dios, tti chonda joachaxin para ngain cain cosa tangui jhi.

¹⁰ Tti naonxin ángel cointtjtjite tti jiria vasoe ngataha ntaxintaen tti coxigo jianha, co tti jehe va vaquetonha va ndaconaxin xehe. Co chojni anto coín na hasta joincheje neje na de ixin tti coín na.

¹¹ Pero masqui jamé cointtoeha na de joinchehe na cosa jianha que vanchehe na, sino que ndaço na palabra jianha para ixin Dios que ttjen ngajni; nichja na jañá ixin jehe na anto coín na.

¹² Tti ineaonxin ángel cointtjtjite tti jiria vasoe ngain tti río anto jie que dinhi Eufrates, co jinda de ngain río mé ndaxema nda co xiré ná nttiha para ixin vatto tti rey que vintequixin de ngain lado tti çhinxin nchanho.

¹³ Cottimeja janha vicon joí ní espíritu jianha. Ná vaçhjexin de ngain rroha tti colantta que chonda tsje já, co iná vaçhjexin de ngain rroha tti coxigo jianha, co tti ninxin espíritu jianha mé vaçhjexin de ngain rroha tti ndaço ixin nichja joajné Dios pero ndoaha. Co canio espíritu jianha mé te xá corrana.

¹⁴ Jehe canio espíritu jhi, espíritu demonio que nchehe milagro, co vagaçhje para joatse cain rey de ngoixin mundo para guerra ngain nchaon Dios, tti chonda cainxin joachaxin; co are mé jehe Dios tsjago joachaxin mé.

¹⁵ Co Cristo ndaĥo: “Tsjexin ra, janha sihi anto daca inchin ná xichehe. Anto ĥjoin para ixin tti chojni que cain tiempo te listo para que tsí nchanho mé, co jamé chojni mé inchin tti chojni que ttenĥjinha lonttoe co jamé xonhi tiempo ĥji na ttolocho na co xonhi chojni nchao dicon cuerpoe na.”

¹⁶ Cottimeja tti ní espíritu jianha mé joatse cain rey que ttetonha ngataha nontte para ngain lugar que dinhi ixin nguigoa hebreo Armagedón.

¹⁷ Tti yatoxin ángel cointtjitte tti jiria vasoe ngataonhe ĥintto. Co desde ngaxinhi nihngo que jí ngajni, co de nttaxintaoen Dios vaĥjexin tté Dios co ndaĥo sén:

—Ojoexin cain.

¹⁸ Cottimeja congúixin cain lado, co anto goan ruido, co anto joatte, co coingui nontte anto soji que xonhi tiempo coingui nontte jamé desde que chojni vehe ngataha nontte.

¹⁹ Co tti ciudad que anto jie vichjenga hasta ní parte, co cain ciudad de ngoixin mundo ndaxantte ciudad. Co Dios xaxaon tti ciudad anto jie que dinhi Babilonia para que vayé ciudad mé tti castigo anto soji que Dios joanjo ixin jehe coñaohé ciudad mé.

²⁰ Cain isla co cain jna ndavintteguítján.

²¹ Cai vinttjixin de ngajni para ngataha nontte ttoni anto yeye que yexin hasta cuarenta kilo. Co chojni ngataha nontte nichja na jianha de ixin Dios ixin vinttji ttoni mé, ixin mé ná castigo anto soji para ixin jehe na.

17

Castigo que vayé ciudad jianha

¹ Cottimeja joí ná de tti yáto ángel que chonda tti yáto vaso, co ndachjenji na janha:

—Ĥacoi, co tsjagoha tti castigo que sayé tti nĥí que nĥecji cuerpoe ngain icha xí, rroĥo tti jie ciudad jianha que taji ngandehé ndachaon.

² Cain rey que ttetonha ngataha nontte joinchehe cosa jianha ngain ciudad mé, co cain chojni que te ngataha nontte ndaviĥoe na de ixin cosa jianha que nchehe chojni ngain ciudad mé.

³ Cottimeja are janha xa vicon tti cjoagohna Espíritu Santo, ná ángel sacjoinha para ngaha jna co nttiha viconxin ná nĥí que jitaha nĥa ná coxigo jianha co jatse va. Co ngoixin coxigo mé jitsama va de nombre feo para ixin Dios. Co jichonda va yáto já va co tte ntehe va.

⁴ Jehe nĥí jiji jingá nĥa lontto morado co jatse, co ditsonji nĥa de oro, conixin xo que anto fino, co perla. Co jiyá nĥa ná vaso de oro jicaon de cain cosa feo co jianha que nchehe nĥa.

⁵ Co nganito nttattjen nĥa jitaxin ná nombre que chojni xa chonxinha co ndaĥo: “Tti jie ciudad de Babilonia, tti cjoí inchin janné cain nĥí que nĥecji cuerpoe ngain icha xí, co de cain cosa jianha ngataha nontte.”

⁶ Cottimeja vicon jian que nĥí jiji ndadicoan nĥa conixin jni chojni Dios, tti chojni que nagoenxon na ixin cjoí na testigoe Jesús. Co are janha vicon yá, anto goan na admirado.

⁷ Cottimeja tti ángel que cjoagohna jiji, ndachjenji na:

—¿Quedonda rridoan admirado? Janha tsjagoha jaha quehe rroĥo tti nĥí yá, que mé jima jai; co sinttanoha quehe rroĥo tti coxigo jianha que jitaha nĥa, tti coxigo que chonda yáto já co tte ntehe.

⁸ Tti coxigo jianha que jaha vicon, yá ná coxigo que vechon are saho, pero jai coxigo yá ijichonha va. Pero masqui jamé, icha saho que jehe va ndasenhe va para cainxin tiempo, jehe va tsajinxin va de ngá tsaga anto nihnga. Cain chojni que te ngataha nontte co tetaxinha nombré na ngain tti libro tti tetaxin nombré cain chojni que chonda iná vida naroaxin, cain tti chojni que tetaxinha nombré nttiha desde are conchjian nontte jihi, cain chojni jihi soan na admirado are sicon na coxigo jianha mé que vechon, co jai ijichonha va, pero que xa rrocjan va tsí va iná.

⁹ Ntthi jinichja nchion para ixin tti chojni que nchao ttinxin: Tti yáto já va, mé rrocho tti yáto jna que ciudad jie yá jitaha.

¹⁰ Co cai tti yáto já va yá rrocho yáto rey. Naho de tti rey yá ojoexin coetonha na, co ná de jehe rey yá jittetonha jai, co iná xa ttiha. Co are tsí tti último rey, jehe mé tsonchjenha tsje tiempo.

¹¹ Tti coxigo jianha que vechon are saho co jai ijichonha va mé tti njinxin rey, masqui cai jihi iná de tti yáto rey, co después ndasitján para cainxin tiempo.

¹² Co tti tte ntehe va que jaha vicon, mé rrocho tti tte rey que xa ttexinha ttetonha; pero cain jehe sayé joachaxin de rey para jehó nchion tiempo. Co jehe na tsetonha na junto conixin tti coxigo jianha mé.

¹³ Jehe tti tte rey jihi te de acuerdo, co sanjo na joachaxin mé ngain tti coxigo jianha.

¹⁴ Co tsetocaho na Colecoe Dios, pero Coleco mé tsixinhi va sachá va ngain cain rey mé conixin ngain jehe coxigo jianha, ixin jehe Coleco tti ttetonha cainxin cosa co cain chojni, co jehe tti Rey de cainxin rey. Co cain chojni que te ngain jehe, mé Dios ndache na ixin tsí na ngain jehe, ixin jehe coinciehe na; co cain tiempo dittaoca na jian ngain Dios.

¹⁵ Co ángel ndachjenji na cai:

—Cain ndachaon que jaha vicon tti jindehe tti nchí que rrocho tti jie ciudad cain ndachaon yá rrocho cain rajna, cain chojni, cain nguigoa, co cain nación.

¹⁶ Co tti tte ntehe va que jaha vicon co tti rrocho tte rey, cain yá tti rroningaconhe nchí jitaha va, co tsintohe na ncha jehó ncha co ttolocho ncha; co sine na cuerpoe ncha, co tsjaga na ncha ngain xohi.

¹⁷ Jamé tsonhe tti ciudad mé ixin Dios coín ngain ansén tti tte rey yá para que sinchehe inchin rinao Dios, mexinxin jehe na vintte na de acuerdo para joanjo na joachaxin de rey ngain tti coxigo jianha hasta que tsoenja tti ndacho Dios.

¹⁸ Co tti nchí que jaha vicon, mé tti ciudad importante que ttetonha cainxin rey de ngoixin mundo.

18

Are xantte ciudad de Babilonia

¹ Después de cain jihi, jianha vicon iná ángel que jixincanjinxin de ngajni conixin tsje joachaxin, co ngoixin ngataha nontte vingasantaha de ixin chíxo que joiaho ángel mé.

² Co jitoyao soji co ndacho:

—Ovetsinga Babilonia, tti ciudad anto importante, co jai ndacjan nchi-andoha demonio, co cuevé cainxin clase de espíritu jianha, co caqué cain conttoa ttojaaha co feo.

³ Ixin chojni de cainxin nació n daviçhoe na de ixin tti jianha que nchehe chojni de ngain ciudad mé, co cain cosa jianha mé inchin ná vino que ncheoan chojni mé, co cainxin rey de ngoixin mundo joinchehe na joxon cosa jianha ngain ciudad jhi, co xicomerciante de ngoixin mundo ndacjan xa rico de ixin cain cosa rentte que vaquehna ngain ciudad mé co vanchecji ngain icha chojni.

⁴ Cottimeja coian tté Dios que joixin de ngajni co ndaço:

—Daçhjexin ra de ngain ciudad yá, jaha ra xo chojnina janha, para que sincheha ra tti jianha que nchehe icha chojni de ngain ciudad yá, ni rrotseha ra castigo na.

⁵ Ixin tti jianha que jehe na tenchehe na, anto ndacotsje co vixintja chó co joiji hasta tti ngajni, co Dios xaxaon co nichja de ixin cain tti jianha mé que jehe na tenchehe na.

⁶ Danjo ra ngain ciudad yá inchin jehe joanjo ngain icha chojni, co ttjenguehe ra ciudad yá hna doble de tti jehe joinchehe nganji ra. Co ttintecjan ra ná tti sihi yó nntiha icha soji que tti jehe ciudad yá cointtecjan para icha chojni.

⁷ Inchin çhjoinxin que conohe ciudad yá co çhjoin que vehe, jamé tsjexin dolencia co tangui nchegetan ra ciudad yá, ixin ndaço ngain ansén: “Ntthi tarrihi janha inchin ná reina; janha jeha ganha na, ni xonhi tiempo setan tangui.”

⁸ Mexinxin ngain nacoa nchanho, tsí cain castigoe ciudad yá: jehe ndasenne, co tsa joachjaon, senhe jinta co rroche conixin xohi, ixin Dios tti jichonda cain joachxin jañá joinchecondená ciudad yá.

⁹ Cain rey de ngoixin mundo tti joinchehe jianha ngain ciudad yá co ché, cain rey mé rrotsjanga co tsa joachjaon de ixin ciudad yá are jehe sicon tsajinhí nchin are rroche ciudad yá.

¹⁰ Cjin sintte cain rey mé ixin rroçagoen castigo que sayé ciudad yá co rrondaço:

—¡Ay! ¡Anto tangui para ixin jaha, ciudad que anto jie Babilonia, ciudad que chonda anto joachxin! Ixin ngain nacoa rato joí cain castigoa.

¹¹ Cai cain xicomerciante de ngoixin mundo rrotsjanga xa co tsa xa joachjaon de ixin tti tsonhe jehe ciudad yá, ixin iseha quensen tsené xa carga que tsiaho xa.

¹² Inchin carga de oro, de plata de xo anto fino, de perla, de manta fino que dinhi lino, de seda de color morado co jatse; cai de cain clase de nttá que çhjoin çajni, de cain cosa que diconchjian joxon marfil, de nttá que anto rentte, de bronce, de hierro, co de marmol,

¹³ co carga de canela co icha ca que çhjoin çajni, tsjoca, mirra, perfume, vino, aceite, harina fina, trigo, co cai coxigo que tama, coleco, conxin, carro, co hasta chojni vanchecji xa para vaguittohe na de esclavo.

¹⁴ Cain xicomerciante mé rrondaço xa ngain ciudad jhi:

—¡Içhondaha cain cosa çhjoin que anto vanttaçoxinha, co ndajoinchetján para cainxin tiempo cain cosa rentte co cain cosa que anto jian que joari-chonda!

¹⁵ Cain tti chojni que vanchexin negocio de ixin cain cosa yá co ndacorrigo na de ixin ciudad yá sinttengattjen na cjin de jehe ciudad, ixin rroçagoen na tti castigo que sayé ciudad yá co rrotsjanga na co tsa na joachjaon,

¹⁶ co rrondaço na:

—¡Ay! ¡Anto tangui para ixin ciudad que anto jie vehe! Ciudad yá vehe inchin ná nchí que vengá lontto fino conixin lontto de color morado co jatse, co vetsonji ncha de oro, co de xo que anto fino conixin perla.

¹⁷ ¡Co ngain nacoa rato ndajoexin tti anto tsje cosa rentte que vechonda ciudad yá!

Cainxin xicapitán de ngain barco conixin cain chojni pasajero conixin cain ximarinero, co cain chojni que nchehe xa ngain ndachaon, tavinttengattjen na cjin,

¹⁸ co are vicon na nchin que jittjinxin de ngain xohi que jichexin ciudad yá, jehe na coyao na co ndacho na:

—¿Quexehe iná ciudad vehe icha importante inchin ciudad jihi?

¹⁹ Co de ixin joachjaon que coá na cointtjitte na jinche já na, co tsjanga na, coá na joachjaon, coyao na, co ndacho na:

—¡Ay! ¡Anto tangui para ixin tti ciudad que anto jie vehe! ¡Conixin cain cosa rentte que vechonda ciudad yá corricoxin cain xí que chonda xa barco ngain ndachaon! ¡Co ngain nacoa rato ndaxante ciudad yá!

²⁰ Pero cain jaha ra xo te ra ngajni, co jaha ra xo cjo ra representanté Jesucristo, co jaha ra xo nichja ra joajna que dayehe ra de ngain Dios, co cain ra xo chojni Dios, cain jaha ra mé chaha ra ixin ciudad yá goan condenado co Dios joinchehe jie para ixin jaha ra.

²¹ Cottimeja ná ángel que chonda tsje joachaxin tsín ná xo, co xo mé jí xo inchin ná xo chin jie co joancahngui xo ngangui ndachaon, co ndacho:

—Cai janhi setsiangui Babilonia, tti ciudad anto jie, co ixonhi tiempo rrocjan ra sicon ra ciudad iná.

²² Ixonhi tiempo rrocjan tsinhi ni ngá nntié ciudad mé soen arpa, flauta, co trompeta. Ni iseha ngain ciudad mé ni ná chojni que chonxin ni ná tipo de xa, ni itsinha ni tti ruido que nchechjian xottja ngataha xo chin.

²³ Ni isingasanha ngain ciudad yá ni ná xo í lámpara co ixonhi tiempo tsinhi ni tti ruido de ti quié chojni que tottehe. Jamé tsonhe masqui xicomerciante que vintte ngain nntiha are saho vechonda anto tsje joachaxin, co masqui ciudad yá joincheyehe chojni de ngoixin mundo conixin joattosohe.

²⁴ De ngain ciudad yá vinchoexin jní chojni que nichja de ixin Dios, co jní chojni Dios, co jní cain chojni que vinttegoen na ngoixin ngain mundo jihi de ixin causexin Dios.

19

¹ Después de cain jihi, janha coian tté tsje chojni que joixin de ngajni que ndacho soji:

¡Nttocoanxinhí na Dios! Dios de ján na tti danjo iná vida naroaxin, co jehe chonda cain gloria co cain joachaxin,

² ixin jehe nchejuzgá inchin jiquininxin, co ndoa tti jehe nchejuzgá;

ixin jehe joinchecondená tti ciudad jie co jianha,

tti joincheconcaxa ngoixin mundo de ixin tti jianha que jehe joinchehe;

Dios joinchecastigá ciudad mé ixin jehe vantsjehe vidé ninchehe xé jehe.

³ Cottimeja cjan cain chojni mé ndacho na iná:

—¡Nttocoanxinhí na Dios! Ixin tti nchin de ciudad mé xonhi tiempo tasehe de tsjinji nchin mé.

⁴ Co tti veinticuatro nittetonha co tti nó cosa que techon vinttecjañantaha nontte co joinchecoanxinhí Dios que retaha nntaxintaoen, co vinttendacho na:

—¡Amén! ¡Nttocoanxinhí na Dios!

⁵ Cottimeja coinhi ni ná tté ángel que joixin de ngaca nttaxintaoen Dios que ndaĉho:

Nchecoanxinhi ra Dios de ján na
cain jaha ra ʒo nchehe ra ʒé
co ʒagonhe ra jehe
masqui nchinnchin ra o yeye ra.

Tti quiai are Jesucristo tsottehe

⁶ Co cai coian ná cosa que inchin tté tsje chojni co inchin are daʒoin jinda de tsje río, co inchin are soji joattehe, co cain tté chojni mé ndaĉho:
¡Nttocoanxinhi na Dios! Ixin ocoexinhi coetonha Dios de ján na tti chonda cainxin joachaxin.

⁷ Cainxin na rrochá na, anto rrochá na co sonttosayehe na Dios mé, ixin ojoí tti nchanho que tsottehe Jesucristo, tti Colecoe Dios.

Co ʒihi Jesucristo ojí nĉha listo,

⁸ co jehe nĉhinovia mé vayé nĉha joachaxin de vengá nĉha tti lontto de ná manta anto fino que dinhi lino; co ʒonhi mancha chonda lontto mé, co hasta jitonguixima lontto.

Ixin jehe tti lino fino mé rroĉho tti vida nao que chonda cain chojni Dios.

⁹ Cottimeja jehe ángel mé ndachjenji na janha:

—Jaha ttentaxin janhi: “Anto ʒhjoin para ixin cain tti chojni que Dios nichjé ixin tsji ngain quiai tti tsottehe Jesucristo, tti Colecoe Dios.”

Co ndachjenji na ángel mé:

—Cain jihu palabra ndoa que ndaĉho Dios.

¹⁰ Janha joarittoxin nttajochjihna ngaca rotté ángel para rrojinttsayá, pero jehe ndachjenji na:

—Ncheha yá, ixin janha jehó ná ninchehe ʒé Dios, jańá inchin jaha conixin cain chojni que ditticaon cain tiempo tti ndoa que cjoago Jesús. Mexinxin jaha nchesayehe jehó Dios.

Ixin jehe tti joajna ndoa yá que cjoago Jesús, mé tti nchenichja cain chojni Dios joajné jehe.

Tti jitaha conxin coroa

¹¹ Cottimeja vicon ngajni jiʒangué co cononxin ná conxin roa, co tti jitaha va dinhi: jehe tti nchehe ʒé Dios conixin ansén, co tti ndoa. Ixin jehe ttetonha co tteto ngain guerra pero nao inchin jiquininxin.

¹² Jmacon chojni mé conguixin inchin neje ʒohi, co ngataha já jidicaoxin tsje corona, co jitaxin ná nombre nganito que jehó jehe chonxin nombre mé.

¹³ Chojni mé jingá ná lontto que diguingaxin jni, co nombré chojni mé, mé tti Palabré Dios.

¹⁴ Co terroé xisoldado de ngajni, tengá xa lontto de lino anto fino, co roa lontto mé co ʒonhi jinche yá lontto, co tetaha xa joxon conxin coroa.

¹⁵ Co jehe tti dinhi Palabré Dios, mé de ngain rroha jidaĉhjexin ná espada anto yao, para sincheninxin chojni de cainxin nación; co tsetonhe cain nación jihu inchin conixin ná nttacotto de chia. Co jehe sinchejuzguehe cain nación jihu inchin tti deninxin ttouva conixin rotté, co jehe mé sincheguihi cain nación tti vino que saĉhjenguixin ttouva, pero mé rroĉho que jehe tti sinchegayé na tti castigo anto soji que ttixin de ngain Dios tti anto dońahe na co tti chonda cainxin joachaxin.

¹⁶ Co nganito tti manta que jitsá chojni mé, co nganito rotté tetaxin nombre jihu: “Rey de cainxin rey, co tti Ttetonha de cain tti ttetonha.”

¹⁷ Cottimeja janha vicon ná ángel que tajingattjen ngataha nchanho, co coyaotte anto soji ngain cain conttoa que tjanganga para noi, co ndaĉho:

—Ķacoi ra co űatte ra para ngain tti cena de Dios,

¹⁸ para sintte ra nntaohe cain rey, co nntaohe cain xigeneral, co nntaohe cain xí ĉhintto, co nntaohe conxin, conixin nntaohe xitetaha va, co nntaohe cain ĉhojni masqui ĉhojni que te libre o esclavo, co de ĉhojni nĉhinnĉhin co yeye.

¹⁹ Cottimeja janha vicon tti coxigo jianha conixin cain rey que ttetonha ngataha nontte, conixin cain xisoldadoe rey mé. Cain na űatte na para tsetocaho na jehe tti jitaha conxin coroa conixin cain xisoldadoe.

²⁰ Jehe tti coxigo jianha mé viaxinhi va ngain cárcel, conixin tti vandaĉho ixin jehe ná tti nichja joajna que vagayé de ngain Dios, pero jeha ndoa. Co jehe mé tti joinchehe tsje milagro ngattoxon con coxigo mé. De ixin jehe cain milagro mé, jehe tti jeha ndoa tti nichja mé, joincheyehe cain tti ĉhojni que vittoexin coá marqué coxigo jianha co joinchecoanxinhi na retratoe va. Cottimeja jehe coxigo jianha mé conixin jehe tti jeha ndoa tti nichja, jamé techon savinttetsingangui tti űohi que jichexin conixin azufre.

²¹ Co tti icha ĉhojni venxin na conixin tti espada que vaĉhjexin de ngain rroha jehe tti jitaha conxin coroa, co cainxin conttoa hasta cojexin va nntaohe cain ĉhojni mé.

20

Tti mil nano

¹ Después janha vicon ná ángel que jixincanjinxin de ngajni conixin llavé tti tsaga anto nihnga co jiyá ná cadena anto jie.

² Jehe ángel jiji tse jehe tti conché mé, tti conché que ovehe desde sé co jehe mé tti inĉhínji co dinhi Satanás. Co ángel coiaxin va conixin cadena mé para mil nano.

³ Co joancá va ngain tti tsaga anto nihnga, co nntiha coiaxinhi va. Co cointtohe ná sello ngain puerté tsaga mé para que isinĉeyehe va ĉhojni de cainxin nación hasta que sattoja mil nano. Co después de tti mil nano mé, chonda que rroxindaguehe va nĉhion tiempo.

⁴ Cottimeja vicon tti tsje nntaxintaon importante, co nntiha tatetaha ĉhojni que vayé joachaxin para sinchejuzgá. Cai janha vicon almé cain tti ĉhojni que ĉhinji já ixin ndache na ĉhojni tti joajné Dios que cjoago Jesús. Cain ĉhojni mé joinchecoanxinha na tti coxigo jianha ni retratoe va ni vittoexinha na coá na marqué va nganito nntattjen na o nganito rá na. Janha vicon xechon cain ĉhojni jiji co jehe na conixin Jesucristo coetonha na para mil nano.

⁵ ĉhojni mé tti saho ĉhojni que rroxechon. Pero tti ni icha que vintgueñe ixechonha na hasta después de tti mil nano mé.

⁶ ¡Anto ĉhojni co jian tequininxin para ngain Dios cain tti ĉhojni que rroxechon ngain jehe tti saho tiempo que rroxechon ĉhojni! Tti yoxin nntiha que ndadenhe ni ichondaha ni ná joachaxin ngain na, sino que jehe na sintte na dána para ngain Dios co ngain Jesucristo, co jehe na conixin Jesucristo tsetonha na para mil nano.

⁷ Co are satto jehe tti mil nano mé, Satanás rroxindaguehe co saĉhjexin de ngain tti siaxinhi,

⁸ co saĉhje para sincheyehe Gog co Magog, rroĉho sincheyehe ĉhojni de cainxin nación de ngoixin mundo, co satse cain xisoldadoe de ngain ĉhojni

que jehe sincheyehe para ngain guerra, co cain xisoldado jihi anto tsje xa inchin nchise ngain ndachaon.

⁹ Co coani xa hasta tti jicaxin nontte, co vixindanji xa tti sín chojni Dios co tti ciudad que Dios anto rinao. Pero Dios rroanha xohi de ngajni, que cjoaga cainxin xa.

¹⁰ Co Dios rroanha inchínji, tti joincheyehe cain xisoldado mé, para ngatte ndachaon xohi que jichexin azufre, tti orroanha coxigo jianha conixin tti jeha ndoa ixin vayé joajné Dios. Nttiha rroche na de nchanho co tte para cainxin tiempo.

Tti chojni que goenhe juzgado ngain tti nttaxintaon roa

¹¹ Cottimeja janha vicon ná nttaxintaon anto jie co roa, co cai vicon tti jitaha nttiha. Ngattoxon con mé, ndavitján nontte co ngajni, co ixonhi lugar vehe para rroquehe cayoi cosa jihi.

¹² Co janha vicon cain chojni que ndavenhe, tti yeve co tti nchinnchin, tatengattjen na ngattoxon con Dios. Co xiré cainxin libro, conixin iná libro cai, que mé tti libro que jitaxin nombré cain tti chojni que chonda iná vida naroaxin. Cain chojni que ndadiguenhe, mé goenhe na juzgado inchin jehe na joinchehe na are vinttechon na, inchin tetaxin ngain cain libro mé.

¹³ Ndachaon joanjo nda cain chojni que ndavenxin ngain nda co tti ndadenhe ni, co tti lugar que ttji cain chojni que ndadenhe, cayoi mé joanjo cain chojni que ndavenhe co te nttiha. Co cain chojni mé goenhe na juzgado; cada na inchin jehe na joinchehe na are vinttechon na.

¹⁴ Cottimeja tti ndadenhe ni, co tti lugar que ttji cain chojni que ndadenhe, cayoi mé savinttjiate ndachaoen xohi. Jehe xohi jihi rrocho tti yoxin tiempo que ndadenhe ni,

¹⁵ co nttiha vinttjiate cain tti chojni que tetaxinha nombré ngain tti libro que tetaxin nombré cain tti chojni que chonda iná vida naroaxin.

21

Ngajni naroaxin co nontte naroaxin

¹ Después janha vicon ná ngajni naroaxin co iná nontte naroaxin, ixin tti saho ngajni co tti saho nontte ndavitján, co iveha ndachaon.

² Co janha Juan, vicon tti ciudad santa, tti Jerusalén naroaxin, que jixin-canjinxin de ngajni, tti ttjen Dios. Ngoixin ciudad mé anto chjoin jí inchin ná xannovia chjoin diguitoxinhi para tsottehe xan ngain xixihi xan.

³ Co coian ná tté ángel que joixin de ngajni co ndacho sén:

—Tsjexin, Dios jí jai ngayé chojni. Jehe sehe ngayé na, co jehe na sintte na chojni jehe, co jehe Dios mismo sehe ngain na para sehe Dios de jehe na.

⁴ Dios sinchexema cain ndacon na, co isenha na, ni irrotsjangaha na, ni iseha joachjaon, ni ixonhi tti tsín na, ixin cain tti vehe are saho, mé ovatto.

⁵ Cottimeja jehe tti jitaha nttaxintaon icha importante ndacho:

—Tsjexin, janha nttachjian cain cosa naroaxin.

Cai ndacho:

—Jaha ttentaxin cain jihi, ixin cain palabra jihi ndoa co nchao rrochonda ra confianza ngain palabra jihi.

⁶ Después ndachjenji na:

—Onchao jí cain. Janha tti icha saho varichon de cainxin cosa, co janha tti sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra. Tti chojni que denhe jinda janha rrochjaha

chojni mé jinda para sihi, co jinda mé danjo nda iná vida naroaxin, co xonhi nttacobra chojni mé.

7 Tti chojni que tsixinhi de sincheha cosa jianha sayé cain jihi inchin herencia, co janha sarihi Dios de chojni mé co jehe sehe xanhna.

8 Pero cain tti chojni que xaon para ndačo ixin janha amigoe na, co tti chojni que ditticaonha nganji na janha, co tti chojni jianha, co tti chojni que dantsjehe vidé icha chojni, co tti chojni que chonda nchicoxe o xicoxe, co tti chojni que dantonga icha chojni, co tti chojni que nchesayehe ídolo, co cain chojni mentiroso; cain chojni mé chonda na que tsji na ngain tti jiche xohi conixin azufre, co mé rročo tti yoxin ntiha que ndasenne na.

Tti Jerusalén naroaxin

9 Cottimeja joí ná de tti yáto ángel que tteyá tti yáto vaso que tecaon tti último yáto castigo. Co ángel mé ndachjenji na:

—Xacoi, co tsjagoha xannovié Colecoe Dios.

10 Cottimeja are janha xa vicon tti cjoagohna Espíritu Santo, jehe ángel mé sacjoinha ngataha ná jna anto jie co noi jna mé, co de ntiha cjoagonanxin Jerusalén, tti ciudad santa que jixincanjinxin de ngajni, tti ttjen Dios.

11 Jehe ciudad mé jitonguixima de ixin chíxo que chonda Dios, co tti jehe jitonguixin mé inchin ná xo que anto fino, inchin ná xo que dinhi jaspe, que xo mé nchao dicondoxin ni xo inchin xoXao.

12 Ngandanji ciudad mé jindanji ná ttjarioho jie co noi co jichonda tteyó puerta co naná ángel jinda ngain cada puerta mé. Co nganito naná puerta mé tetaxin nombré tti ná tteyó grupoe chojni Israel.

13 Jí ní puerta lado tti chinxin nchanho, co ní puerta lado norte, co ní puerta lado sur, co ní puerta lado tti diataonxin nchanho.

14 Co jehe tti ttjarioho jie que jindanji ciudad mé jichonda ttjarioho tteyó xo inchin de base, co nganito naná xo mé tetaxin nombré tti ná tteyó representanté jehe tti Colecoe Dios.

15 Tti ángel que jinichja nganji janha jiyá ná nttacotto de oro para joattechoaxin ciudad mé conixin ttjarioe co cain puerta que jichonda ttjario.

16 Ciudad mé cuadrada; rročo ixin tti jininxin ciudad Xajeho inchin tonxin ciudad. Jehe ángel mé joattechoha ciudad conixin nttacottohe, co jininxin ciudad dos mil doscientos kilometro, co inchin jininxin cai noinxin, co cai tonxin ciudad Xajeho cai.

17 Cottimeja joattechoha ángel mé tti ttjarioho que jindanji ciudad, co ttjarioho mé jichonda sesenta y cuatro metros de noinxin. Angel mé joinchegonda medida que dattechoaxin chojni ntihi ngataha nontte.

18 Jehe ttjarioho que jindanji ciudad mé diconchjian joxon xo fino que dinhi jaspe. Co ciudad diconchjian joxon oro, co jitsjehe inchin xoXao que xonhi jinche yá.

19 Co tti tteyó xo que te de base ngain tti ttjarioho que jindanji ciudad, cain xo mé ditsonji xo de cainxin clase de xo fino: tti xo saho ditsonji de jaspe, xo yoxin conixin zafiro, xo ninxin conixin ágata, xo nonxin conixin esmeralda.

20 Xo naonxin conixin ónice, co xo incjaonxin conixin cornalina, co xo yatoxin conixin crisólito, co xo jninxin conixin berilo, co xo nanxin conixin topacio, co xo tetaxin conixin crisoprasa, co xo ttejngoxin conixin jacinto, co xo tteyoxin conixin amatista.

²¹ Tti tteýo puerta, mé tteýo perla, co cada puerta diconchjian de nacoa perla. Co tti nttiha icha importante de ciudad mé jia joxon oro, co inchin xoxao que nchao dicondoxin ni.

²² Nttiha ngain ciudad mé janha viconha ni ná nihngo, ixin Dios, tti chonda cain joachaxin, mé tti nihngo para ixin ciudad mé conixin jehe tti Colecoe.

²³ Ciudad mé rrogondeha nchanho ni conittjao para sinchengasenhe, ixin mero chíxo que Dios chonda nchengasán ngain ciudad mé, co jehe Colecoe, mé tti xohi para ixin ciudad mé.

²⁴ Chojni de cain nación que chonda iná vida naroaxin, cain chojni mé ngoixin tti chji na chonda ná joadingasán que danjo ciudad mé. Co cain rey de ngoixin mundo tsiaho ngain ciudad mé cain cosa importante que jehe chonda co sinchesayehe ciudad mé.

²⁵ Cain puerta que jichonda ttjarieo ciudad mé sijeha are nchanho, co nttiha xonhi ttie sehe.

²⁶ Co nttiha sicao na cain cosa importante de cainxin nación, co cain tti tosayexin cain nación jihí.

²⁷ Pero xonhi tiempo sixinhi nttiha cosa ttjoaha, ni ná chojni que nchehe cosa jianha o que ncheyehe icha chojni choha sixinhi nttiha. Sino que jehó tti chojni que tetaxin nombré ngain tti libro que tetaxin nombré cain chojni que chonda iná vida naroaxin, co Colecoe Dios jichonda libro mé. Jehó chojni mé tti sixinhi ciudad mé.

22

¹ Cottimeja jehe ángel mé cjoagohna ná río de jinda que xonhi jinche chonda, co jinda mé tti danjo iná vida naroaxin. Jinda mé anto dicondoxin ni nda inchin ná xoxao, co jida chjexin jinda mé de ngain nttaxintaoen Dios conixin de ngain Colecoe.

² Ngosine tti nttiha icha importante de ciudad mé co cayoxin ngandehe río mé te tti ntá que danjo vida. Co ntá mé danjo nta ttochjoin tteýo nttiha ngá nano ixin danjo nta ttochjoin cada conittjao. Co qué ntattochjoin mé jian ca para xingamenxin chojni de cainxin nación.

³ Nttiha seha chojni ni xonhi cosa que Dios joinchecondená. Nttiha sehe nttaxintaoen Dios conixin jehe Colecoe ngain ciudad mé, co ninchehe xé Dios co Jesucristo sinchecoanxinhi na jehe.

⁴ Jehe na sicon na ngá con Jesucristo co jehe sicon ngá con na jehe na, co nganito nttattjen na setaxin nombré jehe.

⁵ Nttiha ixonhi naxin xehe sehe, co cain chojni que sintte nttiha isondeha na xohi de lámpara, ni de nchanho, ixin Dios tti chonda cain joachaxin, jehe tti sinchengasañehe na, co jehe na nitsetonha para cainxin tiempo.

Ochian jói tiempo que Jesucristo tsí iná

⁶ Cottimeja ángel mé ndachjenji na janha:

—Cain palabra jihí ndoa co nchao sehe confianza ngain palabra jihí. Co jehe tti chonda cain joachaxin, que mé Dios mismo que nchenohe cain chojni que nichja joajné, jehe Dios rroanha ángel de jehe para joicjagoe cain ninchehe xé tti siconhe toin.

⁷ Co Jesucristo nda cho:

—Janha sihi toin!

¡Anto chjoin para ixin cain tti chojni que nchehe caso joajné Dios que jitaxin ngain libro jihí!

⁸ Janha Juan coian co vicon cain cosa jiji. Co después de coian co vicon, joarittoxin nntajochjihna ngaca rotté ángel tti cjoagohna cain jiji para rrojinttasayá.

⁹ Pero jehe ndachjenji na:

—Ncheha yá, ixin janha jehó ná ninchehe xé Dios, jañá inchin jaha conixin cain chojni que nichja de ixin Dios conixin cain chojni que nchehe caso tti jitaxin ngain libro jiji. Jaha nchesayehe Dios.

¹⁰ Cai ndachjenji na ángel mé:

—Jaha, ttemaha joajné Dios que jitaxin ngain libro jiji, ixin ochian jói tiempo que siconhe cain tti jitaxin nntihi.

¹¹ Mexinxin tančhanda que tti chojni jianha sinchehe na sigue nchehe na tti jianha, co tti chojni ttjoaha sinchehe sigue ngain tti ttjoaha; pero tti chojni jian sinchehe na sigue de nchehe na tti jian, co tti chojni que coequininxin para ixin Dios sinchehe na sigue de ditticaon na jian cainxin tiempo ngain Dios.

¹² Co Jesucristo ndačho:

—Ján, janha sihi toin. Co siquian premio que rrochjaha cada chojni, inchin jehe na joinchehe na.

¹³ Janha tti icha saho varichon de cainxin cosa co janha tti sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra.

¹⁴ Anto čhjoin para ixin tti chojni que ttjén lonttoe para rrochonda na joachaxin de sine na ttotchjoin de ngain tti nntá que danjo vida, co jamé nchao sixinxin na ngain cain puerté ciudad mé.

¹⁵ Pero tti chojni jianha sittohe na ndoja conixin tti chojni que dantonga icha chojni, co tti chojni que chonda nčhicoxehe o xicoxehe, co tti chojni que dantsjehe vidé icha chojni, co tti chojni que nchesayehe idolo, conixin cain tti chojni que anto rinao ncheyehe icha chojni.

¹⁶ Co Jesucristo ndačho:

—Janha Jesús orroanha ángel de janha para joinchenohe cain jiji chojni de cain nihngo. Janha tti joixin de ngain razé rey David, co janha tti conotse que anto soji nchengasán are nntoyo.

¹⁷ Espíritu Santo co čhihi Coleco ndačho:

—Ķacoi.

Co cain tti ttinhi jiji ndačho:

—Ķacoi.

Cain ra xó senhe ra jinda co xó sinoa ra sihi ra, Ķacoi ra co sihi ra jinda que danjo iná vida naroxin, co xonhi tomi tsjenga ra hna.

¹⁸ Janha Juan rindačhjan janhi ngain cainxin chojni que ttinhi co nchehe caso joajné Dios que jitaxin ngain libro jiji: Si čhonja chojni sincheoenhe na chojni icha cosa de ixin tiempo que tsí que jehó cosa que jitaxin nntihi, Dios rrochjé na icha tsje castigo de tti cain castigo que jitaxin ngain xón jiji.

¹⁹ Co si čhonja chojni santsjehe na masqui nchion de ngain joajné Dios que jitaxin ngain xón jiji, Dios santsjehe na tti parte que jehe na chonda na ngain tti libro tti tetaxin nombré cain chojni que chonda na iná vida naroxin, co santsjehe na tti parte que jehe na chonda na ngain tti ciudad santa. Co xón jiji nichja de ixin libro mé co ciudad mé.

²⁰ Tti ndačho cain cosa jiji, jehe ndačho:

—Ján, janha sihi toin.

Amén. ¡Ķacoi, soixin Jesús!

²¹ Que Jesucristo, tti chonda cainxin joachaxin para ixin ján na, sinttan-chaon cainxin ra. Amén.